

MESYUARAT PERTAMA, PENGKAL KEDUA
PARLIMEN KELIMA BELAS
2023

13 FEBRUARI HINGGA 4 APRIL 2023
SOALAN NO. 1 HINGGA 693

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : DR. ABD GHANI BIN AHMAD [JERLUN]

SOALAN

Minta **PERDANA MENTERI** menyatakan:

- (a) Statistik terkini muafak dan muafak yang kembali murtad mengikut pecahan negeri di seluruh Malaysia; dan
- (b) Apakah usaha-usaha yang dilakukan untuk memastikan akidah Islam dalam kalangan muafak kekal.

JAWAPAN:

**YB SENATOR DATO' SETIA DR. HAJI MOHD NAI'IM BIN HAJI MOKHTAR
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. Untuk makluman Tuan Yang di Pertua, jumlah terkini muallaf seluruh Malaysia adalah seramai 61,449 orang. Jumlah muallaf yang kembali murtad tidak dapat direkodkan kerana jumlah tersebut hanya dapat diperoleh daripada Mahkamah apabila terdapat permohonan untuk keluar Islam.
2. Di bawah Enakmen Pentadbiran Agama Islam yang digunapakai di beberapa buah negeri, telah memperuntukkan bahawa *seseorang Islam tidak boleh keluar Islam atau disifatkan telah meninggalkan agama Islam sebagai agamanya melainkan jika telah memperolehi suatu pengisytiharan bagi maksud itu daripada Mahkamah Tinggi Syariah.*
3. Bagi memastikan golongan muallaf terus kekal sebagai penganut agama Islam, pelbagai langkah telah diambil agar golongan ini tidak terkesan dengan unsur-unsur negatif yang membawa kepada gejala murtad.
4. Sehubungan itu, Jabatan Kemajuan Islam Malaysia (JAKIM) telah melaksanakan kerjasama dengan Jabatan Agama Islam Negeri (JAIN) dan Majlis Agama Islam Negeri (MAIN) melalui beberapa inisiatif seperti berikut:
 - i. JAKIM melalui Institut Pengajian Islam dan Dakwah Sabah (Kampus Kudat) dengan kerjasama Cawangan Akademik IPDAS Keningau telah membangunkan kurikulum Sijil Asas Islam Malaysia (SAPIM) kepada tiga (3) kumpulan sasar iaitu Muallaf, Muslim Pedalaman dan Muslim Asal yang memerlukan pengetahuan asas fardhu ain dan kifayah. Selain itu, program ini juga dijangkakan akan diperluaskan

NO. SOALAN: 1

pelaksanaannya ke masjid-masjid sekitar Negeri Sabah. Program yang sama akan turut diperkenalkan di pusat – pusat latihan islam di bawah seliaan JAKIM yang lain termasuk Institut latihan Islam Malaysia (ILIM, Bangi dan Jelevu) dan Institut Latihan Islam Malaysia Wilayah Timur (ILTIM). Melalui penganjuran program seumpama ini akan membuka ruang yang luas dan peluang kepada umum untuk mengikuti pembelajaran asas agama islam dengan lebih komprehensif.

- ii. Pelaksanaan program bagi menyantuni mualaf seperti program Sambutan Tahun Baru Cina, simposium dan sebagainya bagi mendekati golongan mualaf.
- iii. Penyelarasan dengan Jabatan Agama Islam Negeri (JAIN) berhubung hal ehwal mualaf bagi memastikan kebajikan mualaf terjaga.
- iv. Jabatan Agama Islam Negeri (JAIN) yang menjaga hal ehwal mualaf di negeri turut melaksanakan kelas pengajian Fardhu Ain bagi memberi pendedahan ilmu kepada mualaf.
- v. Lembaga Zakat Negeri mengambil inisiatif membantu menyediakan penginapan sementara untuk saudara baru yang memerlukan serta bantuan kewangan bagi memudahkan mereka menjalani kehidupan mengikut syariat Islam.

Sekian, terima kasih.

MAKLUMAT TAMBAHAN

Statistik yang dikeluarkan Jabatan Kehakiman Syariah Malaysia (JKSM), sebanyak **1979** permohonan pengisytiharan status agama telah yang diterima oleh mahkamah syariah dari seluruh Malaysia dari tahun 2013 hingga 2023 mengikut pecahan seperti berikut :

Negeri	2013	2014	2015	2016	2017	2018	2019	2020	2021	2022	2023	Jumlah
Johor	4	0	2	2	3	2	6	2	1	4	1	27
Kedah	1	3	7	4	3	2	5	8	2	2	0	37
Melaka	4	0	2	2	2	6	3	1	2	5	2	29
Negeri Sembilan	25	25	17	24	19	25	34	13	9	18	2	211
Pahang	0	3	2	1	2	0	1	3	1	1	0	14
Perak	20	16	31	16	29	19	29	19	21	16	0	216
Perlis	0	1	2	1	1	0	1	0	0	0	0	6
Pulau Pinang	5	3	3	2	5	8	6	10	10	2	1	55
Sabah	8	8	4	67	94	108	102	63	36	77	11	578
Sarawak	0	0	0	0	0	0	47	9	0	0	0	56
Selangor	34	36	68	71	70	61	69	48	48	46	3	554
Terengganu	2	0	0	0	0	0	0	0	0	0	0	2
Wilayah Persekutuan	28	13	24	25	23	28	14	9	15	15	0	194
Jumlah	131	108	162	215	251	259	317	185	145	186	20	1,979

SOALAN NO : 2

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : DR. ABD GHANI BIN AHMAD (JERLUN)

SOALAN

DR. ABD GHANI BIN AHMAD (JERLUN) minta **MENTERI
KEMAJUAN DESA DAN WILAYAH** menyatakan :

- (a) berapa jumlah jalan-jalan pertanian di bawah Lembaga Pertanian Muda (MADA) yang didaftarkan di bawah Sistem Maklumat Rekod Jalanraya Malaysia (MARRIS); dan
- (b) berapa peruntukan penyelenggaraan jalan-jalan di Kedah bagi tahun 2022.

JAWAPAN

Untuk makluman Yang Berhormat, di bawah Kementerian ini terdapat dua (2) program jalan raya iaitu program Jalan Luar Bandar (JALB) dan program Jalan Perhubungan Desa (JPD) yang turut dikenali sebagai Jalan Kampung. Selepas jalan berkenaan siap dibina atau dinaiktaraf, jalan raya ini akan diserahkan semula kepada Kerajaan Negeri untuk didaftarkan di bawah MARRIS bagi tujuan penyelenggaraan berterusan. Ini bagi memastikan keadaan jalan yang siap dibina sentiasa selamat dan selesa untuk dilalui oleh pengguna.

Bagi projek-projek Jalan Luar Bandar (JALB), agensi yang bertanggungjawab menyelenggara jalan tersebut adalah JKR Negeri. Manakala bagi Jalan Perhubungan Desa (JPD), penyelenggaraan jalan ini dilaksanakan oleh Pejabat Daerah. Bagaimanapun, pihak JKR Negeri dan Pejabat Daerah tidak membaiki dan memulihkan kerosakan lampu, kabel dan *feeder pillar* yang disebabkan kecurian kerana ianya di bawah tanggungjawab syarikat utiliti elektrik.

Untuk makluman Yang Berhormat juga, Lembaga Pertanian Muda (MADA) adalah agensi di bawah Kementerian Pertanian Dan Keterjaminan Makanan (MAFS). Komponen infrastruktur yang penting di kawasan pertanian adalah rangkaian jalan pertanian/ jalan ladang yang berperanan sebagai akses bagi memudahkan penghantaran input dan hasil ladang, lalu lintas jentera ladang serta perhubungan antara desa dan bandar. Di Kawasan Muda, terdapat sejumlah 5,078.49km jalan pertanian iaitu 3,949.63km bagi Kawasan Muda negeri Kedah dan 1,128.86km jalan ladang di Kawasan Muda negeri Perlis.

Sehingga 31 Disember 2022, sejumlah 696.09 km jalan pertanian MADA (14% daripada keseluruhan panjang jalan) telah didaftarkan di bawah Sistem Maklumat Rekod Jalan Raya Malaysia (MARRIS).

SOALAN NO : 2

Penyenaraian jalan ladang ini ke dalam sistem MARRIS akan membolehkan MADA mendapat manfaat dari segi peruntukan penyelenggaraan jalan dari semasa ke semasa. Perincian panjang jalan pertanian MADA yang berdaftar di dalam MARRIS mengikut parlimen adalah seperti di **Jadual 1**.

Jadual 1: Jumlah Panjang Jalan Pertanian MADA Yang Berdaftar Dengan MARRIS

Bil.	Parlimen	Panjang Jalan (km)
1.	Jerlun	130.11
2.	Kubang Pasu	12.60
3.	Pokok Sena	72.57
4.	Alor Setar	33.41
5.	Kuala Kedah	124.36
6.	Pendang	69.01
7.	Jerai	6.70
Jumlah Kedah		448.76
8.	Kangar	31.86
9.	Perlis	215.47
Jumlah Perlis		247.33
Jumlah MADA		696.09

Untuk makluman Yang Berhormat juga, berdasarkan semakan dengan pihak Kementerian Kerja Raya pula, jumlah panjang Jalan Persekutuan di Negeri Kedah yang disenggara oleh Kementerian berkenaan adalah sepanjang 1,119.327km.

Jumlah keseluruhan peruntukan yang telah diluluskan bagi kerja-kerja penyelenggaraan Jalan Persekutuan di Negeri Kedah bagi tahun 2022 adalah sebanyak RM69.8 juta. Kerja-kerja penyelenggaraan ini merangkumi penyelenggaraan rutin, penyelenggaraan jambatan, penyelenggaraan berkala pavemen dan bukan pavemen dan kerja-kerja kecemasan yang telah dilaksanakan sepanjang tahun 2022.

SOALAN NO : 2

Selain itu, pihak Kementerian Kewangan memaklumkan bahawa Peruntukan Pemberian Penyenggaraan Jalan Negeri merupakan ketetapan di bawah Peruntukan Perkara 109(1)(b), Perlembagaan Persekutuan yang bertujuan membantu Kerajaan Negeri menyenggara jalan negeri di negeri masing-masing. Pemberian Penyenggaraan Jalan Negeri ini disalurkan oleh Kerajaan Persekutuan secara terus kepada Kerajaan Negeri pada setiap bulan.

Dalam hal ini, Kerajaan Negeri hendaklah menubuhkan satu Kumpulan Wang bagi memperakaunkan terimaan dari Pemberian Kerajaan Persekutuan bagi tujuan penyenggaraan jalan negeri dan ditubuhkan di bawah Seksyen 10 Akta Tatacara Kewangan 1957 (semakan 1972) (Akta 61) atau mana-mana undang-undang negeri yang berkaitan.

- (a) Jumlah jalan-jalan pertanian di bawah Lembaga Kemajuan Pertanian Muda (MADA) yang diserahkan kepada Kerajaan Negeri Kedah dan didaftarkan dibawah sistem Maklumat Rekod Jalanraya Malaysia (MARRIS) adalah sebanyak 148 batang Jalan. Merangkumi Daerah Kota Setar sebanyak 56 batang jalan, Daerah Kubang Pasu sebanyak 63 batang jalan, Daerah Pendang 17 batang jalan, Daerah Yan 1 batang jalan, dan Daerah Pokok Sena 11 batang jalan; dan
- (b) Jumlah peruntukan Pemberian Penyenggaraan Jalan Negeri kepada Negeri Kedah bagi tahun 2022 adalah berjumlah RM286.8 juta dan amaun ini telah disalurkan sepenuhnya kepada Kerajaan Negeri Kedah.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : DR. ABD GHANI BIN AHMAD [JERLUN]

SOALAN

DR. ABD GHANI BIN AHMAD [JERLUN] minta **MENTERI PERTANIAN DAN KETERJAMINAN MAKANAN** menyatakan jumlah pembekal padi benih yang berdaftar dengan Kementerian Pertanian dan Keterjaminan Makanan dan nyatakan jumlah subsidi yang diberikan kepada pihak berkenaan.

JAWAPAN

Tuan Yang Di Pertua,

Untuk makluman Ahli Yang Berhormat, bagi mengurangkan beban kos pengeluaran kepada pesawah, Kerajaan telah memperkenalkan program Insentif Benih Padi Sah (IBPS). Selain membantu pesawah, program ini bertujuan untuk menggalakkan pesawah menggunakan benih padi sah yang berkualiti, bermutu tinggi, rintang penyakit serta mengurangkan risiko padi angin. Melalui penggunaan benih padi sah, hasil pengeluaran padi dijangka dapat ditingkatkan.

Berdasarkan kepada kawasan bertanam padi seluas 520,000 hektar di Semenanjung Malaysia, anggaran jumlah benih padi yang diperlukan bagi dua (2) musim penanaman setahun ialah sebanyak 72,000 tan metrik. Jumlah ini adalah berdasarkan kepada keperluan benih padi sehektar sebanyak 140 kilogram (7 beg per hektar x 20kilogram benih padi sah).

Pada ketika ini, sebanyak 12 syarikat pengeluar benih padi sah telah dilantik bagi membekalkan benih padi sah kepada pesawah melalui pengeluaran lesen membeli padi (bagi maksud dibuat biji benih). Pelantikan ini dibuat oleh Ketua Pengarah Kawalselia Padi dan Beras bagi tempoh tiga (3) tahun iaitu 2021 hingga 2023. Sebanyak RM75 juta peruntukan tahunan telah disediakan bagi program ini berdasarkan keperluan sebenar benih padi sah di Semenanjung Malaysia.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : DR. ABD GHANI BIN AHMAD [JERLUN]

SOALAN

DR. ABD GHANI BIN AHMAD [JERLUN] minta **MENTERI PERTANIAN DAN KETERJAMINAN MAKANAN** menyatakan jumlah syarikat Padi Beras Nasional Berhad (BERNAS) yang masih beroperasi sehingga kini mengikut negeri dan nyatakan statistik jumlah pembelian padi antara BERNAS dan syarikat pengilang swasta.

JAWAPAN

Tuan Yang Di Pertua,

Untuk makluman Ahli Yang Berhormat, pada masa ini sebanyak 29 buah syarikat Padiberas Nasional Berhad (BERNAS) yang masih beroperasi di seluruh negara. Terdapat tiga kategori kilang pemprosesan padi yang membeli padi daripada pesawah iaitu kilang BERNAS, kilang bumiputera dan kilang swasta. Kilang-kilang ini akan membeli padi daripada pesawah dan akan memproses sehingga menjadi beras. Dari segi statistik, jumlah pembelian padi oleh kilang BERNAS adalah sebanyak 157,000 tan metrik. Kilang bumiputera adalah sebanyak 183,000 tan metrik. Manakala bagi kilang swasta adalah sebanyak 1,233,000 tan metrik. Jumlah keseluruhan pembelian padi bagi tiga kilang utama pembelian padi ini adalah berjumlah 1,573,000 tan metrik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : LISAN

**DARIPADA : DATUK WETROM BIN BAHANDA
[KOTA MARUDU]**

TARIKH : 30 MAC 2023 (KHAMIS)

SOALAN

DATUK WETROM BIN BAHANDA [KOTA MARUDU] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah langkah dan perancangan Kementerian untuk memperluas senarai penerima bantuan Jabatan Kebajikan Masyarakat (JKM) disebabkan keciciran dalam menyenaraikan penduduk yang seharusnya layak menerima bantuan.

JAWAPAN

Tuan Yang di-Pertua,

1. Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) sentiasa proaktif dalam memastikan kebajikan dan keperluan kumpulan sasar terpelihara. Pelbagai inisiatif dilaksanakan untuk membantu golongan yang memerlukan agar bantuan yang disediakan dapat diberikan kepada mereka yang layak.
2. Antara usaha yang dilakukan untuk memastikan tiada keciciran bantuan Jabatan Kebajikan Masyarakat (JKM) kepada mereka yang layak termasuklah pengoperasian sebanyak **152** buah Pejabat Kebajikan Masyarakat Daerah (PKMD), Pejabat Kebajikan Masyarakat Jajahan (PKMJ), dan Pejabat Kebajikan Masyarakat Bahagian (PKMB) di seluruh negara yang menyediakan perkhidmatan di bawah JKM. Perkhidmatan ini termasuklah perkhidmatan berkaitan permohonan bantuan kewangan. Pemohon boleh hadir ke mana-mana PKMD yang terdekat dengan tempat tinggal mereka untuk mendapatkan perkhidmatan yang diperlukan di bawah JKM.
3. Pada masa yang sama, selari dengan kemajuan teknologi semasa, JKM telah mempermudah Prosedur Operasi Standard (SOP) permohonan bantuan. Pemohon kini digalakkan memohon secara atas talian, yang boleh dibuat melalui Sistem Pengurusan Bantuan Jabatan Kebajikan di laman sesawang <http://ebantuanjkm.jkm.gov.my>.
4. Di samping itu, JKM telah dan akan terus bekerjasama dengan pelbagai pihak, termasuklah agensi-agensi kerajaan persekutuan dan juga kerajaan negeri, para pemimpin setempat di peringkat negeri serta juga daerah melalui program-program seperti turun padang, ziarah kasih, jelajah (*outreach*) dan sebagainya. Melalui program yang dilaksanakan ini, bantuan yang bersesuaian dapat disalurkan kepada pihak yang memerlukan.

SOALAN NO : 5

5. Selain daripada itu, JKM juga menyediakan Perkhidmatan Talian Kasih 15999, yang merupakan talian bebas tol atau melalui Whatsapp 019-26 15999. Talian ini merupakan talian prihatin masyarakat yang dibuka kepada orang ramai bagi mendapatkan perkhidmatan yang diperlukan termasuk mendapatkan maklumat berkenaan bantuan-bantuan yang disediakan.

6. Masyarakat diluar, termasuk semua Ahli Yang Berhormat sendiri, boleh membantu untuk merujuk mana-mana kes yang berkeperluan di kawasan masing-masing untuk dibantu dan diberi bantuan yang bersesuaian mengikut syarat-syarat dan kelayakan yang ditetapkan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TAN SRI HAJI ABDUL HADI BIN
AWANG [MARANG]**

SOALAN

TAN SRI HAJI ABDUL HADI BIN AWANG [MARANG] minta **PERDANA MENTERI** menyatakan apakah usaha yang telah dilakukan oleh Kerajaan untuk memisahkan jawatan dan peranan Pendakwa Raya daripada Peguam Negara untuk mengukuhkan kebebasan Pendakwa Raya.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang Di-Pertua,

1. Untuk makluman Ahli Yang Berhormat, Mesyuarat Jemaah Menteri pentadbiran terdahulu pada 15 Jun 2022 telah bersetuju dengan syor Jawatankuasa Khas Kabinet Mengenai Anti-rasuah supaya Kertas Pertimbangan berkaitan Hasil Kajian Pengasingan Kuasa Pendakwa Raya dan Peguam Negara ditangguhkan kerana perkara ini melibatkan implikasi kewangan dan perundangan yang besar serta kajian yang lebih mendalam perlu dijalankan oleh Jabatan Peguam Negara (AGC).
2. Walaubagaimanapun, Kerajaan Perpaduan komited terhadap reformasi institusi, antara lainnya pengasingan fungsi Peguam Negara dan Pendakwa Raya untuk memastikan supaya pendakwaan adalah bebas daripada sebarang konflik kepentingan. Pada 7 Disember 2022, Jabatan Peguam Negara (AGC) telah memberikan taklimat berkenaan perkara ini termasuk cadangan langkah seterusnya yang perlu diambil.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TAN SRI HAJI ABDUL HADI BIN
AWANG [MARANG]**

SOALAN

TAN SRI HAJI ABDUL HADI BIN AWANG [MARANG] minta **PERDANA MENTERI** menyatakan sejauh mana usaha Kerajaan untuk memperkenalkan Akta Penggal Tetap Parlimen bagi memastikan pembubaran Parlimen dan DUN hanya dilakukan apabila penggalnya tamat bagi mengurangkan ketidaktentuan politik negara.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang Di-Pertua,

1. Fasal (2) Perkara 55 yang wajar dibaca bersama Fasal (1) dan (1A) Perkara 40 Perlembagaan Persekutuan (PP), kuasa untuk membubarkan Parlimen terletak pada Yang di-Pertuan Agong (YDPA), yang bertindak atas nasihat Jemaah Menteri atau nasihat seorang Menteri yang bertindak di bawah kuasa am Jemaah Menteri.
2. Apa-apa cadangan berkenaan perkara ini hendaklah dikaji terlebih dahulu memandangkan ia akan melibatkan pindaan kepada Perkara 55 PP serta menyentuh kuasa YDPA.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TAN SRI HAJI ABDUL HADI BIN AWANG
[MARANG]**

SOALAN

TAN SRI HAJI ABDUL HADI BIN AWANG [MARANG] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah tindakan Kerajaan dalam jangka masa pendek dan panjang untuk membangunkan projek tebatan banjir, khususnya dari sudut infrastruktur saluran dan tebatan banjir serta pembangunan lestari.

JAWAPAN

Tuan Yang di-Pertua,

1. Kerajaan telah merancang tindakan jangka pendek dan jangka panjang sistem pengurusan banjir di seluruh negara melalui pendekatan Pengurusan Banjir Secara Bersepadu atau *Integrated Flood Management* (IFM).
2. Pengurusan Banjir Secara Bersepadu ini akan mengimbangi kaedah Struktur dan Bukan Struktur secara optimum dalam melindungi dan mengurangkan risiko banjir sesuatu kawasan. Kaedah struktur yang digunakan termasuk peningkatan kapasiti saluran utama dan sungai, pembinaan empangan/takungan air pinggir sungai (TAPS), pembinaan Struktur Sabo, kolam takungan, lencongan sungai, pembinaan benteng banjir (*flood wall*) dan sistem pam.
3. Manakala kaedah bukan struktur akan memfokuskan kepada pengurusan dataran banjir, perancangan guna tanah, kawalan dan pematuhan pembangunan, sistem ramalan dan amaran banjir, peta banjir

dan pelaksanaan program kesedaran (*communication, education and public awareness*).

4. Selain itu, dalam usaha Kerajaan untuk mengurangkan risiko banjir di seluruh negara, Kementerian melalui Jabatan Pengairan dan Saliran (JPS) komited menjalankan sebanyak 93 projek Rancangan Tebatan Banjir (RTB) yang telah diluluskan di bawah RMKe-12 dengan kos berjumlah RM11.3 juta dalam *Rolling Plan* ke 3.

5. Pendekatan bukan struktur juga memainkan peranan penting dalam perancangan pengurusan banjir seperti pendekatan Pengurusan Lembangan Sungai Bersepadu atau *Integrated River Basin Management* (IRBM). Pendekatan IRBM ini memerlukan penglibatan semua pihak berkepentingan dalam pemuliharaan kuantiti dan kualiti sumber air yang merupakan kaedah terbaik dalam pengurusan lembangan sungai.

6. Sehingga kini, sebanyak 35 pelan IRBM telah disiapkan, manakala sebanyak 25 pelan IRBM sedang dan akan dilaksanakan di bawah RMKe-12. Di samping itu, sebanyak 12 pelan IRBM sedia ada akan dikaji semula bagi memastikan ianya selari dengan pembangunan semasa, selain melaksanakan 10 kajian *Total Maximum Daily Load* (TMDL) bagi sungai-sungai yang terpilih.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TAN SRI HAJI ABDUL HADI BIN AWANG
[MARANG]**

SOALAN

TAN SRI HAJI ABDUL HADI BIN AWANG [MARANG] minta **MENTERI PENDIDIKAN** menyatakan apakah langkah Kementerian untuk menyelamatkan generasi tercacir dalam pendidikan dan merapatkan jurang pembelajaran antara bandar dengan luar bandar, dan golongan berpendapatan tinggi dengan rendah.

JAWAPAN

Tuan Yang di-Pertua,

Kementerian Pendidikan Malaysia (KPM) merujuk definisi keciciran sebagai keciciran daripada sistem pendidikan iaitu murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat tempoh pendidikan.

Untuk makluman Ahli Yang Berhormat, KPM menyedari bahawa pandemik COVID-19 yang bermula pada tahun 2020 telah memberi kesan kepada keciciran murid. KPM amat memandang serius kepada isu keciciran dan pelbagai langkah diambil bagi mengurangkan kadar keciciran murid. Pihak KPM telah menyediakan Garis Panduan Mengurus Murid Berisiko Cicir di Sekolah (GPMBC) dan telah dikuatkuasakan ke semua sekolah kerajaan dan sekolah bantuan kerajaan. Objektif GPMBC ini adalah untuk membantu pihak sekolah mengenal pasti murid berisiko cicir serta mengurus murid berisiko cicir secara berkesan dan sistematik. GPMBC ini juga bertujuan untuk memastikan pemantauan murid khususnya murid berisiko cicir dapat dilaksanakan oleh pihak jabatan pendidikan negeri (JPN), pejabat pendidikan daerah (PPD) dan sekolah secara berterusan.

KPM turut menyediakan modul Serlahkan Keunggulan Diri (SUDI) sebagai panduan kepada sekolah untuk melaksanakan intervensi dalam menangani keciciran murid. Program Ziarah Prihatin turut dilaksanakan dengan mengadakan lawatan ke rumah murid bagi mengenal pasti dan mengesan punca keciciran murid serta memastikan masalah yang dihadapi oleh murid dapat ditangani. Melalui SUDI dan program ziarah, aktiviti sokongan yang sistematik dapat dilaksanakan secara berterusan bagi memastikan murid kekal bersekolah sehingga tamat persekolahan.

Selain itu, KPM juga telah menjalankan program *outreach* murid cicir di semua PPD dengan kerjasama komuniti setempat. Objektif program *outreach* murid cicir ini adalah memberi intervensi berfokus bagi membantu murid cicir untuk kembali bersekolah. Pada tahun 2022, program ini telah berjaya mengembalikan seramai 5,121 orang murid sekolah rendah dan

1,711 orang murid sekolah menengah ke sekolah.

KPM juga menyediakan pelbagai bentuk bantuan untuk murid seperti menyediakan Biasiswa Kecil Persekutuan, Rancangan Makanan Tambahan (RMT), Kumpulan Wang Amanah Pelajar Miskin (KWAPM), Bantuan Awal Persekolahan (BAP) dan Bantuan Pakaian Seragam Badan Beruniform (BPS). Bantuan seperti pemberian pinjaman buku teks, menyediakan khidmat guru bimbingan dan kaunseling, serta guru pemulihan turut disediakan bagi meningkatkan minat murid untuk meneruskan persekolahan.

KPM juga melaksanakan program Sekolah Model Khas Komprehensif 9 (K9). K9 merupakan sekolah yang memberi pendidikan mulai tahun 1 sehingga tingkatan 3. Matlamat utama sekolah komprehensif 9 atau K9 diwujudkan bagi menangani isu keciciran di kawasan pedalaman, terutamanya dalam kalangan murid Orang Asli dan Peribumi yang menghadapi kesukaran untuk meneruskan pendidikan ke peringkat menengah atas faktor lokasi ke sekolah menengah yang jauh, bentuk muka bumi yang mencabar dan sosio ekonomi keluarga. Sehingga kini terdapat sembilan buah sekolah K9. Setelah melihat kejayaan pelaksanaan K9, KPM telah meluaskan konsep sekolah komprehensif 9 kepada sekolah komprehensif 11 atau K11 iaitu pendidikan bermula dari tahun 1 sehingga tingkatan 5 di sekolah yang sama. Sebagai permulaan, KPM sedang melaksanakan rintis K11 di SK RPS Betau, Kuala Lipis, Pahang dan SK Long Bedian, Baram, Sarawak bermula pada sesi persekolahan 2023/2024.

Selain itu, terdapat kerjasama sekolah dengan ibu bapa dan komuniti dalam menyediakan bantuan sokongan kepada keluarga B40 seperti pemberian bantuan pakaian, makanan (gerobok rezeki) dan bantuan keperluan persekolahan dapat meringankan beban keluarga murid berpendapatan rendah. Penggembelangan segala sumber dipergiat antara agensi dan komuniti setempat seperti penghulu, Jabatan Kebajikan Masyarakat, majlis agama Islam, persatuan ibu bapa dan guru serta agensi swasta berkaitan dilaksanakan bagi membantu murid dan keluarga terlibat bagi meneruskan persekolahan.

KPM turut menambah lebih banyak bahan PdP melalui *Digital Educational Learning Initiative* Malaysia (DELIMa). Pelantar ini merupakan pusat rujukan sehenti yang mengandungi pelbagai aplikasi, perkhidmatan dan sumber pendidikan digital. Sehingga kini, KPM telah memuat naik 754 buku teks digital serta menyediakan sebanyak 3,568 video kurikulum, 263 video pedagogi dan 4,796 video DidikTV KPM. KPM juga telah menambah lebih banyak bahan PdP dalam pelantar DELIMa. KPM turut menggalakkan perkongsian video PdP dan video amalan terbaik hasil daya usaha dan kreativiti guru melalui portal CikgooTUBE dan Ruang Ilmu yang dikongsikan dalam DELIMa.

KPM yakin kerangka holistik yang dirancang dan sedang dilaksanakan ini membolehkan murid mengikuti PdP secara berkesan, seterusnya dapat menangani keciciran pembelajaran murid dan memastikan mereka kekal dalam sistem pendidikan negara.

Sekian, terima kasih.

RT01

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TAN SRI HAJI ABDUL HADI BIN
AWANG [MARANG]**

SOALAN

TAN SRI HAJI ABDUL HADI BIN AWANG [MARANG] minta **PERDANA MENTERI** menyatakan apakah pendirian Kerajaan untuk mengehadkan tempoh perkhidmatan Perdana Menteri, Menteri Besar, dan Ketua Menteri kepada maksimum 10 tahun bagi mengelakkan pemusatan kuasa berlebihan kepada jawatan-jawatan ini dan menjamin ketelusan pentadbiran negara.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, cadangan untuk mengehadkan tempoh perkhidmatan Perdana Menteri, Menteri Besar, dan Ketua Menteri kepada maksimum 10 tahun bagi mengelakkan pemusatan kuasa berlebihan kepada jawatan-jawatan ini dan menjamin ketelusan pentadbiran negara ini sedang diperhalusi oleh Jabatan Peguam Negara dan Bahagian Hal Ehwal Undang-Undang, Jabatan Perdana Menteri (BHEUU,JPM).
2. Dalam hal ini, BHEUU, JPM sedang mendapatkan pandangan serta input daripada pelbagai pihak berkepentingan (*stakeholders*). Setakat ini sebanyak sembilan (9) sesi libat urus telah dilaksanakan. Sesungguhnya, Kerajaan sentiasa mengalu-alukan penambahbaikan kepada mana-mana undang-undang sedia ada di negara ini demi kebaikan dan kemaslahatan seluruh rakyat.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : TUAN ABDUL LATIFF BIN ABDUL
RAHMAN [KUALA KRAI]**

SOALAN

Tuan Abdul Latiff bin Abdul Rahman [Kuala Krai] minta **MENTERI KOMUNIKASI DAN DIGITAL** menyatakan melalui projek Pelan Jalinan Digital Negara (JENDELA) telah membina sebanyak 67 menara baharu, 408 peralatan pemancar 4G dinaik taraf dan sambungan gentian optik ke atas 33,037 premis bermula September 2021 hingga 31 Disember 2022 di seluruh negeri Kelantan:

(a) status terkini projek tersebut; dan

(b) status terkini projek tersebut di dalam kawasan Parlimen Kuala Krai.

JAWAPAN

Tuan Yang di-Pertua,

Status yang dinyatakan adalah merujuk kepada perancangan Pelan Jalinan Digital Negara (JENDELA) setakat September 2021. Namun begitu, setelah membuat tinjauan tapak dan mengambil kira keperluan pengguna yang semakin meningkat, pihak Suruhanjaya Komunikasi dan Multimedia Malaysia (SKMM) dengan kerjasama pihak industri telah membuat perancangan semula bagi meluaskan lagi liputan dan meningkatkan kualiti jalur lebar di Negeri Kelantan termasuklah di Parlimen Kuala Krai.

Perancangan dan pencapaian setakat suku keempat 2022 bagi JENDELA Fasa 1 di Negeri Kelantan adalah seperti berikut:

- (i) Pembinaan 129 menara baharu di seluruh Negeri Kelantan. Daripada jumlah tersebut, sebanyak 64 menara baharu telahpun siap dan baki 65 menara dijangka akan siap sepenuhnya pada suku keempat 2023;
- (ii) Menaik taraf 1,925 alat pemancar komunikasi 4G. Daripada jumlah tersebut, sebanyak 1,921 telah dinaik taraf, manakala baki empat alat pemancar lagi dijangka siap menjelang suku keempat 2023; dan
- (iii) Penyediaan 82,370 premis dengan sambungan gentian optik. Daripada jumlah tersebut, 39,976 premis telah siap disediakan dengan sambungan gentian optik. Manakala, baki 42,394 premis lagi dijangka siap sepenuhnya pada suku keempat tahun 2023.

Manakala, di Parlimen Kuala Krai pula, perancangan dan pencapaian setakat suku keempat 2022 bagi JENDELA Fasa 1 adalah seperti berikut:

SOALAN NO : 11

- (i) Pembinaan 31 buah menara baharu. Daripada jumlah tersebut, sebanyak tiga buah menara telah siap beroperasi setakat suku keempat 2022, manakala baki 28 menara lagi dijangka akan siap sepenuhnya pada suku keempat 2023;
- (ii) Menaik taraf 176 alat pemancar komunikasi 4G. Daripada jumlah tersebut, sebanyak 175 telah dinaik taraf, manakala satu alat pemancar lagi dijangka siap menjelang suku keempat 2023; dan
- (iii) Penyediaan 2,960 premis dengan sambungan gentian optik. Daripada jumlah tersebut, 1,265 premis telah siap disediakan dengan sambungan gentian optik. Manakala, baki 1,695 premis lagi dijangka siap sepenuhnya pada suku keempat tahun 2023.

Kerajaan telah mempercepatkan penyediaan perkhidmatan jalur lebar melalui teknologi satelit di 18 lokasi di kawasan pedalaman di Negeri Kelantan yang pada asalnya dirancang untuk dilaksanakan pada tahun 2023 di bawah JENDELA Fasa 2 yang berjaya disiapkan sepenuhnya di bawah JENDELA Fasa 1 pada tahun 2022.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : TUAN ABDUL LATIFF BIN ABDUL
RAHMAN [KUALA KRAI]**

SOALAN

TUAN ABDUL LATIFF BIN ABDUL RAHMAN [KUALA KRAI] minta
MENTERI KESIHATAN menyatakan : -

- (a) adakah Kerajaan akan meneruskan Rang Undang-undang Kawalan Tembakau dan Merokok 2022; dan
- (b) perkembangan terkini RUU ini selepas dirujuk kepada Jawatankuasa Khas sebelum ini.

JAWAPAN

Tuan Yang di-Pertua,

1. Kementerian Kesihatan Malaysia (KKM) akan meneruskan pembentangan Rang Undang-Undang (RUU) Kawalan Produk Tembakau dan Merokok 2022 yang telah tertangguh dalam masa terdekat. Proses untuk mengangkat semula RUU ini sedang dilaksanakan.
2. Untuk makluman Ahli Yang Berhormat, isu-isu yang dibangkitkan semasa bacaan kedua RUU ini pada 2 Ogos 2022 terutamanya isu yang berkaitan larangan penjualan, pembelian dan penggunaan produk merokok bagi mana-mana orang yang lahir pada 1 Januari 2007 dan seterusnya serta isu berkaitan kuasa yang besar kepada pegawai diberi kuasa sehingga dikhuatiri boleh melanggar hak asasi individu telah dibincangkan semasa Mesyuarat Jawatankuasa Pilihan Khas. Syor-syor berkaitan isu-isu yang dibangkitkan telah dicadangkan dan dipersetujui di bawah jawatankuasa ini sebagaimana dinyatakan dalam Penyata Jawatankuasa Pilihan Khas yang disiarkan pada 5 Oktober 2022.
3. KKM telah meneliti semula semua syor-syor ini dan telah bersetuju untuk meneruskan RUU dengan pindaan tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN ABDUL LATIFF BIN ABDUL RAHMAN
[KUALA KRAI]**

SOALAN

TUAN ABDUL LATIFF BIN ABDUL RAHMAN [KUALA KRAI] minta **MENTERI PENDIDIKAN** menyatakan adakah Kerajaan bercadang menukar balik sesi persekolahan kepada bulan Januari sebagaimana sebelumnya.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan seperti mana kebiasaan akibat penularan COVID-19. Oleh yang demikian, KPM telah membuat ketetapan untuk melanjutkan sesi persekolahan tahun 2021 sehingga bulan Februari tahun 2022.

KPM telah menetapkan sesi persekolahan bagi kalendar akademik sesi 2022/2023 bermula pada bulan Mac 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM akan meneliti cadangan untuk mengembalikan semula kalendar akademik persekolahan bermula pada Januari seperti sebelum ini. Walau bagaimanapun, perkara berkenaan masih belum boleh dilaksanakan tahun hadapan memandangkan perlu menyelesaikan pelbagai justifikasi berdasarkan kepada pematuhan kepada Akta Pendidikan 1996 (Akta 550). Perubahan semula kalendar akademik persekolahan juga perlu mengambil kira faktor ekonomi setempat dan banjir pada hujung tahun, selain tidak mengganggu jadual peperiksaan Sijil Pelajaran Malaysia (SPM), Sijil Tinggi Persekolahan Malaysia (STPM) dan Sijil Tinggi Agama Malaysia (STAM).

Untuk makluman, sesi persekolahan bagi Kalendar Akademik Sesi 2023/2024 masih dikekalkan pada bulan Mac 2023 untuk memastikan KPM mematuhi Peraturan-Peraturan Pendidikan (Penggaj, Hari dan Cuti Sekolah) 1998 (Pindaan) 2021 yang menetapkan bahawa jumlah hari persekolahan dalam kalendar akademik hendaklah tidak kurang daripada satu ratus sembilan puluh (190) hari.

SOALAN NO : 13

KPM sentiasa melihat kepada keperluan dan kesesuaian penyediaan kalendar akademik untuk tahun seterusnya bagi memastikan pengajaran dan pembelajaran dapat dilaksanakan secara optimum.

Sekian, terima kasih.

RT02

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN ABDUL LATIFF BIN ABDUL RAHMAN
(KUALA KRAI)**

SOALAN

TUAN ABDUL LATIFF BIN ABDUL RAHMAN (KUALA KRAI) minta **MENTERI KEMAJUAN DESA DAN WILAYAH** menyatakan status terkini permohonan membina Jambatan Temalir yang runtuh akibat banjir pada tahun 2014.

JAWAPAN

Tuan Yang di-Pertua,

Untuk makluman Yang Berhormat, Kementerian ini mengambil maklum dan peka berkenaan dengan permohonan projek bagi membina jambatan Temalir yang runtuh akibat banjir pada tahun 2014.

Dalam hal ini, Kementerian ini telah mengemukakan permohonan bagi membina baharu jambatan tersebut kepada Kementerian Ekonomi untuk dipertimbangkan bagi kelulusan di bawah *Rolling Plan 3* (RP-3), Rancangan Malaysia Kedua Belas (RMKe-12) tahun 2023.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : LISAN

**DARIPADA : YB DATUK ANDI MUHAMMAD SURYADY BIN
BANDY (KALABAKAN)**

TARIKH : 30 MAC 2023 (KHAMIS)

SOALAN

DATUK ANDI MUHAMMAD SURYADY BIN BANDY [KALABAKAN] minta **MENTERI KERJA RAYA** menyatakan status terkini cadangan pembinaan jalan Kalabakan - Serudong yang akan menghubungkannya dengan jalan ke Simanggaris di Kalimantan, Indonesia memandangkan ianya merupakan projek berkeutamaan tinggi bagi Sabah dan telah dibentangkan dalam Mesyuarat Penyelarasan Perancangan Projek Pembangunan Sempadan Malaysia dan Indonesia (Sabah - Sarawak - Kalimantan) pada 7 Jun 2022.

JAWAPAN

Tuan Yang Di-Pertua,

Untuk makluman Ahli Yang Berhormat, Agensi Pusat telah meluluskan Kerja Awalan dan Rekabentuk bagi Projek Pembinaan Jalan Dari Kalabakan ke Sempadan Malaysia–Indonesia (Simanggaris) pada Rolling Plan 3, Rancangan Malaysia Kedua Belas (RP3, RMKe-12).

Kerja Awalan dan Rekabentuk bagi projek ini perlu dilaksanakan terlebih dahulu sebelum pembinaan projek ini dilaksanakan bagi mengenal pasti jajaran yang terbaik berdasarkan skop dan kos yang optimum yang menguntungkan Kerajaan dan rakyat di samping memastikan kesan terhadap sosial dan alam sekitar dapat diminimumkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN AFNAN HAMIMI BIN TAIB AZAMUDDEN
[ALOR SETAR]**

SOALAN

TUAN AFNAN HAMIMI BIN TAIB AZAMUDDEN [ALOR SETAR] minta **PERDANA MENTERI** menyatakan berapa jumlah perbelanjaan Kerajaan untuk mewujudkan jawatan Timbalan Perdana Menteri 1 dan 2 serta nyatakan butiran perbelanjaan tersebut

JAWAPAN

**DIJAWAB OLEH YB DATUK ARMIZAN BIN MOHD ALI, MENTERI DI
JABATAN PERDANA MENTERI (HAL EHWAL SABAH, SARAWAK
DAN TUGAS-TUGAS KHAS)**

Tuan Yang di-Pertua,

1. Bayaran emolumen bagi jawatan Timbalan Perdana Menteri 1 dan 2 adalah sebagaimana yang telah ditetapkan dalam Akta Ahli Parlimen (Saraan) 1980 (Akta 237) – Ketentuan Elaun dan Keistimewaan Bagi Timbalan Perdana Menteri.
2. Anggaran perbelanjaan *take-home pay* bagi seorang Timbalan Perdana Menteri adalah sebanyak 40,000 sebulan atau RM80,0000 sebulan bagi 2 orang berjawatan Timbalan Perdana Menteri.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN AFNAN HAMIMI BIN TAIB
AZAMUDDEN (ALOR SETAR)**

SOALAN

TUAN AFNAN HAMIMI BIN TAIB AZAMUDDEN [ALOR SETAR] minta **MENTERI KERJA RAYA** menyatakan apakah Kerajaan ada perancangan untuk membina jejantas yang menghubungkan bangunan Menara Alor Setar dengan bangunan Aman Central bagi kegunaan pejalan kaki dan pelancong.

JAWAPAN

Tuan Yang Di-Pertua,

Untuk makluman Ahli Yang Berhormat, hasil semakan Kementerian ini melalui JKR Negeri Kedah mendapati bangunan Menara Alor Setar dan bangunan Aman Central merupakan bangunan milik persendirian. Justeru, cadangan pembinaan jejantas pejalan kaki yang menghubungkan antara bangunan Menara Alor Setar dan bangunan Aman Central adalah di luar skop Program Menaiktaraf Infrastruktur Keselamatan Jalan Raya.

Walau bagaimanapun, jika terdapat keperluan untuk pembinaan jejantas pejalan kaki di atas jalan Persekutuan sahaja, Kementerian akan mempertimbangkan cadangan tersebut tertakluk kepada kelulusan Agensi Pusat tertakluk kepada kedudukan keutamaan projek dan ketersediaan agihan peruntukan pembangunan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN AFNAN HAMIMI BIN TAIB AZAMUDDEN
[ALOR SETAR]**

SOALAN

TUAN AFNAN HAMIMI BIN TAIB AZAMUDDEN [ALOR SETAR] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah perancangan untuk memulihkan Sungai Raja di dalam Bandaraya Alor Setar yang kini berbau, mengganggu pejalan kaki di sekitarnya, dan menjejaskan imej Bandaraya Alor Setar.

JAWAPAN

Tuan Yang di-Pertua,

1. Seperti Yang Berhormat sedia maklum, kawasan Sungai Raja adalah merupakan kawasan penempatan penduduk. Semakan dan siasatan oleh pihak JAS mendapati tiada penempatan kawasan perindustrian di sekitar sungai tersebut.
2. Berkaitan dengan rancangan pemulihan sungai, perancangan bagi pemulihan ini juga memerlukan kerjasama pelbagai pihak lain seperti Kerajaan Negeri, Pihak Berkuasa Tempatan serta agensi-agensi kerajaan yang berkaitan. Untuk ini, JAS sentiasa bersedia untuk menjalinkan kerjasama dengan Kerajaan Negeri Kedah bagi memastikan kelestarian sungai terjamin dan tidak tercemar. Meskipun begitu, seperti yang dimaklumkan, JAS akan sentiasa memantau kawasan yang berpotensi untuk tercemar bagi memastikan ia tidak mendatangkan kesan buruk kepada penduduk setempat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : TUAN AFNAN HAMIMI BIN TAIB
AZAMUDDEN [ALOR SETAR]**

SOALAN

TUAN AFNAN HAMIMI BIN TAIB AZAMUDDEN [ALOR SETAR]
minta **MENTERI KESIHATAN** menyatakan berapa kes kemurungan
yang berlaku dalam kalangan pegawai perubatan sejak tahun 2020
hingga tahun 2022 dan apakah langkah untuk mengatasinya

JAWAPAN

Tuan Yang -di Pertua,

1. Pada tahun 2021 seramai 1,453 (2.7%) daripada 54,083 petugas kesihatan yang menjalani saringan kesihatan mental menggunakan borang saringan DASS-21 didapati mengalami tahap kemurungan yang sederhana/teruk/sangat teruk berbanding 1,478 (2.1%) daripada 68,775 petugas kesihatan yang disaring pada tahun sebelumnya (2020). Data bagi tahun 2022 pula masih dikumpulkan di peringkat Ibu Pejabat KKM.
2. Semua mereka yang mengalami tahap kemurungan sederhana/teruk/sangat teruk ini telah dirujuk untuk intervensi khusus kepada Pegawai Psikologi/ Pegawai Perubatan/ Pakar Perubatan Keluarga atau Pakar Psikiatri bagi mendapatkan terapi, sesi kaunseling atau rawatan yang bersesuaian.
3. Beberapa langkah pencegahan dilaksanakan untuk meningkatkan kesihatan mental yang positif melalui Program KOSPEN WOW di tempat kerja. Antaranya ialah melalui intervensi umum seperti menangani *stress* dengan kaedah 10B, komunikasi berkesan dan sikap asertif, pengurusan masa, penyelesaian masalah menggunakan kaedah IDEAL, pengurusan kemarahan menggunakan kaedah 3B dan latihan kemahiran daya tindak. Petugas kesihatan juga diberi kesedaran tentang kepentingan kesihatan minda serta membanteras stigma terhadap kesihatan mental melalui Let's TALK Minda Sihat. Selain itu petugas kesihatan diperkasakan dengan mengetahui di mana untuk mendapatkan sokongan kesihatan mental di tempat kerja seperti melalui Jawatankuasa Keselamatan dan Kesihatan Pekerjaan (JKKP), Kumpulan Sokongan Rakan Sekerja, Rakan Pembimbing Perkhidmatan Awam (AKRAB) dan juga badan bukan kerajaan (NGO)

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN AFNAN HAMIMI
BIN TAIB AZAMUDDEN (ALOR SETAR)**

SOALAN

TUAN AFNAN HAMIMI BIN TAIB AZAMUDDEN (ALOR SETAR)
minta MENTERI PEMBANGUNAN USAHAWAN DAN KOPERASI
menyatakan apakah inisiatif yang telah dilaksanakan untuk membela
pengusaha-pengusaha perniagaan PKS yang terjejas akibat wabak COVID-
19 sejak tahun 2020 hingga tahun 2022.

JAWAPAN

Tuan Yang di-Pertua,

1. Kementerian Pembangunan Usahawan dan Koperasi (KUSKOP) telah melaksanakan pelbagai inisiatif merangkumi bimbingan dan latihan, akses pembiayaan, akses pasaran, adaptasi teknologi dan intervensi peluang kedua bagi menyokong pemulihan operasi perniagaan usahawan yang terjejas berikutan pandemik COVID-19.
2. Bagi tempoh 2020 hingga 2021, kementerian ini melalui TEKUN Nasional, Suruhanjaya Koperasi Malaysia (SKM), Institut Keusahawanan Negara (INSKEN) dan SME Bank telah melaksanakan Pelan Pemulihan Usahawan dan Koperasi yang merangkumi 29 program jangka pendek dan sederhana bagi membantu usahawan dan koperasi yang terjejas teruk berikutan pandemik COVID-19 dan penutupan sektor ekonomi negara pada ketika itu. Pelaksanaan program-program di bawah Pelan Pemulihan ini telah memanfaatkan lebih 20,000 usahawan dan koperasi.
3. Pada tahun 2022 pula, kementerian ini melalui semua sepuluh agensi di bawahnya meneruskan sokongan untuk memulihkan usahawan melalui pelaksanaan 183 program di bawah Pelan Strategik KUSKOP yang memanfaatkan 1,753,361 individu yang terdiri daripada usahawan, Perusahaan Mikro, Kecil dan Sederhana (PMKS), koperasi, perusahaan sosial, start-up, usahawan informal serta belia dan graduan.
4. Bagi tahun 2023, KUSKOP terus komited untuk membantu usahawan dengan memberi tumpuan kepada pembinaan momentum pembaharuan bagi meningkatkan daya saing dan daya tahan PMKS supaya lebih kalis cabaran demi kestabilan sektor keusahawanan. Sebanyak 185 program telah dirangka di bawah Pelan Strategik KUSKOP Tahun 2023 yang merangkumi penggubalan dasar, tadbir urus dan kawal selia, pembangunan kapasiti, akses pembiayaan, akses pasaran, adaptasi teknologi dan pengukuhan penyampaian perkhidmatan. Pelaksanaan kesemua program yang dirancang pada tahun ini dijangka akan memanfaatkan 543,080 usahawan dan bakal usahawan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATUK HAJI AHMAD AMZAD BIN MOHAMED
@ HASHIM [KUALA TERENGGANU]**

SOALAN

DATUK HAJI AHMAD AMZAD BIN MOHAMED @ HASHIM [KUALA TERENGGANU] minta **MENTERI EKONOMI** menyatakan langkah Kerajaan bagi menangani masalah jurang pendapatan antara golongan kaya dan miskin yang makin meluas khususnya selepas krisis COVID-19.

JAWAPAN

Tuan Yang di-Pertua,

Untuk makluman Ahli Yang Berhormat, statistik sosioekonomi antaranya adalah berdasarkan Laporan Survei Pendapatan, Perbelanjaan dan Kemudahan Asas (HIES & BA). Survei ini dijalankan oleh Jabatan Perangkaan Malaysia (DOSM) sebanyak dua kali setiap lima tahun dan dapatan terkini pada tahun 2019. Berdasarkan HIES & BA 2019, pendapatan purata isi rumah dan pendapatan penengah peringkat nasional masing-masing adalah RM7,901 dan RM5,873. Kadar kemiskinan adalah 5.6% (405.4 ribu isi rumah) manakala pekali Gini yang mengukur ketidaksamarataan antara isi rumah adalah 0.407.

Pandemik COVID-19 dan cabaran sosioekonomi memberi kesan kepada pendapatan, kadar kemiskinan dan ketidaksamarataan. DOSM menganggarkan pendapatan purata dan penengah nasional masing-masing turun kepada RM7,089 dan RM5,209 pada 2020 dibandingkan pada 2019. Insiden kemiskinan meningkat kepada 8.4% (639.8 ribu isi rumah). Manakala, pekali Gini pula telah melebar kepada 0.411.

Bagi agihan pendapatan, bahagian pendapatan kumpulan B40 telah menurun kepada 15.9% daripada 16.0%. Bahagian pendapatan kumpulan M40 juga menyaksikan penurunan kepada 36.9% daripada 37.9%. Manakala, bahagian pendapatan kumpulan T20 meningkat kepada 47.2% daripada 46.8%. Ini menunjukkan jurang pendapatan yang semakin melebar disebabkan antaranya oleh penurunan pendapatan dan agihan pendapatan bagi kumpulan isi rumah B40 dan sebahagian dari isi rumah M40 dibandingkan dengan kumpulan isi rumah T20.

DOSM sedang memuktamadkan dapatan Laporan HIES & BA 2022 yang mengambil kira kesan pandemik COVID-19 kepada pendapatan dan perbelanjaan isi rumah. Dengan senario ekonomi yang bertambah baik di mana Malaysia mencatatkan pertumbuhan ekonomi sebanyak 8.7% pada tahun 2022 (2021: 3.1%) dijangka dapat memberi impak kepada pendapatan negara dan isi rumah. Laporan ini akan memberi gambaran sebenar jurang pendapatan isi rumah terkini dan dijangka diterbitkan pada pertengahan tahun 2023.

Tuan Yang di-Pertua,

Rancangan Malaysia Kedua Belas, 2021-2025 (RMKe-12) dan Bajet 2023 telah menggariskan beberapa strategi jangka sederhana dan panjang untuk membasmi kemiskinan dan mengurangkan jurang pendapatan. Antaranya meningkatkan pendapatan dan meningkatkan taraf hidup golongan miskin tegar dan B40 serta M40, menambah baik akses kepada kemudahan dan perkhidmatan penting, mengukuhkan mekanisme penyampaian perkhidmatan dan mengurangkan ketidaksamarataan antara isi rumah.

YAB Perdana Menteri semasa ucapan Belanjawan 2023 pada 24 Februari 2023, telah mengumumkan langkah-langkah fiskal berikut bagi merapatkan jurang pendapatan termasuk:

- i. Sumbangan Tunai Rahmah kepada hampir 9 juta penerima dengan peruntukan disediakan hampir RM8 bilion;

- ii. Bantuan bulanan Jabatan Kebajikan Masyarakat (JKM) kepada golongan yang mudah terjejas termasuk kanak-kanak, warga emas dan orang kurang upaya;
- iii. Subsidi, bantuan serta insentif sebanyak RM64 billion dan pelaksanaan konsep Payung Rahmah bagi mengurangkan beban kos sara hidup termasuk antaranya:
 - RM100 juta untuk jualan Rahmah yang menawarkan barangan asas dengan harga sehingga 30% lebih murah berbanding pasaran melibatkan 222 kawasan Parlimen;
 - RM40 juta untuk Program Penyeragaman Harga Sabah, Sarawak dan Labuan; dan
- iv. Pakej Perpaduan Prabayar Internet Mudah Alih dan Pakej Perpaduan Jalur Lebar.

Melalui Belanjawan 2023, Kerajaan akan mengambil pendekatan yang progresif dalam konteks subsidi bersasar atau struktur percukaian dan mengharapkan pemahaman rakyat yang lebih berkemampuan untuk menggalas tanggungjawab secara bersama.

Kerajaan melalui Kementerian Ekonomi sedang melaksanakan Inisiatif Pendapatan Rakyat (IPR) yang akan menumpukan kepada pengupayaan golongan miskin tegar dan B40 di seluruh negara supaya meningkatkan potensi pendapatan secara mampan. Melalui Belanjawan 2023, peruntukan sejumlah RM750 juta disediakan untuk tahun 2023 bagi menjayakan IPR.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATUK HAJI AHMAD AMZAD BIN MOHAMED
@ HASHIM [KUALA TERENGGANU]**

SOALAN

**DATUK HAJI AHMAD AMZAD BIN MOHAMED @ HASHIM [KUALA
TERENGGANU]** minta **MENTERI EKONOMI** menyatakan menyatakan

- (a) data kadar kemiskinan mengikut kaum, agama dan negeri dalam tempoh 10 tahun; dan
- (b) apakah usaha Kerajaan untuk menyelesaikan kadar kemiskinan ini

JAWAPAN

Tuan Yang di-Pertua,

Untuk makluman Ahli Yang Berhormat, data kemiskinan di Malaysia adalah berdasarkan Survei Pendapatan, Perbelanjaan Isi Rumah dan Kemudahan Asas (HIES & BA) dilaksanakan oleh Jabatan Perangkaan Malaysia (DOSM). Survei ini dijalankan dua kali setiap lima tahun. Survei terkini adalah pada tahun 2019 manakala survei yang sedang dilaksanakan adalah pada tahun 2022. HIES & BA 2022 dijangka diterbitkan pada pertengahan 2023. Data ini digunakan untuk pelaporan sosioekonomi dan input kepada penggubalan dasar Kerajaan.

HIES & BA yang menjadi sumber utama bagi statistik kemiskinan merupakan survei sosioekonomi meliputi pendapatan, demografi, etnik dan lokasi. Berdasarkan survei ini, kadar kemiskinan mutlak peringkat nasional adalah 5.6% pada tahun 2019. Manakala, kadar kemiskinan mengikut tiga kumpulan etnik utama pada tahun 2019 adalah Bumiputera (7.2%), Cina (1.4%) dan India (4.8%).

Kemiskinan mutlak dan tegar diukur menggunakan Pendapatan Garis Kemiskinan atau PGK. PGK merujuk kepada jumlah pendapatan bulanan isi rumah yang diperlukan untuk memenuhi keperluan optimum minimum makanan dan bukan makanan bagi membolehkan setiap ahli isi rumah menjalani kehidupan yang sihat dan aktif. Pengukuran ini adalah berdasarkan kepada konsep kos keperluan asas.

Bagi tahun 2019, kategori dan had nilai PGK pada peringkat nasional dengan saiz purata isi rumah empat orang adalah:

- i) Miskin mutlak merujuk kepada isi rumah yang berpendapatan kurang daripada PGK keseluruhan, iaitu RM2,208
- ii) Miskin tegar merujuk kepada isi rumah yang berpendapatan kurang daripada Pendapatan Garis Kemiskinan (PGK) makanan, iaitu RM1,169

Untuk makluman ahli Yang Berhormat, PGK juga diterbitkan bagi setiap negeri serta mengikut strata bandar dan luar bandar.

Jadual kadar kemiskinan mengikut peringkat nasional, etnik dan negeri bagi tempoh 10 tahun dari 2009 hingga 2019 adalah seperti berikut:

Kemiskinan Mutlak Malaysia Mengikut Etnik, 2009 - 2019 (%)

Perkara	2009	2012	2014	2016	2019
MALAYSIA	3.8	1.7	0.6	0.4	5.6
ETNIK					
Bumiputera	5.3	2.2	0.8	0.5	7.2
Cina	0.6	0.3	0.1	0.1	1.4
India	2.5	1.8	0.6	0.1	4.8
Lain-lain	6.7	1.5	0.9	1.5	13.5

Sumber: Jabatan Perangkaan Malaysia (DOSM)

Kemiskinan Mutlak Malaysia Mengikut Negeri, 2009 - 2019 (%)

Perkara	2009	2012	2014	2016	2019
MALAYSIA	3.8	1.7	0.6	0.4	5.6
NEGERI					
Johor	1.3	0.9	0.0	0.0	3.9
Kedah	5.3	1.7	0.3	0.2	8.8
Kelantan	4.8	2.7	0.9	0.4	12.4
Melaka	0.5	0.1	0.1	0.0	3.9
Negeri Sembilan	0.7	0.5	0.4	0.2	4.3
Pahang	2.1	1.3	0.7	0.2	4.3
Pulau Pinang	1.2	0.6	0.3	0.1	1.9
Perak	3.5	1.5	0.7	0.2	7.3

Perkara	2009	2012	2014	2016	2019
Perlis	6.0	1.9	0.2	0.1	3.9
Selangor	0.7	0.4	0.2	0.0	1.2
Terengganu	4.0	1.7	0.6	0.4	6.1
Sabah	19.7	8.1	4.0	2.9	19.5
Sarawak	5.3	2.4	0.9	0.6	9.0
W.P. Kuala Lumpur	0.7	0.8	0.1	0.0	0.2
W.P. Labuan	4.3	1.1	1.1	0.0	3.1
W.P. Putrajaya	0.0	0.0	0.0	0.0	0.4

Sumber: Jabatan Perangkaan Malaysia (DOSM)

Pada masa yang sama, Kerajaan juga menggunakan data kemiskinan eKasih oleh Unit Penyelarasan Pelaksanaan, Jabatan Perdana Menteri (ICU, JPM). Data kemiskinan secara pendaftaran dan verifikasi di lapangan ini digunakan tujuan penyaluran bantuan sosial dan program pembasmian kemiskinan. Data ini merangkumi antaranya profil isi rumah, lokasi, pekerjaan, pendapatan, bantuan dan agama.

Kemiskinan mengikut agama ketua isi rumah miskin dan miskin tegar diterbitkan oleh DOSM dalam Statistik Sub Nasional Parlimen dan DUN masing-masing berdasarkan data eKasih.

YAB Perdana Menteri semasa ucapan Bajet 2023 pada 24 Februari 2023, telah mengumumkan langkah-langkah berikut bagi mengurangkan kadar kemiskinan termasuk:

- iii) Sumbangan Tunai Rahmah kepada hampir 9 juta penerima dengan peruntukan disediakan hampir RM8 bilion;
- iv) Bantuan bulanan Jabatan Kebajikan Masyarakat (JKM) kepada 400,000 golongan yang mudah terjejas termasuk kanak-kanak, warga emas dan orang kurang upaya;

- v) Pelbagai bantuan, subsidi dan insentif kepada sekitar 240,000 pesawah dan 380,000 pekebun kecil;
- vi) Projek pembaikan luar bandar dan program-program membasmi kemiskinan (RM3.9 billion);
- vii) Subsidi, bantuan serta insentif bagi mengurangkan beban kos sara sebanyak RM64 billion serta pelaksanaan konsep Payung Rahmah; dan
- viii) Pakej Perpaduan Prabayar Internet Mudah Alih dan Pakej Perpaduan Jalur Lebar.

Kerajaan melalui Kementerian Ekonomi sedang melaksanakan Inisiatif Pendapatan Rakyat (IPR) yang akan menumpukan kepada pengupayaan golongan miskin tegar dan B40 di seluruh negara supaya meningkatkan potensi pendapatan secara mampan. Peruntukan sejumlah RM750 juta disediakan untuk tahun 2023 bagi menjayakan IPR.

Program IPR akan melibatkan tiga inisiatif permulaan iaitu Inisiatif Usahawan Tani (INTAN), Inisiatif Usahawan Makanan (INSAN) dan Inisiatif Operator Perkhidmatan (IKHSAN). Program ini menyasarkan untuk peserta meraih pendapatan antara RM2,000 hingga RM2,500 sebulan dalam tempoh pemantauan 24 bulan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA,
PARLIMEN KE-15**

**PERTANYAAN : BERTULIS
DARIPADA : TUAN AHMAD AMZAD BIN
MOHAMED@HASHIM
[KUALA TERENGGANU]**

SOALAN

YB TUAN AHMAD AMZAD BIN MOHAMED @ HASHIM [KUALA TERENGGANU] minta **KEMENTERIAN PERDAGANGAN ANTARABANGSA DAN INDUSTRI** menyatakan apakah pelan Kementerian untuk pembangunan rangkaian stesen pengecas kenderaan elektrik (EV) di Pantai Timur khususnya di Terengganu untuk mewujudkan ekosistem menyeluruh kerana industri EV adalah industri berpotensi tinggi serta membantu merealisasikan sasaran Malaysia mencapai status negara neutral karbon menjelang tahun 2050.

JAWAPAN

Tuan Yang Dipertua,

Berdasarkan *Low Carbon Mobility Blueprint* (LCMB), sasaran yang ditetapkan adalah 10,000 unit pengecas awam akan dibangunkan di seluruh negara bagi menyokong penggunaan kenderaan elektrik (EV) menjelang tahun 2025.

Pasukan Petugas EV Kebangsaan (*National EV Taskforce-NEVT*) yang diketuai oleh MITI dan dianggotai oleh Kementerian dan agensi Kerajaan yang berkaitan dan pihak industri telah bersetuju agar *Malaysian Green Technology and Climate Change Corporation* (MGTC) untuk menerajui pembangunan dan perancangan infrastruktur pengecasan secara menyeluruh di Malaysia bagi memastikan sasaran 10,000 unit pengecas awam dipasang di seluruh negara menjelang tahun 2025 dapat dicapai.

SOALAN NO : 23

Sehubungan dengan ini, satu kerangka strategi untuk pembangunan dan perancangan infrastruktur pengecasan EV secara menyeluruh di Malaysia telah dibangunkan bagi mencapai sasaran tersebut. Kerangka strategi ini sedang dibincangkan dan diperhalusi oleh pihak-pihak berkepentingan.

Di bawah cadangan Kerangka ini, sasaran bagi setiap Pihak Berkuasa Tempatan (PBT) dan cadangan lokasi untuk pemasangan stesen pengecasan bagi setiap negeri turut dicadangkan berdasarkan penelitian faktor-faktor seperti berikut:

- a. Bilangan isi rumah;
- b. Bilangan kenderaan aktif;
- c. Pelan bandar rendah karbon;
- d. Sosioekonomi setempat;
- e. Potensi penggunaan tinggi (lokasi yang sering dilawati, tempat tarikan utama);
- f. Kebolehcapaian (berdekatan dengan jalan utama, stesen minyak);
- g. Inklusiviti (memastikan setiap lokaliti sekurang-kurangnya mempunyai akses dalam pembangunan baru dan bagi memastikan ketersambungan antara satu lokasi ke satu lokasi); dan
- h. Kebolehlaksanaan tapak (*site feasibility*)

Berdasarkan data terkini yang dikumpul oleh MGTC, didapati sejumlah 6 stesen pengecasan EV telah dibangunkan di negeri Terengganu dengan pecahan 4 unit adalah jenis arus ulang alik (*Alternating Current* - AC) dan 2 unit adalah jenis arus terus (*Direct Current* – DC). Bagi pembangunan seterusnya sehingga tahun 2025, negeri Terengganu disasarkan membangunkan sekurang-kurangnya 300 stesen pengecasan EV meliputi tujuh (7) PBT dengan cadangan taburan terperinci seperti berikut:

No.	PBT	Jumlah
1	Majlis Bandaraya Kuala Terengganu	101
2	Majlis Perbandaran Kemaman	56
3	Majlis Perbandaran Dungun	46

SOALAN NO : 23

No.	PBT	Jumlah
4	Majlis Daerah Besut	30
5	Majlis Daerah Hulu Terengganu	22
6	Majlis Daerah Marang	30
7	Majlis Daerah Setiu	15
JUMLAH KESELURUHAN		300

Lokasi yang dicadangkan akan merangkumi tempat kunjungan awam, destinasi tarikan utama seperti tapak pelancongan dan sepanjang lebuh raya (kawasan Rehat & Rawat (R&R) dan stesen petrol). Oleh itu, bagi memastikan pembangunan stesen pengecasan EV di Terengganu dapat direalisasikan seperti disasarkan, usaha kerjasama antara Kerajaan Negeri, PBT dan penyedia utiliti dalam menangani isu kebolehlaksanaan tapak perlu diteruskan dengan sokongan dan bantuan daripada pihak-pihak berkepentingan yang lain seperti Kementerian Kerja Raya, Jabatan Bomba dan Penyelamat Malaysia dan sebagainya.

Pelaksanaan inisiatif-inisiatif ini di negeri Terengganu diharap dapat meningkatkan lagi penggunaan dan permintaan kenderaan EV dan seterusnya membantu merealisasikan sasaran bagi Malaysia mencapai status negara neutral karbon menjelang tahun 2050 seperti digariskan di bawah Rancangan Malaysia Ke-12.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK HAJI AHMAD AMZAD BIN MOHAMED
@ HASHIM [KUALA TERENGGANU]**

SOALAN

DATUK HAJI AHMAD AMZAD BIN MOHAMED @ HASHIM [KUALA TERENGGANU] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status kemajuan projek pembinaan sistem rawatan kumbahan berpusat di Bandar Baharu Bukit Besar, Kuala Terengganu.

JAWAPAN

Tuan Yang di-Pertua,

Kementerian Sumber Asli, Alam Sekitar dan Perubahan Iklim (NRECC) melalui Jabatan Perkhidmatan Pembetungan (JPP) telah membuat permohonan projek pembinaan sistem rawatan kumbahan berpusat di Bandar Baharu Bukit Besar, Kuala Terengganu di dalam *Rolling Plan* Ketiga, Rancangan Malaysia Kedua Belas (RP3, RMKe -12) untuk pertimbangan Kementerian Ekonomi. Sekiranya diluluskan, projek ini dijangka akan ditender pada suku kedua tahun 2024 dan dijangka siap pada tahun 2029.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 30 MAC 2023 (KHAMIS)

SOALAN

TUAN WILLIAM LEONG JEE KEEN [SELAYANG] minta **MENTERI PENDIDIKAN** menyatakan sama ada Kementerian akan mengembalikan peperiksaan Ujian Penilaian Sekolah Rendah (UPSR) dan Pentaksiran Tingkatan Tiga (PT3) tanpa bergantung kepada hasil laporan Pelan Pembangunan Pendidikan Malaysia 2025 yang akan mengambil 3 tahun lagi.

JAWAPAN

Tuan Yang di-Pertua,

Untuk makluman Ahli Yang Berhormat, berikutan pemansuhan Ujian Pencapaian Sekolah Rendah (UPSR) mulai tahun 2021 dan Pentaksiran Tingkatan Tiga (PT3) mulai tahun 2022, Kementerian Pendidikan Malaysia (KPM) memberi tumpuan kepada pemerkasaan PBS, melibatkan komponen Pentaksiran Bilik Darjah (PBD), Pentaksiran Aktiviti Jasmani, Sukan dan Kokurikulum (PAJSK) serta Pentaksiran Psikometrik (PPsi).

PBS telah diperkenalkan mulai tahun 2011 pada peringkat sekolah rendah dan tahun 2012 pada peringkat sekolah menengah. Pentaksiran ini bertujuan untuk menilai murid dari aspek intelek, emosi, rohani, jasmani dan sosial selaras dengan Falsafah Pendidikan Kebangsaan. PBS merupakan proses ansur maju yang menumpukan perkembangan murid secara holistik serta membolehkan guru memantau perkembangan,

kemajuan dan penguasaan setiap murid dalam proses pembelajaran mereka termasuk kemahiran asas membaca, menulis dan mengira. Guru juga boleh merancang dan mengubah suai kaedah pengajaran dan pembelajaran bagi membantu murid meningkatkan tahap penguasaan, pengetahuan, kemahiran dan nilai sebagai asas yang kukuh untuk mengikuti pembelajaran pada peringkat seterusnya.

Melalui PBS juga, perkembangan murid dalam aspek sukan, kokurikulum, nilai murni, minat dan kecenderungan serta pembentukan sahsiah diperkukuh. Hal ini selari dengan teras KPM yang mengutamakan aspek karamah insaniah melalui pembentukan adab, akhlak dan integriti bagi melahirkan anak yang bijak lagi cerdik.

KPM yakin bahawa pentaksiran yang bersifat holistik dan berterusan melalui PBS merupakan pendekatan terbaik bagi mengoptimumkan potensi murid secara menyeluruh dan bersepadu. Oleh itu, KPM tidak bercadang untuk memperkenalkan semula UPSR dan PT3. Sebarang keputusan untuk melaksanakan semula peperiksaan adalah bergantung pada hasil laporan Pelan Pembangunan Pendidikan Malaysia 2013-2025 yang akan tamat pada tahun 2025.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : DATO' AHMAD BIN SAAD @
YAHAYA [POKOK SENA]**

SOALAN

DATO' AHMAD BIN SAAD @ YAHAYA minta **MENTERI KESIHATAN** menyatakan pendirian Kementerian untuk memuktamadkan Akta Kawalan Produk Tembakau dan Merokok berkenaan larangan merokok serta pemilikan barangan produk rokok kepada generasi muda yang lahir selepas tahun 2005.

JAWAPAN

Tuan Yang di-Pertua,

1. Kementerian Kesihatan Malaysia akan meneruskan pembentangan Rang Undang-Undang (RUU) Kawalan Produk Tembakau dan Merokok 2022 yang tertangguh dengan mengambil kira pindaan yang disyorkan oleh Jawatankuasa Pilihan Khas bagi Menimbang RUU Kawalan Produk Tembakau dan Merokok 2022. Rang Undang-undang ini merangkumi kawalan produk merokok serta peruntukan khusus bagi larangan penjualan, pembelian dan penggunaan produk merokok bagi orang yang lahir 1 Januari 2007 dan seterusnya.

2. Untuk makluman Ahli Yang Berhormat, pindaan kepada peruntukan bagi larangan penjualan, pembelian dan penggunaan produk merokok bagi orang yang lahir pada 1 Januari 2007 dan seterusnya telah diputuskan dalam mesyuarat Jemaah Menteri pada 13 Julai 2022

berbanding keputusan sebelum ini iaitu orang yang lahir pada 1 Januari 2005. Penetapan ini dibuat bagi membolehkan implementasi di lapangan dijalankan berdasarkan pendekatan "*soft landing approach*".

3. Berhubung peruntukan berkaitan larangan merokok serta pemilikan barangan produk rokok, KKM bersetuju akan syor Jawatankuasa Pilihan Khas supaya larangan pemilikan rokok digugurkan, manakala larangan penjualan, pembelian dan penggunaan produk merokok dikekalkan.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT PERTAMA, PENGKAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DATO' AHMAD BIN SAAD @ YAHAYA
[POKOK SENA]**

SOALAN

DATO' AHMAD BIN SAAD @ YAHAYA [POKOK SENA] minta **MENTERI PERLADANGAN DAN KOMODITI** menyatakan strategi Kementerian untuk mengembangkan industri perkayuan yang boleh dibangunkan secara terancang di Parlimen Pokok Sena.

JAWAPAN

Yang di-Pertua,

1. Kementerian Perladangan dan Komoditi (KPK) telah melancarkan Dasar Agrikomoditi Negara 2021-2030 (DAKN 2030) pada 9 Mac 2022. DAKN 2030 adalah dasar utama pembangunan sektor agrikomoditi merangkumi lapar komoditi iaitu sawit, getah, kayu-kayan, koko, lada, fiber berasaskan tumbuhan (kenaf dan fiber berkaitan), biojisim serta biobahan api dengan memberi penekanan untuk meningkatkan ekonomi kitaran berasaskan Agrikomoditi.
2. Sementara itu, Pelan Strategik Industri Perkayuan Negara (NTISP) yang dilancarkan oleh Lembaga Perindustrian Kayu Malaysia (MTIB) selaras dengan aspirasi DAKN 2030 tersebut bagi sektor kayu-kayan iaitu "Memodenkan Industri Kayu-kayan Ke Arah Peningkatan Daya Tahan". NTISP adalah panduan bagi pelaksanaan program-program pembangunan industri perkayuan bagi tempoh 2021-2025.
3. Industri perkayuan merupakan penyumbang ke 3 terbesar kepada sektor Agrikomoditi selepas sawit dan getah serta diiktiraf pada peringkat antarabangsa. Dalam hal ini, Kementerian melalui Agensi seperti MTIB,

Malaysian Timber Council (MTC) dan *Malaysian Timber Certification Council* (MTCC) akan melaksanakan pelbagai aktiviti bagi mencapai sasaran DAKN 2030 iaitu nilai eksport sebanyak RM28 bilion pada tahun 2025 dan RM32.8 bilion pada tahun 2030. Antara strategi yang dilaksanakan adalah:

- i. Menggalakkan kemampanan di sepanjang rantai nilai kayu-kayan;
- ii. Meluaskan usaha peningkatan produktiviti pada peringkat hulu dan hilir;
- iii. Memperhebat aktiviti produk bernilai tambah;
- iv. Meningkatkan amalan persijilan dan kerjasama strategik yang diterajui oleh industri; dan
- v. Meningkatkan penyertaan Bumiputera dalam industri kayu-kayan.

4. Bagi pembangunan industri perkayuan di Negeri Kedah, MTIB menjadikan Pelan Pembangunan Kedah 2035 (Kedah 2035) sebagai panduan. Dalam hal ini, daerah Pokok Sena disasarkan untuk pembangunan Perusahaan Mikro, Kecil dan Sederhana (PMKS). Sehubungan itu, program industri perkayuan yang boleh dilaksanakan dan dihebahkan kepada usahawan di Pokok Sena adalah program promosi dan pemasaran serta bantuan insentif bahan mentah dan mesin kepada usahawan yang layak.

5. Selain itu, MTIB juga mengadakan taklimat secara berkala kepada usahawan di setiap negeri bagi mempromosikan program dan aktiviti yang ditawarkan kepada usahawan perkayuan sedia ada. Sebagai contoh MTIB telah mengadakan taklimat kepada usahawan di Alor Setar pada 2 Ogos 2022 melibatkan seramai 70 orang usahawan. Oleh itu, usahawan di daerah Pokok Sena yang berminat untuk menceburi industri perkayuan adalah dipelawa untuk menyertai program anjuran agensi Kementerian Perlindungan dan Komoditi seperti MTIB dan *Malaysian Timber Council* (MTC) yang dapat membantu pihak usahawan mengembangkan perniagaan mereka. Kementerian melalui Agensi akan sentiasa memberi sokongan dan galakan kepada mereka yang terlibat.

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGKAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DATO' AHMAD BIN SAAD @ YAHAYA
[POKOK SENA]**

SOALAN

Dato' Ahmad bin Saad @ Yahaya [Pokok Sena] minta **MENTERI KOMUNIKASI DAN DIGITAL** menyatakan perkembangan terkini pindaan Akta Komunikasi dan Multimedia bagi membanteras kegiatan judi dalam talian.

JAWAPAN

Tuan Yang di-Pertua,

Pindaan bagi Akta Komunikasi dan Multimedia 1998 [Akta 588] adalah tidak melibatkan peruntukan spesifik mengenai judi dalam talian kerana perkara tersebut bukan di bawah kawal selia Suruhanjaya Komunikasi dan Multimedia Malaysia (SKMM). Secara khususnya judi dalam talian (*online gambling*) adalah tertakluk di bawah Akta Rumah Perjudian Terbuka 1953 [Akta 289] iaitu di bawah bidang kuasa pihak Polis Diraja Malaysia (PDRM).

SKMM sentiasa komited memberi bantuan yang sewajarnya secara teknikal kepada pihak PDRM dalam usaha membanteras judi dalam talian dengan menghalang akses kepada laman-laman sesawang yang melibatkan judi dalam talian.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATO' AHMAD BIN SAAD @ YAHAYA
[POKOK SENA]**

SOALAN

DATO' AHMAD BIN SAAD @ YAHAYA [POKOK SENA] minta
MENTERI PEMBANGUNAN USAHAWAN DAN KOPERASI
menyatakan pelan tindakan Kementerian bagi membangunkan
usahawan digital di negeri Kedah khususnya Parlimen Pokok Sena
yang merupakan bandar terancang IKS.

JAWAPAN

Tuan Yang Di Pertua,

1. Kementerian Pembangunan Usahawan dan Koperasi (KUSKOP) telah melancarkan Pelan Strategik KUSKOP 2023 pada 17 Januari 2023. Objektif pelan ini adalah untuk menyediakan ekosistem yang kondusif bagi menyokong dan memacu pemulihan, pertumbuhan dan kestabilan sektor keusahawanan negara serta mempertingkatkan daya tahan dan daya saing usahawan pasca pandemik. Dua daripada 24 strategi di bawah Pelan Strategik KUSKOP 2023 ini memberikan fokus kepada usaha mendigitalisasikan perusahaan mikro kecil dan sederhana (PMKS) iaitu:

- (i) mempercepat tahap adaptasi teknologi bagi meningkatkan kecekapan dan produktiviti perniagaan; dan
- (ii) menggalak penggunaan platform digital bagi memperluas pasaran domestik dan antarabangsa.

2. Sebanyak 5 program khusus akan dilaksanakan di bawah strategi tersebut dengan sasaran penyertaan seramai 4,320 PMKS. Program-program digitalisasi yang dilaksanakan ini **terbuka kepada semua usahawan PMKS**. Usahawan di negeri Kedah termasuk di Parlimen Pokok Sena hendaklah merebut peluang menyertai program-program yang dilaksanakan oleh Kementerian ini. Perincian bagi setiap program tersebut adalah seperti berikut:

- (i) Program Transformasi Teknologi dan Digitalisasi Koperasi dilaksanakan oleh KUSKOP dengan sasaran sebanyak 20 peserta. Program ini bertujuan untuk memberi pendedahan transformasi koperasi ke arah penggunaan teknologi dan digitalisasi dalam tadbir urus dan aktiviti;
- (ii) Platform Keusahawanan Digital *MyMall* dilaksanakan oleh KUSKOP dengan sasaran sebanyak 200 peserta. Program ini bertujuan untuk mewujudkan pusat maklumat sehenti kepada usahawan dan bakal usahawan bagi mendapatkan informasi berhubung pembiayaan, aktiviti pembangunan kapasiti

SOALAN NO : 29

ataupun latihan, dan pemasaran / pengiklanan;

- (iii) Program Memperkasakan Digitalisasi Koperasi (C.O.D.E.) dilaksanakan oleh Institut Koperasi Malaysia dengan sasaran sebanyak 1,000 peserta. Program ini bertujuan untuk menggalakkan koperasi menggunakan pemasaran digital;
- (iv) Skim Pembiayaan Online TEKUN (SPOT) dilaksanakan oleh TEKUN dengan sasaran sebanyak 3,000 peserta. Program ini bertujuan untuk menyediakan modal pembiayaan secara mudah dan cepat, khas untuk usahawan yang menjalankan perniagaan secara atas talian; dan
- (v) Portal *Pybli* dilaksanakan oleh PERNAS dengan sasaran sebanyak 100 peserta. Program ini bertujuan untuk membantu usahawan mengembangkan perniagaan melalui platform digital.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

DARIPADA : TUAN HASSAN BIN SAAD [BALING]

TARIKH : 30 MAC 2023 (KHAMIS)

SOALAN

TUAN HASSAN BIN SAAD [BALING] minta **MENTERI PENDIDIKAN** menyatakan perancangan bagi memperluas model Tahfiz Ulul Albab bagi menambah bilangan pelajar yang hafiz Al-Quran di sekolah di bawah Kementerian.

JAWAPAN

Tuan Yang di-Pertua,

Untuk makluman Ahli Yang Berhormat, sehingga Januari 2023, Tahfiz Model Ulul Albab (TMUA) telah dilaksanakan di 11 buah sekolah menengah kebangsaan agama (SMKA) dan empat buah sekolah berasrama penuh (SBP) melibatkan 7,444 orang murid. Selain itu, sebanyak 21 buah sekolah agama bantuan kerajaan (SABK) melaksanakan Kurikulum Bersepadu Tahfiz (KBT) melibatkan seramai 5,438 orang murid. Dalam tempoh lima tahun pelaksanaan TMUA, seramai 3,450 murid yang telah berjaya menghafaz 30 juzuk al-Quran dan menguasai tiga aspek kemenjadian murid iaitu quranik, ensiklopedik dan ijtihadik.

Kementerian Pendidikan Malaysia (KPM) sedang meneliti untuk memperluaskan pelaksanaan model TMUA kepada 12 buah sekolah di seluruh negara.

KPM berhasrat melalui pengintegrasian komponen akademik dan pendidikan al-Qur'an ini diharap dapat melahirkan generasi murid yang menghafaz al-Quran (al-hafiz), menguasai dan mengamalkan ilmu al-Quran di samping ilmu yang lain.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN AHMAD FADHLI BIN SHAARI
[PASIR MAS]**

SOALAN

TUAN AHMAD FADHLI BIN SHAARI [PASIR MAS] minta **MENTERI PENGANGKUTAN** menyatakan sama ada Kementerian bercadang menaik taraf Lapangan Terbang Sultan Ismail Petra (LPTSIP) ke taraf lapangan terbang antarabangsa agar ia dapat memudahkan urusan kemasukan pelancong dan pelabur antarabangsa ke negeri Kelantan.

JAWAPAN

Tuan Yang Di Pertua,

1. Untuk makluman Yang Berhormat, pada masa ini, negara telah pun mempunyai enam (6) buah Lapangan Terbang Antarabangsa iaitu KLIA, Kota Kinabalu, Kuching, Pulau Pinang, Langkawi dan Johor Bahru. Lapangan-lapangan terbang domestik lain termasuk juga Lapangan Terbang Sultan Ismail Petra (LTSIP) berperanan sebagai *feeder* kepada lapangan-lapangan terbang antarabangsa ini.
2. Walaupun LTSIP tidak dikategorikan sebagai lapangan terbang antarabangsa/hub penerbangan serantau, namun ia masih boleh mengendalikan operasi penerbangan antarabangsa berjadual dan tidak berjadual seperti mana lapangan-lapangan terbang domestik yang lain seperti di Melaka, Kuantan dan Ipoh.
3. Dalam hubungan ini, Kementerian Pengangkutan sentiasa menggalakkan syarikat-syarikat penerbangan Malaysia dan asing untuk menyediakan dan menambah kekerapan perkhidmatan penerbangan bagi laluan-laluan domestik dan antarabangsa ke LTSIP. Pada masa ini, operasi penerbangan ke/dari LTSIP hanya melibatkan penerbangan bagi laluan domestik sahaja bagi laluan Kuala Lumpur, Subang, Pulau Pinang, Langkawi, Johor Baru, Kota Kinabalu, Kuching dengan jumlah kekerapan penerbangan sebanyak 136 kali seminggu.
4. Dalam hubungan ini, sebarang cadangan untuk menyedia dan menambah kekerapan jadual penerbangan bagi mana-mana laluan termasuk laluan ke LTSIP adalah merupakan perancangan yang ditentukan sendiri oleh syarikat-syarikat penerbangan berdasarkan *commercial viability* sesuatu laluan dan tertakluk kepada kelulusan daripada Suruhanjaya Penerbangan Malaysia (MAVCOM) dan Pihak Berkuasa Penerbangan Awam (CAAM) sebelum ia dapat dilaksanakan.
5. Untuk makluman Yang Berhormat, pihak Kementerian pada masa ini telah memulakan kajian *National Airports Strategic Plan* (NASP) di

bawah Rancangan Malaysia Ke-12 (RMKe-12) pada Mac 2022 yang akan mengambil masa selama 18 bulan untuk disiapkan. Kajian ini penting untuk menentukan keperluan pembangunan jangka panjang lapangan terbang/ padang terbang di Malaysia berdasarkan keperluan industri semasa selari dengan jaringan kesalinghubungan sistem pengangkutan negara.

6. Kajian NASP ini akan turut mengkaji fungsi dan peranan setiap lapangan terbang di dalam sistem jaringan lapangan terbang di Malaysia dan kapasiti pihak-pihak yang terlibat dalam operasi lapangan terbang, serta mencadangkan strategi terbaik bagi satu sistem jaringan lapangan terbang negara yang lebih holistik. Dalam hubungan ini, kajian ini akan turut meneliti sama ada terdapat keperluan untuk LTSIP dijadikan sebagai sebuah lapangan terbang antarabangsa/hub penerbangan serantau atau kekal dengan status semasa.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : YB TUAN AHMAD FADHLI BIN SHAARI
[PASIR MAS]**

SOALAN

YB TUAN AHMAD FADHLI BIN SHAARI (PASIR MAS) minta **MENTERI PERPADUAN NEGARA** menyatakan bentuk bantuan yang telah diberi oleh Kementerian kepada setiap perpustakaan negeri di seluruh negara bagi memastikan setiap premis ini dilengkapi dengan bahan bacaan dan fasiliti yang mencukupi dan lengkap.

JAWAPAN

Tuan Yang Di-Pertua,

1. Perpustakaan Negara Malaysia yang sebelum ini di bawah Kementerian Pelancongan dan Kebudayaan Malaysia telah **ditempatkan di bawah Kementerian Perpaduan Negara berkuat kuasa 03 Disember 2022.**

2. Perpustakaan Negara Malaysia telah **menyalurkan peruntukan di bawah Bantuan Belanja Mengurus Sumbangan Kerajaan Persekutuan** kepada Perbadanan Perpustakaan Awam Negeri **mulai 1992**. Peruntukan yang telah disalurkan kepada semua Perbadanan Perpustakaan Awam Negeri **sehingga tahun 2022 berjumlah RM1.2 bilion**. Maklumat terperinci penyaluran Bantuan Kerajaan Persekutuan kepada Perbadanan Perpustakaan Awam Negeri seperti di **Lampiran I**.

3. Bantuan kewangan ini merupakan pemberian Kerajaan Persekutuan bertujuan untuk **membantu mempertingkatkan pembangunan perpustakaan awam di negeri-negeri** dan menyeimbangkan pembangunan rangkaian perpustakaan dan koleksi negeri seiring dengan perkembangan semasa. Berikut adalah peruntukan kewangan Kerajaan Persekutuan mengikut negeri kepada Perpustakaan Awam Negeri bagi tempoh 2020-2022.

SOALAN NO : 32**PERUNTUKAN BANTUAN KEWANGAN KERAJAAN PERSEKUTUAN
KEPADA PERPUSTAKAAN AWAM NEGERI (PAN) TAHUN 2020 - 2022**

BIL	NEGERI	TAHUN		
		2020	2021	2022
1	Johor	3,722,737.23	3,717,542.02	3,749,970.55
2	Kedah	3,601,261.67	3,596,066.45	3,627,435.33
3	Kelantan	1,492,128.72	1,486,933.50	1,499,904.18
4	Melaka	3,713,449.85	3,708,254.63	3,740,602.14
5	Negeri Sembilan	3,078,429.09	3,073,233.86	3,100,042.02
6	Pahang	4,417,600.78	4,412,405.56	4,450,895.46
7	Perak	4,392,090.13	4,386,894.90	4,425,162.27
8	Perlis	1,451,678.78	1,446,483.55	1,459,101.38
9	Pulau Pinang	6,235,290.48	6,230,095.27	6,724,441.08
10	Sabah	14,888,013.59	14,882,818.37	15,012,642.83
11	Sarawak	8,747,174.04	8,741,978.82	8,818,236.06
12	Selangor	9,614,016.68	9,608,821.47	9,692,640.27
13	Terengganu	5,913,761.00	5,908,565.79	5,960,106.86
Jumlah Disalur (RM)		71,267,632.02	71,200,094.19	72,261,180.43
Pangkalan Data (RM)		3,232,367.98	3,299,905.81	2,238,819.57
Jumlah Peruntukan Diterima (RM)		74,500,000.00	74,500,000.00	74,500,000.00
Jumlah Keseluruhan (RM)		223,500,000.00		

LAMPIRAN I

**PERUNTUKAN BANTUAN BELANJA MENGURUS SUMBANGAN
KERAJAAN PERSEKUTUAN KEPADA PERPUSTAKAAN AWAM
NEGERI (BKPP)
TAHUN 1992-2022**

TAHUN	PERUNTUKAN (RM)
1992	12,354,450.00
1993	14,054,000.00
1994	14,207,500.00
1995	16,282,200.00
1996	16,185,000.00
1997	16,535,000.00
1998	13,559,500.00
1999	12,993,000.00
2000	13,000,000.00
2001	13,000,000.00
2002	13,500,000.00
2003	14,500,000.00
2004	16,000,000.00
2005	17,000,000.00
2006	39,200,000.00
2007	44,597,000.00
2008	49,064,600.00
2009	53,965,746.69
2010	30,432,200.00

TAHUN	PERUNTUKAN (RM)
2011	33,000,000.00
2012	61,445,155.00
2013	60,718,481.00
2014	62,055,945.34
2015	66,501,691.73
2016	71,309,000.00
2017	67,376,100.00
2018	71,600,000.00
2019	71,600,000.00
2020	74,500,000.00
2021	74,500,000.00
2022	74,500,000.00
JUMLAH KESELURUHAN	1,209,536,569.98

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN
DARIPADA : DATUK SERI IR.DR. WEE KA SIONG
[AYER HITAM]
TARIKH : 30 MAC 2023 (KHAMIS)

SOALAN

DATUK SERI IR.DR. WEE KA SIONG [AYER HITAM] minta **MENTERI KEWANGAN** menyatakan bagaimana rasionalisasi subsidi secara bersasar dapat dijalankan. Adakah sistem percukaian baharu akan diperkenalkan.

JAWAPAN

Tuan Yang di-Pertua,

Bagi mengimbangi tanggungan subsidi dengan keperluan untuk terus memelihara kebajikan dan kesejahteraan rakyat, Kerajaan sedang meneroka langkah menambah baik pemberian subsidi secara lebih bersasar bagi mengurangkan ketirisan dalam masa yang sama supaya penjaminan subsidi dapat digunakan bagi mengoptimumkan perbelanjaan kepada program dan projek yang memberi nilai tambah kepada ekonomi negara.

Kerajaan sedang mengkaji pelaksanaan pemberian subsidi secara bersasar berasaskan kepada model yang bersesuaian mengikut keperluan dan kebolehlaksanaan. Kerajaan turut meneliti dan mengenalpasti kaedah yang bukan sahaja berkesan malah menjimatkan masa serta memberi implikasi kewangan yang paling minimum kepada Kerajaan. Pelaksanaan pemberian subsidi secara

bersasar ini akan dibuat secara berperingkat tertakluk kepada ketersediaan serta mengekalkan fokus Kerajaan dalam memastikan kos sara hidup rakyat terutamanya golongan B40 tidak terjejas.

Untuk makluman Ahli Yang Berhormat, pada masa ini, Kerajaan belum bercadang untuk memperkenalkan sistem percukaian baharu.

Pada masa ini, rakyat sedang dalam fasa pemulihan pasca krisis COVID-19 serta menghadapi cabaran kos sara hidup. Inflasi makanan tahun 2022 pada kadar 5.8 peratus dan ini lebih menjejaskan golongan yang berpendapatan rendah. Pada masa yang sama, GST juga merupakan cukai yang bersifat regresif.

Sebarang perubahan polisi berkaitan cukai akan mengambil kira kesan terhadap ekonomi dan kos sara hidup rakyat. Sehubungan itu, Kerajaan sentiasa mengawasi kedudukan ekonomi semasa dan mempertimbangkan langkah-langkah fiskal yang bersesuaian dengan keperluan jangka pendek dan sederhana.

Dalam Belanjawan 2023, Kerajaan telah mengambil pendekatan lebih progresif sebagai langkah baharu meluaskan asas cukai kepada mereka yang punyai kemampuan. Ini termasuk meningkatkan cukai pendapatan bagi individu bagi mereka dengan pendapatan bercukai melebihi RM230,000 setahun, dan pengumuman cadangan Cukai Barangan Mewah dan Cukai Keuntungan Modal ke atas jualan saham tidak tersenarai

Kerajaan akan terus mengadakan libat urus dengan semua pihak berkepentingan bagi mengkaji aspek pembaharuan sistem percukaian.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN AHMAD FADHLI BIN SHAARI
[PASIR MAS]**

SOALAN

TUAN AHMAD FADHLI BIN SHAARI [PASIR MAS] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan perancangan Kementerian di dalam menangani isu banjir termenung di Kampung Tersang, Rantau Panjang dan kawasan-kawasan sekitar Parlimen Pasir Mas.

JAWAPAN

Tuan Yang di-Pertua,

1. Kementerian melalui Jabatan Pengairan dan Saliran (JPS) sedang melaksanakan projek-projek tebatan banjir di Lembangan Sungai Golok dalam usaha mengurangkan risiko banjir semasa musim Monsun Timur Laut khususnya di jajahan Jeli, Rantau Panjang, Pasir Mas dan Tumpat. Projek-projek dalam pelaksanaan adalah seperti berikut:

- a. Pembangunan Lembangan Sungai Bersepadu (PLSB) Sungai Golok (KESBAN) Fasa 1 dengan siling kos projek sebanyak RM656 juta yang dijangka siap sepenuhnya pada Ogos 2024; dan
- b. Pembangunan Lembangan Sungai Bersepadu (PLSB) Sungai Golok Fasa 2 yang telah diluluskan di bawah *Rolling Plan 2* (RP2) Rancangan Malaysia ke-12, dengan kos projek berjumlah RM 879 juta dan sedang dalam proses perolehan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN AHMAD FADHLI BIN SHAARI
[PASIR MAS]**

SOALAN

TUAN AHMAD FADHLI BIN SHAARI [PASIR MAS] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan inisiatif oleh Kementerian bagi membantu Kerajaan Negeri Kelantan dalam memulihara sungai-sungai yang tercemar di Negeri Kelantan.

JAWAPAN

1. Kementerian Sumber Asli, Alam Sekitar dan Perubahan Iklim (NRECC) melalui Jabatan Pengairan dan Saliran (JPS) dan Jabatan Alam Sekitar (JAS) telah mengambil langkah-langkah berikut untuk memastikan sungai yang menjadi sumber air tidak tercemar:
2. Melaksana pendekatan Pengurusan Lembangan Sungai Bersepadu (Integrated River Basin Management - IRBM) yang memerlukan penglibatan semua pihak berkepentingan bagi mengelakkan berlakunya insiden pencemaran, memastikan sumber air yang bersih dan mencukupi, mengurangkan risiko banjir serta meningkatkan pemuliharaan alam sekitar. Pelan IRBM juga memberi syor kepada kerajaan negeri mengenai tindakan menangani isu-isu strategik dalam lembangan agar selari dengan matlamat pemeliharaan kelestarian alam sekitar;
3. Melaksana Program Pembangunan Denai Sungai Kebangsaan (DSK) iaitu pendekatan Nature-Based-Solutions (NBS) bagi menangani masalah pembuangan sisa secara haram dan meningkatkan cakna masyarakat terhadap keindahan sungai, meramaikan pengunjung tepian

sungai untuk riadah dan secara tidak langsung boleh menghindari aktiviti pembuangan sisa haram;

4. Mempertingkatkan penguatkuasaan AKAS 1974 dan Peraturan-Peraturan di bawahnya melalui pemantauan dan pemeriksaan berkala ke atas premis-premis yang menghasilkan buangan seperti efluen, sisa toksik dan berbahaya yang terletak di hulu takat pengambilan air melalui operasi bersepadu yang melibatkan pelbagai agensi penguatkuasaan ke atas punca yang dikenalpasti bermasalah;

5. Melaksanakan operasi khas seperti program penguatkuasaan secara berfokus kepada punca-punca pencemaran tertentu, sektor atau jenis industri tertentu, kawasan tertentu atau hot spot yang mempunyai risiko untuk menyebabkan pencemaran. Selain dari itu, pemantauan melalui rondaan dan dron di kawasan-kawasan berisiko berlaku pencemaran juga dipertingkatkan;

6. Mengambil tindakan undang-undang yang tegas terhadap ketidakpatuhan yang dikesan semasa siasatan penguatkuasaan dilakukan; dan

7. Melaksanakan program kesedaran kepada orang awam, pihak punca-punca pencemaran seperti industri dan pemaju projek pembangunan bagi meningkatkan tahap kesedaran mereka terhadap kepentingan penjagaan alam sekitar dan sumber air.

8. Menyediaan Pelan Induk Saliran Mesra Alam (PISMA) di bandar-bandar utama di seluruh Malaysia untuk digunakan sebagai panduan dan rujukan bagi menaiktaraf, membina sistem saliran serta merancang pembangunan masa hadapan yang lebih terancang, sistematik dan mapan bagi mengurangkan risiko banjir kilat dan mengawal pencemaran akibat pembangunan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS (2023)**

PERTANYAAN : BUKAN LISAN

**DARIPADA : YB DR. AHMAD FAKHRUDDIN BIN
FAKHRURAZI
[KUALA KEDAH]**

SOALAN

DR. AHMAD FAKHRUDDIN BIN FAKHRURAZI [KUALA KEDAH] minta **MENTERI PELANCONGAN, SENI DAN BUDAYA** menyatakan bilangan pelancong asing mengikut negara yang memasuki Malaysia pada tahun 2022.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Sejak dari pembukaan sempadan negara pada 1 April 2022, pelbagai usaha strategik telah dilaksanakan oleh Kementerian Pelancongan, Seni dan Budaya (MOTAC) bagi memulihkan kembali sektor pelancongan selepas menerima kesan teruk akibat penularan pandemik Covid-19.
2. Pemulihan industri pelancongan dapat dilihat bukan sahaja dari data pelancongan tetapi juga dari prestasi trafik penumpang udara dan metrik hotel samada di peringkat global mahupun antarabangsa. Malah, permintaan yang lebih kukuh dari jangkaan juga mewujudkan keperluan peningkatan operasi dan tenaga kerja yang mendadak terutama sekali dalam syarikat pelancongan dan infrastruktur, terutamanya lapangan terbang, kerana pemulihan adalah lebih cepat daripada yang dijangkakan.

Tuan Yang di-Pertua,

3. Malaysia telah merekodkan jumlah kemasukan pelancong asing seramai 10,070,964 orang sepanjang tahun 2022. Namun jumlah ini adalah masih kurang 61.4% jika dibandingkan dengan tempoh sama bagi tahun 2019 yang merekodkan 26,100,784 orang pelancong.
4. Pembukaan semula sempadan negara sejak 1 April lalu serta pemulihan ke fasa endemik telah menyaksikan peningkatan ketibaan pelancong asing ke Malaysia bagi setiap bulan. Ini dapat dilihat dalam syer jumlah ketibaan pelancong asing berbanding tahun 2019 yang semakin bertambah pulih bermula April (-81.8%), Mei (-68%), Jun (-59.5%), Julai (-55.4%), Ogos (-52.9%), September (-37.6%), Oktober (-33.8%), November (-32.4%) dan Disember (-7.6%).

NO. SOALAN : 36

4. Jumlah ketibaan pelancong asing tertinggi pada tahun 2022 adalah dari negara Singapura iaitu sebanyak 5,222,991 orang pelancong, diikuti dengan negara Indonesia seramai 1,481,739 orang pelancong. Sementara itu, Thailand, India dan Brunei juga turut menjadi di antara penyumbang utama bagi kemasukan pelancong iaitu masing-masing dengan 715,528, 324,548 dan 301,757 orang pelancong.

5. Kesimpulannya, sektor pelancongan negara dilihat semakin pulih dari kesan teruk yang dialami akibat dari penularan pandemik Covid-19. Justeru, usaha promosi yang berterusan harus dipergiatkan bagi memastikan hala tuju dan masa depan sektor pelancongan negara terus berdaya saing, mampan dan lestari.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : LISAN

**DARIPADA : YB DATO' MUHAMMAD BAKHTIAR BIN
WAN CHIK [BALIK PULAU]**

TARIKH : 30 MAC 2023 (KHAMIS)

SOALAN

YB DATO' MUHAMMAD BAKHTIAR BIN WAN CHIK [BALIK PULAU] minta **MENTERI PELANCONGAN, SENI DAN BUDAYA** menyatakan tahap ketersediaan Kementerian mengadaptasi pembangunan teknologi dalam membentuk industri pelancongan yang mampan dan bersedia dengan sebarang kemungkinan penutupan pintu sempadan memandangkan terdapat kemunculan virus terbaru.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Kerajaan dan kesemua entiti dalam rangkaian ekosistem pelancongan hendaklah sentiasa bersiap sedia untuk mendepani ketidaktentuan dan cabaran masa depan. Menyedari hal ini, Kementerian Pelancongan, Seni dan Budaya (MOTAC) bersama-sama penggiat industri menerusi *Tourism Productivity Nexus (TPN)* telah menambahbaik pelan pemulihan sedia ada dan membangunkan Rangka Kerja Pemulihan Pelancongan 2.0 atau TRF 2.0. TRF 2.0 merupakan rangka tindakan komprehensif bagi menentu ukur dan membangunkan semula industri pelancongan untuk menjadi lebih kukuh dan lebih berdaya tahan (*resilient*) di samping menyumbang kepada pembangunan keseluruhan ekonomi dan peningkatan kualiti hidup secara mampan (*sustainable*).
2. Di bawah Tonggak 5 TRF 2.0, usaha-usaha akan ditumpukan ke arah memperkukuh pemulihan dengan ketahanan jangka panjang dan kesediaan menghadapi krisis. Antara strategi yang telah dikenalpasti dalam meningkatkan adaptasi dan kemahiran teknologi digital dalam industri pelancongan, seni dan budaya adalah:
 - i. Membangunkan Sistem Pelesenan dan Penguatkuasaan Pelancongan atau *Tourism Licensing and Enforcement System (TOURLIST)* yang menggantikan Sistem Pelesenan Industri Pelancongan (SPIP). Inisiatif ini bertepatan dengan landskap industri pelancongan negara yang terus berkembang dan berubah seiring dengan perkembangan teknologi digital seperti data raya, *business intelligence* dan pelbagai inovasi pintar yang lain;
 - ii. Penawaran e-baucar/rebat diskaun kepada pelancong domestik melalui penebusan dalam talian, kod QR dan laman sesawang

oleh rakan kerjasama industri seperti Express Rail Link Sdn Bhd (ERL), Keretapi Tanah Melayu Berhad (KTMB), persatuan pelancongan, penginapan dan minat khas antaranya *Malaysian Association of Hotels* (MAH), *Malaysia Budget & Business Hotel Association* (MyBHA), *Malaysian Association of Tour & Travel Agents* (MATTA), *Malaysian Inbound Tourism Association* (MITA), *Malaysian Inbound Chinese Association* (MICA), *Malaysian Indian Tour & Travel Association* (MITTA), *Malaysia Kampungstay and Homestay Association* (MKHA), *Malaysia Scuba Diving Association* (MSDA), *Malaysian Association of Theme Parks & Family Attractions* (MATFA) dan Persatuan Pengurusan Kompleks Malaysia (PPKM) serta syarikat penerbangan domestik dalam menawarkan pelbagai pakej destinasi pelancongan, penginapan, tiket pengangkutan (udara dan darat), dan pelancongan minat khas;

- iii. Menggalakkan promosi, pemasaran, dan aktiviti jual beli produk pelancongan budaya secara digital oleh para usahawan kraf di bawah Kraftangan Malaysia, misalnya penggunaan platform seperti E-Kraf Bazaar, *My CraftShoppee* (MCS), E-Dagang Karyaneka, *Journify* dan aplikasi mudah alih – *CraftOnTheGo*;
- iv. Mendigitalkan informasi dan kandungan (*content*) seni, budaya dan warisan dalam usaha mempromosi dan menyemarakkan produk pelancongan budaya, antaranya:
 - a. kolaborasi antara Kraftangan Malaysia dan *Google Arts and Culture* (GAC) dalam memudahkan pengguna mencari maklumat keunikan produk kraf warisan menerusi carian '*Kuala Lumpur Craft Museum*'; dan
 - b. pembangunan pangkalan data seni, budaya, warisan dan pelancongan, misalnya program Pemetaan Budaya (*Cultural Mapping*) oleh Jabatan Kebudayaan dan Kesenian Negara (JKKN) dan Jejak Seni Malaysia oleh Lembaga

NO. SOALAN : 37

Pembangunan Seni Visual Negara (LPSVN). Inisiatif ini bertujuan memudahkan semua peringkat masyarakat termasuk pelancong untuk mengakses maklumat berkaitan seni budaya, warisan dan pelancongan negara.

- v. Mewujudkan galeri-galeri maya yang mengadaptasi teknologi seperti Muzium Kraf - Eksplorasi Maya oleh Kraftangan Malaysia;
- vi. Mewujudkan media atau platform bagi penggiat-penggiat seni budaya menguar-uarkan sebarang aktiviti/program seni budaya masing-masing, misalnya JKKN TV oleh JKKN, serta Go Gallery oleh LPSVN;
- vii. Menggalakkan para penggiat industri pelancongan tempatan mempromosikan tawaran dan pakej-pakej pelancongan secara percuma menerusi halaman *Deals & Packages* pada laman web www.malaysia.travel. Sehingga Jan 2023, lebih 1,330 pakej dan tawaran yang ditawarkan menerusi platform ini yang melibatkan lebih 870 pengusaha pelancongan. Bagi pelancongan antarabangsa pula, antara kerjasama yang dilaksanakan oleh Tourism Malaysia adalah bersama Expedia Group bagi memacu kedatangan pasaran utama ke Malaysia seperti Australia, United Kingdom dan Amerika Syarikat;
- viii. Kerjasama antara *Malaysia Convention & Exhibition Bureau* (MyCEB) dan *Business Events Council Malaysia* (BECM) dalam membangunkan *MySafe Business Events Planner* secara dalam talian. Inisiatif ini menyediakan maklumat terperinci kepada penganjur acara domestik dan tempatan mengenai perancangan awal dan penganjuran termasuk langkah-langkah keselamatan bagi membantu melancarkan penganjuran acara di Malaysia; dan

NO. SOALAN : 37

- ix. Mengajukan kursus, latihan dan peperiksaan secara dalam talian untuk penggiat industri sejak pandemik melanda pada tahun 2020, seperti Kursus E-CTRE, Kursus Pemandu Pelancong, Kursus Mesra Malaysia, Kursus *Travel Tours Enhancement Course* (TTEC), dan Kursus *Travel Tours Management Course* (TTMC). Pelaksanaan program-program ini secara digital telah mendapat sambutan dan maklum balas positif daripada penggiat-penggiat industri pelancongan. Misalnya, lebih 13,000 peserta telah menduduki Kursus E-CTRE dan lima (5) siri Peperiksaan Pemandu Pelancong telah diadakan dari tahun 2020 sehingga kini.
3. Selaras dengan perkembangan semasa, MOTAC akan terus berusaha meneroka dan meningkatkan pembangunan dan penggunaan teknologi terkini dalam usaha melancarkan penyampaian perkhidmatan kepada rakyat seiring dengan dasar-dasar terkini Kerajaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : DR. AHMAD FAKHRUDDIN BIN
FAKHRURAZI [KUALA KEDAH]**

SOALAN

DR. AHMAD FAKHRUDDIN BIN FAKHRURAZI [KUALA KEDAH]
minta **MENTERI KESIHATAN** menyatakan adakah projek rintis
penggunaan ubat PrEP (Pre- Exposure Prophylaxis) di beberapa
hospital, telah mendapat nasihat agama daripada pihak berkuasa
agama sebelum dilaksanakan.

JAWAPAN

Tuan Yang di-Pertua,

1. Pemberian PrEP ini dilaksanakan sebagai satu bentuk kajian rintis yang telah didaftarkan di dalam NMRR (National Medical Research Registry) dan lulus MREC (Medical Research Ethics Committee). Kajian ini bertujuan mengumpul maklumat mengenai keserasian, pengoperasian, penerimaan serta corak pengambilan oleh komuniti berisiko tinggi terhadap PrEP di Klinik Kesihatan di bawah KKM. Hanya setelah kesemua maklumat penting tersebut diperoleh oleh KKM, barulah satu dasar mengenai pemberian PrEP di Klinik Kesihatan kerajaan akan dicadangkan sekiranya perlu.
2. Bagi tujuan pembangunan dasar itu nanti, KKM telah merancang satu bentuk konsultasi kebangsaan melibatkan pelbagai pihak berkepentingan dalam hal ini. KKM melihat pemberian PrEP ini sebagai langkah mencegah selaras dengan skop fungsi KKM yang utama iaitu mencegah penularan jangkitan HIV, dan bukannya penggalak tingkah laku songsang dan rambang.
3. Sebagai langkah awal, KKM telah mengadakan Seminar HIV dan Islam di Selangor dengan kerjasama Jabatan Kesihatan Negeri Selangor dan Jabatan Agama Islam Selangor (JAIS) pada 27 Jun 2022 bagi meneroka perkara ini. Melalui perbincangan singkat, beberapa isu berbangkit telah diketengahkan seperti hukum penghidap HIV yang enggan memulakan rawatan sehingga menjangkiti isteri dan bayi dalam kandungan serta kewajaran ubat PrEP bagi mencegah jangkitan.
4. Ini disusuli pula dengan perbincangan awal antara KKM dengan JAKIM pada 20 Disember 2022, bertujuan untuk mendapatkan pandangan JAKIM berkenaan pemberian PrEP daripada sudut agama. Dalam mesyuarat tersebut, KKM telah membentangkan projek rintis PrEP, termasuk penerangan objektif serta kaedah pelaksanaan.
5. Selain itu, Jabatan Kesihatan Negeri Melaka telah mengadakan sesi "*round table discussion*" dengan penglibatan Jabatan Agama Islam

NO. SOALAN : 38

Negeri. Keputusan perbincangan secara dasarnya memberi hukum harus pada pemberian PrEP, namun menegaskan elemen kerohanian dan kawalan perlu seiring.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DR. AHMAD FAKHRUDDIN BIN FAKHRURAZI
[KUALA KEDAH]**

SOALAN

DR. AHMAD FAKHRUDDIN BIN FAKHRURAZI [KUALA KEDAH] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah langkah jangka panjang untuk mengurangkan mendapan di muara Sungai Kedah.

JAWAPAN

Tuan Yang di-Pertua,

1. Kementerian Sumber Asli, Alam Sekitar dan Perubahan Iklim (NRECC) telah menyiapkan Pelan Pengurusan Pantai Bersepadu (*Integrated Shoreline Management Plan* - ISMP) Negeri Kedah pada tahun 2022. Kajian ISMP berfungsi sebagai satu medium bantuan *Decision Support System* (DSS) bagi perancangan zon persisiran pantai untuk Pihak Berkuasa Tempatan, Kerajaan Negeri dan pihak berkepentingan yang lain bagi menggalakkan pembangunan yang terancang melalui strategi pencegahan dan langkah berjaga-jaga bagi mengurangkan impak negatif kepada alam sekitar secara am dan kawasan persisiran pantai secara khusus.

2. Merujuk kepada ISMP Negeri Kedah, bagi mengekalkan kestabilan muara sungai dan keselamatan pelayaran, langkah yang perlu diambil adalah pengorekan muara secara berkala. Selain itu, kajian hidraulik terperinci perlu dilaksanakan di kawasan muara sungai tersebut untuk mengenalpasti punca-punca yang menyebabkan pemendapan berlaku serta langkah mengatasinya. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DR. AHMAD FAKHRUDDIN BIN FAKHRURAZI
[KUALA KEDAH]**

SOALAN

DR. AHMAD FAKHRUDDIN BIN FAKHRURAZI [KUALA KEDAH]
minta **MENTERI PERTANIAN DAN KERTERJAMINAN MAKANAN**
menyatakan apakah mekanisme yang dilaksanakan oleh Kementerian
bagi mengawal harga keperluan petani seperti baja dan racun.

JAWAPAN

Tuan Yang di-Pertua,

Kementerian ini tidak mempunyai kuasa secara langsung untuk mengawal harga keperluan petani seperti baja dan racun kerana kawalan harga adalah di bawah bidang kuasa Kementerian Perdagangan Dalam Negeri dan Kos Sara Hidup (KPDN). Walaubagaimanapun, bagi mengurangkan kebergantungan petani kepada baja dan racun, Kementerian telah mengambil langkah-langkah seperti berikut:

- (i) Menggalakkan amalan pengurusan perosak bersepadu (IPM):

Amalan pengurusan perosak bersepadu adalah suatu amalan kawalan perosak tanaman yang menjadikan kawalan kimia sebagai pilihan terakhir setelah langkah-langkah kawalan kultura, biologi, mekanikal dan fizikal diambil. Ini akan dapat mengurangkan penggunaan racun kimia yang berlebihan terhadap perosak dan tanaman;

- (ii) Meningkatkan amalan pertanian baik melalui program pensijilan myGAP dan myOrganic:

Amalan pertanian baik merupakan suatu sistem pengurusan sumber di dalam pengeluaran pertanian secara lestari di mana penggunaan baja dan racun adalah mengikut kitaran dan keperluan tanaman;

- (iii) Menggalakkan penggunaan teknologi-teknologi moden seperti fertigasi dan *control environment farming*:

Fertigasi merupakan kaedah penanaman menggunakan air baja yang dibekalkan mengikut masa yang ditetapkan kepada tanaman bagi mengelakkan berlakunya pembaziran penggunaan baja manakala *control environment farming* merupakan satu sistem yang mengawal keperluan tanaman seperti cahaya, air, suhu dan kelembapan supaya tanaman

dapat tumbuh dengan lebih sihat dalam persekitaran yang dikawal;

- (iv) Menggunakan benih-benih berkualiti dan varieti yang rentan penyakit dan perubahan iklim:

Benih-benih berkualiti dan varieti yang rentan penyakit dan perubahan iklim akan dapat membantu tumbesaran tanaman tanpa terlalu bergantung kepada baja dan racun; dan

- (v) *Soil profiling*:

Soil profiling membantu mengenalpasti kandungan nutrien yang tersedia di dalam tanah dan membolehkan penggunaan baja dilaksanakan secara efisien mengikut kuantiti yang diperlukan oleh tanaman sahaja.

Kementerian juga dari semasa ke semasa mengadakan libat urus secara berkala dengan Kementerian/Jabatan atau Agensi yang berkaitan seperti KPDN dan MITI bagi membincangkan isu-isu berkaitan dengan input pertanian.

Sekian, terima kasih

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATUK HAJI AHMAD MARZUK BIN SHAARY
(PENGKALAN CHEPA)**

SOALAN

**DATUK HAJI AHMAD MARZUK BIN SHAARY (PENGKALAN
CHEPA)** minta **MENTERI KEMAJUAN DESA DAN WILAYAH**
menyatakan status projek Jambatan Pantai Sabak kerana
difahamkan kontraktor yang melaksanakan projek tersebut telah
diarahkan untuk tidak meneruskan projek.

JAWAPAN

Tuan Yang di-Pertua,

Untuk makluman Yang Berhormat, Projek Naiktaraf Jambatan Kg. Sabak, Pengkalan Chepa, Kelantan telah diluluskan oleh Kementerian Ekonomi di bawah Rancangan Malaysia Kedua Belas (RMKe-12) *Rolling Plan* 1 tahun 2021 dengan siling berjumlah RM23.5 juta. Skop projek ialah naik taraf jalan sepanjang 0.5 km dengan spesifikasi JKR R2 dan sebuah jambatan. Agensi Pelaksana projek ini ialah Jabatan Kerja Raya (JKR).

Kontraktor projek ini telah dilantik pada 6 April 2022. Projek ini dijangka siap pada akhir tahun 2024. Status kemajuan sebenar projek ini ialah 21.20% berbanding jadual kerja 25.63%.

Untuk makluman Yang Berhormat juga, pelaksanaan projek ini berjalan lancar dan tiada arahan dikeluarkan untuk memberhentikan projek.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : DATO' HAJAH MUMTAZ BINTI MD NAWI
[TUMPAT]**

TARIKH : 30 MAC 2023 (KHAMIS)

SOALAN

DATO' HAJAH MUMTAZ BINTI MD NAWI [TUMPAT] minta **MENTERI PENDIDIKAN** menyatakan apakah perkembangan terhadap langkah-langkah yang telah diambil oleh pihak Kementerian dalam usaha memartabatkan Bahasa Melayu di persada antarabangsa.

JAWAPAN

Tuan Yang di-Pertua,

Kementerian Pendidikan Malaysia (KPM) menerusi Dewan Bahasa dan Pustaka (DBP) telah menubuhkan tiga entiti bagi memartabatkan bahasa Melayu pada peringkat antarabangsa, iaitu Majlis Antarabangsa Bahasa Melayu (MABM), Majlis Bahasa Brunei Darussalam-Indonesia-Malaysia (MABBIM) dan Majlis Sastera Asia Tenggara (Mastera).

MABM berperanan sebagai badan penyelaras perancangan dan pelaksanaan program serta aktiviti pembinaan, pengembangan, pemupukan, pemeliharaan dan pemantapan bahasa Melayu pada peringkat antarabangsa. Antara aktiviti yang dijalankan termasuklah Pidato Antarabangsa Bahasa Melayu, Simposium Pengantarabangsaan Bahasa Melayu 2022 dan Persidangan Penterjemahan Antarabangsa yang telah memasuki siri ke-18.

MABBIM pula bertujuan untuk membina dan mengembangkan bahasa Melayu supaya menjadi bahasa peradaban tinggi, bahasa ilmu, bahasa sains, bahasa teknologi moden, bahasa perusahaan dan bahasa ekonomi. Antara kejayaan MABBIM termasuklah penerbitan 60 judul kamus istilah dan dua judul daftar istilah MABBIM dalam pelbagai bidang ilmu termasuk sains dan teknologi. Istilah yang dihasilkan boleh dirujuk secara dalam talian melalui Pusat Rujukan Persuratan Melayu (PRPM).

Untuk makluman Ahli Yang Berhormat, Mastera ditubuhkan untuk menjadi organisasi serantau sastera yang ternama pada peringkat antarabangsa dalam pembangunan dan pengembangan penyelidikan, penerbitan, pemasaran dan pengiktirafan sastera. Antara program Mastera termasuklah Seminar Antarabangsa Kesusasteraan Asia Tenggara (SAKAT), Siri Kuliah Kesusasteraan Bandingan Mastera dan penghargaan Sasterawan Muda Mastera.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK HAJI AHMAD MARZUK BIN SHAARY
[PENGKALAN CHEPA]**

SOALAN

DATUK HAJI AHMAD MARZUK BIN SHAARY [PENGKALAN CHEPA] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status pembangunan tebatan banjir yang telah diluluskan semasa Kerajaan Perikatan Nasional di sepanjang Sungai Kelantan yang turut melibatkan Parlimen Pengkalan Chepa.

JAWAPAN

Tuan Yang di-Pertua,

1. Kementerian Sumber Asli, Alam Sekitar dan Perubahan Iklim (NRECC) sedang melaksanakan projek tebatan banjir di Negeri Kelantan dalam usaha mengurangkan impak banjir semasa musim Monsun Timur Laut.
2. Bagi usaha mengurangkan risiko banjir bagi Jajahan Pengkalan Chepa, projek Pembangunan Lembangan Sungai Bersepadu (PLSB) Sg Kelantan Fasa 1 telah diluluskan di dalam *Rolling Plan 2* (RP2) , Rancangan Malaysia ke-12 dengan kos berjumlah RM699 juta.
3. Projek ini dalam peringkat pelaksanaan manakala skop kerja merangkumi kerja-kerja menaiktaraf Sungai Pengkalan Datu dan muaranya, pengerukan muara Sungai Kelantan serta penstabilan tebing sungai.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023

PERTANYAAN : BUKAN LISAN

DARIPADA : DATUK HAJI AHMAD MARZUK BIN SHAARY
[PENGKALAN CHEPA]

SOALAN

Minta **Perdana Menteri** menyatakan perkembangan terkini berkenaan Akta Mahkamah Syariah (Bidang Kuasa Jenayah) (Akta 355) dalam memperkasakan institusi Syariah.

JAWAPAN

**YB SENATOR DATO' SETIA DR. HAJI MOHD NAI'IM BIN HAJI
MOKHTAR
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

Pindaan kepada Akta Mahkamah Syariah (Bidang Kuasa Jenayah) 1965 [*Akta 355*] akan dibawa ke Parlimen bersama dengan suatu cadangan Akta yang baharu iaitu Rang Undang-Undang Mahkamah Syariah (Wilayah-Wilayah Persekutuan) dengan tujuan untuk memperkasa Mahkamah Syariah. Kedua-dua Rang Undang-Undang tersebut akan dibentangkan di Parlimen secara bersekali setelah mendapat persetujuan daripada Jemaah Kabinet bagi memastikan hasrat untuk pemerksaan Mahkamah Syariah dapat direalisasikan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB DATUK AHMAD MARZUK BIN SHAARY
(PENGKALAN CHEPA)**

SOALAN

DATUK AHMAD MARZUK BIN SHAARY [PENGKALAN CHEPA] minta **MENTERI KERJA RAYA** menyatakan pecahan kos penyelenggaraan jalan raya Persekutuan bagi setiap negeri bagi memastikan keselesaan dan keselamatan pengguna jalan raya.

JAWAPAN

Tuan Yang Di-Pertua,

Untuk makluman Ahli Yang Berhormat, jumlah keseluruhan Panjang Jalan Persekutuan di seluruh Malaysia adalah sepanjang 18,023.147 km. Pihak Kerajaan telah melantik **enam (6) buah syarikat konsesi** yang bertanggungjawab melaksanakan **kerja-kerja penyenggaraan di Jalan Persekutuan** di seluruh Malaysia mengikut zon seperti berikut:

1. Zon Tengah Timur iaitu negeri **Selangor, Pahang, Terengganu dan Kelantan**

Syarikat: Roadcare (M) Sdn. Bhd.

Tempoh Kontrak: April 2018 hingga 16 Februari 2026.

2. Zon Selatan iaitu negeri **Melaka, Negeri Sembilan dan Johor**

Syarikat: Selia Selenggara Selatan Sdn. Bhd.

Tempoh Kontrak: April 2018 hingga 16 Februari 2026.

3. Zon Utara iaitu negeri **Perak**

Syarikat: Belati Wangsa Sdn. Bhd.

Tempoh Kontrak: April 2018 hingga 16 Februari 2026.

4. Zon Utara iaitu **Pulau Pinang, Kedah dan Perlis**

Syarikat: THB Maintenance Sdn. Bhd.

Tempoh Kontrak: Ogos 2017 hingga 16 Ogos 2027.

5. Negeri **Sabah dan Wilayah Persekutuan Labuan**

Syarikat: Lintasan Resources Sdn. Bhd.

Tempoh Kontrak: September 2018 hingga 31 Ogos 2028.

6. Negeri **Sarawak**

Syarikat: DAL HCM Sdn. Bhd.

Tempoh Kontrak: September 2018 hingga 31 Ogos 2028.

Untuk makluman Ahli Yang Berhormat juga, pihak syarikat konsesi yang dilantik bertanggungjawab melaksanakan kerja penyenggaraan rutin iaitu skop kerja penyenggaraan pavemen, penyenggaraan bahu jalan, potong rumput, perabot jalan, mencuci jambatan dan pemetung, mencuci longkang serta pemeriksaan rutin. Syarikat konsesi juga bertanggungjawab melaksanakan kerja penyenggaraan berkala pavemen dan bukan pavemen yang dilaksanakan secara Arahan Kerja (AK) berdasarkan peruntukan yang diluluskan oleh Kementerian Kewangan. Pihak syarikat turut dipertanggungjawabkan untuk melaksanakan kerja kecemasan dengan membuat tindakan segera jika berlaku kejadian yang di luar jangka. Sebagai contoh, kerja membersihkan jalan setelah kejadian tanah runtuh, menyediakan pelan pengurusan trafik atau *Traffic Management Plan* (TMP) dan menyediakan laluan sementara bagi membolehkan jalan dilalui oleh kenderaan.

Pada tahun **2023**, Kementerian ini telah **diperuntukkan sebanyak RM1.409 billion di bawah program penyenggaraan Jalan Persekutuan**. Sehingga **Mac 2023** Kementerian ini telah membuat agihan peruntukan kepada negeri sebanyak **RM443.54 juta** bagi tujuan **penyenggaraan rutin, penyenggaraan berkala, penyenggaraan jambatan dan bayaran bil dan penyenggaraan lampu jalan dan lampu isyarat di Jalan Persekutuan Seluruh Malaysia**. Kelulusan peruntukan bagi setiap negeri adalah seperti di Lampiran A1.

Untuk makluman Ahli Yang Berhormat, Kementerian Kerja Raya melalui Jabatan Kerja Raya sentiasa komited dalam memastikan jalan sentiasa dalam keadaan yang selamat dan selesa dengan menjalankan kerja-kerja penyenggaraan rutin sepanjang tahun.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN AHMAD TARMIZI BIN SULAIMAN
(SIK)**

SOALAN

TUAN AHMAD TARMIZI BIN SULAIMAN [SIK] minta **MENTERI PERTAHANAN** menyatakan perancangan jangka masa panjang yang membabitkan veteran Angkatan Tentera Malaysia (ATM) sebagai pakar rujuk industri pertahanan

JAWAPAN

1. Kementerian Pertahanan sentiasa berusaha untuk memastikan kebajikan serta kelestarian hidup veteran Angkatan Tentera Malaysia (ATM) sentiasa terjaga. Warga veteran ATM yang telah didedahkan dengan pelbagai latihan berkaitan teknikal baik dalam atau luar negara terutamanya secara langsung daripada *Original Equipment Manufacturer* (OEM) adalah merupakan aset penting hasil pelaburan negara dalam mewujudkan kepakaran tempatan. Golongan ini yang mempunyai kepakaran secara teori dan praktikal dikenalpasti sebagai sumber modal insan paling strategik untuk diserap masuk ke dalam industri pertahanan negara.
2. Oleh yang demikian, salah satu teras utama dalam membangunkan industri pertahanan tempatan adalah dengan program pembangunan modal insan yang menepati keperluan industri. Program berstruktur akan dilaksanakan bagi memastikan kelancaran proses peralihan bakal pesara ATM yang berkepakaran untuk diserap masuk ke dalam industri.
3. Veteran ATM yang berkepakaran juga dicadang untuk diberikan latihan dan pengiktirafan yang sewajarnya bagi melayakkan mereka menjadi tenaga pengajar pusat pembangunan modal insan khusus bagi industri

SOALAN NO: 46

pertahanan yang dirancang dilaksanakan dengan penglibatan institut pengajian tinggi awam dan swasta berkaitan (IPTA/IPTS).

4. Kementerian Pertahanan juga berpandangan bahawa geran khas wajar diwujudkan bagi peningkatan kemahiran dan pemupukan semula kemahiran veteran ATM dalam memastikan kepakaran mereka dapat dimanfaatkan sebagai tenaga pakar untuk rujukan industri pertahanan negara. Perkara ini bukan hanya dapat menjamin sumber pendapatan anggota veteran terlibat, bahkan juga turut membawa pulangan besar kepada negara dari aspek pengekalan kepakaran dalam negara, penjimat kos pembangunan modal insan baharu serta menyokong pembangunan industri pertahanan negara secara langsung.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN AHMAD TARMIZI BIN SULAIMAN
[SIK]**

SOALAN

TUAN AHMAD TARMIZI BIN SULAIMAN [SIK] minta **MENTERI PENDIDIKAN** menyatakan isu menunggu hampir 6 bulan kemasukan ke sekolah khas bagi kanak-kanak lambat disebabkan oleh kelewatan pengesahan daripada pakar perubatan.

JAWAPAN

Tuan Yang di-Pertua,

Untuk makluman Ahli Yang Berhormat, Peraturan-Peraturan Pendidikan (Pendidikan Khas) 2013 menetapkan pengesahan diagnosis murid berkeperluan pendidikan khas (MBPK) oleh pengamal perubatan perlu dilaksanakan bagi membolehkan MBPK mendaftar ke sekolah pendidikan khas atau Program Pendidikan Khas Integrasi (PPKI). Pengesahan diagnosis ini boleh dilaksanakan melalui tiga kaedah iaitu:

- i. membawa anak atau anak jagaan terus ke klinik kesihatan atau hospital swasta. Kaedah ini mengambil masa antara 6 bulan hingga ke 1 tahun sebelum murid disahkan sebagai MBPK oleh pegawai perubatan atau pakar perubatan;
- ii. mendapatkan laporan penilaian awal daripada pegawai bidang khusus di Pusat Perkhidmatan Pendidikan Khas (3PK). Ibu bapa atau penjaga MBPK perlu mendapatkan temu janji dengan pihak 3PK bagi tujuan penilaian anak atau anak jagaan dari aspek psikologi, pendengaran, penglihatan, pertuturan bahasa dan cara kerja. Kaedah ini mengambil masa lebih kurang 1 bulan sebelum anak atau anak jagaan dirujuk ke klinik kesihatan atau hospital swasta dan keseluruhan proses akan mengambil masa kurang dari 6 bulan murid disahkan sebagai MBPK; dan
- iii. menghantar anak atau anak jagaan ke program saringan yang dilaksanakan oleh Kementerian Pendidikan Malaysia (KPM) melalui Pusat Perkhidmatan Pendidikan Khas bagi mengenal pasti murid yang mempunyai ciri-ciri berkeperluan pendidikan khas. Kumpulan sasaran program adalah murid berumur 9 tahun ke atas yang masih belum menguasai kemahiran membaca dan mengira. Program yang bermula pada tahun 2021 ini melibatkan kerjasama beberapa agensi iaitu KPM, Kementerian Kesihatan Malaysia (KKM), Jabatan Kebajikan Masyarakat, Bank Simpanan Nasional, institusi pengajian tinggi dan agensi swasta seperti Audiolab dan pusat terapi swasta. Murid yang terlibat dalam program ini akan disaring dan dinilai dalam aspek psikologi, pendengaran, penglihatan, pertuturan bahasa dan cara kerja oleh Pasukan Pelbagai Disiplin dari KPM dan KKM atau agensi swasta. Seterusnya, dalam program ini juga murid akan

SOALAN NO : 47

menjalani pemeriksaan perubatan bagi tujuan pengesahan diagnosis oleh pegawai perubatan atau pakar perubatan. Keseluruhan proses ini hanya mengambil masa selama 1 hari sahaja.

KPM komited dalam menggiatkan lagi program saringan ke seluruh negara bagi membantu mengatasi isu kelewatan pengesahan ketidakupayaan MBPK.

Sekian, terima kasih.

RT03

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN AHMAD TARMIZI BIN SULAIMAN [SIK]

SOALAN

TUAN AHMAD TARMIZI BIN SULAIMAN [SIK] minta **MENTERI PERTANIAN DAN KETERJAMINAN MAKANAN** menyatakan langkah membantu para petani yang terjejas akibat fenomena tanah jerlus (*hardpan*) di sawah padi sehingga menyebabkan ribuan hektar padi tidak dapat dituai kerana mesin jentuai tidak boleh beroperasi di sawah tersebut.

JAWAPAN

Tuan Yang Di Pertua,

Untuk makluman Ahli Yang Berhormat, tanah jerlus adalah keadaan di mana tanah sawah tidak mempunyai keupayaan galas tanah (*bearing capacity*) yang mencukupi bagi menampung penggunaan jentera pertanian untuk aktiviti ladang seperti penyediaan tanah (putaran kering / putaran basah), penanaman dan penuaian padi. Kejadian tanah jerlus adalah disebabkan oleh faktor berikut:-

- i) Perubahan iklim dan taburan hujan yang tidak menentu menyebabkan turunan hujan yang lebat dalam musim kering. Keadaan petak sawah yang sentiasa bertakung dengan air akan menjadikan tanah tidak mendapat tempoh *fallow period* (tempoh rehat) yang mencukupi untuk meningkatkan lapisan tanah keras (*hardpan*) tanah;
- ii) Sistem saliran yang tidak sempurna menyebabkan air mengambil masa untuk disalir keluar dari sawah;
- iii) Penggunaan jentera pertanian yang tidak bersesuaian secara berterusan; dan
- iv) Aktiviti penanaman padi yang tidak mengikut jadual penanaman yang ditetapkan mengakibatkan penuaian berlaku dalam musim hujan dan jentuai tidak dapat menjalankan aktiviti penuaian dengan sempurna.

Berdasarkan bancian yang dijalankan sehingga 31 Januari 2023, keluasan tanaman padi yang terlibat dengan masalah tanah jerlus adalah sebanyak 2,723.96 hektar meliputi keluasan kerosakan tanaman padi seluas 1,326.28 hektar dan kawasan berisiko jerlus seluas 1,397.68 hektar.

Antara tindakan yang telah diambil oleh pihak Kerajaan melalui agensi berkaitan bagi mengatasi masalah tanah jerlus ini adalah:

I. Perataan tanah sawah

Perataan Tanah Sawah (*land levelling*) bertujuan untuk membentuk permukaan tanah rata. Permukaan sawah yang rata adalah untuk menyokong sistem pengairan yang sempurna dan menyediakan keadaan terbaik bagi pertumbuhan pokok padi. Ia melibatkan proses dimana kedalaman air yang seragam di dalam lot sawah yang rata akan dapat membantu pengagihan air di dalam sawah lebih cekap dan seragam dan akan mengurangkan keadaan air yang bertakung (*water lodge*).

II. Penyelenggaraan Batas Parit Ladang

Penyelenggaraan Batas Parit Ladang membolehkan pengaliran air berlebihan/bertakung dalam petak sawah daripada merosakkan lapisan tanah keras (*hard pan*) yang menjurus kepada keupayaan galas tanah yang rendah (tanah jerlus).

III. Pengesyoran Mekanisasi yang sesuai

Penggunaan jentera di dalam petak sawah adalah dengan tahap kekuatan galas tanah bagi mengelakkan kerosakan pada tanah. Pengesyoran Jentera pertanian adalah mengikut kelas keupayaan galas tanah dari kelas 1 sehingga kelas 3.

Bagi kelas 1 adalah bagi tanah tidak jerlus. Jenis jentera yang sesuai untuk penyediaan tanah adalah dengan menggunakan bajak kering traktor 4 roda yang mempunyai berat kurang daripada 3 tan dan bajak basah atau membadi traktor 2 separa rantai jenis besi. Manakala bagi tujuan penuaian semua jenis jentuai boleh digunakan.

Kelas 2 adalah kelas bagi potensi jerlus di mana traktor yang sesuai untuk penyediaan tanah adalah traktor 2 roda dengan roda sangkar, traktor 4 separa rantai jenis besi dan traktor 2 separa rantai jenis besi. Manakala bagi tujuan penuaian jentera yang sesuai digunakan adalah jentuai mini, jentuai 4 separa rantai jenis besi dan *reaper binder*.

Kelas 3 merupakan kelas bagi tanah jerlus di mana jentera yang sesuai digunakan bagi tujuan penyediaan tanah adalah traktor 2 roda dengan roda sangkar dan traktor 4 separa rantai jenis besi. Manakala jentera jenis manual dan *reaper binder* adalah jenis jentera yang sesuai bagi tujuan penuaian.

iv. **Penambahbaikan Fizikal Tanah**

Penggunaan bahan pelengkap tanah (*soil amendment*) seperti *hydrogel*, *dolomite* dan *gypsum* yang bertindak sebagai penstabil tanah (*soil stabilizer*)/pengikat tanah (*soil binder*) boleh disyorkan untuk meningkatkan kepadatan tanah bagi memperbaiki tanah jerlus.

Selain itu, Kementerian juga sedang mempertimbangkan supaya pesawah yang terjejas akibat tanah jerlus berkecukupan untuk menerima bantuan daripada Tabung Bencana Tanaman Padi (TBTP).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN AHMAD TARMIZI BIN SULAIMAN
[SIK]**

SOALAN

Minta **Perdana Menteri** menyatakan penjelasan berkenaan isu perbelanjaan kesihatan guru KAFA yang tidak boleh menuntut apa-apa bantuan kewangan ataupun Guarantee Letter (GL) bagi perubatan di pusat kesihatan milik Kerajaan.

JAWAPAN

**YB SENATOR DATO' SETIA DR. HAJI MOHD NAI'IM BIN HAJI
MOKHTAR
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. Untuk makluman Ahli Yang Berhormat, bantuan perbelanjaan ataupun *Guarantee Letter (GL)* bagi kemudahan perubatan di fasiliti kesihatan milik Kerajaan diberikan menerusi kelayakan yang telah ditetapkan dalam Pekeliling Perkhidmatan Bilangan 21 Tahun 2009.
2. Pekeliling tersebut memperuntukkan kelayakan kemudahan kesihatan dan perbelanjaan kemudahan perubatan diberikan kepada mana-mana pegawai Perkhidmatan Awam Persekutuan dan Negeri bertaraf lantikan tetap, kontrak secara perkhidmatan (*Contract of Service*) dan sementara.
3. Sebagaimana Ahli Yang Berhormat sedia maklum, pelantikan Guru KAFA adalah di bawah bidang kuasa Agensi Pelaksana KAFA Negeri dan tidak disandarkan kepada mana-mana skim Perkhidmatan Awam Persekutuan mahupun skim Pegawai Perkhidmatan Pendidikan serta hanya menerima elaun daripada Kerajaan sebagaimana lantikan ketua kampung di bawah Kementerian Pembangunan Luar Bandar (KPLB). Oleh yang demikian, kemudahan ini tidak dapat diberikan kepada Guru KAFA sepertimana jawatan Personal MySTEP yang tidak layak menerima kemudahan ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN
DARIPADA : PANG HOK LIONG [LABIS]
TARIKH : 30 MAC 2023 (KHAMIS)

SOALAN

PANG HOK LIONG [LABIS] minta **MENTERI KEWANGAN** menyatakan secara terperinci apakah rancangan pemulihan atau bantuan kewangan yang akan disediakan Kerajaan Persekutuan bagi peniaga-peniaga serta keluarga yang telah mengalami kerugian tinggi dalam bencana banjir Johor pada amnya kawasan Labis dan khususnya Pekan Chaah yang 90% dimusnahkan selain daripada peruntukan RM60 juta yang telah diumumkan.

JAWAPAN

Tuan Yang di-Pertua,

Kerajaan telah menyalurkan peruntukan awal sebanyak 10 juta ringgit kepada Negeri Johor melalui Agensi Pengurusan Bencana Negara (NADMA) bagi tujuan pengurusan bencana dalam tempoh Monsun Timur Laut (MTL) tahun 2022/2023. Susulan daripada bencana banjir yang berlaku di Johor pada 1 Mac lalu, pihak NADMA telah membuat penyaluran peruntukan tambahan sebanyak 50 juta ringgit. Peruntukan sebanyak 60 juta ringgit ini bertujuan untuk menyampaikan bantuan bencana dengan kadar segera meliputi Bantuan Wang Ihsan, Bantuan Wang Ihsan Kematian, Bantuan Barangan Keperluan Asas dan Bantuan Pembaikan Rumah.

Kerajaan juga telah berbincang dengan pihak bank bagi membenarkan moratorium memahami beban yang dihadapi oleh mangsa banjir terutamanya yang terjejas teruk akibat bencana tersebut. Misi utama Kerajaan ketika ini adalah bagi memastikan Projek Rancangan Tebatan Banjir dapat dibuat dengan kadar segera. Di Johor, tiga projek tebatan banjir bakal dilaksanakan pada tahun ini dengan dua projek tebatan banjir baharu iaitu Rancangan Tebatan Banjir Lembangan Sungai Muar Fasa 3 di Segamat dan Rancangan Tebatan Banjir Bandar Batu Pahat sebagai tambahan kepada projek Rancangan Tebatan Banjir Lembangan Sungai Johor Fasa 1 di Kota Tinggi yang telahpun diumumkan dalam Belanjawan 2023.

Sekian, terima kasih.

PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS 2023

PERTANYAAN : BUKAN LISAN

DARIPADA : DATUK ALI ANAK BIJU [SARATOK]

SOALAN

YB DATUK ALI ANAK BIJU [SARATOK] minta MENTERI
PEMBANGUNAN KERAJAAN TEMPATAN menyatakan:

- (a) langkah yang akan dilaksanakan oleh pihak Kementerian untuk menambah baik mutu perkhidmatan Jabatan Bomba dan Penyelamat di kawasan luar bandar dan secara khususnya di Saratok memandangkan kerapnya berlaku kebakaran di kampung atau rumah panjang terutamanya di Saratok; dan
- (b) status cadangan pembinaan balai bomba yang baru di Kabong.

JAWAPAN

Tuan Yang di-Pertua,

- (a) Untuk makluman Ahli Yang Berhormat, Kementerian Pembangunan Kerajaan Tempatan (KPKT) melalui Jabatan Bomba dan Penyelamat Malaysia (JBPM) komited untuk melaksanakan pelbagai program yang menyokong kepada ***community based disaster management*** termasuklah program kesedaran berkaitan pengurusan bencana, pencegahan kebakaran dan penyelamatan terutamanya melibatkan kawasan-kawasan perkampungan serta penempatan yang berada di luar bandar.

Sehubungan itu, Kementerian telah melaksanakan pelbagai inisiatif dan pendekatan dalam memastikan komuniti setempat menjadi sebahagian daripada pasukan bertindak kecemasan. Antara program yang telah dilaksanakan adalah seperti berikut:

- i. meningkatkan penubuhan **Pasukan Bomba Sukarela (PBS)**. Sehingga kini, terdapat sebanyak **357 pasukan** telah ditubuhkan di seluruh negara dengan keahlian seramai **13,559 orang**;
- ii. memperkasakan penubuhan **Bomba Komuniti** yang kini terdapat sebanyak **2,792 pasukan** dengan keahlian seramai **39,500 orang**. Ahli-ahli Bomba Komuniti ini akan diberikan kefahaman tentang pencegahan kebakaran, latihan kebombaian dan penyediaan peralatan asas kawalan awal kebakaran seperti alat pemadam api;
- iii. melaksanakan dan mempertingkatkan **kempen kesedaran keselamatan kebakaran** termasuk **Program 1 Rumah 1 Alat Pemadam Api (1RAPI)**, **Program Sedia Urus Isi Rumah (SURI)** dan lain-lain; dan
- iv. JBPM telah menjadi pasukan teras di dalam menubuh serta memperkasakan pasukan ***Community Emergency Response Team (CERT)*** di **negeri Sarawak** yang mana ahli-ahlinya terdiri daripada penduduk rumah panjang dan pedalaman. JBPM memainkan peranan penting dalam memberi pendedahan serta latihan bagi mengendalikan sebarang insiden kecemasan termasuklah kebakaran dan penyelamatan. Sehingga kini, terdapat sebanyak **54 pasukan CERT** telah ditubuhkan dengan keahlian seramai **9,707 orang**.

(b) Berhubung dengan isu pembinaan Balai Bomba dan Penyelamat (BBP) di Kabong, semakan terkini Kajian Risiko Kebakaran (*fire cover*) mendapati skor risiko di kawasan Kabong adalah sebanyak lima (5) markah. Ini menunjukkan bahawa kawasan tersebut mempunyai risiko rendah.

Walau bagaimanapun, Kementerian melalui JBPM telah mengambil inisiatif awal dan kini sedang dalam proses mengenal pasti tapak yang strategik bagi pembinaan sebuah BBP kategori D. Perancangan perolehan tapak akan dibuat dalam *Rolling Plan* Keempat (RP4), Rancangan Malaysia Kedua Belas (RMKe-12). Walau bagaimanapun, pelaksanaan bagi pembinaan BBP tersebut adalah bergantung kepada ketersediaan tapak tanah berkenaan dan juga kos yang terlibat. Mulai tahun 2023, KPKT juga akan memberi keutamaan projek pembinaan BBP bagi tapak tanah yang disediakan secara percuma atau dengan kadar premium nominal oleh kerajaan negeri atau pemaju perumahan. Faktor ini akan diambil kira selain dari skor kajian *fire cover* yang dilaksanakan oleh JBPM.

Dalam masa yang sama, Kementerian juga berpandangan bahawa pemerkasaan atau penubuhan PBS adalah merupakan langkah yang paling sesuai pada masa ini dalam memastikan penduduk di kawasan tersebut mendapat khidmat kebombaan di peringkat awal. Penubuhan pasukan tersebut akan diselaraskan oleh JBPM Negeri Sarawak melibatkan Pihak Berkuasa Tempatan (PBT) bersama ketua-ketua komuniti setempat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK ALI ANAK BIJU
[SARATOK]**

SOALAN

DATUK ALI ANAK BIJU [SARATOK] minta **MENTERI PENDIDIKAN** menyatakan:

- (a) perancangan secara holistik berkenaan dengan pembangunan pembelajaran Bahasa Iban di Sarawak dan apakah langkah yang telah diambil untuk mengatasi masalah kekurangan guru Bahasa Iban di Sarawak; dan
- (b) status pencapaian perancangan tersebut sekarang.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah mewujudkan Jawatankuasa Hala Tuju Kurikulum Bahasa Iban pada tahun 2022. Jawatankuasa ini bertujuan untuk menasihati KPM dalam perkara berkaitan dengan hala tuju mata pelajaran Bahasa Iban.

Selain itu Jawatankuasa Peristilahan Bahasa Iban turut ditubuhkan pada tahun 2021. Jawatankuasa ini berperanan sebagai badan pakar rujuk untuk memberi syor dan kata putus berkenaan dengan penyeragaman istilah, ejaan, tatabahasa, semantik dan pragmatik dalam penghasilan dokumen serta bahan bagi penggunaan pendidikan bahasa Iban. Jawatankuasa ini juga boleh memberi syor penggunaan Bahasa Iban kepada agensi selain pihak KPM. Penubuhan Jawatankuasa Peristilahan Bahasa Iban telah membantu KPM dalam menyediakan Draf Buku Kosa Kata Bahasa Iban. Penggunaan buku tersebut sudah diuji rintis di 15 buah sekolah yang menawarkan mata pelajaran Bahasa Iban. Jawatankuasa ini juga dalam proses menyemak semula buku tatabahasa Bahasa Iban (Bup Sistem Jaku Iban di Sekula) untuk kegunaan guru, pensyarah dan pemegang taruh Bahasa Iban.

Untuk makluman Ahli Yang Berhormat, berdasarkan data KPM, seramai 203 orang guru Bahasa Iban sedang berkhidmat di sekolah KPM. Mereka terdiri daripada 152 orang guru di sekolah rendah dan 51 orang guru di sekolah menengah. KPM sentiasa membuat semakan dari semasa ke semasa bagi memastikan bekalan guru Bahasa Iban mencukupi.

KPM menerusi Jabatan Pendidikan Negeri Sarawak merancang dan melaksanakan pelbagai program dan inisiatif secara berterusan bagi memantapkan, mengupayakan dan meningkatkan kompetensi guru-guru Bahasa Iban dalam melaksanakan pengajaran dan pembelajaran yang berkesan dan berkualiti. Pelbagai aktiviti dan program telah dilaksanakan sejak tahun 2015 sehingga kini. Di antaranya adalah:

- i. Bengkel Pemantapan Kemahiran Pedagogi Guru-guru Bahasa Iban Sekolah Menengah
- ii. Bengkel Mengupayakan Guru Baharu Bahasa Iban Negeri Sarawak
- iii. Bengkel Penguat PdP Guru Bukan Opsyen Bahasa Iban Sekolah Menengah dan Sekolah Rendah
- iv. Kursus Asas PdP Mata Pelajaran Bahasa Iban Sekolah Rendah Kepada Guru Yang Bukan Penutur Jati
- v. Bengkel Membina Modul Semarak Kasih SPM Bahasa Iban
- vi. Bengkel Membina Modul Kenyalang Cemerlang SPM Bahasa Iban
- vii. Bengkel Penyediaan Jadual Spesifikasi Ujian (JSU) dan Membina Item SPM Bahasa Iban.
- viii. Bengkel Pemantapan PdP Bahasa Iban bagi Guru-guru Sekolah Rendah
- ix. Webinar Kecemerlangan SPM Bahasa Iban
- x. Pengumpulan Bahan PdP Kandungan Kurikulum Bagi Program Pemerkasaan Kurikulum Sarawak.

Untuk makluman Ahli Yang Berhormat, berdasarkan pencapaian calon dalam peperiksaan Sijil Pelajaran Malaysia (SPM), Gred Purata Mata Pelajaran (GPMP) Bahasa Iban menunjukkan peningkatan hasil usaha pelaksanaan program yang telah dirancang. GPMP Bahasa Iban bagi tahun 2019 adalah 5.86 dan tahun 2020 adalah 5.85. Manakala, GPMP Bahasa Iban bagi tahun 2021 adalah 3.26 berdasarkan format baharu Kurikulum Standard Sekolah Menengah (KSSM).

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGKAL KEDUA,
PARLIMEN KELIMA BELAS**

PERTANYAAN : BUKAN LISAN

DARIPADA : DATUK ALI ANAK BIJU [SARATOK]

SOALAN

Datuk Ali anak Biju [Saratok] minta MENTERI KOMUNIKASI DAN DIGITAL menyatakan:

- (a) status terkini pembinaan 11 menara telekomunikasi melalui Pelan Tindakan Jalinan Digital Negara (JENDELA) di Saratok; dan
- (b) usaha Kementerian dalam memastikan 20 menara telekomunikasi yang telah dirancang oleh Kerajaan Negeri Sarawak akan siap dibina sepenuhnya kerana kebanyakan menara–menara yang telah siap dibina tetapi belum beroperasi kerana belum dipasang *microwave*, *antenna* dan sebagainya.

JAWAPAN

Tuan Yang di-Pertua,

Bagi Parlimen Saratok, status terkini pembinaan 21 menara komunikasi baharu di bawah inisiatif Pelan Jalinan Digital Negara (JENDELA) Fasa 1 di bawah seliaan Suruhanjaya Komunikasi dan Multimedia Malaysia (SKMM) adalah seperti berikut:

- (i) empat buah menara komunikasi telah siap dan beroperasi;
- (ii) dua tapak menara komunikasi sedang dalam peringkat pembinaan struktur menara;
- (iii) empat tapak menara komunikasi sedang dalam pembinaan tapak asas;
- (iv) sembilan tapak menara komunikasi telah siap kerja penyelidikan tanah dan akan memulakan pembinaan tapak asas; dan
- (v) dua tapak menara komunikasi sedang dalam peringkat tinjauan tapak.

Pelaksanaan 17 menara komunikasi yang di pelbagai peringkat pelaksanaan di atas dijadualkan siap serta beroperasi pada suku keempat 2023. Senarai lengkap menara komunikasi tersebut adalah seperti di Lampiran A.

Sebanyak 22 buah menara komunikasi telah siap dibina oleh Kerajaan negeri Sarawak melalui *Sarawak Multimedia Authority* (SMA) dan *Sarawak Digital Economy Corporation* (SDEC) di kawasan Parlimen Saratok. Pemasangan peralatan komunikasi sedang giat dilaksanakan di 22 menara komunikasi tersebut.

Rundingan komersil di antara pihak SDEC dan syarikat pemberi perkhidmatan seperti *CelcomDigi*, *Maxis* dan *UMobile* berhubung penyediaan perkhidmatan 4G di menara-menara tersebut juga sedang dijalankan. Menara-menara tersebut disasarkan siap beroperasi menjelang suku kedua tahun 2023. Senarai lengkap menara komunikasi tersebut adalah seperti di Lampiran B.

Status Menara Komunikasi SKMM

Bil.	Lokasi	Status Pelaksanaan
1	SMK Kabong	Siap dan beroperasi pada Oktober 2022
2	Rumah Ungu	Siap dan beroperasi pada November 2022
3	Sebubu Lichok	Siap dan beroperasi pada Disember 2022
4	Rumah Kos Rendah Seroja Indah	Siap dan beroperasi pada Disember 2022
5	Jalan Kabong	Dalam pembinaan struktur menara
6	Sg. Seblak	
7	Kg Paloh, Kabong	Dalam pembinaan tapak asas
8	Kg. Nyabor	
9	Rumah Bukul	
10	SK Klua Saratok	
11	SK Mudong	Siap penyelidikan tanah dan akan memulakan pembinaan tapak asas
12	SK Ulu Budu	
13	SK Wong Besi	
14	Rumah Frederick, Kumpai	
15	SK Nanga Drau	
16	SK Sungai Entebu	
17	SK Nanga Abum	
18	Kg. Sungai Antu	
19	Sungai Dabai PBH	
20	Rumah Melak	Dalam peringkat tinjauan tapak
21	Rumah Bungin	

Status Menara Komunikasi inisiatif Kerajaan Negeri Sarawak

Bil.	Lokasi	Status Pelaksanaan
1	Rumah Roben	Pemasangan peralatan telekomunikasi sedang giat dilaksanakan
2	Babang Krian	
3	Engkudu Baruh	
4	Kabo Hilir	
5	Krikap, Saratok	
6	Nanga Assam	
7	Nanga Marong	
8	Sg. Berangan	
9	Sg. Ruan, Saratok	
10	Tapang Ujan	
11	Tembawai Pok	
12	Ukir Sawa	
13	Ulu Sebetan	
14	Kg. Empelam	
15	Melintang, Ulu Roban	
16	Menggeris, Nyabor	
17	Panjang Baruh	
18	Pelunga Atas	
19	Seridoh	
20	Sg. Padi, Plassu	
21	Sg. Pasir	
22	Ulu Roban	

**PEMBERITAHUAN PERTANYAAN BUKAN LISAN
DEWAN RAKYAT MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

DARIPADA : DATUK ALI ANAK BIJU [SARATOK]

SOALAN

DATUK ALI ANAK BIJU [SARATOK] minta **MENTERI PERLADANGAN DAN KOMODITI** menyatakan adakah Kementerian bercadang untuk mengembalikan semula Skim Bantuan Penanaman Semula secara geran percuma kepada pekebun–pekebun kecil kelapa sawit yang telah ditarik balik oleh Kerajaan Pakatan Harapan pada tahun 2019.

JAWAPAN

Yang di-Pertua,

1. Untuk makluman Ahli Yang Berhormat, Kementerian ini sentiasa komited terhadap keperluan bagi melaksanakan aktiviti penanaman semula sawit terutamanya di kawasan sawit yang telah tua dan tidak lagi produktif. Kementerian ini juga mengambil maklum bahawa terdapat permintaan yang tinggi daripada pekebun kecil sawit supaya bantuan penanaman semula secara geran seperti yang pernah dilaksanakan sebelum ini dapat diteruskan. Bagi tujuan ini, KPK sedang berbincang dengan MOF bagi mempertimbangkan cadangan untuk memperkenalkan semula Skim Bantuan Tanam Semula Sawit Pekebun Kecil secara geran, yang mana pelaksanaannya akan lebih berfokus dan bersasar kepada pekebun kecil sawit kategori B40. Sekiranya diluluskan, Kementerian berharap Skim Bantuan ini akan memberi manfaat kepada pekebun kecil sawit yang terlibat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : DATUK ALI ANAK BIJU [SARATOK]

SOALAN

DATUK ALI ANAK BIJU [SARATOK] minta **MENTERI PERTANIAN DAN KETERJAMINAN MAKANAN** menyatakan adakah Kementerian bercadang untuk menaikkan lagi bantuan subsidi racun dan baja untuk petani, pekebun dan peladang yang terkesan teruk dan peningkatan kos bahan-bahan berkenaan juga telah mempengaruhi harga sayuran di pasaran sebagai contoh.

JAWAPAN

Tuan Yang di-Pertua,

Bagi memastikan keterjaminan bekalan makanan di dalam negara dan menampung kos pengeluaran hasil pertanian berikutan kenaikan harga input pertanian seperti benih tanaman, racun rumpai dan baja , Kerajaan telah menyediakan peruntukan di bawah RMKe-12 bagi projek-projek insentif kepada golongan sasar. Sebanyak 9 projek yang melibatkan skop perolehan input pertanian telah diluluskan oleh Kerajaan di bawah tanggungjawab Jabatan Pertanian dengan nilai peruntukan sebanyak RM 183.5 juta bagi tempoh pelaksanaan sepanjang RMKe- 12 ini.

Berikut adalah senarai projek-projek insentif yang ditawarkan kepada semua petani/pekebun/peladang yang ingin atau sedang mengusahakan projek pertanian dan membantu negara mengeluarkan makanan yang mencukupi dan selamat dimakan :

Bil	Nama Projek	Insentif
1	Pembangunan Tanaman Buah-Buahan Jangka Panjang	RM 15,000.00/hektar
2	Pembangunan Tanaman Buah-Buahan Jangka Pendek	RM 15,000.00/hektar
3	Pembangunan Tanaman Sayuran	<ol style="list-style-type: none"> 1. Geran Padanan dengan kadar 50:50 bagi perolehan mekanisasi, automasi atau teknologi pintar seperti IoT yang melebihi RM 15,000/unit. Kadar maksimum insentif adalah RM 50,000/peserta. 2. Geran Padanan dengan kadar 40:60 (Kerajaan:Syarikat) bagi pembangunan Pertanian Vertikal Persekitaran Terkawal (contoh kilang tanaman) bagi tanaman bernilai tinggi. Kadar maksimum insentif adalah RM 200,000/syarikat. 3. Sistem Penanaman Konvensional dengan kadar maksimum RM15,000/ha; 4. Sistem Penanaman Teknologi Tinggi seperti Fertigasi, Hidroponik dan Pertanian Vertikal dengan kadar maksimum RM50,000/peserta minimum 5,000 polibeg atau poin tanaman;
4	Program Pembangunan Pertanian Komuniti	Kadar Maksimum bagi : <ol style="list-style-type: none"> 1. Individu/Usahawan : RM5,000, 2. Komuniti RM 10,000, 3. Sekolah RM 10,000, 4. Institusi RM 10,000

5	Pembangunan Industri Tanaman Kelapa	<p>Kadar skop:</p> <ol style="list-style-type: none">1. Tanam Semula/ Baru Kadar : RM15,000/ha2. Pemulihan Kadar : RM6,000/ha3. Integrasi Kadar RM10,000/petani4. Pembangunan kawasan kategori Pemulihan bagi Kategori Pekebun Komersial/Komersial/ Koperasi/GLC/Syarikat Swasta secara Reimbursement 4.10 hingga 40.0 hektar.
6	Peningkatan Pendapatan Pesawah Luar Jelapang (B40)	<ol style="list-style-type: none">1. Sub-Projek 1: Fertigasi/ Akuaponik/ Hydroponik – Tanaman Cili Padi, Halia, Cili, Melon, Sayur Daun dan Sayur Buah.2. Kadar insentif bantuan adalah RM30,000/ peserta/ tahun dengan keluasan maksimum 0.4 ha.3. Sub-Projek 2: Konvensional – Tanaman Jagung, nanas, betik, ubi, halia, tebu, pisang, tembikai, sayur daun, sayur buah, kesum, pandan, serai4. Kadar insentif bantuan adalah RM15,000/ peserta/ tahun dengan keluasan maksimum 1 ha.5. Sub-Projek 3: Skop Post-Harvest dan Pemasaran Hasil Pertanian.6. Kadar insentif bantuan adalah RM5,000/ peserta/ tahun.
7	Pembangunan Industri Cendawan	<ol style="list-style-type: none">1. Sub Projek Pengeluaran Cendawan :2. Insentif maksimum sebanyak RM 40,000/peserta atau projek

SOALAN NO: 55

		3. Sub projek Pengeluaran Benih Cendawan Berkualiti: Insentif maksimum sebanyak RM55,000.00/peserta atau projek
8	Pembangunan Industri Kopi	1. Subprojek Tanam Semula/Baru : RM15,000/ha 2. Subprojek Pemulihan : RM7,500/ha
9	Pengeluaran Benih Tanaman Berkualiti	Kadar maksimum RM 50,000 / peserta.
10	Pembangunan Tanaman Makanan Ternakan	Jagung Bijian: Kadar : RM20,000.00/ ha. Bagi individu/ kelompok. Keluasan minima :10 ha

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' DR. ALIAS BIN RAZAK
[KUALA NERUS]**

SOALAN

DATO' DR. ALIAS BIN RAZAK [KUALA NERUS] minta **MENTERI
PENDIDIKAN** menyatakan :

- (a) statistik kuarters guru yang daif dan tidak selamat diduduki di seluruh negara; dan
- (b) berapa anggaran kos baik pulih dan sejauh mana tindakan baik pulih kuarters ini telah dilaksanakan.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha menyediakan prasarana pendidikan termasuk kuarters guru yang selamat dan kondusif untuk diduduki.

Untuk makluman Ahli Yang Berhormat, secara keseluruhan, jumlah kuarters guru KPM adalah sebanyak 47,947 unit, di mana sebanyak 29,207 unit kuarters sedang diduduki dan 18,740 unit kuarters tidak diduduki.

Pada masa ini, KPM telah mengambil tindakan dengan membaik pulih 29,207 unit kuarters guru yang diduduki bagi memberi keselesaan dan keselamatan kepada penghuni. Bagi tujuan tersebut, KPM telah membelanjakan sebanyak RM49.2 juta pada tahun 2021 sehingga Disember 2022.

Di samping itu, KPM telah melantik perunding hartanah bagi menjalankan kajian mengoptimumkan penggunaan kuarters guru tidak berpenghuni milik KPM di seluruh negara. Skop kajian adalah merangkumi cadangan penyelesaian bagi mengoptimumkan kuarters kosong di seluruh negara. Kajian ini dijangka selesai pada akhir April 2023.

Sekian, terima kasih.

RT05

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' DR. ALIAS BIN RAZAK
[KUALA NERUS]**

SOALAN

DATO' DR. ALIAS BIN RAZAK [KUALA NERUS] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan:

- a) sambutan terhadap kempen “Tiada Beg Plastik” yang dilaksanakan di seluruh negara; dan
- b) sejauh mana perancangan penambahbaikan kempen tersebut akan dilaksanakan oleh Kementerian.

JAWAPAN

Tuan Yang di-Pertua,

1. Untuk makluman, Mesyuarat Majlis Negara bagi Kerajaan Tempatan (MNKT) ke 76 pada 18 Oktober 2020 telah bersetuju dengan cadangan pelaksanaan Kempen Tiada Beg Plastik oleh Pihak Berkuasa Tempatan (PBT) di seluruh negara. Melalui kempen ini, premis perniagaan akan mengenakan caj ke atas setiap beg plastik yang dibekalkan kepada pengguna selepas membuat bayaran di kaunter.
2. Bagi fasa pertama iaitu sehingga 2021, kempen ini dilaksanakan di semua premis tetap dan seterusnya akan diperluaskan kepada semua premis perniagaan secara beransur-ansur dalam tempoh 2022 hingga 2025.
3. Tujuan pengenaan caj ke atas beg plastik ini adalah sebagai satu bentuk pencegahan dan usaha membendung penggunaan beg plastik sekali guna yang merupakan salah satu produk yang kerap kali dibuang secara tidak terkawal. Seperti mana diputuskan oleh MNKT, pelaksanaan kempen ini adalah di bawah tanggungjawab kerajaan negeri dan kaedah pelaksanaan adalah mengikut kesesuaian negeri masing-masing sama ada dari segi kadar caj yang dikenakan, kekerapan serahan kutipan, agihan di antara PBT dan kerajaan negeri serta penggunaan wang kutipan tersebut.
4. Antara negeri-negeri yang telah menjalankan kempen ini ialah Selangor, Pulau Pinang, Johor, dan Negeri Sembilan. Kempen ini juga merupakan salah satu pelan jangka panjang kerajaan di dalam Pelan Hala Tuju Malaysia ke Arah Sifar Penggunaan Plastik Sekali Guna 2018-2030 dalam menangani isu pencemaran sisa plastik sekali guna di Malaysia.
5. Kerajaan mengambil pendekatan secara berfasa dalam memperkenalkan setiap pelan tindakan di bawah pelan ini supaya ia lebih berkesan dan rakyat memahami rasional bagi setiap pelan tindakan tersebut, sekaligus mendorong mereka untuk bertindak atau membuat pilihan yang positif dan mesra alam.

6. Sambutan dan kerjasama daripada pihak PBT dan peniaga berhubung kempen ini adalah amat baik. Namun, terdapat juga cabaran di beberapa buah PBT dalam melaksanakan kempen ini terutamanya kerjasama dari para peniaga dan ketersediaan rakyat dalam menggunakan produk alternatif selain plastik sekali guna. Banyak aspek yang perlu diberi perhatian apabila kerajaan ingin melaksanakan sesuatu dasar atau larangan terutamanya yang melibatkan orang awam. Bagi roadmap ini menjadi berkesan, proses perubahan perlu mengambil kira kesan sesuatu tindakan ke atas setiap proses, sistem dan pekerja dalam organisasi dan industri yang terlibat.

7. Di dalam Pelan Hala Tuju Malaysia ke Arah Sifar Penggunaan Plastik Sekali Guna 2018-2030, fokus utama antara lain adalah untuk mengurangkan plastik sekali guna seperti beg plastik dan straw. Pelaksanaan pelan ini juga tidak boleh dibuat secara serta merta dan drastik kerana kesedaran mengenai kesan penggunaan plastik sekali guna perlu dipupuk, dibudaya dan dijalankan secara berterusan.

8. Melalui program *Communication, Education and Public Awareness* (CEPA) yang dilaksanakan, diharap semua pihak dapat memahami rasional pengenaan caj pencemaran ke atas permintaan beg plastik di kaunter-kaunter premis tetap. Selain itu, sesi advokasi kepada negeri-negeri dan pihak PBT akan terus dipergiatkan dalam usaha memberi kesedaran kepada orang awam serta menggalakkan penglibatan yang menyeluruh daripada para peniaga mengenai pelaksanaan kempen ini.

9. Kerjasama dan penglibatan bersama pemegang taruh yang lain seperti pihak industri akan turut dipertingkatkan dalam usaha menjayakan kempen ini. Kunci sebenar kepada kejayaan inisiatif ini adalah perubahan tingkah laku di kalangan orang awam dan juga peniaga.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGKAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : DATO' DR. ALIAS BIN RAZAK
[KUALA NERUS]**

SOALAN

DATO' DR. ALIAS BIN RAZAK [KUALA NERUS] minta **MENTERI KESIHATAN** menyatakan : -

- (a) statistik rakyat Malaysia di seluruh negara yang telah mengambil suntikan dos penggalak kedua vaksin COVID-19 bagi menghadapi jangkitan subvarian baharu COVID-19 yang telah dikenal pasti wujud di negara ini; dan
- (b) perancangan Kementerian untuk menggalakkan lebih ramai rakyat mengambil suntikan dos penggalak kedua vaksin COVID-19.

JAWAPAN

Tuan Yang di-Pertua,

1. Sehingga 1 Februari 2023, seramai 27,544,563 (84.3%) penduduk telah menerima dos primer lengkap, manakala 16,319,486 (50%) penduduk telah menerima dos penggalak pertama dan 815,040 (2.5%) populasi telah menerima menerima dos penggalak kedua. Daripada jumlah tersebut, dalam kalangan:

- (a) penduduk dewasa berumur 18 tahun ke atas, seramai 23,140,383 (98.4%) telah menerima dos primer lengkap, manakala 16,253,130 (69.1%) telah menerima dos penggalak

pertama dan 814,561 (3.5%) telah menerima menerima dos penggalak kedua.

- (b) remaja berumur 12 hingga bawah 18 tahun, seramai 2,858,927 (91.9%) telah menerima dos primer lengkap, manakala 60,414 (1.9%) telah menerima dos penggalak pertama.
- (c) kanak-kanak berumur 5 hingga bawah 12 tahun, seramai 1,545,253 (43.5%) telah menerima dos primer lengkap.

2. Sebagai langkah berterusan untuk menggalakkan lebih ramai penduduk Malaysia mengambil dos penggalak, KKM telah mengambil langkah-langkah seperti berikut:

- (a) Pelanggan boleh membuat tempahan janji temu melalui aplikasi MySejahtera dan bebas memilih tarikh, masa, PPV dan jenis vaksin yang dikehendaki;
- (b) Menawarkan perkhidmatan vaksinasi dos penggalak secara terus tanpa janji temu (*walk-in*) kepada golongan berisiko tinggi di semua Pusat Pemberian Vaksin (PPV) seluruh negara;
- (c) Melaksanakan pemberian dos penggalak secara oportunistik iaitu Klinik kesihatan, hospital dan klinik swasta yang telah beroperasi sebagai PPV menawarkan dos penggalak kepada mana-mana pesakit dan pelanggan yang hadir untuk mendapatkan rawatan bagi penyakit-penyakit lain;
- (d) Menawarkan pemberian dos penggalak secara heterologous iaitu individu boleh menerima dos penggalak kedua daripada vaksin yang berlainan jenis dengan dos sebelumnya (dos primer atau dos penggalak pertama) sekiranya tiada kontraindikasi. Namun begitu vaksin Comirnaty (Pfizer) masih merupakan pilihan utama sebagaimana saranan pakar dalam TWG;
- (e) Melaksanakan polisi vial terbuka (*open vial*) di semua PPV.

Oleh itu PPV boleh memberikan vaksin tanpa mengumpulkan pelanggan bagi memenuhi kuota satu (1) vial vaksin. Contohnya tidak perlu menunggu enam pelanggan untuk membuka satu vial vaksin jenis *Comirnaty*;

- (f) Meningkatkan hebahan melalui media sosial, media arus perdana dan hebahan kawasan setempat. Pelbagai program seperti slot media / radio, ceramah dan webinar telah dilaksanakan. Mesej berkenaan dos penggalak juga telah dihasilkan dalam bentuk infografik, FAQ dan video dalam pelbagai bahasa. Bahan-bahan ini telah dimuat naik di laman web KKM dan media sosial KKM; dan
- (g) Pelaporan Kesan Advers Susulan Imunisasi (AEFI) secara berkala dalam laman web Bahagian Regulatori Farmasi Negara (NPRA) bagi memberi maklumat sebenar kejadian AEFI.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS (2023)**

PERTANYAAN : BUKAN LISAN

**DARIPADA : DATO' DR. ALIAS BIN RAZAK
[KUALA NERUS]**

SOALAN

YB DATO' DR. ALIAS BIN RAZAK [KUALA NERUS] minta **MENTERI PEMBANGUNAN KERAJAAN TEMPATAN** menyatakan dasar perumahan Kerajaan bagi memastikan keperluan perumahan untuk rakyat dipenuhi.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) telah memperkenalkan Dasar Perumahan Negara (DRN) dan Dasar Perumahan Mampu Milik Negara (DRMM). Kedua-dua dasar ini bersifat holistik dan melihat kepada keseluruhan ekosistem perumahan di peringkat pembeli, penghuni, pemaju, rangkaian ekonomi, kualiti serta inovasi pembinaan, pembiayaan dan lain-lain isu berkaitan dengan perumahan. Program perumahan khusus untuk rakyat turut dibincangkan dalam Majlis Perumahan Mampu Milik Negara (MPMMN) yang dipengerusikan oleh YAB Perdana Menteri.

KPKT akan mengkaji semula DRN sedia ada berdasarkan rangkuman intisari Membangun Malaysia MADANI supaya dasar ini dapat diterjemahkan kepada nilai kesejahteraan dan keseimbangan untuk

semua golongan rakyat Malaysia. KPKT melaksanakan sesi libat urus dengan pihak-pihak pemegang taruh dan memanfaatkan pengalaman dan kepakaran tempatan melalui Panel Berkepakaran Perumahan (*Panel of Experts*) dalam usaha melaksanakan kajian semula DRN. Aspek perumahan yang menjadi fokus ialah Ketersediaan (*availability*), Kemampuan Kewangan (*affordability*), Kemudahan Pembiayaan (*accessibility*), Kualiti (*quality*) dan Kediaman Berdaya Huni (*liveability*). Kesemua aspek ini merangkumi seluruh ekosistem perumahan bermula daripada penyediaan kediaman yang mampu milik dan berkualiti sehingga aspek pemilikan atau sewaan di kawasan kejiranan yang berdaya huni.

DRN sedia ada merupakan hasil kerjasama KPKT bersama pakar perumahan dalam negara seperti Khazanah Research Institute (KRI), Bank Negara Malaysia (BNM), Lembaga Pembangunan Industri Pembinaan (CIDB), para akademik dan penganalisis hartanah. Bagi maksud penambahbaikan dasar sedia, rujukan kepada amalan terbaik (*best practices*) akan dilaksanakan supaya polisi yang dirangka lebih komprehensif dan praktikal dilaksanakan mengikut keperluan perumahan di Malaysia.

Sesi sebegini memberi ruang kepada KPKT untuk mengkaji dan meneliti perspektif baharu selain mempelajari amalan terbaik mengenai sektor perumahan khususnya perumahan sosial. Justeru, berdasarkan kepada pengalaman terdahulu serta faedahnya kepada sektor perumahan, KPKT akan meneruskan kesinambungan sesi perkongsian pengalaman dan pengetahuan sebegini bagi memastikan polisi dan tindakan yang lebih komprehensif dan praktikal disediakan dalam konteks keperluan perumahan di Malaysia.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' DR. ALIAS BIN RAZAK
[KUALA NERUS]**

SOALAN

DATO' DR. ALIAS BIN RAZAK [KUALA NERUS] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan:

- (a) statistik sungai yang paling tercemar di seluruh negara; dan
- (b) sejauh mana usaha yang telah dilaksanakan bagi memelihara dan memulihara sungai-sungai ini untuk tujuan mengekalkan keseimbangan sistem ekologi.

JAWAPAN

Tuan Yang di-Pertua,

1. Berdasarkan kepada Laporan Kualiti Alam Sekeliling Tahun 2021, yang dikeluarkan oleh Jabatan Alam Sekitar (JAS), daripada 672 sungai yang dipantau oleh JAS, sebanyak 23 sungai telah dikategorikan sebagai sungai tercemar. Senarai sungai adalah seperti di **Jadual 1**.
2. Untuk makluman, pelbagai usaha dan strategi telah dilaksanakan oleh JAS bagi memelihara dan memulihara sungai-sungai yang merangkumi tindakan-tindakan seperti berikut:
 - i. Penguatkuasaan ke atas punca-punca pencemaran yang tertakluk di bawah Akta Kualiti Alam Sekeliling 1974 (Akta 127);
 - ii. Meningkatkan program pengawasan kualiti air sungai; dan
 - iii. Pelaksanaan program komunikasi, pendidikan dan kesedaran awam (*communication, education and public awareness* - CEPA) kepada semua pihak bagi meningkatkan kesedaran awam dan seterusnya dapat memelihara dan memulihara sungai-sungai ini untuk tujuan mengekalkan keseimbangan sistem ekologi.
3. NRECC melalui Jabatan Pengairan dan Saliran (JPS) juga sentiasa mengambil langkah proaktif untuk mengekalkan keseimbangan sistem ekologi sungai dalam melaksanakan projek-projek pembangunan. JPS telah membangunkan Pelaksanaan kajian Pengurusan Lembangan Sungai Bersepadu/ *Integrated River Basin Management* (IRBM) yang memerlukan penglibatan semua pihak berkepentingan dalam pemeliharaan kuantiti dan kualiti sumber air yang merupakan kaedah terbaik dalam pengurusan lembangan sungai.

4. Terdapat empat (4) objektif utama dalam pendekatan IRBM iaitu;
- i. memastikan air mencukupi,
 - ii. memastikan air bersih,
 - iii. mengurangkan risiko banjir dan
 - iv. meningkatkan pemuliharaan alam sekitar.
5. Melalui pelan IRBM yang disediakan, cadangan perancangan dan pembangunan sumber air di dalam sesebuah lembangan boleh dijadikan rujukan oleh pihak Kerajaan Negeri dan semua pihak berkepentingan. Dalam merancang pembangunan, kesan terhadap kelestarian alam sekitar perlu diberikan perhatian terutamanya sumber air yang sangat diperlukan oleh negara untuk tujuan pembangunan disamping keperluannya untuk kepelbagaian biologi. Bagi Negeri Terengganu sebanyak lima (5) kajian IRBM telah siap dilaksanakan dan satu (1) kajian dalam pelaksanaan.

Sekian, terima kasih.

**JADUAL 1: STATUS KUALITI AIR SUNGAI BAGI SUNGAI
TERCEMAR TAHUN 2021**

NEGERI	LEMBANGAN	SUNGAI	2021	
			IKA	KELAS
JOHOR	AIR BALOI	AIR BALOI	55	III
	BATU PAHAT	TEMEHEL	54	III
	BENUT	PINGGAN	59	III
	KAW. PASIR GUDANG	BULUH	43	IV
		PEREMBI	47	IV
		TUKANG BATU	35	IV
	KEMPAS	KEMPAS	42	IV
	PONTIAN BESAR	AYER MERAH	54	III
	SANGLANG	SANGLANG	57	III
	TEBRAU	BALA	47	IV
		PANDAN	43	IV
		SEBULUNG	58	III
		SENGKUANG	53	III
MELAKA	MERLIMAU	MERLIMAU	59	III
N.SEMBILAN	SEPANG	RAMBAI	25	V
P.PINANG	JAWI	CHEMPEDAK	41	IV
		JAWI	52	III
		TENGAH	58	III
	JURU	RAMBAI	59	III
P.PINANG/KEDAH	PERAI	AIR MELINTAS	57	III
SARAWAK	SARAWAK	KELANTAN	59	III
SELANGOR	BULOH	BULOH	56	III
SELANGOR/WP KL	KLANG	AIR BUSUK	40	IV

*IKA: Indeks Kualiti Air

SUNGAI TERCEMAR MENGIKUT KELAS	JUMLAH
III	14
IV	8
V	1
JUMLAH	23

INPUT JPS

5 kajian IRBM telah siap dilaksanakan dan 1 kajian dalam pelaksanaan.

BI L	TAJUK KERJA	CATATAN
1	Penyediaan Pelan Pengurusan Lembangan Sungai Bersepadu (IRBM) Sungai Kemaman, Terengganu.	SIAP
2	Penyediaan Pelan Pengurusan Lembangan Sungai Bersepadu (IRBM) Sungai Dungun, Terengganu.	SIAP
3	Penyediaan Pelan Pengurusan Lembangan Sungai Bersepadu (IRBM) Sungai Besut, Terengganu.	SIAP
4	Penyediaan Pelan Pengurusan Lembangan Sungai Bersepadu (IRBM) Sungai Marang, Terengganu.	SIAP
5	Penyediaan Pelan Pengurusan Lembangan Sungai Bersepadu (IRBM) Sungai Setiu, Terengganu.	SIAP

6	<i>Review On Integrated River Basin Management (IRBM) Plan For Sungai Terengganu Basin, Terengganu.</i>	Dalam Pelaksanaan Tarikh Mula: 1.9.2022 Tarikh Mula: 30.4.2023
---	---------------------------------------------------------------------------------------------------------	----------------------------------------------------------------------------

Projek Pemuliharaan Sungai Untuk Mengurangkan Risiko Banjir di Kuala Nerus

BIL	TAJUK KERJA	ANGGARAN KOS (RM)
1	Program Pemuliharaan Sungai Risiko Banjir Di Sungai Mengabang Besar, Kampung Kubur Timah, Wakaf Chagak, Daerah Kuala Nerus	110,000.00
2	Program Pemuliharaan Sungai Risiko Banjir Di Anak Sungai Tok Jiring , Taman Desa Tanjung Damai Daerah Kuala Nerus	70,000.00
3	Program Pemuliharaan Sungai Risiko Banjir Di Sungai Terengganu , Kampung Baru Seberang Takir Daerah Kuala Nerus	80,000.00
4	Program Pemuliharaan Sungai Risiko Banjir Di Sungai Jeram Hulu, Kg Jeram Hulu, Daerah Kuala Nerus	80,000.00
5	Program Pemuliharaan Sungai Risiko Banjir Di Sungai Mengabang Pengakalan Maras, Kampung Pengkalan Maras Daerah Kuala Nerus	50,000.00

NO SOALAN : 60

6	Program Pemuliharaan Sungai Risiko Banjir Di Sungai Terengganu , Kampung Wakaf Tengah Daerah Kuala Nerus	50,000.00
7	Program Pemuliharaan Sungai Risiko Banjir Di Anak Sungai Tepuh, Kampung Padang Hangus Daerah Kuala Nerus	70,000.00
8	Program Pemuliharaan Sungai Risiko Banjir Di Sungai Redang, Pulau Redang, Daerah Kuala Nerus	100,000.00
9	Program Pemuliharaan Sungai Risiko Banjir Di Sungai Mengabang Kapal , Kampung Tanjung Daerah Kuala Nerus	40,000.00
10	Program Pemuliharaan Sungai Risiko Banjir Di Alur Pancur Lingai , Kg Sg Ikan, Daerah Kuala Nerus	20,000.00
11	Program Pemuliharaan Sungai Risiko Banjir Di Anak Sungai Nerus, Kg Petaling, Daerah Kuala Nerus	20,000.00
12	Program Pemuliharaan Sungai Risiko Banjir Di Sungai Alur Kuda, Kg. Batin, Daerah Kuala Nerus	20,000.00
13	Program Pemuliharaan Sungai Untuk Mengurangkan Risiko Banjir Di Anak Sungai Nerus, Kampung Sungai Mas, Daerah Kuala Nerus	20,000.00
14	Program Pemuliharaan Sungai Untuk Mengurangkan Risiko Banjir Di Sungai Alor Kepayang, Kampung Pondok Lalang/Banggol Nyior, Daerah Kuala Nerus	20,000.00

15	Program Pemuliharaan Sungai Untuk Mengurangkan Risiko Banjir Di Alor Lebam Besar, Kampung Pagar Ubi,, Daerah Kuala Nerus	20,000.00
16	Program Pemuliharaan Sungai Untuk Mengurangkan Risiko Banjir Di Anak Sungai Nerus, Kampung Padang Air, Daerah Kuala Nerus	20,000.00
17	Program Pemuliharaan Sungai Untuk Mengurangkan Risiko Banjir Di Anak Sungai Takir, Kampung Telaga Daing, Daerah Kuala Nerus	20,000.00
18	Program Pemuliharaan Sungai Untuk Mengurangkan Risiko Banjir Di Kampung Padang Air, Daerah Kuala Nerus	20,000.00
19	Program Pemuliharaan Sungai Untuk Mengurangkan Risiko Banjir Di Alur Sungai Tok Jiring, Kg Bukit Bayas, Daerah Kuala Nerus	20,000.00
	JUMLAH	850,000.00

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI AMINOLHUDA BIN HASSAN
[SRI GADING]**

SOALAN

TUAN HAJI AMINOLHUDA BIN HASSAN [SRI GADING] minta **MENTERI PENDIDIKAN** menyatakan adakah pihak Kerajaan berhasrat mengembalikan penggal persekolahan seperti dahulu dan apakah masalah yang dihadapi pada masa kini.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan seperti mana kebiasaan akibat penularan COVID-19. Oleh yang demikian, KPM telah membuat ketetapan untuk melanjutkan sesi persekolahan tahun 2021 sehingga bulan Februari tahun 2022.

KPM telah menetapkan sesi persekolahan bagi kalendar akademik sesi 2022/2023 bermula pada bulan Mac 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM akan meneliti cadangan untuk mengembalikan semula kalendar akademik persekolahan bermula pada Januari seperti sebelum ini. Walau bagaimanapun, perkara berkenaan masih belum boleh dilaksanakan tahun hadapan memandangkan perlu menyelesaikan pelbagai justifikasi berdasarkan kepada pematuhan kepada Akta Pendidikan 1996 (Akta 550). Perubahan semula kalendar akademik persekolahan juga perlu mengambil kira faktor ekonomi setempat dan banjir pada hujung tahun, selain tidak mengganggu jadual peperiksaan Sijil Pelajaran Malaysia (SPM), Sijil Tinggi Persekolahan Malaysia (STPM) dan Sijil Tinggi Agama Malaysia (STAM).

Untuk makluman, sesi persekolahan bagi Kalendar Akademik Sesi 2023/2024 masih dikekalkan pada bulan Mac 2023 untuk memastikan KPM mematuhi Peraturan-Peraturan Pendidikan (Penggaj, Hari dan Cuti Sekolah) 1998 (Pindaan) 2021 yang menetapkan bahawa jumlah hari persekolahan dalam kalendar akademik hendaklah tidak kurang daripada satu ratus sembilan puluh (190) hari.

KPM sentiasa melihat kepada keperluan dan kesesuaian penyediaan kalendar akademik untuk tahun seterusnya bagi memastikan pengajaran dan pembelajaran dapat dilaksanakan secara optimum.

Sekian, terima kasih.

RT06

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI AMINOLHUDA BIN HASSAN
[SRI GADING]**

SOALAN

Minta **Perdana Menteri** menyatakan apakah langkah-langkah yang telah diambil oleh Kerajaan berkaitan memperkasakan Rang Undang-Undang 355 selepas RUU tersebut dibacakan di Parlimen pada 26 November 2016 yang lalu.

JAWAPAN

**YB SENATOR DATO' SETIA DR. HAJI MOHD NAI'IM BIN HAJI
MOKHTAR
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. Pindaan kepada Akta Mahkamah Syariah (Bidang Kuasa Jenayah) 1965 [*Akta 355*] akan dibawa ke Parlimen bersama dengan suatu cadangan Akta yang baharu iaitu Rang Undang-Undang Mahkamah Syariah (Wilayah-Wilayah Persekutuan) dengan tujuan untuk memperkasa Mahkamah Syariah. Kedua-dua Rang Undang-Undang tersebut akan dibentangkan di Parlimen secara bersekali setelah mendapat persetujuan daripada Jemaah Kabinet bagi memastikan hasrat untuk pemeraksanaan Mahkamah Syariah dapat direalisasikan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI AMINOLHUDA BIN HASSAN
[SRI GADING]**

SOALAN

TUAN HAJI AMINOLHUDA BIN HASSAN [SRI GADING] minta
MENTERI PENDIDIKAN menyatakan langkah-langkah yang telah diambil
bagi mengatasi bebanan guru-guru di sekolah masa kini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa mengambil langkah proaktif dalam usaha mencari penyelesaian terbaik dalam menjamin kesejahteraan guru.

Untuk makluman Ahli Yang Berhormat, KPM telah menyemak semula tugas dan tanggungjawab guru dengan melaksanakan penambahbaikan ke atas fungsi pengurusan di sekolah melalui pewujudan Modul Tadbir Urus Sekolah (MySG) yang diperkenalkan pada tahun 2021. MySG menjelaskan dengan lebih terperinci empat komponen pengurusan sekolah, iaitu Pengurusan dan Pentadbiran, Kurikulum, Hal Ehwal Murid dan Kokurikulum.

Melalui salah satu daripada 7 Teras Nadi Keunggulan KPM, isu kebajikan guru turut diberi fokus. Bermula sesi persekolahan 2023/2024, KPM telah melaksanakan langkah seperti berikut:

- i. mengeluarkan pemakluman Pemansuhan Pertandingan, Sambutan atau Majlis di Semua Peringkat yang Tidak Memberi Impak Besar Terhadap Pembelajaran Murid di Sekolah Kementerian Pendidikan Malaysia bertarikh 15 Mac 2023;
- ii. mengeluarkan Pemakluman Pelaksanaan Penilaian Kendiri Sekolah Standard Kualiti Pendidikan Malaysia Tahun 2023 bertarikh 3 Mac 2023. Berdasarkan surat pemakluman tersebut, pelaksanaan semakan elemen pengurusan sekolah dalam Standard Kualiti Pendidikan Malaysia versi baharu akan dilaksanakan setahun sekali sahaja.
- iii. mengeluarkan pemakluman Perekodan Waktu Kehadiran Murid dalam Sistem Kehadiran Murid (eKehadiran) Sekolah Kementerian Pendidikan Malaysia bertarikh 13 Mac 2023 berkaitan penetapan waktu mengunci masuk rekod kehadiran murid ke dalam sistem eKehadiran yang lebih fleksibel kepada guru iaitu 12 tengah hari untuk sesi pagi dan 5 petang untuk sesi petang;
- iv. mengeluarkan pemakluman Pelantikan Pengawas Peperiksaan Awam Kendalian Lembaga Peperiksaan pada 15 Mac 2023.

Berdasarkan surat pemakluman tersebut, pelantikan pegawai peperiksaan awam yang dikendalikan oleh Lembaga Peperiksaan dan Majlis Peperiksaan Malaysia terbuka kepada individu selain guru yang sedang berkhidmat seperti pesara kerajaan, pelajar institut pendidikan guru (IPG) dan institut pendidikan tinggi (IPT) berdasarkan kriteria yang ditetapkan;

- v. mengeluarkan Pemakluman Berhubung Pelaksanaan Sambutan Hari Guru Tahunan Peringkat Kebangsaan dan Sekolah bertarikh 15 Mac 2023. Berdasarkan surat pemakluman tersebut, sambutan Hari Guru tahunan dihadkan kepada peringkat kebangsaan dan sekolah sahaja;
- vi. mengeluarkan Pemakluman Terhadap Pematuhan Surat Pekeliling Ikhtisas Bilangan 3 Tahun 1999: Penyediaan Rekod Pengajaran dan Pembelajaran bertarikh 3 Mac 2023. Berdasarkan surat pemakluman tersebut, guru perlu menyediakan ringkasan Rancangan Pengajaran Harian (RPH) yang merangkumi elemen objektif, pengajaran dan refleksi; dan
- vii. Untuk makluman semua, KPM baru sahaja mengeluarkan pemakluman autonomi guru dalam perancangan dan pelaksanaan proses pengajaran dan pembelajaran (PdP) di dalam bilik darjah bertarikh 20 Mac 2023. Berdasarkan surat pemakluman tersebut, guru diberi hak dan tanggungjawab untuk menentukan pelaksanaan kurikulum yang merangkumi aspek kandungan kurikulum, pedagogi dan pentaksiran dengan menjadikan Dokumen Standard Kurikulum dan Pentaksiran (DSKP) sebagai rujukan.

KPM melalui Jawatankuasa Mengkaji Beban Guru akan terus meneliti inisiatif yang boleh membantu meringankan beban tugas guru melalui perbincangan berterusan dengan Jabatan Pendidikan Negeri (JPN), Kesatuan Perkhidmatan Perguruan Kebangsaan Malaysia (NUTP), Majlis Pengetua Sekolah Malaysia (MPSM) dan Majlis Guru Besar (MGB).

KPM komited untuk memastikan kesejahteraan guru terjamin dan fokus utama mereka kepada pengajaran dan pembelajaran dapat dioptimumkan.

Sekian, terima kasih.
RT07

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

**DARIPADA : TUAN HAJI AMINOLHUDA BIN HASSAN
[SRI GADING]**

SOALAN

TUAN HAJI AMINOLHUDA BIN HASSAN [SRI GADING] minta **MENTERI SUMBER MANUSIA** menyatakan apakah angka sebenar pembuangan kerja pada tahun 2019-2022.

JAWAPAN

Tuan Yang Di Pertua,

1. Peruntukan di bawah Seksyen 20, Akta Perhubungan Perusahaan 1967 (Akta 177) melindungi mana-mana pekerja daripada dipecat tanpa sebarang sebab dan alasan yang munasabah.
2. Sekiranya seseorang pekerja berpandangan bahawa pemecatannya dibuat tanpa sebarang sebab atau alasan yang munasabah, pekerja berkenaan boleh memfailkan representasi rayuan pemulihan kerja di bawah Seksyen 20 Akta 177 kepada Ketua Pengarah Perhubungan Perusahaan untuk dipulihkan semula ke jawatan asalnya, dalam tempoh 60 hari daripada tarikh penamatan perkhidmatan mereka.
3. Untuk makluman, bilangan kes representasi pemulihan kerja yang telah difailkan bawah Seksyen 20 Akta 177 di Jabatan Perhubungan Perusahaan adalah sebanyak seperti berikut;
 - i) tahun 2019; 6,060 kes
 - ii) tahun 2020; 7,718 kes
 - iii) tahun 2021; 3,684 kes; dan
 - iv) tahun 2022; 3,568 kes

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI AMINOLHUDA BIN HASSAN
[SRI GADING]**

SOALAN

TUAN HAJI AMINOLHUDA BIN HASSAN [SRI GADING] minta
MENTERI SUMBER ASLI, ALAM SEKITAR DAN PERUBAHAN IKLIM
menyatakan:

- (a) jumlah peruntukan yang telah diterima oleh Jabatan Pengairan dan Saliran dari tahun 2018 hingga 2022; dan
- (b) pecahan peruntukan tersebut mengikut setiap negeri untuk kerja-kerja perparitan.

JAWAPAN

Tuan Yang di-Pertua,

1. Untuk makluman Ahli Yang Berhormat, sebanyak RM390 juta telah diperuntukkan untuk kerja-kerja Pemuliharaan Sungai Untuk Mengurangkan Risiko Banjir di bawah Rancangan Malaysia Ke-12 (RMKe-12) dengan melibatkan skop kerja-kerja pengaliran sungai, menstabilkan tebing sungai dan menaiktaraf saluran serta struktur berkaitan bagi meningkatkan kualiti air sungai.

2. Agihan pecahan peruntukan kerja-kerja Pemuliharaan Sungai Untuk Mengurangkan Risiko Banjir (RMKe-12) kepada negeri adalah seperti berikut:

Bil.	Negeri	Peruntukan RMKe- 12 (RM)	Peruntukan 2022 (RM)	Peruntukan 2023 (RM)
1	Perlis	6,000,000.00	2,584,994.65	3,415,005.35
2	Kedah	26,000,000.00	11,994,536.97	14,005,463.03
3	PLSM	8,000,000.00	3,519,959.14	4,480,640.86
4	Perak	28,000,000.00	14,000,000.00	16,000,000.00
5	Pulau Pinang	14,000,000.00	8,499,985.00	5,500,105.00
6	Selangor	20,000,000.00	19,946,542.71	53,457.29
7	N. Sembilan	14,000,000.00	11,419,989.70	2,580,010.30
8	Melaka	10,000,000.00	10,000,000.00	0.00
9	Johor	36,000,000.00	26,158,571.22	9,841,428.78

NO SOALAN : 65

10	Pahang	36,000,000.00	30,057,145.25	5,942,854.75
11	Terengganu	20,000,000.00	11,857,793.18	8,142,206.82
12	Kelantan	24,000,000.00	22,214,363.45	1,785,636.55
13	Sabah	31,000,000.00	22,368,657.60	8,631,342.40
14	Sarawak	35,000,000.00	18,749,997.17	16,250,002.83
15	Kuala Lumpur	75,000,000.00	40,186,716.77	34,813,283.23
16	Labuan	6,000,000.00	3,099,950.40	2,900,049.60
17	Putrajaya	1,000,000.00	250,000.00	750,000.00
Jumlah Keseluruhan		390,000,000.00	254,908,513.21	135,091,486.79

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN JAWAB LISAN

**DARIPADA : YB DATO' SERI HAJI AMINUDDIN BIN
HARUN [PORT DICKSON]**

SOALAN

DATO' SERI HAJI AMINUDDIN BIN HARUN [PORT DICKSON]
minta **MENTERI SUMBER MANUSIA** menyatakan apakah usaha
Kementerian untuk memanfaatkan graduan lepasan institusi
perguruan di bawah KPM, bagi tujuan meningkatkan mutu P&P di
institusi-institusi kemahiran negara.

JAWAPAN

Tuan Yang Di Pertua,

1. Jabatan Tenaga Manusia melalui 32 buah institusi latihan di seluruh negara merupakan salah sebuah agensi yang melaksanakan latihan latihan kemahiran. Tenaga pengajar teknikal yang mengajar di institusi latihan Jabatan Tenaga Manusia terdiri daripada Pegawai Latihan Vokasional skim DV lantikan Suruhanjaya Perkhidmatan Awam. Graduan yang memenuhi syarat lantikan daripada mana-mana IPT boleh memohon sebagai pengajar melalui Suruhanjaya Perkhidmatan Awam.

2. Selain itu, terdapat beberapa perjawatan kader dalam kalangan Pegawai Perkhidmatan Pendidikan Siswazah yang ditugaskan untuk mengajar subjek umum seperti Pendidikan Islam, Pendidikan Moral, Matematik, Bahasa Inggeris. Lantikan dan penempatan pegawai DG dibuat oleh Suruhanjaya Perkhidmatan Pendidikan. Antara calon yang boleh memohon jawatan tersebut adalah dalam kalangan lepasan Institut Pendidikan Guru yang memenuhi kelayakan yang ditetapkan oleh Suruhanjaya Perkhidmatan Pendidikan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SERI HAJI AMINUDDIN BIN HARUN
[PORT DICKSON]**

SOALAN

DATO' SERI HAJI AMINUDDIN BIN HARUN [PORT DICKSON] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan adakah peruntukan untuk program penyelenggaraan sungai dan tebatan banjir untuk Negeri Sembilan. Jika ada, berapa jumlah peruntukannya.

JAWAPAN

Tuan Yang di-Pertua,

1. Di bawah Rancangan Malaysia Ke-12 (RMKe-12), Projek Pemuliharaan Sungai Untuk Mengurangkan Risiko Banjir di Negeri Sembilan telah diluluskan berjumlah RM14 juta. Pada tahun 2022, 88 projek telah dilaksanakan dengan kos berjumlah RM11.24 juta. Manakala Kerja-Kerja Pengukuhan Tebing Sungai Emi di Loji Rawatan Air Pantai Daerah Seremban sedang dilaksanakan dengan kos berjumlah RM2.5 juta dan dijangka siap Jun 2023.

2. Bagi projek tebatan banjir, Kerajaan Persekutuan telah meluluskan empat (4) buah projek di bawah Rancangan Malaysia Ke-11 (RMKe-11) di Negeri Sembilan iaitu:

- I. Pembangunan Lembangan Sungai Bersepadu Sungai Pedas, Daerah Rembau, Negeri Sembilan berjumlah RM25.85 juta dan dijangka siap pada tahun 2025;
- II. Rancangan Tebatan Banjir Sungai Chempedak, Daerah Jelebu, Negeri Sembilan berjumlah RM10 juta dan dijangka siap pada tahun 2025;
- III. Rancangan Tebatan Banjir Sungai Raya, Negeri Sembilan berjumlah RM21.8 juta dan dijangka siap pada tahun 2026; dan
- IV. Pembangunan Lembangan Sungai Bersepadu Sungai Linggi Fasa 4 berjumlah RM70 juta dan dijangka siap pada tahun 2025.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATO' SERI HAJI AMINUDDIN BIN
HARUN (PORT DICKSON)**

SOALAN

YB DATO' SERI HAJI AMINUDDIN BIN HARUN (PORT DICKSON) minta **MENTERI PEMBANGUNAN KERAJAAN TEMPATAN** menyatakan mengenai status pemilikan golongan B40 dalam projek perumahan PR1MA.

JAWAPAN

Tuan Yang di-Pertua,

Untuk makluman Ahli Yang Berhormat, Perbadanan PR1MA Malaysia (PR1MA) merupakan sebuah agensi di bawah Kementerian Pembangunan Kerajaan Tempatan (KPKT) yang ditubuhkan melalui Akta Perumahan Rakyat 1Malaysia 2012 (Akta 739) dengan mandat untuk menyediakan kediaman mampu milik untuk golongan M40.

Buat masa ini, PR1MA tiada sebarang program khas yang mensasarkan golongan B40. Walau bagaimanapun, PR1MA tiada sebarang halangan sekiranya golongan B40 yang berkemampuan untuk memiliki kediaman PR1MA.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : YB DATO' SERI HAJI AMINUDDIN BIN
HARUN [PORT DICKSON]**

SOALAN

YB DATO' SERI HAJI AMINUDDIN BIN HARUN [PORT DICKSON]
minta **MENTERI KESIHATAN** menyatakan apakah langkah-langkah
Kementerian untuk menyelesaikan isu pesakit yang terpaksa menunggu
giliran yang terlalu lama untuk mendapatkan rawatan?

JAWAPAN

Tuan Yang di-Pertua,

1. Isu pesakit menunggu giliran yang lama untuk mendapatkan rawatan sememangnya dipandang serius oleh Kementerian Kesihatan Malaysia. Pelbagai inisiatif diambil pihak Kementerian dalam usaha mengurangkan masa menunggu giliran yang terlalu lama bagi pesakit mendapatkan rawatan di hospital. Antara inisiatif yang dilaksanakan adalah:

i. Memperkembang inisiatif *Lean Healthcare*

inisiatif ini menilai keseluruhan proses kerja bagi mengurangkan aktiviti yang tiada nilai tambah demi meningkatkan kecekapan. Proses yang berulang dan menyebabkan ketidaklancaran pergerakan pesakit dikurangkan atau dihapuskan sama sekali bagi memastikan kelancaran aliran pesakit. Ini membantu memendekkan masa menunggu giliran sekaligus mengurangkan kesesakan di Jabatan Kecemasan dan klinik-klinik pakar. Aktiviti penambabbaikan yang dilakukan menerusi inisiatif *Lean Healthcare* menyasarkan pengurangan waktu menunggu untuk berjumpa doktor, bermula dari kaunter pendaftaran sehinggalah pesakit mengambil ubat di farmasi, dan juga masa menunggu katil untuk pesakit yang perlu dimasukkan ke wad dari Jabatan Kecemasan, di samping mengurangkan masa menunggu untuk pesakit yang discaj dari wad. Antara contoh pelaksanaan adalah di Jabatan Kecemasan Hospital Tengku Ampuan Rahimah yang dapat mengurangkan masa menunggu pesakit dari 192 minit kepada 88 minit (secara purata). Satu lagi contoh adalah di Hospital Sultan Ismail Johor Bahru, yang mana menerusi pelaksanaan kaedah Lean, masa menunggu pesakit untuk berjumpa doktor di Klinik Pakar Ortopedik dapat dikurangkan dari 125 minit ke 90 minit.

ii. Melaksanakan Inisiatif Hospital Kluster

Melaksanakan inisiatif Hospital Kluster bagi meningkatkan kerjasama antara hospital berpakar dengan hospital tanpa pakar bagi membolehkan pesakit luar bandar menerima rawatan kepakaran tanpa perlu dirujuk ke hospital berpakar dan menunggu giliran yang lebih lama untuk dilihat oleh doktor pakar. Melalui pelaksanaan inisiatif Hospital Kluster, hospital-hospital berpakar dan tanpa pakar mengikut lokasi geografi yang berdekatan digabungkan di bawah satu sistem bagi membolehkan perkongsian dan pengoptimuman sumber-sumber seperti sumber manusia, peralatan, fasiliti dan lain-lain dilaksanakan. Perkongsian dan pengoptimuman sumber-sumber ini dilaksanakan bagi memenuhi keperluan pesakit setempat dan meningkatkan kecekapan perkhidmatan dalam setiap Kluster.

iii. Meningkatkan dan memperluas Perkhidmatan Rawatan Harian ke hospital-hospital seluruh negara

Skop perkhidmatan Rawatan Harian telah dikembangkan dan tidak hanya bertumpu pada kes-kes pembedahan sahaja yang memerlukan pemerhatian kurang dari sehari. Prosedur lain yang dilakukan adalah seperti pemindahan darah, kemoterapi dan prosedur perubatan yang lain seperti endoskopi dan hemodialisis. Pada masa hadapan, akan lebih banyak prosedur yang dapat dilakukan berkonsepkan Rawatan Harian bagi mengurangkan waktu menunggu giliran menjalankan prosedur rawatan dalam kalangan pesakit.

iv. Perkhidmatan Pembedahan Elektif Hari Sabtu

Melaksanakan perkhidmatan pembedahan elektif pada hari Sabtu bertujuan mengurangkan masa menunggu pembedahan terutamanya kes-kes pembedahan yang telah dirancang awal demi memenuhi keperluan pesakit yang semakin meningkat. Selain itu, waktu operasi dewan bedah bagi kes-kes elektif pada hari-hari biasa turut dipanjangkan bagi membolehkan lebih banyak pembedahan elektif dapat dibuat dalam satu hari.

v. Sesi *Virtual Clinic*

NO. SOALAN : 69

Memperkenalkan sesi *virtual clinic* yang mana pesakit tidak perlu hadir ke hospital atau klinik untuk mendapatkan khidmat nasihat berkenaan masalah kesihatan. Sebaliknya, mereka boleh mendapatkan konsultasi secara maya.

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DATO' SERI HAJI AMINUDDIN BIN HARUN
[PORT DICKSON]**

SOALAN

Dato' Seri Haji Aminuddin bin Harun [Port Dickson] minta MENTERI KOMUNIKASI DAN DIGITAL menyatakan apakah tindakan Kementerian bagi mengatasi isu-isu fitnah dan berita palsu yang disebarkan di dalam media sosial.

JAWAPAN

Tuan Yang di-Pertua,

Kementerian Komunikasi dan Digital (KKD) komited dan sentiasa bekerjasama secara kolektif dengan jabatan dan agensi di bawahnya dalam mengatasi isu-isu fitnah dan menyekat penularan maklumat berita palsu yang disebarkan di dalam media sosial bagi menjamin keharmonian dan ketenteraman awam di negara ini. Antara langkah-langkah yang diambil oleh Kementerian adalah seperti berikut:

- (i) Penguatkuasaan undang-undang di bawah perundangan sedia ada seperti Seksyen 505 Kanun Keseksaan [Akta 574] dan Seksyen 233 Akta Komunikasi dan Multimedia 1998 [Akta 588] akan terus dilaksanakan untuk membendung berita tidak benar atau mana-mana kandungan yang boleh menimbulkan kekeliruan dalam masyarakat dan keadaan yang tidak baik untuk keselamatan dan kesejahteraan awam serta kestabilan negara;
- (ii) Kerjasama di antara Polis Diraja Malaysia (PDRM) dan SKMM melalui Jawatankuasa Induk PDRM-SKMM akan terus diperkasa melalui perkongsian pintar daripada aspek teknikal bagi membanteras jenayah dan melindungi pengguna Internet dalam negara terutamanya apabila ianya memberi kesan kepada kestabilan negara serta ketenteraman awam, termasuklah kandungan berkaitan penghinaan terhadap Institusi Diraja, Agama dan Kaum (3R iaitu *Royalty*, *Religion* dan *Race*);
- (iii) Jalinan kerjasama bersama penyedia platform media sosial antaranya *TikTok*, *Twitter* dan pihak Meta (*Facebook* dan *Instagram*);
- (iv) Program-program advokasi di bawah SKMM seperti Klik Dengan Bijak (KDB) dan *Malaysia ICT Volunteer* (MIV) bagi mempromosikan penggunaan Internet secara berhemah dan

bertanggungjawab bagi mengelakkan penyalahgunaan media sosial;

- (v) Program-program advokasi dan perkongsian maklumat turut dibuat secara berterusan di semua platform media sosial rasmi Jabatan Penerangan (JaPen) dan Jabatan Penyiaran Malaysia (RTM) untuk mendidik masyarakat supaya sentiasa bertanggungjawab dalam memastikan kesahihan maklumat yang diterima menerusi infografik dan videografik; dan
- (vi) Penerbitan Pesanan Khidmat Awam (PKA) menerusi Perbadanan Filem Nasional Malaysia (FINAS) yang bertajuk 'Hentikan Perkongsian Kandungan Sensitif' berdurasi satu minit yang disiarkan di semua stesen televisyen mulai 23 Disember 2022 sehingga Disember 2023. PKA ini mengajak masyarakat agar menghindari sebarang tindakan termasuk ungkapan kebencian berkaitan 3R yang boleh mencetuskan provokasi kaum.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN(BERTULIS)

**DARIPADA : DATUK ANDI MUHAMMAD SURYADY BIN
BANDY (KALABAKAN)**

SOALAN

DATUK ANDI MUHAMMAD SURYADY BIN BANDY (KALABAKAN)
minta MENTERI PEMBANGUNAN USAHAWAN DAN KOPERASI
menyatakan berapa jumlah usahawan khususnya golongan belia di
dalam Parlimen Kalabakan yang telah menerima bantuan geran dan
bimbingan daripada pihak Kementerian untuk memula dan
mengembangkan perniagaan mereka serta apakah pencapaian yang
telah berjaya dihasilkan oleh mereka menerusi bantuan tersebut.

JAWAPAN

Tuan Yang di-Pertua,

1. Kementerian Pembangunan Usahawan dan Koperasi (KUSKOP) dan agensi-agensi di bawahnya iaitu TEKUN Nasional dan SME Corp. telah melaksanakan beberapa program kepada usahawan belia di Parlimen Kalabakan untuk memulakan dan mengembangkan perniagaan seperti berikut:

- i. **TEKUN Nasional** telah menyediakan **kemudahan pembiayaan** merangkumi semua peringkat umur dari 18 tahun sehingga 65 tahun. Sehingga Disember 2022, seramai 1,767 usahawan di Parlimen Kalabakan telah dibantu melibatkan pembiayaan berjumlah RM18.6 juta. Daripada jumlah tersebut, seramai 1,022 orang merupakan usahawan belia iaitu dalam lingkungan umur 18 tahun sehingga 40 tahun, dengan nilai pembiayaan berjumlah RM11.2 juta.

TEKUN Nasional telah melaksanakan kajian impak secara amnya untuk usahawan yang mendapat bantuan pembiayaan melalui program pembiayaan secara berkumpulan TEMAN TEKUN. Melalui kajian yang dilaksanakan, sebanyak 72% usahawan telah berjaya meningkatkan jumlah jualan sekurang-kurang 20%.

- ii. **SME Corp.** menyalurkan peruntukan bagi tujuan bantuan geran dan pelaksanaan latihan berjumlah RM6.02 juta melibatkan seramai 405 belia Bumiputera di negeri Sabah melalui **Program Tunas Usahawan Belia Bumiputera (TUBE)** bagi tempoh **2021 sehingga 2022**. Daripada jumlah tersebut, sebanyak 9 usahawan belia adalah daripada Parlimen Kalabakan (melibatkan DUN Kukusan, Tanjung Batu, Merotai dan Sebatik) dengan RM176,737.52 peruntukan telah diluluskan (bantuan geran dan kos latihan).

SOALAN NO : 71

Program TUBE ini memberi bantuan kepada belia Bumiputera untuk meningkatkan pengetahuan mereka di dalam bidang perniagaan melalui pembangunan kapasiti berbentuk latihan, geran permulaan perniagaan, khidmat nasihat serta pemantauan dan bimbingan oleh Kaunselor Perniagaan SME Corp.

Kaji selidik penilaian keberkesanan Program TUBE yang telah dilaksanakan juga mendapati 61.4% peserta telah meningkatkan hasil jualan dan keuntungan, meningkatkan kecekapan dan produktiviti (54.7%), membangunkan produk / perkhidmatan baharu (49%) dan memformalkan dan mengkomersialkan perniagaan (31.9%).

- iii. **Amanah Ikhtiar Malaysia (AIM)** telah menyediakan **kemudahan pembiayaan** merangkumi semua peringkat umur dari 18 tahun sehingga 80 tahun. Sehingga Disember 2022, seramai 728 Sahabat Usahawan di Parlimen Kalabakan telah dibantu melibatkan pembiayaan berjumlah RM5.13 juta. Daripada jumlah tersebut, seramai 340 orang merupakan usahawan belia dalam lingkungan umur 18 tahun sehingga 40 tahun, dengan nilai pembiayaan berjumlah RM2.24 juta.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB DATUK ANDI MUHAMMAD SURYADY BIN
BANDY (KALABAKAN)**

SOALAN

DATUK ANDI MUHAMMAD SURYADY BIN BANDY [KALABAKAN] minta **MENTERI KERJA RAYA** menyatakan status terkini pembinaan Lebuhraya Pan Borneo dan apakah jaminan Kementerian bahawa projek ini akan diteruskan sehingga Fasa 3 yang mencakupi jajaran Tawau, Kalabakan, Keningau dan Kimanis mencapai objektif utamanya untuk menyediakan jaringan perhubungan darat yang selesa kepada penduduk setempat.

JAWAPAN

Tuan Yang Di-Pertua,

Untuk makluman Ahli Yang Berhormat, pelaksanaan projek Fasa 1 Lebuhraya Pan Borneo (LPB) Sabah dengan anggaran jarak keseluruhan 706 km dibahagikan kepada 35 pakej kerja di mana sehingga kini, 15 pakej kerja telah dibuat pelantikan kontraktor bagi tujuan kerja-kerja pembinaan dengan status kemajuan sehingga Disember 2022 bagi pakej kerja yang telah dimulakan adalah 73%. Sehingga kini, pakej-pakej kerja berikut telah dibuka untuk pengguna jalan raya:

- i) Pakej Kerja 5 : Donggongan ke Papar telah siap pada 29 Ogos 2022; dan
- ii) Pakej Kerja 27: Kampung Lot M ke Batu 32, Sandakan telah siap pada 18 November 2022.

Manakala status satu (1) pakej kerja baharu iaitu Pakej Kerja 9 yang melibatkan laluan dari Serusop ke Pituru pula dijangka akan dilaksanakan seawal suku tahun kedua 2023, menjadikan keseluruhan 16 pakej kerja akan dilaksanakan buat masa kini, dengan kos keseluruhan sebanyak RM 10,849 juta menggunakan peruntukan pembangunan (*Development Expenditure* – DE) sepenuhnya.

Untuk makluman Ahli Yang Berhormat juga, pada masa kini, keutamaan adalah bagi menyiapkan keseluruhan Fasa 1 terlebih dahulu di mana bagi baki 19 Pakej Kerja (Fasa 1B) yang masih belum mula pembinaan akan dibiayai secara hibrid menggunakan peruntukan pembangunan dan melalui terbitan sukuk/bon oleh DanaInfra Nasional Berhad. Projek LPB Sabah Fasa 1B ini akan dilaksanakan dengan tempoh pembinaan selama 5 tahun, dan dijangka akan dimulakan seawal suku tahun ketiga tahun 2023, tertakluk kepada kelulusan Agensi Pusat. Sekian, terima kasih.

**PEMBERITAHUAN PERTANYAAN BUKAN LISAN (BERTULIS)
DEWAN RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : DATUK ANDI MUHAMMAD SURYADY
BIN BANDY [KALABAKAN]**

SOALAN

DATUK ANDI MUHAMMAD SURYADY BIN BANDY [KALABAKAN] minta **MENTERI PERDAGANGAN DALAM NEGERI DAN KOS SARA HIDUP** menyatakan apakah perancangan strategik Kementerian bagi menangani masalah kenaikan harga barang yang membawa kepada kesan inflasi sehingga mengakibatkan kuasa beli pengguna kian mengecil dan berupaya menjejaskan usaha ke arah pemulihan ekonomi negara.

JAWAPAN

Yang di-Pertua,

Menangani kos sara hidup secara tuntas dan menyeluruh merupakan satu usaha berterusan dan panjang. Kos sara hidup bukan hanya masalah ekonomi tetapi terdapat cabaran yang melibatkan pelbagai dimensi termasuklah yang bersifat struktural. Dalam hubungan ini, inisiatif yang dirangka oleh Majlis Tindakan Sara Hidup Negara (NACCOL) yang dipengerusikan YAB Perdana Menteri akan menumpukan kepada strategi serampang dua mata pertama adalah menangani kenaikan harga barangan dan perkhidmatan dan kedua adalah dengan meningkatkan pendapatan rakyat. Secara realitinya kos sara hidup timbul kerana kuasa beli rakyat tidak dapat menampung perbelanjaan.

Menyedari bahawa isu kos sara hidup ini merentasi bidang tugas banyak Kementerian dan agensi maka selaras dengan nama Kementerian Perdagangan Dalam Negeri dan Kos Sara Hidup (KPDN), kementerian ini diberikan kuasa untuk melaksanakan tanggungjawab berkaitan kos sara hidup dengan lebih efektif dan efisien dan mendukung pendekatan keseluruhan Kerajaan (*whole of government approach*). Tanggungjawab KPDN bukan lagi hanya bersifat keurusetiaan dan penyelarasan semata-mata malah bertindak untuk mengkaji serta menganalisa kesan dan implikasi pelaksanaan polisi dan program Kerajaan terhadap kos sara hidup rakyat.

Tiga (3) cabaran NACCOL dalam usaha untuk menangani kos sara hidup adalah pemberian subsidi secara bersasar, ketirisan subsidi dan kenaikan harga barangan yang didorong oleh faktor luaran. Pada ketika ini sedang berlangsung Makmal Kos Sara Hidup: Subsidi Bersasar yang dikendalikan oleh KPDN bersama Kementerian Kewangan dan Kementerian Ekonomi bagi menetapkan kumpulan penerima faedah subsidi bersasar, keperluan atau barangan yang akan disubsidikan oleh Kerajaan serta mekanisme untuk melaksanakan subsidi secara bersasar. Kerajaan Perpaduan ingin memberi jaminan bahawa kumpulan yang paling terkesan dengan kos sara hidup akan menjadi penerima bantuan subsidi yang paling utama. Mekanisme pemberian subsidi yang lebih terkawal seperti penggunaan teknologi dan sistem ICT akan memastikan

ketirisan subsidi dapat dibendung. Ini merupakan kaedah proaktif Kerajaan selain meneruskan usaha-usaha penguatkuasaan oleh Bahagian Penguatkuasaan KPDN.

Sebagai makluman Inisiatif RAHMAH di bawah perancangan jangka pendek yang diambil oleh KPDN adalah Program Payung Rahmah bagi membantu terutamanya kumpulan berpendapatan rendah untuk mendapatkan barangan keperluan asas. Program ini telah dilaksanakan secara berperingkat bermula pada awal bulan ini. Terdapat lima (5) inisiatif di bawah program ini :

PERTAMA : Bakul Rahmah iaitu inisiatif yang menyasarkan sumbangan berbentuk bakul makanan (keperluan harian) bernilai RM100. Barangan keperluan yang dikenali adalah beras, gula, minyak masak, tepung, susu pekat, mihun dan telur yang akan disumbangkan oleh rakan strategik kepada kumpulan miskin tegar secara berterusan pada setiap bulan. Program ini bukan hanya akan menyediakan bantuan barangan tetapi juga peluang pekerjaan bagi mereka yang layak;

KEDUA : Jualan Rahmah iaitu inisiatif program jualan murah sepanjang tahun 2023 oleh pasaraya besar dan pasaraya. Untuk tujuan ini KPDN akan memberi permit Notis Jualan Murah (NJM) bagi Jualan Rahmah sehingga maksimum 4 bulan berbanding 1 bulan pada masa sekarang;

KETIGA : Pakej Rahmah iaitu inisiatif yang menyokong Jualan Rahmah yang mana pasaraya besar dan pasaraya menyediakan beberapa barangan keperluan asas berbentuk pakej. Barangan keperluan dalam pakej berkenaan adalah bernilai RM70 namun pakej tersebut akan dijual kepada pengguna pada harga RM50 sahaja;

KEEMPAT : Kafe Rahmah yang bertujuan untuk menyediakan makanan yang dijual pada harga yang berpatutan kepada penuntut IPTA serta memberikan hidangan makanan percuma kepada penuntut Institusi Pengajian Tinggi Awam (IPTA) dari keluarga berpendapatan rendah; dan

KELIMA : Menu Rahmah yang sedang hangat diperkatakan sekarang iaitu inisiatif pengusaha-pengusaha makanan secara sukarela untuk menawarkan makanan pada harga RM5 bagi setiap hidangan. Menu

Rahmah bertujuan untuk memastikan terutamanya golongan berpendapatan rendah mendapat akses kepada pilihan harga yang mampu bayar.

Di samping itu juga, KPDN akan meneruskan program sedia ada yang memberi impak tinggi dalam membantu kos sara hidup rakyat iaitu Program Penyeragaman Harga tujuh (7) barangan asas iaitu beras putih, gula, minyak masak 1kg, tepung gandum, LPG, petrol RON95 dan diesel supaya bekalan barangan tersebut sampai kepada penduduk di kawasan luar bandar/ pedalaman Semenanjung, Sabah dan Sarawak pada harga kawalan sama dengan kawasan bandar melalui subsidi pengangkutan yang dibayar Kerajaan.

KPDN juga mengorak langkah dalam inisiatif jangka masa sederhana dan panjang melalui inisiatif DAYA supaya kumpulan sasar Kementerian dapat menjana pendapatan di dalam sektor perdagangan dan pengedaran. Melalui program baharu yang dikenali sebagai **Rezeki Suri**, akan memberi peluang kepada suri rumah untuk menambahkan pendapatan dengan menjalankan perniagaan bahan keperluan asas dari rumah. KPDN juga akan meneruskan **Program Pembangunan Francais Mikro dan Francais Mampu Milik** bagi membantu golongan M40 dan B40 menjadi usahawan dengan menceburi bidang francais. Memandangkan potensi dan pendapatan besar yang boleh disumbangkan oleh bidang francais kepada pendapatan rakyat dan negara maka KPDN turut memohon peruntukan yang lebih besar bagi program ini untuk tahun 2023.

Sekian, terima kasih.

PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023

PERTANYAAN : BUKAN LISAN
DARIPADA : DATUK ANDI MUHAMMAD SURYADY BIN
BANDY [KALABAKAN]

SOALAN

DATUK ANDI MUHAMMAD SURYADY BIN BANDY [KALABAKAN]
minta **MENTERI KEWANGAN** menyatakan sejauh manakah Sumbangan Tunai Rahmah (STR) yang merupakan satu bentuk '*social safety net*' berupaya untuk membantu meningkatkan pertumbuhan ekonomi negara.

JAWAPAN

Tuan Yang di-Pertua,

Untuk makluman Yang Berhormat, Sumbangan Tunai Rahmah atau STR merupakan salah satu inisiatif Kerajaan untuk menangani peningkatan kos sara hidup selain membuktikan keprihatinan Kerajaan terhadap kebajikan rakyat khususnya golongan B40. **Bayaran fasa pertama** STR kepada **8.7 juta penerima B40** dengan implikasi kewangan bernilai **1.67 bilion ringgit** telah dibuat mulai 17 Januari 2023 yang lalu.

Berdasarkan kajian dan penemuan oleh ahli akademik, kumpulan berpendapatan rendah khususnya golongan B40 rata-rata membelanjakan hampir 80 peratus daripada pendapatan yang mereka perolehi. Bayaran STR kepada rakyat bukan sahaja dilihat mampu memberi rangsangan perbelanjaan kepada ekonomi malahan kesan penggandaan perbelanjaan turut memberi sokongan kepada pertumbuhan Keluaran Dalam Negara Kasar (KDNK). Kesan pengganda ini dapat dilihat terutamanya pada akhir suku pertama tahun ini dan

berterusan ke suku kedua dari segi peningkatan dalam perbelanjaan boleh guna rakyat, penggunaan swasta dan beberapa sektor khusus, seperti sektor perkhidmatan dan sub-sektor perkhidmatan, sektor makanan dan minuman, perdagangan borong dan runcit, dan juga industri yang berasaskan makanan.

Justeru, bantuan tunai langsung yang disuntik oleh Kerajaan kepada rakyat melalui pemberian STR merupakan salah satu bentuk 'social safety net' yang terbukti menyumbang kepada pertumbuhan ekonomi negara.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK ANDI MUHAMMAD SURYADY BIN
BANDY (KALABAKAN)**

SOALAN

DATUK ANDI MUHAMMAD SURYADY BIN BANDY [KALABAKAN] minta **MENTERI PERTAHANAN** menyatakan apakah usaha pihak Kementerian bagi memperkasakan tahap kesiapsiagaan di kawasan sempadan terutamanya di Kalabakan daripada ancaman terrorisme dan jenayah rentas sempadan seperti pemerdagangan manusia, penyeludupan dadah yang berupaya mengganggu gugat kesejahteraan dan keselamatan penduduk setempat.

JAWAPAN

1. Kementerian Pertahanan melalui Tentera Darat sentiasa melaksanakan Operasi BALASAH iaitu operasi kawalan sempadan daratan di sepanjang sempadan Sabah (Malaysia) – Kalimantan (Indonesia) yang bermula dari sektor Long Pasia sehingga sektor Serudong.
2. Pada masa kini, terdapat 9 buah pos kawalan sempadan dan 1 Pos Gabungan Bersama (GABMA) antara Tentera Darat Malaysia (TDM) dan Tentara Nasional Indonesia Angkatan Darat (TNI-AD). Ianya merangkumi penambahan sebanyak 2 buah pos kawalan sempadan yang telah siap dibina pada suku kedua tahun 2022 iaitu Pos Luis, Tawau dan Pos Tibow, Pensiangan. Manakala sebuah pos lagi masih dalam pembinaan iaitu Pos Tambulanan, Tawau yang dijangka siap pada penghujung tahun 2023. 2 buah pos tambahan lagi akan dibina pada suku keempat tahun 2023 iaitu Pos Brantian dan Pos Felda Selatan, Tawau.
3. Aktiviti-aktiviti pengoperasian Tentera Darat di kawasan berkenaan melibatkan Rondaan Jarak Jauh (RJJ), Rondaan Jarak Dekat (RJD), pengawasan udara melalui dron serta Serang Hendap dan Tangkap (SERKAP).

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

**DARIPADA : DATUK HAJI AWANG BIN HASHIM
[PENDANG]**

SOALAN

DATUK HAJI AWANG BIN HASHIM [PENDANG] minta **MENTERI SUMBER MANUSIA** menyatakan apakah perancangan jangka panjang pihak PERKESO dalam menjaga kebajikan golongan pencarum terutama pekerja sektor tidak formal serta penambahbaikan yang membawa manfaat kepada golongan terbabit.

JAWAPAN

Tuan Yang di-Pertua,

1. Untuk makluman Ahli-Ahli Dewan Yang Mulia ini, Kerajaan melalui PERKESO mempunyai satu mekanisme perlindungan sosial yang terjamin terutama untuk pekerja sektor tidak formal iaitu Skim Keselamatan Sosial Pekerjaan Sendiri (SKSPS). Skim ini memberi perlindungan kepada individu yang menjalankan pekerjaan sendiri (*self-employed*) di bawah peruntukan Akta Keselamatan Sosial Pekerjaan Sendiri 2017 (Akta 789) yang berkuatkuasa mulai 1 Jun 2017.

2. Oleh itu, PERKESO secara berterusan merancang dan melaksanakan penambahbaikan Skim Keselamatan Sosial Pekerjaan Sendiri (SKSPS) demi menjaga kebajikan golongan pencarum agar ianya memberi manfaat kepada golongan terbabit. Antaranya adalah:

- i. menjadi pengkalan data berpusat bagi pekerja sektor *informal* yang boleh digunapakai untuk melestarikan kesejahteraan golongan ini.
- ii. menambah baik skim faedah dengan skim-skim terbaru di samping skim bencana kerja seperti penyakit krikital dan kemalangan bukan bencana kerja pekerjaan sendiri supaya golongan ini mendapat perlindungan sosial setaraf dengan perubahan ekonomi dan global.
- iii. memperluaskan jalinan "rakan strategik" antara Kementerian Sumber Manusia dan kementerian yang berkaitan untuk memastikan perlindungan keselamatan sosial secara berterusan ke atas orang bekerja sendiri (OBS) di bawah seliaan mereka. Meletakan syarat wajib caruman di bawah SKSPS sebelum menjalankan satu perusahaan tersebut.

SOALAN NO: 76

- iv. mengadakan sesi libat urus dan memeterai Memorandum Persefahaman (MoU) bersama kerajaan negeri, agensi kerajaan mahupun swasta dengan memberi latihan-latihan yang menambah baik perusahaan tersebut bagi sektor *informal*. Setakat ini sebanyak 10 MoU telah temetrai yang melibatkan sektor pengangkutan, peniaga kecil, kesenian dan pertanian.
3. Berdasarkan statistik, setakat 31 Disember 2022 sebanyak **5,843** libat urus telah diadakan dan seramai **713,122** Orang Bekerja Sendiri (OBS) aktif mencatatkan peningkatan sebanyak 105% berbanding tahun 2021 iaitu seramai 347,578 OBS aktif.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN JAWAB LISAN

**DARIPADA : DATUK HAJI AWANG BIN HASHIM
[PENDANG]**

SOALAN

DATUK HAJI AWANG BIN HASHIM [PENDANG] minta **MENTERI SUMBER MANUSIA** menyatakan kadar pengangguran terkini dan apakah pendekatan yang telah dirancang dalam memastikan kadar pengangguran berada di tahap yang terkawal.

JAWAPAN

Tuan Yang Di Pertua,

1. Berdasarkan kepada Statistik Tenaga Buruh terkini oleh Jabatan Perangkaan Malaysia, kadar pengangguran pada suku ketiga 2022 ialah 3.70%. Ini menunjukkan ekonomi negara berada pada tahap guna tenaga penuh dan kadar pengangguran mula kembali kepada keadaan sebelum pandemik COVID-19.
2. Bagi meningkatkan kadar penyertaan tenaga buruh serta mengurangkan kadar pengangguran, Kerajaan telah mempergiatkan usaha mengadakan program berikut:
 - i. KSM sedang mempergiatkan penggunaan platform pencarian pekerjaan dalam portal MYFutureJobs. Dengan membuat padanan pekerjaan berdasarkan kelayakan, kemahiran, pengalaman, gaji dan lain-lain mengikut keperluan majikan (job matching). Bagi meningkatkan tahap padanan pekerjaan ini Kementerian melalui PERKESO telah menjalinkan kerjasama dengan beberapa kementerian, antaranya Kementerian Pembangunan Luar Bandar (KPLB), Kementerian Belia dan Sukan (KBS), dan Kementerian Pengajian Tinggi (KPT), Kementerian Perdagangan Antarabangsa dan Industri (MITI), Kementerian Pembangunan Usahawan dan Koperasi (Medac) serta Kementerian Alam Sekitar dan Air (KASA).
 - ii. KSM secara berterusan mengadakan Karnival Kerjaya atau *Job Carnival* di seluruh negara menerusi program pengambilan pekerja kepada golongan graduan baharu, lepasan sekolah, golongan belia dan pekerja serta golongan yang aktif mencari pekerjaan.
 - iii. Selain itu, KSM menerusi Sistem Insurans Pekerjaan (SIP) telah menyediakan program-program bagi peningkatan modal insan dan kebolehpasaran pekerja seperti khidmat kaunseling kerjaya, skills profiling, penulisan resume, mock interview, latihan kemahiran bahasa

dan penyampaian serta seminar pekerjaan bagi mereka yang mencari pekerjaan. Dengan inisiatif-inisiatif ini, kebolehpasaran mereka akan ditingkatkan dan meningkatkan peluang kerjaya yang baharu.

- iv. KSM melalui **HRD Corp** telah menubuhkan **Placement Centre** yang berperanan sebagai platform untuk memadankan pekerja dengan peluang pekerjaan yang tersedia oleh majikan. Sehingga **31 Disember 2022**, sebanyak **44,109 peluang pekerjaan tersedia** melalui platform ini di mana lebih **7,000 pekerja telah berjaya** mendapat pekerjaan dalam pelbagai sektor seperti Perkhidmatan, Perkilangan, Borong dan Runcit serta lain-lain lagi. Daripada jumlah tersebut, sebanyak **60 peratus (4,200 pekerja)** adalah daripada golongan belia dan sebahagian besar mereka memperoleh gaji sebanyak **RM2,000** dan ke atas.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

DARIPADA : DATUK HAJI AWANG BIN HASHIM [PENDANG]

SOALAN

DATUK HAJI AWANG BIN HASHIM [PENDANG] minta **MENTERI SUMBER MANUSIA** menyatakan pelan tindakan Kerajaan bagi memperkasakan sumber manusia bagi sektor buruh pekerja asing dalam industri sekiranya berdepan dengan pandemik seperti COVID-19 apabila berlakunya kekurangan pekerja secara mendadak.

JAWAPAN

Tuan Yang di-Pertua,

1. Kerajaan Perpaduan amat prihatin dengan keperluan mendesak berkaitan kekurangan guna tenaga khususnya guna tenaga asing di sektor-sektor industri yang kritikal. Sehubungan dengan itu, Kementerian Sumber Manusia (KSM) dengan kerjasama Kementerian Dalam Negeri telah melaksanakan Pelan kelonggaran pekerja asing bermula 17 Januari sehingga 31 Mac 2023 untuk menyegerakan kelulusan permohonan kuota pekerja asing di lima sektor kritikal iaitu perladangan, perkilangan, pembinaan, pertanian dan perkhidmatan (restoran). Sehingga 27 Februari 2023, **358,665 permohonan kuota pekerja asing telah diluluskan merangkumi perladangan (16,537), perkilangan (79,921), pembinaan (208,157), pertanian (20,202) dan perkhidmatan (restoran) (33,858).**

2. Di bawah Pelan Kelonggaran Penggajian Pekerja Asing, majikan-majikan yang memerlukan pekerja asing dibenarkan untuk menggajikan pekerja asing dari 15 negara sumber tanpa melalui prasyarat kelayakan penggajian dan kelayakan kuota yang dikenakan sebelum ini, termasuk pengecualian proses temuduga oleh Agensi Kawal Selia (AKS). Di samping itu, pengiklanan kekosongan jawatan di portal MyFuture Jobs juga telah dikecualikan berkuatkuasa serta merta. KSM akan memproses dan memberi kelulusan permohonan penggajian pekerja asing dalam tempoh tiga (3) hari bekerja daripada tarikh permohonan diterima.

3. Tindakan kerajaan melaksanakan pelan kelonggaran ini merupakan langkah sementara bagi memenuhi keperluan mendesak guna tenaga asing dalam 5 sektor kritikal tersebut. Ianya juga mengambil kira bahawa sempadan negara hanya mula dibuka pada 1 April 2022 selaras peralihan fasa pandemik kepada endemik negara. Namun begitu, keutamaan akan tetap diberikan kepada rakyat dan pekerja tempatan dalam mengisi kekosongan pekerjaan yang ada di dalam negara ini.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN JAWAB LISAN

DARIPADA : DATUK HAJI AWANG BIN HASHIM [PENDANG]

SOALAN

DATUK HAJI AWANG BIN HASHIM [PENDANG] minta **MENTERI SUMBER MANUSIA** menyatakan langkah-langkah bagi memastikan pekerja yang mencukupi bagi sektor pertanian, pembuatan, pembinaan dan perkhidmatan selain mengurangkan kebergantungan terhadap buruh asing.

JAWAPAN

Tuan Yang Di Pertua,

1. Selain institut sedia ada, sebagai langkah jangka panjang, Kerajaan juga berusaha menggalakkan bakat tempatan menyertai sektor pertanian, pembuatan, pembinaan dan perkhidmatan. Dalam usaha menggalakkan anak muda menyertai sektor ini, KSM melalui Jabatan Pembangunan Kemahiran telah membangunkan Standard Kemahiran Pekerjaan Kebangsaan (SKPK) berkaitan industri pertanian, pembuatan, pembinaan dan perladangan. Selain menyenaraikan keperluan kompetensi, SKPK juga secara jelas memperincikan potensi dan laluan kerjaya dalam sektor pertanian, pembuatan, pembinaan dan perkhidmatan yang dapat dijadikan rujukan oleh golongan ini.
2. Kerajaan turut melaksanakan **gaji minimum RM1,500** melalui Perintah Gaji Minimum (PGM) 2022 yang berkuatkuasa mulai 1 Mei 2022. Namum begitu, majikan di sektor perladangan, pertanian dan pembinaan amat digalakkan untuk menawarkan gaji yang lebih kompetitif serta pemberian elaun tambahan bagi menarik minat golongan belia untuk bekerja di ketiga-tiga sektor ini.
3. Kerajaan secara berterusan merangka dan melaksanakan pelbagai inisiatif merentasi kementerian dan agensi bagi membantu rakyat Malaysia mendapatkan pekerjaan dan mengurangkan kebergantungan kepada guna tenaga asing. Antara inisiatif yang dilaksanakan adalah seperti berikut:
 - i. menggalakkan industri supaya beralih kepada **penggunaan automasi** dan teknologi canggih yang dapat mewujudkan permintaan terhadap pekerja berkemahiran tinggi. Dalam masa sama, kebergantungan kepada pekerja asing berkemahiran rendah akan turut dikurangkan secara berperingkat;
 - ii. mengutamakan *exit policy* penggajian pekerja asing dengan menyediakan pelan latihan kemahiran kepada pekerja tempatan,

memberi keutamaan kepada mekanisma Industrialised Building System (IBS) dalam sektor pembinaan, peralihan kepada intensif mekanisasi dan automasi, restoran berkonsepkan layan diri dan sebagainya;

- iii. program Technical and Vocational Education and Training (TVET) untuk warga tempatan diperkasakan bagi melahirkan individu berkemahiran tinggi selaras dengan hasrat Negara untuk beralih daripada industri berintensif buruh kepada *high-end industry*;
- iv. pembiayaan latihan di bawah Pembangunan Sumber Manusia Berhad (PSMB) melalui caruman levi majikan untuk melatih semula pekerja bagi meningkatkan kemahiran pekerja; dan

Sekian, terima kasih.

DISEMAK OLEH:

.....

(S. SIVA KUMAR)

Setia Usaha Bahagian
Kementerian Sumber Manusia

Tarikh : Mac 2023

**Cadangan Jawapan kepada Pertanyaan Bukan Jawab Lisan Dewan
Rakyat daripada Datuk Haji Awang Bin Hashim [Pendang]**

DIPERSETUJUI / TIDAK DIPERSETUJUI

.....

(A. MANIAM)

Timbalan Ketua Setiausaha (Dasar dan Antarabangsa)
Kementerian Sumber Manusia

Tarikh: Mac 2023

DILULUSKAN / TIDAK DILULUSKAN

.....

(DATUK MUHD KHAIR RAZMAN BIN MOHAMED ANNUAR)

Timbalan Ketua Setiausaha (Operasi)
Kementerian Sumber Manusia
[Menjalankan Tugas Ketua Setiausaha]

Tarikh: Mac 2023

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

**DARIPADA : DATUK HAJI AWANG BIN HASHIM
[PENDANG]**

SOALAN

DATUK HAJI AWANG BIN HASHIM [PENDANG] minta **MENTERI SUMBER MANUSIA** menyatakan apakah pelan tindakan atau panduan disediakan pihak Kerajaan dalam menangani hal berkaitan buruh paksa bagi meningkatkan kesedaran mengenai hal tersebut di semua peringkat.

JAWAPAN

Tuan Yang di-Pertua,

1. Kementerian Sumber Manusia sentiasa prihatin dan bersungguh-sungguh dalam menangani isu buruh paksa di negara ini dengan pembangunan Pelan Tindakan Nasional berhubung Buruh Paksa (NAPFL - *National Action Plan on Forced Labour*) 2021-2025.
2. Pelbagai inisiatif telah dan sedang dilaksanakan untuk mencapai sasaran yang ditetapkan di bawah pelan tersebut, antaranya
 - i) meningkatkan pengetahuan asas dan kesedaran serta pemahaman mengenai buruh paksa di kalangan pekerja dan majikan, golongan belia, penjawat awam serta masyarakat secara umum.
 - ii). memberikan tumpuan kepada aktiviti-aktiviti hebahan mengenai buruh paksa melalui medium media massa; dan
 - iii). memperkasa aktiviti-aktiviti penguatkuasaan dan lain-lain.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' AZMAN BIN NASRUDIN
[PADANG SERAI]**

SOALAN

DATO' AZMAN BIN NASRUDIN [PADANG SERAI] minta **PERDANA MENTERI** menyatakan status pembangunan rumah untuk generasi kedua peneroka FELDA mengikut negeri dan usaha Kementerian untuk memperkasakan kesejahteraan golongan peladang FELDA.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Bagi projek Projek Perumahan Generasi Baharu Felda (PBGF) yang mencapai proses kerja 100% adalah di negeri Pahang di tapak Padang Piol, Selancar 4 dan 5, Keratong 4 dan Sungai Koyan 1. Di Negeri Sembilan di tapak Pasoh 1 dan Pasir Besar. Di negeri Johor melibatkan tapak Sungai Sibol dan Inas Utara. Di negeri Kedah melibatkan tapak di kawasan Laka Selatan dan Sungai Tiang.

2. Projek PGBF yang status masih dalam pembinaan terdapat di negeri Pahang di tapak Sungai koyan tapak A dan B, Chini 3 dan Sungai Tekam. Di negeri Sembilan melibatkan tapak Palong 8, Bukit Jalor, Bukit Rokan Utara dan Pasoh 2. Di negeri Johor melibatkan tapak Moakil 1 dan 2, dan Papan Timur. Di negeri Perak melibatkan tapak di Lasah dan Gunung Besout. Di negeri Terengganu hanya melibatkan satu tapak di Kerteh 5.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' AZMAN BIN NASRUDIN
[PADANG SERAI]**

SOALAN

DATO' AZMAN BIN NASRUDIN [PADANG SERAI] minta **MENTERI PENGANGKUTAN** menyatakan :

(a) adakah Kerajaan akan mempertimbangkan untuk meningkatkan hukuman yang lebih berat kepada kes pelanggaran yang melibatkan pemandu mabuk ; dan

(b) sejauh manakah usaha Kerajaan dalam menangani isu kemalangan yang membabitkan kenderaan berat.

JAWAPAN

Tuan Yang di-Pertua,

1. Untuk makluman Yang Berhormat, isu berkaitan dengan kemalangan yang disebabkan oleh pemandu yang memandu di bawah pengaruh alkohol adalah satu perkara yang amat dipandang serius oleh Kerajaan. Kementerian Pengangkutan telah pun menguatkuasakan pindaan ke atas Akta Pengangkutan Jalan (1987) mulai 23 Oktober 2020. Sejak berkuatkuasanya pindaan Akta tersebut, hukuman yang lebih berat telah diperuntukkan termasuk meningkatkan kadar denda, tempoh penjara dan menjadikan hukuman penjara sebagai mandatori bagi jenis-jenis kesalahan tertentu termasuk kesalahan pemanduan di

bawah pengaruh alkohol atau dadah. Pindaan hukuman ini bertujuan menjadi satu bentuk *deterrence* dan memupuk kesedaran kepada orang ramai ke atas pematuhan undang-undang.

2. Kementerian Pengangkutan juga berpandangan bahawa pindaan ini adalah memadai untuk menjadi satu halangan dan pengajaran kepada pemandu mabuk, sebagai contoh: **Seksyen 44 (memandu semasa di bawah pengaruh minuman yang memabukkan/dadah/ dan menyebabkan kematian)** telah memperuntukkan hukuman penjara tidak kurang 10 tahun dan maksimum 15 tahun, serta denda minimum RM50,000 sehingga RM100,000. Bagi sabitan kali kedua atau seterusnya, hukuman penjara diperuntukkan selama tempoh tidak kurang daripada 15 tahun dan tidak lebih 20 tahun dan denda tidak kurang RM100,000 dan maksimum RM150,000. Bagi pemandu yang menyebabkan kecederaan pula, mereka berdepan hukuman penjara maksimum 10 tahun dan denda maksimum RM50,000, jika sabit kesalahan.

3. Dalam pada itu, Kementerian Pengangkutan akan terus bekerjasama dengan pihak KDN dan PDRM dalam melaksanakan program sedia ada seperti melaksanakan aktiviti kempen dan advokasi dan mengukuhkan aktiviti-aktiviti penguatkuasaan di seluruh negara. Kementerian Pengangkutan juga menyeru semua pihak yang berkepentingan termasuk lain-lain agensi Kerajaan, NGO dan pengusaha premis minuman/makanan untuk bekerjasama dalam membantu melaksanakan kempen, advokasi dan pendidikan kepada orang ramai berhubung kesalahan dan implikasi memandu di bawah pengaruh alkohol dan dadah.

4. Di samping itu, Kementerian Pengangkutan telah meminta pihak Institut Penyelidikan Keselamatan Jalan Raya (MIROS) untuk melaksanakan satu kajian keberkesanaan ke atas semua langkah intervensi yang dijalankan bukan sahaja oleh Kementerian Pengangkutan, tetapi oleh semua pihak pemegang taruh yang lain, bagi menangani isu memandu di bawah pengaruh bahan terlarang. Kajian ini juga akan mengesyorkan lain-lain langkah intervensi dan kaedah yang

boleh dilaksanakan bagi menangani isu pemandu mabuk ini di masa hadapan.

Tuan Yang di-Pertua,

5. Untuk makluman Yang Berhormat, berhubung dengan usaha atau tindakan Kementerian Pengangkutan untuk mengurangkan kemalangan kenderaan berat, Kementerian telah melaksanakan aktiviti-aktiviti penguatkuasaan oleh Jabatan Pengangkutan Jalan (JPJ) ke atas peraturan had muatan kenderaan dan had laju bagi kenderaan berat. Selain mengoperasikan 48 buah Stesen Penguatkuasa (atau stesen timbang) di seluruh negara, JPJ juga turut dibekalkan dengan 67 unit alat timbang mudah alih bagi tujuan menguatkuasakan peraturan berkaitan kenderaan lebih muatan. Bagi tempoh lebih kurang 3 tahun yang mana merangkumi tahun 2018 sehingga September 2021, sejumlah 193,950 notis saman telah dikeluarkan atau lebih kurang 50,000 notis saman telah dikeluarkan dalam setahun.

6. Dalam masa yang sama, Kementerian Pengangkutan bersama Kementerian Kerja Raya, sedang dalam proses untuk membangunkan sistem "*High Speed - Weigh in Motion*" atau HS-WIM. Menerusi penggunaan sistem HS-WIM, aktiviti penguatkuasaan kenderaan berat yang boleh dilaksanakan secara automatik tanpa kenderaan tersebut perlu berhenti. Sistem HS-WIM ini dijangka dapat memperkukuhkan lagi keberkesanan penguatkuasaan terhadap kenderaan berat.

7. Selain itu, Kementerian Pengangkutan juga akan terus menumpukan dan memperkukuhkan aktiviti advokasi, program pendidikan, penetapan peraturan dan penguatkuasaan melalui agensi-agensinya selain meneliti lain-lain pendekatan dan kaedah penambahbaikan yang bersesuaian. Hal ini adalah selari dengan Pelan Keselamatan Jalan Raya Malaysia (PKJRM 2022-2030) yang telah dilancarkan pada Januari tahun ini untuk mencapai pengurangan jumlah kematian akibat nahas jalan raya sekurang-kurangnya pada kadar 50% pada tahun 2030.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : DATO' AZMAN BIN NASRUDIN
[PADANG SERAI]**

SOALAN

YB DATO' AZMAN BIN NASRUDIN (PADANG SERAI) minta **MENTERI PERPADUAN NEGARA** menyatakan pendirian Kerajaan terhadap Dasar Perpaduan Negara dan Rangka Tindakan Perpaduan Negara 2021 - 2030 yang telah dilancarkan oleh Kerajaan sebelum ini.

JAWAPAN

Tuan Yang di-Pertua,

1. Kementerian Perpaduan Negara memainkan peranan sebagai **peneraju agenda perpaduan nasional** yang bersifat inklusif merentasi pelbagai golongan masyarakat demi kemakmuran bersama.
2. **Dasar Perpaduan Negara (DPN)** dan **Rangka Tindakan (Blueprint) Perpaduan Negara 2021-2030** merupakan dokumen utama Kementerian dalam merangka halatuju agenda perpaduan nasional dan dokumen dasar yang dihasilkan adalah **selari dengan Kerangka MADANI** yang **menekankan kepada Perlembagan Persekutuan dan Rukun Negara** sebagai asas pembentukan negara dan penyatupaduan masyarakat.
3. Program-program yang dilaksanakan oleh Kementerian di dalam Kerangka Perpaduan Malaysia MADANI juga adalah berdasarkan kepada **tiga (3) teras utama Dasar Perpaduan Negara** seperti berikut;
 - i. Patriotisme dan demokrasi;
 - ii. Identiti nasional; dan
 - iii. Ekosistem perpaduan.
4. Dalam masa yang sama, Kementerian juga akan sentiasa membuat semakan terhadap dasar dan pelan tindakan yang dihasilkan untuk tujuan **penambahbaikan dari masa ke semasa**.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' AZMAN BIN NASRUDIN
[PADANG SERAI]**

SOALAN

DATO' AZMAN BIN NASRUDIN [PADANG SERAI] minta **MENTERI PENDIDIKAN** menyatakan langkah-langkah dan inisiatif Kerajaan bagi menggalakkan pelajar lepasan SPM yang mendapat keputusan yang cemerlang untuk meneruskan pengajian di peringkat lebih tinggi dari mengambil langkah terlibat dalam ekonomi gig semata-mata seperti kerjaya penghantar makanan dan sebagainya.

JAWAPAN

Tuan Yang di-Pertua,

Kementerian Pendidikan Malaysia (KPM) sangat prihatin terhadap aspek keberhasilan murid dan menggalakkan pelajar lepasan Sijil Pelajaran Malaysia (SPM) yang mendapat keputusan yang cemerlang untuk meneruskan pengajian di peringkat lebih tinggi.

KPM telah mengambil inisiatif mengumpulkan maklumat Pengesanan Lulusan (SPM) melalui Sistem eProfil Kerjaya Murid (ePKM). Melalui maklumat tersebut, KPM merancang dan melaksanakan program pembangunan diri murid dan pendidikan kerjaya di sekolah bagi meningkatkan kesedaran murid terhadap kepentingan belajar, mengembangkan potensi, kecenderungan, sikap, minat dan hala tuju kerjaya supaya murid dilengkapi dengan pengetahuan, kemahiran, pengalaman serta jati diri yang tinggi.

Pelbagai langkah dan inisiatif bagi menggalakkan murid meneruskan pengajian di peringkat lebih tinggi seperti penganjuran Program SUKSES Karnival Kerjaya Murid dengan kerjasama Universiti Awam dan Swasta serta agensi-agensi lain yang menawarkan biasiswa dan pinjaman pembiayaan pengajian. Program ini berkonsepkan pusat sehenti (one stop centre) bermaklumat kepada kumpulan sasaran seperti murid, ibu bapa, guru dan komuniti setempat berinspirasikan perkongsian pintar berasaskan kepakaran melalui pameran kerjaya, ujian minat kerjaya, bengkel temuduga, promosi pengajian tinggi termasuk peringkat matrikulasi dan institusi latihan kemahiran.

Guru Bimbingan dan Kaunseling (GBK) juga diberikan pendedahan kepada maklumat berkaitan pendidikan tinggi serta kerjaya terkini selaras dengan peranan mereka sebagai pakar rujuk kerjaya di peringkat sekolah menengah. Sebagai contoh, KPM melaksanakan mobilisasi sumber dengan kementerian lain seperti Kementerian Pengajian Tinggi (KPT), agensi-agensi kerajaan dan bukan kerajaan seperti Perbadanan Ekonomi Digital Malaysia (MDEC), PetroliaM Nasional Berhad (PETRONAS), Pertubuhan Keselamatan Sosial (PERKESO), *Financial Industry Collective*

Outreach (FINCO) dan Perbadanan Produktiviti Malaysia (MPC).

KPM sentiasa komited meningkatkan motivasi murid menjejaki menara gading demi pembangunan dan pertumbuhan mampan negara.

Sekian, terima kasih.

RT08

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' AZMAN BIN NASRUDIN
[PADANG SERAI]**

SOALAN

DATO' AZMAN BIN NASRUDIN [PADANG SERAI] minta **MENTERI
PENDIDIKAN** menyatakan :

- (a) berapa jumlah keseluruhan kuarters pendidikan seluruh negara yang diduduki dan berapa yang terbiar dan tidak diduduki; dan
- (b) nyatakan jumlah tersebut mengikut negeri dan apakah perancangan Kementerian Pendidikan untuk kuarters-kuarters ini.

JAWAPAN

Tuan Yang di-Pertua,

Untuk makluman Ahli Yang Berhormat, secara keseluruhan, jumlah kuarters guru KPM adalah sebanyak 47,947 unit, di mana sebanyak 29,207 unit kuarters sedang diduduki dan 18,740 unit kuarters tidak diduduki.

Perincian jumlah kuarters guru mengikut negeri dan bahagian adalah sebanyak 47,947 berdasarkan seliaan jabatan pendidikan negeri serta bahagian di KPM seperti berikut:

Bil	Jabatan atau Bahagian yang menyelia kuarters	Jumlah kuarters	Jumlah kuarters diduduki	Jumlah kuarters tidak diduduki
1	JPN Perlis	382	178	204
2	JPN Kedah	2,615	670	1,945
3	JPN P. Pinang	1,041	486	555
4	JPN Perak	3,842	1,176	2,666
5	JPN Selangor	3,154	2,448	706
6	JPWP Kuala Lumpur	1,076	1,000	76
7	JPN N. Sembilan	1,476	974	502
8	JPN Melaka	469	232	237
9	JPN Johor	3,534	2,205	1,329
10	JPN Pahang	5,992	2,660	3,332
11	JPN Terengganu	1,857	945	912
12	JPN Kelantan	1,006	504	502
13	JPN Sabah	5,486	3,355	2,131
14	JPWP Labuan	54	51	3
15	JPN Sarawak	10,390	8,839	1,551
16	Bahagian Pengurusan Sekolah Berasrama Penuh (BPSBP)	1,450	841	609
17	Bahagian Matrikulasi (BM)	952	572	380
18	Bahagian Sukan Kesenian dan Kurikulum (BSKK)	96	81	15
19	Institut Pendidikan Guru Malaysia (IPGM)	958	528	430

Bil	Jabatan atau Bahagian yang menvelia kuarters	Jumlah kuarters	Jumlah kuarters diduduki	Jumlah kuarters
20	Bahagian Pendidikan Latihan Teknik Dan Vokasional (BPLTV)	1,714	1,173	541
21	Bahagian Pendidikan Khas (BPKhas)	213	159	54
22	Institut Aminuddin Baki (IAB)	190	130	60
Jumlah Keseluruhan		47,947	29,207	18,740

KPM membuat perancangan dengan memberi tumpuan kepada kerja-kerja membaik pulih dan penyelenggaraan kuarters guru yang didiami berdasarkan tahap kerosakan yang kritikal seperti kerosakan bumbung, pendawaian elektrik, perpaipan, kerosakan tandas, kumbahan dan kerosakan struktur bangunan.

Untuk makluman Ahli Yang Berhormat, kerosakan kuarters yang melibatkan struktur akan dilaksanakan oleh Jabatan Kerja Raya (JKR). Manakala, kerosakan kuarters yang tidak melibatkan struktur akan dilaksanakan oleh KPM melalui Jabatan Pendidikan Negeri (JPN). Pemantauan akan dibuat dari semasa ke semasa oleh JKR dan KPM bagi memastikan skop kerja dipatuhi mengikut spesifikasi yang ditetapkan.

Bagi kuarters guru yang tidak diduduki, KPM telah melantik perunding hartanah bagi menjalankan kajian mengoptimumkan penggunaan kuarters guru tidak berpenghuni milik KPM di seluruh negara. Skop kajian adalah merangkumi cadangan penyelesaian bagi mengoptimumkan kuarters kosong di seluruh negara. Kajian ini dijangka selesai pada akhir April 2023.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI BAKRI BIN JAMALUDDIN
(TANGGA BATU)**

SOALAN

TUAN HAJI BAKRI BIN JAMALUDDIN [TANGGA BATU] minta **MENTERI PERTAHANAN** menyatakan apakah tindakan yang telah dibuat bagi mengatasi masalah gangguan bekalan air di Kem Terendak, Melaka yang semakin meruncing.

JAWAPAN

1. Masalah gangguan bekalan air di Kem Terendak, Melaka merupakan antara fokus utama pihak Kementerian dalam menjaga kebajikan warga tentera yang bertugas serta ahli keluarga mereka yang menduduki Rumah Keluarga Angkatan Tentera (RKAT) di kem berkenaan. Sepanjang tahun 2022, 31 skop kerja pembaikan tangki air yang rosak, sistem perpaipan yang bocor dan sistem pam air yang tidak berfungsi telah siap dilaksanakan dengan kos sebanyak RM412,800.
2. Kementerian Pertahanan menjangkakan keperluan peruntukan sebanyak RM33 juta bagi melaksanakan keseluruhan pelan tindakan peningkatan sistem bekalan air di Kem Terendak yang melibatkan skop kerja pembinaan tangki sedutan baru, pembinaan tangki menara air dan penggantian sistem retikulasi paip air yang telah usang melebihi usia 20 tahun.
3. Perkara ini masih belum dapat direalisasikan sepenuhnya disebabkan kekangan peruntukan kewangan yang diterima. Namun begitu, Kementerian Pertahanan akan terus berusaha bagi mengatasi masalah gangguan bekalan air di Kem Terendak, Melaka.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI BAKRI BIN JAMALUDDIN
(TANGGA BATU)**

SOALAN

TUAN HAJI BAKRI BIN JAMALUDDIN [TANGGA BATU] minta **MENTERI PERTAHANAN** menyatakan tentang tindakan yang telah diambil bagi mengurangkan berlakunya hakisan pantai yang teruk di Kem Terendak yang juga memberi kesan ancaman kepada pembangunan Hospital Angkatan Tentera, Kem Terendak.

JAWAPAN

1. Kementerian Pertahanan memandang serius isu hakisan pantai dan cerun runtuh yang berlaku di kawasan pesisiran pantai Kem Terendak, Melaka. Pada masa ini, sebanyak 7 lokasi hakisan pantai dan cerun runtuh telah dikenal pasti termasuk 1 lokasi berhampiran 94 Hospital Angkatan Tentera (94 HAT). Pihak Jabatan Kerja Raya (JKR) telah menjalankan kajian dan menjangkakan anggaran kos pembaikan bagi kesemua 7 lokasi berkenaan adalah sebanyak RM12.2 juta.
2. Walau bagaimanapun, hanya kerja-kerja awalan dan pencegahan sahaja dapat dilaksanakan pada masa ini disebabkan kekangan peruntukan kewangan. Pihak Kementerian sedang berusaha mendapatkan peruntukan tambahan yang diperlukan bagi mengatasi masalah hakisan pantai dan cerun runtuh yang berlaku di Kem berkenaan.
3. Inisiatif telah dilaksanakan dengan menutup sementara tebing-tebing yang terdedah kepada runtuh dengan menggunakan kanvas serta mengosongkan bangunan-bangunan yang berdekatan dengan tebing yang berisiko mengalami runtuh sehingga kerja-kerja pembaikan cerun runtuh dapat dilaksanakan.

Sekian, terima kasih.

PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023

PERTANYAAN : BUKAN LISAN

**DARIPADA : TUAN HAJI BAKRI BIN JAMALUDDIN
(TANGGA BATU)**

SOALAN

TUAN HAJI BAKRI BIN JAMALUDDIN [TANGGA BATU] minta **MENTERI PERTAHANAN** menyatakan apakah ada usaha dan perancangan untuk mempertingkatkan atau menyelenggarakan dengan baik pusat-pusat rekreasi anggota berpangkat rendah yang sedia ada di dalam kem-kem tentera seperti *Beach Club* di Kem Terendak.

JAWAPAN

1. Peruntukan senggaraan yang diterima secara amnya memberi keutamaan kepada kebajikan anggota dan keluarga dengan fokus terhadap senggaraan Rumah Keluarga Angkatan Tentera (RKAT) dan bangunan-bangunan teknikal yang terdapat di dalam kem-kem bagi memastikan pengoperasian Angkatan Tentera pada tahap yang optimum. Peruntukan untuk senggaraan kemudahan pusat rekreasi dan sukan juga turut disalurkan pada setiap tahun bergantung kepada keutamaan.
2. Secara kesimpulannya, pihak Kementerian Pertahanan sentiasa berusaha bagi menyediakan peruntukan yang mencukupi untuk mempertingkatkan dan menyelenggara pusat-pusat rekreasi anggota ATM di seluruh negara tertakluk kepada kemampuan kewangan dan keutamaan perbelanjaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI BAKRI BIN JAMALUDDIN
[TANGGA BATU]**

SOALAN

TUAN HAJI BAKRI BIN JAMALUDDIN [TANGGA BATU] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah ada usaha untuk mengkaji semula dan melaksanakan kembali projek Rancangan Tebatan Banjir (RTB) bernilai RM932 juta yang dirancang di Krubong, Sungai Duyong, Jasin, Alor Gajah dan Merlimau yang telah pun dibatalkan oleh Perdana Menteri sedangkan projek ini telah mula berjalan.

JAWAPAN

Tuan Yang di-Pertua,

1. Kementerian Sumber Asli, Alam Sekitar dan Perubahan Iklim (NRECC) komited dalam meneruskan projek yang sedang dibangunkan untuk kesejahteraan penduduk sekitar. Projek Rancangan Tebatan Banjir (RTB) bernilai RM 933.4 juta yang telah dirancang di Krubong, Sungai Duyong, Jasin, Alor Gajah dan Merlimau sedang dilaksanakan.
2. Maklumat projek yang sedang dilaksanakan adalah seperti berikut:
 - a. RTB Alor Gajah Fasa 1 berjumlah RM30 juta dan dijangka siap pada tahun 2025;
 - b. RTB Sungai Duyong berjumlah RM163.8 juta dan dijangka siap pada tahun 2025;
 - c. RTB Bandar Jasin berjumlah RM60 juta dan dijangka siap pada tahun 2025;
 - d. RTB Bandar Merlimau berjumlah RM36 juta dan dijangka siap pada tahun 2025;
 - e. Projek Menaiktaraf Kolam Tebatan Banjir Krubong-Durian Tunggal Sebagai Kolam Dwi-Fungsi Untuk Tebatan Banjir Dan Sumber Air Negeri Melaka berjumlah RM603.6 juta dan dijangka siap pada tahun 2026; dan
 - f. Projek Rancangan Tebatan Banjir Sungai Melaka Fasa 1 dengan kos berjumlah RM40 juta. Projek ini masih dalam peringkat reka bentuk terperinci dan jangka akan ditender pada Ogos 2024.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : TUAN HAJI BAKRI BIN JAMALUDDIN
[TANGGA BATU]**

SOALAN

YB TUAN HAJI BAKRI BIN JAMALUDDIN [TANGGA BATU] minta **MENTERI PEMBANGUNAN KERAJAAN TEMPATAN** menyatakan apakah ada usaha untuk menyusun dan membangunkan kompleks perniagaan kekal untuk peniaga-peniaga kecil di sekitar pantai Kelebang dan Pantai Puteri, Melaka.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) melalui Jabatan Perancangan Bandar dan Desa (PLANMalaysia) telah menyediakan Rancangan Tempatan Majlis Bandaraya Melaka Bersejarah 2035 (Penggantian) bagi memandu arah perancangan dan pembangunan dalam kawasan pentadbiran pihak Majlis Bandaraya Melaka Bersejarah. Dokumen ini telah disediakan pada tahun 2020 dan telah diwartakan pada 16 September 2021.

Di dalam Rancangan Tempatan Majlis Bandaraya Melaka Bersejarah 2035 (Penggantian), Pantai Kelebang dan Pantai Puteri terletak di dalam Zon Perancangan 4 dan Zon Perancangan 5 (ZP 4 dan ZP5). Cadangan yang melibatkan peniaga-peniaga kecil di dalam Rancangan Tempatan Majlis Bandaraya Melaka Bersejarah 2035 (Penggantian) yang melibatkan kedua-dua kawasan ini adalah:

SOALAN NO : 90

- i. Cadangan Pusat Penjaja Terancang Kelebang seluas 0.76 hektar;
- ii. Cadangan Pusat Penjaja Terancang Tanjung Keling seluas 3.42 hektar; dan
- iii. Cadangan Pusat Penjaja Terancang Tangga Batu seluas 3.12 hektar.

Keperluan penyediaan cadangan pusat-pusat penjaja ini bertujuan untuk menempatkan semula peniaga-peniaga kecil di sekitar pantai Kelebang dan Pantai Puteri serta mewujudkan kompleks perniagaan kekal yang terancang dan kondusif. Antara komponen yang dicadangkan diwujudkan di Pusat Penjaja Terancang ini ialah:

- i. arked / bazar peniaga kecil;
- ii. medan selera;
- iii. kemudahan sokongan (tempat letak kenderaan, tandas awam, surau dan sebagainya); dan
- iv. kawasan landskap.

Di dalam Rancangan Tempatan Majlis Bandaraya Melaka Bersejarah 2035 (Penggantian), pelaksanaan untuk ketiga-tiga pusat penjaja ini telah dicadangkan untuk dilaksanakan dalam fasa ke dua pelaksanaan, iaitu antara tahun 2026-2030.

Untuk makluman Ahli Yang Berhormat selanjutnya, KPKT sedia mempertimbangkan permohonan Pihak Berkuasa Tempatan (PBT) dan cadangan untuk menyusun dan membangunkan kompleks perniagaan kekal untuk peniaga-peniaga kecil di kawasan-kawasan berkenaan. Bagi tahun 2023, KPKT akan melaksanakan 3,000 projek kiosk perniagaan peniaga kecil yang akan disediakan di kawasan tumpuan awam dan pelancongan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN CHA KEE CHIN [RASAH]

SOALAN

YB TUAN CHA KEE CHIN [RASAH] minta **MENTERI PEMBANGUNAN KERAJAAN TEMPATAN** menyatakan bilangan unit hartanah dan nilai hartanah yang telah siap dibina tetapi gagal dijual, mengikut setiap negeri bagi tahun 2019, 2020, 2021 dan 2022. Sila nyatakan apakah langkah Kerajaan untuk mengatasi masalah ini.

JAWAPAN

Tuan Yang di-Pertua,

Untuk makluman Ahli Yang Berhormat, bilangan unit dan nilai harta tanah siap dibina tidak terjual, mengikut negeri bagi tahun 2019, 2020, 2021 dan suku ketiga 2022 (Q3, 2022) adalah seperti berikut:

JADUAL 1 : HARTA TANAH SIAP DIBINA TIDAK TERJUAL MENGIKUT NEGERI

NEGERI	Bil. Unit (2019)	Nilai (Juta)	Bil. Unit (2020)	Nilai (Juta)	Bil. Unit (2021)	Nilai (Juta)	Bil. Unit (Q3, 2022)	Nilai (Juta)
JOHOR	5,627	4,703.22	7,030	5,480.93	6,089	4,715.35	5,348	4,482.59
KEDAH	1,974	560.73	877	290.57	2,569	732.72	1,133	402.35
KELANTAN	210	85.39	118	73.96	613	223.55	442	181.38
MELAKA	678	266.88	636	267.1	607	233.65	597	226.02
NEGERI SEMBILAN	1,048	581.09	1,008	594.94	1,401	697.59	945	506.75
PAHANG	1,466	570.59	1,727	655.9	1,286	558.17	1,197	480.32
PERAK	5,024	1516.86	3,637	1,159.68	2,748	920.29	2,400	799.5
PERLIS	33	10.27	18	5.31	67	13.3	35	4.79
PULAU PINANG	3,353	2,593.39	2,069	1,072.18	5,493	3,555.04	5,222	3,483.98
SABAH	1,544	624.48	1,437	601.23	2,933	1121.23	2,645	1093.72
SARAWAK	1,847	747.87	2,458	940.97	2,172	881.36	1,176	546.79
SELANGOR	4,687	3,750.71	4,889	4,287.94	6,095	5,281.23	4,386	4,334.25
TERENGGANU	498	184.82	455	168.18	587	229.94	527	183.44
WP LABUAN	70	22.89	69	22.56	65	21.25	48	15.7
WP PUTRAJAYA	-	0	114	382.1	230	439.03	71	78.96
WP KUALA LUMPUR	2,605	2,600.25	3,023	2,915.02	3,908	3,166.05	3,362	3,129.06
JUMLAH	30,664	18,819.44	29,565	18,918.57	36,863	22,789.75	29,534	19,949.60

Sumber: Pusat Maklumat Harta Tanah Negara (NAPIC)

Untuk makluman Ahli Yang Berhormat, KPKT sedang melaksanakan beberapa tindakan untuk menangani isu rumah tidak terjual dan antara tindakan yang sedang diambil adalah:

- i. **mengkaji dan melaksanakan analisis data lambakan rumah tidak terjual** bagi mengenal pasti penyelesaian yang bersesuaian;
- ii. sedang melaksanakan **pemetaan Indeks Rumah Mampu Milik** berdasarkan pendapatan median mengikut negeri dan daerah yang diperolehi daripada tinjauan Laporan Survei Pendapatan Isi Rumah dan Kemudahan Asas 2019;
- iii. Kerajaan juga menggalakkan pemaju untuk melaksanakan **Kajian Kebolehlaksanaan (*Feasibility Study*)** sebelum sesuatu pemajuan dilaksanakan bagi memastikan rumah yang dibina adalah berdasarkan kemampuan rakyat seterusnya mengelakkan rumah tersebut tidak terjual; dan
- iv. akan membangunkan **Pusat Data Perumahan (BDA)** sebagai sumber rujukan berpusat bagi data perumahan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN CHA KEE CHIN [RASAH]

SOALAN

TUAN CHA KEE CHIN [RASAH] minta **PERDANA MENTERI** menyatakan bilangan kes penipuan dan nilai penipuan melalui talian, maya dan '*online*' yang direkodkan pada tahun 2020, 2021 dan 2022. Apakah langkah atau pendekatan yang telah dan bakal diambil oleh Kerajaan untuk membanteras sindiket penipuan ini.

JAWAPAN**YB DATUK SERI AZALINA OTHMAN SAID,
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Berdasarkan statistik yang dikemukakan oleh Jabatan Siasatan Jenayah Komersial (JSJK), Polis Diraja Malaysia, jumlah bilangan kes penipuan dalam talian dan nilai kerugian yang dilaporkan adalah seperti berikut:

Tahun	Kes Dilaporkan	Nilai Kerugian
2020	21,497	RM658,657,580.59
2021	26,297	RM700,015,419.49
2022	25,480	RM850,846,659.24.

2. Kes-kes penipuan atas talian yang berlaku ini melibatkan pelbagai jenis modus operandi seperti penipuan telekomunikasi (*telecommunication fraud*), penipuan perdagangan elektronik atau *e-Commerce fraud*, pinjaman tidak wujud, tipu pelaburan tidak wujud, *love scam* dan *e-financial fraud* terutamanya melalui teknik *phishing*.

3. Bagi membanteras sindiket penipuan ini pihak Kerajaan telah dan akan mengambil beberapa langkah, antaranya, seperti berikut –

- a. Penaiktarafan Pusat Respon Scam (*Scam Response Centre*), JSJK, PDRM kepada Pusat Respon Scam Kebangsaan (*National Scam Response Centre – NSRC*) yang telah mula beroperasi pada 12 Oktober 2022 yang merupakan sebuah pusat tindakan respons setempat yang boleh dihubungi melalui panggilan pantas 997 yang menggabungkan sumber dan kepakaran pelbagai agensi kerajaan terdiri daripada Bank Negara Malaysia (BNM), PDRM, Suruhanjaya Komunikasi dan Multimedia (SKMM) dan Pusat Pencegahan Jenayah Kewangan Nasional (*National Anti-Financial Crime Centre* -

NFCC), serta disokong oleh institusi perbankan dan syarikat telekomunikasi bagi menerima pelaporan daripada mangsa-mangsa penipuan untuk membolehkan tindakan segera, termasuk menjejaki dan menyekat pengaliran transaksi kewangan yang disyaki bagi mengurangkan kerugian dan selanjutnya mengambil tindakan penguatkuasaan terhadap pelaku jenayah.

- b. Bekerjasama dengan pihak institusi kewangan dalam memperkenalkan kaedah-kaedah yang bersesuaian bagi membolehkan dan memudahkan mangsa scam mengambil tindakan awal bagi menyekat sebarang urusan perbankan yang melibatkan akaun-akaun bank mereka yang disyaki telah digodam oleh para penipu (*scammer*) antaranya memperkenalkan kaedah '*kill switch*'.
 - c. Melipat gandakan inisiatif kempen kesedaran orang awam mengenai scam secara berterusan dan bersama antara agensi kerajaan seperti PDRM, BNM, pihak institusi kewangan, Cyber Security Malaysia dan badan-badan bukan kerajaan (NGO) yang berkepentingan.
 - d. Dalam masa yang pihak Kerajaan sedang secara serius meneliti beberapa peruntukan undang-undang yang boleh digunakan atau yang boleh dipinda bagi tujuan untuk membentaras kesalahan scam ini secara lebih berkesan termasuk kaedah-kaedah yang membolehkan pengembalian wang penipuan kepada mangsa-mangsa. Antara peruntukan undang-undang yang sedang diteliti adalah Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 [*Akta 613*], Kanun Keseksaan dan Kanun Tatacara Jenayah.
4. Pihak Kerajaan menerusi agensi penguat kuasa amat komited dalam mengambil tindakan sewajarnya bagi memerangi kesalahan penipuan dalam talian ini termasuk usaha untuk mengesan dalang utama dan mereka yang terlibat secara langsung dan tidak langsung

NO. SOALAN: 92

dalam perlakuan kesalahan ini. Kerajaan amat berharap agar rakyat akan sentiasa peka dan berhati-hati sebelum mendedahkan maklumat perbankan mereka kepada pihak-pihak yang diragui identitinya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN CHA KEE CHIN [RASAH]

SOALAN

TUAN CHA KEE CHIN [RASAH] minta **MENTERI PENDIDIKAN** menyatakan secara terperinci, peruntukan tahunan yang telah diterima oleh setiap SJK(C) dan SJK(T) di Negeri Sembilan untuk tahun 2019, 2020, 2021 dan 2022. (Terdapat 82 buah SJK(C) dan 61 buah SJK(T) di Negeri Sembilan).

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha untuk menyediakan prasarana dan kemudahan infrastruktur pendidikan kepada semua sekolah termasuk di Negeri Sembilan.

Sepanjang tahun 2019 sehingga 2022, KPM telah menyalurkan peruntukan penyelenggaraan kepada Sekolah Jenis Kebangsaan (Cina) dan Sekolah Jenis Kebangsaan (Tamil) di Negeri Sembilan seperti berikut:

Jenis Sekolah		Tahun 2019 (RM)	Tahun 2020 (RM)	Tahun 2021 (RM)	Tahun 2022 (RM)
Sekolah Jenis Kebangsaan Cina (SJKC)	SK	-	1,339,781	3,787,820	1,706,831
	SBK	2,265,000	531,246	2,554,877	3,636,500
Sekolah Jenis Kebangsaan Tamil (SJKT)	SK	100,000	345,000	812,327	469,800
	SBK	3,070,000	4,387,720	2,555,100	2,818,000
Jumlah		5,435,000	6,603,747	9,710,124	8,631,131

*Nota: SK- Sekolah Kerajaan
SBK- Sekolah Bantuan Kerajaan

Sekian, terima kasih.

RT10

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN LISAN

DARIPADA : TUAN CHA KEE CHIN [RASAH]

SOALAN

TUAN CHA KEE CHIN [RASAH] minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah penerima bantuan bulanan Jabatan Kebajikan Masyarakat (JKM) di bawah Parlimen Rasah untuk semua kategori bagi tahun 2020, 2021 dan 2022 mengikut DUN (Labu, Bukit Kepayang, Rahang, Mambau dan Seremban Jaya) dan nilai bantuan yang diterima oleh setiap penerima.

JAWAPAN

Berdasarkan statistik Jabatan Kebajikan Masyarakat (JKM), jumlah penerima bantuan bulanan JKM di bawah Parlimen Rasah untuk semua kategori bagi tahun 2020, 2021 dan 2022 dan nilai bantuan yang diterima oleh setiap penerima adalah seperti berikut:

Tahun	Bil Penerima	Jumlah Peruntukan (RM)
2020	2,827	RM 10,010,620.00
2021	3,057	RM 14,663,290.00
2022	3,430	RM 16,491,450.00

Statistik penerima bantuan mengikut DUN di Parlimen Rasah adalah seperti di **LAMPIRAN 1**.

STATISTIK TAHUN 2020 HINGGA 2022 PARLIMEN RASAH MENGIKUT DUN

Bil	Jenis Bantuan	Tahun 2020									
		DUN BUKIT KEPAYANG		DUN LABU		DUN MAMBAU		DUN RAHANG		DUN SENAWANG	
		BIL KES	RM	BIL KES	RM	BIL KES	RM	BIL KES	RM	BIL KES	RM
1	Bantuan Kanak-Kanak (BKK)	74	216,000	60	217,100	72	211,400	20	52,200	76	219,750
2	Bantuan Warga Emas (BWE)	146	553,000	111	467,250	272	1,119,300	127	542,850	174	707,350
3	Elaun Pekerja Orang Kurang Upaya (EPOKU)	151	688,000	108	504,000	137	605,200	50	225,600	103	473,200
4	Bantuan OKU Tidak Berupaya Bekerja (BTB)	169	468,000	93	268,750	138	409,750	61	173,500	127	354,000
5	Bantuan Penjagaan OKU Terlantar/ Pesakit Kronik Terlantar (BPT)	23	100,800	24	101,150	21	93,800	5	22,400	19	81,550
6	Bantuan Am Negeri (BA)	101	245,160	61	156,560	142	343,630	62	160,070	91	217,350
7	Bantuan Latihan Perantis (BLP)	-	-	-	-	1	1,000	1	700	-	-
8	Bantuan Anak Pelihara (BAP)	3	4,750	-	-	1	2,750	1	1,250	2	1,500
JUMLAH KESELURUHAN		667	2,275,710	457	1,714,810	784	2,786,830	327	1,178,570	592	2,054,700

Bil	Jenis Bantuan	Tahun 2021									
		DUN BUKIT KEPAYANG		DUN LABU		DUN MAMBAU		DUN RAHANG		DUN SENAWANG	
		BIL KES	RM	BIL KES	RM	BIL KES	RM	BIL KES	RM	BIL KES	RM
1	Bantuan Kanak-Kanak (BKK)	78	424,100	66	346,700	81	413,450	21	104,350	81	401,200
2	Bantuan Warga Emas (BWE)	161	946,000	113	686,000	283	1,685,000	136	811,500	184	1,089,500
3	Elaun Pekerja Orang Kurang Upaya (EPOKU)	158	845,100	111	610,200	147	783,900	51	279,450	117	630,450
4	Bantuan OKU Tidak Berupaya Bekerja (BTB)	185	657,900	99	354,300	156	551,100	65	237,000	143	510,000
5	Bantuan Penjagaan OKU Terlantar/ Pesakit Kronik Terlantar (BPT)	23	147,500	24	149,500	21	129,000	6	39,500	18	109,500
6	Bantuan Am Negeri (BA)	120	388,920	74	243,920	164	519,370	57	192,690	105	348,690
7	Bantuan Latihan Perantis (BLP)	-	-	-	-	-	-	-	-	-	-
8	Bantuan Anak Pelihara (BAP)	3	9,250	-	-	2	5,500	2	5,500	2	7,250
JUMLAH KESELURUHAN		728	3,418,770	487	2,390,620	854	4,087,320	338	1,669,990	650	3,096,590

Bil	Jenis Bantuan	Tahun 2022									
		DUN BUKIT KEPAYANG		DUN LABU		DUN MAMBAU		DUN RAHANG		DUN SENAWANG	
		BIL KES	RM	BIL KES	RM	BIL KES	RM	BIL KES	RM	BIL KES	RM
1	Bantuan Kanak-Kanak (BKK)	97	497,400	78	418,200	80	369,600	35	171,600	87	420,000
2	Bantuan Warga Emas (BWE)	188	1,128,000	125	750,000	297	1,782,000	153	918,000	195	1,170,000
3	Elaun Pekerja Orang Kurang Upaya (EPOKU)	194	1,047,600	128	691,200	148	799,200	66	356,400	133	59,850
4	Bantuan OKU Tidak Berupaya Bekerja (BTB)	209	752,400	118	424,800	169	608,400	71	255,600	165	594,000
5	Bantuan Penjagaan OKU Terlantar/ Pesakit Kronik Terlantar (BPT)	30	180,000	34	204,000	25	150,000	8	48,000	22	718,200
6	Bantuan Am Negeri (BA)	120	412,080	83	296,880	166	558,480	64	227,280	130	446,280
7	Bantuan Latihan Perantis (BLP)	-	-	-	-	-	-	-	-	-	-
8	Bantuan Anak Pelihara (BAP)	6	18,000	-	-	2	6,000	1	3,000	3	9,000
JUMLAH KESELURUHAN		844	4,035,480	566	2,785,080	887	4,273,680	398	1,979,880	735	3,417,330

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN CHA KEE CHIN [RASAH]

SOALAN

Tuan Cha Kee Chin [Rasah] minta **MENTERI DALAM NEGERI** menyatakan jumlah permohonan kewarganegaraan yang telah diluluskan oleh Kerajaan untuk kategori berikut bagi tahun 2019, 2020, 2021 dan 2022 :

(a) anak yang dilahirkan oleh wanita warga asing di Malaysia, tetapi bapa anak adalah warga Malaysia. Kedua ibu bapa telah mendaftarkan perkahwinan selepas anak dilahirkan; dan

(b) anak angkat yang asalnya tanpa kewarganegaraan tetapi telah diangkat secara sah dan anak yang tidak diketahui ibu bapanya.

JAWAPAN

Tuan Yang Di Pertua,

Berdasarkan rekod Jabatan Pendaftaran Negara (JPN), sebanyak 5,094 permohonan kewarganegaraan di bawah Perkara 15A Perlembagaan Persekutuan bagi anak tidak sah taraf diterima dari tahun 2019 hingga 2022. Dari jumlah berkenaan, sebanyak 33 permohonan yang telah diluluskan mengikut pecahan seperti berikut:

Tahun	Jumlah
2019	22
2020	9
2021	2
2022	-
Jumlah	33

Manakala sebanyak 5,011 permohonan kewarganegaraan di bawah Perkara 15A Perlembagaan Persekutuan bagi anak angkat diterima dari tahun 2019 hingga 2022. Dari jumlah berkenaan, sebanyak 189 permohonan yang telah diluluskan mengikut pecahan seperti berikut:

Tahun	Jumlah
2019	94
2020	81
2021	12
2022	2
Jumlah	189

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN CHE ALIAS BIN HAMID [KEMAMAN]

SOALAN

- (a) jumlah kerugian golongan penternak, petani dan pesawah di seluruh negara yang terjejas berikutan banjir Monsun Timur Laut pada Disember tahun lalu; dan
- (b) bentuk-bentuk bantuan yang telah disalurkan oleh Kerajaan dalam memulihkan pendapatan mereka yang terjejas berikutan bencana banjir.

JAWAPAN

Tuan Yang di-Pertua,

- (a) KPKM sentiasa peka berkenaan kesan perubahan iklim yang akan menjejaskan sektor agromakanan Negara terutama persediaan dalam menghadapi Luruan Monsun Timur Laut. Peningkatan hujan yang mengakibatkan tanah runtuh dan banjir telah menjejaskan aktiviti-aktiviti berkaitan agromakanan sekaligus telah mengakibatkan kerugian kepada warga agromakanan seperti petani, pekebun dan penternak terutamanya yang berskala kecil.

Sebagai makluman, sebanyak 12,410 warga agromakanan yang telah terkesan akibat Monsun Timur Laut 2022/2023. Anggaran nilai kerosakan pula adalah sebanyak RM111,951,912.30 yang terdiri daripada sektor padi, tanaman, perikanan, ternakan, nelayan laut dan usahawan tani (Jadual Pecahan seperti di Lampiran 1)

- (b) Kerajaan sehingga kini telah menyalurkan peruntukan sebanyak RM62.77 juta iaitu RM40.54 juta melalui Program Pembangunan Semula Projek Agromakanan dan RM22.23 juta melalui Tabung Bencana Tanaman Padi bagi membantu petani, penternak dan nelayan yang telah terkesan akibat bencana banjir.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN CHE ALIAS BIN HAMID [KEMAMAN]

SOALAN

TUAN CHE ALIAS BIN HAMID [KEMAMAN] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status terkini rancangan tebatan banjir yang melibatkan pembangunan lembangan sungai bersepadu Sungai Kemaman bagi menyelesaikan isu berkaitan banjir yang kerap kali berlaku setiap tahun di kawasan tersebut.

JAWAPAN

Tuan Yang di-Pertua,

1. Bagi menangani isu banjir yang berlaku di Daerah Kemaman Terengganu, Kementerian sedang melaksana Projek Pembangunan Lembangan Sungai Bersepadu (PLSB) Sungai Kemaman, Terengganu. Projek ini sedang di peringkat penilaian tender.

2. Objektif projek ini adalah untuk mengurangkan berlakunya kejadian banjir dan kawasan ditenggelami air serta menyelamatkan nyawa dan harta benda pada tahap perlindungan *50 Years Average Recurrence Interval (ARI)* di kawasan Bandar Chukai, Lembangan Sungai Kemaman.

3. Skop utama projek adalah pembinaan lencongan banjir, pembinaan ban binjai dan kerja-kerja berkaitan. Projek ini dijangka dapat melindungi Bandar Chukai seluas 97.9 hektar dan di sekitar Bandar Kemaman. Projek ini juga mampu melindungi 200,000 penduduk di sekitar Kemaman.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGKAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : TUAN CHE ALIAS BIN HAMID
[KEMAMAN]**

SOALAN

TUAN CHE ALIAS BIN HAMID [KEMAMAN] minta **MENTERI KESIHATAN** menyatakan status terkini pembinaan Hospital Kemaman baharu di Kijal, apakah ianya mengikut jadual dan bila jangkaan siap.

JAWAPAN

Tuan Yang di-Pertua,

1. Untuk makluman Ahli Yang Berhormat, Projek Pembinaan Hospital Kemaman telah diluluskan di bawah *Rolling Plan* Pertama (RP1), Rancangan Malaysia Kesebelas (RMKe-11). Projek ini melibatkan pembinaan sebuah hospital baharu pakar major dengan kapasiti 300 katil dan lapan (8) buah dewan bedah.

2. Projek Pembinaan Hospital Kemaman kini berada dalam fasa pembinaan. Sehingga 28 Februari 2023, status kemajuan fizikal sebenar telah mencapai 67% iaitu lewat jadual sebanyak 12 hari. Projek ini dijadualkan siap pada 28 Februari 2024.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN CHE ALIAS BIN HAMID
(KEMAMAN)**

SOALAN

TUAN CHE ALIAS BIN HAMID [KEMAMAN] minta **MENTERI KERJA RAYA** menyatakan usaha pihak Kementerian untuk melebarkan jalan sehingga dua lorong dari Bukit Anak Dara, Kijal sehingga ke Bukit Kuang, Kijal bagi memastikan keselamatan pengguna jalan raya terjamin.

JAWAPAN

Tuan Yang Di-Pertua,

Untuk makluman Ahli Yang Berhormat, projek yang dimaksudkan adalah Menaik Taraf '*Missing Link*' Di Laluan FT145 : Dari Persimpangan Bukit Anak Dara Ke Bukit Kuang, Kemaman, Terengganu. Cadangan projek ini pernah dimohon ketika RP3, RMKe-12, namun tidak dapat dipertimbangkan berdasarkan kedudukan keutamaan projek dan agihan siling peruntukan pembangunan yang terhad untuk projek baharu.

Kementerian ini akan meneliti semula cadangan projek ini apabila dimohon dalam *Rolling Plan* RMKe-12 yang akan datang dan akan dipertimbangkan untuk diangkat kepada Agensi Pusat untuk kelulusan, tertakluk kepada kedudukan keutamaan projek dan ketersediaan agihan peruntukan pembangunan.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN CHE ALIAS BIN HAMID [KEMAMAN]

SOALAN

Tuan Che Alias bin Hamid [Kemaman] minta **MENTERI DALAM NEGERI** menyatakan status terkini cadangan pembinaan Ibu Pejabat Polis Daerah Kemaman baharu dan jangkaan akan dimulakan bagi memastikan keselesaan tadbir urus polis dan anggota yang terlibat berikutan kes-kes jenayah semakin meningkat dengan pertambahan penduduk setempat.

JAWAPAN

Tuan Yang Di Pertua,

Permohonan pembinaan baharu Ibu Pejabat Polis Daerah (IPD) Kemaman telah diangkat dalam *Rolling Plan 4* (RP4) Tahun 2024, Rancangan Malaysia Kedua Belas (RMK-12).

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATUK CHE MOHAMAD ZULKIFLY BIN
JUSOH [BESUT]**

SOALAN

YB DATUK CHE MOHAMAD ZULKIFLY BIN JUSOH [BESUT] mohon **MENTERI PEMBANGUNAN KERAJAAN TEMPATAN** menyatakan apakah Kerajaan bercadang menetapkan garis panduan kepada Kerajaan negeri untuk melantik ahli-ahli majlis daripada pelbagai kepakaran, pengalaman dan latar belakang memandangkan Kerajaan terkini dikatakan sebagai Kerajaan Perpaduan dan Madani.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) buat masa ini tidak bercadang menetapkan garis panduan kepada kerajaan negeri untuk melantik Ahli Majlis Pihak Berkuasa Tempatan (PBT) kerana berdasarkan Akta Kerajaan Tempatan 1976 [Akta 171], perkara berkaitan urusan pelantikan dan pengurusan Ahli Majlis PBT adalah di bawah bidang kuasa Pihak Berkuasa Negeri (PBN) masing-masing.

Untuk makluman Ahli Yang Berhormat juga, berdasarkan semakan KPKT, didapati bahawa semua negeri telahpun mempunyai ketetapan atau telah membangunkan panduan berhubung urusan pelantikan dan pengurusan Ahli Majlis PBT mengikut kesesuaian negeri masing-masing. Ketetapan atau panduan di peringkat negeri tersebut adalah selaras dengan kriteria umum yang telah dijelaskan di dalam Akta 171.

Kriteria umum yang dijelaskan di dalam Seksyen 10(2), Akta 171 adalah Ahli Majlis yang dilantik hendaklah:

- i. sebilangan besar mereka terdiri daripada pemastautin dalam kawasan PBT tersebut;
- ii. mempunyai pengalaman luas dalam hal ehwal kerajaan tempatan atau telah memperoleh kejayaan dalam sesuatu profesion, perdagangan atau perindustrian; atau
- iii. mempunyai kebolehan untuk mewakili kepentingan komuniti mereka dalam kawasan PBT tersebut.

Sebagai contoh amalan terbaik, pihak Kerajaan Negeri Selangor melalui Majlis Mesyuarat Kerajaan Negeri (MMKN) telah meluluskan Pekeliling Setiausaha Kerajaan Negeri Selangor Bilangan 1 Tahun 2021:

Garis Panduan Pengurusan Ahli Majlis Pihak Berkuasa Tempatan Negeri Selangor yang merangkumi semua aspek pengurusan Ahli Majlis seperti:

- i. Kriteria Pemilihan Ahli Majlis;
- ii. Urusan Pentadbiran Pencalonan Ahli Majlis;
- iii. Pelantikan Ahli Majlis;
- iv. Tarikh Kuat Kuasa Ahli Majlis;
- v. Penamatan Ahli Majlis;
- vi. Aduan Terhadap Ahli Majlis;
- vii. Penubuhan Jawatankuasa;
- viii. Penentuan Bidang Tugas dan Keanggotaan Ahli Majlis;
- ix. Tatacara Pengendalian Mesyuarat Majlis;
- x. Tatacara Pengendalian Peruntukan Elaun-elaun dan Kemudahan Ahli Majlis;
- xi. Penilaian Prestasi Ahli Majlis; dan
- xii. Larangan kepada Ahli Majlis.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATUK CHE MOHAMAD ZULKIFLY BIN
JUSOH [BESUT]**

SOALAN

YB DATUK CHE MOHAMAD ZULKIFLY BIN JUSOH [BESUT] minta **MENTERI PEMBANGUNAN KERAJAAN TEMPATAN** menyatakan perbezaan di antara syarikat kredit komuniti dan Ah Long di mana syarikat kredit ini dikawal selia oleh Kementerian telah dianggap sebagai Ah Long berlesen yang mengenakan pinjaman wang segera.

JAWAPAN

Tuan Yang di-Pertua

Untuk makluman Ahli Yang Berhormat, aktiviti pemberian pinjaman wang di bawah Subseksyen 17A (1), Akta Pemberi Pinjam Wang 1951 [Akta 400] menyatakan bahawa faedah bagi pinjaman dengan cagaran hendaklah tidak melebihi 12% setahun (1.0% sebulan) dan faedah bagi pinjaman tanpa cagaran hendaklah tidak melebihi 18% setahun (1.5% sebulan). Akta 400 melalui Subseksyen 17A (2) juga telah menerangkan bahawa faedah tidak boleh pada bila-bila masa dikutip oleh pemegang lesen akan suatu jumlah yang melebihi jumlah pokok yang kena dibayar. Oleh yang demikian, tempoh dan jumlah bayaran semula ansuran perlu mematuhi Akta 400 dan semua Peraturan-Peraturan Pemberi Pinjam Wang (Kawalan dan Pelesenan) 2003.

Kadar faedah nominal dan kadar faedah efektif di bawah Akta 400 ini adalah sama dan ianya tidak terkesan dengan Kadar Dasar Semalaman ataupun OPR yang ditetapkan oleh Bank Negara Malaysia (BNM). Pemberian pinjaman di bawah Akta 400 juga adalah untuk tempoh yang singkat dan caj faedah diambil berdasarkan tempoh pinjaman yang dibuat.

Selaras dengan prinsip pembiayaan bertanggungjawab (*responsible lending*), PPW akan melaksanakan penilaian risiko berdasarkan pelaporan kredit yang diperolehi daripada agensi pelaporan kredit yang berdaftar di bawah Kementerian Kewangan untuk menilai kemampuan peminjam sebelum memperolehi sesuatu fasiliti pinjaman sekali gus mengelakkan kes-kes pinjaman tidak berbayar. Berdasarkan penilaian tersebut, PPW boleh mengenakan kadar faedah yang bersesuaian asalkan ianya tidak melebihi kadar faedah maksimum yang ditetapkan dan tidak melanggar mana-mana peruntukan Akta 400 dan Peraturan-peraturan berkaitan. Kegiatan pemberian pinjam wang tanpa lesen pula merupakan satu jenayah komersial dan tindakan pemantauan serta siasatan lanjut dilaksanakan oleh pihak Jabatan Siasatan dan Jenayah Komersial (JSJK), Polis Diraja Malaysia (PDRM).

SOALAN NO: 102

Bagi memastikan perlindungan kepada pengguna, mana-mana PPW yang didapati melanggar kadar faedah yang ditetapkan boleh diambil tindakan oleh Kementerian melalui Subseksyen 17A (4) iaitu dikenakan denda tidak melebihi dua puluh ribu ringgit atau dipenjarah selama tempoh tidak melebihi lapan belas bulan atau kedua-duanya. Tambahan pula, Akta 400 telah menyatakan bahawa PPW adalah dilarang untuk mengenakan faedah kompaun ke atas peminjam atas mana-mana keingkaran pembayaran melalui Subseksyen 17 Akta 400.

Untuk makluman Ahli Yang Berhormat, perbezaan di antara syarikat kredit komuniti dan pemberi pinjam wang tidak berlesen adalah seperti di **Lampiran 1**. Bagi memastikan orang awam tidak terpengaruh untuk mendapatkan pinjaman daripada pemberi pinjam wang tidak berlesen, orang awam disarankan untuk berhubung dengan KPKT bagi memastikan mereka tidak terjerat dengan kegiatan pemberi pinjam wang tidak berlesen. Sebarang kemusykilan berkenaan aktiviti pemberian pinjam wang berlesen, boleh disalurkan terus kepada pihak Kementerian melalui Sistem Aduan Bersepadu KPKT iaitu di pautan aduan.kpkt.gov.my.

Sekian, terima kasih.

**RINGKASAN PERBEZAAN DI ANTARA SYARIKAT KREDIT KOMUNITI DAN
PEMBERI PINJAM WANG TIDAK BERLESEN**

BIL.	SYARIKAT KREDIT KOMUNITI	PEMBERI PINJAM WANG TIDAK BERLESEN
1	Perjanjian pinjaman wang mengikut borang yang ditetapkan dengan terma yang sah dari segi undang-undang.	Perjanjian dan terma-terma pinjaman mengikut selera pemberi pinjam wang tidak berlesen yang kebanyakannya dibuat secara lisan dan tiada perjanjian bertulis.
2	Kadar faedah ditetapkan tidak melebihi 12% setahun bagi pinjaman bercagar dan tidak melebihi 18% setahun bagi pinjaman tanpa cagaran.	Kadar faedah berubah mengikut kehendak pemberi pinjam wang tidak berlesen yang boleh mencecah sehingga 50% setahun mengikut keadaan permohonan pinjaman.
3	Kadar denda lewat bayar ansuran bulanan sangat minimum iaitu pada kadar 8% setahun dikira daripada hari ke hari tarikh keingkaran bayaran balik bagi amaun jumlah ansuran.	Mengenakan denda lewat bayar yang sangat tinggi serta menetapkan tempoh yang pendek untuk menyelesaikan bayaran ansuran tertunggak dan jika gagal dikenakan denda berlipat ganda.
4	Keingkaran peminjam untuk membayar balik hutang hanya boleh diperolehi melalui tuntutan sivil di mahkamah sahaja.	Pemberi pinjam wang tidak berlesen akan menggunakan kekerasan terhadap peminjam yang ingkar bagi mendapatkan balik pinjaman mereka kerana mereka tidak boleh buat tuntutan sivil.
5	Setiap transaksi pinjaman wang hanya boleh dilakukan di alamat premis yang diluluskan sahaja.	Tidak mempunyai alamat tetap dan transaksi pinjaman biasa dilakukan di alamat atau tempat-tempat yang tidak tetap.
6	Syarikat Kredit Komuniti perlu menghantar Rekod Transaksi Tahunan kepada KPKT.	Tiada apa-apa laporan pinjaman dikemukakan kepada KPKT.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATUK CHE MOHAMAD ZULKIFLY
BIN JUSOH (BESUT)**

SOALAN

YB DATUK CHE MOHAMAD ZULKIFLY BIN JUSOH (BESUT) minta **MENTERI PEMBANGUNAN KERAJAAN TEMPATAN** menyatakan langkah penyelarasan bagi projek pembangunan setempat yang semasa dan baru dilakukan dan sejauh mana keberkesanan Kementerian dan Pihak Berkuasa Tempatan (PBT) dalam menyelaraskan projek pembangunan ini.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) sentiasa mengadakan kerjasama strategik bersama Pihak Berkuasa Tempatan (PBT) dan Pejabat Setiausaha Kerajaan Negeri untuk penyelarasan permohonan, kelulusan, pelaksanaan dan pemantauan projek-projek kecil di bawah peruntukan BP.1 supaya pelaksanaan projek dapat disempurnakan mengikut perancangan. Perkara ini akan membantu negeri dalam merancang pembangunan setempat di negeri berkenaan. Melalui platform kerjasama strategik ini, tindakan penyelarasan ke atas projek-projek pembangunan dapat dibuat dengan lebih baik dan berkesan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : DATUK CHE MOHAMAD ZULKIFLY BIN
JUSOH [BESUT]

SOALAN

DATUK CHE MOHAMAD ZULKIFLY BIN JUSOH [BESUT] minta **MENTERI PENGANGKUTAN** menyatakan apakah faktor-faktor yang menyebabkan kemalangan jalan raya terutama melibatkan penunggang motosikal serta adakah disebabkan oleh faktor manusiawi atau faktor-faktor lain.

JAWAPAN

Tuan Yang Dipertua,

1. Untuk makluman Ahli Yang Berhormat, faktor utama yang menyebabkan pelanggaran di jalan raya terbahagi kepada tiga (3), iaitu manusia (80.6%), kenderaan (6.2%) dan jalan raya (13.2%), dan turut dikenali di peringkat global. Laporan MIROS pada tahun 2020 tentang penyiasatan pelanggaran yang melibatkan motosikal menunjukkan bahawa lebih 50% mereka yang terkorban adalah lelaki dan berumur kurang daripada 30 tahun.

2. Antara faktor-faktor lain yang menyebabkan kemalangan jalan raya terutama melibatkan penunggang motosikal adalah:

- i. Keadaan trafik di Malaysia yang bercampur (pelbagai saiz kenderaan atas jalan raya), autonomi motosikal dan kekangan bilangan lorong motosikal menyebabkan mod pengangkutan ini paling berisiko untuk terlibat dalam pelanggaran maut. Ekonomi gig yang juga dipacu oleh penggunaan motosikal menambah lagi pendedahan risiko kepada penunggang;
- ii. Tahap kemahiran untuk mengenali dan menjangka bahaya semasa memandu/menunggang;
- iii. Pemandu/penunggang tanpa lesen; dan
- iv. Tingkah laku penunggang motosikal yang berbahaya seperti melanggar lampu isyarat merah boleh meningkatkan risiko pelanggaran di jalan raya.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATUK CHE MOHAMAD ZULKIFLY BIN
JUSOH (BESUT)**

SOALAN

YB DATUK CHE MOHAMAD ZULKIFLY BIN JUSOH (BESUT) minta
MENTERI PEMBANGUNAN KERAJAAN TEMPATAN menyatakan:

- (a) berapa peruntukan yang telah diluluskan bagi tujuan pembangunan kepada setiap pihak berkuasa tempatan (PBT) di seluruh negara dalam tempoh lima tahun; dan
- (b) langkah terbaharu meningkatkan kerjasama di antara Kerajaan Negeri dan Persekutuan.

JAWAPAN

Tuan Yang di-Pertua,

(a) Untuk makluman Ahli Yang Berhormat, peruntukan BP.1 yang telah diluluskan oleh Kementerian Pembangunan Kerajaan Tempatan (KPKT) bagi tujuan pembangunan kepada setiap negeri melalui Pihak Berkuasa Tempatan (PBT) di seluruh negara dalam tempoh lima tahun adalah seperti di **Lampiran A**.

(b) Untuk makluman Ahli Yang Berhormat selanjutnya, Kementerian sentiasa melaksanakan kerjasama yang komprehensif dan strategik dengan PBT melalui kelulusan projek BP.1, bantuan Sumbangan Membantu Kadar (SMK), geran tahunan dan bil elektrik kepada PBT. Bagi tahun 2023, KPKT telah menambah baik prosedur bagi permohonan BP.1 iaitu perlu mengambil kira empat (4) aspek sebagaimana saranan

YB Menteri dalam memastikan projek-projek yang akan dilaksanakan memberi impak tinggi kepada orang awam. Empat (4) aspek tersebut adalah Return of Investment (ROI), Analisis Kos Faedah (Cost Benefit Analysis - CBA), Credibility Reliability Index dan Feasibility Study. Kaedah penilaian tersebut akan mula dilaksanakan dalam Mesyuarat Jawatankuasa Penilaian Projek BP.1 pada 31 Mac 2023.

Di samping itu, KPKT selaku peneraju kepada pembangunan bandar pintar telah mengambil langkah meningkatkan kerjasama di antara Kerajaan Negeri dan Persekutuan melalui pelaksanaan bandar pintar di bawah Rangka Kerja Bandar Pintar Malaysia (RKBPM). RKBPM telah disediakan di peringkat persekutuan dan diterjemahkan di peringkat negeri dan tempatan melalui penerapan dalam Rancangan Pemajuan (Rancangan Struktur Negeri dan Rancangan Tempatan), pelan strategik atau penyediaan *blueprint* dan Pelan Tindakan Bandar Pintar.

Usaha ini adalah penting bagi menyokong hala tuju Malaysia sebagai Negara Pintar (*Smart Nation*) dan merealisasikan aspirasi bandar Malaysia yang mampan dan pintar seperti yang dinyatakan dalam Rancangan Malaysia Kedua Belas (RMKe-12). Bagi menyokong pelaksanaan bandar pintar di peringkat negeri dan tempatan, KPKT memberikan kerjasama kepada semua negeri melalui pelaksanaan inisiatif pendigitalan perkhidmatan seperti sistem PBT*Pay*, OSC 3.0 *Plus* dan aplikasi i-Tegur yang dibangunkan oleh Jabatan Kerajaan Tempatan. Selain itu, KPKT juga meneruskan kerjasama dengan negeri-negeri dalam membangunkan fasiliti pengurusan sisa pepejal seperti tapak pelupusan, stesen pemindahan sisa pepejal dan loji rawatan air *leachate* untuk kegunaan PBT-PBT di seluruh Malaysia.

Sekian, terima kasih.

SOALAN NO : 105**LAMPIRAN A**

NEGERI	PERUNTUKAN BP1				
	TAHUN 2018	TAHUN 2019	TAHUN 2020	TAHUN 2021	TAHUN 2022
JOHOR	33,000,000.00	38,000,000.00	19,500,000.00	22,896,643.11	43,700,000.00
PERAK	22,500,000.00	31,727,319.65	18,000,000.00	20,250,000.00	37,242,384.00
KEDAH	16,700,000.00	40,683,442.00	15,605,000.00	21,870,000.00	30,964,485.00
PAHANG	20,963,474.00	30,605,001.00	9,723,200.00	18,170,000.00	31,200,000.00
TERENGGANU	15,200,000.00	24,600,000.00	9,073,445.00	13,440,000.00	27,098,146.00
SABAH	86,467,457.00	105,200,000.00	5,000,000.00	137,324,739.89	56,700,000.00
SARAWAK	13,895,000.00	27,033,642.00	4,301,151.13	12,093,752.00	18,624,304.00
KELANTAN	18,000,000.00	60,624,901.25	24,099,514.00	21,033,500.00	33,800,000.00
SELANGOR	26,281,000.00	27,850,508.37	12,600,000.00	14,040,000.00	22,418,165.00
NEGERI SEMBILAN	12,800,000.00	17,400,000.00	10,280,000.00	10,690,000.00	15,700,000.00
MELAKA	7,791,715.00	8,200,000.00	4,950,000.00	7,598,617.00	13,030,920.00
PERLIS	1,217,613.00	1,800,000.00	670,130.00	800,000.00	2,153,798.00
PULAU PINANG	640,207.00	1,566,869.00	2,503,557.00	7,285,301.00	3,018,928.00
JUMLAH	275,456,466.00	415,291,683.27	136,305,997.13	307,492,553.00	335,651,130.00

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : TUAN CHIEW CHOON MAN [MIRI]

SOALAN

TUAN CHIEW CHOON MAN [MIRI] minta **MENTERI KEWANGAN** menyatakan perancangan Kerajaan dalam melaksanakan program pemberian subsidi kepada rakyat dengan kaedah yang lebih cekap dan berkesan agar subsidi yang diberikan dapat dimanfaatkan sepenuhnya.

JAWAPAN

Tuan Yang di-Pertua,

Untuk makluman, Kerajaan telah membelanjakan sebanyak RM66.3 bilion merangkumi subsidi petrol, diesel dan gas cecair memasak, skim subsidi minyak masak, subsidi bil elektrik dan subsidi harga ayam dan telur yang merupakan antara subsidi dengan perbelanjaan terbesar pada tahun 2022.

Langkah meneruskan pemberian subsidi dan bantuan dilihat berjaya mengurangkan kesan kenaikan kos sara hidup rakyat. Walau bagaimanapun pelaksanaan yang tidak bersasar menyebabkan ketirisan berlaku. Justeru, Kerajaan komited dalam melaksanakan pemberian subsidi secara bersasar bagi mengurangkan ketirisan. Langkah pertama yang diambil adalah melalui pemberian subsidi bil elektrik secara bersasar pada separuh tahun 2023 apabila sebahagian kos dilepaskan kepada industri termasuk perbadanan multinasional. Melalui langkah ini, Kerajaan masih menanggung jumlah subsidi sebanyak 10.8 bilion ringgit berbanding jumlah asal sebanyak 14.9 bilion ringgit.

Bagi mengimbangi tanggungan subsidi dengan keperluan untuk terus memelihara kebajikan dan kesejahteraan rakyat, Kerajaan sedang meneroka langkah menambah baik pemberian subsidi secara lebih bersasar bagi mengurangkan ketirisan dalam masa yang sama supaya penjaminan subsidi dapat digunakan bagi mengoptimumkan perbelanjaan kepada program dan projek yang memberi nilai tambah kepada ekonomi negara.

Kerajaan juga sedang mengkaji pelaksanaan pemberian subsidi secara bersasar berasaskan kepada model yang bersesuaian dan kebolehlaksanaan. Pelaksanaan pemberian subsidi secara bersasar ini akan dibuat secara berperingkat tertakluk kepada ketersediaan serta mengekalkan fokus Kerajaan dalam memastikan kos sara hidup rakyat terutamanya golongan B40 tidak terjejas.

Untuk makluman, satu pasukan petugas khas telah diwujudkan di bawah Kementerian Kewangan untuk bekerjasama dengan kementerian/jabatan/agensi yang terlibat bagi meneliti keperluan dan kebolehlaksanaan pemberian subsidi secara bersasar dan mengenalpasti kaedah yang bukan sahaja berkesan malah menjimatkan masa serta memberi implikasi kewangan yang paling minimum kepada Kerajaan.

Ini termasuklah mengumpul data dari Jabatan Pengangkutan Jalan (JPJ), Jabatan Pendaftaran Negara (JPN) dan Lembaga Hasil Dalam Negeri (LHDN). Penetapan kriteria kelayakan masih belum diputuskan namun usaha membangunkan pusat data yang komprehensif sedang dibuat bagi membantu Kerajaan menetapkan kriteria yang bersesuaian berdasarkan data yang diperolehi.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN CHIEW CHOON MAN [MIRI]

SOALAN

TUAN CHIEW CHOON MAN [Miri] minta **MENTERI EKONOMI** menyatakan perancangan dan strategi Kerajaan untuk meningkatkan pendapatan rakyat Sarawak secara amnya dan secara khususnya bagi golongan anak muda yang baru sahaja memulakan alam pekerjaan mereka.

JAWAPAN

Tuan Yang di-Pertua,

Kerajaan akan meneruskan strategi dan inisiatif yang dilaksanakan bagi meningkatkan pendapatan rakyat terutamanya di Sarawak. Oleh itu, Kerajaan akan terus mengimbangi tumpuan untuk menstrukturkan ekonomi negara dengan keperluan ekonomi rakyat berhubung pendapatan yang lebih baik untuk kesejahteraan rakyat.

Rancangan Malaysia Kedua Belas, 2021-2025 (RMKe-12) menggariskan strategi meningkat dan mempelbagaikan sumber pendapatan bagi negeri Sarawak. Sumber pendapatan isi rumah miskin ditingkat dan dipelbagaikan melalui penglibatan dalam aktiviti ekonomi yang mempunyai nilai ditambah yang tinggi, pembangunan modal insan dan keusahawanan. Ekosistem keusahawanan seperti bantuan pembiayaan dan pemasaran melalui platform digital diperkukuh untuk memudah cara usahawan bagi mempercepat pembangunan sosioekonomi komuniti.

Pendidikan dan peningkatan kemahiran merupakan langkah utama untuk meningkatkan mobiliti sosial masyarakat. Kerajaan telah memberi tumpuan kepada Pendidikan TVET di Sarawak melalui 52 buah Institut Latihan Kemahiran Awam (ILKA) di Sarawak yang meliputi GIATMARA, Institut Kemahiran MARA (IKM), Institut Latihan Perindustrian (ILP), Institut Kemahiran Belia Negara, Politeknik dan Kolej Komuniti serta Institut Latihan di bawah Kementerian Pertanian dan Industri Makanan.

Di samping itu, status sosioekonomi Bumiputera Sarawak ditambah baik antaranya melalui Program Khas Bumiputera Sarawak dengan mewujudkan lebih banyak peluang latihan, pekerjaan, pemilikan tanah dan aktiviti ekonomi bernilai tinggi bagi meningkatkan taraf hidup rakyat serta mengurangkan kemiskinan dan ketidaksamarataan dalam kalangan rakyat.

Keusahawanan juga diberi perhatian khusus untuk meningkatkan dan mempelbagaikan pendapatan rakyat di Sarawak. Sumber semula jadi dan budaya tempatan akan dimanfaatkan dalam mengkomersialkan produk tempatan yang mempunyai nilai ditambah yang tinggi termasuk industri pertanian, akuakultur, ekopelancongan serta menceburi seni dan kraf. Melalui Belanjawan 2023, sebanyak RM40 bilion dana tersedia untuk perusahaan mikro, kecil dan sederhana (PMKS). Dana ini merangkumi pembiayaan secara pinjaman langsung, alternatif dan jaminan pembiayaan.

Di samping peningkatan pendapatan melalui pendidikan dan peningkatan kemahiran, penyediaan infrastruktur dan perkhidmatan asas seperti jalan, bekalan air terawat dan elektrik serta ketersambungan jalur lebar juga sedang ditingkatkan. Dalam tempoh RMKe-12, Sarawak menerima antara 15%-18% setahun daripada jumlah peruntukan perbelanjaan pembangunan (DE) asas. Melalui Belanjawan 2023, Sarawak meraih manfaat besar daripada peruntukan pembangunan sebanyak RM5.6 bilion.

Kerajaan melalui Kementerian Ekonomi dengan kerjasama merentas kementerian, agensi dan pihak berkepentingan sedang melaksanakan Inisiatif Pendapatan Rakyat (IPR) yang menumpukan kepada

pengupayaan golongan miskin tegar dan B40 di seluruh negara supaya meningkatkan potensi pendapatan secara mampan. Peruntukan sejumlah RM750 juta disediakan untuk tahun 2023 bagi menjayakan IPR.

Program IPR akan melibatkan tiga inisiatif permulaan iaitu Inisiatif Usahawan Tani (INTAN), Inisiatif Usahawan Makanan (INSAN) dan Inisiatif Operator Perkhidmatan (IKHSAN). Program ini menyasarkan untuk peserta meraih pendapatan antara RM2,000 hingga RM2,500 sebulan dalam tempoh pemantauan 24 bulan.

Tuan Yang di-Pertua,

Bagi membantu golongan anak muda yang baru sahaja memulakan pekerjaan, Kementerian Sumber Manusia melalui Pertubuhan Keselamatan Sosial (PERKESO) dengan kerjasama pelbagai agensi telah mewujudkan MyFutureJobs iaitu platform padanan pekerjaan atas talian. Selain itu, mereka juga boleh meningkatkan kemahiran melalui *Upskill Malaysia* di bawah Perbadanan Pembangunan Sumber Manusia iaitu satu *single window* mengenai program latihan dan pembangunan kemahiran yang ditawarkan oleh pelbagai kementerian dan agensi. Platform ini membolehkan anak muda di Sarawak untuk memohon program latihan dan pembangunan kemahiran bagi meningkatkan kebolehpasaran.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN LISAN

DARIPADA : YB TUAN CHIEW CHOON MAN [MIRI]

SOALAN

YB TUAN CHIEW CHOON MAN [MIRI] minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah golongan gelandangan terkini mengikut pecahan negeri dan perancangan Kementerian melalui usaha perundangan dan kerja sama dengan agensi Kerajaan dan bukan kerajaan yang terlibat dalam menyelesaikan masalah ini.

JAWAPAN

Golongan gelandangan merupakan satu kumpulan masyarakat yang mempunyai isu yang kompleks dan pelbagai. Justeru, intervensi dan pengendalian isu gelandangan ini memerlukan kerjasama daripada pelbagai kementerian dan agensi kerajaan. Buat masa kini ketetapan bagi agensi yang mengendalikan kumpulan sasaran yang melibatkan isu gelandangan masih belum mempunyai satu ketetapan khusus kerana tiada tafsiran serta perundangan tertentu yang menyatakan dengan jelas tentang kumpulan sasaran ini. Oleh itu jumlah gelandangan dan data berdasar lokaliti juga tidak dapat dipastikan dengan jelas. Namun, cakna terhadap isu ini, Kementerian Pembangunan Wanita, Keluarga dan Masyarakat (KPWKM) telah mengambil inisiatif dan merancang beberapa usaha berbentuk *quick-win* dan jangka panjang dalam membantu menangani isu gelandangan dengan usahasama Kementerian dan Agensi kerajaan yang lain.

Perancangan Kementerian Melalui Usaha Perundangan : Kajian Semakan Semula Akta Orang-Orang Papa 1977

KPWKM sedang menjalankan Kajian Semakan Semula Akta Orang-Orang Papa 1977 dan tempoh pelaksanaan kajian ini adalah selama 15 bulan (19 September 2022 – 18 Disember 2023). KPWKM mensasarkan dapatan kajian ini untuk digunakan sebagai asas kepada penstrukturan semula mekanisme pengendalian isu berkaitan orang papa, pengemisan dan gelandangan dan juga penggubalan rang undang-undang dan pelan tindakan ke arah inisiatif pengendalian isu gelandangan, pengemisan dan kemiskinan bandar meliputi peringkat Kerajaan Persekutuan, Kerajaan Negeri dan Pihak Berkuasa Tempatan.

Pengendalian isu gelandangan memerlukan pendekatan usahasama secara bersepadu dan holistik kerana isu gelandangan adalah rumit dan unik mengikut lokaliti dan melibatkan pelbagai sub kumpulan yang memerlukan perkhidmatan daripada pelbagai agensi kerajaan.

Kerjasama Dengan Agensi Kerajaan

i. ANJUNG SINGGAH

KPWKM melalui Yayasan Kebajikan Negara (YKN) memperkenalkan Anjung Singgah yang merupakan sebuah pusat khidmat bantuan sosial dan intervensi yang diwujudkan bertujuan membantu golongan gelandangan yang masih produktif dan secara sukarela ingin mengubah kehidupan mereka. Perkhidmatan yang disediakan adalah meliputi **tempat penginapan sementara, makan minum, saringan awal kesihatan, program intervensi kaunseling dan motivasi, pusat rujukan bantuan sosial serta bantuan mendapatkan pekerjaan** melalui kerjasama agensi-agensi kerajaan serta Pertubuhan Bukan Kerajaan (NGO) yang berkaitan. Berdasarkan rekod dari tahun 2011 sehingga Disember 2022, seramai **8,802 orang gelandangan** telah mendaftar masuk dan mendapatkan perkhidmatan di lima lokasi Anjung Singgah di Malaysia iaitu Kuala Lumpur (3,111 orang), Johor (3,039 orang), Pulau Pinang (1,078 orang), Sarawak (948 orang) dan Perak (626 orang).

Pelaksanaan di bawah Pihak Berkuasa Tempatan (PBT) dan Rakan Strategik

ii. PUSAT TRANSIT GELANDANGAN KUALA LUMPUR (PTGKL)

Jabatan Wilayah Persekutuan (JWP) dengan kerjasama strategik KPWKM, Dewan Bandaraya Kuala Lumpur, Malaysian Resources Corporation Berhad (MRCB) dan juga NGO menubuhkan Pusat Transit Gelandangan Kuala Lumpur (PTGKL) dan melantik Yayasan Kebajikan Negara (YKN) sebagai koordinator pusat. PTGKL berperanan sebagai pusat sehenti (*One Stop Centre*) yang menyediakan **penginapan sementara, program kemasyarakatan, kerohanian dan program kerjaya** kepada hampir semua kategori golongan gelandangan di bandaraya Kuala Lumpur. Sehingga 3 Februari 2023, seramai **80 orang gelandangan** sedang menginap di PTGKL .

iii. RUMAH BIMBINGAN GELANDANGAN

DBKL dan YKN menyediakan **20 unit rumah** Rumah Bimbingan Gelandangan dengan kadar sewa bagi seorang penghuni sebanyak **RM30 sebulan** kepada gelandangan yang telah selesai mengikuti program transit di PTGKL, program intervensi di Anjung Singgah dan telah mendapat pekerjaan. Sehingga Disember 2022 seramai **112 orang gelandangan** yang bekerja telah menyewa di perumahan awam tersebut.

Kerjasama Dengan Agensi Bukan Kerajaan

Selain dari agensi Kerajaan, KPWKM melalui YKN juga mempunyai beberapa rakan strategik yang sering membantu dan memberi sokongan dari segi sumbangan makanan, memberikan khidmat seperti perkhidmatan gunting rambut, pemeriksaan kesihatan, bimbingan kemahiran dan kerjaya serta perkhidmatan kaunseling dan pengisian kerohanian.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN CHIEW CHOON MAN [MIRI]

SOALAN

Tuan Chiew Choon Man [Miri] minta **MENTERI DALAM NEGERI** menyatakan jumlah lesen penjualan dan pembakaran bunga api dari tahun 2016 ke 2022, dan senarai syarikat yang mempunyai kelulusan permohonan lesen penjualan dan pembakaran bunga api.

JAWAPAN

Tuan Yang Di Pertua,

Sebanyak 27 syarikat telah dikeluarkan lesen mengimport, menyimpan dan berniaga bunga api jenis *happy boom* termasuk pop-pop oleh Kementerian Dalam Negeri sejak 2016 sehingga 2022. Setiap syarikat diwajibkan untuk memperbaharui lesen mengimport, menyimpan dan berniaga bunga api tersebut secara tahunan kepada pihak Kementerian.

Senarai nama 27 syarikat adalah seperti berikut.

Bil	Nama Syarikat	Negeri
1	Syarikat Adin Redcracker Sdn. Bhd	Selangor
2	Syarikat Amflex Sdn. Bhd	Kuala Lumpur
3	Syarikat Pakatan Majuniaga Sdn.Bhd	Kuala Lumpur
4	Syarikat L.C.M Maha Energy Sdn. Bhd	Selangor
5	Syarikat Well Century Sdn. Bhd	Johor
6	Syarikat Red Flame Special Effects	Kuala Lumpur
7	Syarikat VTEC Enterprise	Pulau Pinang
8	Syarikat Best Toy Enterprise	Pulau Pinang
9	Syarikat Cass Resources Sdn. Bhd.	Selangor
10	Syarikat Empayar Pasirmas (M) Sdn. Bhd.	Pulau Pinang
11	Syarikat Ming Sing Brother Enterprise	Perak
12	Syarikat JL Sparkle Sdn Bhd	Perak
13	Syarikat Kiong Tiong Sdn. Bhd.	Sarawak
14	Syarikat A & U Trading Sdn. Bhd.	Sarawak
15	Syarikat Villan Trading	Sarawak
16	Syarikat Fifa Enterprise Sdn. Bhd.	Sarawak
17	Syarikat T.S.H Enterprise	Sarawak
18	Syarikat Toh Huan Corporation	Sarawak
19	Syarikat Starry Nights Sdn. Bhd.	Sarawak
20	Syarikat Mutiara Binajaya	Sarawak
21	Syarikat Don Juara Industries Sdn. Bhd	Selangor
22	Syarikat Ace Speed Enterprise	Melaka

SOALAN NO: 109

Bil	Nama Syarikat	Negeri
23	Syarikat Pyrotechnics (M) Sdn. Bhd.	Selangor
24	Syarikat HD Home Theatre	Sarawak
25	Syarikat Pyroleader Company Sdn. Bhd.	Sarawak
26	Syarikat Toy World Sdn. Bhd.	Kuala Lumpur
27	Syarikat Steady Enterprise	Sarawak

Manakala bagi pembakaran bunga api, setakat 31 Disember 2022 terdapat 35 syarikat yang berdaftar dengan Kementerian dan mempunyai kelulusan sebagai syarikat pengendali pertunjukan bunga api piroteknik.

Bil	Nama Syarikat	Negeri
1	Syarikat Low Frequency Production Sdn Bhd	Kedah
2	Syarikat Red Flame Special Effects	Kuala Lumpur
3	Syarikat Safari Wonderland Sdn Bhd	Melaka
4	Syarikat Super Sparks Special Effects	Selangor
5	Syarikat Boom Boom Sky Sdn Bhd	Negeri Sembilan
6	Syarikat Blastmaster (M) Sdn Bhd	Selangor
7	Syarikat Prominent Fantasy	Perak
8	Syarikat Pyro Tact Services Sdn Bhd	Kuala Lumpur
9	Syarikat L.C.M Maha Energy Sdn Bhd	Selangor
10	Syarikat Adin Red Cracker Sdn Bhd	Selangor
11	Syarikat Pakatan Majuniaga Sdn Bhd	Kuala Lumpur
12	Syarikat A & U Trading	Sarawak
13	Syarikat Amflex Sdn Bhd	Kuala Lumpur
14	Syarikat Fifa Enterprise	Sarawak
15	Syarikat Kiong Tiong Sdn Bhd	Sarawak
16	Syarikat Villan Trading	Sarawak
17	Syarikat Toh Huan Corporation Sdn Bhd	Sarawak
18	Syarikat T.S.H Enterprise	Sarawak
19	Syarikat Pyroleader Co.	Sarawak
20	Syarikat HD Home Theatre	Sarawak
21	Syarikat Steady Enterprise	Sarawak
22	Syarikat Starry Nights Sdn. Bhd	Sarawak

SOALAN NO: 109

Bil	Nama Syarikat	Negeri
23	Syarikat JL Sparkle Sdn Bhd	Perak
24	Syarikat Eng Tech Explosive Sdn Bhd	Sarawak
25	Syarikat Zhongma Enterprise	Sabah
26	Syarikat Hua Leong Importers & Exporters Sdn. Bhd.	Sabah
27	Syarikat Lee Nam Hong Sdn. Bhd.	Sarawak
28	Syarikat Benefit Agency Sdn. Bhd.	Negeri Sembilan
29	Syarikat Pyro Splendour Services Sdn Bhd	Kuala Lumpur
30	Syarikat Bumikan Sdn. Bhd	Sabah
31	Syarikat Bernas Impresif Sdn. Bhd	Perak
32	Syarikat All Well Enterprise	Sarawak
33	Syarikat Naza Entertainment	Negeri Sembilan
34	Syarikat Jujuran Budi Enterprise	Selangor
35	Syarikat Bunga Api Bumi	Sabah

Bagi kelulusan pembakaran untuk pertunjukan bunga api piroteknik pula, KDN telah meluluskan sebanyak 2,502 permohonan bagi pertunjukan bunga api daripada syarikat-syarikat pengendali piroteknik yang berlesen tersebut sejak dari tahun 2016 sehingga 2022.

Statistik Kelulusan Pertunjukan Bunga Api Piroteknik Tahun 2016-2022

Bil	Tahun	Jumlah Kelulusan
1.	2016	541
2.	2017	564
3.	2018	482
4.	2019	450
5.	2020	155
6.	2021	49
7.	2022	261
JUMLAH		2502

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : TUAN CHIEW CHOON MAN [MIRI]

SOALAN

TUAN CHIEW CHOON MAN [MIRI] minta **MENTERI KESIHATAN** menyatakan jumlah Pakej Penjagaan COVID-19 (PPC) yang telah diedarkan kepada keluarga B40 dan nilai kos untuk setiap satu pakej tersebut.

JAWAPAN

Tuan Yang di-Pertua,

1. Sehingga 11 Ogos 2022 sebanyak Pakej Penjagaan COVID-19 (PPC) telah diedarkan kepada semua 3,532,662 orang penerima keluarga B40 sebagaimana data Bantuan Prihatin Rakyat (BPR) tahun 2021 kategori isi rumah.
2. Untuk makluman Ahli Yang Berhormat, nilai kos purata untuk setiap set PPC ini adalah sebanyak RM120.42.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN CHONG ZHEMIN [KAMPAR]

SOALAN

TUAN CHONG ZHEMIN [KAMPAR] minta **PERDANA MENTERI** menyatakan jumlah dana MITRA yang telah diberikan untuk tahun 2020, 2021 dan 2022, dan apakah sebab dana MITRA tidak habis diagihkan untuk tahun-tahun yang lepas.

JAWAPAN

Yang Di-Pertua,

1. Dari tahun 2020 hingga 2022, sebanyak **RM300 juta** yang telah diperuntukan untuk pembangunan sosioekonomi masyarakat India Malaysia.
2. Walau bagaimanapun MITRA **tidak dapat membelanjakan** sepenuhnya **atas faktor berikut** iaitu:
 - a. **Perintah Kawalan Pergerakan (PKP)** yang telah diisytiharkan oleh Kerajaan pada **tahun 2020** dengan **memberhentikan** segala operasi *Non Essential Service* bagi **mengekan** penyebaran wabak **COVID-19**.
 - b. Kebanyakan program yang diluluskan menggunakan **kaedah penyaluran 50%, 40% dan 10%** dan **disebabkan PKP**, maka program **tidak dapat** dijalankan mengikut **garis masa** yang ditetapkan sekaligus telah **menjejaskan jadual perbelanjaan** MITRA.
 - c. Tempoh PKP yang **berpanjangan sehingga tahun 2021** telah **mengekan** pelaksanaan lebih banyak program untuk masyarakat India. Program-program yang **dicadangkan** adalah berdasarkan **kaedah pelaksanaan secara fizikal**. Oleh yang demikian, kebanyakan program-program tersebut tidak dapat dipertimbangkan untuk dilaksanakan.
 - d. **Suruhanjaya Pencegahan Rasuah Malaysia (SPRM)** telah menjalankan **siasatan** terhadap program-program MITRA dari tahun 2019 hingga 2021 yang juga menyebabkan program tidak dapat dilaksanakan sementara siasatan sedang berjalan.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN CHONG ZHEMIN [KAMPAR]

SOALAN

Tuan Chong Zhemmin [Kampar] minta **MENTERI DALAM NEGERI** menyatakan senarai jumlah filem yang dilarang untuk ditayang dalam pawagam Malaysia sejak tahun 2020 dan apakah sebab filem-filem ini dilarang.

JAWAPAN

Tuan Yang Di Pertua,

Untuk makluman Yang Berhormat,

Lembaga Penapis Filem (LPF), Kementerian Dalam Negeri (KDN) bertanggungjawab melaksanakan penapisan filem yang disiarkan, dipamerkan, disebar, ditayangkan, diedarkan atau dipancarkan secara fizikal (konvensional) kepada masyarakat umum di Malaysia, kecuali melalui internet berdasarkan kepada Akta Penapisan Filem 2022 [Akta 620] dan Garis Panduan Penapisan Filem (GPPF), 2010.

Terdapat empat (4) aspek utama dalam garis panduan tersebut yang diteliti dan diberi perhatian khusus oleh Ahli-ahli Lembaga Penapis Filem (ALPF) semasa menonton tapis sesebuah filem, iaitu:

- i. Keselamatan dan Ketenteraman Awam;
- ii. Keagamaan;
- iii. Sosiobudaya; dan
- iv. Ketertiban dan Ketatasusilaan.

Secara asasnya, sesebuah filem adalah dibenarkan untuk tayangan kepada umum selagi ia tidak bertentangan garis panduan tersebut. Namun demikian, sekiranya sesuatu adegan atau dialog di dalam filem berkenaan didapati melanggar mana-mana peruntukan yang digariskan di dalam garis panduan ini, LPF boleh mengarahkan supaya kandungan filem tersebut dibuat pengubahan seperti berikut:

- i. memotong adegan;
- ii. mengaburkan paparan;
- iii. senyapkan (*mute*) dialog;
- iv. memadamkan sari kata; atau
- v. lain-lain bentuk pengubahan yang bersesuaian dan tidak menjejaskan jalan cerita sesebuah filem.

SOALAN NO: 112

Sebaliknya, jika tema, genre atau keseluruhan jalan cerita filem tersebut didapati amat keterlaluan dan tidak sesuai untuk tayangan umum, LPF akan memberi keputusan ‘Tidak Lulus Untuk Tayangan’ (TUT) kerana boleh menjejaskan dan menyebabkan isu-isu keselamatan, agama, sosio budaya dan tata susila rakyat secara amnya. Sejak tahun 2020 bilangan filem yang telah dikeluarkan keputusan TUT adalah seperti berikut:

Tahun	Bilangan Filem	Sebab Tidak Lulus Untuk Tayangan
2020	6	i. Politik ii. Unsur seksual / kebogelan iii. Dadah iv. Mempromosi gaya hidup LGBT v. Keagamaan vi. Filem keluaran Israel vii. Ideologi Komunisme dan perkauman
2021	5	i. Ideologi komunisme ii. Kekejaman iii. Politik iv. Keagamaan v. LGBT
2022	5	i. LGBT ii. Keagamaan iii. Islamophobia iv. Politik v. Anti-kerajaan vi. Kekejaman
2023	-	-

SOALAN NO: 112

LPF akan terus melaksanakan amanah dan tanggungjawab yang telah ditetapkan bagi tujuan untuk melindungi orang ramai agar tidak terpesong dengan nilai-nilai negatif yang diakibatkan daripada penontonan filem. Dalam masa yang sama ianya tidak menyekat kreativiti pembuat filem untuk menghasilkan filem yang dapat menghiburkan dan mendidik masyarakat, boleh menjana industri filem yang aktif serta mampu bersaing dengan filem-filem luar negara.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN CHONG ZHEMIN [KAMPAR]

SOALAN

TUAN CHONG ZHEMIN [KAMPAR] minta **MENTERI PENDIDIKAN** menyatakan senarai secara terperinci jumlah peruntukan yang diterima oleh SJKC, SJKT dan SMJK pada tahun 2020, 2021 dan 2022.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha untuk menyediakan prasarana dan kemudahan infrastruktur pendidikan kepada semua sekolah termasuk sekolah berstatus sekolah jenis kebangsaan Cina (SJKC), sekolah jenis kebangsaan Tamil (SJKT) dan sekolah menengah kebangsaan (merujuk kepada sekolah menengah jenis kebangsaan).

Sepanjang tahun 2020 sehingga 2022, KPM telah menyalurkan peruntukan bagi penyelenggaraan mengikut jenis sekolah seperti berikut:

Jenis Sekolah		Tahun 2020 (RM)	Tahun 2021 (RM)	Tahun 2022 (RM)
Sekolah Jenis Kebangsaan Cina (SJKC)	SK	26,908,000	11,560,190	15,777,446
	SBK	8,328,756	45,623,258	46,571,585
Sekolah Jenis Kebangsaan Tamil (SJKT)	SK	7,786,000	2,589,322	4,611,120
	SBK	32,232,977	18,136,379	16,349,131
Sekolah Menengah Kebangsaan (merujuk SMJK)	SK	122,114	350,000	-
	SBK	18,887,858	3,424,563	1,484,027
Jumlah		94,265,705	81,683,712	84,793,309

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

DARIPADA : TUAN CHONG ZHEMIN [KAMPAR]

SOALAN

Minta **MENTERI BELIA DAN SUKAN** menyatakan adakah Kerajaan berhasrat untuk menjadikan ping pong sebagai sukan wajib SUKMA kerana ping pong telah digugurkan dalam acara SUKMA sejak tahun 2013 walaupun Malaysia telah memenangi dua pingat perak dalam acara Ping Pong di Sukan Komanwel tahun lepas.

JAWAPAN

Tuan Yang di-Pertua,

Untuk makluman Ahli Yang Berhormat, Sukan Malaysia atau SUKMA merupakan satu pertandingan melibatkan pelbagai jenis sukan (*multi sports event*) di peringkat umur bawah 21 tahun yang dipertandingkan antara negeri-negeri dan wilayah di Malaysia. Tujuan penganjuran SUKMA sejak tahun 1986 ini adalah sebagai 'platform' kepada atlet-atlet remaja di negeri-negeri dan wilayah untuk bersaing serta mempamerkan prestasi masing-masing sebelum dipilih untuk mewakili negara ke kejohanan atau temasya sukan antarabangsa melalui program Pelapis Kebangsaan, Majlis Sukan Negara (MSN).

Dari segi sukan-sukan yang dipertandingkan di temasya SUKMA ini, sebanyak 19 jenis sukan wajib dipertandingkan di temasya SUKMA adalah merupakan sukan teras yang telah diluluskan oleh Jawatankuasa Kabinet Pembangunan Sukan (JKPS) pada tahun 2004. Sukan teras merupakan sukan-sukan yang perlu dibangunkan bermula di peringkat akar umbi yang berpotensi untuk memenangi pingat di temasya sukan

antarabangsa seperti Sukan SEA, Sukan Komanwel, Sukan Asia dan Sukan Olimpik. Bermula tahun 2018, sukan teras mempunyai 16 jenis sukan sahaja setelah tiga (3) jenis sukan iaitu Angkat Berat, Sepak Takraw dan Taekwondo digugurkan daripada senarai sukan teras.

Selain dari 16 Sukan Wajib, SUKMA turut mempertandingkan acara - acara sukan lain yang dikategorikan sebagai Sukan Pilihan. Pemilihan sukan ini adalah berdasarkan kepada persetujuan negeri tuan rumah SUKMA dan sokongan Majlis Sukan Negeri-Negeri/Wilayah serta mendapat penyertaan sekurang-kurangnya enam (6) buah kontinjen/negeri sepertimana yang termaktub dalam Peraturan Am SUKMA. Walau bagaimanapun, bilangan sukan pilihan yang akan dipertandingkan perlu mendapat kelulusan Jawatankuasa Tertinggi SUKMA.

Justeru itu, sukan ping pong masih mempunyai peluang untuk dipertandingkan di SUKMA yang akan datang namun perlu bersaing dengan 36 jenis sukan lain dalam mendapatkan sokongan negeri tuan rumah SUKMA dan penyertaan kontinjen negeri-negeri sebelum dibawa ke Mesyuarat Jawatankuasa Tertinggi SUKMA untuk keputusan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

DARIPADA : YB TUAN CHONG ZHEMIN (KAMPAR)

SOALAN

TUAN CHONG ZHEMIN [KAMPAR] minta **MENTERI KERJA RAYA** menyatakan adakah Kerajaan telah meluluskan projek West Ipoh Span Expressway (WISE) dan adakah Kerajaan berhasrat untuk memanjangkan lebuh raya WISE ke Kampar dan Tapah untuk mengelak kawasan kemalangan di Gua Tempurung.

JAWAPAN

Tuan Yang Di-Pertua,

Untuk makluman Ahli Yang Berhormat, pihak Kerajaan Persekutuan telah memberikan kelulusan prinsip kepada Syarikat Pencadang bagi Cadangan Projek *West Ipoh Span Expressway* (WISE) pada 9 Februari 2022 untuk tempoh 3 (tiga) tahun bertujuan membolehkan jabatan/agensi yang berkaitan melaksanakan penilaian aspek teknikal dan kewangan untuk menentukan kebolehlaksanaan dan daya maju (*viability*) cadangan.

Ketika ini, Cadangan Projek WISE telah melalui proses rundingan teknikal melalui Makmal Pengurusan Nilai (*Value Management* – VM) melibatkan agensi Kerajaan di peringkat Persekutuan, Negeri dan Pihak Berkuasa Tempatan (PBT). Manakala proses rundingan kewangan sedang giat dijalankan. Perancangan pelaksanaan cadangan projek akan diputuskan setelah rundingan teknikal dan kewangan dimuktamadkan.

Untuk makluman Ahli Yang Berhormat, buat masa ini pihak Kerajaan tidak berhasrat untuk memanjangkan Cadangan Projek WISE ke Kampar dan Tapah bagi mengelakkan sebarang implikasi kepada kebolehlaksanaan dan daya maju cadangan projek berdasarkan jajaran sedia ada. Tumpuan adalah diberikan untuk meningkatkan aspek keselamatan dan penyuraiaan trafik bagi laluan Gopeng ke Kuala Kangsar melalui Terowong Menora.

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BUKAN LISAN

**DARIPADA : TUAN CHOW KON YEOW
[BATU KAWAN]**

SOALAN

TUAN CHOW KON YEOW [BATU KAWAN] minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada terdapat perancangan untuk menyelaraskan pengoperasian taska, tadika, pusat jagaan kanak-kanak dan juga pusat penjagaan ibu bersalin (*confinement centre*) di bawah satu bumbung berbanding kini. Sekiranya tidak, apakah langkah yang bakal diambil Kementerian demi memastikan kebajikan golongan-golongan berkaitan terjaga.

JAWAPAN

Kementerian Pembangunan Wanita, Keluarga dan Masyarakat (KPWKM) amat komited dan sentiasa memberi perhatian kepada aspek kebajikan dan keperluan penghuni di semua pusat jagaan yang berdaftar di bawah Akta Pusat Jagaan 1993.

Kementerian tiada perancangan untuk menyelaraskan pengoperasian taska, tadika, pusat jagaan kanak-kanak dan juga pusat penjagaan ibu bersalin (*confinement centre*) di bawah satu bumbung kerana berdasarkan Seksyen 3, Akta Pusat Jagaan 1993 [Akta 506], Akta ini tidak terpakai bagi –

(b) mana-mana institusi atau premis yang tertakluk kepada kawalan di bawah, dan ditubuhkan, didaftarkan, dikendalikan, atau diuruskan dengan sahnya mengikut, Akta Pendidikan 1996 [Akta 550]

(c) mana-mana taman asuhan kanak-kanak yang didaftarkan di bawah Akta Taman Asuhan Kanak-Kanak 1984 [Akta 308]

Manakala pusat penjagaan ibu bersalin (*confinement centre*) tidak didaftarkan di bawah Akta Pusat Jagaan 1993.

Bagi memastikan pusat jagaan ini diuruskan dengan baik, Kementerian melalui Jabatan Kebajikan Masyarakat sentiasa melakukan pemeriksaan bagi memantau pengoperasian pusat jagaan daripada semasa ke semasa agar mematuhi standard minimum yang telah ditetapkan. **Sehingga Disember 2022, sebanyak 1,762 kali pemeriksaan telah dilakukan ke atas 1,933 pusat jagaan.**

Kementerian juga komited dalam memastikan tindakan penguatkuasaan diambil ke atas pusat jagaan yang berdaftar dan tidak berdaftar. Pada tahun 2022 sebanyak 70 tindakan penguatkuasaan telah diambil di bawah Akta Pusat Jagaan 1993 yang mana sebanyak dua (2) tindakan penguatkuasaan telah diambil ke atas pusat jagaan tidak berdaftar dan 68 tindakan penguatkuasaan diambil ke atas pusat jagaan berdaftar. **Secara keseluruhan bagi tahun 2020 sehingga tahun 2022 sebanyak 310 tindakan penguatkuasaan telah diambil di bawah Akta**

Pusat Jagaan 1993. Daripada jumlah tersebut 22 tindakan ke atas pusat jagaan tidak berdaftar.

Selain daripada itu, salah satu lagi usaha kerajaan dalam memastikan pusat jagaan berdaftar di bawah Akta Pusat Jagaan 1993 adalah dengan melaksanakan projek rintis Program My Community Enforcement Care (MyCCE) di Johor. Keahlian seramai 40 orang sukarelawan MyCCE Johor yang dilantik adalah berperanan untuk menjadi mata dan telinga jabatan bagi menyalurkan maklumat berkaitan dengan Pusat Jagaan tidak berdaftar serta melaksanakan advokasi perundangan berkaitan akta tersebut. Bagi tahun 2023 program ini telah diperluaskan ke seluruh negara untuk melantik sukarelawan MyCCE.

Program advokasi kepada masyarakat khususnya kepada pengendali pusat jagaan juga turut diadakan secara berterusan bagi memastikan masyarakat sedar tentang kepentingan untuk sesebuah pusat jagaan berdaftar dengan JKM.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : TUAN CHOW KON YEOW [BATU KAWAN]

SOALAN

TUAN CHOW KON YEOW [BATU KAWAN] minta **MENTERI KEWANGAN** menyatakan jumlah geran tahunan yang diberi kepada Prasarana Malaysia Berhad dan Rapid Penang Sdn. Bhd. dari tahun 2018 sehingga 2022. Perincikan juga perancangan untuk menyelaraskan kerja-kerja naik taraf pembekalan elektrik di Pulau Pinang supaya dapat menyediakan kemudahan mencaj bas elektrik di depoh Rapid Penang.

JAWAPAN

Tuan Yang di-Pertua,

Kerajaan melalui Syarikat Prasarana Malaysia Bhd yang dimiliki sepenuhnya oleh Menteri Kewangan DiPerbadankan sentiasa komited dalam memastikan rakyat menikmati kemudahan pengangkutan awam yang selamat, cekap serta pada kadar yang berpatutan. Dalam hal ini, jumlah keseluruhan peruntukan pembangunan dan operasi yang telah disalurkan kepada Prasarana Malaysia Berhad dari tahun 2018 hingga 2022 adalah sebanyak RM3.7 bilion dengan pecahan peruntukan tahunan seperti berikut:

- Tahun 2018 : RM39.2 juta
- Tahun 2019 : RM1 bilion
- Tahun 2021 : RM1.22 bilion; dan
- Tahun 2022 : RM1.45 bilion

Dalam menyokong aspirasi Malaysia sebagai sebuah negara neutral karbon pada 2050, Kerajaan amat prihatin dan mempunyai perancangan untuk beralih kepada inisiatif yang lebih mesra alam. Ini termasuk menyokong perancangan pihak Prasarana untuk beralih kepada penggunaan bas elektrik. Walau bagaimanapun, peralihan ini perlu dilaksanakan secara teratur dan berperingkat mengambil kira kos bas elektrik yang tinggi dan memastikan peralihan ini tidak menjejaskan perkhidmatan bas sedia ada kepada rakyat. Program peralihan ini juga mengambil kira semua aspek termasuk Jumlah Kos Pemilikan (*Total Cost Ownership*) dan ketersediaan infrastruktur seperti stesen pengecasan.

Bagi tujuan ini, Syarikat Prasarana pada masa ini sedang melaksanakan kajian untuk mengenal pasti kaedah terbaik bagi pelaksanaan program bas elektrik. Salah satu skop kajian ini adalah untuk meneliti infrastruktur Bekalan Kuasa Bukan Daya Tarikan (*Non-Traction Power Supply*) sedia ada di setiap depoh utama Rapid Bus termasuk di Pulau Pinang dan mengesyorkan kerja-kerja menaik taraf yang diperlukan bagi menyokong kemudahan pengecasan serta

pengoperasian bas elektrik. Kajian selama lima (5) bulan ini dijangka akan siap pada penghujung Oktober 2022.

Tuan Yang di-Pertua,

Berkenaan perancangan untuk menyelaraskan kerja-kerja naik taraf pembekalan elektrik di Pulau Pinang supaya dapat menyediakan kemudahan mencaj bas elektrik di sana, Kementerian Kewangan telah menerima maklum balas daripada Kementerian Tenaga dan Sumber Asli (KeTSA) seperti berikut:

- a. Projek PMU The Light merupakan projek pengukuhan bekalan elektrik Pulau Pinang melalui penyambungan terus bekalan daripada tanah besar Semenanjung menggunakan talian penghantaran atas monopole 275 kiloVatt (kV) sepanjang 8.5 kilometer yang bakal menghubungkan Pencawang Masuk Utama (PMU) Stesen Janakuasa Perai ke PMU The Light yang akan dibina selari dengan Jambatan Pulau Pinang.
- b. Projek pengukuhan bekalan elektrik ini dijangka menelan belanja lebih RM500 juta dan berdasarkan jadual, ia akan siap sepenuhnya pada tahun 2024.
- c. Pelaksanaan projek ini akan memberikan kestabilan bekalan elektrik di Pulau Pinang kerana ia mampu menghantar bekalan sehingga 2,000 Megawatt (MW) daripada Stesen Janakuasa Perai ke PMU The Light. Kapasiti ini akan dapat menampung permintaan bekalan elektrik di Pulau Pinang yang pernah merekodkan permintaan puncak sebanyak 777.85 MW pada bulan Januari 2020.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : TUAN CHOW KON YEOW [BATU KAWAN]

SOALAN

TUAN CHOW KON YEOW [BATU KAWAN] minta **MENTERI KEWANGAN** menyatakan bilakah Penang Hill Biosphere Reserve (menerusi Perbadanan Bukit Bendera) akan memperoleh peruntukan yang telah diumumkan pada pembentangan Bajet 2022. Perincikan punca kelewatan berkaitan.

JAWAPAN

Tuan Yang di-Pertua,

Sebagaimana diumumkan dalam Bajet 2022, peruntukan akan diberikan kepada kerajaan negeri bagi melaksanakan projek jaminan bekalan makanan, pelancongan serta pemeliharaan dan pemuliharaan alam sekitar. Peruntukan ini seterusnya diagihkan secara berperingkat dengan penyaluran pertama sebanyak RM5 juta pada bulan Mac 2022 dengan arahan jelas kepada Kerajaan Negeri Pulau Pinang untuk melaksanakan projek pemeliharaan dan pemuliharaan alam sekitar merangkumi projek Penang Hill Biosphere Reserve (PHBR). Manakala penyaluran kedua sebanyak RM5 juta telah dibuat pada bulan Jun 2022.

Penyaluran ini telah dimaklumkan oleh Kementerian Kewangan melalui surat rujukan MOF.NBO(S) 600/8/5/13(4) bertarikh 11 Mac 2022, surat rujukan MOF.NBO(S) 600/8/5/13(14) bertarikh 9 Jun 2022 dan MOF.NBO(S) 600/8/5/13 s.k.31(14) bertarikh 12 Oktober 2022 kepada Pegawai Kewangan Negeri.

Semakan terkini dengan Pejabat Kewangan Negeri Pulau Pinang mendapati status pelaksanaan projek PHBR ini masih dalam peringkat penyediaan dokumen perolehan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN CHOW KON YEOW (BATU KAWAN)

SOALAN

YB TUAN CHOW KON YEOW (BATU KAWAN) minta **MENTERI PEMBANGUNAN KERAJAAN TEMPATAN** menyatakan adakah Kementerian akan memberi insentif kepada Kerajaan Negeri yang berhasrat untuk melaksanakan pengurusan sisa kepada tenaga. Jika ya, apakah pakejnya, jika tidak, jelaskan kenapa.

JAWAPAN

Tuan Yang di-Pertua,

Untuk makluman Ahli Yang Berhormat, Mesyuarat Jemaah Menteri pada 20 Jun 2019 telah bersetuju secara prinsip untuk membangunkan sekurang-kurangnya satu (1) fasiliti pengurusan sisa pepejal berkonsepkan *Waste to Energy* (WTE) di setiap negeri di Malaysia. Pembangunan loji WTE bagi negeri yang menguatkuasakan Akta Pengurusan Sisa Pepejal dan Pembersihan Awam 2007 (Akta 672) akan dilaksanakan oleh Kementerian ini melalui Jabatan Pengurusan Sisa Pepejal Negara (JPSPN). Bagi negeri yang tidak menguatkuasakan Akta 672 pula, pembangunan loji WTE adalah di bawah kuasa kerajaan negeri dan Pihak Berkuasa Tempatan (PBT) masing-masing.

Untuk makluman Ahli Yang Berhormat juga, bagi memastikan pembangunan loji WTE tersebut berdaya maju dengan cadangan yuran *gate fee* yang munasabah serta tidak membebankan kerajaan, kuota tenaga boleh baharu (*renewable energy*) bagi projek pembangunan loji WTE yang menggunakan teknologi insinerator telah disediakan sebanyak 322MW. Pengagihan kuota tenaga tersebut telah dikhaskan kepada KPKT atau mana-mana kerajaan negeri yang berhasrat untuk melaksanakan pembangunan loji WTE. KPKT telah dipertanggungjawabkan untuk menyelaras pengagihan kuota tenaga tersebut kepada pemaju projek yang berkeelayakan. Dalam hal ini, KPKT telah mengedarkan surat pemakluman kepada kerajaan negeri untuk memohon kuota tenaga tersebut dengan syarat-syarat seperti berikut:

- (i) loji WTE yang akan dibina adalah dari jenis insinerator;
- (ii) syarikat telah ditawarkan secara rasmi projek pembinaan loji WTE oleh kerajaan negeri/ PBT untuk memproses sisa pepejal di kawasan seliaan yang telah ditetapkan;
- (iii) loji mampu menjana tenaga elektrik yang mencukupi untuk dieksport ke grid nasional;

- (iv) *Commercial Operation Date* (COD) dan kadar tarif tenaga boleh baharu:
 - a. 42 sen/kWj untuk projek yang mencapai tarikh operasi komersial (*Commercial Operation Date*) pada atau sebelum 31 Disember 2025; dan
 - b. 35 sen/kWj untuk projek-projek yang mencapai *Commercial Operation Date* pada atau selepas 1 Januari 2026 sehingga 31 Disember 2030.
- (v) syarikat setelah dianugerahkan projek oleh kerajaan negeri/ PBT perlu mengemukakan permohonan kepada JPSPN yang merangkumi maklumat-maklumat berikut:-
 - a. surat tawaran/surat setuju terima daripada kerajaan negeri/PBT;
 - b. salinan perincian projek;
 - c. jadual pelaksanaan projek; dan
 - d. pendaftaran dengan Suruhanjaya Syarikat Malaysia.
- (vi) syarikat mengemukakan surat kelulusan pengagihan kuota tenaga daripada KPKT kepada Suruhanjaya Tenaga (ST) untuk urusan selanjutnya seperti memeterai perjanjian pembelian tenaga (PPA) serta mendapatkan lesen penjanaan awam; dan
- (vii) KPKT berhak untuk meminda kuota tenaga yang telah diberikan dan pemberian kuota tenaga adalah berdasarkan prinsip *first come first served basis*.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN CHOW KON YEOW [BATU KAWAN]

SOALAN

TUAN CHOW KON YEOW [BATU KAWAN] minta **MENTERI PERTANIAN DAN KETERJAMINAN MAKANAN** menyatakan jumlah bantuan sara hidup yang disalurkan kepada nelayan di setiap negeri dari tahun 2018 sehingga 2022. Perincikan juga insentif-insentif yang telah diberikan dan juga dalam perancangan sehingga tahun 2023.

JAWAPAN

Tuan Yang di-Pertua,

Kementerian Pertanian dan Keterjaminan Makanan (KPKM) sentiasa mengambil berat terhadap kebajikan golongan nelayan menerusi pelbagai insentif dan bantuan yang disediakan seperti program Elaun Sara Hidup Nelayan (ESHN). Program ini adalah bantuan secara bulanan kepada pemilik individu vesel perikanan dan pekerja warganegara yang bekerja di atas vesel berlesen bertujuan untuk meringankan beban nelayan dalam menghadapi tekanan ekonomi disebabkan kenaikan kos sara hidup. Kadar bantuan ESHN adalah sebanyak RM300 kepada nelayan laut dan RM250 bagi nelayan darat.

Pecahan penerima dan jumlah yang menerima bantuan ESHN bagi seluruh negara untuk tahun 2018 hingga 2022 adalah seperti berikut:

1) Nelayan Laut

Tahun	Bilangan penerima	Jumlah (RM)
2018	53,729	162,530,050.00
2019	45,380	87,297,600.00
2020	39,089	100,703,500.00
2021	37,474	116,810,700.00
2022	36,040	108,088,800.00

2) Elaun Sara Hidup Nelayan Darat

Tahun	Bilangan penerima	Jumlah (RM)
2018	56,277	12,462,800.00
2019	38,043	7,684,600.00
2020	36,376	7,343,800.00
2021	30,588	7,706,750.00
2022	29,787	7,476,000.00

Di samping itu, Kerajaan juga memberi insentif-insentif lain seperti berikut:

- a) Skim Subsidi Diesel dan Petrol Nelayan bagi mengurangkan kos operasi menangkap ikan;
- b) Skim Tabung Bantuan Bencana Alam dan Kebajikan Nelayan memberi bantuan dan sumbangan segera dalam bentuk kewangan kepada nelayan yang tidak dilindungi di bawah Skim Keselamatan Sosial Pekerjaan Sendiri;
- c) Skim Perlindungan Insurans / Keselamatan Nelayan untuk membela nasib keluarga nelayan dan persediaan kewangan luar jangka golongan nelayan sekiranya berlaku kejadian yang tidak diingini atau kemalangan yang melibatkan nelayan;
- d) Program Dana Nelayan menyediakan pinjaman mudah bagi pembelian bot dan peralatan baru atau meningkatkan keupayaan bot sedia ada;
- e) Program Insentif Hasil Tangkapan Ikan (IHTI) adalah untuk memberi galakan kepada pemilik vesel perikanan untuk mendaratkan hasil perikanan di dalam negara;
- f) Program sijil diploma di Akademi Perikanan Malaysia (APM) di Chendering Terengganu dan Kolej Perikanan Sultan Nazrin di Lumut Perak; dan
- g) Exit policy pukut tunda dari Zon B yang telah bermula pada tahun 2015 akan memberi peluang kepada nelayan-nelayan tradisi dan nelayan pantai untuk meningkatkan aktiviti penangkapan.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN CHOW YU HUI [RAUB]

SOALAN

Minta **MENTERI PENDIDIKAN TINGGI** menyatakan senarai bilangan pelajar-pelajar sarjana muda di setiap institusi pendidikan tinggi awam (IPTA) berdasarkan pecahan kaum (iaitu Melayu, Cina, India, Bumiputera bukan Melayu Semenanjung, Bumiputera Sabah, Bumiputera Sarawak dan lain-lain) dari tahun 2018 hingga tahun 2022.

JAWAPAN

Tuan Yang di-Pertua,

1. Berdasarkan Sistem MyMoheS Kementerian Pendidikan Tinggi (KPT), pada tahun 2022, pelajar warganegara (Bumiputera) yang sedang mengikuti pengajian peringkat sarjana muda di IPTA adalah seperti berikut:

PERINGKAT PENGAJIAN (KUMPULAN)	JENIS IPT	TARAF BUMI	2018	2019	2020	2021	2022
			Bil.	Bil.	Bil.	Bil.	Bil.
Sarjana Muda	POLITEKNIK	Bukan Bumiputera	67	69	58	54	78
		Bumiputera	579	498	489	498	483
		Jumlah	646	567	547	552	561
	UA	Bukan Bumiputera	46,825	48,230	51,624	53,179	51,375
		Bumiputera	282,303	291,023	306,281	314,019	303,710
		Jumlah	329,128	339,253	357,905	367,198	355,085
	Jumlah		329,774	339,820	358,452	367,750	355,646
Jumlah		329,774	339,820	358,452	367,750	355,646	

2. Selain itu, Selain itu, bilangan Enrolmen Pelajar Warganegara Peringkat Sarjana Muda di IPTA mengikut Bangsa adalah seperti **Jadual 1** di bawah.

Jadual 1: Bilangan Enrolmen Pelajar Warganegara Peringkat Sarjana Muda di IPTA mengikut Bangsa

PERINGKAT PENGAJIAN (KUMPULAN)	JENIS IPT	BANGSA (KUMPULAN)	2018	2019	2020	2021	2022
			Bil.	Bil.	Bil.	Bil.	Bil.
Sarjana Muda	POLITEKNIK	Bumiputera Sabah	11	11	8	13	9
		Bumiputera Sarawak	16	13	15	13	8
		Cina	6	6	8	8	8
		India	54	56	47	42	62
		Lain-Lain	7	7	3	4	8
		Melayu	552	473	465	471	465
		Orang Asli	-	1	1	1	1
		Jumlah	646	567	547	552	561

NO. SOALAN: 121

	UA	Bumiputera Sabah	17,088	15,886	18,106	19,803	19,384
		Bumiputera Sabah Lain	41	11	33	48	51
		Bumiputera Sarawak	8,401	11,827	12,199	12,192	11,937
		Bumiputera Sarawak Lain	146	122	124	115	98
		Cina	30,386	30,255	32,253	32,509	31,342
		India	13,935	15,629	16,687	17,743	17,164
		Lain-Lain	2,514	2,376	2,748	3,079	3,032
		Melayu	256,336	262,836	275,426	281,360	271,740
		Orang Asli	281	311	329	349	337
		Jumlah	329,128	339,253	357,905	367,198	355,085
	Jumlah		329,774	339,820	358,452	367,750	355,646
Jumlah			329,774	339,820	358,452	367,750	355,646

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN CHOW YU HUI [RAUB]

SOALAN

TUAN CHOW YU HUI [RAUB] minta **MENTERI PENDIDIKAN** menyatakan senarai bilangan kemasukan pelajar-pelajar ke setiap kolej matrikulasi berdasarkan pecahan kaum (iaitu Melayu, Cina, India, Bumiputera bukan Melayu Semenanjung, Bumiputera Sabah, Bumiputera Sarawak dan lain-lain) dari tahun 2018 hingga tahun 2022.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan menetapkan dasar pengambilan pelajar ke Program Matrikulasi adalah tertakluk kepada kuota 90 peratus bagi pelajar Bumiputera dan 10 peratus bagi pelajar bukan Bumiputera. Bagi pengagihan kuota 10 peratus kepada pelajar bukan Bumiputera, Kerajaan telah memutuskan bahawa peratusan pengambilan pelajar adalah mengikut nisbah 5.43 peratus untuk kaum Cina, 3.72 peratus untuk kaum India dan 0.85 peratus untuk lain-lain. Oleh demikian, tawaran kemasukan ke Program Matrikulasi adalah mengikut komposisi yang telah ditetapkan.

Berdasarkan kuota pengambilan sedia ada, bagi sesi 2018 hingga 2022, jumlah tawaran bagi pengambilan pelajar Program Matrikulasi KPM ialah 30,000 tempat. Daripada jumlah tersebut, 27,000 tempat adalah untuk pelajar Bumiputera dan 3,000 tempat lagi untuk pelajar bukan Bumiputera.

Sekian, terima kasih.

RT12

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN CHOW YU HUI [RAUB]

SOALAN

Tuan Chow Yu Hui [Raub] minta **MENTERI DALAM NEGERI** menyatakan jumlah permohonan, jumlah kelulusan serta alasan penolakan penukaran kad pengenalan merah ke biru mengikut pecahan jantina dan kaum (iaitu Melayu, Cina, India, Bumiputera bukan Melayu Semenanjung, Bumiputera Sabah, Bumiputera Sarawak dan lain-lain) dari tahun 2012 hingga tahun 2022.

JAWAPAN

Tuan Yang Di Pertua,

Untuk makluman Ahli Yang Berhormat, statistik bagi Permohonan Penukaran Kad Pengenalan Pemastautin Tetap (MyPR) ke Kad Pengenalan Warganegara (MyKAD) mengikut pecahan jantina dan kaum dari tahun 2012 hingga tahun 2022 adalah seperti berikut:

**STATISTIK PERMOHONAN PENUKARAN KAD PENGENALAN MERAH
KE BIRU MENGIKUT KETURUNAN DAN JANTINA BAGI TAHUN 2012
SEHINGGA 2022**

KETURUNAN	JANTINA		JUMLAH
	LELAKI	PEREMPUAN	
MELAYU	184	395	579
CINA	63	110	173
INDIA	195	468	663
BUMIPUTERA SABAH	132	330	462
BUMIPUTERA SARAWAK	55	104	159
LAIN-LAIN	3,403	17,831	21,234
JUMLAH	4,032	19,238	23,270

Sumber : Pangkalan Data JPN

Tarikh : 02 Februari 2023

**STATISTIK KELULUSAN PENUKARAN KAD PENGENALAN MERAH KE
BIRU MENGIKUT KETURUNAN DAN JANTINA
BAGI TAHUN 2012 SEHINGGA 2022**

KETURUNAN	JANTINA		JUMLAH
	LELAKI	PEREMPUAN	
MELAYU	183	395	578
CINA	63	110	173
INDIA	195	467	662
BUMIPUTERA SABAH	132	330	462
BUMIPUTERA SARAWAK	54	103	157
LAIN-LAIN	3,397	17,815	21,212
JUMLAH	4,024	19,220	23,244

Sumber : Pangkalan Data JPN

Tarikh : 02 Februari 2023

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN CHOW YU HUI [RAUB]

SOALAN

Minta **MENTERI PENDIDIKAN TINGGI** menyatakan senarai kemasukan pelajar-pelajar ke institusi pendidikan tinggi awam (IPTA) selain kelayakan Sijil Tinggi Persekolahan Malaysia (STPM), kolej matrikulasi, program pengajian asasi dan Sijil Tinggi Agama Malaysia (STAM).

JAWAPAN

Tuan Yang di-Pertua,

1. Untuk tujuan kemasukan ke Universiti Awam (UA) melalui UPUOnline® pada sesi Akademik 2022/2023, **selain** kelayakan STPM, Matrikulasi, Asasi dan STAM, kelayakan lain yang dipertimbangkan adalah iaitu:

i. Kategori E:

(Kelayakan Diploma DKM/ DLKM/ DVM/ Lain Diploma)

- a. **E1:** Diploma Kemahiran Malaysia (DKM)/ Diploma Lanjutan Kemahiran Malaysia (DLKM).

Pada Sesi Akademik 2022/2023, seramai 511 orang calon Lulusan DKM/DLKM telah membuat **permohonan** melalui UPUOnline®.

- b. **E2:** Diploma Vokasional Malaysia (DVM).

Pada Sesi Akademik 2022/2023, seramai 2,799 orang calon Lulusan DVM telah membuat **permohonan** melalui UPUOnline®.

E3: Diploma Institusi Pendidikan Tinggi Swasta (IPTS)/ Luar negara/ Institusi latihan kemahiran Awam (ILKA)/ Lain-lain Kelayakan.

Pada Sesi Akademik 2022/2023, seramai 8,878 orang calon Diploma Institusi Pendidikan Tinggi Swasta (IPTS)/ Luar negara/ Institusi latihan kemahiran Awam (ILKA)/ Lain-lain Kelayakan telah membuat **permohonan** melalui UPUOnline®.

ii. Kategori F: Kelayakan Setaraf

a. F1: A-Level

Pada Sesi Akademik 2022/2023, seramai 338 orang calon Lulusan A-Level telah membuat **permohonan** melalui UPUOnline®.

b. F2: International Baccalaureate (IB)

Pada Sesi Akademik 2022/2023, seramai 13 orang calon Lulusan International Baccalaureate (IB) telah membuat **permohonan** melalui UPUOnline®.

c. F3: Sekolah Sukan

Pada Sesi Akademik 2022/2023, seramai 157 orang calon Sekolah Sukan telah membuat permohonan melalui UPUOnline®.

d. F4: STPM (Bukan Tahun Semasa)

Pada Sesi Akademik 2022/2023, seramai 4,381 orang calon Lulusan STPM (Bukan Tahun Semasa) telah membuat permohonan melalui UPUOnline®.

e. F5: Matrikulasi KPM/ Asasi UA (Bukan Tahun Semasa)

Pada Sesi Akademik 2022/2023, seramai 945 orang calon Lulusan Matrikulasi KPM/ Asasi UA (Bukan Tahun Semasa) telah membuat permohonan melalui UPUOnline®.

f. F6: STAM (Bukan Tahun Semasa)

Pada Sesi Akademik 2022/2023, seramai 107 orang calon Lulusan STAM (Bukan Tahun Semasa) telah membuat permohonan melalui UPUOnline®.

- g. **F7:** Australian matriculation (AUSMAT)/ South Australian matriculation (SAM)/ Canadian Pre-University (CPU).

Pada Sesi Akademik 2022/2023, seramai 45 orang calon Lulusan Australian matriculation (AUSMAT)/ South Australian matriculation (SAM)/ Canadian Pre-University (CPU) telah membuat permohonan melalui UPUOnline®.

- h. **F8:** Foundation Institusi Pendidikan Tinggi Swasta (IPTS)

Pada Sesi Akademik 2022/2023, seramai 1,045 orang calon Lulusan Foundation Institusi Pendidikan Tinggi Swasta (IPTS) telah membuat permohonan melalui UPUOnline®.

iii. Kategori G: Diploma UA/Politeknik

- a. **G1:** Diploma UA

Pada Sesi Akademik 2022/2023, seramai 14,199 orang calon Lulusan Diploma UA telah membuat permohonan melalui UPUOnline®.

- b. **G2:** Diploma Politeknik

Pada Sesi Akademik 2022/2023, seramai 12,380 orang calon Lulusan Diploma Politeknik telah membuat permohonan melalui UPUOnline®.

2. Permohonan layak daripada **Kategori Diploma/Setaraf (Kategori E, F dan G)** adalah sebanyak 26,958 daripada jumlah keseluruhan permohonan sebanyak 45,798 bagi Sesi Akademik 2022/2023. Jumlah penawaran adalah sebanyak 20,617 dengan kadar kejayaan sebanyak 76,48%.

3. Permohonan layak daripada **Kategori STPM/ Matrikulasi/ Asasi** tahun semasa adalah sebanyak 61,546 daripada jumlah keseluruhan permohonan sebanyak 65,991 bagi Sesi Akademik 2022/2023. Jumlah penawaran adalah sebanyak 54,281 dengan kadar kejayaan sebanyak 88.20%.

4. Manakala permohonan layak daripada **kategori STAM** tahun semasa adalah sebanyak 2,241 daripada jumlah keseluruhan permohonan sebanyak 3,688 bagi Sesi Akademik 2022/2023. Jumlah penawaran adalah sebanyak 2,183 dengan kadar kejayaan sebanyak 97.41%.
5. **Jumlah keseluruhan permohonan layak bagi semua kategori Lulusan STPM/Setaraf** adalah sebanyak **90,745** daripada keseluruhan permohonan sebanyak 115,477.
6. **Jumlah keseluruhan penawaran bagi semua kategori Lulusan STPM/Setaraf** adalah sebanyak **77,081** dengan kadar kejayaan **sebanyak 84.94%** bagi Sesi Akademik 2022/2023. Penawaran ini adalah melebihi **Unjuran ambilan** (Bilangan tempat yang disediakan oleh Universiti Awam (UA) iaitu hanya sebanyak **71, 615 tempat**.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : YB TUAN CHOW YU HUI [RAUB]

SOALAN

TUAN CHOW YU HUI [RAUB] minta **MENTERI PERTANIAN DAN KETERJAMINAN MAKANAN** menyatakan bilangan (dalam tan) durian sejuk beku yang dieksportkan mengikut pecahan negara masing-masing sejak tahun 2016 hingga tahun 2022.

JAWAPAN

Tuan Yang di-Pertua,

Kebanyakan durian yang dieksport ke luar negara adalah dalam bentuk segar atau sejuk beku. Durian segar kebanyakannya dieksport ke negara berhampiran terutamanya ke Singapura, Hong Kong dan Thailand. Manakala durian sejuk beku pula banyak dihantar ke negara yang jaraknya lebih jauh bagi memastikan buah tersebut boleh disimpan dengan lebih lama dan mematuhi syarat biosekuriti negara pengimport. Secara lazimnya, terdapat dua bentuk durian sejuk beku yang dieksport iaitu buah durian sejuk beku (*frozen whole fruit*) dan ulas durian sejuk beku (*frozen pulp*). Selain itu, terdapat juga pengeksportan yang dibuat dalam bentuk pes durian yang digunakan untuk produk pastri, kek dan lain-lain.

Berdasarkan data daripada Jabatan Perkhidmatan Kuarantin dan Pemeriksaan Malaysia (MAQIS), pengeksportan durian secara keseluruhannya (termasuk segar dan sejuk beku) dari tahun 2016 sehingga tahun 2019 adalah seperti jadual berikut:

**Statistik Eksport Durian (Termasuk Musang King) ke Luar Negara
Tahun 2016 – 2019**

Tahun	Kuantiti (Metrik Tan)
2016	17,011
2017	14,550
2018	23,064
2019	28,674

Sumber: Jabatan Perkhidmatan Kuarantin dan Pemeriksaan Malaysia (MAQIS)

Pecahan eksport durian mengikut lima (5) negara destinasi utama dari tahun 2016 sehingga tahun 2019 adalah seperti berikut:

**5 NEGARA TERATAS DESTINASI EKPORT DURIAN
MENGIKUT TAHUN 2016-2019 BERDASARKAN KUANTITI**

(DATA 2016-2019: KELULUSAN PERMIT MAQIS)

TAHUN	KEDUDUKAN	NEGARA DESTINASI	KUANTITI (MT)
2016	1	SINGAPURA	15,937
	2	CHINA	485
	3	HONG KONG	242
	4	INDONESIA	111
	5	AMERIKA SYARIKAT	91
2017	1	SINGAPURA	13,384
	2	HONG KONG	450
	3	THAILAND	345
	4	AMERIKA SYARIKAT	133
	5	CHINA	67
2018	1	SINGAPURA	19,527
	2	HONG KONG	1,261
	3	THAILAND	1,090
	4	VIETNAM	329

SOALAN NO: 125

	5	AMERIKA SYARIKAT	316
2019	1	SINGAPURA	24,529
	2	THAILAND	1,989
	3	HONG KONG	1,483
	4	CHINA	220
	5	AMERIKA SYARIKAT	177

Bermula pada tahun 2020, sistem i-MAQIS mula merekod pecahan eksport durian sejuk beku dari Malaysia. Kuantiti eksport dan negara destinasi eksport durian sejuk beku dari tahun 2020 sehingga tahun 2022 adalah seperti berikut:

**DATA EKSPORT DURIAN SEJUK BEKU DARI JANUARI 2020 HINGGA
DISEMBER 2022 MENGIKUT NEGARA DESTINASI**
(SUMBER: I-MAQIS)

TAHUN	NEGARA DESTINASI	KOMODITI/ KOD TARIF		KUANTITI MENGIKUT NEGARA (MT)
		EKSPORT		
		Durian Sejuk Beku (<i>Whole Fruit</i>)	Durian Sejuk beku (<i>Pulp</i>)	
		0810600000	081190200	
		KUANTITI (MT)	KUANTITI (MT)	
2020	CHINA	1,786.87	161.20	1,948.07
	AUSTRALIA	267.80	100.58	368.38
	AMERIKA SYARIKAT	226.49	16.13	242.63
	THAILAND	96.62	0.00	96.62
	INDONESIA	25.63	42.25	67.88
	HONG KONG	37.07	1.14	38.21
	TAIWAN	25.94	11.20	37.14
	KANADA	29.43	0.00	29.43
	AUSTRALIA	9.02	5.62	14.64
	EMIRIAH ARAB BERSATU	4.62	1.73	6.35
	SINGAPURA	3.63	0.00	3.63
	BELANDA	0.90	0.80	1.70
	UNITED KINGDOM	0.05	0.48	0.53
	NEW ZEALAND	0.00	0.49	0.49

SOALAN NO: 125

	BRUNEI DARUSSALAM	0.32	0.00	0.32
	JUMLAH	2,514.39	341.61	2,856.00
2021	CHINA	2,767.99	207.04	2,975.03
	AUSTRALIA	170.21	54.31	224.52
	AMERIKA SYARIKAT	163.61	19.10	182.71
	INDONESIA	82.45	92.78	175.23
	HONG KONG	51.23	21.65	72.88
	THAILAND	54.98	6.52	61.50
	TAIWAN	0.15	9.21	9.36
	CHILE	5.30	0.00	5.30
	KANADA	1.80	3.36	5.16
	BELANDA	1.44	1.68	3.12
	BRUNEI DARUSSALAM	1.74	0.00	1.74
	BAHRAIN	0.00	0.90	0.90
	SINGAPURA	0.76	0.01	0.77
	UNITED KINGDOM	0.43	0.30	0.73
	NEW ZEALAND	0.00	0.36	0.36
	VIETNAM	0.28	0.00	0.28
	JUMLAH	3,302.37	417.22	3,719.59
2022	CHINA	649.99	103.89	753.87
	INDONESIA	327.32	11.46	338.78
	HONG KONG	25.90	3.11	29.01
	SINGAPURA	11.88	0.00	11.88
	AUSTRALIA	0.00	5.60	5.60
	NEW ZEALAND	2.16	1.72	3.88
	TAIWAN	0.00	2.00	2.00
	THAILAND	1.45	0.00	1.45
	KANADA	0.00	1.20	1.20
	UNITED KINGDOM	0.60	0.33	0.93
	JUMLAH	1,019.29	129.31	1,148.59

Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' DR. AHMAD YUNUS BIN HAIRI
[KUALA LANGAT]**

SOALAN

DATO' DR. AHMAD YUNUS BIN HAIRI [KUALA LANGAT] minta
MENTERI PENGANGKUTAN menyatakan :

- (a) status perancangan pembangunan pelabuhan ketiga Pulau Carey, Selangor;
- (b) apakah perancangan Kementerian untuk menaik taraf sistem jalan raya yang menghubungkan pelabuhan ini dan kawasan sekitarnya khususnya di Kuala Langat.

JAWAPAN

Tuan Yang Di Pertua,

1. Untuk makluman Ahli Yang Berhormat, dalam usaha menggiatkan pembangunan masa hadapan Pelabuhan Klang, sejak hampir 30 tahun yang lepas, Lembaga Pelabuhan Klang (LPK) telah menjalankan beberapa kajian kebolehlaksanaan bagi menilai dan mengenal pasti tapak pelabuhan baharu yang sesuai untuk dibangunkan sebagai terminal pelabuhan ketiga bagi meningkatkan kapasiti masa hadapan Pelabuhan Klang sebagai langkah persediaan apabila pembangunan di Pelabuhan Utara (Northport) dan Pelabuhan Barat (Westports) mencapai tahap kapasiti maksima.
2. Pulau Carey dipilih sebagai lokasi yang sesuai untuk pembinaan pelabuhan baharu berdasarkan kedudukannya yang strategik di Selat Melaka dengan kedalaman semula jadi sedalam 18 meter yang sesuai untuk kapal-kapal kargo besar bersaiz ultra.
3. Dalam hubungan ini, Kementerian Pengangkutan (MOT) telah membentangkan satu kertas Jemaah Menteri bertajuk Cadangan Pelaksanaan Kajian Kebolehlaksanaan Projek Bagi Pembangunan Pelabuhan di Pulau Carey, Selangor pada 29 Ogos 2018. Jemaah Menteri telah bersetuju supaya LPK melaksanakan Kajian Kebolehlaksanaan Projek (*Feasibility Study*) untuk tujuan pembangunan pelabuhan di Pulau Carey, Mukim Telok Panglima Garang, Kuala Langat, Selangor.
4. Lanjutan daripada itu, LPK telah melantik Vestera Resources Sdn. Bhd. untuk menjalankan Kajian "*Feasibility Study to Develop a Third Port Terminal at Port Klang on Pulau Carey, Selangor*". Laporan Akhir telah pun dikemukakan kepada pihak LPK pada 7 Julai 2021 dan dibentangkan kepada MOT pada 10 Januari 2022.
5. Dalam perkembangan yang sama, perkara ini juga telah dibentangkan kepada Kerajaan Negeri Selangor masing-masing melalui Mesyuarat Majlis Tindakan Ekonomi Selangor (MTES) yang

dipengerusikan oleh YAB Menteri Besar Selangor dan Mesyuarat Penyelarasan Cadangan Pembangunan Pelabuhan ke-3 Pulau Carey, Selangor Darul Ehsan yang dipengerusikan oleh YB Setiausaha Kerajaan Negeri Selangor.

6. Sehubungan dengan itu, MOT sedang dalam usaha untuk meneliti beberapa isu berbangkit berhubung pembangunan pelabuhan ketiga di Pulau Carey sebelum mencadangkan hala tuju seterusnya untuk pertimbangan dan persetujuan Kerajaan.

7. Untuk makluman Ahli Yang Berhormat, perancangan menaik taraf sistem jalan raya adalah di bawah bidang kuasa Kementerian Kerja Raya (KKR). Sehingga kini, MOT telah dimaklumkan bahawa pihak KKR tidak menerima sebarang permohonan daripada Kerajaan Negeri Selangor untuk menaiktaraf sistem rangkaian jalan raya yang menghubungkan lokasi cadangan pembangunan pelabuhan ketiga di Pulau Carey dan kawasan sekitar di Kuala Langat. Semakan KKR mendapati jalan-jalan di Pulau Carey adalah jalan negeri dan terletak di bawah bidang kuasa Kerajaan Negeri.

8. KKR akan memperhalusi sebarang cadangan projek jalan baharu atau penaiktarafan jalan persekutuan sedia ada di kawasan sekitar Pulau Carey tertakluk kepada kedudukan keutamaan projek dan ketersediaan agihan peruntukan pembangunan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' DR. AHMAD YUNUS BIN HAIRI
[KUALA LANGAT]**

SOALAN

DATO' DR. AHMAD YUNUS BIN HAIRI [KUALA LANGAT] minta
MENTERI PENGANGKUTAN menyatakan :

(a) dasar Kementerian terhadap pekerja asing menjadi pemandu kenderaan komersial; dan

(b) berapa banyak kes yang direkodkan melibatkan kemalangan maut dan apakah tindakan yang dikenakan kepada majikan.

JAWAPAN

Tuan Yang di-Pertua,

1. Untuk makluman Ahli Yang Berhormat, berdasarkan Pekeliling JPJ bilangan (2) Tahun 1996, dasar Kementerian Pengangkutan terhadap pekerja asing menjadi pemandu kenderaan komersial adalah seperti berikut:

- a. Pengeluaran Lesen Memandu Kenderaan Perkhidmatan Awam (PSV) kepada warganegara asing adalah tidak dibenarkan sama sekali;
- b. Permohonan Lesen Memandu Kenderaan Barangan (GDL) kepada warganegara asing adalah layak dipertimbangkan dengan syarat-syarat tertentu.

2. Walau bagaimanapun, pelaksanaan pekeliling ini adalah tidak melibatkan permohonan daripada warganegara Singapura. Bagi warganegara Singapura, proses pengeluaran lesen vokasional (PSV dan GDL) dibenarkan tetapi hanya dibenarkan di stesen JPJ Johor Bahru.

3. Statistik Kemalangan Maut bagi Warganegara dan Bukan Warganegara yang menjadi Pemandu Kenderaan Komersil bagi tahun 2021 hingga 2023 (1hingga 31 Januari 2023) adalah seperti berikut:

BIL	TAHUN	WARGANEGARA	BUKAN WARGANEGARA
1.	2021	137	9
2.	2022	166	10
3.	2023 (1 – 31 Januari)	6	1
JUMLAH		309	20

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' DR. AHMAD YUNUS BIN HAIRI
[KUALA LANGAT]**

SOALAN

Minta **PERDANA MENTERI** menyatakan:

- (a) perancangan untuk menaik taraf dan memperkasakan mahkamah Syariah di negara kita; dan
- (b) adakah projek perintis JKES seperti mahkamah bergerak, fast track, bantuan awal pelaksanaan arahan mahkamah Syariah juga akan dilaksanakan di seluruh negara.

JAWAPAN

**YB SENATOR DATO' SETIA DR. HAJI MOHD NAI'IM BIN HAJI
MOKHTAR**

MENTERI DI JABATAN PERDANA MENTERI (HAL EHWAL AGAMA)

Tuan Yang di-Pertua,

1. Sebagaimana yang kita semua sedia maklum, Senarai 2, Jadual Kesembilan Perlembagaan Persekutuan jelas memperuntukkan bahawa kuasa perundangan syariah adalah terletak di bawah Sultan/Raja setiap negeri manakala bagi negeri-negeri tidak beraja adalah di bawah kuasa Seri Paduka Baginda Yang Di-Pertuan Agong. Sebarang usaha untuk menaik taraf dan memperkasakan Mahkamah Syariah seluruh negara perlulah mendapat kerjasama, pandangan dan persetujuan daripada pihak berkuasa negeri-negeri.

2. Kerajaan amat peka dan sememangnya mengambil langkah-langkah yang serius dalam memperkasa pentadbiran Mahkamah Syariah selaras dengan Fasal (1) Perkara 3 Perlembagaan Persekutuan yang memperuntukkan bahawa Islam adalah agama bagi Persekutuan. Kerajaan dari semasa ke semasa sentiasa menjalankan usaha-usaha ke arah penyeragaman undang-undang dan pentadbiran kehakiman syariah antara negeri-negeri melalui Jabatan Kehakiman Syariah Malaysia (JKSM).

3. Pada bulan Jun 2022 yang lalu, Jawatankuasa Memperkasakan Mahkamah Syariah (JKMMS) telah ditubuhkan untuk meningkatkan dan memartabatkan Mahkamah Syariah secara holistik selaras dengan kedudukan Islam dalam Perlembagaan Persekutuan. Jawatankuasa ini akan memberikan syor kepada Kerajaan mengenai perkara-perkara dasar yang berhubungan dengan pemerkasaan Mahkamah Syariah, antaranya meliputi skop yang berikut:

- i. Penambahbaikan sistem dan undang-undang Syariah;
- ii. Pengurusan, penstrukturan semula dan infrastruktur Mahkamah Syariah;
- iii. Pengurusan dan penstrukturan semula Jabatan Kehakiman Syariah;
- iv. Latihan Hakim dan Pegawai Syariah;
- v. Sistem pendidikan undang-undang Syariah; dan
- vi. Penambahbaikan perkara-perkara yang berhubungan dengan hal ehwal penguatkuasaan dan pendakwaan Syariah serta peguam Syarie.

4. Berkenaan projek rintis yang dilaksanakan oleh Jabatan Kehakiman Syariah Selangor (JAKESS), Kerajaan sentiasa menyambut baik projek berkenaan dan menggalakkan negeri-negeri lain untuk mengikutinya. Sebagaimana yang dinyatakan sebelum ini, Mahkamah Syariah adalah terletak di bawah pentadbiran negeri-negeri dan terpulanglah kepada negeri berkenaan untuk menerima dan melaksanakan inisiatif berkenaan di negeri-negeri.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' DR. AHMAD YUNUS BIN HAIRI
[KUALA LANGAT]**

SOALAN

**DATO' DR. AHMAD YUNUS BIN HAIRI [KUALA LANGAT] minta
MENTERI SUMBER ASLI, ALAM SEKITAR DAN PERUBAHAN IKLIM
menyatakan:**

- a) berapa keluasan tanah rizab Melayu yang masih belum diganti disebabkan tujuan penggunaan pembangunan awam; dan
- b) apakah tindakan yang diambil untuk penggantian tersebut.

JAWAPAN

Tuan Yang di-Pertua,

Pada masa ini, keluasan kawasan pewartaan Tanah Rizab Melayu sehingga 31 Disember 2022 adalah 4,996,406.42 hektar. Ia menunjukkan peningkatan sebanyak 0.67% berbanding 4,963,190.80 hektar pada tahun 2021. Kementerian merekodkan data keluasan ini berdasarkan kepada kutipan data daripada Pihak Berkuasa Negeri di Semenanjung Malaysia. Secara keseluruhannya, semua negeri mencatatkan peningkatan Tanah Rizab Melayu.

Untuk makluman Yang Berhormat, Kerajaan Negeri hendaklah menggantikan semula tanah yang telah dibatalkan sebagai status Tanah Rizab Melayu selaras dengan Perkara 89 Perlembagaan Persekutuan yang menyatakan setiap keputusan pembatalan Tanah Rizab Melayu hendaklah digantikan oleh Pihak Berkuasa Negeri masing-masing dengan kawasan yang sama jenis dan luasnya dengan tanah tersebut. Oleh itu, urusan pembatalan dan penggantian adalah terletak di bawah bidang kuasa Pihak Berkuasa Negeri mengikut Enakmen Tanah Rizab Melayu negeri masing-masing.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATO' DR. AHMAD YUNUS BIN HAIRI
[KUALA LANGAT]**

SOALAN

**DATO' DR. AHMAD YUNUS BIN HAIRI [KUALA LANGAT] minta
MENTERI EKONOMI menyatakan:**

- (a) perancangan untuk memulihkan semula ekonomi selepas bencana wabak pandemik COVID-19 dan banjir besar seluruh negara; dan
- (b) apakah ada tumpuan khusus kepada masyarakat luar bandar dan B40.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan telah melaksanakan pelbagai inisiatif dalam usaha memulihkan semula ekonomi selepas pandemik COVID-19 dan banjir besar yang berlaku di seluruh negara. Usaha ini telah membuahkan hasil yang mana ekonomi negara telah melonjak sebanyak 8.7% pada tahun 2022 berbanding pertumbuhan tahun sebelumnya iaitu 3.1% (2020: -5.5%). Prestasi ini menunjukkan pemulihan ekonomi yang berterusan dan mencerminkan daya tahan ekonomi negara.

Pelbagai langkah telah diambil Kerajaan susulan penularan pandemik COVID-19 sejak tahun 2020. Langkah-langkah tersebut, termasuk memperkenalkan lapan (8) pakej rangsangan ekonomi dengan jumlah peruntukan sebanyak RM530 bilion. Pakej rangsangan ini bertujuan menghidupkan semula ekonomi dan menyokong perniagaan serta membantu rakyat yang terkesan akibat wabak tersebut. Sebanyak RM15 bilion telah diperuntukkan bagi menangani isu pengangguran menerusi pelaksanaan program di bawah PRIHATIN dan PENJANA yang meliputi program subsidi gaji, program insentif pengambilan pekerjaan dan juga bantuan latihan. Selain itu, bagi mengurangkan bebanan kewangan rakyat, pemberian subsidi, bantuan dan insentif, termasuk pengeluaran khas Kumpulan Wang Simpanan Pekerja (KWSP) turut dilaksanakan pada tahun 2022.

Beberapa inisiatif telah diluluskan di bawah Belanjawan 2023 yang diumumkan oleh YAB Perdana Menteri pada 24 Februari 2023 yang lalu bagi menangani bencana alam seperti banjir. Inisiatif tersebut, termasuk perolehan khemah operasi dan bencana Polis Diraja Malaysia (PDRM), peralatan pasca banjir, peralatan dan aset di bawah Kementerian Pertahanan Malaysia, peralatan dan aset bencana di bawah Bomba, Tabung Bencana Negara serta pengukuhan fungsi Agensi Pengurusan Bencana Negara (NADMA). Bagi tebatan banjir pula, inisiatif seperti menaik taraf infrastruktur dan saliran bandar serta penyelenggaraan kolam takungan banjir di bawah pihak berkuasa tempatan (PBT) dan

perparitan dan longkang di bawah PBT melibatkan kontraktor G1-G4 turut diluluskan sejumlah peruntukan bertujuan memastikan musibah bencana dapat ditangani dengan baik. Bantuan Musim Tengkujuh juga akan dinaikkan kadarnya kepada RM800 berbanding RM600 sebelum ini untuk tempoh empat (4) bulan. Peningkatan kadar ini bakal memanfaatkan 320 ribu pekebun kecil.

Tuan Yang di-Pertua,

Agenda pembasmian kemiskinan dan pembangunan inklusif sentiasa menjadi tonggak penting dalam dasar pembangunan sosioekonomi negara. Malaysia telah berjaya menangani isu kemiskinan dan merapatkan jurang ketidaksamarataan dalam kalangan rakyat, tanpa mengira jantina, etnik, status ekonomi dan lokasi. Walau bagaimanapun, kemiskinan masih wujud dalam kelompok tertentu di bandar dan luar bandar. Di bawah Rancangan Malaysia Kedua Belas, 2021-2025 (RMKe-12), masyarakat luar bandar, terutama golongan B40 sentiasa menjadi tumpuan khusus Kerajaan dalam membangunkan ekonomi negara.

Melalui Belanjawan 2023, Kerajaan telah mengambil langkah responsif dan proaktif untuk terus membantu golongan miskin dan B40, dalam dan luar bandar. Langkah-langkah tersebut, termasuk pemberian bantuan bulanan Jabatan Kebajikan Masyarakat (JKM) kepada hampir 400,000 golongan yang mudah terjejas, termasuk kanak-kanak, warga emas dan orang kurang upaya; pelbagai bantuan, subsidi dan insentif kepada 240,000 pesawah dan 380,000 pekebun kecil dan projek pembaikan luar bandar dan program-program membasmi kemiskinan.

Kerajaan juga akan meneruskan pelbagai inisiatif bagi mengurangkan impak kos sara hidup dengan peruntukan berjumlah RM64 bilion. Bantuan bagi meminimumkan beban sara hidup ini, termasuk pelaksanaan konsep Payung Rahmah dan Sumbangan Tunai Rahmah (STR). Konsep Payung Rahmah, antara lainnya, meliputi Kempen Menu Rahmah, Jualan Rahmah, *Program Community Drumming* dan Kredit e-Tunai Belia Rahmah. Manakala, STR akan memanfaatkan hampir sembilan (9) juta penerima yang layak dengan peruntukkan disediakan sebanyak hampir RM8 bilion.

Selain bantuan secara terus, golongan miskin tegar, miskin dan B40 akan terus dibantu bagi membina keupayaan mereka untuk meningkatkan pendapatan. Menerusi pelaksanaan Inisiatif Pendapatan Rakyat (IPR) yang dilancarkan baru-baru ini, golongan isi rumah ini dijangka mampu meraih pendapatan antara RM2,000 hingga RM2,400 sebulan dalam tempoh pemantauan selama 24 bulan. Sejumlah RM750 juta telah diperuntukkan bagi pelaksanaan program ini di bawah Belanjawan 2023. Rakyat yang layak boleh memohon mana-mana inisiatif di bawah IPR iaitu Inisiatif Usahawan Tani (INTAN), Inisiatif Usahawan Makanan (INSAN) dan Inisiatif Operator Perkhidmatan (IKHSAN). Isu pengganguran belia turut mendapat perhatian bagi meningkatkan keupayaan mereka menjana pendapatan dengan pelbagai bantuan telah diperkenal, termasuk pelaksanaan program peningkatan kemahiran (*upskilling*) kepada 30,000 pekerja *gig* dengan jumlah peruntukan sebanyak RM40 juta dan penawaran 35 ribu peluang kerjaya oleh syarikat berkaitan kerajaan kepada lepasan sekolah dan graduan.

Tuan Yang di-Pertua,

Penyampaian perkhidmatan Kerajaan yang lebih berkesan dan pelaksanaan segera reformasi struktur adalah penting untuk mempercepatkan pemulihan ekonomi. Oleh itu, Kerajaan telah menubuhkan Pasukan Petugas Khas Reformasi Agensi (STAR) yang diketuai oleh Ketua Setiausaha Negara bagi menambah baik perkhidmatan Kerajaan. Pasukan ini akan menangani isu pelaksanaan seperti penyelenggaraan sekolah daif, kebolehpasaran graduan teknikal dan latihan vokasional, perkhidmatan di jabatan kecemasan dan trauma di hospital kerajaan serta pelaksanaan sistem bayaran tanpa tunai, di samping mengenal pasti inisiatif yang boleh dilaksanakan dengan segera berteraskan prinsip Malaysia Madani.

Menerusi pelaksanaan pelbagai inisiatif yang dinyatakan, Kerajaan yakin bahawa setiap lapisan rakyat Malaysia, terutama golongan miskin dan B40 akan diberi perhatian dan memperoleh manfaat ekonomi yang sama rata. Ia juga merupakan usaha yang berterusan bagi mewujudkan sebuah masyarakat yang lebih adil dan sejahtera dan seterusnya mampu memulihkan semula ekonomi Negara. Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB DATO' ABDUL KHALIB BIN ABDULLAH
(ROMPIN)**

SOALAN

DATO' ABDUL KHALIB BIN ABDULLAH [ROMPIN] minta **MENTERI KERJA RAYA** menyatakan apakah langkah-langkah yang telah diambil oleh pihak Kementerian untuk mengatasi masalah kerosakan kecil pada permukaan jalan raya di laluan tanpa tol pada ketika ini terutama waktu musim hujan yang tidak menentu di seluruh negara.

JAWAPAN

Tuan Yang Di-Pertua,

Untuk makluman Ahli Yang Berhormat, kerosakan kecil yang sering berlaku pada permukaan jalan raya kebiasaannya adalah kewujudan *pothole*. *Pothole* bermaksud lubang di permukaan jalan berukuran tidak kurang 200mm garis pusat (tidak melebihi 1000mm) dan tidak kurang 25mm dalam.

JKR sentiasa mengambil tindakan proaktif dan segera dalam menangani masalah jalan-jalan berlubang. Bagi aduan *pothole*, JKR Daerah akan memastikan aduan tersebut ditangani dalam tempoh 24 jam yang mana kerja-kerja baik pulih akan dilaksanakan oleh kontraktor konsesi yang dilantik. Ia selaras dengan Piagam Pelanggan JKR bagi menampal *pothole* dalam tempoh 24 jam selepas aduan diterima. Sepanjang tahun 2022, sebanyak 65,072 (8519 di Semenanjung, 56,553 di Sarawak Sabah Labuan) *pothole* telah ditampal oleh pihak konsesi dalam tempoh 24 jam. Selain itu, rondaan rutin sentiasa dilakukan melibatkan JKR Daerah dan konsesi bagi memantau keadaan sebenar di tapak sebanyak 2 kali seminggu bagi setiap laluan.

Di samping itu, JKR juga telah memberikan kelulusan kepada beberapa produk *All Weather Coldmix* bagi memastikan kerja-kerja penampalan *pothole* juga dapat dilaksanakan ketika cuaca hujan. Pihak kementerian sentiasa komited bagi memastikan jalan berada dalam keadaan yang baik dan selamat kepada semua pengguna jalan raya.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB DATO' ABDUL KHALIB BIN ABDULLAH
(ROMPIN)**

SOALAN

DATO' ABDUL KHALIB BIN ABDULLAH [ROMPIN] minta **MENTERI KERJA RAYA** menyatakan adakah pihak Kementerian mempunyai perancangan untuk menambah baik kualiti penyelenggaraan jalanraya tanpa tol (Resurface) yang menghubungkan bandar-bandar utama dalam negara dalam jangka masa 5 tahun yang akan datang.

JAWAPAN

Tuan Yang Di-Pertua,

Untuk makluman Ahli Yang Berhormat, bermula tahun 2022 pihak kementerian telah melaksanakan kerja-kerja penyenggaraan jalan secara *Performance Based Contract* (PBC) di beberapa Laluan Persekutuan di Semenanjung Malaysia. PBC akan dijadikan projek perintis bagi menggantikan Kontrak Penyenggaraan Jalan-Jalan Persekutuan di Semenanjung Malaysia. Pelaksanaan PBC ini dapat membantu kementerian dalam mengukur prestasi perkhidmatan yang disampaikan oleh syarikat yang dilantik bagi memastikan jalan raya yang lebih berkualiti untuk keselamatan dan keselesaan pengguna.

Buat masa ini, pelaksanaan kontrak ini dihadkan kepada laluan persekutuan FT001, FT003 dan FT005 di zon selatan Semenanjung Malaysia berdasarkan kelulusan yang diperolehi dari Jemaah Menteri.

Melalui pelaksanaan kontrak secara PBC, kualiti turapan bukan sahaja dapat dinilai berdasarkan pematuhan spesifikasi yang ditetapkan, malah aspek keselesaan pemanduan turut dinilai berdasarkan pematuhan terhadap *International Roughness Index* (IRI) yang telah ditetapkan. Kerja turapan yang telah dilaksanakan juga terikat dengan jaminan kualiti selama 24 bulan dari tarikh tamat kontrak selain jaminan reka bentuk selama 5 tahun.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' HAJI ABDUL KHALIB BIN ABDULLAH
[ROMPIN]**

SOALAN

DATO' HAJI ABDUL KHALIB BIN ABDULLAH [ROMPIN] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah langkah-langkah yang telah diambil oleh pihak Kementerian untuk memastikan pencemaran udara dari asap-asap kilang yang dilepaskan di udara oleh kilang-kilang yang beroperasi adalah pada nisbah selamat kepada penduduk penduduk yang tinggal berhampiran dengan kilang-kilang tersebut.

JAWAPAN

Tuan Yang di-Pertua,

1. Di bawah Akta Kualiti Alam Sekeliling 1974 (Akta 127), mana-mana kilang yang melepaskan atau berupaya melepaskan asap (pencemar udara) ke ruang udara adalah tertakluk kepada Peraturan-Peraturan Kualiti Alam Sekeliling (Udara Bersih) 2014.
2. Di bawah Peraturan ini, kilang-kilang adalah bertanggungjawab untuk mereka bentuk, membina, mengendali dan menyenggara sistem kawalan pencemaran udara yang berupaya merawat pencemar udara yang dihasilkan dan sebarang pelepasan ke udara hendaklah mematuhi had nilai batas dan standard teknikal yang ditetapkan di bawah Peraturan tersebut. Premis juga perlu menjalankan pemantauan dan mengemukakan laporan pelepasan pencemar udara secara berkala kepada Jabatan Alam Sekitar (JAS) bagi memastikan pelepasan mematuhi had nilai batas dan standard teknikal di bawah Peraturan tersebut.
3. Dalam hal ini, langkah-langkah tambahan yang telah diambil untuk memastikan pencemaran udara dari asap-asap kilang yang dilepaskan di udara oleh kilang kilang yang beroperasi adalah pada nisbah selamat kepada penduduk penduduk yang tinggal berhampiran dengan kilang-kilang tersebut adalah seperti berikut:
 - i) pembangunan dan penempatan kilang-kilang hendaklah mematuhi Rancangan Struktur Negeri dan Rancangan Tempatan Daerah yang telah ditetapkan. Penempatan tersebut telah mengambil kira keperluan zon penampakan yang selamat antara kawasan perindustrian dan kawasan perumahan. Walaubagaimanapun, kelulusan akhir sesuatu pembinaan kilang adalah tertakluk keputusan Pihak Berkuasa Tempatan (PBT) yang berkenaan; dan
 - ii) bagi projek-projek pembinaan kilang yang tertakluk kepada Perintah Kualiti Alam Sekeliling (Aktiviti yang Ditetapkan)

(Penilaian Kesan kepada Alam Sekeliling) 2015, penggerak projek perlu mengemukakan Laporan Penilaian Kesan Kepada Alam Sekeliling (*Environmental Impact Assessment* - EIA). Kajian EIA ini perlu merangkumi langkah-langkah kawalan kepada impak alam sekitar serta pemodelan pelepasan pencemar udara yang memperincikan impak projek kepada persekitaran.

4. Kementerian melalui JAS akan sentiasa menjalankan penguatkuasaan dan pemantauan secara berkala kepada premis-premis yang tertakluk kepada Akta 127. Sebarang ketidakpatuhan akan diambil tindakan tegas di bawah perundangan tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' HAJI ABDUL KHALIB BIN ABDULLAH
[ROMPIN]**

SOALAN

DATO' HAJI ABDUL KHALIB BIN ABDULLAH [ROMPIN] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan adakah pihak Kementerian mempunyai perancangan jangka panjang untuk menjalankan pemeriksaan berkala pada sungai-sungai dan tali air yang menjadi antara penyebab utama limpahan air hujan yang boleh menyebabkan banjir kilat bila berlaku hujan lebat di seluruh negara.

JAWAPAN

Tuan Yang Di-Pertua,

1. NRECC melalui JPS memberi perhatian secara khusus dalam mitigasi jangka pendek dan sederhana untuk mengurangkan risiko banjir di bawah Projek Pemuliharaan Sungai Untuk Mengurangkan Risiko Banjir akibat daripada limpahan sungai di seluruh negara.
2. Sehubungan itu, JPS sedang melaksanakan kerja-kerja Pemuliharaan Sungai Untuk Mengurangkan Risiko Banjir dengan kos berjumlah RM390 juta di bawah Rancangan Malaysia Ke-12. Projek ini melibatkan skop kerja-kerja pengaluran sungai, menstabilkan tebing sungai serta menaiktaraf saluran dan struktur berkaitan bagi meningkatkan kualiti air sungai.
3. Pembahagian peruntukan bagi seluruh negara seperti berikut:

Bil.	Negeri	Peruntukan RMKe-12 (RM)
1	Perlis	6,000,000.00
2	Kedah	26,000,000.00
3	PLSM	8,000,000.00
4	Perak	28,000,000.00
5	Pulau Pinang	14,000,000.00
6	Selangor	20,000,000.00
7	Negeri Sembilan	14,000,000.00
8	Melaka	10,000,000.00

NO SOALAN : 134

9	Johor	36,000,000.00
10	Pahang	36,000,000.00
11	Terengganu	20,000,000.00
12	Kelantan	24,000,000.00
13	Sabah	31,000,000.00
14	Sarawak	35,000,000.00
15	Kuala Lumpur	75,000,000.00
16	Labuan	6,000,000.00
17	Putrajaya	1,000,000.00
Jumlah Keseluruhan		390,000,000.00

Sekian, terima kasih

PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS

PERTANYAAN : BUKAN LISAN

DARIPADA : DATO' HAJI ABDUL KHALIB BIN ABDULLAH
[ROMPIN]

SOALAN

Minta **Perdana Menteri** menyatakan adakah pihak Kementerian mempunyai perancangan jangka panjang dalam latihan pembangunan insan ke arah melahirkan generasi-generasi pemimpin muda (Islam) yang celik ilmu dan mempunyai personaliti unggul (*Towering Personality*) sebagai bakal pemimpin yang bersesuaian dengan aspirasi perjuangan agama, bangsa dan tanah air.

JAWAPAN

**YB SENATOR DATO' SETIA DR. HAJI MOHD NAI'IM BIN HAJI
MOKHTAR
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. JAKIM telah melaksanakan program MyInsaniah yang merupakan usaha bagi memantapkan program penghayatan Islam dalam kalangan remaja dan belia. Program ini dilaksanakan oleh JAKIM dengan kerjasama Kementerian Pendidikan Malaysia, Jabatan Pendidikan Negeri, Majlis Agama Islam Negeri dan Jabatan Agama Islam Negeri (JAIN).
2. Program ini mempunyai tiga modul mengikut kategori iaitu Modul Jati Diri, Modul Kepimpinan dan Modul Citra Malaysia (kenegaraan). Objektif utama program ini adalah untuk membangunkan belia yang memiliki daya kepimpinan Islam yang berteraskan Ihsan dan Qawiyyul Amin sebagai persiapan untuk menjadi pemimpin masa depan negara; meningkatkan penghayatan Islam kepada golongan belia agar taat dan istiqamah dalam menyempurnakan tuntutan Islam sebagai al-Din serta melahirkan belia dan modal insan yang kompeten, berintegriti, berketerampilan dan memiliki jati diri yang kukuh melalui peningkatan kemahiran insaniah.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SERI AMIRUDIN BIN SHARI
[GOMBAK]**

SOALAN

DATO' SERI AMIRUDIN BIN SHARI [GOMBAK] minta **MENTERI PENDIDIKAN** menyatakan jumlah graduan bidang TVET dari tahun 2018 sehingga 2023 mengikut bidang latihan yang telah mereka lalui. Berapakah daripada graduan ini sudah memperolehi pekerjaan dalam bidang latihan tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menghasilkan graduan TVET KPM yang berkualiti serta mempunyai kebolehpasaran (*marketability*), kebolehkerjaan (*workability*) dan kebolehgajian (*employability*) yang tinggi untuk memenuhi keperluan revolusi perindustrian. Jumlah bilangan keluaran graduan TVET KPM dan yang memperolehi pekerjaan mengikut bidang yang dipelajari dari tahun 2018 hingga 2021 adalah seperti berikut:

Bil.	Bidang	Bil. Graduan 2018 – 2021	Bil. Graduan 2018 – 2021 Yang Bekerja Dalam Bidang
1	Teknologi Mekanikal dan Pembuatan	14,043	7,330
2	Teknologi Elektrik dan Elektronik	9,800	4,766
3	Perniagaan	9,341	5,107
4	Hospitaliti	4,628	2,801
5	Perkhidmatan Masyarakat	664	427
6	Teknologi Awam	3,607	1,481
7	Teknologi Maklumat	2,373	870
8	Seni Reka	2,085	1,048
9	Pertanian	933	302
10	Pembuatan dan Pemprosesan	533	288

Untuk makluman Ahli Yang Berhormat, data graduan KV bagi tahun 2022 hanya akan diperolehi enam bulan selepas murid bergraduat iaitu pada bulan Mac 2023.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

**PERTANYAAN : BUKAN LISAN
DARIPADA : DATO' SERI AMIRUDIN BIN SHARI
[GOMBAK]**

SOALAN

DATO' SERI AMIRUDIN BIN SHARI [GOMBAK] minta **MENTERI KEWANGAN** menyatakan kategori pencarum KWSP berdasarkan wang simpanan terkini. Berapakah daripada pencarum ini di dalam kategori terdedah akibat duit caruman yang tidak mencukupi menjelang umur persaraan mereka.

JAWAPAN

Seperti mana yang dibangkitkan oleh Yang Berhormat, tahap simpanan ahli KWSP adalah rendah dan sangat membimbangkan terutamanya setelah pelaksanaan empat (4) pengeluaran berkaitan Covid-19 iaitu i-Lestari, i-Sinar, i-Citra dan Pengeluaran Khas. Secara keseluruhannya, sebanyak RM145 bilion telah dikeluarkan oleh seramai 8.1 juta ahli di bawah keempat-empat program pengeluaran ini.

Selain impak daripada pengeluaran-pengeluaran tersebut, antara faktor-faktor lain yang turut menyumbang kepada jumlah simpanan persaraan yang rendah ialah tahap gaji yang rendah, caruman yang tidak konsisten, pengeluaran pra-persaraan daripada Akaun 2 dan kadar kesedaran perancangan persaraan serta celik kewangan yang rendah.

Status terkini tahap simpanan ahli KWSP

Setakat 31 Disember 2022, seramai 6.7 juta ahli iaitu 51% daripada 13.1 juta ahli berumur di bawah 55 tahun mempunyai simpanan sebanyak RM10 ribu atau kurang. Daripada jumlah ini, seramai 1.7 juta atau 26% adalah ahli berumur 40 tahun dan ke atas, iaitu golongan yang bakal mencapai umur pengeluaran penuh simpanan KWSP dalam masa 15 tahun dan kurang. Bagi kumpulan ini, simpanan KWSP mereka hanya boleh memberikan pendapatan persaraan kurang daripada RM42 sebulan untuk tempoh 20 tahun.

Jadual 1: Pecahan ahli berumur di bawah 55 tahun mengikut tahap simpanan dan julat umur setakat 31 Disember 2022

Julat Umur		Simpanan RM10 ribu atau kurang	Simpanan melebihi RM10 ribu	Jumlah
Kurang daripada tahun	30	3.2 juta (75% daripada kumpulan umur)	1.0 juta (25% daripada kumpulan umur)	4.2 juta

Julat Umur	Simpanan RM10 ribu atau kurang	Simpanan melebihi RM10 ribu	Jumlah
30 hingga 39 tahun	1.8 juta (44% daripada kumpulan umur)	2.3 juta (56% daripada kumpulan umur)	4.1 juta
40 hingga 54 tahun	1.7 juta (36% daripada kumpulan umur)	3.1 juta (64% daripada kumpulan umur)	4.8 juta
Jumlah	6.7 juta	6.4 juta	13.1 juta

Setakat 31 Disember 2022, hanya 19% daripada ahli KWSP mencapai tahap Simpanan Asas mengikut umur bagi membolehkan ahli mempunyai simpanan RM240,000 pada usia 55 tahun. Ini secara langsung menunjukkan bahawa 81% ahli berumur 55 tahun dan ke bawah berada dalam situasi yang serius di mana jumlah simpanan mereka tidak cukup untuk bersara melebihi paras kemiskinan. Jika dilihat pencapaian bagi ahli aktif formal pula, 30% daripada ahli aktif formal yang mencarum telah mencapai tahap Simpanan Asas mengikut umur.

Melihat kepada perspektif ahli yang bakal mencapai umur pengeluaran penuh KWSP dalam tempoh setahun iaitu ahli yang berumur 54 tahun, seramai 155 ribu atau 56% daripada 275 ribu ahli dalam kumpulan umur ini mempunyai simpanan sebanyak RM50 ribu atau kurang. Jumlah RM50 ribu ini hanya boleh memberikan pendapatan persaraan sekitar RM208 sebulan untuk tempoh 20 tahun.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS 2023**

PERTANYAAN : BERTULIS
DARIPADA : DATO` SERI AMIRUDIN BIN SHARI
[GOMBAK]

SOALAN

YB DATO' SERI AMIRUDIN BIN SHARI [GOMBAK] minta **KEMENTERIAN PERDAGANGAN ANTARABANGSA DAN INDUSTRI** menyatakan jumlah pelaburan serta jumlah syarikat antarabangsa yang telah melabur di Malaysia khusus dalam bidang terkait dengan TVET.

JAWAPAN

Tuan Yang di-Pertua,

Sektor pendidikan swasta telah memberi sumbangan besar dalam melengkapkan usaha Kerajaan ke arah menyediakan akses kepada pendidikan berkualiti. Selaras dengan hasrat ini, Kerajaan telah membangunkan pelan strategik yang dinamakan “*Malaysia Education Blueprint 2015 - 2025 (Higher Education)*”, menumpukan transformasi institusi pengajian tinggi Malaysia kepada institusi bertaraf dunia termasuk institusi latihan pendidikan teknikal dan vokasional (TVET).

Seterusnya, Kerajaan telah mengenalpasti dan memfokuskan kepada institusi TVET swasta dan institusi pengajian tinggi swasta (PHEI) sebagai sektor yang boleh merangsang pembangunan industri dan perkhidmatan tersebut di Malaysia, sekaligus dapat menyumbang ke arah menjadikan Malaysia sebagai hab kecemerlangan pendidikan serantau.

Di bawah Pelan Transformasi Pendidikan Vokasional yang diperkenalkan pada tahun 2012 dan Rancangan Malaysia Ke-12 (RMKe-12), Kerajaan mengiktiraf TVET sebagai sebahagian daripada pendidikan arus perdana di negara ini. Bagi mencapai status sebuah negara berpendapatan tinggi, lebih ramai graduan TVET yang berkemahiran dan

berdaya tahan masa depan diperlukan untuk menyertai sektor gunatenaga tersebut.

Bagi mempromosi PHEI dan TVET swasta berkualiti tinggi, Kerajaan melalui MIDA menawarkan galakan Elaun Cukai Pelaburan di bawah Akta Penggalakan Pelaburan, 1986 sebanyak 100 peratus daripada perbelanjaan modal yang layak dalam tempoh 10 tahun, dan boleh ditolak sehingga 70 peratus daripada pendapatan berkanun bagi setiap tahun taksiran.

Bermula tahun 1996 sehingga 2022, bilangan projek yang telah diluluskan galakan oleh MIDA untuk menubuhkan institusi TVET termasuk penyertaan pelabur asing di Malaysia adalah sebanyak 53 projek dengan nilai yang berjumlah RM2.12 bilion. Dengan amaun tersebut, pelaburan tempatan adalah sebanyak RM1.88 bilion (89 peratus) manakala pelaburan asing adalah sebanyak RM 233,848,541 (11 peratus). Pelabur-pelabur asing yang telah terlibat dalam penubuhan TVET adalah dari Australia, Itali, Perancis, Kanada, United Kingdom dan India.

Projek yang diluluskan telah mewujudkan sebanyak 2,987 peluang pekerjaan dalam negara. Antara bidang kursus yang ditawarkan adalah berkaitan dengan penerbangan, mesin dan peralatan, perubatan serta kejuruteraan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : DATO' SERI AMIRUDIN BIN SHARI
[GOMBAK]

SOALAN

DATO' SERI AMIRUDIN BIN SHARI [GOMBAK] minta **MENTERI KEWANGAN** menyatakan jumlah pemberian Persekutuan kepada negeri-negeri dari tahun 2018 sehingga 2022.

JAWAPAN

Tuan Yang di-Pertua,

Pemberian Kerajaan Persekutuan kepada Kerajaan Negeri disediakan berdasarkan peruntukan yang termaktub di dalam Perlembagaan Persekutuan, undang-undang serta Akta, keputusan Mesyuarat Jemaah Menteri (MJM) dan juga keputusan Mesyuarat Majlis Kewangan Negara (MkewN). Pemberian-pemberian ini disediakan secara geran tahunan dan disalurkan terus kepada Kerajaan Negeri masing-masing.

Jumlah pemberian Kerajaan Persekutuan kepada negeri-negeri untuk tempoh lima (5) tahun mulai 2018 hingga 2022 adalah seperti berikut :

Tahun	Jumlah Pemberian (RM Juta)
2018	7,338.33
2019	7,589.66
2020	7,703.15
2021	7,638.08
2022	7,791.90

Kerajaan Persekutuan sentiasa memastikan peruntukan yang diterima oleh negeri-negeri meningkat pada setiap tahun dengan mengambil kira kedudukan dan kemampuan kewangan semasa Kerajaan Persekutuan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : DATO' SERI AMIRUDIN BIN SHARI [GOMBAK]

SOALAN

DATO' SERI AMIRUDIN BIN SHARI [GOMBAK] minta **MENTERI PERTANIAN DAN KETERJAMINAN MAKANAN** menyatakan senarai setiap barang makanan yang dikategorikan sebagai keperluan asas dan keterjaminan makanan berdasarkan keperluan tahunan seluruh negara.

JAWAPAN

Pihak kementerian telah menyenaraikan lapan (8) komoditi utama iaitu beras, ayam, telur ayam, daging lembu/kerbau, sayur, buah dan ikan yang merupakan keperluan asas yang pantau secara berterusan.

Keperluan bagi komoditi tersebut boleh diukur melalui Penggunaan Per Kapita (*Per Capita Consumption* - PCC) yang merujuk kepada jumlah penggunaan setiap penduduk dalam tempoh setahun. PCC tahun 2021 bagi komoditi terpilih adalah seperti berikut:

Bil	Komoditi	Nilai PCC
i	Beras	79.0 kg
ii	Telur Ayam	342.6 biji
iii	Daging Ayam	46.1 kg
iv	Daging Lembu/Kerbau	5.5 kg

Daripada nilai PCC ini, dianggarkan purata keperluan tahunan negara tahun 2021 ialah: beras 2.4 juta tan metrik, telur ayam sebanyak 11.6 bilion biji, ayam sebanyak 1.5 juta tan metrik dan daging sebanyak 229 ribu tan metrik.

SOALAN NO : 140

Kemampuan negara untuk memenuhi keperluan domestik melalui pengeluaran tempatan pula diukur melalui kadar sara diri (*Self-Sufficiency Ratio* - SSR). Pencapaian SSR tahun 2021 bagi komoditi terpilih adalah seperti berikut:

Bil	Komoditi	Kadar SSR
i	Beras	65.0 %
ii	Telur Ayam	114.4%
iii	Daging Ayam	99.9%
iv	Daging Lembu/Kerbau	18.9%

Walau bagaimanapun, keterjaminan makanan boleh dipenuhi sama ada melalui pengeluaran tempatan atau sumber import. Sumber import ini diperlukan kerana terdapat komoditi makanan yang tidak dapat dihasilkan secara domestik antaranya disebabkan oleh faktor kesesuaian iklim, tidak ekonomik, kekangan sumber tanah dan tenaga kerja.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATUK HAJI IDRIS BIN AHMAD
[BAGAN SERAI]**

SOALAN

DATUK HAJI IDRIS BIN AHMAD [BAGAN SERAI] minta **MENTERI
PERTANIAN DAN KETERJAMINAN MAKANAN** menyatakan
langkah-langkah Kerajaan untuk membantu pesawah padi yang
terpaksa menanggung beban kenaikan harga baja dan racun.

JAWAPAN

Tuan Yang Di Pertua,

Untuk makluman Ahli Yang Berhormat, Kerajaan amat perihatin akan beban yang ditanggung oleh pesawah berikutan peningkatan kos bahan mentah yang memberi kesan terhadap kenaikan kos input pertanian dan pendapatan pesawah.

Bagi meringankan beban pesawah akibat kenaikan kos ini, Kerajaan telah menaikkan kadar bantuan bersubsidi racun makhluk perosak di bawah program Skim Insentif Pengeluaran Padi (SIPP) daripada RM200/hektar per musim kepada RM300/hektar per musim pada tahun 2022 secara *one-off*. Kenaikan kadar ini melibatkan implikasi kewangan tambahan sebanyak RM62 juta. Kementerian Pertanian dan Keterjaminan Makanan (KPKM) juga kini sedang berusaha untuk mengekalkan kadar baharu ini bagi tahun 2023 dan tahun-tahun seterusnya namun ianya tertakluk kepada kelulusan Kementerian Kewangan (MOF) dan kedudukan kewangan semasa.

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DATUK HAJI IDRIS BIN AHMAD
[BAGAN SERAI]**

SOALAN

**Datuk Haji Idris bin Ahmad [Bagan Serai] minta MENTERI
KOMUNIKASI DAN DIGITAL menyatakan :**

- (a) bilangan pengguna akaun *Facebook*, *TikTok*, *Instagram*, dan *Whatsapp* sehingga Disember 2022; dan
- (b) berapakah jumlah akaun *TikTok* yang telah diambil tindakan dan nyatakan sebab-sebabnya.

JAWAPAN

Tuan Yang di-Pertua,

Berdasarkan kaji selidik yang dibuat oleh *Data Reportal*, bilangan pengguna sehingga 2022 bagi Facebook adalah seramai 21.7 juta orang, Instagram seramai 15.5 juta orang dan *TikTok* adalah seramai 14.6 juta orang. Untuk *WhatsApp*, tiada data yang tersedia secara umum yang memfokuskan kepada Malaysia. Namun, laporan daripada Statista menyatakan bahawa *WhatsApp* mempunyai dua bilion jumlah pengguna secara global.

Dalam hal ini, khusus bagi *TikTok* yang berpangkalan di Amerika Syarikat, dari tahun 2020 sehingga Januari 2023, sebanyak 346 permohonan untuk menurunkan atau memadamkan kandungan telah dibuat oleh Suruhanjaya Komunikasi dan Multimedia Malaysia (SKMM) kepada *TikTok* dan daripada jumlah tersebut sebanyak 325 kandungan (94%) telah diturunkan. Dalam masa yang sama, sejumlah 23 kertas siasatan telah dibuka oleh SKMM di bawah Seksyen 233 Akta Komunikasi dan Multimedia 1998 [Akta 588]. Daripada jumlah tersebut, sebanyak dua kes telah diberikan surat amaran, manakala 21 kes sedang dalam siasatan.

Kandungan dan akaun yang diambil tindakan termasuk penurunan kandungan adalah disebabkan oleh pelanggaran semua undang-undang sedia ada, termasuklah menyalahgunakan platform-platform berkenaan untuk menyebarkan kandungan yang bersifat lucah, sumbang, palsu, mengancam atau jelik sifatnya seperti mana yang diperuntukkan di bawah Seksyen 233 Akta 588.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN**

PERTANYAAN : BERTULIS

**DARIPADA : DATUK HAJI IDRIS BIN AHMAD
[BAGAN SERAI]**

SOALAN

DATUK HAJI IDRIS BIN AHMAD [BAGAN SERAI] minta **MENTERI KESIHATAN** menyatakan berapakah jumlah doktor pelatih yang telah berhenti dan tidak sempat menamatkan latihan daripada tahun 2020 sehingga 2022.

JAWAPAN

Tuan Yang di-Pertua,

1. Berdasarkan rekod Kementerian Kesihatan (KKM), seramai 1,732 Pegawai Perubatan Siswazah telah meletak jawatan sebelum menamatkan latihan siswazah pada tahun 2020 - 2022. Bilangan meletak jawatan mengikut tahun adalah seperti berikut:

- (i) 2020: 544 orang;
- (ii) 2021: 768 orang; dan
- (iii) 2022: 420 orang.

2. Manakala dari tahun 2020 hingga 2022, seramai 4,276 orang pegawai perubatan lantikan tetap dan kontrak KKM mengikuti pengajian kepakaran di bawah tiga (3) program iaitu Program Latihan Kepakaran Pengurusan & Profesional, Program Sarjana Perubatan dan Program Parallel Pathway di bawah tajaan KKM. Daripada jumlah tersebut, seramai 185 orang pegawai perubatan lantikan tetap dan kontrak KKM gagal menamatkan pengajian kepakaran.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGKAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : DATUK HAJI IDRIS BIN AHMAD
[BAGAN SERAI]**

SOALAN

DATUK HAJI IDRIS BIN AHMAD [BAGAN SERAI] minta **MENTERI KESIHATAN** menyatakan status pembinaan Hospital Bagan Serai dan bilakah ianya dijangka akan siap dan boleh digunakan sepenuhnya.

JAWAPAN

Tuan Yang di-Pertua,

1. Projek Pembinaan Hospital Bagan Serai, Perak telah diluluskan di bawah Rolling Plan Ketiga, RMK-10 dengan kos sebanyak RM173.35 juta. Kerja-kerja pembinaan telah dimulakan pada 2 Januari 2018 dengan tarikh jangka siap asal pada 28 Disember 2020.
2. Namun demikian, atas sebab-sebab yang tidak dapat dielakkan termasuk aspek reka bentuk dan penangguhan kerja akibat Perintah Kawalan Pergerakan (PKP) semasa pandemik COVID-19, projek ini telah diberikan lanjutan tempoh masa (EOT) dan tarikh jangka siap semasa adalah pada 13 November 2023.
3. Sehingga Januari 2023, kemajuan fizikal projek ini telah mencapai 73% berbanding jadual sebanyak 74% iaitu kelewatan sebanyak 1% iaitu bersamaan 25 hari. Projek ini dijangka dapat disiapkan mengikut jadual dan mula beroperasi secara berperingkat mulai bulan Januari 2024.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS 2023**

PERTANYAAN : BUKAN LISAN

**DARIPADA : YB DATUK HAJI IDRIS BIN AHMAD
[BAGAN SERAI]**

SOALAN

DATUK HAJI IDRIS BIN AHMAD [BAGAN SERAI] minta **MENTERI PELANCONGAN, SENI DAN BUDAYA** menyatakan jumlah pelancong dari China yang datang ke Malaysia sejak negara itu membuka sempadan dan apakah tindakan Kerajaan bagi memastikan agar virus COVID-19 tidak merebak di negara kita.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Pelancong dari negara China merupakan salah satu pasaran utama kepada ketibaan pelancong asing ke Malaysia. Bagi tahun 2019, sebanyak 3,114,257 orang pelancong telah direkodkan dan menduduki tangga ketiga dalam senarai penyumbang pelancong asing ke Malaysia selepas Singapura dan Indonesia.
2. Untuk makluman Yang Berhormat, pada 20 Januari 2023, Kementerian Pelancongan Dan Budaya Republik Rakyat China telah mengumumkan kebenaran ke luar negara bagi tujuan melancong bermula 6 Februari 2023. Pergerakan warga China ke Malaysia sebelum ini hanyalah melibatkan *essential movements* dan pergerakan dari memasuki negara lain.
3. Selain itu, sebagai persediaan menerima pelancong dari negara China, Malaysia Airport Berhad (MAB) telah menyediakan kaunter dan petugas khas yang fasih berbahasa Mandarin di KLIA bagi membantu proses memasukkan pelancong-pelancong dari negara tersebut. Inisiatif ini akan dapat menonjolkan sifat mesra Malaysia dalam mengalu-alukan kedatangan pelancong dari China.
4. Bagi data ketibaan pelancong, Jabatan Imigresen Malaysia (JIM) masih lagi dalam proses mengeluarkan data ketibaan pelancong ke Malaysia dan Tourism Malaysia akan memproses data tersebut berdasarkan maklumat yang diterima dari pihak JIM.
5. Namun begitu, untuk makluman bersama, Malaysia telah pun merekodkan ketibaan pelancong dari negara China seramai 212,630 orang bagi tahun 2022.

6. Pihak Kementerian Kesihatan Malaysia (KKM) menerusi kenyataan media pada 1 Ogos 2022 lalu telah memaklumkan agar semua pengembara yang memasuki Malaysia tidak lagi perlu mengisi dan melengkapkan Kad Pengembara yang terdapat di dalam aplikasi MySejahtera. Pada masa yang sama, KKM sentiasa mempergiatkan aktiviti pemantauan gejala dikalangan pengembara di semua pintu-pintu masuk antarabangsa ke Malaysia.

7. Sekiranya pengembara didapati bergejala, mereka akan dirujuk kepada pihak kesihatan untuk pemeriksaan dan rawatan lanjut. Kebiasaannya, di Hospital Sungai Buloh. Sehubungan itu, pengembara yang tiba dari luar negara hendaklah mengamalkan pemantauan status kesihatan, serta mematuhi SOP yang telah ditetapkan sepanjang tempoh berada di Malaysia.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB DATUK SERI DR. DZULKEFLY BIN AHMAD
[KUALA SELANGOR]**

SOALAN

Datuk Seri Dr. Haji Dzulkefly bin Ahmad [Kuala Selangor] minta **MENTERI DALAM NEGERI** menyatakan akan status permohonan balai polis dan balai bomba untuk Bandar Puncak Alam, Alam Jaya dan Alam Perdana.

JAWAPAN

Tuan Yang Di Pertua,

Buat masa ini, perancangan untuk membina Balai Polis Puncak Alam telah disenaraikan dalam Pelan Tindakan Pembangunan Strategik PDRM (PSPDRM) tahun 2021 hingga 2025. Namun pihak Kementerian dan Polis Diraja Malaysia (PDRM) akan mempertimbangkan pembinaan kemudahan ini dalam *Rolling Plan* yang akan datang.

Bagi status pembinaan Balai Bomba Puncak Alam, ianya bukan di bawah bidang kuasa Kementerian ini dan perlu diajukan kepada Kementerian Pembangunan Kerajaan Tempatan.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGKAL KEDUA,
PARLIMEN KELIMA BELAS**

PERTANYAAN : BUKAN LISAN

DARIPADA : DATUK SERI DR. HAJI DZULKEFLY BIN AHMAD [KUALA SELANGOR]

SOALAN

Datuk Seri Dr. Haji Dzulkefly bin Ahmad [Kuala Selangor] minta **MENTERI KOMUNIKASI DAN DIGITAL** menyatakan tentang langkah-langkah untuk mengatasi servis internet yang lemah di beberapa kawasan kampung dan juga bandar sekitar Puncak Alam.

JAWAPAN

Tuan Yang di-Pertua,

Bagi mengatasi masalah servis internet yang lemah, terdapat sembilan menara baharu yang dibina termasuk tujuh menara baharu yang berada di dalam DUN Jeram. Sebanyak enam menara telah pun siap beroperasi iaitu di Kuala Selangor, Tesco Puncak Alam, Taman Tiaj, Alam Suria, Eco Grandeur A dan Desa Coalfields East manakala sebuah menara di kawasan Kampung Bukit Hijau masih dalam peringkat pelaksanaan.

Selain itu, sebanyak 90 buah stesen pemancar telah siap dinaik taraf di kawasan DUN Jeram. Kesemua inisiatif yang sedang dalam peringkat pelaksanaan dijangka akan siap sepenuhnya pada suku keempat 2023.

Untuk makluman Ahli Yang Berhormat, terdapat 82 lokasi yang dirancang bagi pembangunan rangkaian 5G pada tahun 2023 di daerah Kuala Selangor. Melalui Digital Nasional Berhad (DNB), kerja-kerja perancangan dan juga lawatan tapak telah pun dimulakan. Pelaksanaan

pembangunan ini akan mengurangkan risiko peluasan jurang digital dalam masyarakat bandar dan luar bandar serta meningkatkan capaian internet di kawasan tersebut.

Kementerian Komunikasi dan Digital (KKD) melalui Suruhanjaya Komunikasi dan Multimedia Malaysia (SKMM) sedang mengambil segala usaha bagi mempercepatkan pembinaan menara namun beberapa cabaran dihadapi antaranya mendapatkan kelulusan permit yang dikeluarkan pihak berkaitan seperti Pihak Berkuasa Negeri (PBN) dan Pihak Berkuasa Tempatan (PBT).

Bagi mengatasi cabaran-cabaran yang seterusnya, peranan pihak *One Stop Agency (OSA)* selaku pemudahcara juga perlu dipertingkatkan dalam memastikan permohonan pembangunan infrastruktur telekomunikasi di negeri Selangor dapat dilaksanakan dengan lebih lancar.

Kerjasama serta komitmen agensi-agensi di bawah Kerajaan Negeri adalah penting bagi memastikan kesemua cadangan dasar yang telah diluluskan di peringkat pusat, dapat dilaksanakan secara keseluruhannya di peringkat negeri dan PBT agar penyediaan infrastruktur digital dapat dimudahcara serta mengikut piawaian yang tertentu bagi memastikan aspirasi nasional dapat dicapai.

Selain itu, faktor bentuk muka bumi dan kedudukan geografi juga menyumbang kepada cabaran di dalam pembangunan infrastruktur telekomunikasi dan ianya berkadar secara langsung dengan kos yang perlu dilaburkan oleh syarikat penyedia perkhidmatan di sesuatu kawasan.

Sekian, terima kasih.

**PEMBERITAHUAN PERTANYAAN DEWAN NEGARA
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : LISAN

**DARIPADA : YB DATUK SERI DR. HAJI DZULKEFLY
BIN AHMAD
[KUALA SELANGOR]**

SOALAN

DATUK SERI DR. HAJI DZULKEFLY BIN AHMAD [KUALA SELANGOR] minta **MENTERI PELANCONGAN, SENI DAN BUDAYA** menyatakan bentuk bantuan dana dan sokongan yang diberikan kepada para pengusaha pelancongan bagi mempromosikan Kuala Selangor sebagai pusat pelancongan.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Kementerian Pelancongan, Seni dan Budaya Malaysia (MOTAC) sentiasa mengalu-alukan sebarang bentuk aktiviti atau pembangunan produk yang berkaitan dengan industri pelancongan di seluruh negara. Dalam konteks bantuan dana dan sokongan kepada para pengusaha pelancongan khususnya di Kuala Selangor, kementerian ada menawarkan insentif berbentuk pinjaman bagi projek pelancongan menerusi Skim Infrastruktur Pelancongan (SIP). SIP diuruskan oleh Bank Pembangunan Malaysia Berhad (BPMB) yang menawarkan skop pembiayaan seperti berikut:

- i. Pembelian tanah, pembinaan bangunan, mesin dan pelbagai aset yang berkaitan dengan pelancongan;
- ii. Modal kerja bagi syarikat yang terlibat dalam industri pelancongan; dan
- iii. Kerja-kerja pengubahsuaian dan naik taraf yang berkaitan dengan projek pelancongan.

2. Jumlah pembiayaan yang ditawarkan oleh SIP adalah bermula dari RM5 juta sehingga RM100 juta atau sehingga 80% daripada jumlah kos projek yang mana lebih rendah. Tempoh permohonan bagi SIP bermula pada 1 Januari 2021 sehingga 31 Disember 2023. Sehubungan itu, pengusaha-pengusaha pelancongan di Kuala Selangor yang berminat dan memenuhi kriteria seperti yang dinyatakan boleh memohon pembiayaan SIP ini.

3. MOTAC juga telah memperuntukkan sejumlah RM250,000 di bawah program Penyelenggaraan Kemudahan Pelancongan termasuk Pemuliharaan dan Pemeliharaan Tapak / Bangunan Warisan Tahun 2020 bagi Membaikpulih Semula Kemudahan Pontoon dan Tangga Jeti di Santuari Kelip-Kelip Kampung Kuantan, Kuala Selangor.
4. Kerajaan melalui Pembentangan Bajet 2022 pada 29 Oktober 2021 telah mengumumkan pemberian Bantuan Khas kepada lebih 20 ribu pengusaha pelancongan yang berdaftar di bawah MOTAC dengan peruntukan sebanyak RM85 juta. Bagi Negeri Selangor, seramai 207 orang pengusaha telah menerima bantuan khas ini dengan nilai keseluruhan berjumlah RM372,600.00. Homestay Sungai Semilang dan Homestay Bukit Cherakah di Kuala Selangor turut memperoleh bantuan khas kewangan ini yang berjumlah RM46,800.
5. Kementerian juga telah menyalurkan bantuan kewangan secara *one-off* menerusi inisiatif Bantuan Kewangan Tahun 2022 kepada syarikat pengendali pelancongan berlesen dengan MOTAC sebanyak RM9,000 di mana sehingga kini 628 syarikat pengendali pelancongan di Selangor telah pun menerima bantuan. Daripada jumlah tersebut, dua (2) syarikat pengendalian pelancongan di Kuala Selangor telah menerima bantuan kewangan tersebut.
6. Selain itu, Kementerian juga telah memberi beberapa kelonggaran kepada pengusaha pelancongan bagi membantu penggiat industri pelancongan termasuk di Selangor melalui inisiatif bukan kewangan seperti kelonggaran berkaitan kompaun dan kelonggaran syarat lesen kepada pengusaha pelancongan sehingga 30 September 2022.
7. Pengecualian fi pembaharuan lesen dan lesen-lesen tambahan bagi pengusaha pelancongan dan pemandu pelancong yang memohon pembaharuan lesen sehingga 31 Disember 2022 juga diberikan bagi mengurangkan beban yang terpaksa ditanggung kesan daripada wabak COVID-19.

8. Kementerian juga giat mempromosikan produk-produk pelancongan di Kuala Selangor seperti Kuala Selangor Nature Park yang merupakan antara lokasi *birdwatching* popular negara dan disenaraikan dalam brosur baharu *birdwatching* iaitu *Malaysia Birdwatching Paradise* yang mengandungi maklumat dan butiran destinasi melihat burung dan eko-pelancongan dalam negara. Risalah ini telahpun dilancarkan pada 18 Oktober 2022 lalu dan seterusnya dimuatnaik di menu e-risalah digital, laman sesawang rasmi Tourism Malaysia (TM).

9. Promosi dan publisti kepada tarikan pelancongan Kuala Selangor Nature Park turut dimuatkan di dalam laman sesawang www.birdsmalaysia.com yang telah dibangunkan oleh Tourism Malaysia bersama persatuan Eco-tourism dan Conservation Society Malaysia (ECOMY).

10. Selain daripada itu, Tourism Malaysia turut mempromosikan Kuala Selangor sebagai destinasi pelancongan minat khas homestay dan agro pelancongan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK SERI DR. HAJI DZULKEFLY BIN
AHMAD [KUALA SELANGOR]**

SOALAN

DATUK SERI DR. HAJI DZULKEFLY BIN AHMAD [KUALA SELANGOR] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan tindakan dan perancangan yang dibuat untuk mengekalkan kawasan-kawasan hutan sebagai hutan bakau simpanan khususnya di Kuala Selangor dan peranan hutan sebagai perlindungan hidupan liar dan penghadang ombak tinggi di kawasan perairan.

JAWAPAN

Tuan Yang di-Pertua,

1. Untuk makluman Ahli Yang Berhormat, sehingga tahun 2021 seluas 89,976 hektar hutan paya laut telah diwartakan sebagai Hutan Simpanan Kekal (HSK) di Semenanjung Malaysia. Keluasan hutan paya laut di negeri Selangor yang telah diwartakan sebagai HSK adalah seluas 18,998 hektar. Manakala keluasan hutan paya laut di Kuala Selangor yang melibatkan Hutan Simpan Banjar Utara, Hutan Simpan Banjar Utara Tambahan dan Hutan Simpan Kapar Tambahan pula adalah seluas 1,077.05 hektar.

2. Antara tindakan dan perancangan yang diambil oleh Kementerian melalui Jabatan Perhutanan Semenanjung Malaysia (JPMS) dalam menjaga dan memelihara hutan paya laut di Semenanjung Malaysia adalah:

(i) Melalui pelaksanaan aktiviti di bawah Program Penanaman Pokok Bakau dan Spesies-Spesies Yang Sesuai Di Pesisiran Pantai Negara yang telah dimulakan sejak tahun 2005. Sehingga 31 Disember 2022, seluas 3,278.24 hektar kawasan pesisiran pantai di seluruh negara telah ditanam dengan 7,209,896 pokok bakau dan spesies-spesies pantai yang sesuai; dan

(ii) Mengambil bahagian dalam penyediaan Rancangan Fizikal Zon Pesisiran Pantai Negara 2 (RFZPPN2) yang diterajui oleh PLANMalaysia. RFZPPN2 yang dilancarkan pada 14 Jun 2022 telah mengenal pasti dan menyenaraikan kawasan persisiran pantai tertentu di Semenanjung sebagai mempunyai kadar kerapuhan yang sangat tinggi termasuk kawasan persisiran pantai Kuala Selangor.

3. Selain itu, Kerajaan Negeri Selangor melalui Jabatan Perhutanan Negeri Selangor juga telah mengambil tindakan sewajarnya dan merancang beberapa langkah untuk memelihara serta melindungi fungsi hutan paya laut di negeri Selangor termasuk di kawasan Kuala Selangor seperti berikut:

(i) Mengenal pasti dan meluluskan seluas 331.56 hektar hutan paya laut yang berstatus tanah kerajaan untuk diwartakan sebagai HSK pada tahun 2017 dan 2019. Kawasan tersebut adalah melibatkan tanah kerajaan seluas 292.81 hektar di daerah Kuala Selangor yang juga dikenali sebagai Taman Alam Kuala Selangor untuk diwartakan sebagai Hutan Simpan Melawati. Kawasan Taman Alam Kuala Selangor ini adalah merupakan tempat persinggahan burung-burung hijrah terutamanya dari negara Rusia dan Siberia sehingga menjadikannya sebagai salah satu kawasan *Important Bird Area* (IBA). Manakala, seluas 38.75 hektar pula melibatkan kawasan hutan tanah kerajaan di daerah Klang untuk diwartakan sebagai Hutan Simpan Raja Lumu. Kawasan ini merupakan salah satu inisiatif Kerajaan Negeri untuk pembangunan lestari Sungai Klang; dan

(ii) Mempregiat dan memperkasa penguatkuasaan hutan termasuk di kawasan-kawasan *hotspot* penebangan kayu bakau secara haram. Elemen penguatkuasaan hutan amat penting dalam mencegah kehilangan hasil negeri yang amat bernilai tinggi di samping melindungi fungsi hutan paya laut ini sebagai kawalan banjir dan hakisan pantai. Khusus di Kuala Selangor, sejumlah RM5 juta daripada peruntukan pembangunan persekutuan bagi tempoh RMKe-12 telah diluluskan untuk Kerja-Kerja Menaik Taraf Pengkalan Operasi Penguatkuasaan Hutan Telok Gong, Pelabuhan Klang.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN EDWIN ANAK BANTA (SELANGAU)

SOALAN

TUAN EDWIN ANAK BANTA (SELANGAU) minta **MENTERI KEMAJUAN DESA DAN WILAYAH** menyatakan perancangan Kementerian bagi membantu masyarakat luar bandar, khususnya di Sarawak dari segi pemasaran hasil keluaran sama-ada hasil pertanian atau kraftangan mereka seperti menyediakan *collection center* atau *processing center* untuk tujuan pemasaran dalam negeri atau eksport.

JAWAPAN

Tuan Yang di-Pertua,

Untuk makluman Yang Berhormat, pada masa ini di bawah Program Desamall terdapat *outlet-outlet* Desamall atau dipanggil sebagai stor konsep telah diwujudkan di tujuh (7) lokasi di seluruh negara berfungsi sebagai pusat pameran, pusat pengumpulan, penjualan dan pemasaran produk-produk usahawan luar bandar untuk dipasarkan samada di *outlet* berkenaan atau melalui platform Desamall secara dalam talian. Tujuh (7) stor konsep Desamall sedia ada terletak di lokasi-lokasi seperti berikut:

- a. Desamall@PERDA, Pulau Pinang;
- b. Desamall@Ipoh, Perak;
- c. Desamall@Lipis, Pahang;
- d. Desamall@Mersing, Johor;
- e. Desamall@KPLB, Putrajaya;
- f. Desamall@KIMAR, Kuala Lumpur; dan
- g. Desamall@Kelana Jaya, Selangor.

Buat masa ini, Kementerian mempunyai perancangan untuk membuka sebuah Pusat Pengumpulan produk-produk usahawan Desamall di Sarawak. Pusat Pengumpulan ini bertujuan memudahkan pengumpulan produk-produk usahawan luar bandar dari Wilayah tersebut untuk dipasarkan secara dalam talian.

Untuk makluman Yang Berhormat juga, Kementerian melaksanakan Program *Outreach* Keusahawanan yang dilaksanakan menerusi penganjaran program Mini Karnival Usahawan Desa (KUD). Mini KUD yang bakal dilaksanakan di Sarawak pada tahun ini akan dapat membantu usahawan luar bandar untuk memasarkan hasil pertanian atau kraftangan menerusi jualan langsung dan juga menerusi sesi padanan perniagaan yang akan dikendalikan oleh

SOALAN NO : 150

pihak Majlis Amanah Rakyat (MARA) dengan penglibatan syarikat-syarikat *anchor* peruncit yang dibawa khusus untuk program Mini KUD tersebut.

Selain itu, Program *Rural Business Outlet* (RBO) yang dilaksanakan oleh Kementerian ini turut membantu memasarkan produk usahawan luar bandar dari Sarawak untuk kategori Makanan dan Minuman. Program RBO telah memasarkan 4 produk daripada 2 usahawan luar bandar Sarawak.

Melalui MARA juga, tindakan proaktif telah diambil dalam usaha membangunkan usahawan luar bandar termasuk di Sarawak untuk meningkatkan sosio-ekonomi masyarakat dengan memberikan latihan dan khidmat bimbingan pembangunan usahawan, penyediaan premis perniagaan dan pembiayaan perniagaan dengan memberi fokus kepada produk kraftangan yang menjadi fokus dalam *cottage industry* dengan kerjasama Perbadanan Kemajuan Kraftangan Malaysia dan *Sarawak Craft Council*. Seramai 105 usahawan Bumiputera Sarawak yang terlibat dalam industri kraftangan telah menerima kemudahan-kemudahan yang disediakan oleh MARA.

Di antaranya adalah melalui latihan pembangunan usahawan yang telah dilaksanakan pada tahun 2022 adalah seperti *Program One Stop Centre Place (Handicraft)* khusus kepada usahawan yang terlibat dalam *cottage industry* yang telah dihadiri seramai 40 usahawan Bumiputera di daerah Kapit, Sibu, Lawas dan Limbang dengan bimbingan perunding yang dilantik.

Manakala program *Embracing and Branding Digital Marketing* telah dilaksanakan melibatkan penyertaan seramai 30 orang usahawan dari daerah Bau-Lundu, Serian, Sri Aman dan Betong yang bertujuan melatih usahawan desa terutamanya pengusaha *handicraft* untuk memasarkan produk menggunakan platform digital. Pada tahun 2021, di bawah program kraftra iaitu Pembangunan Produk

SOALAN NO : 150

Kraftangan telah dilaksanakan di Sibu untuk membangunkan 20 orang pengusaha kraftangan dengan kerjasama *Malaysia Design Development Centre* (DDEC) yang merupakan syarikat subsidiari MARA.

Selain memberikan latihan dan khidmat bimbingan, MARA juga telah mengenal pasti produk-produk usahawan yang mempunyai potensi dari segi rekabentuk produk kraftangan untuk mendapatkan kemudahan di bawah Program Pensijilan Usahawan MARA iaitu geran pensijilan untuk Cap Dagangan (Trademark) daripada Perbadanan Harta Intelekt Malaysia (MyIPO). Ia merupakan inisiatif MARA untuk melindungi hak cipta dan mempromosikan jenama yang dibangunkan oleh usahawan desa.

Selain itu, kemudahan lain yang disediakan termasuk Program Pendigitalan Perniagaan MARA telah memberi manfaat kepada usahawan kraftangan di daerah Kapit, Mukah dan Sibu di mana selain memasarkan produk ke platform Shoppe, Lazada dan FB Marketplace, pemasaran produk handicraft ini juga diperluaskan ke platform Amazon dan eBay.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN FONG KUI LUN [BUKIT BINTANG]

SOALAN

YB TUAN FONG KUI LUN [BUKIT BINTANG] minta **MENTERI PEMBANGUNAN KERAJAAN TEMPATAN** menyatakan apakah tindakan Kementerian ke atas pemaju perumahan Riz Communities yang lewat menyiapkan projek perumahannya di Salak Selatan di mana para pembeli perlu menunggu tiga tahun lagi dan mereka menuntut pampasan lewat penyerahan rumah.

JAWAPAN

Untuk makluman Ahli Yang Berhormat, Kementerian Pembangunan Kerajaan Tempatan (KPKT) melalui Jabatan Perumahan Negara (JPN) telah menyenaraihitamkan pemaju dan Ahli Lembaga Pengarah Surrealist Communities Sdn. Bhd. daripada memohon Lesen Pemajuan Perumahan dan Permit Iklan dan Jualan (APDL) yang baharu selagi projek sakit sedia ada iaitu Residensi Salak Selatan belum disiapkan dengan *Certificate of Completion and Compliance* (CCC) penuh. Pemajuan ini juga telah dipaparkan di laman portal JPN kepada umum sebagai projek perumahan yang sakit. Senarai projek sakit ini boleh dijadikan panduan oleh bakal pembeli rumah dan pihak pembiaya sebelum meluluskan sesuatu pinjaman perumahan baharu dan mengawal bayaran kemajuan kepada pemaju sedia ada. Pihak pemaju juga telah diarahkan untuk mengemukakan laporan kemajuan secara bulanan kepada JPN. Berdasarkan laporan terkini yang telah dikemukakan oleh pihak pemaju sehingga 31 Januari 2023, kemajuan sebenar di tapak adalah sebanyak 62.91% berbanding 100% kemajuan sasaran.

Di samping itu, Kementerian sentiasa membuat pemantauan ke atas projek-projek sakit bagi memastikan pemaju menyiapkan projek dengan kadar segera. Kegagalan pihak pemaju untuk membuat serahan milikan kosong mengikut Perjanjian Jual Beli melayakkan pihak pembeli untuk menuntut *Liquidated Ascertain Damages* (LAD) daripada pemaju.

Kementerian melalui JPN turut mengeluarkan surat pengesahan projek bermasalah (sakit) atas permohonan pembeli kepada pihak pembiaya pinjaman untuk pengstruktur semula pinjaman. Ini adalah bagi membantu meringankan beban kewangan yang ditanggung oleh pembeli.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN FONG KUI LUN [BUKIT BINTANG]

SOALAN

TUAN FONG KUI LUN [BUKIT BINTANG] minta **PERDANA MENTERI** menyatakan tindakan mengatasi banjir kilat yang sering melanda kawasan Tiong Nam, Masjid Jamek, Jalan Sultan Abdul Samad dan lain-lain di Kuala Lumpur saban tahun agar tidak berulang lagi.

JAWAPAN

**YB DATUK SERI AZALINA OTHMAN SAID,
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, kawasan-kawasan rendah seperti Tiong Nam, Masjid Jamek, Jalan Sultan Abdul Samad dan lain-lain yang terletak di sepanjang sungai-sungai utama seperti Sungai Klang, Sungai Gombak, Sungai Batu secara amnya akan terjejas dan terkesan apabila berlaku limpahan air sungai, terutamanya semasa insiden hujan lebat berkekalan dalam tempoh panjang dan luar biasa di bahagian hulu sungai.
2. Secara amnya sungai-sungai utama di Kuala Lumpur adalah dibawah seliaan dan tanggungjawab pihak Jabatan Pengaliran dan Saliran Malaysia (JPS Malaysia). Untuk itu, JPS adalah pihak yang bertanggungjawab melaksanakan atau merangka pelan mitigasi di kawasan-kawasan yang melibatkan sungai utama di Kuala Lumpur.
3. Namun begitu, Dewan Bandaraya Kuala Lumpur (DBKL) telah mengambil tindakan **serta-merta** di kawasan yang terlibat dengan banjir kilat dengan memastikan kelancaran air ke *scupper drain* tidak terhalang. Untuk itu, kesemua *scupper drain* yang diperiksa di lokasi hotspot banjir telah dibersihkan, dinaik taraf dan terdapat juga pembinaan baru.
4. Selain daripada itu, kerja-kerja penyelenggaraan kolam takungan banjir, sungai dan parit induk turut dipergiat. Kerja-kerja pengorekan kelodak telah dilaksanakan di kolam-kolam takungan banjir yang terlibat. Bagi kawasan rendah yang terlibat dengan limpahan air sungai, guni-guni pasir juga telah dipasang. Antara kawasan yang terlibat adalah di Jalan Rahmat, di Jalan Pintasan Segambut, di Jalan Kampung Pasir dan di Jalan Segambut Dalam.
5. DBKL juga telah mempertingkatkan kawalan dan penyuraian trafik di

kawasan hotspot banjir kilat dengan mengadakan hubungan kerjasama yang erat antara Warden Trafik DBKL dan pihak Polis Trafik Kuala Lumpur. Dalam masa yang sama Kempen Cuci KL yang melibatkan aktiviti *plogging* dan pembersihan juga telah dilaksanakan oleh DBKL sepanjang tahun 2022. DBKL juga telah membuat hebahan ramalan hujan lebat melalui perkhidmatan aplikasi telefon mudah alih, *Mobile Integrated Service* (MOBIS) yang telah dibangunkan oleh DBKL. Kesemua tindakan serta merta telah dilaksanakan pada Disember 2022.

6. DBKL seterusnya mempunyai rancangan mitigasi banjir berskala **kecil/sederhana** seperti membina kolam-kolam takungan banjir, rumah pam, tembok penahan banjir dan menaiktaraf infrastruktur sistem perparitan sedia ada.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN FONG KUI LUN [BUKIT BINTANG]

SOALAN

TUAN FONG KUI LUN [BUKIT BINTANG] minta **PERDANA MENTERI** menyatakan langkah-langkah meningkatkan tahap kebersihan Bandaraya Kuala Lumpur memandangkan prestasi SWCorp dan kontraktornya gagal menguruskan dengan baik terutama di kawasan Pudu dan Brickfields.

JAWAPAN

**YB DATUK SERI AZALINA OTHMAN SAID,
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, setelah Akta Pengurusan Sisa Pepejal dan Pembersihan Awam 2007 (Akta 672) dikuatkuasakan pada September 2011, tanggungjawab Dewan Bandaraya Kuala Lumpur (DBKL) dalam pengurusan sisa pepejal dan pembersihan awam telah diambil alih oleh SWCorp.
2. Walaubagaimanapun, bagi memastikan tahap kebersihan sentiasa dalam tahap terbaik, Dewan Bandaraya Kuala Lumpur sentiasa berkerjasama dengan pihak SWCorp sama ada dalam aspek kawalselia dan penguatkuasaan. DBKL juga telah melaksanakan Zon Bebas Sampah di beberapa lokasi strategik di pusat bandar termasuklah Brickfields. Bagi lokasi Zon Bebas Sampah, sesiapa yang di dapati bersalah membuang sampah ditempat yang tidak dibenarkan atau menyebabkan kekotoran akan dikenakan kompaun maksimum.
3. Untuk makluman Ahli Yang Berhormat juga, SWCorp juga turut berkerjasama dalam melaksanakan Blueprint Penarafan Kebersihan WPKL yang berkonsepkan penarafan bintang. Penekanan terhadap peranan syarikat konsesi dan masyarakat setempat dalam memastikan dan mengekalkan tahap kebersihan diberi keutamaan dalam aspek penilaian penarafan. DBKL akan senantiasa memberikan komitmen dan kerjasama pada semua pihak dan agensi bagi memastikan Bandaraya Kuala Lumpur bersih, indah dan sejahtera kepada warga kota.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN FONG KUI LUN
[BUKIT BINTANG]**

SOALAN

Minta **PERDANA MENTERI** menyatakan adakah Kerajaan menyedari diskriminasi terhadap seseorang balu yang terkandung dalam Akta Saraan Ahli-ahli Parlimen 1980 berkait dengan pencen terbitan di mana apabila berhenti menjadi Ahli Parlimen dan berkahwin dan sekiranya meninggal dunia balunya akan menerima pencen selama 11 ½ tahun sahaja. Jika sedar adakah Kerajaan memansuhkan seksyen tersebut agar balu berkenaan akan terus menerima pencen sepanjang hayatnya dan adakah Kerajaan akan menasihati semua Kerajaan negeri yang mempunyai seksyen yang bersifat diskriminasi dan tidak adil dipinda sejajar dengan zaman dan peredaran masa kini.

JAWAPAN

**DIJAWAB OLEH YB DATUK ARMIZAN MOHD ALI,
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)**

Tuan Yang di-Pertua,

1. Untuk makluman, Jadual Pertama, Akta Ahli Parlimen (Saraan) 1980 (Akta 237) telah menjelaskan bahawa bagi perkahwinan selepas seseorang itu berhenti menjadi Ahli Parlimen, sekiranya beliau meninggal dunia, balu atau duda itu hanya berhak mendapat pencen terbitan sahaja bagi baki tempoh dua puluh tahun itu dan tidak layak mendapat pencen terbitan selepas daripada itu. Tempoh pembayaran pencen terbitan selama dua puluh tahun ini juga terpakai kepada pasangan pesara perkhidmatan awam yang dikahwini dalam persaraan. Oleh itu dakwaan bahawa wujud diskriminasi apabila tempoh pembayaran pencen terbitan kepada balu selama 11 ½ tahun adalah tidak tepat.

2. Pada masa ini, dasar pembayaran pencen terbitan selama dua puluh tahun ini masih kekal dan dilaksanakan oleh Kerajaan. Memandangkan pembayaran pencen terbitan kepada Ahli Dewan Undang Negeri juga adalah menggunakan ordinan/enakmen yang berlainan, Kerajaan Persekutuan tidak mempunyai kuasa untuk meminta Kerajaan Negeri untuk meminda perkara tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : TUAN FONG KUI LUN [BUKIT
BINTANG]**

SOALAN

TUAN FONG KUI LUN [BUKIT BINTANG] minta **MENTERI KESIHATAN** menyatakan cadangan Kementerian untuk melanjutkan masa bekerja di klinik- klinik kesihatan bagi mengatasi kesesakan para pesakit dari segi kecukupan kakitangan dan terbeban dengan kerja lebih masa.

JAWAPAN

Tuan Yang di-Pertua,

1. KKM telah memperkenalkan beberapa inisiatif bagi menangani kesesakan di klinik kesihatan seperti berikut:

a. Pemanjangan Waktu Operasi Selepas Waktu Pejabat

Inisiatif ini dilaksanakan di 52 buah klinik kesihatan bagi bertujuan untuk mengurangkan kesesakan di Jabatan Kecemasan Hospital. Waktu operasi bagi perkhidmatan adalah 5 petang hingga 9.30 malam pada hari Isnin hingga Jumaat dan 8 pagi hingga 12 tengahari pada Sabtu.

Pegawai Perubatan dan anggota bertugas selepas waktu bekerja biasa bagi secara lebih masa. Penjadualan kakitangan dibuat dengan mengambil kira sumber manusia sesebuah fasiliti, di mana bilangan anggota yang minimum perlu disediakan bagi menawarkan perkhidmatan tersebut.

b. Pelaksanaan perkhidmatan mengikut syif di 6 buah klinik kesihatan

Melalui kaedah ini, semua perkhidmatan kesihatan di klinik disediakan sepanjang waktu operasi iaitu dari 7.30am sehingga 9.30 malam setiap hari bekerja. Anggota klinik digilirkan dalam 2 syif dengan waktu bekerja bagi syif pertama dari 7.30am hingga 3.30pm, dan syif kedua dari 1.30pm hingga 9.30pm. Bilangan anggota pada setiap syif bergantung kepada beban kerja klinik tersebut.

c. Perkhidmatan Konsultasi Secara Maya

Inisiatif ini merupakan salah satu Strategi Pendigitalan Kesihatan yang sedang dilaksanakan di 376 buah klinik kesihatan. Perkhidmatan Konsultasi Secara Maya sebagai pelengkap kepada perkhidmatan klinik sedia ada bagi

memudahkan pelanggan menerima perkhidmatan kesihatan. Perkhidmatan ini boleh menjimatkan masa dan kos pengangkutan, mengurangkan sesi lawatan ke klinik dan tidak perlu menunggu lama di klinik kesihatan. Skop perkhidmatan ditawarkan meliputi rawatan susulan pesakit luar, perkhidmatan ibu dan anak, perkhidmatan dietetik, perkhidmatan farmasi, perkhidmatan terapi cara kerja dan fisioterapi. Walau bagaimanapun, pesakit perlu mempunyai peranti mudah alih dan kecapaian internet yang bersesuaian.

d. Sistem janji temu melalui aplikasi MySejahtera di klinik kesihatan

Slot temu janji sepanjang waktu operasi di sesebuah klinik disediakan dengan mengambil kira pelbagai kriteria seperti kapasiti klinik, skop perkhidmatan, dan kategori pesakit. Melalui kaedah ini pesakit boleh memilih slot janji temu dalam aplikasi MySejahtera mengikut kesesuaian masa mereka sendiri. Pelaksanaan Sistem Janji Temu membolehkan kedatangan pesakit secara anjal sepanjang waktu operasi klinik dan membolehkan pengoptimuman waktu operasi klinik kesihatan khususnya menyuraikan kesesakan pesakit pada waktu puncak. Inisiatif ini sedang dilaksanakan di 1,027 klinik kesihatan seluruh negara. KKM juga dalam proses memperkasakan komuniti supaya mematuhi janji temu yang telah dipilih menerusi media sosial.

2. Selain itu, bagi meringankan beban kerja di klinik kesihatan, prosedur-prosedur rawatan ringan turut disalurkan ke 228 Klinik Komuniti seluruh negara.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI MOHD HASNIZAN BIN HARUN
[HULU SELANGOR]**

SOALAN

Minta **MENTERI PENDIDIKAN TINGGI** menyatakan berapa ramai golongan sasaran dari kalangan B40, ibu tunggal dan golongan belia mengikut pembelajaran sepanjang hayat di kolej komuniti bagi tahun 2023, 2024 dan 2025.

JAWAPAN

Tuan Yang di-Pertua,

1. Berikut adalah unjuran golongan sasaran yang menyertai PSH kolej komuniti bagi tahun 2023, 2024 dan 2025:

Tahun/ Golongan Sasar	2023	2024	2025
Belia	35,000	35,000	35,000
B40	20,000	20,000	20,000
Ibu Tunggal	1,000	1,000	1,000

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : TUAN HAJI MOHD HASNIZAN BIN
HARUN [HULU SELANGOR]**

SOALAN :

Minta **PERDANA MENTERI** menyatakan bentuk bantuan kepada rakyat Kelantan dan Terengganu yang terjejas akibat banjir yang telah dilaksanakan oleh JPP sebagai agensi Persekutuan yang diperuntukkan sebanyak RM50 juta.

JAWAPAN

DIJAWAB OLEH YB DATUK ARMIZAN BIN MOHD ALI
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)

Tuan Yang di-Pertua,

1. Terdapat tiga (3) jenis bantuan yang disediakan bagi membantu mangsa banjir di negeri ini iaitu Bantuan Wang Ihsan (BWI), Bantuan Barangan Keperluan Asas (BBKA) dan Bantuan Pembaikan Rumah Maksimum RM5,000.

2. Proses agihan ini dilaksanakan oleh ICU JPM melalui Pejabat Pembangunan Negeri (PPN) berdasarkan senarai mangsa-mangsa banjir yang disahkan oleh Pusat Kawalan Operasi Bencana (PKOB) Daerah ataupun Negeri.

3. Di Negeri Terengganu, sehingga 17 Mac 2023, daripada 722 Ketua Isi Rumah (KIR) yang disahkan layak, seramai 719 KIR (99.6%) telah menerima bantuan BWI iaitu seperti jadual di bawah:

Bil.	Daerah	Bil. KIR Disahkan Layak	Bil. KIR Terima	Jumlah Agihan (RM)	Peratus KIR Terima (%)
1	DUNGUN	469	466	466,000	99.4
2	KEMAMAN	145	145	145,000	100
3	HULU TERENGGANU	108	108	108,000	100
JUMLAH		722	719	719,000	99.6

4. Bagi BBKA pula, daripada 469 KIR yang disahkan layak, seramai 466 KIR (99.4%) telah menerima bantuan tersebut dan kesemua penerima adalah dari Daerah Dungun.

5. Di Negeri Kelantan, sehingga 17 Mac 2023, daripada 47,812 KIR yang disahkan layak, seramai 11,961 KIR (25.0%) telah menerima bantuan BWI iaitu seperti jadual di bawah:

Bil.	Daerah	Bil. KIR Disahkan Layak	Bil. KIR Terima	Jumlah Agihan (RM)	Peratus KIR Terima (%)
1	GUA MUSANG	196	196	196,000	100
2	JELI	152	152	152,000	100
3	TANAH MERAH	1,706	1,658	1,658,000	97.2
4	MACHANG	1,388	1,343	1,343,000	96.8
5	BACHOK	2,944	2,744	2,744,000	93.2
6	KUALA KRAI	1,371	893	893,000	65.1
7	PASIR PUTEH	5,861	1,282	1,282,000	21.9
8	PASIR MAS	5,121	1,095	1,095,000	21.4
9	KOTA BHARU	8,986	1,174	1,174,000	13.1
10	TUMPAT	20,087	1,424	1,424,000	7.1
JUMLAH		47,812	11,961	11,961,000	25.0

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI MOHD HASNIZAN BIN
HARUN [HULU SELANGOR]**

SOALAN

**TUAN HAJI MOHD HASNIZAN BIN HARUN [HULU
SELANGOR] minta PERDANA MENTERI** menyatakan berapa
lama tempoh Kerajaan membenarkan pemegang kad UNHCR
untuk berada di Malaysia.

JAWAPAN

**DIJAWAB OLEH YB DATUK ARMIZAN BIN MOHD ALI
MENTERI DI JABATAN PERDANA MENTERI (HAL EHWAL
SABAH, SARAWAK DAN TUGAS-TUGAS KHAS)**

Tuan Yang di-Pertua,

1. Malaysia bukanlah Negara Pihak kepada Konvensyen Mengenai Status Pelarian 1951 dan Protokol Mengenai Status Pelarian 1967. Walau bagaimanapun, atas dasar kemanusiaan, Kerajaan membenarkan pelarian dan pemohon suaka yang mendapat perlindungan antarabangsa melalui Pejabat UNHCR di Malaysia untuk tinggal sementara di negara ini sementara menunggu proses untuk pulang atau ditempatkan ke negara ketiga oleh pihak UNHCR. Kerajaan sentiasa menggesa pihak UNHCR untuk menyegerakan penghantaran pulang ke negeri asal atau ditempatkan ke negeri ketiga. Ia juga tertakhluk kepada persetujuan negara penerima dan tujuan penempatan semula ke negeri ketiga amatlah rendah.

2. Justeru, pelarian tersebut akan berada di dalam negara untuk satu tempoh masa yang lama. Pelarian Rohingya umpamanya tidak dapat dihantar pulang ke negara asal disebabkan situasi di Rohingya *state*, Myanmar yang masih tidak aman dan negara ketiga pula tidak menjadikan pelarian Myanmar sebagai fokus bagi penempatan di negara maju disebabkan pelbagai faktor.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI MOHD HASNIZAN BIN HARUN
[HULU SELANGOR]**

SOALAN

TUAN HAJI MOHD HASNIZAN BIN HARUN [HULU SELANGOR] minta **MENTERI PENDIDIKAN** menyatakan langkah dan program Kementerian bagi meningkatkan kualiti penghayatan Pendidikan Islam dan Pendidikan Moral sebagai salah satu usaha mengurangkan masalah sosial remaja yang semakin meningkat.

JAWAPAN

Tuan Yang di-Pertua,

Kementerian Pendidikan Malaysia (KPM) sangat menitikberatkan pembangunan adab, akhlak dan integriti bagi melahirkan Anak yang Baik lagi Cerdik (ABC) dalam memastikan generasi waris masa depan mempunyai jati diri yang kukuh dan perpaduan dalam kalangan murid untuk menghadapi pelbagai cabaran melalui mata pelajaran Pendidikan Islam dan Pendidikan Moral.

Selaras dengan itu, KPM telah memperkenalkan Tujuh Teras Nadi Keunggulan KPM. Teras kedua memberi penekanan kepada aspek karamah insaniah, iaitu pembentukan adab, akhlak dan integriti bagi mewujudkan suasana harmoni yang akan menghindari gejala negatif. Aspek karamah insaniah ini bukan sahaja diterap dalam pengajaran dan pembelajaran di bilik darjah, malah turut diterapkan dalam pembelajaran di luar bilik darjah.

Penekanan kepada pembentukan akhlak dilaksanakan menerusi pendidikan sivik dalam lima mata pelajaran termasuk Pendidikan Islam dan Pendidikan Moral di sekolah rendah dan menengah.

Untuk makluman Yang Berhormat, mata pelajaran Pendidikan Islam merupakan mata pelajaran teras yang wajib dipelajari oleh semua murid Islam yang belajar pada peringkat sekolah rendah dan menengah dalam sistem pendidikan negara.

Kurikulum Pendidikan Islam menekankan kefahaman dan penghayatan terhadap Islam dalam kehidupan individu dan keluarga melalui penguasaan bidang al-Quran, hadis, akidah, fiqah, sirah, akhlak Islamiyah dan kemahiran jawi. Bagi mengelakkan murid terlibat dalam jenayah tajuk khusus seperti Menjaga Maruah Diri, Adab Berjiran, Adab Berkomunikasi, Adab Bernegara, Memelihara Harta dan Nyawa, Menjaga Hubungan Antara Kaum dan Jenayah Dalam Islam dimasukkan dalam kurikulum Pendidikan Islam. Selain itu, keberkesanan mata pelajaran Pendidikan Islam dipertingkatkan melalui amali solat, fardu ain, fardu

kifayah dan program kerohanian.

Melalui kurikulum Pendidikan Moral pula, KPM telah mengambil beberapa pendekatan untuk melahirkan murid yang mempunyai peribadi yang kental dalam mengatasi dan membendung perbuatan jenayah dalam kalangan murid sekolah. Maka, kurikulum sekolah rendah dan menengah yang ada sekarang menjurus ke arah mencapai matlamat yang diinginkan dan dicapai oleh murid serta masih relevan dengan keadaan semasa.

Nilai-nilai seperti hormat, harga diri, rasional, toleransi, kasih sayang, mematuhi peraturan dan undang-undang serta hemah tinggi diajar kepada murid sebagai satu cara untuk menerapkan tingkah laku murid yang terpuji dan mempunyai nilai akidah yang tinggi serta memupuk sahsiah yang terpuji dalam kalangan murid.

Sekian, terima kasih.

RT14

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

**DARIPADA : TUAN HAJI MOHD HASNIZAN BIN
HARUN [HULU SELANGOR]**

SOALAN

TUAN HAJI MOHD HASNIZAN BIN HARUN [HULU SELANGOR] minta **MENTERI SUMBER MANUSIA** menyatakan punca majoriti tenaga buruh tempatan tidak dilengkapi kelayakan dan kemahiran yang diperlukan oleh industri.

JAWAPAN

Tuan Yang di-Pertua,

1. Tinjauan Jabatan Perangkaan Malaysia (DOSM) pada suku ketiga tahun 2022 memperincikan pekerjaan yang ditawarkan di Malaysia merangkumi peratusan kategori pekerjaan mahir sebanyak 24.9%, kategori separuh mahir 62.3%, dan kategori kemahiran rendah pula sebanyak 12.8%. Data ini menunjukkan aliran permintaan pekerjaan negara cenderung kepada kategori separuh mahir dengan mendominasi 5.41 juta jawatan.
2. Statistik siswazah 2021 yang dikeluarkan oleh DOSM menunjukkan 66.1% siswazah bekerja dalam pekerjaan mahir, manakala 33.9% bekerja dalam pekerjaan separuh mahir dan berkemahiran rendah atau dikategorikan sebagai guna tenaga tidak penuh berkaitan kemahiran (*underemployment*).
3. Secara umumnya, set kemahiran yang diperlukan oleh pekerja ditetapkan oleh majikan atau industri berdasarkan skop dan bidang kerja seseorang pekerja itu. Dalam usaha membantu majikan mendapatkan tenaga kerja mahir yang memenuhi keperluan industri, Kerajaan giat melaksanakan pelbagai program latihan kemahiran berbentuk jangka panjang atau jangka pendek khususnya berteraskan Pendidikan dan Latihan Teknikal dan Vokasional (TVET).
4. Evolusi teknologi menyebabkan keperluan kemahiran dan kelayakan dalam pasaran pekerjaan bersifat dinamik. Sehubungan itu, golongan pekerja disarankan untuk pro-aktif dalam meningkatkan pengetahuan dan kemahiran dari semasa ke semasa agar mereka kekal relevan dengan keperluan industri. Sebagai langkah intervensi, Kerajaan turut menawarkan program-program upskilling dan reskilling pada masa sama memberi penekanan kepada majikan agar secara berterusan memberi peluang kepada para pekerja untuk memanfaatkan program-program ini.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : DR. HAJAH HALIMAH ALI [KAPAR]

SOALAN

DR. HAJAH HALIMAH ALI [KAPAR] minta **MENTERI EKONOMI** menyatakan perancangan Kerajaan memanfaatkan persisiran pantai sejajar dengan projek WCE untuk merancakkan ekonomi di Kapar.

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan kedudukan kewangan Kerajaan pada masa kini, Kerajaan lebih memberi perhatian kepada pelaksanaan projek-projek yang memberi manfaat terus kepada rakyat (mesra rakyat dan berimpak tinggi) seperti pembinaan/ menaiktaraf jalan raya, jambatan, bekalan air, bekalan elektrik, keselamatan, kesihatan, sekolah dan rumah ibadat berbanding pelaksanaan projek mega berimpak tinggi. Selain itu, projek-projek sedia ada yang telah diluluskan sebelum ini akan diteruskan pelaksanaannya dalam usaha untuk memacu ekonomi negara.

Bagi tujuan untuk membangunkan persisiran pantai sejajar dengan projek WCE, Kerajaan Persekutuan mengambil ingatan bahawa kawasan tersebut terletak di bawah tanggungjawab Kerajaan Negeri dan Pihak Berkuasa Tempatan (PBT). Sehubungan itu, Kerajaan Negeri dan PBT amat digalakkan untuk mewujudkan aktiviti ekonomi dan melaksanakan projek di bawah bidang kuasa masing-masing bagi merancakkan ekonomi di Kapar.

Bagi projek-projek di bawah Kerajaan Persekutuan pula, pihak Kerajaan Negeri bersama-sama pihak lain yang berkenaan seperti Pihak Berkuasa Tempatan dan Unit Perancang Ekonomi Negeri boleh membuat perancangan dan mengemukakan permohonan kepada Kementerian yang berkaitan untuk pertimbangan bagi dikemukakan kepada Kementerian Ekonomi untuk keputusan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : YB DR. HAJAH HALIMAH ALI
[KAPAR]**

SOALAN

YB DR. HAJAH HALIMAH ALI (KAPAR) minta **MENTERI PERPADUAN NEGARA** menyatakan adakah Kementerian sudah membuat kajian terperinci mengenai punca utama wujudnya ketegangan kaum pasca merdeka dan apakah hasil dapatan kajian tersebut.

JAWAPAN

Yang Di Pertua,

1. Majlis Konsultasi Perpaduan Negara (MKPN) dengan kerjasama Institut Kajian Etnik (KITA), Universiti Kebangsaan Malaysia telah **mengadakan 18 siri Dialog Perpaduan di seluruh negara** dari 2014-2015 bagi **mengenal pasti permasalahan, isu dan cabaran** yang wujud yang disuarakan oleh segenap lapisan masyarakat serta aspirasi dan harapan mereka. Hasil daripada siri dialog ini, sebanyak **sembilan (9) defisit sosial** telah dikenal pasti seperti berikut:

- (a) Etnisiti
- (b) Kelas Sosial
- (c) Bahasa
- (d) Agama
- (e) Pendidikan
- (f) Jurang Generasi
- (g) Gender
- (h) Politik Federalisme

(i) Ruang Bandar – Desa

2. Seterusnya, pada tahun 2018, pihak KITA sekali lagi telah mengadakan sesi libat urus di seluruh negara bagi mendapatkan input, pandangan dan pendapat mengenai isu-isu yang boleh menjejaskan penyatuan dan perpaduan nasional ke arah membina bangsa Malaysia yang bersatu. Dalam sesi ini, selain daripada sembilan (9) defisit sosial, satu lagi cabaran utama yang dikenal pasti ialah **media**. Justeru, terdapat **sepuluh (10) defisit sosial** yang perlu ditangani dengan sewajarnya untuk memastikan tahap perpaduan terus kekal stabil dan terkawal.

3. Pada tahun 2018 juga, Jabatan Perpaduan Negara dan Integrasi Nasional (JPNIN) bersama KITA telah membangunkan satu indeks bagi mengukur tahap kesepaduan dalam kalangan masyarakat iaitu **Indeks Perpaduan Nasional (IPNas)**, dengan mengambil kira sepuluh (10) defisit sosial tersebut.

4. Pada tahun 2022, Kementerian Perpaduan Negara (KPN) bersama KITA telah menjalankan **kajian IPNas 2022 yang menunjukkan skor 0.629**, bermaksud perpaduan dalam kalangan rakyat Malaysia berada pada **tahap sederhana dan terkawal**. IPNas 2022 menunjukkan **peningkatan sebanyak 0.062** berbanding skor IPNas 2018 iaitu 0.567.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

DARIPADA : DR. HAJAH HALIMAH ALI [KAPAR]

SOALAN

DR. HAJAH HALIMAH ALI [KAPAR] minta **MENTERI SUMBER MANUSIA** menyatakan apakah langkah Kerajaan untuk memastikan pekerja asing yang didatangkan sekali dalam projek – projek mega khususnya dengan China tidak mengancam keselamatan rakyat sendiri terutamanya di persekitaran projek.

JAWAPAN

Tuan Yang di-Pertua,

1. Semua pekerja asing yang bekerja di Malaysia adalah tertakluk kepada undang - undang perburuhan negara iaitu Akta Kerja 1955 bagi Semenanjung Malaysia, Ordinan Buruh (Sarawak Bab 76) dan Ordinan Buruh (Sabah Bab. 67) bagi Sarawak dan Sabah.
2. Kementerian Sumber Manusia melalui Jabatan Tenaga Kerja Semenanjung Malaysia telah mengambil langkah-langkah wajib bagi memastikan tiada ancaman keselamatan daripada pekerja asing terhadap rakyat negara dengan menguatkuasakan Akta Standard Minimum Perumahan, Kemudahan dan Penginapan Pekerja [Akta 446] berkaitan penyediaan perumahan dan penginapan serta kemudahan kepada pekerja yang perlu dipatuhi majikan. Akta 446 ini terpakai di Semenanjung Malaysia dan Wilayah Persekutuan Labuan sahaja.
3. Majikan perlu menyediakan tempat tinggal yang mematuhi piawaian yang ditetapkan Akta 446 serta undang – undang dan peraturan yang ditetapkan oleh Pihak Berkuasa Tempatan. Ini adalah bagi memastikan persekitaran tempat tinggal yang selamat, bersih dan kondusif serta memastikan persekitaran projek berada dalam keadaan baik. Di samping itu, Kerajaan juga akan memastikan lokasi penempatan pekerja asing tidak menyumbang kepada pencemaran sosial, budaya dan keselamatan penduduk tempatan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : DR. HAJAH HALIMAH ALI [KAPAR]

SOALAN

DR. HAJAH HALIMAH ALI [KAPAR] minta **PERDANA MENTERI** menyatakan apakah langkah-langkah yang akan diambil oleh Kerajaan untuk memperkasakan peruntukan-peruntukan yang absah di dalam Perlembagaan yang terkandung dalam Perkara 3 (Islam Agama Persekutuan), Perkara 152 (Bahasa Melayu sebagai Bahasa Kebangsaan), Perkara 153 (Kedudukan Istimewa Melayu dan Bumiputera Sarawak dan Sabah) dan Perkara 181 (Kedaulatan Institusi Raja Raja).

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, Kerajaan tidak bercadang untuk memperkasakan peruntukan-peruntukan yang absah di dalam Perlembagaan yang terkandung dalam Perkara 3 (Islam Agama Persekutuan), Perkara 152 (Bahasa Melayu sebagai Bahasa Kebangsaan), Perkara 153 (Kedudukan Istimewa Melayu dan Bumiputera Sarawak dan Sabah) dan Perkara 181 (Kedaulatan Institusi Raja Raja).
2. Walau bagaimanapun, Kerajaan perlu memastikan pemerkasaan peruntukan-peruntukan yang absah dalam Perlembagaan ini disokong dengan rasionalisasi yang jelas bagi maksud pelaksanaannya kerana ia menyentuh bidang kuasa Persekutuan dan Negeri selain aspek sensitiviti masyarakat. Selain itu, jika pemerkasaan ini dipertimbangkan, Kerajaan juga akan melaksanakan kajian lanjut dan penetapan polisi yang komprehensif dengan semua pihak berkepentingan sebelum pemerkasaan peruntukan-peruntukan ini dilaksanakan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB DR. HAJJAH HALIMAH BINTI ALI
(KAPAR)**

SOALAN

DR. HAJJAH HALIMAH BINTI ALI [KAPAR] minta **MENTERI KERJA RAYA** menyatakan :

(a) pelan tindakan untuk memastikan jalan raya Persekutuan di Kapar sentiasa selamat untuk pengguna dan diselenggara menurut piawaian mengambil kira penggunaan kenderaan yang berat dan dilanda banjir; dan

(b) berapa peruntukan di bawah MARRIS untuk jalan raya di Kapar.

JAWAPAN

Tuan Yang Di-Pertua,

Untuk makluman Ahli Yang Berhormat, penyenggaraan Jalan Persekutuan merangkumi 3 skop penyenggaraan antaranya skop penyenggraan rutin, penyenggaraan berkala dan kerja kecemasan.

Bagi penyenggaraan rutin, ia merangkumi kerja-kerja penyenggaaran seperti :-

- RO1- Penyenggaraan Pavemen – (*“Potholes Patching”*)
- RO2- Penyenggaraan Bahu Jalan
- RO3- Pemotongan Rumput
- RO4- Penyenggaraan Bahu Jalan
- RO5- Penyenggaraan Jambatan dan Pembetung
- RO7- Penyenggaraan Longkang.

Penyenggaraan rutin ini adalah berdasarkan pusingan kerja yang telah ditetapkan seperti yang termaktub dalam Perjanjian Penswastaaan Penyenggaraan Jalan Persekutuan Semenanjung Malaysia.

Manakala, kerja penyenggaraan berkala pula akan dilaksana berdasarkan kepada kelulusan peruntukan dari semasa ke semasa.

Bagi Kerja kecemasan pula bermaksud kerja yang tak dijangka atau dirancang dan perlukan tindakan segera.

Untuk makluman Yang Berhormat, bagi Parlimen Kapar, Jalan Persekutuan yang terlibat adalah FT05, Jalan Klang – Sabak Bernam, FT20 Jalan Pintas Selat Klang Utara (Persiaran Sultan Hishamuddin) dan FT3217, Jalan Perindustrian Meru. Jalan-jalan yg dinyatakan tadi telah dikuatkuasa Perintah Sekatan Berat yang mana FT05 had maksimum kenderaan berat ialah 53 tan manakala bagi FT20 dan FT3217 had

maksimum ialah 36 tan. Penguatkuasaan terhadap perintah sekatan ini adalah di bawah bidang kuasa Jabatan Pengangkutan Jalan di bawah perundangan Akta Pengangkutan Jalan (Akta 333).

Untuk makluman Ahli Yang Berhormat, sehingga kini Kementerian telah menerima kelulusan peruntukan sebanyak **RM8.322 juta** bagi tahun **2022**. Daripada jumlah kos yang diluluskan, sebanyak **RM7.09 juta** adalah untuk penyenggaraan **kerja berkala pavemen**. Sebanyak **RM0.249 juta** telah diperuntukkan bagi **kerja berkala bukan pavemen** dan sebanyak **RM0.982 juta** telah dibelanja untuk penyenggaraan rutin.

Bagi tahun 2023 pula, Kementerian telah mengenal pasti dan merancang **13 bilangan kerja berkala pavemen** yang bernilai **RM16.0 juta** dan **9 bilangan kerja berkala bukan pavemen** bernilai **RM4.54 juta**. Walau bagaimanapun, pelaksanaan kerja ini tertakluk kepada nilai keseluruhan peruntukan yang diluluskan Kementerian Kewangan dan senarai keutamaan kerja berdasarkan penilaian tahap kerosakan keseluruhan jaringan jalan persekutuan yang disediakan pihak JKR.

Untuk makluman Ahli Yang Berhormat Senator, peruntukan di bawah Kumpulan Wang Amanah bagi penyelenggaraan jalan raya (**MARRIS**) hanyalah melibatkan laluan yang berstatus jalan Negeri. Peruntukan **MARRIS** ini akan disalurkan secara terus oleh Kementerian Kewangan kepada Kerajaan Negeri dan diuruskan sepenuhnya oleh Kerajaan Negeri. Oleh itu, bidang kuasa Kementerian Kerja Raya Malaysia hanyalah ke atas Jalan Persekutuan sahaja.

Kementerian Kerja Raya melalui Jabatan Kerja Raya komited dalam memastikan jalan sentiasa dalam keadaan yang selamat dan selesa dengan menjalankan kerja-kerja penyenggaraan rutin sepanjang tahun.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : DATUK SERI UTAMA HASNI BIN
MOHAMMAD [SIMPANG RENGAM]

SOALAN

DATUK SERI UTAMA HASNI BIN MOHAMMAD [SIMPANG RENGAM] minta **MENTERI KEWANGAN** menyatakan apakah langkah-langkah yang bakal dirangka dan dilaksanakan Kerajaan bagi mengawal hutang negara semasa.

JAWAPAN

Tuan Yang di-Pertua,

Dalam memastikan paras hutang Kerajaan Persekutuan terkawal dan terurus, beberapa langkah kawalan berikut perlu dipatuhi dalam usaha menyelesaikan peningkatan paras hutang. Antaranya:

- i. Meneruskan langkah konsolidasi fiskal secara beransur-ansur bagi memastikan pinjaman baharu adalah lebih rendah berbanding semasa pandemik tanpa menjejaskan pemulihan ekonomi negara;
- ii. Meningkatkan kecekapan perbelanjaan, mengawal dan memastikan peruntukan dibelanjakan dengan berkesan serta mengurangkan ketirisan dan pembaziran. Kerajaan juga perlu melaksanakan kajian semula perbelanjaan awam (*Public Expenditure Review*) termasuk langkah rasionalisasi dan keutamaan perbelanjaan;
- iii. Memastikan perbelanjaan mengurus sentiasa dibiayai melalui hasil negara dan sebahagian daripada hasil dapat menampung sebahagian perbelanjaan pembangunan;
- iv. Memperluas asas hasil dan memastikan kutipan hasil yang mampan di mana Kerajaan perlu mempunyai lebih baki semasa dan tidak meminjam untuk perbelanjaan operasi;
- v. Memastikan bayaran khidmat hutang (*debt service charges*) terkawal dan tidak melebihi 15% daripada hasil;
- vi. Memastikan pinjaman Kerajaan adalah semata-mata untuk membiayai perbelanjaan pembangunan yang ditumpukan kepada projek berimpak tinggi seterusnya memberi pulangan kepada negara dan rakyat dalam tempoh jangka masa panjang;
- vii. Mengutamakan pinjaman domestik dengan mengambil kira mudah tunai yang tinggi dan kos pinjaman yang lebih murah serta tidak terdedah kepada risiko tukaran wang asing; dan

- viii. Mengukuhkan rangka kerja institusi dan perundangan dengan melaksanakan langkah pembaharuan fiskal termasuk memperkenalkan Akta Tanggungjawab Fiskal (*Fiscal Responsibility Act*). Akta yang dijangka akan dibentangkan pada tahun ini mampu memperkukuhkan lagi tadbir urus, ketelusan dan akauntabiliti dalam pengurusan fiskal.

Di samping itu, langkah kawalan dan pengurangan hutang serta konsolidasi fiskal perlu disokong dengan pelaksanaan strategi hasil jangka sederhana. Strategi ini meliputi penambahbaikan sistem percukaian sedia ada, memperluas asas hasil, meneroka potensi hasil daripada sektor tidak formal dan memberi fokus kepada insentif cukai yang lebih bersasar. Kesemua usaha dan langkah ini mampu memperkukuh kedudukan kewangan Kerajaan, membina semula ruang fiskal dan seterusnya mengurangkan hutang negara.

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DATUK SERI UTAMA HASNI BIN MOHAMMAD
[SIMPANG RENGAM]**

SOALAN

Datuk Seri Utama Hasni bin Mohammad [Simpang Renggam] minta **MENTERI KOMUNIKASI DAN DIGITAL** menyatakan inisiatif yang bakal diambil Kementerian bagi menyebarkan informasi dan kefahaman mengenai konsep Malaysia Madani kepada rakyat di seluruh negara.

JAWAPAN

Tuan Yang di-Pertua,

Usaha menyebar luas konsep dan hala tuju Malaysia MADANI merupakan tanggungjawab bersama kementerian/jabatan/agensi kerajaan agar dapat difahami dan dihayati oleh semua lapisan masyarakat. Kementerian Komunikasi dan Digital (KKD) bertanggungjawab untuk membantu memasarkan konsep Malaysia MADANI yang diacu berteraskan enam rukun iaitu keMampanan, kesejAhtraan, Daya cipta, hormAt, keyakiNan dan Ihsan.

KKD bersama jabatan dan agensi di bawahnya telah dan sedang melaksanakan pelbagai inisiatif program melalui pelbagai platform komunikasi secara bersepadu bagi menyebarkan informasi dan kefahaman mengenai konsep Malaysia MADANI kepada rakyat di seluruh negara. Antara program yang telah dan akan dilaksanakan meliputi:

(i) Program Penerangan Malaysia MADANI:

- (a) Taklimat Isu-isu Semasa mengenai Malaysia MADANI telah diadakan pada 15 Februari 2023 (Rabu) secara hybrid melibatkan 750 orang peserta yang terdiri daripada Pengurusan tertinggi Jabatan Penerangan Malaysia (JaPen), pegawai-pegawai JaPen Ibu Pejabat dan Negeri, Pegawai Penerangan Daerah, Pembantu Penerangan dan juga Pegawai Kader Perhubungan Awam di Kementerian dan Jabatan;
- (b) KKD juga akan menganjurkan Taklimat Khas mengenai Malaysia MADANI pada 28 Februari 2023 yang melibatkan 500 orang peserta yang terdiri daripada warga KKD dan semua Pegawai Perhubungan Awam di Kementerian secara bersemuka dan hybrid; dan

- (c) Inisiatif advokasi secara berterusan bersama komuniti setempat melalui kaedah komunikasi bersemuka seperti program *Info on Wheels* (IOW) iaitu sebanyak 690 program hebahan di 2,575 lokasi melibatkan seramai 126,487 khalayak, program baharu 'Jelajah Kita Madani' yang berorientasikan rakyat (*people centric*) dan program Jalinan Insan Wahana Aspirasi (JIWA) di 153 daerah seluruh negara.
- (ii) Hebahan Maklumat Malaysia MADANI:
 - (a) Hebahan melalui media elektronik yang merangkumi program bual bicara dan kapsul Malaysia MADANI melibatkan lima (5) saluran televisyen dan 34 stesen radio termasuk stesen negeri dan daerah dan disampaikan dalam pelbagai bahasa; dan
 - (b) KKD melalui Jabatan Penerangan (JaPen) telah membuat 173 hantaran (*posting*) Malaysia MADANI yang merangkumi infografik dan videografik di semua platform media sosial Japen yang telah mendapat *reach* sebanyak 360,371.
- (iii) Liputan berita secara harian, laporan khas dan rencana liputan berita oleh RTM dan BERNAMA.

Inisiatif untuk menyebarkan informasi mengenai konsep Malaysia MADANI akan terus dilaksanakan secara berterusan supaya seluruh rakyat dapat memahami dan menghayati semangatnya dan seterusnya bersama-sama mengangkat semula martabat dan kegemilangan negara di persada dunia.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK SERI UTAMA HASNI BIN MOHAMMAD
[SIMPANG RENGAM]**

SOALAN

DATUK SERI UTAMA HASNI BIN MOHAMMAD [SIMPANG RENGAM] minta **MENTERI PENGANGKUTAN** menyatakan apakah status terkini Projek Keretapi Berkelajuan Tinggi Kuala Lumpur - Singapura (HSR).

JAWAPAN

Tuan Yang Di Pertua,

Untuk makluman Yang Berhormat, Kementerian Pengangkutan sedang meneliti semua aspek pembinaan projek dan berpandangan suatu model kerjasama awam-swasta (PPP) perlu diterokai dengan lebih lanjut. Pihak swasta yang berkemampuan dari segi teknikal dan kewangan perlu dilibatkan bagi memastikan kelestarian operasi dalam jangka masa panjang.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB DATUK SERI UTAMA HASNI BIN
MOHAMMAD (SIMPANG RENGAM)**

SOALAN

DATUK SERI UTAMA HASNI BIN MOHAMMAD [SIMPANG RENGAM]
minta **MENTERI KERJA RAYA** menyatakan apakah status terkini Projek
Menaik Taraf Lebuhraya Utara Selatan di Senai Utara - Pandan, Johor
Bahru.

JAWAPAN

Tuan Yang Di-Pertua,

Untuk makluman Ahli Yang Berhormat, Agensi Pusat telah meluluskan cadangan projek **Pembinaan Lorong Tambahan Lebuhraya Utara Selatan (Plus) Dari Yong Peng Utara Ke Senai Utara Fasa 1 : Senai (U) – Sedenak** pada *Rolling Plan 3* (RP3), Rancangan Malaysia Kedua Belas (RMKe-12) dengan anggaran kos RM 525 juta.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HASSAN BIN ABDUL KARIM
[PASIR GUDANG]**

SOALAN

TUAN HASSAN BIN ABDUL KARIM [PASIR GUDANG] minta **MENTERI PENDIDIKAN** menyatakan mengapa krisis berlaku dalam dunia Pendidikan Malaysia sekarang di mana terdapat hampir 100,000 pelajar tercicir.

JAWAPAN

Tuan Yang di-Pertua,

Kementerian Pendidikan Malaysia (KPM) merujuk kepada definisi keciciran iaitu murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat tempoh pendidikan. Kadar keciciran murid di seluruh negara pada peringkat sekolah rendah adalah 0.07 peratus manakala pada peringkat sekolah menengah pula adalah 0.99 peratus pada tahun 2022.

Untuk makluman Ahli Yang Berhormat, antara faktor utama yang menyebabkan keciciran murid peringkat sekolah rendah dan sekolah menengah adalah faktor kemiskinan, perceraian ibu bapa, masalah disiplin, tidak berminat untuk belajar, kurang kesedaran ibu bapa terhadap pendidikan anak-anak dan gejala sosial.

Walau bagaimanapun, KPM mendapati bilangan keciciran murid sebanyak 100,000 yang dianggarkan adalah tidak tepat. Ini disebabkan oleh penggunaan kaedah penganggaran dan definisi keciciran yang berbeza dengan definisi KPM. Definisi yang digunakan merangkumi keciciran murid daripada sistem pendidikan termasuk bilangan murid yang mendaftar Sijil Pelajaran Malaysia (SPM) tetapi tidak hadir dan gagal mendapati sijil.

KPM sentiasa memandang serius mengenai isu keciciran murid bagi memastikan mereka kekal dalam sistem pendidikan negara. Pemantauan dan intervensi dilaksanakan terhadap murid berisiko cicir dan murid cicir daripada peringkat sekolah hingga ke jabatan pendidikan negeri agar mereka kekal bersekolah sehingga tamat tingkatan lima atau setara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HASSAN BIN ABDUL KARIM
[PASIR GUDANG]**

SOALAN

TUAN HASSAN BIN ABDUL KARIM [PASIR GUDANG] minta **PERDANA MENTERI** menyatakan adakah Kerajaan bercadang untuk memastikan Laporan Tahunan SUHAKAM bukan sahaja dibentangkan di Parlimen tetapi juga hendaklah dibahaskan.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, pembentangan Laporan Tahunan SUHAKAM ke Parlimen dibuat selaras dengan peruntukan undang-undang yang berkuat kuasa. Dalam hal ini, seksyen 21 Akta Suruhanjaya Hak Asasi Manusia 1999 memperuntukkan tentang tanggungjawab SUHAKAM mengemukakan Laporan Tahunan kepada Parlimen mengenai segala aktiviti yang dijalankannya sepanjang tahun yang berkenaan dengan laporan tersebut.
2. Dalam hal ini, Kerajaan komited untuk memastikan Laporan Tahunan SUHAKAM dapat dibentangkan mengikut tempoh masa yang ditetapkan. Perbahasan Laporan ini adalah bergantung kepada ketetapan Dewan. Justeru itu, perbahasan terhadap laporan ini boleh dibuat berdasarkan Peraturan-Peraturan Mesyuarat sedia ada.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : YB TUAN HASSAN BIN ABDUL KARIM
[PASIR GUDANG]**

SOALAN

Minta **PERDANA MENTERI** menyatakan adakah Kerajaan bercadang untuk menggubal undang- undang supaya dana yang sama rata dan adil diberikan kepada semua 222 Ahli Parlimen seluruh negara tanpa membezakan sama ada Ahli Parlimen Kerajaan ataupun Pembangkang.

JAWAPAN

**DIJAWAB OLEH YB DATUK ARMIZAN BIN MOHD ALI
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)**

Tuan Yang di-Pertua,

Peruntukan Khas YAB Perdana Menteri untuk Kawasan Parlimen hanyalah sebagai penambah dan pelengkap kepada peruntukan di bawah Rancangan Malaysia Lima Tahun. Penyediaan dan penyaluran peruntukan ini adalah mengikut dasar sedia ada dan tertakluk kepada kemampuan semasa kewangan Kerajaan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

**PERTANYAAN : BUKAN LISAN
DARIPADA : YB HASSAN BIN ABDUL KARIM
[PASIR GUDANG]**

SOALAN

TUAN HASSAN BIN ABDUL KARIM [PASIR GUDANG] minta **PERDANA MENTERI** menyatakan sampai bilakah Perdana Menteri akan memegang jawatan Menteri Kewangan. Adakah hal ini sementara atau kekal hingga tamat penggal.

JAWAPAN

Tuan Yang Di-Pertua,

Kerajaan ingin menegaskan kedudukan YAB Perdana Menteri yang turut memegang jawatan Menteri Kewangan bukan menjadi masalah selagi jawatan-jawatan itu tidak disalah guna dan pemimpin perlu telus dalam melaksanakan tanggungjawab yang telah diberi mandat oleh rakyat. Kerajaan Perpaduan tidak akan berkompromi dan juga bertekad akan menggunakan segala usaha untuk membanteras sebarang perbuatan rasuah berlaku di negara ini selaras dengan gagasan Malaysia Madani.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HASSAN BIN ABDUL KARIM
[PASIR GUDANG]**

SOALAN

TUAN HASSAN BIN ABDUL KARIM [PASIR GUDANG] minta **PERDANA MENTERI** menyatakan adakah Kerajaan bercadang untuk membentangkan di Parlimen satu Kertas Putih berkenaan pendedahan Pandora's Papers.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Yang Berhormat, mengenai isu pendedahan *Pandora Papers* yang dibuat oleh pihak luar negara di dalam pelbagai media antarabangsa, pihak berkuasa sedang menjalankan siasatan untuk membuktikan kebenaran pendedahan tersebut. Ini adalah kerana beberapa penama yang terlibat adalah mereka yang pernah memegang jawatan dalam Kerajaan.

2. Pendedahan ini menunjukkan tentang bagaimana sesetengah pihak yang dikatakan memiliki sejumlah harta yang mencurigakan perlu diperjelaskan kepada orang ramai. Rakyat perlu mengetahui tentang bagaimana penama-penama tersebut memperolehi atau mengumpul harta yang sebegitu banyak yang didakwa disimpan di luar negara. Fokus siasatan adalah menyiasat punca pemilikan harta tersebut samada ianya dirompak dari kekayaan negara.

3. Dalam hal ini, sebagai pendekatan penguatkuasaan dan siasatan bersepadu secara sistematik, satu Kumpulan Kerja Penganalisa (KKP) telah ditubuhkan untuk menganalisa isu aliran kewangan haram (*illicit financial flows*). KKP melibatkan agensi-agensi seperti berikut:

- a. Pusat Pencegahan Jenayah Kewangan Nasional (NFCC);
- b. Polis Diraja Malaysia (PDRM);
- c. Suruhanjaya Pencegahan Rasuah Malaysia (SPRM);
- d. Bank Negara Malaysia (BNM);
- e. Lembaga Hasil Dalam Negeri Malaysia (LHDN); dan
- f. Lembaga Perkhidmatan Kewangan Labuan (Labuan FSA)

4. Analisis terperinci oleh KKP diperlukan kerana penubuhan syarikat luar pesisir dan pembukaan akaun bank di negara luar pesisir tidak semestinya menyalahi undang-undang. Walau bagaimanapun, penubuhan entiti luar pesisir dan transaksi luar pesisir boleh disalahgunakan oleh penjenayah kewangan, pelarian cukai dan penjenayah yang menerima rasuah, terutamanya dalam membuat "*layering*" bagi mengelakkan hasil haram daripada senang dikesan.
5. Analisis KKP melibatkan beberapa peruntukan di bawah Akta Cukai Pendapatan 1967, Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001, Akta Suruhanjaya Pencegahan Rasuah Malaysia 2009 dan lain-lain undang-undang yang berkaitan.
6. Secara khususnya, SPRM telah pun menjalankan siasatan berkaitan isu *Pandora Papers*. Siasatan adalah melibatkan subjek-subjek yang didakwa memiliki akaun, syarikat atau firma pemegang amanah di luar pesisir di luar negara.
7. SPRM telah mengambil tindakan dengan bantuan BNM dan LHDN dalam membuat semakan daripada beberapa entiti-entiti luar bagi mendapatkan maklumat lanjut berhubung dakwaan dalam *Pandora Papers*.
8. Penelitian dokumen-dokumen sedang giat dijalankan. Selain itu, beberapa butiran dan dokumen kewangan daripada negara luar sedang dalam proses diperolehi oleh KKP.
9. Agensi penguatkuasaan akan terus mengumpul maklumat terutamanya dari luar negara berhubung transaksi yang didedahkan. Kerajaan komited untuk terus mengambil langkah tegas dalam mengekang *illicit financial outflows*, jenayah kewangan dan ketirisan sumber negara.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN HASSAN BIN SAAD [BALING]

SOALAN

Tuan Hassan bin Saad [Baling] minta **MENTERI DALAM NEGERI** menyatakan usaha membaik pulih balai polis mukim di Parlimen Baling.

JAWAPAN

Tuan Yang Di Pertua,

Dalam tahun 2022, PDRM telah menyalurkan sebanyak RM85 ribu bagi pembaikan melibatkan Ibu Pejabat Polis Daerah Baling dan Balai Polis Kupang, Baling seperti berikut:

1. Kerja-kerja pembaikan perimeter pagar dan longkang di Balai Polis Baling, Kedah berjumlah RM 40,000.00;
2. Kerja-kerja pembaikan dan penyelenggaraan sistem saluran paip di Balai Polis Kupang, Baling RM 10,000.00;
3. Kerja-kerja kecil pembaikan elektrik dewan serbaguna Ibu Pejabat Polis Daerah Baling berjumlah RM 20,000.00; dan
4. Kerja-kerja kecil pembaikan loji kumbahan Balai Polis Kupang RM15,000.00

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGAL KEDUA,
PARLIMEN KELIMA BELAS (2023)**

PERTANYAAN : BUKAN LISAN

DARIPADA : TUAN HASSAN BIN SAAD [BALING]

SOALAN

YB TUAN HASSAN BIN SAAD [BALING] minta **MENTERI
PEMBANGUNAN KERAJAAN TEMPATAN** menyatakan rancangan
Kementerian untuk membaik pulih fasiliti serta menambah bilangan balai
bomba di Parlimen Baling bagi menampung keperluan semasa.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) melalui Jabatan Bomba dan Penyelamat Malaysia (JBPM) sentiasa berusaha untuk memastikan perkhidmatan kebombaan terus diperkasa dan diperluas kepada seluruh masyarakat.

Pada masa kini, kawasan Parlimen Baling mendapat perkhidmatan kebombaan dari Balai Bomba dan Penyelamat (BBP) Baling yang dilengkapi dengan sebuah jentera bersama kekuatan keanggotaan seramai 29 orang. Untuk makluman Ahli Yang Berhormat selanjutnya, Kementerian telah merancang untuk melaksanakan kerja-kerja membaik pulih fasiliti di BBP Baling yang dijangka bermula pada suku ketiga tahun 2023.

Berhubung cadangan menambah bilangan BBP di kawasan Baling, Kementerian melalui JBPM telah mengenal pasti sebidang tanah di Kuala Ketil sebagai tapak BBP yang baharu dengan keluasan tapak lebih kurang 1.6 ekar. Proses permohonan tapak sedang diselaraskan dan peruntukan bagi kerja-kerja awalan tanah (perolehan tanah) akan dipohon dalam Rancangan Malaysia Kedua Belas (RMKe-12).

Mulai tahun 2023 juga, KPKT akan memberi keutamaan projek pembinaan BBP bagi tapak tanah yang disediakan secara percuma atau dengan kadar premium nominal oleh kerajaan negeri atau pemaju perumahan. Faktor ini akan diambil kira selain dari skor kajian *fire cover* yang dilaksanakan oleh JBPM.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN HASSAN BIN SAAD [BALING]

SOALAN

TUAN HASSAN BIN SAAD [BALING] minta **MENTERI PENDIDIKAN** menyatakan:

- (a) statistik pelajar sekolah yang tercicir di sekolah di Parlimen Baling mengikut peringkat umur persekolahan; dan
- (b) faktor utama yang mendorong keciciran pelajar.

JAWAPAN

Tuan Yang di-Pertua,

Kementerian Pendidikan Malaysia (KPM) merujuk kepada definisi keciciran iaitu murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat tempoh pendidikan. Berdasarkan kepada semakan aplikasi pangkalan data murid (APDM) KPM, pada tahun 2022 tiada keciciran murid pada peringkat sekolah rendah di Parlimen Baling. Pada peringkat sekolah menengah pula, kadar keciciran di Parlimen Baling adalah sebanyak 3.21 peratus. Statistik ini merangkumi murid sekolah KPM sahaja.

Untuk makluman, antara punca keciciran murid adalah kurang minat untuk belajar, kemiskinan, masalah disiplin, perceraian ibu bapa, kurang kesedaran ibu bapa terhadap pendidikan anak-anak dan gejala sosial. KPM sentiasa memandang serius mengenai isu keciciran murid dan menjalankan pemantauan kepada murid berisiko cicir dan murid cicir. Intervensi turut dilaksanakan pada peringkat sekolah bagi memastikan mereka kekal dalam sistem pendidikan negara sehingga tamat persekolahan.

Sekian, terima kasih.

RT16

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : YB TUAN HASSAN BIN SAAD
[BALING]**

SOALAN

TUAN HASSAN BIN SAAD [BALING] minta **MENTERI PELANCONGAN, SENI DAN BUDAYA** menyatakan pelan tindakan Kementerian bagi merintis konsep pelancongan Islam di negeri Kedah.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Kementerian Pelancongan, Seni dan Budaya melalui Pusat Pelancongan Islam atau *Islamic Tourism Centre (ITC)*, sebuah agensi di bawah Kementerian ini yang berfungsi sebagai pusat penyelidikan strategik dan pembangunan kapasiti Pelancongan Islam telah melaksanakan pelbagai inisiatif dan pendekatan dalam membangunkan dan mengembangkan segmen Pelancongan Islam serta Pelancongan dan Hospitaliti Mesra Muslim di Malaysia.
2. Pelan tindakan Kementerian melalui ITC bagi merintis konsep Pelancongan Islam di negeri Kedah adalah:
 - i. Mengenalpasti produk dan perkhidmatan pelancongan di Kedah yang berpotensi untuk dibangunkan sebagai produk Pelancongan Islam dan Pelancongan dan Hospitaliti Mesra Muslim. Antaranya adalah Masjid Zahir, Masjid Al-Bukhary, Galeri Sultan Abdul Halim, Balai Seni Negeri, Muzium Negeri Kedah, Menara Alor Setar, dan Pekan Rabu di Alor Setar, Gunung Jerai di Gurun, Pulau Langkawi, Kota Kuala Kedah di Kuala Kedah dan Taman Rekreasi Sungai Sedim di Kulim. Selain itu, konsep Pelancongan Islam turut dilaksanakan melalui Program Pengalaman *Homestay* Malaysia di bawah seliaan MOTAC. *Homestay* di negeri Kedah antaranya seperti *Homestay* Kampung Raga, Yan dan *Homestay* Wang Tok Rendong, Langkawi sering menjadi tumpuan pelancong terutama dari Singapura untuk melaksanakan ibadah aqiqah dan korban. Di samping itu, sekolah-sekolah pondok di Kedah juga berpotensi untuk dibangunkan sebagai '*pondokstay*' iaitu konsep yang menggabungkan keunikan pengajian pondok dan *homestay* di mana ianya merupakan sesuatu yang

menarik untuk diketengahkan sebagai satu produk Pelancongan Islam/mesra Muslim yang baharu.

- ii. Penganjuran program dan latihan kepada para penggiat industri di Kedah antaranya seperti Kursus Latihan Pemandu Lawatan Masjid – *Mosque Visit Guide (MosVi)*, Kursus Pemandu Pelancong Mesra Muslim - *Muslim Friendly Tourist Guide (MFTG)*, Seminar Keusahawanan dan Kepimpinan Pelancongan Islam - *Islamic Tourism Entrepreneurship and Leadership Seminar (ITELS)*; dan lain-lain bentuk program. Program-program ini bertujuan meningkatkan dan membangunkan keupayaan penggiat industri tempatan disamping mengukuhkan kefahaman mengenai konsep mesra Muslim agar dapat diaplikasikan dalam setiap produk dan perkhidmatan yang disediakan untuk para pelancong khususnya Pelancong Muslim.
- iii. Memperkenalkan dan menggalakkan hotel-hotel di negeri Kedah untuk menyertai program Pengiktirafan Penginapan Mesra Muslim (*Muslim Friendly Accommodation Recognition – MFAR*). Program ini mengiktiraf perusahaan hotel / premis penginapan di Malaysia yang menyediakan perkhidmatan Mesra Muslim berdasarkan garis panduan yang telah dikeluarkan oleh ITC. Antara perkara yang dinilai ialah seperti adanya tanda arah kiblat, sejadah, surau, kemudahan wuduk dan makanan halal. Pengiktirafan diberikan mengikut tiga (3) kategori iaitu Platinum, Emas dan Perak. Lebih daripada 50 hotel seluruh negara telah menerima pengiktirafan di bawah program ini yang terdiri daripada rangkaian hotel tempatan dan antarabangsa.
- iv. Menjalinkan kerjasama strategik dan libat urus bersama agensi-agensi Kerajaan serta penglibatan daripada pihak NGO pelancongan dan kebudayaan serta pihak swasta dalam memperkasa dan membangunkan Pelancongan Islam/mesra Muslim di negeri Kedah.
- v. Mempergiat penghebahan maklumat-maklumat mengenai aktiviti dan program Pelancongan Islam/Mesra Muslim di negeri Kedah menerusi

media sosial melalui laman web ITC (www.itc.gov.my) disamping laman Facebook, Twitter dan Instagram ITC.

3. Pelan tindakan ini akan diselaraskan oleh ITC sebagai agensi di bawah MOTAC yang bertanggungjawab melalui kerjasama agensi dan jabatan negeri yang berkaitan bagi memastikan kelancaran proram yang efektif dan menyeluruh.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN
DARIPADA : TUAN HASSAN BIN SAAD
[BALING]

SOALAN

Minta **PERDANA MENTERI** menyatakan perkembangan terkini kajian pembangunan mahkamah syariah secara komprehensif di bawah Jawatankuasa Memperkasakan Mahkamah Syariah (JKMMS).

JAWAPAN

YB SENATOR DATO' SETIA DR. HAJI MOHD NAI'IM BIN HAJI MOKHTAR

MENTERI DI JABATAN PERDANA MENTERI (HAL EHWAL AGAMA)

Tuan Yang di-Pertua,

1. Jawatankuasa Memperkasakan Mahkamah Syariah (JKMMS) telah ditubuhkan pada Jun 2022 untuk meningkatkan dan memartabatkan Mahkamah Syariah secara holistik selaras dengan kedudukan Islam dalam Perlembagaan Persekutuan. Jawatankuasa ini akan memberikan syor kepada Kerajaan mengenai perkara-perkara dasar yang berhubungan dengan pemerkasaan Mahkamah Syariah, antaranya meliputi skop yang berikut:
 - i. Penambahbaikan sistem dan undang-undang Syariah;
 - ii. Pengurusan, penstrukturan semula dan infrastruktur Mahkamah Syariah;
 - iii. Pengurusan dan penstrukturan semula Jabatan Kehakiman Syariah;
 - iv. Latihan Hakim dan Pegawai Syariah;
 - v. Sistem pendidikan undang-undang Syariah; dan
 - vi. Penambahbaikan perkara-perkara yang berhubungan dengan hal ehwal penguatkuasaan dan pendakwaan Syariah serta peguam Syarie.

2. Buat masa ini, jawatankuasa ini masih lagi mengumpulkan input-input dan syor-syor yang akan dikemukakan kepada mesyuarat Majlis Kebangsaan Bagi Hal Ehwal Agama Islam (MKI) dan Kerajaan dalam tempoh 2 tahun daripada tarikh penubuhannya iaitu pada Mei 2024.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SRI IKMAL HISHAM BIN ABDUL AZIZ
(TANAH MERAH)**

SOALAN

DATO' SRI IKMAL HISHAM BIN ABDUL AZIZ [TANAH MERAH] minta **MENTERI PERTAHANAN** menyatakan berapa jumlah serangan siber yang berjaya ditangkis oleh Bahagian Siber dan Elektromagnetik Pertahanan (BSEP), ATM sejak ianya ditubuhkan dan penggadam dari negara manakah yang dikesan mencatatkan serangan paling tinggi ke atas Malaysia.

JAWAPAN

1. Setelah penubuhan Bahagian Siber Elektromagnetik Pertahanan (BSEP), pada 16 Disember 2020, serangan yang berlaku semakin berkurangan jika dibandingkan dengan tahun-tahun sebelumnya. Penubuhan BSEP yang merupakan salah satu tonggak pertahanan bagi domain siber dan elektromagnetik telah menunjukkan keupayaannya melalui kerjasama dalam keselamatan siber secara holistik di semua peringkat agensi dalam dan luar negara bagi mempertahankan kedaulatan negara daripada ancaman.

2. Berdasarkan kepada rekod, jumlah serangan siber semenjak BSEP ditubuhkan sebanyak 625 kes serangan siber telah berjaya ditangkis yang melibatkan penggadam dalam pelbagai negara. Serangan yang berselindung dengan pelbagai *proxy* ini, ditujukan kepada Malaysia lebih menjurus kepada kekuatan pertahanan negara dan dasar-dasar pembangunan negara. Ini jelas menunjukkan bahawa penyamaran ini adalah bagi melindungi pelaku untuk mengelakkan ketegangan di antara negara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SRI IKMAL HISHAM BIN ABDUL AZIZ
(TANAH MERAH)**

SOALAN

Minta **PERDANA MENTERI** menyatakan berapa jumlah perbelanjaan yang telah Kerajaan keluarkan untuk program tajaan pelajar Ijazah Perubatan di luar negara mengikut tahun dari 2020 hingga 2022.

JAWAPAN

**DIJAWAB OLEH YB DATUK ARMIZAN MOHD ALI,
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)**

Tuan Yang di-Pertua,

1. Untuk makluman, jumlah perbelanjaan yang telah dikeluarkan oleh Kerajaan bagi menaja pelajar peringkat Ijazah Pertama dalam program Perubatan di luar negara dari tahun 2020 sehingga 2022 berjumlah RM 14,464,140.86 dengan pecahan seperti berikut:

- a. Tahun 2020 = RM 1,223,893.60.
- b. Tahun 2021 = RM 4,263,042.74.
- c. Tahun 2022 = RM 8,977,204.52

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB DATO' SRI IKMAL HISHAM BIN ABDUL AZIZ
[TANAH MERAH]**

SOALAN

Dato' Sri Ikmal Hisham Bin Abdul Aziz [Tanah Merah] minta **MENTERI DALAM NEGERI** menyatakan berapa jumlah insiden pelanggaran wilayah yang dicatatkan dilakukan oleh nelayan-nelayan daripada Thailand dan Indonesia bagi kawasan perairan Zon Ekonomi Eksklusif di Pantai Timur Semenanjung Malaysia dan berapa jumlah kerugian yang terpaksa ditanggung oleh negara.

JAWAPAN

Tuan Yang Di Pertua,

Sepanjang tahun 2020 sehingga tahun 2022, APMM telah merekodkan sebanyak 4 kes asing nelayan Thailand, 10 kes nelayan asing Indonesia dan 235 kes nelayan asing Vietnam yang telah menceroboh masuk ke wilayah Zon Ekonomi Eksklusif (ZEE) di Pantai Timur Semenanjung Malaysia.

Berdasarkan perangkaan oleh Jabatan Perikanan Malaysia (DOF), negara mengalami kerugian dalam bentuk hasil tangkapan perikanan lebih kurang RM 6 bilion setahun dan kira-kira RM 70 bilion dalam tempoh 12 tahun sejak tahun 2010 susulan pencerobohan nelayan asing ini ke perairan negara.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SRI IKMAL HISHAM BIN ABDUL AZIZ
[TANAH MERAH]**

SOALAN

DATO' SRI IKMAL HISHAM BIN ABDUL AZIZ [TANAH MERAH] minta **MENTERI PENDIDIKAN** menyatakan berapa unjuran keperluan guru Bahasa Inggeris, Matematik dan Sains di seluruh negara mengikut negeri untuk tahun 2023 bersama statistik pengisian semasa oleh pihak Kementerian Pendidikan Malaysia.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian terhadap pengisian guru di sekolah rendah dan menengah seluruh negara bagi memastikan pengajaran dan pembelajaran di sekolah dapat dilaksanakan dengan berkesan.

Untuk makluman Ahli Yang Berhormat, kedudukan guru semasa pada 29 Mac 2023 bagi subjek Bahasa Inggeris adalah seramai 45,154 dengan kekurangan guru sebanyak 9%. Bagi subjek Matematik, jumlah pengisian guru adalah seramai 35,848 dan berlaku lebih sebanyak 2%. Manakala bagi subjek Sains, jumlah pengisian guru adalah seramai 28,310 dan berlaku lebih sebanyak 13%.

KPM komited mengoptimumkan pengisian perjawatan guru di sekolah berdasarkan waran perjawatan yang ditetapkan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SRI IKMAL HISHAM BIN ABDUL AZIZ
[TANAH MERAH]**

SOALAN

DATO' SRI IKMAL HISHAM BIN ABDUL AZIZ [TANAH MERAH] minta **MENTERI PENDIDIKAN** menyatakan berapa unjuran keperluan bilangan guru-guru Program Pendidikan Khas mengikut negeri dan unjuran bajet pembangunan yang diperlukan untuk pembinaan Sekolah Pendidikan Khas (SPK) di seluruh negara bagi tahun 2023 dan 2024.

JAWAPAN

Tuan Yang di-Pertua,

Unjuran keperluan bilangan guru Program Pendidikan Khas mengikut negeri di seluruh negara bagi tahun 2023 adalah seramai 18,714 orang dan 19,432 orang bagi tahun 2024.

Manakala unjuran peruntukan pembangunan yang diperlukan untuk projek gantian penuh dan pembinaan bangunan tambahan Sekolah Pendidikan Khas (SPK) di seluruh negara adalah sebanyak RM165.2 juta bagi tahun 2023 dan RM155 juta bagi tahun 2024. Walau bagaimanapun, kelulusan permohonan pembinaan ini adalah tertakluk kepada kelulusan agensi pusat dan kedudukan kewangan semasa Kerajaan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATO' SRI DR. HAJI ISMAIL BIN HAJI ABD.
MUTTALIB [MARAN]**

SOALAN

DATO' SRI DR. HAJI ISMAIL BIN HAJI ABD. MUTTALIB [MARAN] minta **MENTERI EKONOMI** menyatakan apakah pelan dan strategi segera yang dilakukan oleh Kerajaan bagi mengimbangi kegagalan pembangunan yang begitu ketara antara negeri-negeri Pantai Timur Malaysia Barat yang ketinggalan jauh di belakang jika dibandingkan negeri-negeri di Pantai Barat Malaysia Barat seperti Pulau Pinang, Perak dan Selangor.

JAWAPAN

Tuan Yang di-Pertua,

Seiring dengan konsep MADANI yang diilhamkan oleh YAB Perdana Menteri ke arah pentadbiran negara yang berkesan, Kerajaan sentiasa berusaha ke arah memastikan pembangunan yang seimbang dilaksanakan merentasi wilayah dan negeri, termasuk negeri-negeri di sebelah Pantai Timur. Ini penting bagi memastikan supaya setiap lapisan masyarakat dapat menikmati pembangunan yang adil dan saksama serta kesejahteraan semua rakyat terjamin.

Dalam Rancangan Malaysia Kedua Belas (RMKe-12), iaitu melalui Bab 6: Mempertingkatkan Keseimbangan dan Keterangkuman Wilayah, Kerajaan telah memberi tumpuan kepada usaha menangani ketidakseimbangan sosioekonomi dan menggalakkan pertumbuhan yang saksama antara wilayah dan negeri. Usaha dipergiat bagi menangani

jurang kekayaan dan pendapatan, merapatkan jurang pembangunan luar bandar dan bandar serta mempercepat pembangunan yang lebih inklusif bagi wilayah dan negeri.

Di bawah *Rolling Plan 2* Tahun 2022, negeri-negeri Pantai Timur (meliputi Kelantan, Pahang dan Terengganu) telah diluluskan peruntukan pembangunan asas sebanyak RM5.89 bilion bagi melaksanakan sejumlah 1,068 projek pembangunan di bawah pelbagai Kementerian. Beberapa projek pembangunan utama yang sedang dilaksanakan di negeri-negeri Pantai Timur adalah seperti:

- i) Projek Menaik Taraf Jambatan Merentasi Sg. Marang Di Laluan FT003 Jalan Kuala Terengganu - Kuantan, Marang, Terengganu;
- ii) Pembinaan Bangunan Baru Pusat Pakar Pergigian (*Non-Hospital Based*) Terengganu;
- iii) Projek Pembinaan Stadium Bukit Merbau, Kompleks Sukan Bukit Merbau, Pasir Puteh, Kelantan;
- iv) Projek Pembangunan di Pihak Berkuasa Tempatan Kelantan;
- v) Program Perumahan Rakyat (PPR) Bera, Pahang; dan
- vi) Projek Balai Bomba dan Penyelamat Sungai Lembing, Pahang.

Kerajaan juga telah memperuntukkan sebanyak RM162.8 juta melalui perbelanjaan pembangunan pada tahun 2022 bagi Wilayah Ekonomi Pantai Timur (ECER). Ia adalah bagi membiayai projek/program pembinaan infrastruktur melibatkan negeri-negeri di wilayah ECER seperti Kelantan, Terengganu, Pahang dan Daerah Mersing.

Beberapa projek yang dibangunkan di wilayah ECER dalam tempoh RMKe-12 adalah seperti berikut:

- (i) Pembangunan Jambatan Palekbang-Kota Bharu Kelantan;
- (ii) Pembangunan Taman Biopolimer Kertih, Terengganu;
- (iii) Projek Eko-pelancongan di Endau-Rompin, Pahang; dan
- (iv) Projek Lembah Tenusu Jemaluang, Mersing.

Melalui inisiatif pembangunan yang dilaksanakan, Majlis Pembangunan Ekonomi Pantai Timur (ECERDC) juga telah merekodkan jumlah pelaburan komited sebanyak RM49.0 bilion dengan sejumlah RM40.0 bilion pelaburan telah direalisasi dalam tempoh Rancangan Malaysia Kesebelas (RMKe-11). Pelaburan ini turut menjana sebanyak 41,993 peluang pekerjaan dan 4,632 peluang keusahawanan di ECER. Bagi tempoh RMKe-12, ECERDC telah mencatatkan jumlah pelaburan komited sebanyak RM16.90 bilion dengan jumlah pelaburan direalisasi sebanyak RM6.45 bilion. Walaupun berdepan cabaran pandemik COVID-19 pada tahun 2021 dan 2022, ECERDC berjaya menarik sebanyak 18,864 peluang pekerjaan dan 2,336 peluang keusahawanan di ECER.

Dalam usaha merealisasi pembangunan yang seimbang, pembangunan di kawasan luar bandar juga tidak dilupakan. Dalam hal ini, sebanyak 95 projek dengan peruntukan sebanyak RM300.8 juta diluluskan di bawah peruntukan RP2 Tahun 2022 untuk pembangunan luar bandar di negeri-negeri Pantai Timur. Peruntukan ini adalah bagi melaksanakan program/projek seperti Jalan Luar Bandar (JALB), Bekalan Air Luar Bandar (BALB), Bekalan Elektrik Luar Bandar (BELB) dan Jalan Perhubungan Desa melalui Kementerian Kemajuan Desa dan Wilayah.

Kerajaan percaya bahawa segala perancangan dan pelaksanaan projek pembangunan tersebut akan menyumbang kepada pertumbuhan negeri-negeri Pantai Timur dan seterusnya akan memberikan pelbagai manfaat kepada kesejahteraan penduduk.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SRI DR. HAJI ISMAIL BIN HAJI ABD.
MUTTALIB (MARAN)**

SOALAN

DATO' SRI DR. HAJI ISMAIL BIN HAJI ABD. MUTTALIB [MARAN] minta **MENTERI PERTAHANAN** menyatakan berapa jumlah semua Pusat Latihan Khidmat Negara (PLKN) yang terdapat di negara ini dan adakah Kerajaan merancang untuk memulihkan pusat-pusat tersebut.

JAWAPAN

1. Sebelum Program Latihan Khidmat Negara (PLKN) dimansuhkan pada 11 Julai 2018 selaras dengan keputusan Jemaah Menteri, terdapat sejumlah 79 buah kem Program Latihan Khidmat Negara (PLKN) di seluruh negara yang diuruskan oleh pihak swasta melalui kontrak dengan Kementerian Pertahanan. Selepas PLKN dimansuhkan, Kementerian Pertahanan telah menamatkan kontrak sewaan dengan pengusaha-pengusaha kem tersebut.
2. Kementerian Pertahanan akan membentangkan kepada Jemaah Menteri untuk mendapatkan kata putus mengenai hala tuju program ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DATO' SRI DR. HAJI ISMAIL BIN HAJI ABD.
MUTTALIB
[MARAN]**

SOALAN

Minta **Perdana Menteri** menyatakan apakah punca sebenar menyebabkan sebuah Kerajaan negeri di negara ini mengeluarkan perintah larangan kepada semua masjid di negeri-negeri berkenaan supaya memperlahankan setiap kali azan apabila tiba solat lima waktu.

JAWAPAN

**YB SENATOR DATO' SETIA DR. HAJI MOHD NAI'IM BIN HAJI
MOKHTAR
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

Untuk makluman Ahli Yang Berhormat, azan merupakan salah satu dari syiar agama Islam yang bertujuan untuk memberitahu bahawa telah masuknya waktu bagi solat-solat fardhu. Hukum melaungkan azan adalah *sunat muakkad* untuk kesemua solat lima waktu. Sehingga kini, tiada negeri yang menetapkan supaya memperlahankan azan solat lima waktu.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB DATO' SRI DR HJ. ISMAIL B HJ. ABD
MUTTALIB [MARAN]**

SOALAN

Dato' Sri Dr. Haji Ismail bin Haji Abd. Muttalib [Maran] minta **MENTERI
DALAM NEGERI** menyatakan apakah benar Kerajaan berhasrat untuk
memberi pengiktirafan kepada rakyat yang lahir selepas merdeka tanpa
mengira warna kulit. Jika benar, apakah rasionalnya.

JAWAPAN

Tuan Yang Di Pertua,

Untuk makluman Ahli Yang Berhormat, pemerolehan kewarganegaraan Malaysia sama ada individu tersebut lahir sebelum atau selepas Hari Merdeka adalah tertakluk kepada syarat-syarat yang telah ditetapkan dalam Bahagian III Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak dan peraturan imigresen.

Penganugerahan kewarganegaraan Malaysia kepada individu bertaraf bukan warganegara merupakan anugerah tertinggi dan hak eksklusif Kerajaan Persekutuan yang tidak ditawarkan dan diberikan dengan sewenang-wenangnya. Setiap permohonan kewarganegaraan yang diterima diproses dan diteliti dengan sewajarnya berdasarkan syarat dan perundangan yang berkuatkuasa tanpa membezakan keturunan atau warna kulit pemohon.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB DATO' SRI DR. HAJI ISMAIL BIN ABD.
MUTTALIB (MARAN)**

SOALAN

DATO' SRI DR. HAJI ISMAIL BIN ABD. MUTTALIB [MARAN] minta **MENTERI KERJA RAYA** menyatakan apakah langkah yang bakal diambil oleh Kerajaan untuk mengatasi rungutan awam terhadap kerosakan jalan-jalan persekutuan dan berapa kos yang disediakan oleh Kerajaan untuk mengatasinya.

JAWAPAN

Tuan Yang Di-Pertua,

Untuk makluman Ahli Yang Berhormat Senator, jumlah panjang jalan Persekutuan di seluruh Malaysia adalah sepanjang 18,023 km. Manakala bagi Parlimen Maran, Jalan Persekutuan yang terdapat di parlimen ini adalah **sepanjang 301.86 km.**

Untuk makluman Ahli Yang Berhormat, antara langkah-langkah yang diambil oleh Kementerian/Jabatan dalam mengendalikan masalah rungutan awam berkaitan kerosakan jalan raya adalah dengan mengumpulkan aduan orang awam yang diterima dari 11 sumber saluran aduan antaranya dari e-mel, telefon, akhbar, media sosial dan sebagainya serta didaftarkan di dalam Sistem Pengurusan Aduan Awam (SISPAA) untuk agihan bagi tindakan di peringkat JKR yang terlibat.

Bagi aduan jalan berlubang, kerja-kerja penampalan jalan berlubang akan dilaksanakan dalam tempoh masa 24 jam selari dengan Piagam Pelanggan Jabatan Kerja Raya dan kontrak penyenggaraan jalan persekutuan (FRM) pihak konsesi di bawah kerja-kerja Penyenggaraan Rutin.

Bagi aduan kerosakan jalan yang memerlukan pembaikan berskala besar, kajian dan analisa akan dijalankan dari semasa ke semasa untuk mengenal pasti tahap kerosakan jalan tersebut serta kaedah pembaikannya. Permohonan kerja pembaikan ini akan dibuat melalui Program Penyenggaraan Berkala (Pavemen dan Bukan Pavemen) berdasarkan notis kerosakan (Notice of Defects / NOD) yang disediakan oleh syarikat konsesi.

Melalui NOD ini, Kementerian akan menyenaraikan program penyenggaraan mengikut keutamaan, tahap kritikal dan keperluan mendesak. Kelulusan kerja penyenggaraan berkala ini adalah

berdasarkan permohonan yang dikemukakan oleh pihak JKR dan pelaksanaan kerja pembaikan adalah tertakluk kepada nilai kelulusan peruntukan yang diluluskan oleh Kementerian Kewangan.

Untuk makluman Ahli Yang Berhormat Senator, kos yang disediakan oleh Kerajaan untuk mengatasi isu kerosakan jalan di jalan Persekutuan adalah terhad. Untuk rekod, jumlah peruntukan penyenggaraan jalan Persekutuan yang telah diperuntukkan kepada Kementerian ini adalah **berjumlah RM1.091 bilion untuk tahun 2021, RM1.211 bilion untuk tahun 2022 dan RM1.409 bilion untuk tahun 2023. Peruntukan yang diterima ini sangat rendah sekiranya dibandingkan dengan nilai permohonan pembaikan kerosakan jalan berdasarkan keperluan sebenar iaitu sebanyak RM3.529 bilion untuk tahun 2021, RM 4.252 bilion untuk tahun 2022 dan RM 4.438 bilion untuk tahun 2023.**

Untuk makluman Ahli Yang Berhormat, Kementerian Kerja Raya melalui Jabatan Kerja Raya sentiasa komited dalam memastikan jalan sentiasa dalam keadaan yang selamat dan selesa dengan menjalankan kerja-kerja penyenggaraan rutin sepanjang tahun.

Sekian, terima kasih

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : YB DATO' SRI ISMAIL SABRI BIN YAAKOB
[BERA]**

SOALAN

DATO' SRI ISMAIL SABRI BIN YAAKOB [BERA] minta **MENTERI PEMBANGUNAN WANITA, KELUARGA DAN MASYARAKAT** menyatakan statistik terkini secara terperinci berkaitan dengan kes penderaan kanak-kanak di Malaysia serta bagaimana tahap kesedaran dalam kalangan rakyat berkaitan dengan masalah penderaan yang semakin meningkat kini.

JAWAPAN

Kementerian Pembangunan Wanita, Keluarga dan Masyarakat (KPWKM) amat prihatin dan memandang serius akan kes penderaan ke atas kanak-kanak yang merupakan aset penting yang bakal mencorak masa hadapan negara. Kerajaan bertanggungjawab untuk memastikan empat (4) prinsip utama hak kanak-kanak iaitu kelangsungan hidup, perkembangan, perlindungan dan juga penyertaan kanak-kanak terjamin selaras dengan obligasi Malaysia sebagai Negara Pihak kepada Konvensyen Mengenai Hak Kanak-Kanak (*Convention on the Rights of the Child - CRC*).

Penderaan ke atas kanak-kanak dibahagikan kepada tiga (3) kategori utama iaitu penderaan fizikal, seksual dan emosi. Berdasarkan statistik Jabatan Kebajikan Masyarakat (JKM), bilangan keseluruhan kes penderaan melibatkan kanak-kanak bagi lima (5) tahun yang berturutan adalah sebanyak 3,532 kes (2018), 3,540 kes (2019), 3,534 kes (2020), 3,760 kes (2021) dan diikuti dengan 3,489 kes (2022). Statistik mengikut kategori penderaan adalah seperti dalam **Jadual 1**.

Jadual 1: Statistik penderaan kanak-kanak secara terperinci mengikut jenis penderaan bagi tahun 2018 sehingga 2022

JENIS PENDERAAN / JANTINA	2018		2019		2020		2021		2022	
	L	P	L	P	L	P	L	P	L	P
Penderaan Fizikal	911	792	828	743	802	657	805	809	838	794
Penderaan Seksual	136	1,569	134	1,722	152	1,752	111	1,851	139	1566
Penderaan Emosi	56	68	49	64	71	100	77	107	60	92
JUMLAH	1,102	2,429	1,011	2,529	1,025	2,509	993	2,767	1,037	2,452
JUMLAH BESAR	3,532		3,540		3,534		3,760		3,489	

Sumber: Jabatan Kebajikan Masyarakat

Usaha untuk menangani penderaan kanak-kanak merupakan tanggungjawab bersama. Bagi meningkatkan tahap kesedaran rakyat berhubung dengan isu penderaan, Kementerian telah melaksanakan pelbagai inisiatif sama ada dari aspek perundangan, legislatif dan advokasi seperti berikut:

(i) Akta Kanak-Kanak 2001

Kementerian telah membuat pindaan Akta Kanak-Kanak 2001 [Akta 611] pada tahun 2016 sama ada melalui pindaan peruntukan sedia ada atau penambahan peruntukan baharu yang merangkumi aspek seperti pemeliharaan, perlindungan dan pemulihan.

Dalam hal ini, Seksyen 29(A) telah memperuntukkan mengenai peranan masyarakat untuk memberikan maklumat atau melaporkan sebarang kejadian yang disyaki berlakunya penderaan. Selain itu, Seksyen 7 juga memperuntukkan penglibatan komuniti dalam usaha-usaha pencegahan isu penderaan kanak-kanak melalui penubuhan Pasukan Pelindung Kanak-Kanak (PPKK) dan Pasukan Kebajikan Kanak-Kanak (PKKK) yang bukan sahaja bertujuan menangani kes kanak-kanak yang telah disyaki menjadi mangsa pengabaian, penganiayaan dan penderaan dan memerlukan pemeliharaan serta perlindungan, malahan menjadi orang perantara antara komuniti dengan JKM dalam melaksanakan program advokasi dan kesedaran berkaitan penderaan kanak-kanak di peringkat komuniti setempat.

(ii) Program Advokasi

Bagi mengukuhkan usaha dalam menangani masalah penderaan dalam kalangan kanak-kanak, KPWK melalui JKM dan Lembaga Penduduk dan Pembangunan Keluarga Negara (LPPKN) sentiasa mempergiat program advokasi dan kesedaran yang melibatkan ibu bapa, kanak-kanak dan juga komuniti setempat menerusi penganjuran Kursus Pra Perkahwinan SMARTSTART, Kursus Ilmu Keluarga@LPPKN dan juga Program Keluarga@Kerja (Parenting@Work) yang merupakan program pengukuhan institusi kekeluargaan. Ini termasuklah program-program literasi undang-undang dan penguatkuasaan peruntukan Akta sedia ada untuk memberi kesedaran kepada masyarakat bahawa memelihara dan melindungi kanak-kanak adalah tanggungjawab bersama.

Kesimpulannya, usaha menangani isu penderaan kanak-kanak merupakan usaha berterusan dan memerlukan kerjasama bersepadu serta tindakan secara kolektif bersama semua pihak sama ada agensi kerajaan, sektor swasta, pertubuhan bukan kerajaan, ahli akademik dan setiap anggota masyarakat termasuk rakan daripada pihak pembangkang. Sehubungan itu, Kementerian amat berharap supaya program kesedaran dan advokasi ini dapat disampaikan sehingga ke peringkat akar umbi.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : DATO' SRI ISMAIL SABRI BIN
YAAKOB [BERA]**

SOALAN

DATO' SRI ISMAIL SABRI BIN YAAKOB [BERA] minta **MENTERI KESIHATAN** menyatakan apakah mekanisme yang diguna pakai bagi memastikan jumlah doktor, pembantu perubatan dan jururawat mencukupi dan terjamin di hospital awam sebagai persediaan sekiranya berlaku sebarang perkara luar jangka seperti COVID-19.

JAWAPAN

Tuan Yang di-Pertua,

1. Kementerian Kesihatan Malaysia (KKM) mengambil pendekatan dinamik bagi memenuhi keperluan tenaga kerja dalam usaha menangani perkara luar jangka seperti penularan COVID-19 di negara ini. Pendekatan yang dilaksanakan adalah seperti berikut:

- (i) melaksanakan penugasan semula ke negeri dan fasiliti yang memerlukan;
- (ii) melantik petugas secara kontrak tambahan;
- (iii) mendapatkan perkhidmatan kesihatan/kepakaran daripada pihak swasta menerusi penyampaian perkhidmatan dan penyumberluaran (*outsourcing*);
- (iv) mendapatkan perkhidmatan Pegawai Perubatan Pakar swasta dan Pegawai Perubatan swasta secara kontrak untuk perkhidmatan (*Contract for Service*) bagi penyampaian perkhidmatan kesihatan dalam tempoh perkara luar jangka seperti COVID-19 bagi membantu kesinambungan sistem kesihatan negara; dan
- (v) melaksanakan kolaboratif dengan agensi awam lain seperti Angkatan Tentera Malaysia, Jabatan Perkhidmatan Awam, MAMPU, Jabatan Perangkaan, kementerian-kementerian lain dan Pihak Berkuasa Negeri serta mendapatkan kerjasama sukarelawan dari luar Perkhidmatan Awam.

2. Berdasarkan rekod, pelaksanaan mobilisasi bagi memenuhi keperluan tenaga kerja perubatan di negeri-negeri yang terlibat untuk menangani pandemik COVID-19 pada tahun 2021 melibatkan seramai 3,787 petugas KKM. Dalam masa yang sama, KKM juga telah melaksanakan pelantikan secara kontrak tambahan khas untuk menangani COVID-19 melibatkan 14,993 petugas dalam pelbagai skim

perkhidmatan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SRI ISMAIL SABRI BIN YAAKOB
[BERA]**

SOALAN

DATO' SRI ISMAIL SABRI BIN YAAKOB [BERA] minta **MENTERI PENDIDIKAN** menyatakan berapa peratuskah jumlah keciciran di dalam persekolahan dalam kalangan anak-anak masyarakat Orang Asli serta apakah strategi Kementerian untuk merapatkan jurang dan mengatasi isu keciciran khususnya di perkampungan terpencil yang jauh dari sekolah.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberikan perhatian yang serius kepada isu keciciran pendidikan termasuk dalam kalangan anak-anak masyarakat Orang Asli. KPM merujuk kepada definisi keciciran iaitu murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat tempoh pendidikan. Pada tahun 2022, tiada keciciran murid masyarakat Orang Asli dikesan pada peringkat sekolah rendah, manakala, kadar keciciran di peringkat sekolah menengah dalam kalangan murid Orang Asli adalah sebanyak 4.65 peratus. Statistik ini merangkumi murid-murid Orang Asli di sekolah KPM sahaja.

KPM telah melaksanakan Program Jom Belajar, iaitu Program Khas Murid Orang Asli (PROKHAS) dan Chup Badui Sikulah (CBS) khusus untuk memberi akses pendidikan asas kepada kanak-kanak Orang Asli yang tinggal di kawasan pedalaman. Sehingga Januari 2023, sejumlah 348 orang kanak-kanak Orang Asli keciciran telah mula kembali bersekolah di 10 buah sekolah di seluruh negara. KPM juga mengadakan sesi libat urus dan Program Ziarah Kasih bersama-sama komuniti Orang Asli di perkampungan masyarakat Orang Asli bagi menangani isu keciciran murid Orang Asli.

KPM turut bekerjasama dengan pihak Jabatan Kemajuan Orang Asli (JAKOA) dan pertubuhan bukan kerajaan (NGO) dalam mengesan kanak-kanak Orang Asli yang sepatutnya berada dalam sistem pendidikan tetapi tidak bersekolah. Program turun padang ini melibatkan pegawai KPM, jabatan pendidikan negeri (JPN), pejabat pendidikan daerah (PPD), sekolah, JAKOA dan NGO. Matlamat utama adalah untuk menjelaskan kepentingan pendidikan dan meyakinkan komuniti Orang Asli bahawa anak-anak mereka berpotensi untuk cemerlang dalam bidang akademik mahupun dalam bidang sukan sekiranya mengikuti pendidikan formal di sekolah. Pihak JAKOA pula membantu menyediakan kemudahan asas persekolahan, bantuan wang saku dan kemudahan pengangkutan murid ke sekolah terdekat.

Di samping program yang dilaksanakan, peluasan Program Sekolah Model Khas Komprehensif Khas 9 (K9) juga merupakan salah satu strategi KPM dalam usaha menangani isu kehadiran murid Orang Asli yang tinggal jauh di pedalaman dan kawasan terpencil. Peluasan Sekolah K9 pasti mampu mengurangkan kadar keciciran transisi murid dari Tahun 6 ke Tingkatan 1 kerana murid tidak perlu bertukar ke sekolah lain bagi mengikuti pendidikan di peringkat menengah rendah.

Setelah melihat kejayaan pelaksanaan sekolah K9, KPM telah meluaskan konsep sekolah model khas komprehensif 9 kepada sekolah model khas komprehensif 11 atau K11 iaitu pendidikan bermula dari tahun 1 sehingga tingkatan 5 di sekolah yang sama. Sebagai permulaan, KPM sedang melaksanakan rintis K11 di dua buah sekolah termasuk di SK RPS Batau, Kuala Lipis, Pahang bermula pada sesi persekolahan 2023/2024

KPM sentiasa komited dalam usaha menangani isu keciciran pendidikan dalam kalangan anak-anak masyarakat Orang Asli dan memastikan hak setiap kanak-kanak di negara ini untuk mendapat akses pendidikan yang berkualiti diberi keutamaan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATO' SRI ISMAIL SABRI BIN YAAKOB
(BERA)**

SOALAN

DATO' SRI ISMAIL SABRI BIN YAAKOB (BERA) minta **MENTERI KEMAJUAN DESA DAN WILAYAH** menyatakan berapa jumlah produk usahawan desa yang telah berjaya dipasarkan di pasaraya-pasaraya tempatan dan *hypermarket* asing di dalam negara serta yang berjaya menembusi pasaran luar negara.

JAWAPAN

Tuan Yang di-Pertua,

Kementerian Kemajuan Desa dan Wilayah (KKDW) menerusi program yang dilaksanakan oleh Bahagian Pembangunan Usahawan Desa (UD) iaitu Program *Rural Business Outlet* (RBO) turut membantu memasarkan produk usahawan luar bandar dari seluruh negara. Program RBO telah memasarkan 677 produk daripada usahawan luar bandar.

Untuk makluman Yang Berhormat juga, MARA telah membangunkan empat (4) program khas di bawah Bahagian Infrastruktur dan Komersial dengan kerjasama pemain industri makanan dan minuman (F&B). Melalui program ini, MARA telah berjaya membantu 812 usahawan dalam memasarkan 43,953 *Stock Keeping Unit* (SKU) produk usahawan di pasaraya dan hypermarket tempatan serta secara platform *online*.

BIL.	NAMA PROGRAM	BIL. SKU
1	Program Peruncitan MARA - MyMesra	255
2	Program Pembangunan Peruncitan MARA: Halal Mart (HALMART)	256
3	Jana Niaga MARA-Shopee	42,661
4	Rural Business Outlet (RBO)	781
	JUMLAH	43,953

Penyewa-penyewa premis perniagaan MARA juga turut memasarkan 541 SKU produk di pasaraya dan *hypermarket* asing di dalam serta pasaran luar negara.

Selain daripada itu, melalui inisiatif Pembinaan Usahawan, MARA telah melaksanakan program khusus pembangunan usahawan eksport bermula pada tahun 2018 lagi yang di kenali sebagai

SOALAN NO : 193

Gate To Global (GTG) MARA. Secara ringkasnya, GTG merupakan program berstruktur kepada syarikat *product ready to export* yang merangkumi skop program pembangunan pengurusan eksport, pembangunan dan penjenamaan produk, pemasaran di peringkat antarabangsa, dan misi perdagangan dan jaringan perniagaan dengan kerjasama *Malaysia External Trade Development Corporation* (MATRADE).

Sehingga kini, MARA telah berjaya membangunkan seramai 56 syarikat usahawan Bumiputera yang telah meluaskan pasaran ke 33 buah negara di dunia dengan jumlah produk sebanyak 218 SKU semenjak program ini diperkenalkan pada tahun 2018. Antara program-program yang telah dilaksanakan di dalam dan luar negara adalah seperti Malaysia International Halal Showcase (MIHAS), Padanan Perniagaan Antarabangsa, Selangor International Business Summit, Gulfood Dubai, Halal Canada, Fine Food Australia, International Astronautical Congress (IAC) Paris, Interzoo German, Conference Business Strategy Analysis Indonesia dan lain-lain lagi.

Selain itu, FELCRA juga telah melaksanakan pelbagai inisiatif untuk memasarkan produk usahawan komuniti peserta bagi memasarkan produk premium mereka di pasaraya-pasaraya tempatan dan *hypermarket* asing di dalam negara di samping menembusi pasaran luar negara. Analisis jaringan pemasaran produk tersebut adalah sepertimana jadual di bawah;

BIL PRODUK DI PASARAYA TEMPATAN	BIL PASARAYA TEMPATAN	BIL PRODUK DI HYPERMARKET ASING - (DLM NEGARA)	BIL HYPERMARKET ASING (DLM NEGARA)	BIL PRODUK DI HYPERMARKET ASING (LUAR NEGARA)	BIL HYPERMARKET ASING (LUAR NEGARA)
39	5	12	1	18	1

SOALAN NO : 193

Pihak RISDA turut komited membantu usahawan pekebun kecil memasarkan produk-produk mereka secara fizikal dan secara atas talian. Pada masa ini, dua (2) orang usahawan pekebun kecil RISDA telah berjaya memasarkan produk mereka di Pasaraya *Hypermarket* (Mydin dan Lotus). Produk yang berjaya dipasarkan adalah makanan dalam tin (jenama Che Din'S) dan minuman pra campuran (jenama Akifcafe). Pada tahun 2022, sebanyak 15 SKU produk usahawan pekebun kecil tersebut telah mencatat jumlah jualan sebanyak RM4,339,615.00.

Untuk makluman Yang Berhormat juga, sehingga 31 Januari 2023 seramai 3 usahawan Orang Asli telah memasuki pasaraya tempatan dengan jualan produk seperti kuih bahulu, makanan sejuk beku, hasil tani dan herba-herba. Manakala bagi pasaran *hypermarket* asing dan pasaran luar negara masih tiada produk usahawan desa yang berjaya dipasarkan. Namun, terdapat seorang usahawan Orang Asli yang menembusi pasaran luar negara dengan penjualan perabot kayu secara permintaan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : DATO' SRI ISMAIL SABRI BIN YAAKOB
[BERA]

SOALAN

DATO' SRI ISMAIL SABRI BIN YAAKOB [BERA] minta **MENTERI KEWANGAN** menyatakan adakah terdapat sebarang kajian lapangan yang dilaksanakan oleh pihak Kementerian berkaitan dengan kesan kenaikan Kadar Dasar Semalaman (OPR) terhadap rakyat khususnya golongan B40.

JAWAPAN

Tuan Yang di-Pertua,

Seperti yang termaktub dalam Akta Bank Negara Malaysia 2009, sebarang keputusan mengenai dasar monetari adalah tidak boleh melibatkan campur tangan Kementerian Kewangan. Menerusi akta ini, Jawatankuasa Dasar Monetari (*Monetary Policy Committee*, MPC), Bank Negara Malaysia (BNM) bertanggungjawab merumuskan dasar monetari secara autonomi bagi mengekalkan kestabilan harga serta memastikan pertumbuhan ekonomi kekal mampan pada masa hadapan.

Bagi menjawab pertanyaan mengenai kajian lapangan bagi menilai impak kenaikan kadar Dasar Semalam (OPR) khususnya untuk golongan B40, ingin dimaklumkan bahawa proses membuat keputusan dasar monetari oleh MPC BNM merupakan proses yang komprehensif dan melibatkan perbincangan teknikal. Dalam hal ini, MPC juga meneliti maklum balas daripada hasil pengawasan dan pemantauan, analisis dan kajian berterusan yang merangkumi ekonomi global dan domestik, harga serta keadaan monetari dan kewangan secara menyeluruh termasuk impak kenaikan OPR kepada semua peminjam.

Keputusan MPC untuk mengekalkan OPR pada kadar 2.75 peratus berbanding kenaikan sebanyak empat kali berturut-turut pada tahun 2022 sehingga OPR mencapai peningkatan kumulatif sebanyak 100 mata asas dari 1.75 peratus sehingga 2.75 peratus telah dibuat bagi menilai kesan pelarasan kumulatif OPR pada tahun lalu terhadap prospek inflasi dan ekonomi Malaysia. Keputusan ini turut mengambil kira kesan sela masa (*lag effect*) daripada peningkatan OPR sebanyak empat kali berturut-turut pada tahun lalu terutamanya kesannya terhadap pengurangan tekanan permintaan yang melibatkan perubahan tingkah laku isi rumah dan perniagaan yang biasanya mengambil masa.

Mengenai kesan peningkatan OPR kepada peminjam terutamanya golongan B40, ingin dijelaskan, bukan semua peminjam terkesan dengan peningkatan OPR kerana peningkatan kepada ansuran bulanan hanya

melibatkan peminjam yang mempunyai pinjaman jenis berkadar terapung.

Setakat Disember 2022, sebahagian peminjam iaitu 50.3 peratus daripada jumlah akaun pinjaman dalam sektor isi rumah adalah pinjaman berkadar tetap. Bagi peminjam berpendapatan rendah iaitu pendapatan kurang dari RM5,000 sebulan termasuk golongan B40, dianggarkan sebanyak 54.8 peratus daripada jumlah akaun pinjaman adalah berasaskan kadar tetap.

Apa yang penting, langkah seterusnya oleh MPC adalah untuk mengembalikan tahap akomodasi dasar monetari ke tahap wajar yang akan ditentukan berdasarkan penilaian MPC tentang kesan keadaan yang berubah-ubah terhadap prospek inflasi dan pertumbuhan dalam negeri.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : PUAN ISNARAISSAH MUNIRAH MAJILIS
[KOTA BELUD]**

SOALAN

Minta **MENTERI PENDIDIKAN TINGGI** menyatakan adakah projek pembinaan Politeknik Kota Belud akan menjadi keutamaan Kementerian di bawah Kajian Separuh Penggal (KSP), Rancangan Malaysia ke-12 (RMK-12) mengambil kira aspirasi Kerajaan baharu dan jaminan oleh Yang Amat Berhormat Perdana Menteri bahawa Kerajaan Persekutuan tidak akan meminggirkan Sabah dan Sarawak.

JAWAPAN

Tuan Yang di-Pertua,

1. Negeri Sabah secara khususnya telah mempunyai tiga (3) buah Politeknik dan lapan (8) buah Kolej Komuniti.
2. Projek pembinaan Politeknik Kota Belud telah dimohon melalui Permohonan Peruntukan Pembangunan Projek (DE) Rancangan Malaysia Kedua Belas (RMKe-12) di bawah *Rolling Plan* 3 (2023) iaitu di bawah projek perolehan tanah bagi pembinaan Politeknik Kota Belud dan sedang menunggu kelulusan permohonan projek.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : PUAN ISNARAISSAH MUNIRAH MAJILIS
[KOTA BELUD]**

SOALAN

PUAN ISNARAISSAH MUNIRAH MAJILIS [KOTA BELUD] minta **PERDANA MENTERI** menyatakan adakah pindaan kepada Akta Kemajuan Petroleum 1974 (Akta 144) akan dibuat di dalam mesyuarat Parlimen Penggal ke-2, Parlimen ke-15:

- a) jika ya, apakah pindaan yang akan dibuat termasuk jumlah 'Pembayaran Tunai oleh Perbadanan' di bawah seksyen 4 dan 'Majlis Penasihat Petroleum Negara' di bawah seksyen 5. Sekiranya tidak, mengapa.

JAWAPAN

**YB DATO' SRI AZALINA OTHMAN SAID,
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, Majlis Penasihat Petroleum Negara (MPPN) bertanggungjawab menasihat Perdana Menteri selaras dengan peruntukan Seksyen 5(2) Akta Kemajuan Petroleum 1974 [Akta 144]. MPPN yang pertama telah bersidang pada 9 April 1975 dan dipengerusikan oleh YM Raja Tan Sri Mohar Raja Badiozaman yang merupakan Penasihat Khas kepada YAB Perdana Menteri ketika itu. Walau bagaimanapun, rekod menunjukkan bahawa MPPN tidak aktif semenjak tahun 1995.
2. Kerajaan Persekutuan sentiasa terbuka untuk meneliti perundangan dan dasar mengikut situasi dan cabaran semasa.
3. Kerajaan Persekutuan sentiasa memberi perhatian terhadap isu dan perkara berkaitan pembangunan negeri Sabah. Ini terbukti melalui penubuhan Majlis Khas Mengenai Perjanjian Malaysia 1963 (MA63) pada 16 September 2020 dan dipengerusikan oleh YAB Perdana Menteri. Dalam konteks cari gali petroleum, Kerajaan Negeri Sabah dan PETRONAS telah menandatangani Perjanjian Kerjasama Komersial (*Commercial Collaboration Agreement*, atau CCA) pada 7 Disember 2021 untuk meningkatkan lagi kerjasama dalam membangunkan industri minyak dan gas di Sabah melalui jawatankuasa penyelarasan bersama (*joint coordination committee*) dan dialog strategik tahunan (*annual strategic dialogue*).
4. Kerajaan Persekutuan juga telah menyerahkan kuasa kawal selia bekalan gas kepada Kerajaan Negeri Sabah melalui pewartaan Perintah Negeri-Negeri Borneo (Kuasa-Kuasa Perundangan) (Pindaan) 2023 yang berkuatkuasa pada 10 Januari 2023. Ini membolehkan Kerajaan Negeri Sabah mempunyai kuasa autonomi dalam mengawal selia

NO. SOALAN: 196

industri bekalan gas serta meningkatkan penglibatan dan keupayaan penduduk negeri untuk Sabah dalam urusan kawal selia industri bekalan gas dalam aspek perundangan, operasi dan teknikal.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : PUAN ISNARAISAH MUNIRAH
MAJILIS [KOTA BELUD]**

SOALAN

PUAN ISNARAISAH MUNIRAH MAJILIS [KOTA BELUD] minta **PERDANA MENTERI** menyatakan status terkini penambahan bilangan kerusi Parlimen Sabah dan Sarawak kepada 35% dan bilakah cadangan ini akan dibentangkan di peringkat Kabinet untuk kelulusan.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, Suruhanjaya Pilihan Raya (SPR) merupakan pihak yang bertanggungjawab untuk melaksanakan Urusan Kajian Semula Persempadanan berdasarkan keperluan di bawah Fasal (2) Perkara 113 Perlembagaan Persekutuan.
2. Bagi melaksanakan cadangan pertambahan kerusi Dewan Rakyat bagi negeri Sabah dan Sarawak, pindaan kepada Perkara 46 Perlembagaan Persekutuan berkaitan komposisi Ahli Dewan Rakyat perlu dibuat terlebih dahulu dan pindaan ini perlu mendapat persetujuan 2/3 daripada jumlah Ahli Dewan Rakyat.
3. Kajian akan dilaksanakan berkenaan perkara ini sebelum ia dibentangkan kepada Jemaah Menteri untuk pertimbangan dan persetujuan dasar.
4. Kajian mengenai perkara ini dijangka akan mengambil sedikit masa oleh sebab ia melibatkan pindaan undang-undang khususnya berkaitan Perlembagaan Persekutuan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : PUAN ISNARAISSAH MUNIRAH MAJILIS
[KOTA BELUD]**

SOALAN

PUAN ISNARAISSAH MUNIRAH MAJILIS [KOTA BELUD] minta
MENTERI PERTANIAN DAN KETERJAMINAN MAKANAN
menyatakan bantuan input pertanian, penternakan dan perikanan
kepada golongan petani, penternak dan nelayan di Sabah khususnya
di Parlimen Kota Belud yang mana 80% daripada rakyat di sini terlibat
dengan pertanian.

JAWAPAN

Tuan Yang di-Pertua,

Untuk makluman, Kerajaan Negeri Sabah melalui Jabatan Pertanian Sabah, Jabatan Perikanan Sabah dan Jabatan Perkhidmatan Veterinar Sabah komited untuk membantu golongan petani, penternak dan nelayan dengan menyediakan bantuan insentif seperti berikut:

- i. bantuan pembersihan kawasan, input pertanian seperti baja dan racun, bahan tanaman dan peralatan ladang;
- ii. insentif pembayaran pembajakan (subsidi) bagi tanaman padi;
- iii. agihan induk lembu, kambing dan bebiri kepada penternak yang layak;
- iv. bantuan peralatan perikanan bagi kegunaan aktiviti harian seperti bot gentian kaca, enjin sangkut, pukot dan tong ikan berinsulasi;
- v. pemberian insentif kepada pengusaha akuakultur marin skala kecil dan komuniti yang berupa bahan dan peralatan sistem ternakan, fasiliti sokongan atau infrastruktur sokongan mengikut kategori serta syarat;
- vi. pemberian insentif kepada penternak ikan air tawar berupa bantuan peralatan sokongan ladang seperti tangki ternakan, paip HDPE untuk saluran bekalan air kolam, net ternakan serta hapa untuk ternakan anak ikan, pam air dan alat pengudaraan kuasa elektrik;
- vii. bantuan peralatan kepada pengusaha rumpai laut seperti tali, pelampung penanaman, pancang kayu, bot gentian dan benih rumpai;
- viii. bantuan peralatan sokongan ternakan seperti tangki air dan kolam HDPE, makanan ikan dan pam air kepada pengusaha ikan hiasan; dan
- ix. kursus dan latihan bagi meningkatkan pengetahuan dan kapasiti golongan sasaran berkaitan.

SOALAN NO: 198

Bagi Daerah Kota Belud, bantuan yang telah diterima dan disasarkan adalah seperti berikut:

- i. insentif pembayaran pembajakan sebanyak RM200/ekar ataupun RM494/hektar melibatkan seramai 6,792 orang pesawah;
- ii. bantuan input baja organan kepada tujuh (7) orang peserta Taman Kekal Pengeluaran Makanan (TKPM) di Parlimen Kota Belud bermula tahun 2022;
- iii. bantuan input penternakan minimum 10 ekor kambing kepada penternak-penternak yang layak;

BIL	NAMA	BILANGAN AGIHAN TERNAKAN YANG TELAH DITERIMA	CATATAN
1	Lamjari Sarif Tawang	30 ekor Kambing Tenusu	Agihan 2020
2	Melvin Epin	30 ekor Kambing Cross Boer	
3	Rodalan bin Madtaah	15 ekor Kambing Cross Boer	Agihan 2021
4	Clay Jonis Riluan	10 ekor Kambing Cross Boer	
5	Evaleena Viona Patrick	10 ekor Kambing Cross Boer	
6	Zafiruddin Ziyaad bin Saijan	15 ekor Kambing Cross Boer	Agihan 2022
7	Nadiah binti Abdullah	10 ekor Kambing Cross Boer	

- iv. bantuan input perikanan yang berupa sistem ternakan bagi beberapa komoditi ternakan akuakultur marin seperti ketam bakau, lokan dan balat kepada 27 orang pengusaha skala kecil;
- v. menganjurkan program pelepasan benih ikan siakap, balat dan lampam jawa di perairan umum kawasan Parlimen Kota Belud;

SOALAN NO: 198

- vi. bantuan berbentuk benih ikan tilapia dan ikan keli, makanan formulasi ikan dan peralatan sokongan ladang seperti paip HDPE, shading net hitam, skup net, PE rope, tangki hitam HDPE, knotless net dan PE net kepada seramai 12 orang pengusaha akuakultur air tawar; dan
- vii. bantuan peralatan penanaman rumpai laut yang berupa benih, tali pelbagai saiz, pelampung, sampan gentian kaca kepada seramai 20 orang peserta daripada Kg. Buah Pandai, Kota Belud serta dua (2) buah pelantar penjemuran rumpai laut;
- viii. bantuan enjin sangkut kepada seramai 3 orang nelayan;
- ix. Skim Subsidi Diesel dan Petrol kepada nelayan kepada 181 pemilik vesel nelayan;
- x. bantuan input perikanan bagi beberapa komoditi ternakan akuakultur marin seperti ketam bakau, lokan dan balat kepada 29 orang pengusaha dengan nilai RM126,085;
- xi. Program Bantuan Khas Benih, Bibit dan Baja kepada 12 orang pengusaha akuakultur air tawar; dan
- xii. Elaun Sara Hidup Nelayan (ESHN) diberikan kepada 426 nelayan.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : PUAN ISNARAISSAH MUNIRAH MAJILIS
[KOTA BELUD]**

SOALAN

PUAN ISNARAISSAH MUNIRAH MAJILIS [KOTA BELUD] minta **MENTERI LUAR NEGERI** menyatakan sejauh manakah platform ASEAN berkesan dalam membanteras sindiket penipuan pekerjaan di luar negara yang semakin membimbangkan.

JAWAPAN

Setakat ini, isu membanteras sindiket penipuan pekerjaan di luar negara masih belum diperbincangkan di peringkat Menteri-menteri Luar Negeri ASEAN memandangkan ianya bersifat dua hala. Namun begitu, Kerajaan Malaysia sentiasa proaktif dalam mengenengahkan isu ini semasa pertemuan dan perbincangan sampingan dengan Negara-negara yang terlibat di sela-sela Mesyuarat ASEAN bagi mencari penyelesaian terbaik dalam isu ini demi keselamatan warganegara Malaysia di rantau ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN JAMALUDIN BIN YAHYA
[PASIR SALAK]**

SOALAN

TUAN JAMALUDIN BIN YAHYA [PASIR SALAK] minta **MENTERI PENDIDIKAN** menyatakan apakah langkah yang sedang dan telah diambil untuk memastikan Pelan Pendidikan Kebangsaan yang akan berakhir pada 2025 ini bagi menetapkan arah tuju dasar digital dalam pembelajaran dapat direalisasikan.

JAWAPAN

Tuan Yang di-Pertua,

Pelan Pembangunan Pendidikan Malaysia (PPPM) 2013-2025 memberikan tumpuan kepada pengajaran dan pembelajaran (PdP) yang mengupayakan teknologi seperti yang dinyatakan dalam Anjakan 7: Memanfaatkan ICT Bagi Meningkatkan Kualiti Pembelajaran di Malaysia.

Kementerian Pendidikan Malaysia (KPM) terus memperkasakan penggunaan teknologi dalam PdP dengan memberi tumpuan kepada peningkatan keupayaan pendidikan digital di sekolah yang merupakan satu daripada 7 Teras Nadi Keunggulan KPM dalam menerajui sistem pendidikan negara.

Untuk makluman Ahli Yang Berhormat, pada masa ini, KPM dalam proses akhir memuktamadkan Dasar Pendidikan Digital (DPD). KPM sedang berkerjasama dengan agensi-agensi berkaitan bagi memastikan kesemua pandangan dan input diambil kira dengan sewajarnya. KPM sentiasa komited untuk menambah baik sistem pembelajaran berasaskan digital secara berterusan untuk memenuhi keperluan pendidikan masa hadapan.

Sekian, terima kasih.

RT20

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN JAMALUDIN BIN YAHYA
[PASIR SALAK]**

SOALAN

TUAN JAMALUDIN BIN YAHYA [PASIR SALAK] minta **MENTERI PENDIDIKAN** menyatakan bagaimanakah konsep Karamah Insaniah yang digariskan dalam gerak kerja Kementerian dapat diterapkan dalam sistem pendidikan kebangsaan pada masa ini.

JAWAPAN

Tuan Yang di-Pertua,

Kementerian Pendidikan Malaysia (KPM) sangat menitikberatkan pembangunan adab, akhlak dan integriti bagi melahirkan Anak yang Baik lagi Cerdik (ABC) dalam memastikan generasi waris masa depan mempunyai jati diri yang kukuh untuk menghadapi cabaran masa mendatang.

Selaras dengan itu, KPM telah memperkenalkan 7 Teras Nadi Keunggulan KPM. Teras kedua memberi penekanan kepada aspek karamah insaniah, iaitu pembentukan adab, akhlak dan integriti bagi mewujudkan suasana harmoni yang akan menghindari gejala negatif. Aspek karamah insaniah ini bukan sahaja diterap dalam pengajaran dan pembelajaran di bilik darjah, malah turut diterapkan dalam pembelajaran di luar bilik darjah.

Dalam konteks pendidikan, aspek karamah insaniah yang diperkenalkan ini adalah untuk membentuk modal insan yang seimbang dan cemerlang berteraskan Falsafah Pendidikan Kebangsaan, berpegang teguh kepada prinsip Rukun Negara dan berpandukan ajaran agama melalui enam inisiatif atau program iaitu Pemupukan Perpaduan Kaum, Pembudayaan Adab, Akhlak dan Integriti Murid, Integrasi Nasional dalam Pendidikan, Integrasi Nasional Merentasi Kurikulum, Penghayatan Aspirasi Rukun Negara dan Pemerkasaan Pusat Kokurikulum Negeri.

Melalui pelaksanaan kurikulum, aspek karamah insaniah diintegrasikan dalam mata pelajaran Pendidikan Moral dan Pendidikan Sivik. Pendidikan Moral merupakan mata pelajaran teras untuk murid yang tidak menganut Agama Islam mengikut Akta Pendidikan 1996 (Akta 550). Mata pelajaran ini adalah mata pelajaran teras di peringkat sekolah rendah dan menengah untuk membentuk insan berakhlak mulia yang mengamalkan perlakuan bermoral secara bertanggungjawab, berintegriti, boleh menyumbang ke arah keharmonian dan kestabilan negara serta masyarakat global. Pendidikan Sivik merupakan penyepaduan dalam mata pelajaran Bahasa Melayu, Bahasa Inggeris, Sejarah, Pendidikan Islam dan

Pendidikan Moral yang dilaksanakan secara holistik berfokus kepada pembentukan perwatakan murid. Aspek karamah insaniah diterapkan dalam Perincian Pemetaan Pendidikan Sivik di sekolah rendah dan sekolah menengah melalui tajuk hak asasi manusia, pencegahan rasuah, anti buli dan perpaduan.

Dalam aktiviti kokurikulum, penerapan aspek karamah insaniah dalam kalangan murid disemai dan dipupuk melalui pasukan badan beruniform, kelab dan persatuan serta sukan dan permainan yang disertai oleh murid. Penyertaan murid dalam aktiviti ini tidak terhad kepada golongan tertentu sahaja malah melibatkan pelbagai latar belakang sosioekonomi, agama dan etnik. Aktiviti seperti ini mampu membentuk kesedaran dalam diri individu dan menjadi platform terbaik dalam penerapan perpaduan dan nilai-nilai murni dalam kalangan murid seperti yang dihasratkan.

Sekian, terima kasih.

RT21

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

**DARIPADA : TUAN JAMALUDIN BIN YAHYA
[PASIR SALAK]**

SOALAN

**TUAN JAMALUDIN BIN YAHYA [PASIR SALAK] minta MENTERI
SUMBER MANUSIA menyatakan:**

- a) adakah pihak Kementerian bercadang untuk menetapkan kembali umur persaraan kpd 55 tahun; dan
- b) apakah implikasi sekiranya Kerajaan mengubah tempoh had umur persaraan ini kepada 55 tahun terhadap kewangan negara.

JAWAPAN

Tuan Yang di-Pertua,

1. Umur persaraan minimum 60 tahun telah dikuat kuasa pada 1 Julai 2013 di bawah Seksyen 4(1) Akta Umur Persaraan Minimum 2012 [Akta 753]. Buat masa ini Kerajaan tidak bercadang untuk menurunkan umur persaraan daripada 60 tahun kepada 55 tahun. Oleh itu, umur persaraan minimum 60 tahun kepada pekerja swasta adalah masih terpakai.
2. Sekiranya terdapat pindaan umur persaraan kepada pekerja swasta, ianya tidak melibatkan sebarang kos atau peruntukan kewangan daripada pihak kerajaan. Apabila berlakunya persaraan, pesara boleh mengeluarkan simpanan mereka di Kumpulan Wang Simpanan Pekerja sepenuhnya dan tidak melibatkan wang kerajaan kerana ianya adalah caruman pekerja dan pihak majikan.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN JAMALUDIN BIN YAHYA
[PASIR SALAK]**

SOALAN

Tuan Jamaludin bin Yahya [Pasir Salak] minta **MENTERI DALAM NEGERI** menyatakan tindakan sewajarnya yang telah diambil oleh Kerajaan Pusat untuk menangani isu-isu hak kewarganegaraan yang masih wujud dan menimbulkan pelbagai masalah kepada masyarakat di negara ini.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Dalam Negeri (KDN) melalui Jabatan Pendaftaran Negara (JPN) sentiasa mengambil langkah proaktif dalam memastikan urusan pendaftaran dokumen pengenalan diri individu yang berkecualan dapat dilaksanakan dengan mudah di seluruh negara terutamanya di kawasan pedalaman dan luar bandar melalui program Menyemai Kasih Rakyat (MEKAR). Melalui program ini, JPN memberikan pelbagai perkhidmatan termasuklah khidmat nasihat berkaitan pendaftaran kad pengenalan, kelahiran dan kematian serta kewarganegaraan bagi memudahkan urusan rakyat untuk memiliki dokumen pengenalan diri mengikut kecutian.

Selain itu, Kementerian ini sedang melaksanakan tindakan segera secara berperingkat terhadap semua permohonan kewarganegaraan yang diterima dan sentiasa berusaha untuk memudahkan permohonan berkenaan selagi ia selaras dengan perundangan yang berkuatkuasa.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN JAMALUDIN BIN YAHYA
[PASIR SALAK]**

SOALAN

TUAN JAMALUDIN BIN YAHYA [PASIR SALAK] minta **MENTERI PENDIDIKAN** menyatakan :

- (a) apakah langkah yang diambil oleh pihak Kementerian berhubung isu kecurian wang Bantuan Awal Persekolahan yang berlaku baru-baru ini; dan
- (b) adakah pihak KPM bersedia untuk menyemak atau mengambil tindakan daripada segi prosedur dan tatacara pengeluaran wang oleh pihak sekolah berdasarkan garis panduan yang telah ditetapkan agar insiden seperti ini tidak berlaku lagi.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah mendapat kelulusan pendahuluan diri daripada Kementerian Kewangan (MOF) untuk menggantikan kehilangan wang BAP Tahun 2023 akibat insiden kecurian. Ini adalah bagi memastikan agihan BAP Tahun 2023 tidak terjejas. Peruntukan tersebut telah disalurkan ke akaun sekolah pada 3 Februari 2023 untuk 729 orang murid yang layak di SK Kampung Rincing, Beranang, Selangor.

Untuk makluman Ahli Yang Berhormat juga, prosedur pengeluaran wang tunai telah dinyatakan dengan jelas dalam Surat Pekeliling Kewangan (SPK) Bilangan 20 Tahun 2020: Bantuan Awal Persekolahan dan Arahan Perbendaharaan (AP 137) mengenai Tanggungjawab Bagi Wang Tunai Dalam Perjalanan. Berdasarkan Surat Pekeliling Kewangan Bilangan 20 Tahun 2020: Bantuan Awal Persekolahan, Perkara 6 menyatakan bahawa pihak sekolah hendaklah mematuhi tatacara pengeluaran wang tunai daripada bank yang selamat dan mengikut peraturan semasa seperti berikut:

- i. pengeluaran wang tunai sehingga RM10,000 oleh Pengetua/ Guru Besar hendaklah diiringi oleh dua orang guru; atau
- ii. bagi pengeluaran wang tunai melebihi RM10,000 Pengetua/ Guru Besar perlu mengambil langkah keselamatan tambahan seperti mendapatkan perkhidmatan polis pengiring berdasarkan Arahan Perbendaharaan (AP 137) mengenai Tanggungjawab Bagi Wang Tunai Dalam Perjalanan.

Penjelasan dan maklumat berkaitan pengurusan wang Bantuan Awal Persekolahan Tahun 2023 kepada Jabatan Pendidikan Negeri (JPN) dan juga Pejabat Pendidikan Daerah (PPD) telah diberi secara bertulis melalui surat bertarikh 29 Disember 2022 yang dilampirkan bersama Pekeliling Kewangan Bilangan 20 Tahun 2020: Bantuan Awal Persekolahan. Susulan daripada surat yang dikemukakan ini, satu sesi Taklimat Pelaksanaan Bantuan Awal Persekolahan Tahun 2023 telah dilaksanakan pada 11 Januari 2023. KPM sentiasa memberi taklimat secara berterusan bagi

SOALAN NO : 204

memastikan Pengetua dan Guru Besar mematuhi tatacara kelola pengurusan wang di sekolah.

Dalam masa yang sama, pihak kementerian sedang meneliti cadangan pengagihan wang Bantuan Awal Persekolahan secara kredit terus ke akaun murid sepenuhnya. Cadangan ini adalah bagi memastikan insiden seperti ini tidak berlaku lagi. Walau bagaimanapun, cadangan ini perlu mengambil kira kesediaan pihak bank dan kesukaran murid di pedalaman yang memerlukan kos yang tinggi bagi membuat urusan di bank.

Sekian, terima kasih.

RT22

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN JIMMY PUAH WEE TSE [TEBRAU]

SOALAN

Tuan Jimmy Puah Wee Tse [Tebrau] minta **MENTERI DALAM NEGERI** menyatakan dalam pecahan jumlah banduan di semua penjara di Malaysia dan kos pembiayaan setiap banduan di Malaysia.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan rekod Jabatan Penjara sehingga 3 Februari 2023, jumlah penghuni yang sedang menjalani hukuman dan ditahan di seluruh institusi penjara adalah seramai 72,495 orang yang melakukan pelbagai kesalahan. Perincian pecahan jumlah banduan di seluruh institusi penjara di Malaysia adalah seperti yang dinyatakan di maklumat tambahan.

Manakala kos keseluruhan bagi tujuan penyelenggaraan seorang banduan di penjara adalah sebanyak RM50.00. Kos tersebut adalah bagi tujuan penyediaan peralatan, kemudahan, perubatan, makanan, kawalan keselamatan, pengiringan, emolumen kakitangan dan lain-lain. Perincian pecahan anggaran kos keseluruhan perbelanjaan bagi seorang banduan untuk sehari adalah seperti yang dinyatakan di maklumat tambahan.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : TUAN JIMMY PUAH WEE TSE
[TEBRAU]**

SOALAN

TUAN JIMMY PUAH WEE TSE [TEBRAU] minta **MENTERI KESIHATAN** menyatakan apakah cadangan untuk menyelesaikan isu kekurangan parkir hospital di Johor terutamanya Hospital Sultan Ismail, Johor Bahru.

JAWAPAN

Tuan Yang di-Pertua,

1. Kementerian Kesihatan Malaysia (KKM) sedia maklum tentang isu kesesakan dan kekurangan tempat letak kereta di hospital-hospital KKM. Pada tahun 2022, kerja naik taraf tempat letak kereta telah dilaksanakan di Hospital Sultan Ismail, Johor Bahru dan sehingga kini, bilangan tempat letak kereta yang dapat disediakan adalah 1,791 petak untuk kegunaan kakitangan dan orang awam.

2. Namun begitu, usaha untuk mengurangkan kesesakan dan menambah tempat letak kereta di hospital terus diberi perhatian. Antara inisiatif yang sedang dirancang adalah seperti berikut:

- (i) melaksanakan *outsourcing* tempat letak kereta secara premis demis dengan ditawarkan kepada syarikat swasta untuk menguruskan tempat letak kereta hospital;
- (ii) kolaborasi/ kerjasama untuk menggunakan tempat letak kereta pihak PBT/syarikat swasta;
- (iii) memperkenalkan *valet parking* di hospital;
- (iv) menggalakkan penggunaan pengangkutan awam; dan
- (v) mempertimbang penyediaan tempat letak kereta bertingkat secara usaha sama dengan pihak swasta.

3. KKM juga mengalu-alukan sebarang usaha dan cadangan daripada pihak lain bagi menambah baik pengurusan tempat letak kereta di Hospital Sultan Ismail, Johor Bahru.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN JIMMY PUAH WEE TSE [TEBRAU]

SOALAN

TUAN JIMMY PUAH WEE TSE [TEBRAU] minta **MENTERI PENGANGKUTAN** menyatakan :

(a) jumlah keseluruhan kereta dan motosikal di Malaysia dalam pecahan negeri ; dan

(b) adakah Kerajaan berhasrat untuk melaksanakan dasar 'scrap' kereta bagi kenderaan lebih 15 tahun untuk mengurangkan jumlah kenderaan yang terlalu banyak di atas jalan.

JAWAPAN

Tuan Yang di-Pertua,

1. Untuk makluman Ahli Yang Berhormat, mengikut rekod Jabatan Pengangkutan Jalan (JPJ), **sehingga 31 Disember 2022**, jumlah terkumpul bagi **motosikal** adalah sebanyak **enam belas juta dua ratus lima ribu empat ratus tiga** unit (16,205,403) manakala motokar (Persendirian) pula adalah sebanyak **enam belas juta empat ratus tiga puluh lima ribu empat ratus dua puluh tiga** (16,435,423) unit.

2. Pecahan jumlah terkumpul motosikal dan motokar (Persendirian), bagi tempoh yang sama, mengikut negeri adalah seperti berikut:

Negeri	Motosikal	Motokar (Persendirian)
Perlis	97,930	28,224
Kedah	1,052,213	355,617
Pulau Pinang	1,512,849	1,139,043
Perak	1,453,809	776,039
Selangor	1,555,845	1,187,431
W.P. Kuala Lumpur	1,970,865	4,125,631
W.P. Putrajaya	94,172	55,127
W.P. Labuan	22,603	55,546
Negeri Sembilan	593,673	346,607
Melaka	502,083	350,065
Johor	2,006,188	1,537,310
Pahang	662,530	401,714
Terangganu	458,606	215,388

Kelantan	575,645	319,704
Sabah	457,106	695,558
Sarawak	906,106	858,384
Rakan-Niaga	2,283,180	3,988,035
Jumlah	16,205,403	16,435,423

3. Secara amnya, Kementerian Pengangkutan (MOT) bersama agensi-agensi Kerajaan lain amat memberi perhatian kepada isu lambakan kenderaan motor yang tidak lagi sesuai digunakan di atas jalan raya sama ada dari aspek *road-worthiness* atau keselamatan penggunaannya serta dari aspek pencemaran kepada alam sekitar. Dalam hal ini, MOT sedia bekerjasama dengan agensi Kerajaan terlibat untuk mengkaji hala tuju jangka masa panjang mengenai perkara ini, termasuk mengkaji konsep penamatan penggunaan kenderaan usang. Pelaksanaan konsep ini berupaya menyumbang kepada peningkatan tahap keselamatan jalan raya, mengurangkan pencemaran daripada kenderaan yang telah lama dan berusia serta merancakkan permintaan kenderaan yang akan menyumbang kepada kelestarian sektor automotif negara.

4. Menyedari akan kepentingan ini, MOT sedang dalam proses membangunkan sistem *De-Registration* atau pembatalan pendaftaran kenderaan secara atas talian yang bertujuan untuk memudahkan mana-mana individu yang berhasrat untuk melupuskan kenderaan buruk mereka dengan membuat pembatalan pendaftaran kenderaan yang akan ditukar hakmilik kepada syarikat pelupusan sisa pepejal yang diiktiraf. Dengan pelaksanaan inisiatif ini, diharap ianya akan membuka jalan keluar terhadap lambakan kenderaan buruk dan usang.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

DARIPADA : YB TUAN JIMMY PUAH WEE TSE (TEBRAU)

SOALAN

TUAN JIMMY PUAH WEE TSE [TEBRAU] minta **MENTERI KERJA RAYA** menyatakan adakah Kerajaan mempunyai cadangan untuk menambah lane Lebuhraya Utara - Selatan di negeri Johor yang hanya mempunyai 2 lane setakat hari ini.

JAWAPAN

Tuan Yang Di-Pertua,

Untuk makluman Ahli Yang Berhormat, Agensi Pusat telah meluluskan cadangan projek **Pembinaan Lorong Tambahan Lebuhraya Utara Selatan (Plus) Dari Yong Peng Utara Ke Senai Utara Fasa 1 : Senai (U) – Sedenak** pada *Rolling Plan 3* (RP3), Rancangan Malaysia Kedua Belas (RMKe-12) dengan anggaran kos RM 525 juta.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN JIMMY PUAH WEE TSE
[TEBRAU]**

SOALAN

TUAN JIMMY PUAH WEE TSE [TEBRAU] minta **PERDANA MENTERI** menyatakan status pembinaan bangunan Mahkamah Tinggi baru di Johor Bahru yang telah ditangguhkan berpuluh-puluh tahun.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, pada masa ini Mahkamah Johor Bahru beroperasi di tiga (3) premis berbeza bagi menampung kapasiti kes semasa. Bangunan Mahkamah Tinggi Johor Bahru merupakan bangunan warisan yang terletak di Jalan Dato' Onn. Susulan keadaan bangunan yang kian usang, kerja-kerja naik taraf di bangunan Mahkamah Tinggi telah dilaksanakan pada tahun 1990, 2000 dan 2021. Selaras dengan pertambahan keperluan semasa, bangunan Mahkamah Sesyen dan Mahkamah Majistret Johor Bahru mula dibina pada tahun 1997 di Jalan Ayer Molek bersebelahan dengan bangunan Mahkamah Tinggi Johor Bahru. Premis tambahan bagi menempatkan Mahkamah Sivil Johor Bahru pula beroperasi secara sewaan di Menara MSC Cyberport, Jalan Bukit Meldrum bermula pada tahun 2010 bagi menangani kekurangan ruang kerja di bangunan sedia ada.

2. Atas dasar keprihatinan untuk meningkatkan kecekapan penyampaian perkhidmatan Badan Kehakiman Negara kepada orang awam, Kerajaan telahpun meluluskan pelaksanaan Projek Pembinaan Kompleks Mahkamah Baharu Johor Bahru dalam *Rolling Plan* Kedua (RP2) Tahun 2017 di bawah Rancangan Malaysia Kesebelas (RMKe-11). Proses perolehan tanah bagi projek ini selesai pada tahun 2021 setelah persetujuan dicapai di antara Kerajaan Persekutuan dan Kerajaan Negeri Johor.

3. Tapak yang dipersetujui terletak dalam kawasan pentadbiran Kerajaan Negeri di Kota Iskandar. Kompleks Mahkamah Baharu Johor Bahru bakal dilengkapi dengan satu (1) Bilik Bicara Mahkamah Khas, tujuh (7) Bilik Bicara Mahkamah Tinggi, lapan (8) Bilik Bicara Mahkamah Sesyen dan lapan (8) Bilik Bicara Mahkamah Majistret. Projek ini dijadualkan mengambil masa selama 3 tahun bermula pada 8 Februari

2023 dan dijangka siap pada tahun 2026. Pihak Jabatan Kerja Raya (JKR) telah dilantik sebagai Agensi Pelaksana.

4. Kerajaan yakin Kompleks Mahkamah Baharu Johor Bahru ini dapat memenuhi keperluan Mahkamah serta dapat memberi keselesaan dan persekitaran yang kondusif kepada semua pengguna mahkamah apabila siap kelak. Kerajaan juga komited dalam memastikan prinsip *access to justice* dan penyampaian perkhidmatan yang cekap kepada orang awam tercapai melalui penyediaan prasarana yang terbaik.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS 2023**

PERTANYAAN : BUKAN LISAN

**DARIPADA : TUAN HAJI KAMAL BIN ASHAARI
[KUALA KRAU]**

SOALAN

TUAN HAJI KAMAL BIN ASHAARI [KUALA KRAU] minta **PERDANA MENTERI** menyatakan strategi dari pihak Kementerian untuk menangani sistem pembuangan dan pelupusan sampah yang tidak dipantau dan diurus di FELDA.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, pada masa kini sistem pembuangan dan pelupusan sampah diuruskan oleh rancangan masing-masing dengan pemantauan daripada pihak FELDA di Wilayah. Pihak FELDA mengadakan kerjasama dengan Pihak Berkuasa Tempatan (PBT) di kawasan masing-masing dalam memastikan sampah dapat diselenggara dan dibuang dengan baik.
2. Selain itu juga, jalinan kerjasama turut dibuat dengan kontraktor yang berdaftar dan mempunyai lesen Pengurusan Sisa Pepejal serta dibuang ke tempat yang telah diwartakan. Dari semasa ke semasa FELDA sememangnya memantau pembuangan dan pelupusan sampah dengan cara yang terbaik.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : TUAN HAJI KAMAL BIN ASHAARI
[KUALA KRAU]

SOALAN

TUAN HAJI KAMAL BIN ASHAARI [KUALA KRAU] minta **MENTERI PENDIDIKAN** menyatakan langkah-langkah Kerajaan bagi menangani isu kenaikan tambang bas sekolah pada tahun ini.

JAWAPAN

Tuan Yang di-Pertua,

1. Bagi tambang bas dan van sekolah, Kerajaan telah memutuskan bermula pada tahun 2015 untuk tidak lagi menetapkan kadar tambang yang dikenakan, dengan tujuan untuk menjadikan industri ini lebih mapan serta mutu perkhidmatan dipertingkatkan dari aspek keselamatan dan keselesaan anak-anak.
2. Kadar tambang bas dan van sekolah pada masa ini adalah lebih fleksibel dan ditetapkan menerusi rundingan bersama antara pengendali bas sekolah dan ibu bapa bagi mendapatkan kadar tambang yang menang-menang berdasarkan keadaan semasa seperti kos operasi, tempoh serta waktu perkhidmatan dan lain-lain. Malah, sekiranya ibu bapa tidak bersetuju dengan kadar yang ditetapkan oleh pengendali maka mereka mempunyai pilihan untuk mendapatkan perkhidmatan daripada pengendali bas sekolah yang lain. Maka, pengendali tidak akan sewenang-wenangnya menaikkan tambang yang melampau kerana mereka akan kehilangan pelanggan.

3. Selain itu Kerajaan juga sentiasa membuat pemantauan bagi memastikan pengendali tidak menaikkan tambang dengan sesuka hati atau terlalu tinggi tanpa berbincang dengan pihak ibubapa. Kerajaan juga membuat libat urus bersama persatuan-persatuan pengendali bas sekolah untuk memastikan keselamatan kenderaan dan penumpang sentiasa diberikan keutamaan. Pengendali juga perlu mematuhi syarat-syarat lesen yang ditetapkan serta boleh dikenakan tindakan di bawah Akta Pengangkutan Awam Darat (Akta 715) sekiranya didapati melanggar syarat lesen tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI KAMAL BIN ASHAARI
[KUALA KRAU]**

SOALAN

TUAN HAJI KAMAL BIN ASHAARI [KUALA KRAU] minta **MENTERI PENDIDIKAN** menyatakan perancangan Kerajaan mengenai bentuk pendidikan awal kepada pengundi-pengundi 18.

JAWAPAN

Tuan Yang di-Pertua,

Untuk makluman Ahli Yang Berhormat, kandungan yang berkaitan pilihan raya telah dimasukkan secara khusus dalam mata pelajaran Sejarah dan elemen berkaitan pilihan raya dilaksanakan dalam pendidikan sivik serta aktiviti kokurikulum.

Sebagai usaha membentuk karakter murid menjadi warganegara yang bertanggungjawab dan cinta akan negara, bermula dari sekolah rendah, murid diajar mengenai Perlembagaan Persekutuan dan tanggungjawab rakyat kepada negara. Ini termasuk latar belakang pengetahuan asas sejarah negara melalui tema “Sejarah Awal Negara, Kedaulatan Negara dan Kemakmuran Negara Kita”.

Selaras dengan kematangan usia dan tahap pengetahuan, murid sekolah menengah didedahkan dengan lebih mendalam tentang politik melalui tema “Sejarah Kita dan Dunia, Warisan Bangsa, Kedatangan Kuasa Asing, Pembinaan Negara serta Malaysia dan Masa Hadapan”. Ini adalah bertujuan supaya murid memahami kepentingan peranan mereka sebagai warganegara yang bertanggungjawab untuk mengekalkan keharmonian dan kestabilan negara.

Bagi memupuk kesedaran politik melalui aktiviti kokurikulum pula, KPM menjalin kerjasama dengan Jabatan Penerangan Malaysia (JaPen), bagi melaksanakan pelbagai aktiviti patriotisme melalui Kelab Malaysiaku. KPM turut menyokong program yang dianjurkan oleh Jabatan Perpaduan Negara dan Integrasi Nasional (JPNIN) melalui Kelab Rukun Negara yang merangkumi pelbagai aktiviti berteraskan kepada pengukuhan pengetahuan, pemahaman, penghayatan dan pengamalan Rukun Negara.

KPM berpandangan pelaksanaan kandungan kurikulum dan aktiviti kokurikulum sedia ada membolehkan murid memperoleh pengetahuan, pemahaman serta penghayatan tentang pendidikan politik dan perlembagaan persekutuan. KPM yakin bahawa pengetahuan dan penghayatan tersebut boleh diaplikasikan dalam kehidupan harian serta

SOALAN NO : 212

dapat mempersiapkan murid untuk melaksanakan hak dan tanggungjawab.

Sekian, terima kasih.

RT23

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI KAMAL BIN ASHAARI
[KUALA KRAU]**

SOALAN

TUAN HAJI KAMAL BIN ASHAARI [KUALA KRAU] minta **PERDANA MENTERI** menyatakan status terkini mengenai isu tanah lot FELDA untuk generasi kedua dan seterusnya, adakah pengagihan tanah kosong FELDA kepada generasi tersebut akan dilaksanakan ataupun ada penempatan lain yang akan disediakan kepada mereka.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Kerajaan telah memperkenalkan semula model pembangunan perumahan berasaskan konsep bina sendiri oleh Generasi Kedua. Melalui model ini, Generasi Kedua akan ditawarkan tapak rumah dan reka bentuk yang standard oleh kerajaan.
2. Bagi melaksanakan pembangunan di atas, Garis Panduan Pemberimilikan Lot Kediaman Kepada Generasi Baharu FELDA telah diluluskan oleh Kerajaan sebagai panduan pelaksanaan kepada Generasi Kedua dan jawatankuasa di rancangan.
3. Lot tapak rumah yang ditawarkan ini adalah sebahagian daripada kawasan kosong dalam tanah kampung yang ditadbir melalui penguatkuasaan Akta Penempatan Berkelompok 1960 (Akta 530) (GSA). Sebelum lot-lot ini boleh ditawarkan, permohonan pembatalan status tanah di bawah GSA perlu dilakukan dengan persetujuan Kerajaan Negeri dan Menteri yang bertanggungjawab ke atas FELDA. Pengagihan lot tapak rumah di atas adalah tertakluk kepada kekosongan dan kesesuan di tanah dalam rancangan.
4. Tempoh dua (2) tahun diperlukan bagi tujuan pembatalan tanah berstatus GSA dan kelulusan hakmilik kerana ia melibatkan pentadbiran penguatkuasaan Akta 530 dan Kanun Tanah Negara di peringkat Pentadbir Tanah Negeri dan Kementerian. Proses pemilikan lot tapak rumah diuruskan oleh Jawatankuasa Bertindak di peringkat Rancangan bagi memudahkan urusan permohonan dan kelulusan Pihak Berkuasa Negeri dan juga proses pemilihan peserta.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI KAMAL BIN ASHAARI
[KUALA KRAU]**

SOALAN

Minta **MENTERI PENDIDIKAN TINGGI** menyatakan apakah status pemberian geran secara tahunan kepada IPTA dan bagaimanakah kaedah pengagihan geran tersebut dilaksanakan di peringkat Kementerian.

JAWAPAN

Tuan Yang di-Pertua,

1. Seperti tahun-tahun sebelum ini, Kerajaan masih mengekalkan pemberian geran mengurus tahunan kepada semua UA.
2. Universiti Penyelidikan (RU) diperuntukkan **100%** emolumen sahaja.
3. Bukan Universiti Penyelidikan (NON-RU) diperuntukkan **100%** emolumen berserta sebahagian peruntukan non emolumen.
4. Geran mengurus tersebut diagihkan kepada IPTA pada setiap suku tahunan seperti digariskan dalam Pekeliling Perbendaharaan Malaysia PB 1.2 Anggaran Perbelanjaan Persekutuan iaitu penyaluran **50%** daripada peruntukan yang diluluskan dibuat secara suku tahunan oleh Kementerian dan baki **50%** perlu mendapat kelulusan Kementerian Kewangan (MOF).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : DR. KELVIN YII LEE WUEN [BANDAR KUCHING]

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan berapa bilangan kekosongan jawatan pegawai rumah, pegawai perubatan, pakar perubatan, jururawat, pembantu perubatan, pegawai farmasi dan pegawai pergigian di KKM setiap tahun antara tahun 2013 dan 2022.

JAWAPAN

Tuan Yang di-Pertua,

Bilangan kekosongan jawatan Pegawai Perubatan Siswazah, Pegawai Perubatan, Pakar Perubatan, Jururawat, Penolong Pegawai Perubatan, Pegawai Farmasi dan Pegawai Pergigian di Kementerian Kesihatan tahun 2013 hingga 2022 adalah seperti berikut:

Tahun	Pegawai Latihan Siswazah	Pegawai Perubatan	Pakar Perubatan	Jururawat	Penolong Pegawai Perubatan	Pegawai Farmasi	Pegawai Pergigian
2013	388	2,324	968	4,953	819	491	422
2014	712	270	456	9,872	1,878	1,347	422
2015	845	76	310	5,261	976	629	133
2016	856	0	351	2,087	865	489	0
2017	6,290	0	0	1,057	374	670	435
2018	4,206	0	0	1,618	607	834	710
2019	1,125	0	0	969	764	391	598
2020	1,215	2,125	0	2,106	585	487	516
2021	1,283	3,368	0	2,224	1,053	211	327
2022	1,312	5,992	0	4,420	1,073	410	443

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : DR. KELVIN YII LEE WUEN [BANDAR KUCHING]

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan berapa bilangan pegawai rumah, pegawai perubatan, pakar perubatan, jururawat, pembantu perubatan, pegawai farmasi dan pegawai pergigian yang telah meletakkan jawatan di KKM setiap tahun antara tahun 2013 dan 2022. Apakah alasan utama yang diberikan.

JAWAPAN

Tuan Yang di-Pertua,

1. Berdasarkan rekod Kementerian Kesihatan, jumlah petugas kesihatan mengikut skim perkhidmatan yang telah meletakkan jawatan sejak tahun 2013 hingga 2022 adalah seperti berikut:

Tahun	Pegawai Perubatan Siswazah	Pegawai Perubatan	Pakar Perubatan	Jururawat	Penolong Pegawai Perubatan	Pegawai Farmasi	Pegawai Pergigian
2013	219	487	106	51	12	198	134
2014	193	546	143	84	6	207	198
2015	225	549	164	188	12	247	274
2016	244	630	158	127	7	196	294
2017	318	661	170	184	16	193	261
2018	303	599	198	196	20	127	379
2019	592	798	229	92	30	556	492
2020	544	498	161	95	26	442	437
2021	768	238	134	221	82	287	328
2022	420	1,276	168	405	123	239	459

2. Antara alasan yang diberikan petugas kesihatan diatas untuk meletakkan jawatan adalah seperti yang berikut:

- (i) berkhidmat dalam sektor swasta dan Badan Berkanun;
- (ii) sebab peribadi;
- (iii) melanjutkan pelajaran;
- (iv) masalah kesihatan;
- (v) berhijrah ke luar negara; serta
- (vi) membuka klinik sendiri.

Sekian terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : DR. KELVIN YII LEE WUEN
[BANDAR KUCHING]**

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan apakah kadar vaksinasi kanak-kanak di Malaysia daripada golongan yang dipinggirkan seperti pelarian, komuniti tanpa kewarganegaraan dan migran tidak berdokumen. Atas pertimbangan kesihatan awam, apakah rancangan Kementerian untuk memberi vaksin kepada golongan yang dipinggirkan untuk mencegah penyakit yang boleh dibendung melalui vaksin.

JAWAPAN

Tuan Yang di-Pertua,

1. Sehingga 1 Februari 2023, seramai 27,538,078 (84.3%) penduduk telah menerima Kementerian Kesihatan Malaysia melalui perkhidmatan kesihatan primer di seluruh negara menyediakan perkhidmatan kepada kanak-kanak bukan warganegara termasuk suntikan imunisasi bagi mencegah penyakit cegahan vaksin.

2. Dari tahun 2018 hingga 2021, pemberian vaksin kepada kanak-kanak bukan warganegara (termasuk yang mempunyai dokumen dan tiada dokumen) adalah seperti berikut:

Liputan vaksinasi DTaP-IPV-HepB-Hib dos ketiga (diberi semasa umur 5 bulan) kepada kanak-kanak Bukan Warganegara (BWN) tahun 2018 hingga 2021:

Tahun	Bil.dos disuntik kepada kanak-kanak Bukan Warganegara (BWN)**	Peratusan BWN yang disuntik (dari jumlah kelahiran BWN)	*Kelahiran Hidup BWN (berdaftar dengan JPN)
2018	7605	45.6%	16,669
2019	7610	42.2%	18,028
2020	6209	34.0%	18,258
2021	5968	39.0%	15,284

Nota: *Bilangan BWN yang berdaftar dengan Jabatan Pendaftaran Negara (JPN) adalah yang mempunyai dokumen (legal)

**Bilangan kanak-kanak BWN yang disuntik termasuk juga yang tiada dokumen dan datang ke klinik kesihatan primer untuk mendapatkan perkhidmatan

3. Bagi menggalakkan pemberian vaksin kepada golongan tersebut, KKM telah mengambil langkah-langkah berikut:

(a) Pengecualian caj imunisasi rutin polio kepada kanak-kanak bukan warganegara yang berumur tujuh (7) tahun ke bawah

Di bawah Perintah Fi (Perubatan) (Kos Perkhidmatan) 2014, caj perkhidmatan imunisasi yang dikenakan kepada kanak-kanak bukan warganegara yang datang ke fasiliti kesihatan Kerajaan adalah sebanyak RM40 (sebagai fi pendaftaran termasuk perundingan dan ubat) dan RM40 (sebagai fi suntikan imunisasi bagi setiap suntikan vaksin).

Walau bagaimanapun, bagi mengelakkan wabak polio daripada berulang di Malaysia, pengecualian caj imunisasi rutin polio diberikan kepada kanak-kanak bukan warganegara yang berumur tujuh (7) tahun ke bawah meliputi caj pendaftaran dan suntikan. Kini, vaksin polio diberikan dalam bentuk vaksin kombinasi enam serangkai DTaP-IPV-HepB-Hib (*difteria-tetanus-accellular pertussis – inactivated polio vaccine – Hepatitis B – Haemophilus influenzae type b*). Dengan pelaksanaan ini, **kanak-kanak yang menerima vaksin ini secara percuma** tidak hanya mendapat perlindungan terhadap polio, malah mendapat perlindungan terhadap difteria, tetanus, pertussis, Hepatitis B dan jangkitan *Haemophilus influenzae type b* (Hib).

(b) Pemberian imunisasi di luar fasiliti kesihatan statik oleh pasukan bergerak KKM

Pemberian imunisasi dilaksanakan di luar fasiliti kesihatan statik oleh pasukan bergerak KKM. Langkah ini bertujuan memastikan semua kanak-kanak tidak kira di mana mereka berada termasuk di pulau-pulau dan kawasan pedalaman menerima suntikan vaksin tanpa mengira status kewarganegaraan. Aktiviti imunisasi tambahan (*supplementary immunisation activities*) secara jangkau luar (*outreach*) turut dilaksanakan di lokaliti yang melaporkan kes atau wabak penyakit cegahan vaksin, bertujuan bagi meningkatkan tahap imuniti dan mencegah penularan jangkitan.

- (c) Kolaborasi dengan agensi lain dan pertubuhan bukan kerajaan (NGO) bagi pemberian imunisasi kepada golongan pelarian.

Sejak tahun 2020, pemberian imunisasi di kalangan pelarian, Program Bantuan Kemanusiaan Pelarian Rohingya dijalankan secara berkala menggunakan peruntukan *Dana Qatar Fund For Development* (QFFD). Pemberian imunisasi dilakukan di lima (5) buah klinik kesihatan statik yang telah diwujudkan seperti berikut:

Bil.	Nama dan Lokasi	NGO Terlibat
1	Klinik Statik QFFD Ampang, Selangor	MERCY Malaysia
2	Klinik Statik QFFD Kajang, Selangor	MERCY Malaysia
3	Klinik Statik QFFD Selayang, Selangor	IMARET
4	Klinik Statik QFFD Kota Tinggi, Johor	IMARET
5	Klinik Statik QFFD Sg. Petani, Kedah	Malaysian Relief Agency (MRA)

Sejak 2020 hingga Disember 2022, seramai 20,463 orang pelarian telah menerima pelbagai vaksin melalui program ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : DR. KELVIN YII LEE WUEN [BANDAR KUCHING]

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan jumlah kes cubaan membunuh diri dari tahun 2020-2023 di seluruh negara dan perincian mengikut negeri dan umur dan jantina mangsa.

JAWAPAN

Tuan Yang- di Pertua,

1. Kementerian Kesihatan Malaysia (KKM) melalui Pusat Informatik Kesihatan (PIK), KKM mengumpulkan data-data bagi kes mencederakan diri (*self-harm*) termasuk cubaan membunuh diri yang mendapatkan rawatan di hospital KKM.
2. Pada tahun 2022, sejumlah 1,279 kes mencederakan diri direkodkan berbanding 1,036 kes pada tahun 2021. Ini merupakan peningkatan sebanyak 23.5% (243 kes) berbanding tahun 2021.
3. Analisis data menunjukkan dalam tempoh tiga (3) tahun iaitu 2020-2022, bilangan lelaki mencederakan diri adalah lebih tinggi iaitu sebanyak 1,782 kes berbanding bilangan perempuan (1,671 kes). Daripada segi kategori umur, bilangan kes mencederakan diri yang paling tinggi adalah dalam kategori umur 20-39 tahun iaitu 50.4% dari keseluruhan kes.
4. Analisis data juga menunjukkan bahawa dalam tempoh tiga (3) tahun tersebut, tiga (3) negeri menunjukkan bilangan kes tertinggi adalah Selangor (785 kes); diikuti oleh Johor (542 kes) dan Sarawak (334 kes).

Sekian, terima kasih.

Bilangan Kes Mencederakan Diri Sendiri Yang Mendapatkan Rawatan di Hospital KKM Bagi Tempoh 2020-2022.

Jadual 1: Bilangan Kes Mencederakan Diri sendiri bagi tempoh tahun 2020-2022

Tahun	2020	2021	2022	Jumlah
Bilangan Kes	1,146	1,036	1,279	3,461

Jadual 2: Bilangan Kes Mencederakan Diri Sendiri Mengikut Jantina bagi tempoh tahun 2020-2022

JANTINA	2020	2021	2022	Jumlah
Lelaki	510	467	805	1,782
Perempuan	636	567	468	1,671
Tiada Maklumat	0	2	0	2
JUMLAH	1,146	1,036	1,279	3,455

Jadual 3: Bilangan Kes Mencederakan Diri sendiri Mengikut Umur bagi tempoh tahun 2020-2022

UMUR (TAHUN)	2020	2021	2022	Jumlah
0-19	247	248	333	828
20-39	625	514	605	1,744
40-59	204	189	227	620
60 ke atas	70	84	114	268
Tiada Maklumat	0	1	0	1
JUMLAH	1,146	1,036	1,279	3,461

Jadual 4: Bilangan Kes Mencederakan Diri Sendiri Mengikut Pecahan Negeri bagi tempoh tahun 2020-2022

NEGERI	2020	2021	2022	Jumlah
Selangor	273	203	309	785
Johor	183	154	205	542
Sarawak	95	94	145	334
Perak	99	103	104	306

NEGERI	2020	2021	2022	Jumlah
Negeri Sembilan	107	107	81	295
Pulau Pinang	61	100	96	257
Sabah	71	65	82	218
Kedah	52	40	58	150
Pahang	49	39	39	127
WP Kuala Lumpur	43	25	41	109
Terengganu	27	28	39	94
Kelantan	26	26	36	88
Melaka	38	21	17	76
WP Putrajaya	18	22	22	62
Perlis	3	6	4	13
WP Labuan	1	3	1	5
JUMLAH	1,146	1,036	1,279	3,461

(Sumber: Pusat Informatik Kesihatan (PIK), KKM)

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : DR. KELVIN YII LEE WUEN [BANDAR
KUCHING]**

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan jumlah *backlog* prosedur-prosedur atau rawatan kes bukan COVID-19 yang telah ditangguhkan disebabkan COVID-19 dan apakah berapakah jumlah *backlog* yang berjaya dikurangkan dalam beberapa bulan ini dan anggaran bila kesemua *backlog* dapat diselesaikan. Perincikan jenis prosedur-prosedur tersebut mengikut kategori.

JAWAPAN

Tuan Yang di-Pertua,

1. Sehingga 30 September 2021, terdapat sebanyak 57,355 kes tertunggak di hospital-hospital KKM. 53,785 kes daripadanya adalah berkaitan prosedur pembedahan yang meliputi pembedahan am, pembedahan neuro, pembedahan pediatrik, pembedahan plastik dan rekonstruktif, pembedahan kardiorasik, pembedahan vaskular, urologi, ginekologi, ortopedik, oftalmologi dan otorinolaringologi. Manakala baki 3,570 kes adalah berkaitan prosedur bukan pembedahan. Ini termasuk *sleep study, lung function test, stem cell procedure, radiotherapy and CT simulation* dan *coronary angiography*.

2. Bagi menangani isu kes-kes tertunggak tersebut, beberapa inisiatif telah dilakukan oleh KKM, iaitu:

- i. Penyumberluaran pesakit KKM ke hospital swasta;
- ii. Pembukaan semula dewan-dewan bedah elektif di hospital-hospital KKM secara berperingkat bermula pada bulan Oktober 2021;
- iii. Inisiatif pembedahan elektif hari Sabtu dari jam 8 pagi hingga 5 petang di hospital-hospital berpakar di seluruh negara bermula pada bulan Disember 2021; dan
- iv. Melaksanakan pembedahan secara besar-besaran (*Mass Surgery Initiative*) di beberapa negeri seperti:
 - a. *Mass Urology Surgery Initiative* di Hospital Selayang pada bulan Februari 2022;
 - b. *Mass Cataract Surgery Initiative* di Hospital Tawau pada bulan Mac 2022; dan

- c. *Tawau Surgical Carnival Initiative* di Hospital Tawau pada bulan Jun 2022.

3. Di bawah inisiatif-inisiatif di atas, sebanyak 53,315 prosedur pembedahan dan 3,570 prosedur bukan pembedahan tertunggak telah dilaksanakan. Justeru, jumlah kes tertunggak sehingga 31 Disember 2022 adalah sebanyak 470 kes, iaitu pengurangan sebanyak 99.2% berbanding pada 30 September 2021. Baki kes-kes tertunggak tersebut hanya melibatkan prosedur daripada disiplin pembedahan pediatrik.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

SOALAN

TUAN KESAVAN A/L SUBRAMANIAM [SUNGAI SIPUT] minta **MENTERI PENDIDIKAN** menyatakan status terkini peruntukan 8.4 juta untuk pembinaan bangunan baru sekolah SJK(T) Ladang Dovenby, Sungai Siput dan pendirian Lembaga Pengelola Sekolah (LPS).

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah diluluskan projek pembinaan bangunan tapak baharu Sekolah Jenis Kebangsaan Tamil (SJKT) Ladang Dovenby, Perak di bawah Rancangan Malaysia Ke-11 *Rolling Plan* 1 Tahun 2016.

Pada 23 Julai 2019, KPM telah dimaklumkan oleh pemilik tanah bahawa mereka bersetuju untuk menyerahkan tapak sekolah ini kepada lembaga pengelola sekolah (LPS). Oleh yang demikian adalah menjadi tanggungjawab LPS untuk memuktamadkan urusan penyerahan tapak ini di Pejabat Pengarah Tanah dan Galian Negeri Perak terlebih dahulu.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN(BERTULIS)

**DARIPADA : TUAN KESAVAN A/L SUBRAMANIAM
(SUNGAI SIPUT)**

SOALAN

TUAN KESAVAN A/L SUBRAMANIAM (SUNGAI SIPUT) minta **MENTERI PEMBANGUNAN USAHAWAN DAN KOPERASI** menyatakan di bawah program PRIHATIN dan PENJANA, pengusaha Perusahaan Kecil dan Sederhana diberi bantuan kewangan dan peluang latihan percuma oleh pelbagai Kementerian, Jabatan, Agensi dan Unit Pelaksanaan Ekonomi Wilayah dan Negeri. Berapa jumlah Pengusaha Perusahaan Kecil dan Sederhana yang berjaya mendapat pelbagai Latihan Kemahiran Perniagaan dan Pemasaran sejak pandemik COVID-19.

JAWAPAN

Tuan Yang di-Pertua,

1. Kementerian Pembangunan Usahawan dan Koperasi (KUSKOP) telah melaksanakan pelbagai program latihan keusahawanan kepada usahawan perusahaan mikro, kecil dan sederhana (PMKS) walaupun dalam tempoh pandemik COVID-19. Penggunaan teknologi telah dimanfaatkan supaya latihan keusahawanan juga dapat dilaksanakan secara atas talian merangkumi program-program latihan, bimbingan dan bantuan kewangan seperti berikut:

i. **SME Corp.** telah melaksanakan **Program Tunas Usahawan Belia Bumiputera (TUBE)** untuk menggalakkan dan meningkatkan golongan belia menceburi bidang perniagaan. Pada tahun 2020 sehingga 2021, sejumlah 781 belia Bumiputera telah menerima manfaat dengan kos pelaksanaan program berjumlah RM12.13 juta. Pada tahun 2022, sejumlah 401 belia Bumiputera telah dilatih dengan peruntukan berjumlah RM5 juta;

Program *Micro Connector* pula menyediakan bantuan kepada perusahaan mikro dan juga bantuan kemahiran kepada komuniti B40 untuk memulakan perniagaan, meningkatkan kemahiran dan pendapatan komuniti B40 melalui perniagaan. Pada tahun 2020 sehingga 2021, seramai 2,796 peserta telah menyertai program ini dengan kos pelaksanaan program berjumlah RM3.67 juta. Pada tahun 2022, sejumlah 3,652 peserta telah mendapat manfaat melalui program ini dengan peruntukan berjumlah RM5 juta;

ii. **Bank Rakyat** telah melaksanakan Kursus Asas Keusahawanan melalui siri Jelajah Memperkasakan Usahawan menerusi Jelajah Aspirasi Keluarga Malaysia - Santai Namun Sampai (SNS), Program RAKYATpreneur dan Bank Rakyat UNIPreneur. Bagi tahun 2022, seramai 2,864 usahawan telah menerima latihan kemahiran perniagaan dan pemasaran menerusi program-program tersebut dengan kos pelaksanaan program sebanyak RM4.954 juta yang turut merangkumi suntikan dana kepada usahawan;

iii. **Institut Keusahawanan Negara (INSKEN)** telah melaksanakan Program Latihan INSKEN (IBT) dan Kursus Asas Keusahawanan (KAK) dengan peruntukan sebanyak RM3 juta, dan dengan peruntukan berjumlah RM4.3 juta untuk melaksanakan Program Bimbingan Jualan Atas Talian (*e-Board*) dan Program Bimbingan Pembangunan Industri Pertanian (ACID) pada tahun 2020 hingga 2021. Dalam tempoh tersebut, seramai 12,622 orang peserta telah menerima latihan dan bimbingan menerusi program-program yang telah dijalankan;

iv. **PERNAS** menerusi *Franchise Institute* telah melaksanakan pelbagai program latihan dan perkhidmatan perundingan berfokuskan francais dan keusahawanan. Seramai 53,288 orang telah menyertai latihan yang dianjurkan oleh *Franchise Institute* sejak pandemik COVID-19.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN KESAVAN A/L SUBRAMANIAM
(SUNGAI SIPUT)**

SOALAN

TUAN KESAVAN A/L SUBRAMANIAM (SUNGAI SIPUT) minta
MENTERI PEMBANGUNAN USAHAWAN DAN KOPERASI
menyatakan berapa jumlah peruntukan yang disediakan oleh pelbagai
Kementerian, Jabatan, Agensi Dan Unit Pelaksanaan Ekonomi Wilayah
dan Negeri untuk melatih Pengusaha Perusahaan Kecil & Sederhana
di seluruh negara.

JAWAPAN

Tuan Yang di-Pertua,

1. Kementerian Pembangunan Usahawan dan Koperasi (KUSKOP) menerusi agensi-agensi di bawahnya adalah komited dalam menyediakan pelbagai inisiatif bagi membantu usahawan dengan menyediakan pelbagai program pembangunan usahawan.

2. Pada tahun 2022, sebanyak **RM15 billion** telah diperuntukkan merentasi pelbagai kementerian dan agensi bagi melaksanakan **229 program** pembangunan keusahawanan yang meliputi akses kepada pembiayaan, pembangunan modal insan, adaptasi inovasi dan teknologi, akses kepada pasaran dan pembangunan infrastruktur yang memanfaatkan seramai **519,289 usahawan**. Program pembangunan keusahawanan ini diperluaskan kepada pelbagai sektor seperti sektor perkhidmatan, pertanian dan pembuatan dengan menyasarkan usahawan Bumiputera, perusahaan mikro, wanita, belia, B40 dan luar bandar.

3. KUSKOP sendiri menerusi agensi-agensi di bawahnya juga, telah memperuntukkan sebanyak **RM5.4 billion** bagi melaksanakan **55 program** yang memberi manfaat kepada seramai **64,208 usahawan**.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT,
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN(BERTULIS)

**DARIPADA : TUAN KESAVAN A/L SUBRAMANIAM
(SUNGAI SIPUT)**

SOALAN

TUAN KESAVAN A/L SUBRAMANIAM (SUNGAI SIPUT) minta **MENTERI PEMBANGUNAN USAHAWAN DAN KOPERASI** menyatakan 8 jenis sektor perusahaan kecil dan sederhana yang telah memperolehi pelbagai latihan percuma ‘pengusahawan, pemprosesan, pembungkusan dan pemasaran’. Apakah impak latihan kemahiran ini kepada pengusaha perusahaan kecil dan sederhana. Apakah impak latihan-latihan ini terhadap pengusaha perusahaan kecil & sederhana dari segi peningkatan pendapatan, pengembangan perniagaan, kelulusan lesen khas atau kelulusan produk dari KKM, Program SME Go Global dan lain-lain lagi.

JAWAPAN

Tuan Yang di-Pertua,

1. Kementerian Pembangunan Usahawan dan Koperasi (KUSKOP) dan agensi-agensi di bawahnya telah merangka dan melaksanakan pelbagai inisiatif untuk membantu pengusaha Perusahaan Mikro, Kecil dan Sederhana (PMKS) yang merangkumi sektor-sektor utama merangkumi perkhidmatan, pembinaan, pembuatan, pertanian serta perlombongan dan pengkuarian. Inisiatif tersebut adalah berteraskan penyediaan struktur latihan dan bimbingan yang komprehensif dalam membantu usahawan meningkatkan pendapatan serta pengembangan perniagaan seperti berikut:

- i. **SME Corp.** telah melaksanakan **Program *Micro Connector*** untuk membantu perusahaan mikro menubuh dan menguruskan perniagaan mereka serta melatih kumpulan B40 untuk mendapatkan kemahiran bagi menjana pendapatan melalui keusahawanan. Kemahiran yang diajar termasuklah kraf kreatif, perkhidmatan kesihatan dan gaya hidup, penjagaan kanak-kanak, penyelenggaraan dan pembaikan. Hasil kaji selidik yang dijalankan oleh SME Corp. mendapati:
- a. kemahiran baharu paling tinggi yang diperoleh adalah dalam pengiklanan dan promosi (47.8%), e-dagang mudah alih, e-pembayaran dan aplikasi ICT (34.8%) serta kraf kreatif (17.4%);
 - b. pendapatan isi rumah meningkat secara purata sebanyak RM2,800 setiap isi rumah berbanding hanya RM2,000 setiap isi rumah sebelum menyertai program ini; dan
 - c. peningkatan penggunaan teknologi dan peralatan seperti perkhidmatan internet, komputer, telefon pintar atau tablet, serta mesin dan perkakas automatik atau separuh automatik dalam operasi perniagaan harian mereka.
- ii. bagi tujuan peningkatan eksport, di bawah RMKe-11, **Program *Going Export*** oleh **SME Corp.** telah ditawarkan kepada 219 usahawan. Antara hasil kaji selidik yang diperoleh oleh penerima manfaat program adalah dari segi meningkatkan jualan (63% responden), menembusi pasaran eksport baharu (58% responden) dan menghasilkan kualiti produk/perkhidmatan yang lebih tinggi (53% responden);
- iii. **Institut Keusahawanan Negara (INSKEN)** telah menyediakan **Program Konsultasi Perniagaan (BizClinic)** di seluruh Malaysia dengan kerjasama

Kerajaan Negeri secara percuma dengan tujuan membantu usahawan yang memerlukan khidmat nasihat berkaitan latihan, bimbingan, kewangan dan pengoperasian syarikat. Pada tahun 2022, INSKEN telah melaksanakan 42 sesi dengan penglibatan 1,271 orang usahawan di seluruh Negeri. Sebanyak 20% usahawan adalah usahawan sektor perkhidmatan yang memfokuskan kepada perkhidmatan spa, makanan, jahitan, agen hartanah dan lain-lain. INSKEN juga membantu usahawan yang menyelesaikan sesi konsultasi tersebut untuk mengikuti kelas-kelas yang bersesuaian berdasarkan maklum balas daripada BisKaunselor INSKEN;

- iv. Selain itu, **INSKEN** turut menyediakan program berbentuk bimbingan kepada usahawan selama 4 bulan iaitu **Program Bimbingan Bumiputera Bisnes (IBBC)**. Program ini memerlukan bayaran komitmen peserta yang berminat dan memenuhi syarat-syarat yang ditetapkan. Pada tahun 2021, sebanyak 44.4% syarikat telah berjaya meningkatkan hasil jualan sebanyak 20% manakala pada tahun 2022, 46.03% syarikat telah berjaya meningkatkan hasil jualan sebanyak 20%; dan
- v. **PERNAS** menerusi **Franchise Institute** telah melaksanakan pelbagai program latihan dan perkhidmatan perundingan berfokuskan francais dan keusahawanan kepada usahawan. Seramai 24,292 orang telah menyertai latihan yang dianjurkan oleh *Franchise Institute* pada tahun 2022.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN KESAVAN A/L SUBRAMANIAM
(SUNGAI SIPUT)**

SOALAN

TUAN KESAVAN A/L SUBRAMANIAM [SUNGAI SIPUT] minta **MENTERI PERTAHANAN** menyatakan Perbadanan Hal Ehwal Bekas Angkatan Tentera (PERHEBAT), telah diberi mandat untuk melatih personal ATM yang bersara dan personal bersara supaya mereka mendapat kemahiran baru bagi menjalani corak penghidupan selepas perkhidmatan di ATM:

- (a) berapa ramaikah anggota yang telah dilatih di PERHEBAT dalam jangkamasa 10 tahun ini dan berapakah jumlah bilangan anggota tentera yang telah berjaya menamatkan kursus, di kesemua kluster bidang yang ditawarkan di PERHEBAT dalam jangka masa 10 tahun ini; dan
- (b) berapa ramaikah anggota tentera yang telah menamatkan pelbagai kluster kursus ini, yang berjaya diserapkan dalam sektor pekerjaan (kebolehpasaran).

JAWAPAN

1. Dalam tempoh 10 tahun iaitu mulai tahun 2012 hingga 2022, PERHEBAT telah berjaya mengurus dan melatih bakal pesara dan veteran Angkatan Tentera Malaysia (ATM) seramai 238,364 orang pelatih yang melibatkan 3 fasa Latihan Peralihan iaitu Pra Latihan Peralihan seramai 136,719 orang; Latihan Peralihan seramai 49,165 orang; dan Pasca Latihan Peralihan seramai 52,480 orang.

2. Manakala bagi bilangan veteran ATM yang telah berjaya mendapat kerjaya kedua semenjak tahun 2021, ialah seramai 6,049 veteran ATM. Bilangan yang telah berjaya memiliki kerjaya kedua ini berdasarkan kepada pemantauan dan pengesanan pelatih yang tamat Latihan Peralihan, dimana PERHEBAT bertanggungjawab untuk membantu, membimbing dan memantau kerjaya kedua veteran bagi tempoh 6 bulan sehingga 5 tahun selepas anggota menamatkan perkhidmatan. Veteran dibimbing melalui pelbagai kaedah seperti khidmat nasihat, *coaching*, *mentoring* serta jaringan dengan pelbagai agensi kerajaan dan syarikat swasta.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : IR. TS. HAJI KHAIRIL NIZAM BIN
KHIRUDIN [JERANTUT]**

SOALAN

IR. TS. HAJI KHAIRIL NIZAM BIN KHIRUDIN [JERANTUT] minta **MENTERI KESIHATAN** menyatakan pelan tindakan yang akan dilaksanakan oleh Kementerian untuk menyelesaikan masalah kekurangan kakitangan di hospital Kerajaan seperti di Hospital Jerantut.

JAWAPAN

Tuan Yang di-Pertua,

1. Berdasarkan rekod Kementerian Kesihatan, sehingga 31 Disember 2022, terdapat seramai 18,087 petugas kesihatan berkhidmat di negeri Pahang. Daripada jumlah tersebut, seramai 362 orang adalah Pakar Perubatan, 1,393 Pegawai Perubatan, 536 Pegawai Pergigian, 690 Pegawai Farmasi, 4,184 Jururawat dan 10,922 petugas kesihatan dalam skim perkhidmatan yang lain.

2. Hospital Jerantut adalah hospital tanpa pakar dengan 77 katil rasmi. Sehingga 31 Disember 2022, 91.5 peratus atau 354 pengisian daripada 388 jawatan tetap telah dibuat di hospital tersebut. Daripada jumlah tersebut seramai 14 adalah Pegawai Perubatan, 17 Pegawai Farmasi, 97 Jururawat dan 226 petugas kesihatan dalam skim perkhidmatan yang lain.

3. Sejak tahun 2014, Hospital Jerantut adalah salah sebuah hospital dibawah program Hospital Kluster Pahang Tengah bersama-sama dengan Hospital Jengka, Hospital Bentong (Pakar Minor) dan Hospital Sultan Haji Ahmad Shah (Pakar Major). Dibawah program Hospital Kluster ini, perkhidmatan kepakaran, sumber manusia, fasiliti dan kemudahan dikongsi antara kesemua hospital dibawah kluster tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : IR. TS. HAJI KHAIRIL NIZAM BIN KHIRUDIN
[JERANTUT]**

SOALAN

IR. TS. HAJI KHAIRIL NIZAM BIN KHIRUDIN [JERANTUT] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan rekod Kerajaan yang ada di dalam Kementerian untuk jumlah hutan yang telah dikategorikan sebagai hutan simpan termasuk berapa keluasan setiap hutan, terutamanya di Jerantut.

JAWAPAN

Tuan Yang di-Pertua,

Untuk makluman Ahli Yang Berhormat, pada masa ini keluasan Hutan Simpanan Kekal (HSK) di seluruh negara adalah seluas 10,677,414 hektar. Daripada jumlah tersebut, sejumlah 4,806,334 hektar terletak di Semenanjung dan kawasan HSK yang telah diwartakan di negeri Pahang adalah seluas 1,545,610 hektar. Daripada jumlah tersebut, seluas 355,998 hektar yang terdiri daripada 15 HSK adalah terletak di daerah Jerantut seperti jadual berikut:

Bil.	Nama Hutan Simpanan Kekal	Keluasan (Hektar)
1.	Hutan Simpan Tekai Tembeling	101,973.69
2.	Hutan Simpan Tekai Tembeling (Tambahan)	47,722.14

3.	Hutan Simpan Gunung Aais	77,861.00
4.	Hutan Simpan Ulu Beruit	1,098.30
5.	Hutan Simpan Ulu Mas	1,385.26
6.	Hutan Simpan Jerantut (Tambahan)	15,855.97
7.	Hutan Simpan Gunung Aais (Tambahan)	14,870.96
8.	Hutan Simpan Yong	35,208.36
9.	Hutan Simpan Yong Tambahan	1,536.67
10.	Hutan Simpan Tekam	35,167.94
11.	Hutan Simpan Tekam (Tambahan)	3,077.30
12.	Hutan Simpan Jerantut	212.51
13.	Hutan Simpan Som	11,630.30
14.	Hutan Simpan Jerantut (Tambahan)	553.40
15.	Hutan Simpan Berkelah (Jerantut)	7,844.31
JUMLAH		355,998.11

Sumber: Jabatan Perhutanan Semenanjung Malaysia

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : IR. TS. HAJI KHAIRIL NIZAM BIN KHIRUDIN
[JERANTUT]**

SOALAN

IR. TS. HAJI KHAIRIL NIZAM BIN KHIRUDIN [JERANTUT] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan rekod Kementerian untuk tanah haram yang telah melaksanakan penanaman semula hutan dengan menanam Musang King di hutan-hutan yang telah melakukan pembalakan.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian melalui Jabatan Perhutanan Semenanjung Malaysia (JPMS) sentiasa bersiaga dalam memerangi kes kesalahan hutan di dalam kawasan Hutan Simpanan Kekal (HSK) termasuk kes pencerobohan yang melibatkan penanaman pokok durian Musang King secara haram. Tindakan penguatkuasaan telah diambil bagi memusnahkan tanaman-tanaman tersebut dalam operasi penguatkuasaan yang dijalankan oleh Jabatan-jabatan Perhutanan Negeri.
2. Berdasarkan rekod, jumlah keluasan HSK yang telah diceroboh dan ditanam dengan pokok durian Musang King di seluruh negara dari tahun 2017 hingga tahun 2022 adalah 5,383.94 hektar. Daripada jumlah tersebut, seluas 90 hektar di negeri Kelantan; 5,257.44 hektar di negeri Pahang; dan 36.50 hektar di negeri Perak.

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : IR. TS. HAJI KHAIRIL NIZAM BIN
KHIRUDIN [JERANTUT]**

SOALAN

IR. TS. HAJI KHAIRIL NIZAM BIN KHIRUDIN [JERANTUT] minta **MENTERI KOMUNIKASI DAN DIGITAL** menyatakan komitmen Kementerian untuk menaik taraf prosedur keselamatan data rakyat Malaysia yang semakin mudah dibocorkan di atas talian.

JAWAPAN

Tuan Yang di-Pertua,

Kementerian Komunikasi dan Digital (KKD) melalui Jabatan Perlindungan Data Peribadi (JPDP) sedang dalam proses meminda Akta Perlindungan Data Peribadi 2010 [Akta 709] supaya seiring dengan perkembangan semasa terutamanya perkembangan teknologi dan perubahan dalam landskap perundangan privasi global. Antara pindaan yang dicadangkan adalah termasuk:

- (i) Mewajibkan pelantikan Pegawai Perlindungan Data di organisasi pengguna data dan pemproses data yang sebelum ini tidak diwajibkan untuk dilantik;
- (ii) Mewajibkan pemakluman insiden kebocoran data kepada Pesuruhjaya JPDP dalam tempoh 72 jam; dan
- (iii) Memanjangkan tanggungjawab di bawah Prinsip Keselamatan Akta 709 kepada Pemproses Data yang sebelum ini hanya dikenakan kepada Pengguna Data (pemilik data). Sebelum ini Pemproses Data iaitu pihak ketiga yang dilantik untuk menguruskan sistem/data tidak mempunyai obligasi secara langsung terhadap pematuhan kepada Akta ini. Ini adalah termasuk Pemproses Data yang dilantik oleh pihak Kerajaan.

Selain itu, Kerjasama di antara agensi-agensi berkaitan di bawah KKD seperti Suruhanjaya Komunikasi dan Multimedia dan CyberSecurity Malaysia dilaksanakan secara berterusan untuk memantau dan mengawal selia pemprosesan data peribadi dalam transaksi komersial agar sentiasa menepati prinsip-prinsip di bawah Akta 709 disamping mengambil tindakan mitigasi segera sekiranya berlaku insiden kebocoran atau penjualan data peribadi yang melibatkan transaksi.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB IR. TS. HAJI KHAIRIL NIZAM BIN
KHIRUDIN (JERANTUT)**

SOALAN

IR. TS. HAJI KHAIRIL NIZAM BIN KHIRUDIN [JERANTUT] minta **MENTERI KERJA RAYA** menyatakan perancangan Kementerian bagi memantau serta menyelenggara cerun di jalan raya menuju ke Cameron Highlands ataupun Genting Highlands.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya komited dalam memastikan jalan raya utama terutama ke kawasan tarikan pelancong seperti Cameron Highlands dan Genting Highlands untuk sentiasa berada dalam keadaan selamat. Sehubungan itu, Peta Bahaya dan Risiko Cerun (PBRC) yang telah dibangunkan oleh Cawangan Kejuruteraan Cerun, Jabatan Kerja Raya (JKR) digunapakai untuk mengenal pasti cerun-cerun yang berada dalam kategori yang sangat berisiko tinggi untuk diambil tindakan sewajarnya.

Cerun-cerun yang berada dalam kategori sangat berisiko tinggi akan menjadi keutamaan untuk pelaksanaan kerja-kerja pencegahan (*preventive*). Namun begitu, pelaksanaan kerja-kerja pencegahan ini adalah bergantung kepada peruntukan kewangan yang disalurkan oleh pihak Kementerian Kewangan.

JKR juga telah mengenalpasti kawasan yang sangat berisiko dan telah memasang peralatan yang bersesuaian bagi tujuan pemantauan cerun. Antaranya ialah pemasangan dua (2) *Robotic Total Station* (RTS) di lokasi sepanjang FT185 Jalan Simpang Pulai-Lojing-Gua Musang yang akan memantau pergerakan cerun.

Di samping itu juga, JKR telah memasang sebanyak 18 bilangan tolok hujan di jalan-jalan menuju ke Cameron Highlands. Sepuluh (10) di Laluan FT185 Jalan Simpang Pulai-Lojing-Gua Musang, empat (4) di Laluan FT59 Jalan Tapah-Cameron Highlands dan empat (4) lagi di FT 102 Jalan Sungai Koyan-Ringlet.

Tolok hujan ini akan memberikan indikasi data hujan dan akan memberikan amaran awal apabila tolok hujan mencatatkan hujan yang luar biasa. Amaran yang dikeluarkan ini akan disalurkan kepada pihak

JKR Daerah untuk melaksanakan kerja-kerja rondaan dan pemantauan bagi mengesan tanda-tanda awal tanah runtuh. JKR Daerah akan segera mengambil tindakan sewajarnya apabila melihat terdapat tanda-tanda awal tanah runtuh seperti membuat lencongan jalan dan penutupan jalan sekiranya perlu bagi mengelakkan kenderaan melalui jalan yang berisiko tersebut.

Kementerian juga akan melihat keperluan dari segi pembinaan struktur seperti *rockshed* (struktur separuh terowong) seperti yang dibina di seksyen 45.9, FT185 Jalan Simpang Pulai-Lojing-Gua Musang bagi melindungi jalan daripada terputus akibat bencana tanah runtuh.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : DATO' KHLIR BIN MOHD NOR [KETEREH]

SOALAN

DATO' KHLIR BIN MOHD NOR [KETEREH] minta **MENTERI PENDIDIKAN** menyatakan status pembinaan kolej tingkatan enam Kelantan di Ketereh yang telah diluluskan semasa pentadbiran Kerajaan Perikatan Nasional.

JAWAPAN

Tuan Yang di-Pertua,

Untuk makluman Ahli Yang Berhormat, KPM telah diluluskan projek Pembangunan 20 Bilik Darjah Kolej Tingkatan Enam, Kota Bharu, Kelantan dalam Rancangan Malaysia Ke-12 *Rolling Plan* 1 tahun 2021.

Projek ini telah diserahkan kepada Jabatan Kerja Raya (JKR) Malaysia untuk dilaksanakan dan kini berada dalam peringkat perolehan. Surat Setuju Terima (SST) telah dikeluarkan kepada kontraktor pada 20 Februari 2023 dan tarikh milik tapak adalah pada 27 Mac 2023. Tempoh pembinaan bagi projek ini adalah selama 156 minggu dan dijangkakan siap pada 22 Mac 2026.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN KHOO POAY TIONG [KOTA MELAKA]

SOALAN

YB TUAN KHOO POAY TIONG [KOTA MELAKA] minta **MENTERI PEMBANGUNAN KERAJAAN TEMPATAN** menyatakan kadar penggunaan dan kapasiti tempat - tempat pelupusan sampah untuk negeri Melaka dan adakah Kementerian bercadang untuk membina insinerator baharu untuk negeri Melaka.

JAWAPAN

Tuan Yang Di Pertua,

Untuk makluman Ahli Yang Berhormat, Tapak Pelupusan Sisa Pepejal Sanitari Sungai Udang, Melaka adalah merupakan fasiliti pengurusan sisa pepejal yang berkonsepkan *regional facility* untuk melupuskan sisa dari seluruh negeri Melaka. Tapak ini telah direka bentuk untuk melupuskan sisa pepejal sebanyak 1,000 tan sehari dan mempunyai jangka hayat selama 10 tahun.

Kerajaan Persekutuan melalui Kementerian Pembangunan Kerajaan Tempatan (KPKT) telah merancang untuk membina loji rawatan sisa pepejal *Waste-to-Energy* (WTE) di Sungai Udang, Melaka yang dilaksanakan secara kerjasama awam swasta (*Public Private Partnership*-PPP) bagi mengatasi isu kekurangan tapak pelupusan sanitari serta menampung penjanaaan sisa yang semakin meningkat sepanjang tahun.

Untuk makluman Ahli Yang Berhormat juga, projek WTE tersebut kini di peringkat rundingan terma dan syarat utama perjanjian konsesi bersama pembida berjaya. Kementerian ini menjangkakan perjanjian konsesi tersebut dapat dimuktamadkan dan ditandatangani pada tahun 2023. Setelah itu, pihak syarikat perlu memenuhi syarat duluan (*condition precedent*) dalam tempoh satu (1) tahun sebelum perjanjian konsesi boleh berkuat kuasa. Antara syarat duluan yang perlu dipenuhi adalah seperti kajian impak alam sekitar (EIA), kajian impak sosial (SIA), kajian sistem kuasa (PSS) dan reka bentuk. Seterusnya, setelah syarat dahuluan tersebut disahkan oleh kerajaan, proses pembinaan loji akan dimulakan dan tempoh pembinaan adalah selama tiga (3) tahun termasuk kerja-kerja pengujian dan pentauliahan. Loji akan mula beroperasi setelah kerja-kerja pembinaan dan sesi pengujian serta pentauliahan selesai. Loji dijangka mula beroperasi secara rasmi pada tahun 2027.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN KHOO POAY TIONG [KOTA MELAKA]

SOALAN

TUAN KHOO POAY TIONG [KOTA MELAKA] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan:

- (a) status terkini Rancangan Tebatan Banjir Sungai Duyong, termasuk kerja-kerja yang telah disiapkan, garis masa, dan jumlah kos yang terlibat; dan
- (b) garis masa untuk pelaksanaan Rancangan Tebatan Banjir Sungai Melaka Fasa 1.

JAWAPAN

Tuan Yang Di-Pertua,

a) Projek Rancangan Tebatan Banjir Sungai Duyong, Melaka di dalam peringkat pembinaan dan status terkini sehingga 23 Februari 2023 adalah 21.5 peratus. Projek ini berjumlah RM117 juta dan skop kerja di peringkat berikut:

- i. Kerja-kerja awalan (*Preliminaries*);
- ii. Kerja-kerja tanah (*Earthwork*);
- iii. Tembok Banjir (*Flood Wall*);
- iv. Pintu Kawalan Air Pasang Surut (*Tidal Control Gate*);
- v. Pembentung (*Culvert Crossing*); dan
- vi. Wang Peruntukan Sementara (*Provisional Sum*)

Garis masa pelaksanaan projek Rancangan Tebatan Banjir Sungai Duyong adalah seperti berikut:

Bil.	Fasa	Tarikh Mula	Tarikh siap
1.	Fasa rekabentuk terperinci	27 September 2016	10 Mac 2021
2.	Fasa tender sehingga keluar Surat setuju terima	11 Mac 2020	05 Oktober 2021
3.	Pembinaan	22 Oktober 2021	22 Oktober 2024

b) Garis masa pelaksanaan projek Rancangan Tebatan Banjir Sungai Melaka Fasa 1:

Bil.	Fasa	Jangka Mula	Jangka siap
1.	Fasa rekabentuk terperinci	13 Jun 2022	04 April 2024
2.	Fasa tender sehingga keluar Surat setuju terima	05 April 2024	Oktober 2024
3.	Pembinaan	Oktober 2024	Mac 2027

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN KHOO POAY TIONG [KOTA MELAKA]

SOALAN

TUAN KHOO POAY TIONG [KOTA MELAKA] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan:

- (a) apakah status terkini projek TAPS Jernih dan TAPS Melaka, termasuklah kerja-kerja yang telah dilaksanakan pada tahun 2022 ; dan
- (b) apakah status projek-projek di bawah Rolling Plan Pertama RMK-12 iaitu Projek Penyaluran Air Mentah Dari Sungai Kesang Dan Tasik Biru Ke Empangan Jus, Kajian Kebolehlaksanaan Penyaluran Air Sungai Muar, Fasa 3 (Rumah Pam Grisek - Empangan Durian Tunggal), dan Projek Menaik Taraf Kolam Tebatan Banjir Krubong-Durian Tunggal.

JAWAPAN

Tuan Yang di-Pertua,

1. Untuk makluman Ahli Yang Berhormat, Projek Pembinaan Takungan Air Pinggiran Sungai (TAPS) Jernih, Melaka telah memasuki peringkat pembinaan dengan Surat Setuju Terima (SST) telah dikeluarkan kepada kontraktor pada 27 Mei 2022. Tarikh milik tapak adalah pada 7 Jun 2022, tempoh pembinaan adalah selama 30 bulan dan tarikh siap projek dijangka pada 6 Disember 2024. Peratus kemajuan kerja fizikal projek ini sehingga 23 Januari 2023 adalah sebanyak 4.60 % mengikut jadual.

2. Projek Pembinaan Takungan Air Pinggiran Sungai (TAPS) Melaka pula masih lagi dalam peringkat reka bentuk terperinci, kajian Impak Alam Sekitar (EIA) dan kajian Impak Sosial (SIA). Permohonan pengambilan balik tanah di bawah Seksyen 4 telah diwartakan dan permohonan di bawah Seksyen 8 telah dibuat pada Disember 2022. Kerja-kerja pembinaan fizikal TAPS Melaka dijangka bermula selewat-lewatnya pada suku ke-2 tahun 2024, tertakluk kepada tempoh penyelesaian urusan pengambilan balik tanah dan proses Kebenaran Merancang. Projek dijangka siap pada Mei 2029.

Tuan Yang di-Pertua,

3. Status pelaksanaan projek-projek lain yang telah diluluskan di bawah *Rolling Plan* Pertama RMK-12 adalah seperti berikut:

- a) Projek Penyaluran Air Mentah Dari Sungai Kesang Dan Tasik Biru Ke Empangan Jus, Daerah Jasin, Melaka dengan kapasiti sebanyak 120 Juta Liter Sehari (JLH) masih dalam peringkat perancangan kerana pelaksanaannya hanya boleh dimulakan setelah projek TAPS Melaka siap pada tahun 2028.
- b) Kajian Kebolehlaksanaan Penyaluran Air Sungai Muar Fasa 3 (Rumah Pam Grisek - Empangan Durian Tunggal) mula dilaksanakan pada Januari 2022 dan akan siap pada April 2023. Peratus kemajuan kerja fizikal projek ini sehingga 31 Januari 2023 adalah sebanyak 50% mengikut jadual.

Sekian. Terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN KHOO POAY TIONG [KOTA MELAKA]

SOALAN

TUAN KHOO POAY TIONG [KOTA MELAKA] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan senarai nama syarikat dan projek yang telah diberi kelulusan laporan penilaian kesan alam sekitar (EIA) untuk projek-projek tebus guna tanah (tambakan laut) di negeri Melaka semenjak 1990 sehingga 2022, termasuklah tarikh kelulusan dan tempoh sah (*validity period*) kelulusan laporan-laporan tersebut.

JAWAPAN

Tuan Yang di-Pertua,

1. Ringkasan bilangan projek-projek tebus guna tanah (tambakan laut) di negeri Melaka yang telah diberi kelulusan EIA semenjak 1990 sehingga 2022 adalah seperti berikut:

Tahun	Bilangan Projek
1991	1
1994	1
1995	2
1999	1
2013	1
2016	1
2018	2
2019	1
2020	1
2021	4
Jumlah	15

2. Senarai penuh projek adalah seperti di **Lampiran**.

Sekian, terima kasih.

Lampiran

Senarai Projek Penambakan Laut Di Negeri Melaka Yang Telah Mendapat Kelulusan Laporan EIA (Perincian) dari tahun 1991 hingga 2022

BIL	NAMA PROJEK	TARIKH KELULUSAN	PERINTAH EIA
1.	The Proposed "Penambakan Kawasan Laut Seluas +- 16.14 Ekar Di Pulau Melaka, Kawasan Bandar Xliii, Daerah Melaka Tengah, Melaka Secara Penswastaaan" For Messrs. Parkland Avenue Sdn Bhd – Jadual 1	18/11/2021	PERINTAH EIA 2015
2.	Proposed Reclamation and Dredging for The Development of Pelabuhan Kuala Sg. Linggi At Perairan Muara Sungai Linggi, Alor Gajah, Melaka Tetuan Linggi Base Sdn Bhd – Jadual 2	29/6/2021	PERINTAH EIA 2015
3.	Proposed Construction, Completion and Maintainance Of Reclamation and Associated Works For 112 Acres (Phase 4) Between Kuala Sungai Melaka And Kuala Sungai Seri Melaka At Kawasan Bandar XLIV, Daerah Melaka Tengah, Melaka Tetuan Ultra Green Sdn Bhd – Jadual 1	29/4/2021	PERINTAH EIA 2015

4.	Cadangan Penambakan Kawasan Laut Seluas 400 Ekar Untuk Pembangunan Bercampur-campur, Kawasan Bandar XLVI, Daerah Melaka Tengah, Melaka Secara Penswastaan Untuk Yayasan Melaka (Revised EIA) – Jadual 2	20/1/2021	PERINTAH EIA 2015
5.	Cadangan Menambak Laut Seluas 75 Ekar Di Perairan Kota Laksamana, Kawasan Bandar 6, Daerah Melaka Tengah, Melaka” Untuk Tetuan Golden Heritage Sdn Bhd – Jadual 1	24/02/2020	PERINTAH EIA 2015
6.	Penambakan Kawasan Laut Seluas 27.18 Ekar Untuk Cadangan Pembangunan Jeti Penumpang Serta Kemudahan Sokongan Sekolah Agama Di Atas Tanah Reklamasi Jeti Anjung Batu Melaka” Untuk Tetuan Rohasassets Sdn Bhd. – Jadual 1	23/9/2019	PERINTAH EIA 2015
7.	Cadangan Menambak Laut Seluas 100 Ekar Di Perairan Kota Laksamana, Kawasan Bandar 6, Daerah Melaka Tengah, Melaka Bagi Tetuan Puncak Jasasia Sdn. Bhd – Jadual 1	1/6/2018	PERINTAH EIA 2015

8.	The Proposed 120 Acres of Coastal Reclamation at Pekan Klebang Section III, Mukim Klebang Besar, Daerah Melaka Tengah, Melaka Tetuan Awan Plasma Sdn Bhd – Jadual 2	29/3/2018	PERINTAH EIA 2015
9.	Proposed 3.3 Acres Reclamation at Pulau Melaka, Kawasan Bandar XLIII, Daerah Melaka Tengah, Melaka & Untuk Tetuan Seaview Landmark Sdn. Bhd. – Jadual 1	28/11/2016	PERINTAH EIA 2015
10.	Cadangan Penambakan Laut Seluas 98 Ekar Di Kawasan Pulau Panjang, Daerah Melaka Tengah, Melaka Oleh KAJ Development Sdn Bhd – Jadual 1	23/1/2013	PERINTAH EIA 1987
11.	Coastal Land Reclamation Projects In Melaka Tebusguna Tanah (parcel 1-4) Kuala Sungai Seri Melaka, MBMB Tetuan Ultra Green Sdn Bhd	26/10/1999	PERINTAH EIA 1987
12.	Cadangan Projek Penambakan Laut Di Padang Temu-Telok Mas, Melaka. Oleh Kejuruteraan Mahajaya Sdn. Bhd.	23/08/1995	PERINTAH EIA 1987

13.	Cadangan Projek Penambakan Laut antara Teluk Mas ke Klebang Di Melaka Tengah, Melaka. Oleh Olympia Land Sdn. Bhd.	22/04/1995	PERINTAH EIA 1987
14.	Cadangan Projek Tebusguna 225 Ekar Di Tanah Pulau Jawa oleh Kerajaan Negeri Melaka	08/07/1994	PERINTAH EIA 1987
15.	Cadangan Tebusguna Tanah Pantai Kundur, Melaka oleh Petroleum Nasional Sdn Bhd	04/03/1991	PERINTAH EIA 1987

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN KHOO POAY TIONG
[KOTA MELAKA]**

SOALAN

**TUAN KHOO POAY TIONG [KOTA MELAKA] minta PERDANA
MENTERI menyatakan:**

- (a) pandangan Unit Perancang Ekonomi (EPU) dan Unit Kerjasama Awam Swasta (UKAS) terhadap rancangan Kerajaan Negeri Melaka untuk membina laluan jambatan/terowong dari Melaka ke Dumai, Indonesia; dan
- (b) adakah Kerajaan Persekutuan telah menerima apa-apa permohonan atau memberi persetujuan terhadap projek tersebut.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

a) Kerajaan Persekutuan melalui Unit Kerjasama Awam Swasta (UKAS) sentiasa mengalu-alukan sebarang cadangan projek pembangunan secara kerjasama awam swasta (public private partnership – PPP) dalam memacu pertumbuhan ekonomi negara. Berhubung rancangan Kerajaan Negeri Melaka untuk membangunkan projek Jambatan dari Melaka ke Dumai, Indonesia secara PPP, UKAS berpandangan ianya memerlukan penelitian yang mendalam memandangkan cadangan projek tersebut melibatkan kos yang besar serta melibatkan dasar dua negara antara Kerajaan Malaysia dan Kerajaan Indonesia. Dalam hubungan ini, pertimbangan utama perlu mengambil kira kos projek dan *business model* yang bersesuaian khususnya cadangan pendapatan serta anggaran trafik yang munasabah bagi memastikan projek adalah berdaya maju serta bermanfaat kepada negara. Sehubungan itu, pertimbangan untuk melaksanakan projek ini memerlukan kajian secara terperinci oleh kementerian/agensi berkepentingan di peringkat Kerajaan Persekutuan. Kesemua perkara ini perlu diteliti secara berhati-hati bagi memastikan aktiviti perdagangan di Selat Melaka yang merupakan laluan perkapalan paling sibuk di dunia tidak terjejas.

b) Kerajaan Persekutuan telah menerima cadangan daripada sebuah syarikat swasta bagi membangunkan projek Jambatan dari Melaka ke Dumai, Indonesia secara Inisiatif Pembiayaan Swasta (Private Financing Initiative - PFI) melalui Kerajaan Negeri Melaka pada tahun 2021. Dalam hubungan ini, Kerajaan Persekutuan sedang meneliti cadangan projek tersebut yang merangkumi model kewangan, daya maju projek, keperluan teknikal serta perkara-perkara lain termasuk impak kepada perkhidmatan sedia ada di kawasan tersebut

SOALAN NO : 235

(perkhidmatan roro) dan kesan kepada alam sekitar sebelum membuat apa-apa keputusan terhadap permohonan tersebut.

Sekian, terima kasih.

SOALAN

DATO' WIRA DR. KU ABD RAHMAN BIN KU ISMAIL [KUBANG PASU] minta **MENTERI KEWANGAN** menyatakan sama ada Kerajaan berhasrat untuk menaikkan kadar pemberian ikut kepala (*Capitation Grant*) kepada Kerajaan Negeri di bawah peruntukan Perkara 109(1)(a) Perlembagaan Persekutuan kerana peruntukan Perkara 109(2) membenarkan Kerajaan untuk mengubah kadar pemberian ikut kepala yang diberikan kepada Kerajaan Negeri. Kali terakhir kadar ini diubah adalah pada tahun 2002.

JAWAPAN

Tuan Yang di-Pertua,

Untuk makluman, kadar Pemberian Mengikut Bilangan Orang telah melalui pindaan beberapa kali dan pindaan terkini adalah berdasarkan kelulusan pindaan pada bulan Julai 2002 melalui Akta 622 berkuat kuasa mulai 1 Januari 2002. Pada masa ini, Kerajaan Persekutuan belum bercadang untuk melaksanakan kajian semula ke atas kadar semakan tersebut kerana ia memerlukan kajian terperinci. Fokus perbelanjaan pada masa kini adalah untuk menyokong momentum pemulihan semula ekonomi negara serta menjamin kesejahteraan rakyat.

Walau bagaimanapun, Kementerian Kewangan akan sentiasa terus komited untuk mengkaji secara berterusan dan menimbang sebarang penambahbaikan ke atas Pemberian kepada negeri-negeri tertakluk kepada kemampuan kewangan Kerajaan Persekutuan. Seperti yang diumumkan dalam ucapan Belanjawan 2023, Kerajaan Persekutuan telah bersetuju untuk meningkatkan Pemberian TAHAP daripada RM330 juta kepada RM400 juta sementara *Ecological Fiscal Transfer* dinaikkan daripada RM70 juta kepada RM150 juta.

Sekian, terima kasih.

***PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' WIRA DR. KU ABD RAHMAN BIN KU
ISMAIL [KUBANG PASU]**

SOALAN

Minta **MENTERI PENDIDIKAN TINGGI** menyatakan mengapa terdapat penurunan yang signifikan jumlah pendaftaran di kalangan pelajar di IPTA sejak dua tahun lalu.

JAWAPAN

Tuan Yang di-Pertua,

1. Kementerian Pendidikan Tinggi (KPT) sangat mengambil berat tentang pengambilan pelajar ke Institusi Pendidikan Tinggi Awam (IPTA) dan Institusi Latihan Kemahiran Awam (ILKA).
2. Sepanjang tempoh pandemik COVID-19, terdapat trend **peningkatan permohonan** ke IPTA dan ILKA bagi pelajar Lulusan SPM dan Lulusan STPM/Matrikulasi/Asasi secara keseluruhan.
3. Jumlah **permohonan** yang diterima secara keseluruhannya melalui UPUOnline® adalah sebanyak 324,065 **pada tahun 2021**, meningkat 26.39% berbanding permohonan keseluruhan pada tahun 2019 sebanyak 256,388.
4. **Sebelum fasa pandemik COVID 19 di tahun 2019**, seramai 140,343 orang pelajar Lulusan SPM ditawarkan ke IPTA dan ILKA daripada 199,629 permohonan layak dengan 70.3 peratus kejayaan penawaran dicatatkan bagi Program Pengajian Lulusan SPM.

5. Terdapat penurunan penawaran sebanyak 13.5% pada tahun 2020, namun pada tahun 2021 berlaku peningkatan penawaran sebanyak 1% berbanding tahun 2019.
6. Penurunan tawaran ini berlaku disebabkan KPT telah melaksanakan konsep *Single Window Single Offer* bersama IPTA, ILKA, Institut Pendidikan Guru Malaysia (IPGM) dan Bahagian Matrikulasi Kementerian Pendidikan Malaysia (BMKPM) pada Sesi Akademik 2020/2021 melalui platform UPUOnline®. Melalui konsep ini, IPTA dan ILKA hanya menawarkan program pengajian mengikut kapasiti sebenar sahaja.
7. Pengambilan ke Kolej Matrikulasi (KM KPM) dan IPG pada sesi Akademik 2021/2022 juga tidak lagi melalui UPUOnline®. Justeru, terdapat peningkatan tawaran oleh IPTA dan ILKA dengan mengambil kira tawaran bertindih antara UPUOnline® dan KM serta Institut Pendidikan Guru (IPG).
8. Bagi **penawaran** melibatkan pelajar Lulusan STPM/Matrikulasi/ASASI, seramai 50,668 orang ditawarkan Program Pengajian Ijazah Sarjana Muda di Universiti Awam (UA) daripada 56,194 permohonan layak dengan jumlah kejayaan sebanyak 90.2% bagi tahun 2019. Pada tahun 2020, berlaku peningkatan penawaran sebanyak 2.7%, namun pada tahun 2021 terdapat penurunan hanya sebanyak 0.5%.
9. **Secara keseluruhannya, pendaftaran pelajar ke IPTA** pada tahun 2019 adalah seramai **227,249 sebelum pandemik** melanda negara. Pada tahun 2020, semasa situasi pandemik melanda, terdapat penurunan sebanyak **8.98%** kemasukan pelajar berbanding tahun 2019.
10. Namun pada tahun 2021, **kemasukan pelajar ini meningkat** sebanyak **6.22%** berbanding tahun 2020 dan ia berlaku semasa pasca Pandemik COVID-19. Walaupun berlaku peningkatan, ia masih rendah berbanding tahun 2019.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : DATO' WIRA DR. KU ABD RAHMAN BIN
KU ISMAIL [KUBANG PASU]

SOALAN

DATO' WIRA DR. KU ABD RAHMAN BIN KU ISMAIL
[KUBANG PASU] minta **MENTERI KEWANGAN** menyatakan sama
ada Kerajaan berhasrat untuk melaksanakan semula *Good and Services*
Tax (GST) dalam masa terdekat ini memandangkan GST lebih efisien dari
SST dan diterima pakai oleh 170 buah negara di dunia.

JAWAPAN

Tuan Yang di-Pertua,

Untuk makluman Ahli Yang Berhormat, pada masa ini, Kerajaan belum bercadang untuk memperkenalkan semula Cukai Barang dan Perkhidmatan (GST).

Pada masa ini, rakyat sedang dalam fasa pemulihan pasca krisis COVID-19 serta menghadapi cabaran kos sara hidup. Inflasi makanan tahun 2022 pada kadar 5.8 peratus dan ini lebih menjejaskan golongan yang berpendapatan rendah. Pada masa yang sama, GST juga merupakan cukai yang bersifat regresif.

Dengan itu, cadangan untuk memperkenalkan GST hanya dapat dipertimbangkan setelah pemulihan dan pertumbuhan ekonomi berada di landasan yang lebih kukuh serta setelah ditentukan bagaimana dapat

menambahbaik mekanisme GST berbanding dengan sebelum ini supaya mengurangkan impak kepada golongan berpendapatan rendah.

Sebarang perubahan polisi berkaitan cukai akan mengambil kira kesan terhadap ekonomi dan kos sara hidup rakyat. Sehubungan itu, Kerajaan sentiasa mengawasi kedudukan ekonomi semasa dan mempertimbangkan langkah-langkah fiskal yang bersesuaian dengan keperluan jangka pendek dan sederhana.

Dalam Belanjawan 2023, Kerajaan telah mengambil pendekatan lebih progresif sebagai langkah baharu meluaskan asas cukai kepada mereka yang punyai kemampuan. Ini termasuk :-

- i. meningkatkan cukai pendapatan bagi individu bagi mereka dengan pendapatan bercukai melebihi RM230,000 setahun; dan
- ii. pengumuman cadangan Cukai Barangan Mewah dan Cukai Keuntungan modal ke atas jualan saham tidak tersenarai

Kerajaan akan terus mengadakan libat urus dengan semua pihak berkepentingan bagi mengkaji aspek pembaharuan sistem percukaian. Tidak semestinya ianya melibatkan GST. Terdapat juga ruang untuk menambahbaik SST sedia ada.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' WIRA DR. KU ABD RAHMAN BIN KU
ISMAIL [KUBANG PASU]**

SOALAN

Minta **MENTERI PENDIDIKAN TINGGI** menyatakan status terkini Perumahan Siswa Universiti Utara Malaysia (UUM) di Bandar Darulaman, Jitra, Kedah. Perumahan Siswa UUM ini didapati terbiar begitu lama tanpa penyenggaraan dan 'menyakitkan mata' (eye sore) kepada penduduk tempatan.

JAWAPAN

Tuan Yang di-Pertua,

1. Pada masa ini sejumlah 110 unit rumah masih berpenghuni (sewa) dan baki 150 unit rumah telah terbiar dan usang.
2. Aktiviti-aktiviti penyelenggaraan luar bangunan masih dilakukan secara berkala.
3. Mengambil kira keluasan taman perumahan dan keadaan rumah yang telah mencapai usia 40 tahun, kerja-kerja baik pulih dan penyelenggaraan memerlukan peruntukan yang besar.
4. Bagi tujuan tersebut, Kementerian Pendidikan Tinggi melalui UUM telah mengemukakan permohonan peruntukan penyelenggaraan dengan kos sebanyak RM20 juta di dalam permohonan Rancangan Malaysia Ke-12, *Rolling Plan* (RP) yang akan datang untuk pertimbangan selanjutnya pihak Kementerian Ekonomi.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA,
PARLIMEN KE-15**

PERTANYAAN : BERTULIS
DARIPADA : YB DATO' WIRA DR. KU ABD RAHMAN
BIN KU ISMAIL [KUBANG PASU]

SOALAN

YB DATO' WIRA DR. KU ABD RAHMAN BIN KU ISMAIL [KUBANG PASU] minta **KEMENTERIAN PERDAGANGAN ANTARABANGSA DAN INDUSTRI** menyatakan sama ada Kerajaan akan menilai semula penyertaan Malaysia dalam Perjanjian Komprehensif dan Progresif bagi Perkongsian Trans-Pasifik (CPTPP) memandangkan terdapat bantahan dan kebimbangan dari pelbagai pihak.

JAWAPAN

Tuan Yang di-Pertua,

Pada 29 November 2022, Perjanjian Komprehensif dan Progresif bagi Perkongsian Trans-Pasifik (CPTPP) telah berjaya dikuatkuasakan oleh Malaysia di samping lapan buah negara yang lain iaitu Australia, Kanada, Jepun, Mexico, New Zealand, Peru, Singapura dan Viet Nam. Baru-baru ini pula, iaitu pada 21 Februari 2023, negara Chile merupakan negara yang ke-sepuluh yang telah berjaya menguatkuasakan Perjanjian CPTPP ini.

Sejak Malaysia menandatangani dan seterusnya menguatkuasakan Perjanjian CPTPP, Kementerian Perdagangan Antarabangsa dan Industri (MITI) bersama Kementerian/ Agensi yang berkaitan telah giat melaksanakan pelbagai sesi libat urus bersama Kerajaan Negeri, Badan-Badan Bukan Kerajaan, Pertubuhan Masyarakat Sivil dan sektor swasta bagi menjawab persoalan dan kebimbangan berkaitan CPTPP, selain melaksanakan Kajian Analisis Kos-Faedah (*Cost-Benefit Analysis* - CBA) bagi mengenalpasti isu-isu berkepentingan kepada Malaysia. Langkah-langkah tersebut penting untuk memastikan kesiapsiagaan Kerajaan, industri dan rakyat dalam meraih manfaat yang optimum daripada Perjanjian ini. Sehingga kini, MITI dan Kementerian/ Agensi yang berkaitan masih melaksanakan sesi libat urus berhubung pelaksanaan CPTPP.

Tuan Yang di-Pertua,

Perjanjian CPTPP telah dirunding melalui penglibatan semua Kementerian dan Agensi Kerajaan. Meskipun pasukan perunding dari Malaysia diketuai oleh MITI, ianya turut dianggotai oleh Kementerian/Agensi lain yang terlibat bagi Bab-bab yang terkandung di dalam CPTPP yang berada di bawah seliaan dan tanggungjawab mereka. Sebagai contoh, Bab Perolehan Kerajaan dirunding oleh Kementerian Kewangan manakala Bab Buruh pula oleh Kementerian Sumber Manusia. Untuk Bab Hak Harta Intelektual serta Syarikat Milik Kerajaan (*State Owned Enterprises*) ianya telah dirunding oleh Kementerian Perdagangan Dalam Negeri dan Kos Sara Hidup. Kementerian dan Agensi berkaitan telah secara kolektif menyokong Malaysia untuk meratifikasi dan seterusnya menguatkuasakan CPTPP.

Memandangkan Perjanjian CPTPP telahpun berkuatkuasa bagi Malaysia, maka tiada isu berbangkit dalam isu penilaian semula penyertaan Malaysia dalam CPTPP. Satu-satunya alternatif sekiranya

Perjanjian ini tidak menguntungkan negara, adalah dengan menarik diri daripada Perjanjian CPTPP. Perkara ini dijelaskan melalui peruntukan di dalam Artikel 4 Penarikan Balik (*Withdrawal*) Perjanjian CPTPP yang membenarkan negara-negara anggota CPTPP menarik balik penyertaan daripada Perjanjian ini menerusi hantaran notis kepada New Zealand selaku *Depositary* CPTPP serta pemakluman kepada negara-negara anggota yang lain. Penarikan balik ini akan berkuatkuasa enam bulan selepas notis dikemukakan kepada *Depositary*. Walau bagaimanapun, penarikan diri daripada CPTPP bukanlah satu langkah yang bijak kerana ianya akan mengakibatkan Malaysia tidak dapat menikmati manfaat hasil daripada pelaksanaan Perjanjian ini.

Tuan Yang di-Pertua,

Bagi mengatasi kebimbangan sesetengah pihak, Kerajaan telah berjaya merunding dan mendapatkan beberapa fleksibiliti dan ruang dasar yang telah diberikan kepada Malaysia di bawah Perjanjian ini. Selain itu, Kerajaan kekal optimis dengan manfaat yang dinikmati dari Perjanjian CPTPP yang jauh lebih banyak berbanding sebarang kos yang mungkin timbul, sepertimana dapatan hasil Kajian Analisa Kos-Faedah berhubung penyertaan Malaysia di dalam CPTPP yang telah dilaksanakan oleh PricewaterhouseCoopers (PWC). Sejak Perjanjian CPTPP berkuatkuasa pada 29 November 2022 sehinggalah data terkini pada 3 Mac 2023, sebanyak 483 Sijil Tempasal Berkeutamaan atau *Preferential Certificate of Origin* (PCO) dengan nilai FOB lebih RM191.7 juta telah dikeluarkan oleh MITI kepada pengeksport tempatan bagi membolehkan mereka mendapat layanan berkeutamaan (*preferential treatment*) melalui duti import yang lebih rendah atau bebas duti. Ini jelas menunjukkan bahawa terdapat permintaan atau *demand* daripada pengeksport tempatan terhadap Perjanjian CPTPP sekaligus meyakinkan Kerajaan bahawa Perjanjian tersebut adalah relevan dan perlu diteruskan pelaksanaannya.

Tuan Yang di-Pertua,

Sehingga kini, sebanyak enam (6) buah negara telah secara rasminya mengemukakan permohonan kemasukan (*accession*) ke dalam Perjanjian CPTPP. Negara-negara tersebut adalah United Kingdom (UK), Republik Rakyat China, Taiwan, Ecuador, Costa Rica dan Uruguay. Langkah permohonan kemasukan tersebut adalah suatu petanda positif yang membuktikan bahawa Perjanjian CPTPP memberi pelbagai manfaat termasuk meningkatkan kedudukan sosio-ekonomi

negara-negara tersebut. Rundingan memasukkan UK ke dalam Perjanjian CPTPP adalah di peringkat akhir dan akan dimuktamadkan tidak lama lagi. Di sini jelas dapat diperhatikan bahawa, sekiranya Perjanjian CPTPP tidak mempunyai sebarang manfaat atau faedah, maka sudah pastinya negara-negara tersebut tidak akan membuat permohonan rasmi untuk menyertai perjanjian ini. Dalam hal ini, adalah amat merugikan sekiranya Malaysia menarik diri daripada Perjanjian CPTPP, kerana kita bukan hanya akan terlepas daripada menikmati segala manfaat serta peluang yang boleh diperolehi daripada perjanjian berpiawaian emas atau *gold standard* ini, malah kedudukan Malaysia sebagai destinasi pelaburan juga akan tergugat di mana pelabur-pelabur asing lebih cenderung memilih negara-negara anggota CPTPP yang lain seperti Singapura dan Viet Nam untuk melabur berbanding Malaysia.

Walaupun bagaimanapun, sekiranya terdapat mana-mana pihak yang mempunyai cadangan penyelesaian terbaik terhadap isu-isu yang dibangkitkan di bawah Perjanjian CPTPP ini, MITI bersama-sama Kementerian-kementerian yang lain amat berbesar hati untuk mendengar cadangan-cadangan tersebut agar Kerajaan dapat merangka strategi penyelesaian yang mampan demi kesejahteraan ekonomi Malaysia secara keseluruhannya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATUK HAJI IDRIS BIN AHMAD
[BAGAN SERAI]**

SOALAN

DATUK HAJI IDRIS BIN AHMAD [BAGAN SERAI] minta **MENTERI
PERTANIAN DAN KETERJAMINAN MAKANAN** menyatakan
langkah-langkah Kerajaan untuk membantu pesawah padi yang
terpaksa menanggung beban kenaikan harga baja dan racun.

JAWAPAN

Tuan Yang Di Pertua,

Untuk makluman Ahli Yang Berhormat, Kerajaan amat perihatin akan beban yang ditanggung oleh pesawah berikutan peningkatan kos bahan mentah yang memberi kesan terhadap kenaikan kos input pertanian dan pendapatan pesawah.

Bagi meringankan beban pesawah akibat kenaikan kos ini, Kerajaan telah menaikkan kadar bantuan bersubsidi racun makhluk perosak di bawah program Skim Insentif Pengeluaran Padi (SIPP) daripada RM200/hektar per musim kepada RM300/hektar per musim pada tahun 2022 secara *one-off*. Kenaikan kadar ini melibatkan implikasi kewangan tambahan sebanyak RM62 juta. Kementerian Pertanian dan Keterjaminan Makanan (KPKM) juga kini sedang berusaha untuk mengekalkan kadar baharu ini bagi tahun 2023 dan tahun-tahun seterusnya namun ianya tertakluk kepada kelulusan Kementerian Kewangan (MOF) dan kedudukan kewangan semasa.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : DATUK LARRY SOON @ LARRY
SNG WEI SHIEN [JULAU]**

SOALAN

DATUK LARRY SOON @ LARRY SNG WEI SHIEN [JULAU] minta **MENTERI KESIHATAN** menyatakan pendirian dan komitmen Kementerian berhubung penggubalan Rang Undang-Undang Kawalan Produk Tembakau dan Merokok 2022. Bilakah inisiatif *Generational End Game* (GEG) ini akan mula dilaksanakan.

JAWAPAN

Tuan Yang di-Pertua,

1. Rang Undang-Undang (RUU) Kawalan Produk Tembakau dan Merokok 2022 telah pun dibentang dan dibuat bacaan pertama dan bacaan kedua pada Sidang Dewan Rakyat Keempat Belas, Penggal Kelima, Mesyuarat Ketiga pada Ogos 2022. Namun, RUU tersebut telah dirujuk ke Jawatankuasa Pilihan Khas Bagi Menimbang RUU Kawalan Produk Tembakau dan Merokok 2022 untuk penelitian lanjut.

2. Walau bagaimanapun, pembentangan RUU ini tertangguh akibat pembubaran Parlimen pada 10 Oktober 2022. Kementerian Kesihatan Malaysia (KKM) telah membuat penelitian semula dan akan meneruskan pembentangan semula RUU ini dengan pindaan yang dipersetujui oleh Jawatankuasa Pilihan Khas melalui Penyata yang disiarkan pada 5 Oktober 2022. KKM mensasarkan untuk membentangkan semula RUU ini dalam masa terdekat agar penguatkuasaan dapat dimulakan pada tahun 2024.

3. Untuk makluman Ahli Yang Berhormat, pelaksanaan inisiatif *Generational Endgame* (GEG) telah dimulakan sejak tahun 2022 walaupun peruntukan undang-undang masih belum diluluskan. Inisiatif yang telah dilaksanakan termasuk aktiviti advokasi dan pendidikan serta penumpuan kepada mereka yang telah merokok untuk bantuan rawatan berhenti merokok melalui Pelan *Generational Endgame* Anti-Rokok-18 atau GEGAR-18.

4. Inisiatif di bawah Pelan GEGAR-18 adalah merangkumi persekitaran yang bebas tanpa sebarang bentuk amalan merokok dan memastikan generasi ini kekal bebas tidak merokok sepanjang hayat.

5. Pelan GEGAR-18 dilaksanakan dengan kerjasama pihak Kementerian Pendidikan Malaysia (KPM), Kementerian Pendidikan Tinggi (KPT), Kementerian Pembangunan Wanita, Keluarga dan Masyarakat (KPWKM) serta Pertubuhan Bukan Kerajaan (NGO) seperti Majlis Belia Malaysia, Pertubuhan Wanita Malaysia untuk Kawalan Tembakau dan Kesihatan (MYWATCH), Persatuan Kanser Kebangsaan Malaysia (NCSM), Persatuan Mencegah Dadah Malaysia (PEMADAM), Pertubuhan Green Lung Malaysia, Pertubuhan IKRAM Malaysia dan lain-lain lagi.

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DATUK LARRY SOON @ LARRY SNG
WEI SHIEN [JULAU]**

SOALAN

Datuk Larry Soon @ Larry Sng Wei Shien [Julau] minta **MENTERI KOMUNIKASI DAN DIGITAL** menyatakan sejauh manakah usaha pemberian PerantiSiswa Keluarga Malaysia ini telah berjaya dilaksanakan dan adakah Kementerian akan meneruskan inisiatif pemberian peranti percuma ini dalam usaha membantu pelajar-pelajar di dalam negara.

JAWAPAN

Tuan Yang di-Pertua,

Secara keseluruhannya, lebih 359,776 atau 97% tablet telah diedarkan di seluruh negara dalam tempoh pengagihan sehingga 14 Mac 2023 di mana penerima terdiri daripada mahasiswa/pelajar daripada Kementerian Pendidikan Tinggi, Kementerian Pendidikan Malaysia dan Kementerian Pelancongan, Seni dan Budaya. Baki tablet sebanyak 3% lagi akan diedarkan dalam masa terdekat kepada mahasiswa/pelajar yang layak menerimanya mengikut jadual agihan yang telah diaturkan oleh Kementerian Komunikasi dan Digital.

Setakat hari ini, inisiatif PerantiSiswa hanya menfokuskan kepada objektif asal inisiatif ini iaitu membantu pelajar/mahasiswa yang terkesan dengan mod pembelajaran secara dalam talian akibat wabak Covid-19 yang kini hampir pulih sepenuhnya. Sebarang peluasan inisiatif ini akan melibatkan perolehan dan peruntukan tambahan daripada Kerajaan. Justeru, cadangan peluasan boleh dipertimbangkan dan diambil kira dengan syarat inisiatif ini dilanjutkan dengan peruntukan tambahan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATUK LARRY SOON @ LARRY SNG WEI
SHIEN [JULAU]**

SOALAN

DATUK LARRY SOON @ LARRY SNG WEI SHIEN [JULAU] minta
MENTERI EKONOMI menyatakan :

- (a) berapa jumlah peratusan rakyat miskin di Sarawak dapat dikurangkan setakat ini di bawah Rancangan Malaysia Ke-12. Nyatakan juga secara spesifik untuk penduduk di lokaliti Parlimen Julau; dan
- (b) langkah proaktif Kementerian untuk terus membantu rakyat keluar dari kancah kemiskinan yang meruncing.

JAWAPAN

Tuan Yang di-Pertua,

Untuk makluman Ahli Yang Berhormat, data kemiskinan di Malaysia adalah berdasarkan Survei Pendapatan, Perbelanjaan Isi Rumah dan Kemudahan Asas (HIES & BA) dilaksanakan oleh Jabatan Perangkaan Malaysia (DOSM). Survei ini dijalankan dua kali setiap lima tahun. Survei terkini adalah pada tahun 2019 manakala survei yang sedang dilaksanakan adalah pada tahun 2022. HIES & BA 2022 dijangka diterbitkan pada pertengahan 2023.

Insiden kemiskinan mutlak di Sarawak pada tahun 2019 adalah sebanyak 9.0% dan dianggarkan meningkat kepada 12.9% pada tahun 2020 akibat daripada pandemik COVID-19 dan cabaran sosioekonomi. Insiden kemiskinan yang baharu akan diterbitkan bersama Laporan HIES & BA 2022.

Bagi Parlimen Julau, statistik kemiskinan boleh didapati daripada Laporan Statistik Subnasional Parlimen dan Dewan Undangan Negeri Sarawak P.209 Julau yang diterbitkan oleh DOSM. Insiden kemiskinan pada tahun 2019 adalah sebanyak 18.1%.

Tuan Yang di-Pertua,

YAB Perdana Menteri semasa ucapan Bajet 2023 pada 24 Februari 2023, telah mengumumkan langkah-langkah berikut bagi mengurangkan kadar kemiskinan termasuk:

- a. Sumbangan Tunai Rahmah kepada hampir 9 juta penerima dengan peruntukan disediakan hampir RM8 bilion;
- b. Bantuan bulanan Jabatan Kebajikan Masyarakat (JKM) kepada hampir 400,000 golongan yang mudah terjejas termasuk kanak-kanak, warga emas dan orang kurang upaya;

- c. Pelbagai bantuan, subsidi dan insentif kepada sekitar 240,000 pesawah dan 380,000 pekebun kecil;
- d. Projek pembaikan luar bandar dan program-program membasmi kemiskinan (RM3.9 billion);
- e. Subsidi, bantuan serta insentif bagi mengurangkan beban kos sara sebanyak RM64 billion serta pelaksanaan konsep Payung Rahmah; dan
- f. Pakej Perpaduan Prabayar Internet Mudah Alih dan Pakej Perpaduan Jalur Lebar.

Kerajaan melalui Kementerian Ekonomi sedang melaksanakan Inisiatif Pendapatan Rakyat (IPR) yang akan menumpukan kepada pengupayaan golongan miskin tegar dan B40 di seluruh negara supaya meningkatkan potensi pendapatan secara mampan. Peruntukan sejumlah RM750 juta disediakan untuk tahun 2023 bagi menjayakan IPR.

Program IPR akan melibatkan tiga inisiatif permulaan iaitu Inisiatif Usahawan Tani (INTAN), Inisiatif Usahawan Makanan (INSAN) dan Inisiatif Operator Perkhidmatan (IKHSAN). Program ini menyasarkan untuk peserta meraih pendapatan antara RM2,000 hingga RM2,500 sebulan dalam tempoh pemantauan 24 bulan. Majlis pelancaran IPR telah diadakan pada 26 Februari 2023.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATUK LARRY SOON @ LARRY SNG WEI
SHIEN [JULAU]**

SOALAN

DATUK LARRY SOON @ LARRY SNG WEI SHIEN [JULAU] minta
MENTERI LUAR NEGERI menyatakan :

- (a) jumlah rakyat warganegara Malaysia yang terlibat dengan sindiket penipuan tawaran pekerjaan di luar negara; dan
- (b) jumlah mereka yang masih terperangkap di luar negara dan usaha Kementerian dalam membawa mereka pulang ke tanah air dengan selamat.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Julau atas pertanyaan yang dikemukakan.

2. Untuk makluman Yang Berhormat, sehingga 13 Februari 2023, KLN melalui Kedutaan-Kedutaan Besar Malaysia di Bangkok, Phnom Penh, Vientiane dan Yangon telah menerima sejumlah 564 laporan mengenai warganegara Malaysia yang menjadi mangsa sindiket jenayah penipuan tawaran pekerjaan di luar negara. Daripada jumlah tersebut, seramai 401 orang telah berjaya diselamatkan, dengan 377 orang daripada mereka telah dihantar pulang. Baki seramai 24 orang yang lain sedang ditahan di depoh tahanan sementara menunggu proses pengusiran pulang, manakala 163 orang lagi masih sedang dikesan.

3. Negara yang mempunyai bilangan kes paling ramai dilaporkan adalah Kemboja dengan 277 kes. Ini diikuti dengan Myanmar 135 kes, Laos 92 kes dan Thailand 60 kes. Daripada jumlah tersebut, bilangan mangsa yang telah diselamatkan di Kemboja adalah seramai 247 orang, 37 orang di Myanmar, 68 orang di Laos dan 49 orang di Thailand. Bagi yang masih belum dikesan, terdapat 98 orang di Myanmar, 24 orang di Laos, 11 orang di Thailand dan 30 orang di Kemboja.

4. Kementerian melalui Perwakilan-Perwakilan Malaysia yang berkenaan dan dengan kerjasama pihak berkuasa tuan rumah akan terus berusaha untuk mengesan serta menyelamatkan para mangsa. Dalam masa yang sama, para mangsa yang diselamatkan adalah tertakluk kepada perundangan sesebuah negara, termasuk proses siasatan dan pendakwaan, sebelum mereka dibenarkan pulang ke tanah air.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : Tuan Lee Chean Chung [Petaling Jaya]

SOALAN

Tuan Lee Chean Chung [Petaling Jaya] minta **MENTERI DALAM NEGERI** menyatakan secara terperinci rancangan Kementerian untuk menambah skim perumahan anggota polis di seluruh negara, serta langkah-langkah yang diambil untuk membaik pulih serta menaik taraf kuarters polis bagi memastikan kebajikan dan imej polis sentiasa terjaga.

JAWAPAN

Tuan yang Di Pertua,

Kerajaan telah merancang untuk menambah baik skim perumahan anggota polis di seluruh negara. Antara rancangan yang telah dilaksanakan adalah seperti berikut:

1. Melaksanakan pembinaan kuarters-kuarters baru berdasarkan permohonan projek di dalam bajet pembangunan dari **tempoh RP4 RMK10 sehingga RP2 RMK12** berjumlah 1,580 unit (*RM1.98 Bilion kos keseluruhan projek termasuk Bangunan Pentadbiran, Sokongan dan Kuarters*) di seluruh negara.

Antara projek pembinaan yang telah diluluskan adalah seperti berikut:

- a. Pembinaan 102 Unit Kuarters Balai Polis Inanam, Kota Kinabalu, Sabah;
- b. Pembinaan 63 Unit Kuarters Ibu Pejabat Polis Daerah Muallim, Perak;
- c. Pembinaan 54 Unit Kuarters Ibu Pejabat Polis Daerah Lawas, Sarawak;
- d. Pembinaan 103 Unit Kuarters Ibu Pejabat Polis Daerah Jeli, Kelantan;
- e. Pembinaan 11 Unit Kuarters Balai Polis Matang Jaya, Padawan, Sarawak;
- f. Pembinaan 8 Unit Kuarters Balai Polis Spoah, Betong, Sarawak;
- g. Pembinaan 273 Unit Kuarters Kem Batalion 10 Pasukan Gerakan Am Sarikei, Sarawak;
- h. Pembinaan 486 Unit Kuarters Kem Batalion 20 Pasukan Gerakan Am Beluran Sabah;
- i. Pembinaan 10 Unit Kuarters Balai Polis Rantau Panjang, Kelantan;
- j. Pembinaan 96 Unit Kuarters Ibu Pejabat Polis Daerah Klang Utara;

SOALAN NO: 246

- k. Pembinaan 55 Unit Kwarters Ibu Pejabat Polis Daerah Hulu Terengganu, Terengganu;
 - l. Pembinaan 200 Unit Kwarters di Ibu Pejabat Polis Kontinjen Pulau Pinang;
 - m. Pembinaan 55 Unit Kwarters di Balai Polis Bukit Jelutong, Selangor;
 - n. Pembinaan 38 Unit Kwarters di Ibu Pejabat Polis Daerah Belaga, Sarawak;
 - o. Pembinaan 14 Unit Kwarters di Balai Polis Kuala Penyu, Beaufort, Sabah;
 - p. Pembinaan 2 Unit Kwarters di Pondok Polis Kampung Pimping, Beaufort, Sabah; dan
 - q. Pembinaan 10 Unit Kwarters Balai Polis Pulau Redang, Terengganu.
2. Melaksanakan pembinaan kwarters secara PBLT iaitu sebanyak 97 Unit (*RM114.139 juta kos keseluruhan projek termasuk Bangunan Pentadbiran, Sokongan dan Kwarters*) seperti berikut:
- a. Pembinaan 10 Unit Kwarters Balai Polis Kuala Krau, Temerloh, Pahang;
 - b. Pembinaan 13 Unit Kwarters Balai Polis Simpangan, Tumpat, Kelantan; dan
 - c. Pembinaan 74 Unit Kwarters Markas Operasi Pasukan Polis Marin Wilayah 3 Tok Bali, Kelantan.

3. Menjalankan kerja-kerja menaik taraf dan membaik pulih kuarters polis seperti berikut:
- a. Pembaikan Dan Menaiktaraf Kuarters Kediaman PDRM dengan kos sebanyak RM10,000,000.00. Sebanyak 11,498 unit kuarters daripada keseluruhan 61,781 unit kuarters di seluruh Malaysia telah dibaiki dengan tumpuan diberikan terhadap kerja-kerja pembaikan infra; dan
 - b. Pembaikan Pejabat Dan Kuarters Ibu Pejabat Polis Daerah Kajang dengan kos RM1,685,000.00.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN LEE CHEAN CHUNG (PETALING
JAYA)**

SOALAN

TUAN LEE CHEAN CHUNG [PETALING JAYA] minta **MENTERI KERJA RAYA** menyatakan bagaimanakah Kementerian bercadang untuk menyelesaikan isu kesesakan lalu lintas yang semakin teruk di kawasan federal highway di susur keluar Sunway terutamanya ketika waktu puncak, musim perayaan dan cuti hujung minggu.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian ini amat mengambil berat akan isu kesesakan lalu lintas yang berlaku di kawasan bandar terutamanya ketika waktu puncak, musim perayaan dan cuti hujung minggu.

Bagi mengurangkan kesesakan lalulintas di kawasan Lebuhraya Persekutuan, Kementerian telah menyiapkan Lebuhraya Bertingkat Damansara – Shah Alam (DASH) yang menghubungkan Denai Alam dan Damansara Perdana. Dengan penyiapan lebuhraya ini, dijangkakan kesesakan lalulintas di Lebuhraya Persekutuan dapat dikurangkan.

Pada masa ini, Kementerian telah menerima cadangan daripada beberapa pembida yang berminat untuk melaksanakan projek lebuhraya yang menghubungkan Kuala Lumpur hingga ke Klang melalui kaedah *Public Private Partnership* (PPP), walau bagaimanapun, cadangan tersebut masih dalam penelitian Kementerian ini.

Kementerian ini juga akan meneliti sekiranya terdapat cadangan projek dimohon dalam Rolling Plan RMKe-12 yang akan datang dan akan dipertimbangkan untuk diangkat kepada Agensi Pusat untuk kelulusan, tertakluk kepada kedudukan keutamaan projek dan ketersediaan agihan peruntukan pembangunan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN LEE CHEAN CHUNG [PETALING JAYA]

SOALAN

TUAN LEE CHEAN CHUNG [PETALING JAYA] minta **PERDANA MENTERI** menyatakan bilangan rakyat Malaysia yang terlibat kes penipuan dalam talian sepanjang tahun 2019 hingga 2022 dan nyatakan kemajuan terkini hasil pelaksanaan Pusat Respons Scam Kebangsaan (NSRC) untuk membendung jenayah penipuan dalam talian.

JAWAPAN**YB DATUK SERI AZALINA OTHMAN SAID,
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Berdasarkan statistik yang dikemukakan oleh JSJK, PDRM, jumlah bilangan kes penipuan dalam talian dan nilai kerugian yang dilaporkan adalah seperti berikut:

Tahun	Kes Dilaporkan	Nilai Kerugian
2019	17,678	RM768,387,227.05
2020	21,497	RM658,657,580.59
2021	26,297	RM700,015,419.49
2022	25,480	RM850,846,659.24.

2. Kes-kes penipuan atas talian yang berlaku ini melibatkan pelbagai jenis modus operandi seperti penipuan telekomunikasi (*telecommunication fraud*), penipuan perdagangan elektronik atau *e-Commerce fraud*, pinjaman tidak wujud, tipu pelaburan tidak wujud, *love scam* dan *e-Financial fraud* terutamanya melalui teknik *Phishing*.

3. Semenjak penubuhan Pusat Respons Scam Kebangsaan (NSRC) setakat 31 Januari 2023, sebanyak 16,752 panggilan yang diterima oleh NSRC merangkumi laporan kes-kes penipuan dan khidmat nasihat kepada orang ramai. Berdasarkan kepada aduan-aduan yang diterima itu, didapati jumlah kerugian adalah sebanyak RM39,299,158.25.

4. Berdasarkan aduan dan penelitian lanjut ke atas aduan-aduan tersebut pihak PDRM telah membuka sebanyak 751 kertas siasatan bagi siasatan kesalahan penipuan di bawah seksyen 420 Kanun Keseksaan dan sebanyak 24 kertas siasatan di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 (Akta 613) dan telah membekukan sebanyak RM24.3 juta bagi tujuan siasatan bagi

kesalahan pengubahan wang haram. Siasatan terperinci sedang giat dilaksanakan.

5. Selain itu pihak NSRC juga sedang meneliti dan mengenal pasti beberapa peruntukan undang-undang yang sedia ada bagi membolehkan suatu tindakan penguatkuasaan yang lebih berkesan dan menyeluruh diambil untuk membendung jenayah penipuan dalam talian ini. Penelitian ini juga termasuk mencari kaedah yang bertepatan berdasarkan undang-undang bagi membolehkan hasil kerugian mangsa boleh dipulihkan semula (*recovery*). Antara akta-akta yang diteliti adalah Kanun Keseksaan, Kanun Tatacara Jenayah dan Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001.

6. Dalam masa yang sama pihak NSRC dengan kerjasama pihak-pihak yang berkepentingan yang lain termasuk badan bukan kerajaan telah dan akan melipat gandakan usaha dan aktiviti kesedaran orang awam berkaitan kesalahan scam ini.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGKAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : TUAN LEE CHEAN CHUNG
[PETALING JAYA]

SOALAN

TUAN LEE CHEAN CHUNG [PETALING JAYA] minta **MENTERI KEWANGAN** menyatakan jumlah pulangan *Government-linked and Investment Corporation* (GLIC) kepada Kerajaan dari tahun 2011 hingga 2021.

JAWAPAN

Tuan Yang di-Pertua,

Pulangan dalam pelaburan syarikat adalah salah satu sumber pendapatan negara. Pulangan pelaburan ini adalah dalam bentuk dividen yang dikelaskan di bawah hasil bukan cukai (*non-revenue tax*) kepada Kerajaan. Pelaburan di dalam syarikat-syarikat Kerajaan secara umumnya bertujuan untuk membangunkan ekonomi negara bagi meningkatkan kualiti kehidupan rakyat.

Penubuhan syarikat pelaburan Kerajaan adalah untuk menyediakan khidmat sosial kepada rakyat seperti perkhidmatan pengangkutan awam dan utiliti serta merancakkan pertumbuhan ekonomi melalui pelaburan dalam sektor strategik seperti penyelidikan dan pembangunan teknologi. Selain itu, syarikat pelaburan Kerajaan juga diwujudkan bertujuan memenuhi jurang pasaran di mana terdapat kurang penglibatan daripada sektor swasta berikutan kos pelaburan yang tinggi dan kesukaran menembusi pasaran. Di samping itu juga, syarikat pelaburan Kerajaan turut berperanan menarik pelabur tempatan dan asing untuk melabur

dalam bidang khusus seperti bioteknologi, teknologi maklumat dan komunikasi.

Pulangan pelaburan dalam bentuk dividen yang diterima oleh Kerajaan khususnya daripada syarikat Menteri Kewangan (Diperbadankan) (MKD) dari tahun 2011 hingga 2021 adalah seperti berikut:

TAHUN	DIVIDEN DITERIMA (RM)
2021	28,191,753,331.28
2020	35,323,986,119.71
2019	55,204,979,952.36
2018	27,903,075,039.67
2017	16,847,329,045.09
2016	16,720,995,452.94
2015	27,845,670,977.54
2014	29,606,720,666.85
2013	28,403,200,799.57
2012	29,489,718,518.65
2011	30,546,405,194.45

Jumlah dividen yang diterima dari tahun 2011 hingga 2021

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA,
PARLIMEN KE-15**

PERTANYAAN : BERTULIS
DARIPADA : TUAN LEE CHEAN CHUNG
[PETALING JAYA]

SOALAN

YB TUAN LEE CHEAN CHUNG [PETALING JAYA] minta **KEMENTERIAN PERDAGANGAN ANTARABANGSA DAN INDUSTRI** menyatakan jumlah geran dan insentif yang diberikan kepada syarikat asing dan syarikat tempatan dalam sektor elektronik dan semikonduktor dari tahun 2011 hingga 2021.

JAWAPAN

Tuan Yang di-Pertua,

Kementerian Perdagangan Antarabangsa dan Industri (MITI) melalui Lembaga Pembangunan Pelaburan Malaysia (MIDA) sentiasa komited dalam menarik pelaburan ke dalam negara sama ada daripada syarikat tempatan mahupun syarikat asing. Antara langkah - langkah yang diambil adalah dengan menawarkan pelbagai pakej insentif seperti Taraf Perintis, Elaun Cukai Pelaburan, Galakan Cukai Istimewa di bawah Pelan Jana Semula Ekonomi Negara (PENJANA), dan geran padanan kepada syarikat perkilangan yang layak termasuk syarikat dalam sektor elektronik dan semikonduktor.

Bagi tempoh 2011 hingga 2021, sebanyak 283 syarikat dengan jumlah nilai pelaburan sebanyak RM99 bilion telah diluluskan insentif di dalam sektor elektronik dan semikonduktor. Jumlah ini terdiri daripada 157 syarikat tempatan dengan jumlah pelaburan sebanyak RM4.6 bilion dan 126 syarikat asing dengan jumlah pelaburan sebanyak RM94.4 bilion.

Di antara keluaran atau aktiviti utama yang diluluskan insentif ini adalah *semiconductor devices, integrated circuit (IC), Internet-of-Things (IOT) products, multi-layer printed circuit board (PCB)* dan *advanced electronic packaging*.

MIDA juga telah diberi mandat untuk menilai permohonan syarikat bagi geran padanan dengan tujuan untuk menarik pelaburan berkualiti tinggi, serta membantu syarikat dalam meningkatkan produktiviti. Butiran geran tersebut adalah seperti berikut:

a. Dana Strategik Pelaburan Tempatan (DISF)

Dana Strategik Pelaburan Tempatan (DISF) telah mula diperkenalkan sejak tahun 2012 (RMK-10) untuk memacu peralihan syarikat milik rakyat Malaysia ke arah industri yang bernilai ditambah tinggi, berteknologi tinggi, berintensifkan pengetahuan, serta berasaskan inovasi dalam industri yang disasarkan.

Geran yang diluluskan adalah berbentuk padanan (50:50) melalui pembayaran semula (*reimbursable*) yang perlu dituntut dalam tempoh yang diluluskan berdasarkan kriteria dan garis panduan yang ditetapkan. Terdapat lima (5) jenis geran di bawah DISF iaitu latihan, penyelidikan dan pembangunan (R&D), pemodenan atau naiktaraf mesin dan peralatan, memperoleh standard atau pensijilan antarabangsa dan pelesenan serta pembelian teknologi baharu.

Dalam tempoh 2012-2021, sebanyak lebih 50 syarikat tempatan telah diluluskan geran padanan berjumlah RM400 juta bagi industri elektrik dan elektronik. Di antara keluaran yang diluluskan geran DISF adalah pembuatan komponen elektronik seperti *IC design, light emitting diode (LED)* dan *advanced IC packaging*.

b. Dana Berimpak Tinggi (HIF)

Dana ini telah diperkenalkan pada tahun 2000 (RMK-8) untuk menarik pelaburan yang berpotensi, strategik dan memberi

impak besar kepada ekonomi negara dalam pelbagai aspek seperti nilai ditambah yang tinggi, pemindahan teknologi, peningkatan eksport negara, pengukuhan rantai industri, pembangunan vendor tempatan, penggunaan bahan tempatan, peningkatan R&D tempatan dan peningkatan tahap kemahiran.

Geran yang diluluskan adalah berbentuk padanan (50:50) melalui pembayaran semula (*reimbursable*) yang perlu dituntut dalam tempoh yang diluluskan berdasarkan kriteria dan garis panduan yang ditetapkan. Geran ini boleh dipohon oleh syarikat tempatan dan asing.

Sebanyak lebih 70 syarikat (tempatan dan asing) telah diluluskan geran padanan berjumlah RM1.4 billion bagi industri elektrik dan elektronik untuk tempoh 2011 - 2021. Antara keluaran yang diluluskan geran HIF adalah pengilangan komponen elektronik seperti fabrikasi wafer, *advanced IC packaging* dan elektronik industri seperti *measurement equipment*.

c. Dana Intervensi Industry4WRD

Dana Intervensi Industry4WRD telah diperkenalkan pada tahun 2020 bagi menggalakkan syarikat-syarikat tempatan, khususnya Perusahaan Kecil dan Sederhana (PKS) dalam sektor perkilangan dan sektor perkhidmatan berkaitan perkilangan (*manufacturing related services – MRS*) untuk mengaplikasi teknologi Industri 4.0 di dalam proses pengilangan serta sistem pengurusan syarikat yang dipacu oleh tiga faktor peralihan – Insan, Proses dan Teknologi. Dana ini menyediakan geran secara padanan (70:30) kepada syarikat yang layak sehingga jumlah maksimum RM500,000.

Sejak pelaksanaan pada tahun 2020 sehingga 31 Disember 2021, sebanyak 12 syarikat PKS dalam industri elektrik dan elektronik telah diluluskan Dana Intervensi Industry4WRD dengan jumlah geran padanan sebanyak RM4.57 juta. Antara keluaran utama yang diluluskan geran Dana Intervensi Industry4WRD adalah papan litar bercetak (*printed circuit board - PCB*), *switchboards*, dan komponen elektronik bagi

pengilangan peralatan elektronik pengguna dan elektronik industri serta yang digunakan dalam pengilangan peranti semikonduktor.

d. Geran Automasi Pintar

Selain daripada Dana Intervensi Industry4WRD, MITI melalui MIDA, juga telah memperkenalkan Geran Automasi Pintar (*Smart Automation Grant – SAG*) pada tahun 2021 bagi menggalakkan peningkatan automasi terutamanya di kalangan syarikat PKS dan juga syarikat peringkat pertengahan (*mid-tier companies - MTC*) yang diberikan secara padanan (50:50) sehingga jumlah maksimum sebanyak RM1 juta.

Sejak 4 Disember 2020 sehingga 31 Disember 2021, sebanyak 9 syarikat, iaitu 6 syarikat PKS dan 3 syarikat MTC, dalam industri elektrik dan elektronik telah diluluskan dengan jumlah geran padanan sebanyak RM6.08 juta. Antara keluaran utama yang diluluskan geran SAG adalah PCB, peralatan elektronik industri, serta komponen elektronik yang digunakan dalam pengilangan peranti semikonduktor.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : TUAN LEE CHUAN HOW [IPOH TIMUR]

SOALAN

TUAN LEE CHUAN HOW minta **MENTERI KESIHATAN [IPOH TIMUR]** menyatakan apakah purata kos setiap pesakit rawatan luka bermula daripada penerimaan oleh seorang doktor sehingga sembuh, dalam setahun, daripada Januari 2013 sehingga Disember 2022. Sehingga sembuh bermaksud pesakit di wad ataupun yang berulang alik untuk rawatan susulan.

JAWAPAN

Tuan Yang di-Pertua,

1. Pesakit warganegara yang mendapatkan rawatan di fasiliti kesihatan Kementerian Kesihatan Malaysia (KKM) akan dikenakan caj sebagaimana kadar ditetapkan di bawah Perintah Fi (Perubatan) 1982 dan Perintah Fi (Perubatan) (Pindaan) 2017. Sebagai contoh, RM1.00 boleh dikenakan bagi rawatan luka ringan sebagai pesakit luar sehingga caj maksimum RM500 bagi pesakit warganegara yang menerima rawatan sebagai pesakit dalam wad Kelas 3.

2. Walau bagaimanapun, purata kos sebenar yang ditanggung oleh Kerajaan bagi pesakit dalam (*in-patient*) mengikut jenis rawatan utama yang diberikan dari tahun 2017 hingga 2020 ialah seperti berikut:

- a. *Pressure Sore* (tanpa pembedahan) : RM8,630.95
- b. *Diabetic Limb Ulcer* (tanpa pembedahan) : RM6,279.52
- c. *Diabetic Limb Ulcer* (dengan pembedahan) : RM7,977.33
- d. *Traumatic Wound* (tanpa pembedahan) : RM3,693.27

3. Kos rawatan yang dinyatakan adalah merangkumi kos ubat-ubatan dan operasi hospital bagi seorang pesakit. Kos-kos tersebut tidak termasuk kos rawatan susulan serta rawatan domisiliari atau rawatan di rumah.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : TUAN LEE CHUAN HOW [IPOH TIMUR]

SOALAN

TUAN LEE CHUAN HOW [IPOH TIMUR] minta **MENTERI KESIHATAN** menyatakan peratus pesakit rawatan luka mengikut pecahan daerah Kinta, negeri Perak dan seluruh Malaysia, daripada Januari 2013 sehingga Disember 2022.

JAWAPAN

Tuan Yang di-Pertua,

1. *Pressure Sore* dan *Diabetic Limb Ulcer* merupakan dua diagnosis utama bagi pesakit rawatan luka di hospital-hospital Kementerian Kesihatan Malaysia (KKM). Data bagi Hospital Raja Permaisuri Bainun Ipoh menunjukkan 1.1% daripada jumlah keseluruhan kemasukan pesakit sepanjang tahun 2021 merupakan pesakit dengan *Pressure Sore* dan 0.8% pesakit dengan *Diabetic Limb Ulcer*.
2. Peratusan yang sama direkodkan bagi seluruh negeri Perak bagi kedua-dua jenis luka tersebut dalam tempoh yang sama. Manakala data kebangsaan bagi 121 hospital KKM dalam tahun yang sama menunjukkan 2% daripada jumlah kemasukan ke hospital adalah pesakit dengan *Pressure Sore* dan 0.9% adalah *Diabetic Limb Ulcer*.
3. Data kebangsaan daripada 15 hospital negeri dan hospital berpakar menunjukkan sebanyak 15,556 pelbagai jenis luka berkomplikasi daripada 12,021 pesakit dirujuk ke pasukan penjagaan luka hospital-hospital tersebut sepanjang Januari ke Disember 2021. Ini melibatkan 26 pesakit bagi setiap 10,000 kemasukan ke hospital dan kedatangan ke klinik pakar dalam tempoh yang sama.
4. Manakala, jumlah kes yang telah dirawat di klinik kesihatan seluruh Malaysia dari 2019 hingga 2022 adalah 3,171,045. Di Negeri Perak, jumlah kes yang dirawat adalah 565,195 (17.8% daripada kes seluruh Malaysia), dan di daerah Kinta jumlah kes adalah 126,646 kes (4% daripada kes seluruh Malaysia).
5. Kecederaan luka memerlukan masa untuk sembuh dan memerlukan *dressing* ditukar pada sela masa tertentu. Justeru, kebanyakan kes yang dirawat di klinik kesihatan adalah kes ulangan dengan jumlah 2,515,947 (79.3% daripada keseluruhan kes di Malaysia) manakala 655,098 (20.7%) adalah kes baharu.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGAL KEDUA,
PARLIMEN KELIMA BELAS (2023)**

PERTANYAAN : BUKAN LISAN

DARIPADA : TUAN LEE CHUAN HOW [IPOH TIMUR]

SOALAN

YB TUAN LEE CHUAN HOW [IPOH TIMUR] minta **MENTERI PEMBANGUNAN KERAJAAN TEMPATAN** menyatakan rancangan untuk menambah baik kemudahan dan peruntukan kepada perkhidmatan bomba sukarelawan.

JAWAPAN

Tuan Yang di-Pertua,

Untuk makluman Ahli Yang Berhormat, Pasukan Bomba Sukareka (PBS) merupakan sebahagian usaha untuk meningkatkan *response time* perkhidmatan kebombaan. Sehingga kini, terdapat sebanyak 357 buah pasukan PBS di seluruh negara dengan keahlian seramai 13,000 anggota sukarela. Di dalam usaha memperkasakan PBS ini, Kementerian Pembangunan Kerajaan Tempatan (KPKT) melalui Jabatan Bomba dan Penyelamat Malaysia (JBPM) telah berusaha menambah baik keperluan PBS seperti berikut:

i. Pemberian Peruntukan Geran Bantuan Kewangan

Setiap tahun PBS yang aktif akan diberikan geran bantuan kewangan sebanyak RM3,000 bagi setiap pasukan untuk pengurusan dan pengoperasian balai serta penyelenggaraan peralatan operasi. Selain itu, peruntukan ini juga diperlukan bagi pengurusan penyelenggaraan jentera dan kenderaan pasukan, bahan api, perlindungan kenderaan operasi dan cukai jalan serta lain-lain kos tambahan.

ii. Pembekalan Peralatan

PBS yang ditubuhkan akan dibekalkan dengan kelengkapan *Personal Protective Equipment (PPE)*, iaitu set pakaian pemadaman lengkap dengan *helmet*, *gloves* dan *boots* bagi membolehkan setiap PBS menghadiri sebarang operasi kecemasan terutamanya yang melibatkan kebakaran. Peralatan yang dibekalkan adalah seperti *Volunteer Fire Response Vehicle (VFRV)*, pam, *hose*, *hard suction*, *hydrant key and bar* dan lain-lain. Bermula tahun 2012 hingga tahun 2022, JBPM telah membuat pembelian PPE untuk pengoperasian PBS di seluruh negara. Jumlah perbelanjaan adalah sebanyak RM9,103,482 dan pecahan perbelanjaan adalah seperti berikut :

Bil.	Jenis PPE	Kuantiti	Kos (RM)
1.	Fire Fighting Suit	2,830	4,269,000.00
2.	Fire Fighting Glove	2,996	683,590.00
3.	Fire Fighting Helmet	3,454	2,266,992.00
4.	Fire Fighting Boot	3,978	1,068,610.00
5.	Delivery Hose	355	425,290.00
6.	Attacking Hose	500	390,000.00
Jumlah		14,113	9,103,482.00

Bagi tahun 2023 pula, JBPM telah membuat perancangan perolehan keperluan tambahan PPE seperti berikut :

Bil.	Jenis PPE	Kuantiti	Kos (RM)
1.	Fire Fighting Suit	250	212,500.00
2.	Fire Fighting Glove	200	50,000.00
3.	Fire Fighting Boot	250	100,000.00
4.	Uniform PBS	1,000	200,000.00
Jumlah Perbelanjaan		1,700	562,500.00

iii. Pembekalan Jentera Bomba Sukarela atau *Volunteer Fire Response Vehicle* (VFRV)

JBPM juga berusaha menyediakan pembekalan VFRV kepada PBS. Sebanyak 52 buah jentera Jepun (telah diagihkan pada tahun 2002-2007), 170 buah Proton Arena (agihan pada tahun 2008 dan 2011) dan 30 buah Mitsubishi Triton Lite (agihan tahun 2013) telah diserahkan dan diagihkan kepada PBS.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN LEE CHUAN HOW [IPOH TIMUR]

SOALAN

YB TUAN LEE CHUAN HOW [IPOH TIMUR] minta **MENTERI PEMBANGUNAN KERAJAAN TEMPATAN** menyatakan jumlah bomba sukarelawan yang aktif di seluruh Malaysia daripada Januari 2013 sehingga Disember 2022.

JAWAPAN

Tuan Yang di-Pertua,

Untuk makluman Ahli Yang Berhormat, Pasukan Bomba Sukareka (PBS) merupakan sebahagian usaha untuk meningkatkan *response time* perkhidmatan kebombaan. Sehingga kini, terdapat sebanyak 357 buah pasukan PBS di seluruh negara dengan keahlian seramai 13,000 anggota sukarela. Berdasarkan sesi pengauditan PBS bagi suku pertama tahun 2023, terdapat seramai **12,118 anggota sukarela** yang aktif di seluruh negara.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN (BERTULIS)

DARIPADA : TUAN LEE CHUAN HOW [IPOH TIMUR]

SOALAN

TUAN LEE CHUAN HOW [IPOH TIMUR] minta **MENTERI PERDAGANGAN DALAM NEGERI DAN KOS SARA HIDUP** menyatakan mengulas pengeluaran komoditi makanan terutamanya gula yang tidak menentu sejak akhir-akhir ini atas tindakan beberapa kilang pengeluar gula yang memaksa pemborong dan peruncit untuk membeli gula yang tidak bersubsidi dalam kuantiti yang besar.

JAWAPAN

Yang di-Pertua,

Terdapat dua (2) buah syarikat gula di Malaysia iaitu MSM Holding Berhad dan CSR Sugar Refinery Sdn Bhd. Operasi pengeluaran dijalankan oleh empat (4) buah kilang gula iaitu:

- i. CSR Sugar Refinery Berhad, Shah Alam Selangor;
- ii. CSR Sugar Refinery (Padang Terap) Sdn Bhd, Perlis;
- iii. MSM Prai Berhad, Perai, Pulau Pinang; dan
- iv. MSM Sugar Refinery (Johor), Pasir Gudang, Johor.

Buat masa ini hanya gula pasir putih bertapis kasar dan halus merupakan barang kawalan berjadual dan harganya dikawal secara perundangan.

Setakat ini, tiada aduan rasmi diterima berkaitan isu paksaan ke atas pemborong dan peruncit untuk membeli gula yang tidak bersubsidi dalam kuantiti yang besar. Keberadaan bekalan gula turut diimbangi oleh kemasukan gula import yang dikawal selia oleh Kementerian. Kementerian sentiasa menjalankan pemeriksaan bagi memastikan bekalan dan keberadaan gula sentiasa mencukupi dipasaran.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN LIM GUAN ENG [BAGAN]

SOALAN

TUAN LIM GUAN ENG [BAGAN] minta **MENTERI PENDIDIKAN** menyatakan usaha untuk mengatasi kekurangan guru di sekolah vernakular yang kian serius. Nyatakan jumlah guru yang kurang dan berikan pecahan mengikut sekolah.

JAWAPAN

Tuan Yang di-Pertua,

Kementerian Pendidikan Malaysia (KPM) telah melaksanakan pengambilan seramai 22,327 guru pada tahun 2021 dan 2022 melalui kaedah *one-off* dan kluster mata pelajaran. Urusan pengambilan ini akan berterusan dari semasa ke semasa.

Untuk makluman Ahli Yang Berhormat, data kedudukan guru pada 31 Januari 2023 untuk sekolah jenis kebangsaan Cina adalah seramai 35,761 guru dengan kekosongan sebanyak 3.4%. Manakala, bagi sekolah jenis kebangsaan Tamil pula, pengisian adalah seramai 8,580 guru dengan kekosongan sebanyak 1.4%. Data kedudukan guru di Sekolah Kebangsaan pula adalah sebanyak 188,067 dengan kekosongan sebanyak 4.04%.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN LIM GUAN ENG [BAGAN]

SOALAN

TUAN LIM GUAN ENG [BAGAN] minta **PERDANA MENTERI** menyatakan cadangan meminda Perlembagaan Persekutuan untuk memberikan kewarganegaraan kepada anak-anak pasangan wanita Malaysia yang berkahwin dengan orang asing agar tiada wujudnya diskriminasi jantina.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, Jemaah Menteri telah bersetuju dengan cadangan pindaan kepada Perlembagaan Persekutuan yang melibatkan Jadual Kedua secara khususnya perenggan (d) dan (e) kepada subseksyen 1(1) dalam Bahagian I dan perenggan (b) dan (c) kepada seksyen 1 dalam Bahagian II. Pindaan tersebut membolehkan kewarganegaraan melalui kuat kuasa undang-undang diberikan kepada anak yang dilahirkan di luar negara oleh ibu yang merupakan warganegara Malaysia yang berkahwin dengan pasangan bukan warganegara Malaysia. Ia sekaligus bakal merealisasikan komitmen negara terhadap kesaksamaan jantina dan memenuhi hak terhadap kanak-kanak.

2. Cadangan tersebut akan dibentangkan di Parlimen dalam masa terdekat selepas selesaikan isu pelaksanaan yang dibangkitkan dan setelah memperolehi persetujuan daripada Majlis Raja-Raja.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEDUA
PARLIMEN LIMA BELAS 2023**

PERTANYAAN : BUKAN LISAN

DARIPADA : TUAN LIM GUAN ENG [BAGAN]

SOALAN

TUAN LIM GUAN ENG [BAGAN] minta **MENTERI PENDIDIKAN** menyatakan sama ada kelulusan lesen baru kepada Sekolah Menengah Jenis Kebangsaan Heng Ee, Bayan Baru di Pulau Pinang yang diberikan oleh Kerajaan Pakatan Harapan pada Januari 2020 akan dikembalikan.

JAWAPAN

Tuan Yang di-Pertua,

Kementerian Pendidikan (KPM) sentiasa mengambil berat dan komited dalam memastikan murid menerima pendidikan yang berkualiti seiring dengan komitmen KPM yang dijelmakan menerusi tujuh teras utama dalam memperkasa agenda pendidikan negara.

Untuk makluman Ahli Yang Berhormat, SMK Heng Ee di premis Bayan Baru, Pulau Pinang telah diberi kelulusan pemutihan pembinaan pada 1 Jun 2016. KPM juga telah menerima permohonan agar bangunan di premis Bayan Baru tersebut dioperasikan dengan pentadbiran tersendiri pada bulan Julai 2016. Namun demikian, permohonan tersebut tidak dapat dipertimbangkan memandangkan ianya adalah tidak selaras dengan dasar dan perundangan yang sedang berkuat kuasa. Sehubungan dengan itu, KPM pada 15 Februari 2017 telah meluluskan pengoperasian sekolah tersebut di premis Bayan Baru sebagai bangunan tambahan kepada SMK Heng Ee, Georgetown, Pulau Pinang.

Mesyuarat Jemaah Menteri pada 22 Januari 2020 di bawah agenda hal-hal lain telah meluluskan permohonan pembukaan institusi baharu (PIB) SMK Heng Ee di premis Bayan Baru, Pulau Pinang. Keputusan tersebut telah dibuat tanpa pembentangan khusus oleh Menteri Pendidikan berdasarkan perundangan yang berkuat kuasa, keperluan serta pertimbangan terperinci oleh Jemaah Menteri pada ketika itu. Justeru, KPM mendapati bahawa ianya memerlukan penelitian yang lebih mendalam dan menyeluruh sebelum sebarang cadangan diusulkan untuk pertimbangan Jemaah Menteri.

Bagi tujuan tersebut, KPM akan mendapatkan maklum balas berhubung isu dan permasalahan yang dihadapi oleh pihak pentadbir, guru dan murid serta mencari penyelesaian terbaik bagi menangani isu yang dihadapi.

SOALAN NO : 258

Seperti Ahli Yang Berhormat sedia maklum, SMK Heng Ee di premis Bayan Baru, Pulau Pinang kini kekal beroperasi sebagai bangunan tambahan kepada SMK Heng Ee, Georgetown, Pulau Pinang sepertimana yang telah diluluskan oleh YB Menteri Pendidikan pada 15 Februari 2017.

Sekian, terima kasih.

RT27

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN LIM GUAN ENG [BAGAN]

SOALAN

TUAN LIM GUAN ENG [BAGAN] minta **MENTERI PENDIDIKAN** menyatakan bilakah kelulusan akan diberikan kepada Sekolah Rendah Jenis Kebangsaan (Cina) Chong Hwa di Bagan Dalam, Butterworth, Pulau Pinang untuk memulakan kerja pembinaan semula bangunan uzur dan usang memandangkan wang derma telahpun berjaya dikutip daripada orang ramai.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah menerima "*Permohonan untuk Kelulusan bagi Cadangan Meroboh dan Membina Satu Blok Bangunan Baharu Empat Tingkat Mengandungi 12 Bilik Darjah dan Kantin di PBC2039 SJKC Chung Hwa 2, Butterworth Pulau Pinang (SBK) dengan Anggaran Kos RM2 Juta*" yang dikemukakan oleh pihak sekolah melalui Jabatan Pendidikan Negeri (JPN) Pulau Pinang.

Untuk makluman ahli yang terhormat, permohonan berkenaan sedang dalam penelitian dan tindakan pihak KPM. Keputusan berkaitan permohonan tersebut akan dimaklumkan kepada pihak sekolah melalui JPN Pulau Pinang.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN LIM GUAN ENG [BAGAN]

SOALAN

Tuan Lim Guan Eng [Bagan] minta **MENTERI DALAM NEGERI** menyatakan kemajuan tentang laporan polis yang dibuat terhadap YB Permatang Pauh yang membuat fitnah ke atas orang bukan Islam dan juga YB Marang bahawa golongan bukan Islam dan bukan bumiputera merupakan punca gejala rasuah di Malaysia.

JAWAPAN

Tuan Yang Di Pertua,

Berhubung kenyataan yang dikeluarkan oleh YB Permatang Pauh yang dilaporkan membuat fitnah ke atas orang bukan Islam dan kenyataan yang dilaporkan dikeluarkan oleh YB Marang berkenaan golongan bukan Islam dan bukan bumiputera merupakan punca gejala rasuah di Malaysia, kertas siasatan telah dibuka bagi setiap kes. Kedua-dua kertas siasatan dibuka di bawah Seksyen 505 (C) Kanun Keseksaan, kesalahan kenyataan-kenyataan yang mendatangkan khianat awam dan Seksyen 233 Akta Komunikasi dan Multimedia, kesalahan penggunaan tidak wajar kemudahan rangkaian atau perkhidmatan rangkaian.

Memandangkan kedua-dua kes masih lagi dalam tindakan pihak PDRM, saya tidak berhasrat untuk mengulas lanjut untuk tidak mengganggu siasatan yang sedang dilaksanakan.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN LIM LIP ENG [KEPONG]

SOALAN

TUAN LIM LIP ENG [KEPONG] minta **PERDANA MENTERI** menyatakan status terkini siasatan semula kes kematian Teoh Beng Hock dan Muhammad Adib Mohd Kassim. Apakah tindakan susulan Kerajaan dalam dua kes ini.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, susulan keputusan Mesyuarat Jemaah Menteri pada tahun 2018, pihak Polis Diraja Malaysia telah membuka kembali kertas siasatan kes kematian Teoh Beng Hock di bawah seksyen 342 Kanun Keseksaan (Kurungan Salah). Kertas siasatan tersebut telah dikembalikan oleh pihak Jabatan Peguam Negara kepada pegawai penyiasat kes pada 6 Januari 2023. Dalam hal ini, pihak Polis Diraja Malaysia telah diminta untuk membuat rakaman percakapan lanjut saksi-saksi penting sebelum mengemukakan semula kertas siasatan tersebut kepada Jabatan Peguam Negara bagi arahan selanjutnya.

2. Manakala dalam isu kematian Allahyarham Muhammad Adib Mohd Kassim, Jawatankuasa Khas Siasatan Kes Kematian Allahyarham Muhammad Adib Mohd Kassim telah ditubuhkan pada bulan Disember 2021 selaras ketetapan Jemaah Menteri. Jawatankuasa Khas tersebut telah menjalankan tugas mereka selama 9 bulan dan laporan Jawatankuasa Khas ini telah diserahkan kepada pihak Kerajaan pada 30 Ogos 2022. Apa-apa tindakan susulan berhubung perkara ini akan dibuat selepas Kerajaan meneliti laporan tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN LIM LIP ENG [KEPONG]

SOALAN

TUAN LIM LIP ENG [KEPONG] minta **PERDANA MENTERI** menyatakan rancangan Kerajaan memperoleh tanah Kerajaan atau swasta di Parlimen Kepong untuk mendirikan perumahan awam kerana hanya ada satu PPR di Kepong. Berapa permohonan perumahan awam di Kuala Lumpur yang diterima dan berapa unit perumahan awam yang kosong sekarang.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, perancangan untuk membina atau mendirikan perumahan awam adalah di bawah tanggungjawab Kementerian Pembangunan Kerajaan (KPKT). Mengenai cadangan pembinaan PPR di Kuala Lumpur, KPKT memaklumkan bahawa Kementerian tersebut telah memohon tapak cadangan bagi pembinaan projek PPR bagi tahun 2023 di bawah *Rolling Plan* 3 (RP3), Rancangan Malaysia ke-12 (RMKe-12).
2. Khusus bagi Perumahan Awam di bawah Dewan Bandaraya Kuala Lumpur, sebanyak 2,149 pemohon yang layak telahpun diluluskan permohonannya. Pada masa ini, sebanyak 234 unit rumah siap sedia untuk ditawarkan kepada mereka yang telah diluluskan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN LIM LIP ENG [KEPONG]

SOALAN

TUAN LIM LIP ENG [KEPONG] minta **PERDANA MENTERI** menyatakan senarai nama, mengikut kawasan Parlimen, lokasi 260 projek pengindahan dan penghijauan di Kuala Lumpur yang membelanjakan kos sebanyak RM100 juta. Adakah kontrak 260 projek itu diberikan melalui tender.

JAWAPAN**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, sebanyak 260 projek telah dikenalpasti oleh Dewan Bandaraya Kuala Lumpur (DBKL) untuk pelaksanaan projek pembersihan dan pengindahan bandar di sekitar Wilayah Persekutuan Kuala Lumpur. Peruntukan RM100 juta telah diluluskan melalui bajet pembangunan DBKL untuk melaksanakan 260 projek tersebut dalam tempoh 5 hingga 10 tahun bermula 2023 melalui beberapa kaedah iaitu tender terbuka, sebut harga dan kontrak berpenggal mengikut keperluan semasa.
2. Antara projek pengindahan bandar Kuala Lumpur yang dikenal pasti merangkumi kerja-kerja lanskap, naiktaraf lorong belakang dan ruang bandar, membaikpulih dan menaiktaraf pusat-pusat penjaja, memperbanyak dan menaiktaraf laluan pejalan kaki dan basikal yang selamat serta memperindahkan pencahayaan di pusat bandar raya Kuala Lumpur.
3. Usaha pengindahan ini bukan sahaja melibatkan lokasi-lokasi di pusat bandar, tetapi ianya juga meliputi kesemua 11 parlimen di dalam Kuala Lumpur seperti berikut :

Bil.	Parlimen	Jumlah projek
1.	Bukit Bintang	131
2.	Seputeh	21
3.	Wangsa Maju	18
4.	Segambut	14
5.	Bandar Tun Razak	13
6.	Lembah Pantai	11

SOALAN NO : 263

Bil.	Parlimen	Jumlah projek
7.	Kepong	11
8.	Titiwangsa	8
9.	Cheras	6
10.	Batu	5
11.	Setiawangsa	4
12.	Semua Parlimen	18
Jumlah keseluruhan		260

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN LIM LIP ENG [KEPONG]

SOALAN

Tuan Lim Lip Eng [Kepong] minta **MENTERI DALAM NEGERI** menyatakan bilangan rakyat Malaysia yang melintasi Tambak Johor dengan kenderaan dan berjalan kaki ke negara Singapura setiap hari antara Isnin hingga Jumaat. Bilakah Kerajaan akan menaik taraf Tambak Johor untuk menangani masalah kesesakan.

JAWAPAN

Tuan Yang Di Pertua,

Untuk makluman Ahli Yang Berhormat, jumlah keseluruhan pelawat Malaysia yang masuk dan keluar ke Singapura melalui Bangunan Sultan Iskandar (BSI) dan Kompleks Sultan Abu Bakar (KSAB) bagi 2020 (1,817,126), 2021 (2,836,416), 2022 (53,583,717) dan sehingga 8 Mac 2023 (13,602,637).

Bagi menangani kesesakan di Tambak Johor, Jabatan Imigresen Malaysia (JIM) telah mengambil inisiatif untuk meningkatkan mutu perkhidmatan di BSI, Tambak Johor bagi memastikan kelancaran di pintu masuk. Antara inisiatif yang telah diambil adalah seperti berikut:

1. Cadangan jumlah E-gate mengikut pelan naik taraf pengubahsuaian Dewan Penumpang Bas adalah seperti di jadual.

BIL	JENIS E-GATE	MASUK	KELUAR
1	E-GATE MACS 1.0 (SEDIA ADA)	6	6
2	E-GATE MACS XP (SEDIA ADA)	14	16
3	TAMBAHAN E-GATE	10	10
4	E-GATE FR	8	-
JUMLAH		38	32

Jumlah keseluruhan E-Gate adalah sebanyak 70 unit (38 unit - Masuk, 32 unit - Keluar) bagi ICQ Bangunan Sultan Iskandar.

2. Penggantian komputer sebanyak 330 unit pada Mei 2021 di semua kaunter imigresen di BSI dan menaiktaraf Sistem Kawalan Imigresen kepada Sistem Transformasi Web Kawalan Imigresen; dan

SOALAN NO: 264

3. Pembinaan Projek MBIKE sebanyak 25 laluan keluar di BSI dan 33 laluan keluar dan masuk di KSAB yang dijangka siap pada tahun 2024. Bilangan laluan MBIKE sedia ada adalah seperti berikut:

Lokasi	Masuk	Keluar	Jumlah
BSI	50	50	100
KSAB	25	25	50

Merujuk kepada pertanyaan mengenai usaha menaiktaraf Tambak Johor, ianya adalah diluar bidang kuasa Kementerian Dalam Negeri kerana melibatkan infrastruktur jalan raya dan tambak yang menghubungkan Malaysia dan Singapura.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN LIM LIP ENG
[KEPONG]**

SOALAN

Tuan Lim Lip Eng [Kepong] minta **MENTERI DALAM NEGERI** menyatakan bilakah pindaan Akta Penjara 1995 [*Akta 537*] akan dibuat untuk menangani masalah-masalah seperti kesesakan, kekurangan makanan dan kemudahan perubatan bagi banduan. Berapa bilangan banduan terkini mengikut jantina, warganegara dan lokasi penjara.

JAWAPAN

Tuan Yang Di Pertua,

Untuk makluman Ahli Yang Berhormat, Jabatan Penjara Malaysia melalui Kementerian Dalam Negeri sedang melaksanakan pindaan Akta Penjara 1995 [*Akta 537*]. Cadangan pindaan Akta ini bertujuan bagi menambah baik perkhidmatan dan mengekalkan kecemerlangan Jabatan Penjara Malaysia seiring dengan perubahan semasa dan cabaran masa kini.

Berdasarkan rekod Jabatan Penjara sehingga 1 Februari 2023, bilangan banduan di seluruh institusi penjara adalah seramai **72,787** orang banduan merangkumi penjara utama, Penjara Satelit, Penjara Transit dan Pusat Transit Penerimaan. Daripada jumlah tersebut, seramai **68,823** orang banduan lelaki dan seramai **3,964** orang banduan wanita. Manakala pecahan mengikut kewarganegaraan terdapat seramai **59,709** orang banduan warganegara manakala seramai **13,078** orang banduan bukan warganegara.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN LO SU FUI [TAWAU]

SOALAN

TUAN LO SU FUI [TAWAU] minta **MENTERI PENDIDIKAN** menyatakan bilangan sekolah yang diklasifikasikan sebagai daif di seluruh daerah Tawau dan apakah rancangan terkini Kementerian bagi mengatasi isu sekolah daif ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa proaktif dan memberi keutamaan dalam usaha menangani sekolah yang mempunyai bangunan daif di Sabah termasuk di kawasan Tawau.

Untuk makluman Ahli Yang Berhormat, berdasarkan data KPM, terdapat tiga buah sekolah yang mempunyai bangunan daif di Parlimen Tawau. Sekolah tersebut adalah SK Balung, SK Indersabah dan SK Perdana. Ketiga-tiga buah sekolah ini berskala 6 iaitu sekolah yang mempunyai bangunan yang tidak selamat dengan pengesahan daripada pihak teknikal pejabat pendidikan daerah (PPD) serta jabatan pendidikan negeri (JPN).

KPM telah mengemukakan permohonan menaik taraf bangunan daif di SK Balung dalam Rancangan Malaysia Ke-12 *Rolling Plan* 3 tahun 2023. Manakala bagi SK Indersabah dan SK Perdana pula, KPM merancang untuk mengangkat cadangan menaik taraf atau membina bangunan gantian untuk pertimbangan agensi pusat dalam Rancangan Malaysia Lima Tahun. Walau bagaimanapun, kelulusan dan pelaksanaan projek ini adalah tertakluk kepada keutamaan dan kedudukan kewangan semasa kerajaan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

DARIPADA : YB TUAN LO SU FUI (TAWAU)

SOALAN

TUAN LO SU FUI [TAWAU] minta **MENTERI KERJA RAYA** menyatakan:

(a) jangkaan persiapan sepenuhnya pembinaan Projek Lebuhraya Pan Borneo : Pakej 15 dan status pelaksanaan terkini bagi projek ini dan seluruh negeri Sabah; dan

(b) adakah Kementerian berhasrat mengkaji semula cadangan projek yang pernah disenaraikan dalam Kajian Semula Pembangunan Rangkaian Jalan Raya (HNDP) Fasa 2. Ia bermula dari Jalan Kuhara dan berakhir di Persimpangan Rangu/Jalan Sandakan - Tawau yang akan menjadi laluan baharu dan dapat mengurangkan kesesakan di Bandar Tawau.

JAWAPAN

Tuan Yang Di-Pertua,

(a)

Untuk makluman Ahli Yang Berhormat, pelaksanaan projek Fasa 1 Lebuhraya Pan Borneo (LPB) Sabah dengan anggaran jarak keseluruhan 706 km dibahagikan kepada 35 pakej kerja di mana sehingga kini, 15 pakej kerja telah dibuat pelantikan kontraktor bagi tujuan kerja-kerja pembinaan dengan status kemajuan sehingga Disember 2022 bagi pakej kerja yang telah dimulakan adalah 73%. Bagi Pakej Kerja 15 sepertimana yang dinyatakan oleh Ahli Yang Berhormat, status kemajuan terkini adalah 72.91% dan dijangka akan siap sepenuhnya pada Jun 2023.

Manakala status satu (1) pakej kerja baharu iaitu Pakej Kerja 9 yang melibatkan laluan dari Serusop ke Pituru pula dijangka akan dilaksanakan seawal suku tahun kedua 2023, menjadikan keseluruhan 16 pakej kerja akan dilaksanakan buat masa kini, dengan kos keseluruhan sebanyak RM 10,849 juta menggunakan peruntukan pembangunan (*Development Expenditure* – DE) sepenuhnya.

Untuk makluman Ahli Yang Berhormat juga, bagi baki 19 Pakej Kerja (Fasa 1B) yang masih belum mula pembinaan akan dibiayai secara hibrid menggunakan peruntukan pembangunan dan melalui terbitan sukuk/bon oleh DanaInfra Nasional Berhad. Projek LPB Sabah Fasa 1B ini akan dilaksanakan dengan tempoh pembinaan selama 5 tahun, dan dijangka akan dimulakan seawal suku tahun ketiga tahun 2023, tertakluk kepada kelulusan Agensi Pusat.

(b)

Untuk makluman Ahli Yang Berhormat, antara objektif Kajian Pelan Pembangunan Rangkaian Jalan Raya 2040 (HNDP 2040) yang sedang dilaksanakan pada masa ini adalah untuk menilai semula semua cadangan jalan yang terdapat di dalam dokumen HNDP Fasa 2.

Sehubungan itu, kajian ini akan mengambilkira senarai cadangan HNDP Fasa 2 terdahulu yang belum dilaksanakan untuk diteliti semula oleh Kerajaan bagi menentukan sama ada cadangan tersebut masih relevan untuk dilaksanakan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : TUAN LO SU FUI [TAWAU]

SOALAN

TUAN LO SU FUI [TAWAU] minta **MENTERI PENGANGKUTAN** menyatakan :

- (a) apakah Kementerian berhasrat untuk menaik taraf Lapangan Terbang Tawau yang mana kapasitinya telah meningkat sehingga kini
- (b) apakah perancangan Kementerian berkenaan sistem keselamatan e-hailing, adakah ia perlu dinaik taraf atau dikaji semula.

JAWAPAN

Tuan Yang Di Pertua,

1. Untuk makluman Ahli Yang Berhormat, Kementerian Pengangkutan melalui Malaysia Airports Holdings Berhad (MAHB) sebelum ini telah merancang untuk mempertingkatkan dan menaik taraf perkhidmatan Lapangan Terbang Tawau melalui Pelan Pemodenan Lapangan Terbang Tawau yang dilancarkan pada tahun 2018. Melalui pelan ini, MAHB antara lain telah bercadang untuk mempertingkatkan kapasiti pengendalian penumpang Lapangan Terbang Tawau daripada 1.5 juta penumpang setahun kepada 2.5 juta penumpang setahun.
2. Walau bagaimanapun, penularan wabak COVID-19 telah memberi kesan negatif terhadap industri penerbangan negara terutama kemampuan MAHB untuk membiayai projek tersebut. Dalam hubungan ini, syarikat penerbangan dijangka memerlukan tempoh masa sehingga 2024 untuk pulih sepenuhnya dari impak wabak COVID-19, tertakluk kepada situasi semasa penularan wabak tersebut di dalam dan luar negara.
3. Berdasarkan perkembangan terkini dan permintaan yang masih berada pada tahap sederhana dalam industri penerbangan negara, projek ini akan ditangguhkan sehinggalah industri penerbangan dipulihkan memandangkan kapasiti terminal sedia ada masih mampu menampung jumlah penumpang yang menggunakan Lapangan Terbang Tawau pada ketika ini.
4. Berdasarkan statistik semasa, jumlah pengendalian penumpang di Lapangan Terbang Tawau pada tahun 2020 dan 2021 masing-masing adalah melebihi 500 ribu orang dan 400 ribu orang. Jumlah ini menunjukkan peningkatan ketara pada tahun 2022 dengan jumlah pengendalian penumpang sebanyak 1.3 juta orang.
5. Bagi memastikan keperluan pembangunan jangka panjang lapangan terbang/padang terbang di Malaysia berdasarkan keperluan industri semasa mengambil kira impak COVID-19 dan keperluan sistem

jaringan kesalinghubungan pengangkutan negara, Kementerian Pengangkutan telah memulakan kajian *National Airports Strategic Plan* (NASP) pada Mac 2022 yang akan mengambil masa selama 18 bulan untuk disiapkan.

6. Hasil daripada kajian ini kelak akan membantu MOT dalam perancangan masa hadapan pembangunan lapangan-lapangan terbang di Malaysia termasuk Lapangan Terbang Tawau dengan lebih jelas dan efektif berdasarkan *evidence based planning*.

Tuan Yang di-Pertua,

7. Berhubung dengan pertanyaan Ahli Yang Berhormat berkenaan sistem keselamatan *e-hailing*, pada masa ini, tiada sistem keselamatan *e-hailing* dibangunkan oleh pihak Kementerian. Namun, mana-mana ciri keselamatan sedia ada dalam aplikasi adalah dibangunkan oleh pihak operator sendiri.

8. Walau bagaimanapun, Kementerian melalui Agensi Pengangkutan Awam Darat (APAD) boleh menetapkan apa-apa syarat termasuk berkaitan keselamatan sekiranya diperlukan dari semasa ke semasa melalui syarat lesen yang dikenakan kepada pihak operator.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : TUAN LO SU FUI [TAWAU]

SOALAN

TUAN LO SU FUI [TAWAU] minta **MENTERI KESIHATAN** menyatakan apakah Kementerian berhasrat untuk menaik taraf klinik-klinik kesihatan di daerah Tawau yang sehingga kini masih mendiami bangunan yang agak lama/usang.

JAWAPAN

Tuan Yang di-Pertua,

1. Kementerian Kesihatan (KKM) sememangnya cakna untuk menaik taraf dan menyediakan infrastruktur fasiliti kesihatan yang lebih baik dan selamat bagi kegunaan pesakit serta kakitangan kesihatan di Sabah. Ini termasuklah beberapa buah fasiliti kesihatan di sekitar Tawau. Sehubungan itu, KKM mempunyai inisiatif bagi mengenal pasti klinik-klinik kesihatan yang daif dan usang dengan penubuhan sebuah jawatankuasa teknikal di peringkat Kementerian sebagai persediaan untuk menggantikan dengan infrastruktur yang baharu.

2. Bagi penggantian fasiliti klinik daif yang telah dikenal pasti, antara pertimbangan yang dibuat ialah mengenai:

- (i) tahap keselamatan struktur bangunan sedia ada;
- (ii) kekerapan kerosakan kepada sistem terpasang;
- (iii) ketidakpatuhan kepada Akta dan Peraturan terutamanya melibatkan sistem elektrik dan pencegahan kebakaran; dan
- (iv) kekangan ruang kerja dan menunggu sedia ada.

3. Selain itu, KKM juga telah mengenal pasti Klinik Kesihatan Apas Balung sebagai sebuah klinik yang mungkin perlu digantikan dengan sebuah klinik kesihatan yang lebih komprehensif. Permohonan ini telah pun diangkat dalam Rolling Plan 4 Rancangan Malaysia Ke-12 (RP4 RMKe-12).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN LO SU FUI [TAWAU]

SOALAN

TUAN LO SU FUI [TAWAU] minta **MENTERI PERTANIAN DAN KETERJAMINAN MAKANAN** menyatakan keluasan tanah terbiar di seluruh negara mengikut negeri dan nyatakan langkah Kementerian bagi memajukan tanah-tanah terbiar berkenaan khususnya bagi meningkatkan hasil pengeluaran makanan negara.

JAWAPAN

Tuan Yang di-Pertua,

Tanah Terbiar didefinisikan sebagai tanah darat atau tanah sawah yang berkeluasan minima 0.4 hektar ke atas sama ada bersambungan atau bertaburan yang merupakan tanah milik yang tidak diusahakan selama tiga tahun berturut-turut. Berdasarkan rekod Jabatan Pertanian, seluas 103,563 hektar tanah terbiar telah dikenal pasti melibatkan sejumlah 46,382 lot di Semenanjung Malaysia termasuk Wilayah Persekutuan Labuan.

Data Tanah Terbiar Mengikut Negeri

Bil.	Negeri	Bil. Lot	Luas (Ha.)
1	JOHOR	4,561	10,098
2	KEDAH	1,774	2,655
3	KELANTAN	3,690	4,815

4	MELAKA	1,915	2,332
5	N.SEMBILAN	5,885	11,324
6	PAHANG	11,292	29,391
7	PERAK	4,004	11,013
8	PERLIS	14	12
9	PULAU PINANG	877	2,622
10	SELANGOR	4,485	20,058
11	TERENGGANU	7,027	7,862
12	W.P. LABUAN	858	1,381
	JUMLAH	46,382	103,563

Walaupun bagaimanapun, pihak Kementerian tidak mempunyai data berkenaan tanah terbiar di negeri Sabah dan Sarawak.

Kementerian Pertanian dan Keterjaminan Makanan (KPKM) sangat mengalu-alukan cadangan untuk memajukan tanah yang terbiar atau belum dibangunkan bagi tujuan pertanian. Urusan tanah untuk pertanian adalah di bawah bidang kuasa Pihak Berkuasa Negeri (PBN) selaras dengan Seksyen 40 Kanun Tanah Negara (KTN) yang secara jelas memperuntukkan bahawa PBN mempunyai hak ke atas semua tanah yang termasuk di dalam sempadan negeri masing-masing.

KPKM mempunyai program dan projek Rancangan Malaysia Ke-12 di bawah Jabatan dan Agensi yang memperuntukkan insentif kepada pengusaha tanaman dalam mengusahakan tanaman di mana-mana tanah hak milik atau sewaan sama ada milik Kerajaan atau orang perseorangan.

SOALAN NO : 270

KPKM juga sentiasa membuat libat urus dengan kerajaan Negeri melalui Mesyuarat Menteri Pertanian bersama Exco Pertanian Negeri dalam membincangkan isu-isu berkaitan sektor agromakanan termasuk isu penggunaan tanah yang berada di bawah kuasa Kerajaan Negeri.

Bagi tanah-tanah persekutuan di bawah kawalan pelbagai Kementerian dan Agensi, KPKM juga mengalu-alukan sebarang cadangan bagi memajukan tanah-tanah yang masih belum ada pembangunan untuk digunakan bagi tanaman-tanaman sayuran dan tanaman kontan yang boleh memberikan pulangan hasil sementara menunggu perancangan pembangunan lain di tanah-tanah tersebut.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : JAWAB LISAN

DARIPADA : YB M. KULASEGARAN [IPOH BARAT]

SOALAN

Tuan M. Kulasegaran [Ipoh Barat] minta **MENTERI DALAM NEGERI** menyatakan :

- (a) Jumlah anggota polis di negara ini; dan
- (b) Berapa ramai anggota polis yang melakukan kerja bukan polis seperti melakukan kerja kerani di jabatan polis dan di tempat-tempat lain.

JAWAPAN

Tuan Yang Di Pertua,

Jawapan (a):

Pasukan Polis Diraja Malaysia (PDRM) merupakan agensi kerajaan yang memberi perkhidmatan kepolisan kepada komuniti setempat bagi memastikan keamanan, keselamatan dan ketenteraman awam kekal terpelihara.

Jumlah perjawatan PDRM yang berakhir pada 31 Disember 2022 mengikut skim perkhidmatan adalah seperti berikut:

SKIM PERKHIDMATAN	PERJAWATAN
Pegawai Kanan Polis	13,969
Pegawai Rendah Polis & Konstabel	100,483
Pegawai Rendah Polis & Konstabel Orang Asli	938
Pegawai Rendah Polis & Konstabel Sokongan	8,712
JUMLAH KESELURUHAN	124,102

JAWAPAN (b):

PDRM menempatkan anggota di pelbagai penugasan dan bidang seperti operasi lapangan, risikan dan siasatan, kepolisan am dan pengurusan. Penugasan anggota PDRM adalah secara *multitasking* demi kepentingan perkhidmatan dan keselamatan negara. Secara keseluruhannya, terdapat 3,599 (2.9%) anggota polis yang menjalankan tugas tidak melibatkan operasi sepenuhnya (non-operational), seperti dalam bidang pengurusan. Namun begitu, mereka ini boleh diatur gerak untuk melaksanakan kerja-kerja operasi pada bila-bila masa sekiranya diperlukan. Ini selaras dengan Seksyen 19, Akta Polis 1967 (Akta 344) yang menyatakan "Tiap-tiap pegawai polis, pegawai polis tambahan dan konstabel penjaga, bagi maksud-maksud Akta ini, hendaklah disifatkan sebagai sentiasa bertugas apabila dikehendaki bertindak sebagai demikian dan hendaklah melaksanakan tugas-tugas dan menjalankan kuasa-kuasa yang diberi kepadanya di bawah mana-mana undang-undang lain di mana-mana tempat dalam Malaysia di mana dia mungkin menjalankan tugas."

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN M. KULASEGARAN [IPOH BARAT]

SOALAN

Tuan M. Kulasegaran [Ipoh Barat] minta PERDANA MENTERI menyatakan :

- (a) jumlah ganti rugi yang telah dibayar oleh Kerajaan kepada waris yang menyaman polis dan agensi penguatkuasaan akibat kematian tahanan dari tahun 2016 sehingga tahun 2023; dan
- (b) senaraikan jumlah pesalah dalam kes-kes seperti di atas yang telah melakukan kesilapan dan tindakan yang telah diambil terhadap pesalah, jika ada.

JAWAPAN

Tuan Yang Di Pertua,

- (a) Bagi tempoh 2016 hingga 2022, terdapat tiga (3) kes sivil yang menuntut bayaran ganti rugi bagi kematian tahanan semasa berada dalam jagaan Polis Diraja Malaysia (PDRM) dan kesemua kes telah diselesaikan. Mahkamah telah menetapkan bayaran ganti rugi kepada waris si mati bernilai RM1.53 juta untuk kesemua kes. Walau bagaimanapun, PDRM tidak dapat memastikan sama ada bayaran ganti rugi tersebut telah dibuat kepada waris si mati atau sekiranya masih terdapat rayuan daripada pihak Peguam.
- (b) Bagi tempoh yang sama, dua (2) Pegawai Kanan Polis telah diambil tindakan dan dituduh di bawah Seksyen 330 Kanun Keseksaan.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN M. KULASEGARAN [IPOH BARAT]

SOALAN

TUAN M. KULASEGARAN [IPOH BARAT] minta **MENTERI PENDIDIKAN** menyatakan langkah-langkah yang akan diambil oleh Kerajaan untuk menangani serta menyegerakan masalah tunggakan gaji kontraktor pembersihan, Sekolah Tanjung Karang bagi bulan November dan Disember tahun 2022 atas alasan Kontraktor Rahmat Serangkai Sdn. Bhd. telah dibatalkan pendaftaran sehingga mengakibatkan KPM tidak dapat menyalurkan bayaran.

JAWAPAN

Tuan Yang di-Pertua,

Untuk makluman Ahli Yang Berhormat, Syarikat Rahmat Serangkai Sdn. Bhd. telah dianugerahkan kontrak perkhidmatan kebersihan bangunan dan kawasan di Zon Kuala Selangor 2 bermula dari 1 Jun 2019 sehingga 31 Disember 2022.

KPM tidak dapat memproses pembayaran kepada bulan November dan Disember 2022 disebabkan sijil pendaftaran syarikat bawah Kementerian Kewangan Malaysia (MoF) telah tamat tempoh pada 3 November 2022. Keperluan sijil pendaftaran yang sah merupakan salah satu syarat untuk membuat pembayaran dan pihak syarikat telah dimaklumkan tentang perkara tersebut semasa menerima Surat Setuju Terima.–Sehubungan itu, bagi membolehkan pembayaran dibuat, syarikat perlu memperbaharui terlebih dahulu sijil tersebut dengan MoF.

Untuk makluman Ahli Yang Berhormat, pihak syarikat telah memperbaharui sijil pendaftaran kewangan pada 23 Januari 2023. Berikutan kelewatan pembaharuan sijil tersebut, KPM hanya boleh membuat pembayaran pada tahun 2023.

Sekian, terima kasih.

RT30

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

DARIPADA : TUAN M. KULASEGARAN [IPOH BARAT]

SOALAN

TUAN M. KULASEGARAN [IPOH BARAT] minta **MENTERI SUMBER MANUSIA** menyatakan:

- a) bilangan syarikat kontraktor Kerajaan yang mendapat tender untuk perkhidmatan pembersihan dan pengawal keselamatan tetapi gagal melaksanakan perintah gaji minima dengan alasan Kerajaan belum membuat pindaan dalam dokumen tender; dan
- b) nyatakan langkah-langkah drastik yang akan diambil untuk menangani masalah tersebut.

JAWAPAN

Tuan Yang di-Pertua,

1. Kementerian Sumber Manusia (KSM) tiada maklumat khusus berkaitan dengan bilangan syarikat bagi syarikat kontraktor berkenaan. Walau bagaimanapun, KSM melalui Jabatan Tenaga Kerja Semenanjung Malaysia (JTKSM) sentiasa menjalankan pemeriksaan terhadap syarikat kontraktor perkhidmatan pembersihan dan pengawal keselamatan. Ini bagi memastikan pematuhan majikan terhadap Perintah Gaji Minimum 2022.
2. Untuk makluman, Kementerian Kewangan Malaysia melalui surat bertarikh 15 Jun 2022 telah mengeluarkan arahan pelarasan kadar harga kontrak perolehan Kerajaan berikutan pelaksanaan Perintah Gaji Minimum 2022 kepada semua kementerian untuk tindakan mengemaskini kontrak perolehan kerajaan sedia ada.
3. Langkah – langkah yang dilaksanakan Jabatan Tenaga Kerja Semenanjung Malaysia bagi memastikan syarikat kontraktor berkenaan mematuhi Perintah Gaji Minimum 2022 adalah melalui tindakan berikut:
 - i. mengadakan perbincangan dengan Persatuan Industri Keselamatan Malaysia;
 - ii. mengadakan perbincangan dengan kontraktor dan syarikat pencucian;
 - iii. khidmat nasihat berhubung arahan yang dikeluarkan oleh Kementerian Kewangan Malaysia;
 - iv. siasatan aduan yang diterima daripada pekerja;
 - v. pemeriksaan berkanun daripada semasa ke semasa; atau
 - vi. pendakwaan dan kompaun dengan denda maksimum sehingga RM10,000.00 bagi setiap pekerja apabila disabitkan kesalahan di bawah Seksyen 43 Akta 732.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : JAWAB BUKAN LISAN

DARIPADA : TUAN M. KULASEGARAN [IPOH BARAT]

SOALAN

TUAN M. KULASEGARAN [IPOH BARAT] minta **MENTERI SUMBER MANUSIA** menyatakan:

- a) jumlah syarikat dan jumlah pekerja yang terkesan setelah Kerajaan memutuskan untuk menangguhkan pelaksanaan gaji minimum RM1500 membabitkan majikan yang mempunyai pekerja kurang 5 orang; dan
- b) adakah pekerja yang terbabit dalam masalah tunggakan gaji akan dibayar penuh setelah penangguhan ditamatkan.

JAWAPAN

Tuan Yang di-Pertua,

1. Perintah Gaji Minimum 2022 (PGM 2022) telah berkuat kuasa mulai 1 Mei 2022 dengan kadar gaji minimum RM1,500 sebulan untuk semua sektor tanpa mengira wilayah bagi majikan yang menggajikan lima (5) orang pekerja atau lebih dan tanpa mengira bilangan pekerja bagi majikan yang menjalankan suatu aktiviti professional yang dikelaskan di bawah Piawaian Pengelasan Pekerjaan Malaysia (*Malaysia Standard Classification of Occupations, MASCO*) 2020.
2. Kerajaan telah melanjutkan pelaksanaan PGM 2022 bagi majikan yang menggajikan kurang lima (5) orang pekerja daripada 1 Januari 2023 kepada 1 Julai 2023 di seluruh negara termasuk Sabah dan Sarawak. Keputusan penangguhan PGM 2022 dibuat antaranya dengan mengambil kira memorandum daripada pihak majikan kontraktor kecil yang menyatakan bahawa mereka terpaksa menanggung kos tambahan akibat daripada pelaksanaan PGM 2022 yang akhirnya akan menyebabkan peningkatan kos pengeluaran operasi dan perkhidmatan syarikat.
3. Berdasarkan data daripada Suruhanjaya Syarikat Malaysia (SSM) Tahun 2021 dan Laporan Banci Ekonomi 2011 dan 2016 daripada Jabatan Perangkaan Malaysia (*Department of Statistics Malaysia, DOSM*), sehingga Jun 2022 terdapat 923,667 perusahaan mikro yang beroperasi di seluruh negara dengan anggaran seramai 2.9 juta pekerja pertubuhan mikro terkesan daripada pelaksanaan PGM 2022 ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK SERI PANGLIMA MADIUS TANGAU
[TUARAN]**

SOALAN

DATUK SERI PANGLIMA MADIUS TANGAU [TUARAN] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan adakah Kerajaan sedar bahawa kajian banjir tidak pernah dibuat untuk daerah Tuaran di Sabah dan adakah Kementerian bercadang untuk melaksanakan kajian tersebut.

JAWAPAN

Tuan Yang Di-Pertua,

1. NRECC melalui JPS telah melaksanakan pelbagai langkah penyelesaian dalam mengurangkan masalah banjir di kawasan Daerah Tuaran, Sabah.
2. Bagi penyelesaian jangka masa panjang, satu (1) Kajian Pelan Induk Saliran Mesra Alam (PISMA) Pekan Tuaran, Sabah telah diluluskan dalam Rancangan Malaysia ke-12 (RMK12) dengan kos peruntukan sebanyak RM2.5 juta. Kajian ini di peringkat penyediaan Terma Rujukan (TOR) dan dijangka akan diiklankan pada Jun 2023.
3. Kajian PISMA merupakan satu kerangka tindakan yang menggunakan konsep 'kawalan di punca' seperti dalam Manual Saliran Mesra Alam bagi pengurusan air larian hujan. Kajian ini perlu dilaksanakan terlebih dahulu untuk mengenalpasti punca-punca kejadian banjir kilat yang berlaku dan sebagai rujukan dalam merancang infrastruktur saliran serta mengenalpasti langkah-langkah penyelesaian jangka pendek dan jangka panjang secara komprehensif bagi menangani kejadian banjir kilat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK SERI PANGLIMA MADIUS TANGAU
[TUARAN]**

SOALAN

DATUK SERI PANGLIMA MADIUS TANGAU [TUARAN] minta **MENTERI PENDIDIKAN** menyatakan berapa buah sekolah-sekolah daif di seluruh negara mengikut negeri serta wilayah dan bilakah masalah tersebut dapat diselesaikan secara tuntas.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa proaktif dan memberi keutamaan dalam usaha menangani sekolah yang mempunyai bangunan daif di seluruh negara.

Untuk makluman Ahli Yang Berhormat, berdasarkan data KPM, bilangan sekolah yang mempunyai bangunan daif di seluruh negara adalah sebanyak 830 buah sekolah yang terdiri daripada 560 buah sekolah berskala 6 dan 270 buah sekolah berskala 7. Bilangan sekolah yang mempunyai bangunan daif mengikut negeri serta wilayah adalah seperti berikut:

BIL	NEGERI	SKALA 6	SKALA 7	BILANGAN (SKALA 6 & 7)
1	SELANGOR	1	7	8
2	SABAH	225	64	289
3	SARAWAK	253	112	365
4	W.P. LABUAN	1	0	1
5	W.P. KUALA LUMPUR	0	0	0
6	JOHOR	8	8	16
7	KEDAH	13	25	38
8	KELANTAN	5	8	13
9	MELAKA	3	2	5
10	NEGERI SEMBILAN	15	3	18
11	PAHANG	3	5	8
12	PERAK	25	25	50
13	PULAU PINANG	4	3	7
14	PERLIS	0	0	0
15	TERENGGANU	4	8	12
16	PUTRAJAYA	0	0	0
	JUMLAH	560	270	830

Data sehingga 15 Januari 2023

Keutamaan KPM adalah kepada bangunan yang berada pada skala 6 dan skala 7 untuk dinaik taraf atau dibina bangunan gantian. Pembinaan

SOALAN NO : 277

bangunan gantian ini dilaksanakan secara berfasa melalui peruntukan yang diluluskan oleh agensi pusat bagi setiap *Rolling Plan* dalam Rancangan Malaysia Lima Tahun. Walau bagaimanapun kelulusan dan pelaksanaan projek ini adalah tertakluk kepada keutamaan dan kedudukan kewangan semasa kerajaan.

Sekian, terima kasih.

RT31

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : DATUK SERI PANGLIMA MADIUS
TANGAU [TUARAN]**

SOALAN

DATUK SERI PANGLIMA MADIUS TANGAU [TUARAN] minta **MENTERI KESIHATAN** menyatakan bilakah Klinik Desa Kg. Pahu dan Klinik Desa Kg. Gayoratau dalam kawasan Parlimen Tuaran dinaik taraf menjadi klinik kesihatan.

JAWAPAN

Tuan Yang di-Pertua,

JKN Sabah dalam perancangan untuk menaik taraf Klinik Desa ke Klinik Kesihatan terutama di kawasan pedalaman dan berada di lokasi jauh daripada hospital. Klinik Desa Pahu dan Klinik Desa Gaya Ratau merupakan klinik desa binaan konkrit dengan purata kedatangan harian kurang daripada 10 klien sehari. Buat masa ini, status bangunan bagi kedua-dua buah klinik ini masih kukuh dan berada dalam kondisi yang baik. KKM akan mengkaji keperluan menaik taraf klinik tersebut dari semasa ke semasa.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : DATUK SERI PANGLIMA MADIUS BIN
TANGAU [TUARAN]

SOALAN

DATUK SERI PANGLIMA MADIUS BIN TANGAU [TUARAN] MINTA **MENTERI KEWANGAN** menyatakan bilakah Kerajaan akan mewujudkan zon perdagangan bebas di semua taman-taman perindustrian di Sabah.

JAWAPAN

Tuan Yang di-Pertua,

Untuk makluman Ahli Yang Berhormat, pada masa ini, Kementerian Kewangan sedang meneliti dan mempertimbangkan permohonan cadangan pewujudan zon bebas cukai di Taman Perindustrian POIC Lahad Datu, Sabah. Sebarang keputusan akan dimaklumkan kepada pihak POIC Sabah Sdn Bhd selaku pemohon bagi cadangan tersebut.

Untuk makluman Ahli Yang Berhormat juga, permohonan bagi mewujudkan zon bebas cukai kebiasaannya dibuat oleh pihak Kerajaan Negeri atau pun mana-mana syarikat atau pemilik tanah dengan persetujuan dan sokongan daripada pihak Kerajaan Negeri. Sebarang cadangan bagi mewujudkan zon bebas cukai juga memerlukan kajian kebolehlaksanaan atau *feasibility study* yang antara lain merangkumi perincian latar belakang, konsep pembangunan dan jenis aktiviti yang akan dijalankan, justifikasi permohonan, kos dan pembiayaan serta analisis impak. Kajian kebolehlaksanaan adalah penting bagi memastikan

pewujudan zon bebas cukai kelak benar-benar mencapai objektif dan memberi manfaat yang sewajarnya.

Dalam hal ini, pihak Kementerian Kewangan adalah terbuka untuk menerima permohonan bagi mewujudkan zon bebas cukai di Sabah dengan disertakan bersama laporan kajian kebolehlaksanaan untuk penilaian dan pertimbangan selanjutnya.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

**DARIPADA : DATUK SERI PANGLIMA MADIUS TANGAU
[TUARAN]**

SOALAN

DATUK SERI PANGLIMA MADIUS TANGAU [Tuaran] minta **MENTERI BELIA DAN SUKAN** menyatakan apakah langkah-langkah yang telah dan akan diambil untuk memastikan agar pembinaan stadium sukan di Tuaran dapat dilaksanakan dengan kadar yang segera.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Belia dan Sukan tiada perancangan untuk membina stadium sukan di Tuaran, Sabah. Keutamaan Kementerian pada masa ini adalah untuk menaik taraf kemudahan KBS sedia ada. Ini adalah kerana pembinaan kemudahan sukan baharu memerlukan penyelenggaraan yang tinggi serta pertambahan perjawatan bagi menguruskannya.

Selain itu, KBS memandang serius ketersediaan tapak dalam pembinaan kemudahan sukan baharu sebagaimana syarat yang ditetapkan oleh Kementerian Ekonomi, iaitu;

- Memastikan tapak/tanah perlu didaftarkan atas nama Pesuruhjaya Tanah Persekutuan (PTP) dengan memperoleh pengesahan pihak Jabatan Ketua Pengarah Tanah dan Galian (JKPTG); dan
- Tapak adalah bebas bebanan dan sedia untuk dimasuki serta tiada isu tapak/tanah projek seperti setinggan, bantahan penduduk dan lokasi tidak sesuai apabila membuat permohonan projek fizikal binaan baharu.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TAN SRI DATO' HAJI MAHIADDIN
BIN HAJI MOHD. YASSIN [PAGOH]**

SOALAN

TAN SRI DATO' HAJI MAHIADDIN BIN HAJI MOHD. YASSIN [PAGOH] minta **PERDANA MENTERI** menyatakan status penggubalan Akta Pendanaan Politik dan sesi libat urus yang telah diadakan sebelum ini.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Kerajaan komited dalam membanteras rasuah dan politik wang. Dalam hal ini, Rang Undang-Undang (RUU) Dana Politik ini akan diangkat semula untuk kelulusan dasar baharu oleh Jemaah Menteri.
2. Susulan perkembangan politik pasca Pilihanraya Umum 15, landskap politik di Malaysia turut mengalami beberapa perubahan di mana terdapat gabungan politik yang baru. Oleh yang demikian, sesi libat urus perlu diteruskan untuk mendapatkan maklum balas parti-parti politik dan pihak berkepentingan, agar RUU yang bakal digubal ini adalah inklusif dan komprehensif.
3. Dalam hal ini, RUU Dana Politik akan dicadang untuk dirujuk kepada Jawatankuasa Pilihan Khas (PSC) supaya semua Ahli-Ahli Dewan Rakyat boleh memberi pandangan dan cadangan supaya semua aspek yang penting berkenaan dana politik ini diambil kira.
4. Selain daripada RUU Dana Politik, Kerajaan juga akan mengambil kira amalan dan perundangan yang sedia ada untuk mengatasi isu dana politik, antaranya Akta Suruhanjaya Pencegahan Rasuah Malaysia 2009 [Akta 694], Akta Kesalahan Pilihan Raya 1954 [Akta 5], Akta Pendaftaran Pertubuhan 1966 [Akta 335] dan Akta Pengubahan Wang Haram, Pencegahan Pembiayaan Keganasan dan Hasil Daripada Kegiatan Haram 2001 [Akta 613].

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : TAN SRI DATO' HAJI MAHIADDIN BIN HAJI
MOHD. YASSIN [PAGOH]**

SOALAN

TAN SRI DATO' HAJI MAHIADDIN BIN HAJI MOHD. YASSIN [PAGOH]
minta **MENTERI EKONOMI** menyatakan :

- (a) statistik mengenai bilangan golongan miskin dan miskin tegar mengikut DUN; dan
- (b) sama ada Kerajaan bercadang mengkaji semula kategori B40, M40 dan T20 dan seterusnya.

JAWAPAN

Tuan Yang di-Pertua,

Untuk makluman Ahli Yang Berhormat, statistik kemiskinan diperolehi dari dapatan Survei Pendapatan, Perbelanjaan dan Kemudahan Asas (HIES & BA) oleh Jabatan Perangkaan Malaysia (DOSM). Survei ini dilaksanakan dua kali setiap lima tahun dan dapatan terkini adalah pada tahun 2019. Dapatan survei digunakan untuk pengubalan dasar bagi perancangan sosio-ekonomi negara.

Berdasarkan HIES & BA 2019, insiden kemiskinan dan bilangan isi rumah miskin peringkat nasional adalah 5.6% (405.4 ribu). Manakala, isi rumah miskin tegar adalah 0.4% (27.2 ribu). Isi rumah miskin merujuk kepada isi rumah yang berpendapatan di bawah Pendapatan Garis Kemiskinan (PGK) berjumlah RM2,208. Isi rumah miskin tegar pula merujuk kepada isi rumah yang berpendapatan di bawah PGK makanan berjumlah RM1,169. Saiz purata isi rumah adalah seramai empat orang.

Bilangan isi rumah miskin dan insiden kemiskinan mengikut negara dan daerah pentadbiran bagi tahun 2019 adalah seperti di **Jadual 1**. Data peringkat DUN adalah seperti di **Jadual 2**.

Kerajaan melalui DOSM juga sedang memuktamadkan dapatan HIES & BA 2022. Survei melibatkan 92,000 isi rumah bermula daripada Januari 2022 hingga Disember 2022. PGK 2022 akan dikemas kini dan dijangka diterbitkan bersekali dengan HIES & BA 2022 pada pertengahan tahun 2023.

Pada masa yang sama, statistik kemiskinan juga diperolehi daripada sistem eKasih di bawah Unit Penyelarasan dan Pelaksanaan, Jabatan Perdana Menteri (ICU, JPM). Statistik ini adalah berdasarkan kepada pendaftaran dan verifikasi di lapangan seluruh negara. Maklumat kemiskinan daripada data eKasih dijadikan rujukan untuk program bantuan sosial dan kemiskinan supaya usaha meningkatkan kesejahteraan rakyat lebih bersasar.

Maklumat bilangan isi rumah miskin dan miskin tegar yang berdaftar dalam sistem eKasih boleh didapati melalui laporan eStatistik: Statistik Sub Nasional Parlimen dan DUN yang diterbitkan oleh DOSM di laman sesawang www.dosm.gov.my.

Tuan Yang di-Pertua,

Kementerian Ekonomi sedang menyemak semula kategori kumpulan pendapatan isi rumah sedia ada bagi membolehkan bantuan yang lebih bersasar dalam Rancangan Malaysia Kedua Belas, 2021 – 2025 (RMKe-12). Semakan ini akan mengambil kira perubahan struktur pendapatan dan perbelanjaan, kos sara hidup, kuasa beli, demografi serta lokasi isi rumah. Kategori kumpulan pendapatan dan had pendapatan isi rumah yang baharu akan memantapkan lagi penggubalan dasar dan menambah baik penyampaian perkhidmatan.

Melangkah ke hadapan, Kerajaan merancang untuk beralih daripada pemberian subsidi menyeluruh menggunakan pendekatan berdasarkan kumpulan pendapatan B40, M40 dan T20 kepada pendekatan yang lebih bersasar. Ini mengambil kira antaranya pendapatan boleh guna yang dipadankan dengan kos sara hidup semasa berdasarkan demografi ahli keluarga dan lokaliti.

Pada masa ini, Kementerian Ekonomi melalui DOSM sedang menyelaraskan infrastruktur data yang bersesuaian untuk membantu penggubalan dasar yang berasaskan bukti (*evidence-based*).

Sekian, terima kasih.

Jadual 1: Bilangan isi rumah dan insiden kemiskinan mengikut daerah pentadbiran, Malaysia, 2019

Daerah Pentadbiran	Kemiskinan mutlak		Kemiskinan tegar	
	Bilangan isi rumah ('000)	Insiden kemiskinan (%)	Bilangan isi rumah ('000)	Insiden kemiskinan (%)
Malaysia	405.4	5.6	27.2	0.4
Batu Pahat	3.1	2.9	0.0	0.0
Johor Bahru	12.3	3.3	1.1	0.3
Kluang	3.5	5.0	0.0	0.0
Kota Tinggi	2.8	6.0	0.1	0.2
Mersing	2.1	12.1	0.1	0.6
Muar	2.6	4.1	0.0	0.0
Pontian	2.1	5.8	0.1	0.3
Segamat	1.5	2.9	0.0	0.0
Kulai	2.4	3.2	0.0	0.0
Tangkak	1.6	3.7	0.2	0.4
Baling	5.9	17.9	0.6	1.7
Bandar Baharu	0.7	7.2	0.1	0.5
Kota Setar	5.8	6.4	0.1	0.1
Kuala Muda	13.2	10.9	0.9	0.7
Kubang Pasu	2.8	4.8	0.0	0.0
Kulim	7.3	9.9	0.7	0.9
Langkawi	0.2	0.9	0.0	0.0
Padang Terap	1.4	9.1	0.0	0.0
Sik	1.3	7.6	0.1	0.5
Yan	2.0	12.7	0.0	0.3
Pendang	1.8	8.1	0.0	0.2
Pokok Sena	1.2	7.3	0.1	0.3
Bachok	3.8	13.1	0.2	0.6
Kota Baharu	10.5	9.1	0.9	0.8
Machang	1.5	7.1	0.0	0.0
Pasir Mas	5.4	13.1	0.3	0.6
Pasir Puteh	3.1	12.7	0.2	0.7
Tanah Merah	3.3	12.0	0.2	0.8
Tumpat	4.2	12.5	0.4	1.2
Gua Musang	3.2	17.2	0.5	2.9
Kuala Krai	5.3	22.4	0.3	1.1
Jeli	1.7	18.5	0.1	1.4
Lojing	0.6	33.3	0.2	11.1
Alor Gajah (Melaka Utara)	1.9	3.8	0.1	0.3
Jasin (Melaka Selatan)	1.1	3.0	0.2	0.6
Melaka Tengah	5.8	4.2	0.4	0.3
Jejebu	0.5	5.2	0.1	0.6

Daerah Pentadbiran	Kemiskinan mutlak		Kemiskinan tegar	
	Bilangan isi rumah ('000)	Insiden kemiskinan (%)	Bilangan isi rumah ('000)	Insiden kemiskinan (%)
Kuala Pilah	1.4	8.3	0.2	1.1
Port Dickson	1.2	4.3	0.0	0.0
Rembau	0.7	5.7	0.1	0.5
Seremban	5.0	3.2	0.7	0.4
Tampin	1.1	4.8	0.0	0.2
Jempol	1.7	6.2	0.1	0.5
Bentong	1.0	3.3	0.1	0.3
Cameron Highlands	0.0	0.4	0.0	0.0
Jerantut	2.0	9.9	0.1	0.4
Kuantan	2.2	1.8	0.0	0.0
Lipis	1.0	5.8	0.1	0.4
Pekan	1.6	6.6	0.1	0.3
Raub	1.0	4.7	0.1	0.3
Temerloh	2.6	6.1	0.1	0.2
Rompin	1.6	6.7	0.0	0.2
Maran	1.5	6.4	0.0	0.1
Bera	0.5	2.9	0.0	0.0
S.P. Tengah	2.3	2.3	0.0	0.0
S.P. Utara	3.7	4.6	0.2	0.3
S.P. Selatan	1.1	2.1	0.0	0.0
Timur Laut	0.8	0.5	0.1	0.1
Barat Daya	0.6	1.0	0.0	0.0
Batang Padang	2.2	7.1	0.0	0.0
Manjung	4.5	6.9	0.0	0.0
Kinta	10.9	4.9	1.0	0.4
Kerian	2.6	6.0	0.2	0.4
Kuala Kangsar	4.5	10.6	0.4	0.9
Larut & Matang	6.8	7.9	0.7	0.8
Hilir Perak	4.1	12.0	0.3	1.0
Hulu Perak	3.2	12.9	0.3	1.4
Perak Tengah	2.8	10.0	0.1	0.4
Kampar	2.1	7.0	0.1	0.4
Muaalim	1.9	11.6	0.1	0.3
Bagan Datuk	1.0	6.4	0.0	0.0
Perlis	2.3	3.9	0.2	0.3
Gombak	0.9	0.4	0.2	0.1
Klang	4.0	1.7	0.8	0.3
Kuala Langat	1.4	2.4	0.3	0.6
Kuala Selangor	2.0	3.5	0.4	0.7
Petaling	6.2	1.1	0.7	0.1
Sabak Bernam	1.2	4.7	0.1	0.4
Sepang	0.5	0.7	0.0	0.0

Daerah Pentadbiran	Kemiskinan mutlak		Kemiskinan tegar	
	Bilangan isi rumah ('000)	Insiden kemiskinan (%)	Bilangan isi rumah ('000)	Insiden kemiskinan (%)
Hulu Langat	1.9	0.6	0.0	0.0
Hulu Selangor	0.8	1.5	0.0	0.0
Besut	3.4	10.1	0.4	1.1
Dungun	1.9	5.1	0.1	0.2
Kemaman	2.2	4.6	0.0	0.0
Kuala Terengganu	2.3	4.4	0.0	0.0
Marang	2.0	8.2	0.1	0.4
Hulu Terengganu	1.4	7.9	0.3	1.5
Setiu	0.9	6.5	0.0	0.0
Kuala Nerus	1.7	5.4	0.0	0.0
Tawau	7.2	14.2	0.4	0.7
Lahad Datu	5.6	19.3	0.1	0.5
Semporna	5.3	31.5	0.9	5.5
Sandakan	8.8	18.2	0.5	1.1
Kinabatangan	2.2	32.1	0.3	4.2
Beluran	3.9	45.0	0.7	8.2
Kota Kinabalu	6.1	7.5	0.2	0.2
Ranau	4.5	26.8	0.6	3.7
Kota Belud	6.1	34.0	0.7	4.0
Tuaran	4.6	16.7	0.3	0.9
Penampang	1.4	4.4	0.0	0.0
Papar	3.6	12.7	0.2	0.6
Kudat	6.6	41.5	0.2	1.4
Kota Marudu	6.9	46.1	0.8	5.6
Pitas	4.4	53.6	0.4	5.1
Beaufort	2.7	21.0	0.1	1.1
Kuala Penyu	1.5	29.7	0.0	0.8
Sipitang	0.9	10.5	0.1	0.8
Tenom	2.0	17.2	0.0	0.0
Nabawan	2.0	35.6	0.1	1.1
Keningau	4.7	17.1	0.0	0.0
Tambunan	1.1	16.7	0.0	0.0
Kunak	1.3	26.0	0.0	0.6
Tongod	3.1	56.6	0.8	13.9
Putatan	2.0	10.9	0.0	0.0
Telupid	1.3	40.7	0.1	4.7
Kuching	9.3	5.6	0.2	0.1
Bau	1.3	9.6	0.1	0.4
Lundu	0.9	10.2	0.0	0.0
Samarahan	1.2	4.7	0.1	0.3
Serian	3.0	16.8	0.3	1.7
Simunjan	1.9	21.1	0.2	1.9

Daerah Pentadbiran	Kemiskinan mutlak		Kemiskinan tegar	
	Bilangan isi rumah ('000)	Insiden kemiskinan (%)	Bilangan isi rumah ('000)	Insiden kemiskinan (%)
Sri Aman	1.3	7.4	0.0	0.0
Lubok Antu	0.7	7.9	0.0	0.0
Betong	2.5	22.4	0.0	0.4
Saratok	1.0	13.8	0.0	0.5
Sarikei	1.3	9.1	0.0	0.3
Meradong	0.9	12.7	0.0	0.6
Daro	1.2	18.5	0.1	0.9
Julau	0.5	13.0	0.0	0.0
Sibu	4.3	7.3	0.1	0.1
Dalat	0.5	11.9	0.0	0.8
Mukah	1.0	10.4	0.0	0.0
Kanowit	1.7	21.9	0.0	0.4
Bintulu	0.7	2.1	0.0	0.1
Tatau	0.3	5.0	0.0	0.0
Kapit	0.3	3.8	0.0	0.0
Song	0.3	6.0	0.0	0.9
Belaga	0.6	6.9	0.0	0.5
Miri	2.9	4.7	0.2	0.3
Marudi	0.8	16.9	0.1	1.9
Limbang	1.4	11.0	0.0	0.2
Lawas	1.3	14.4	0.0	0.4
Matu	1.2	24.1	0.0	0.7
Asajaya	1.5	20.0	0.1	1.3
Pakan	1.4	21.7	0.2	2.6
Selangau	1.1	14.3	0.0	0.0
Pusa	1.9	38.6	0.0	0.0
Kabong	1.1	23.0	0.1	1.1
Tanjung Manis	0.5	16.1	0.0	1.1
Sebauh	0.2	3.4	0.0	0.0
Subis	1.0	7.4	0.2	1.2
Tebedu	1.9	28.7	0.4	5.3
Bukit Mabong	0.3	7.5	0.0	0.0
Beluru	0.5	12.0	0.0	0.0
Telang Usan	0.5	13.6	0.0	1.2
W.P. Kuala Lumpur	0.8	0.2	0.2	0.0
W.P. Labuan	0.7	3.1	0.0	0.0
W.P. Putrajaya	0.1	0.4	0.0	0.0

Jadual 2: Insiden kemiskinan mutlak mengikut DUN, Malaysia, 2019

Negeri	Kod DUN	Nama DUN	Insiden kemiskinan (%)
Perlis	N.01	Titi Tinggi	7.6
Perlis	N.02	Beseri	8.6
Perlis	N.03	Chuping	2.7
Perlis	N.04	Mata Ayer	0.0
Perlis	N.05	Santan	5.3
Perlis	N.06	Bintong	4.4
Perlis	N.07	Sena	5.2
Perlis	N.08	Indera Kayangan	0.9
Perlis	N.09	Kuala Perlis	7.6
Perlis	N.10	Kayang	0.6
Perlis	N.11	Pauh	0.5
Perlis	N.12	Tambun Tulang	1.2
Perlis	N.13	Guar Sanji	1.4
Perlis	N.14	Simpang Empat	3.6
Perlis	N.15	Sanglang	2.8
Kedah	N.01	Ayer Hangat	0.9
Kedah	N.02	Kuah	0.9
Kedah	N.03	Kota Siputeh	7.0
Kedah	N.04	Ayer Hitam	6.4
Kedah	N.05	Bukit Kayu Hitam	3.7
Kedah	N.06	Jitra	4.6
Kedah	N.07	Kuala Nerang	5.9
Kedah	N.08	Pedu	12.9
Kedah	N.09	Bukit Lada	7.7
Kedah	N.10	Bukit Pinang	6.6
Kedah	N.11	Derga	6.0
Kedah	N.12	Suka Menanti	3.9
Kedah	N.13	Kota Darul Aman	0.0
Kedah	N.14	Alor Mengkudu	6.6
Kedah	N.15	Anak Bukit	3.3
Kedah	N.16	Kubang Rotan	12.2
Kedah	N.17	Pengkalan Kundor	6.1
Kedah	N.18	Tokai	5.3
Kedah	N.19	Sungai Tiang	11.5
Kedah	N.20	Sungai Limau	9.4
Kedah	N.21	Guar Chempedak	14.6
Kedah	N.22	Gurun	17.2
Kedah	N.23	Belantek	12.8
Kedah	N.24	Jeneri	2.9
Kedah	N.25	Bukit Selambau	7.7
Kedah	N.26	Tanjong Dawai	17.4
Kedah	N.27	Pantai Merdeka	17.0
Kedah	N.28	Bakar Arang	2.6

Negeri	Kod DUN	Nama DUN	Insiden kemiskinan (%)
Kedah	N.29	Sidam	10.8
Kedah	N.30	Bayu	18.6
Kedah	N.31	Kupang	15.7
Kedah	N.32	Kuala Ketil	19.3
Kedah	N.33	Merbau Pulas	12.1
Kedah	N.34	Lunas	7.8
Kedah	N.35	Kulim	11.4
Kedah	N.36	Bandar Baharu	7.2
Kelantan	N.01	Pengkalan Kubor	20.8
Kelantan	N.02	Kelaboran	14.5
Kelantan	N.03	Pasir Pekan	9.5
Kelantan	N.04	Wakaf Bharu	7.4
Kelantan	N.05	Kijang	13.9
Kelantan	N.06	Chempaka	8.2
Kelantan	N.07	Panchor	5.5
Kelantan	N.08	Tanjong Mas	7.3
Kelantan	N.09	Kota Lama	10.8
Kelantan	N.10	Bunut Payong	5.2
Kelantan	N.11	Tendong	7.4
Kelantan	N.12	Pengkalan Pasir	8.9
Kelantan	N.13	Meranti	16.9
Kelantan	N.14	Chetok	12.0
Kelantan	N.15	Gual Periok	18.7
Kelantan	N.16	Apam Putra	15.7
Kelantan	N.17	Salor	4.5
Kelantan	N.18	Pasir Tumboh	12.5
Kelantan	N.19	Demit	10.3
Kelantan	N.20	Tawang	9.2
Kelantan	N.21	Pantai Irama	14.7
Kelantan	N.22	Jelawat	14.3
Kelantan	N.23	Melor	9.9
Kelantan	N.24	Kadok	13.6
Kelantan	N.25	Kok Lanas	11.0
Kelantan	N.26	Bukit Panau	6.6
Kelantan	N.27	Gual Ipoh	21.8
Kelantan	N.28	Kemahang	13.6
Kelantan	N.29	Selising	9.9
Kelantan	N.30	Limbongan	10.5
Kelantan	N.31	Semerak	17.6
Kelantan	N.32	Gaal	16.6
Kelantan	N.33	Pulai Chondong	2.5
Kelantan	N.34	Temangan	9.6
Kelantan	N.35	Kemuning	7.9
Kelantan	N.36	Bukit Bunga	20.0
Kelantan	N.37	Air Lanas	22.7

Negeri	Kod DUN	Nama DUN	Insiden kemiskinan (%)
Kelantan	N.38	Kuala Balah	12.1
Kelantan	N.39	Mengkebang	22.3
Kelantan	N.40	Guchil	13.1
Kelantan	N.41	Manek Urai	33.0
Kelantan	N.42	Dabong	32.4
Kelantan	N.43	Nenggiri	39.4
Kelantan	N.44	Paloh	16.2
Kelantan	N.45	Galas	14.6
Terengganu	N.01	Kuala Besut	10.1
Terengganu	N.02	Kota Putera	8.9
Terengganu	N.03	Jertih	13.1
Terengganu	N.04	Hulu Besut	3.9
Terengganu	N.05	Jabi	13.5
Terengganu	N.06	Permaisuri	4.9
Terengganu	N.07	Langkap	9.0
Terengganu	N.08	Batu Rakit	11.3
Terengganu	N.09	Tepuh	2.1
Terengganu	N.10	Buluh Gading	8.3
Terengganu	N.11	Seberang Takir	5.2
Terengganu	N.12	Bukit Tunggal	0.0
Terengganu	N.13	Wakaf Mempelam	2.3
Terengganu	N.14	Bandar	2.7
Terengganu	N.15	Ladang	3.6
Terengganu	N.16	Batu Buruk	3.9
Terengganu	N.17	Alur Limbat	8.0
Terengganu	N.18	Bukit Payung	6.7
Terengganu	N.19	Ru Rendang	8.5
Terengganu	N.20	Pengkalan Berangan	6.2
Terengganu	N.21	Telemung	9.1
Terengganu	N.22	Manir	7.7
Terengganu	N.23	Kuala Berang	8.9
Terengganu	N.24	Ajil	4.4
Terengganu	N.25	Bukit Besi	7.6
Terengganu	N.26	Rantau Abang	6.2
Terengganu	N.27	Sura	4.9
Terengganu	N.28	Paka	4.0
Terengganu	N.29	Kemasik	5.8
Terengganu	N.30	Kijal	3.0
Terengganu	N.31	Cukai	4.3
Terengganu	N.32	Air Putih	4.8
Pulau Pinang	N.01	Penaga	7.5
Pulau Pinang	N.02	Bertam	2.0
Pulau Pinang	N.03	Pinang Tunggal	5.5
Pulau Pinang	N.04	Permatang Berangan	2.3
Pulau Pinang	N.05	Sungai Dua	2.1

Negeri	Kod DUN	Nama DUN	Insiden kemiskinan (%)
Pulau Pinang	N.06	Telok Ayer Tawar	8.5
Pulau Pinang	N.07	Sungai Puyu	5.3
Pulau Pinang	N.08	Bagan Jermal	2.2
Pulau Pinang	N.09	Bagan Dalam	1.3
Pulau Pinang	N.10	Seberang Jaya	3.6
Pulau Pinang	N.11	Permatang Pasir	15.7
Pulau Pinang	N.12	Penanti	6.6
Pulau Pinang	N.13	Berapit	0.0
Pulau Pinang	N.14	Machang Bubuk	1.4
Pulau Pinang	N.15	Padang Lalang	1.9
Pulau Pinang	N.16	Perai	0.0
Pulau Pinang	N.17	Bukit Tengah	0.0
Pulau Pinang	N.18	Bukit Tambun	1.2
Pulau Pinang	N.19	Jawi	0.3
Pulau Pinang	N.20	Sungai Bakap	2.9
Pulau Pinang	N.21	Sungai Acheh	5.4
Pulau Pinang	N.22	Tanjong Bunga	0.0
Pulau Pinang	N.23	Air Putih	0.0
Pulau Pinang	N.24	Kebun Bunga	0.0
Pulau Pinang	N.25	Pulau Tikus	0.0
Pulau Pinang	N.26	Padang Kota	0.0
Pulau Pinang	N.27	Pengkalan Kota	1.3
Pulau Pinang	N.28	Komtar	2.3
Pulau Pinang	N.29	Datok Keramat	5.3
Pulau Pinang	N.30	Sungai Pinang	0.0
Pulau Pinang	N.31	Batu Lancang	0.0
Pulau Pinang	N.32	Seri Delima	0.0
Pulau Pinang	N.33	Air Itam	1.3
Pulau Pinang	N.34	Paya Terubong	0.0
Pulau Pinang	N.35	Batu Uban	0.0
Pulau Pinang	N.36	Pantai Jerejak	2.4
Pulau Pinang	N.37	Batu Maung	0.3
Pulau Pinang	N.38	Bayan Lepas	0.5
Pulau Pinang	N.39	Pulau Betong	0.0
Pulau Pinang	N.40	Telok Bahang	2.1
Perak	N.01	Pengkalan Hulu	13.7
Perak	N.02	Temengor	4.8
Perak	N.03	Kenering	13.7
Perak	N.04	Kota Tampan	4.8
Perak	N.05	Selama	8.7
Perak	N.06	Kubu Gajah	11.2
Perak	N.07	Batu Kurau	4.4
Perak	N.08	Titi Serong	7.9
Perak	N.09	Kuala Kurau	8.2
Perak	N.10	Alor Pongsu	1.7

Negeri	Kod DUN	Nama DUN	Insiden kemiskinan (%)
Perak	N.11	Gunong Semanggol	5.5
Perak	N.12	Selinsing	4.7
Perak	N.13	Kuala Sepetang	15.6
Perak	N.14	Changkat Jering	7.6
Perak	N.15	Trong	18.6
Perak	N.16	Kamunting	2.9
Perak	N.17	Pokok Assam	8.5
Perak	N.18	Aulong	3.7
Perak	N.19	Chenderoh	6.9
Perak	N.20	Lubok Merbau	5.2
Perak	N.21	Lintang	19.5
Perak	N.22	Jalong	14.9
Perak	N.23	Manjoi	4.6
Perak	N.24	Hulu Kinta	7.1
Perak	N.25	Canning	2.4
Perak	N.26	Tebing Tinggi	1.6
Perak	N.27	Pasir Pinji	1.3
Perak	N.28	Bercham	3.1
Perak	N.29	Kepayang	6.3
Perak	N.30	Buntong	9.2
Perak	N.31	Jelapang	6.1
Perak	N.32	Menglembu	8.2
Perak	N.33	Tronoh	7.7
Perak	N.34	Bukit Chandan	6.6
Perak	N.35	Manong	7.9
Perak	N.36	Pengkalan Baharu	19.2
Perak	N.37	Pantai Remis	10.1
Perak	N.38	Astaka	5.5
Perak	N.39	Belanja	9.7
Perak	N.40	Bota	5.3
Perak	N.41	Malim Nawar	5.7
Perak	N.42	KerANJI	6.8
Perak	N.43	Tualang Sekah	10.2
Perak	N.44	Sungai Rapat	6.4
Perak	N.45	Simpang Pulai	3.0
Perak	N.46	Teja	4.8
Perak	N.47	Chenderiang	3.6
Perak	N.48	Ayer Kuning	13.2
Perak	N.49	Sungai Manik	19.2
Perak	N.50	Kampung Gajah	18.6
Perak	N.51	Pasir Panjang	4.7
Perak	N.52	Pangkor	4.6
Perak	N.53	Rungkup	8.3
Perak	N.54	Hutan Melintang	6.0
Perak	N.55	Pasir Bedamar	7.8

Negeri	Kod DUN	Nama DUN	Insiden kemiskinan (%)
Perak	N.56	Changkat Jong	12.2
Perak	N.57	Sungkai	3.8
Perak	N.58	Slim	10.7
Perak	N.59	Behrang	10.1
Pahang	N.01	Tanah Rata	0.4
Pahang	N.02	Jelai	9.1
Pahang	N.03	Padang Tengku	7.2
Pahang	N.04	Cheka	1.5
Pahang	N.05	Benta	8.5
Pahang	N.06	Batu Talam	6.5
Pahang	N.07	Tras	2.7
Pahang	N.08	Dong	10.7
Pahang	N.09	Tahan	18.3
Pahang	N.10	Damak	7.7
Pahang	N.11	Pulau Tawar	2.7
Pahang	N.12	Beserah	1.8
Pahang	N.13	Semambu	2.2
Pahang	N.14	Teruntum	0.0
Pahang	N.15	Tanjung Lumpur	2.3
Pahang	N.16	Inderapura	0.6
Pahang	N.17	Sungai Lembing	7.0
Pahang	N.18	Lepar	0.0
Pahang	N.19	Panching	0.0
Pahang	N.20	Pulau Manis	6.5
Pahang	N.21	Peramu Jaya	5.2
Pahang	N.22	Bebar	12.6
Pahang	N.23	Chini	4.5
Pahang	N.24	Luit	10.4
Pahang	N.25	Kuala Sentul	3.9
Pahang	N.26	Chenor	10.9
Pahang	N.27	Jenderak	2.2
Pahang	N.28	Kerdau	25.0
Pahang	N.29	Jengka	4.0
Pahang	N.30	Mentakab	5.9
Pahang	N.31	Lanchang	7.2
Pahang	N.32	Kuala Semantan	5.6
Pahang	N.33	Bilut	2.1
Pahang	N.34	Ketari	4.9
Pahang	N.35	Sabai	1.9
Pahang	N.36	Pelangai	0.0
Pahang	N.37	Guai	2.4
Pahang	N.38	Triang	3.6
Pahang	N.39	Kemayan	1.4
Pahang	N.40	Bukit Ibam	7.3
Pahang	N.41	Muadzam Shah	8.5

Negeri	Kod DUN	Nama DUN	Insiden kemiskinan (%)
Pahang	N.42	Tioman	4.8
Selangor	N.01	Sungai Air Tawar	2.3
Selangor	N.02	Sabak	11.5
Selangor	N.03	Sungai Panjang	1.9
Selangor	N.04	Sekinchang	4.1
Selangor	N.05	Hulu Bernam	0.0
Selangor	N.06	Kuala Kubu Baharu	0.0
Selangor	N.07	Batang Kali	2.3
Selangor	N.08	Sungai Burong	4.9
Selangor	N.09	Permatang	9.6
Selangor	N.10	Bukit Melawati	8.7
Selangor	N.11	Ijok	0.9
Selangor	N.12	Jeram	0.0
Selangor	N.13	Kuang	0.8
Selangor	N.14	Rawang	0.6
Selangor	N.15	Taman Templer	0.6
Selangor	N.16	Sungai Tua	1.7
Selangor	N.17	Gombak Setia	0.0
Selangor	N.18	Hulu Kelang	0.0
Selangor	N.19	Bukit Antarabangsa	0.6
Selangor	N.20	Lembah Jaya	1.5
Selangor	N.21	Pandan Indah	0.0
Selangor	N.22	Teratai	0.5
Selangor	N.23	Dusun Tua	0.1
Selangor	N.24	Semenyih	1.4
Selangor	N.25	Kajang	0.4
Selangor	N.26	Sungai Ramal	0.3
Selangor	N.27	Balakong	0.4
Selangor	N.28	Seri Kembangan	0.0
Selangor	N.29	Seri Serdang	3.1
Selangor	N.30	Kinrara	0.3
Selangor	N.31	Subang Jaya	0.4
Selangor	N.32	Seri Setia	1.5
Selangor	N.33	Taman Medan	1.0
Selangor	N.34	Bukit Gasing	0.0
Selangor	N.35	Kampung Tunku	0.0
Selangor	N.36	Bandar Utama	0.6
Selangor	N.37	Bukit Lanjan	0.6
Selangor	N.38	Paya Jaras	1.8
Selangor	N.39	Kota Damansara	1.5
Selangor	N.40	Kota Anggerik	0.4
Selangor	N.41	Batu Tiga	0.0
Selangor	N.42	Meru	2.0
Selangor	N.43	Sementa	4.6
Selangor	N.44	Selat Klang	1.3

Negeri	Kod DUN	Nama DUN	Insiden kemiskinan (%)
Selangor	N.45	Bandar Baru Klang	0.9
Selangor	N.46	Pelabuhan Klang	2.2
Selangor	N.47	Pandamaran	0.8
Selangor	N.48	Sentosa	0.8
Selangor	N.49	Sungai Kandis	0.0
Selangor	N.50	Kota Kemuning	3.6
Selangor	N.51	Sijangkang	3.2
Selangor	N.52	Banting	3.9
Selangor	N.53	Morib	0.6
Selangor	N.54	Tanjong Sepat	0.0
Selangor	N.55	Dengkil	0.7
Selangor	N.56	Sungai Pelek	1.0
Negeri Sembilan	N.01	Chennah	4.4
Negeri Sembilan	N.02	Pertang	4.3
Negeri Sembilan	N.03	Sungai Lui	10.3
Negeri Sembilan	N.04	Klawang	6.3
Negeri Sembilan	N.05	Serting	6.7
Negeri Sembilan	N.06	Palong	6.1
Negeri Sembilan	N.07	Jeram Padang	11.2
Negeri Sembilan	N.08	Bahau	2.6
Negeri Sembilan	N.09	Lenggeng	2.0
Negeri Sembilan	N.10	Nilai	4.3
Negeri Sembilan	N.11	Lobak	8.5
Negeri Sembilan	N.12	Temiang	0.0
Negeri Sembilan	N.13	Sikamat	3.4
Negeri Sembilan	N.14	Ampangan	4.5
Negeri Sembilan	N.15	Juasseh	11.7
Negeri Sembilan	N.16	Seri Menanti	7.1
Negeri Sembilan	N.17	Senaling	12.9
Negeri Sembilan	N.18	Pilah	4.2
Negeri Sembilan	N.19	Johol	7.3
Negeri Sembilan	N.20	Labu	0.6
Negeri Sembilan	N.21	Bukit Kepayang	1.8
Negeri Sembilan	N.22	Rahang	0.0
Negeri Sembilan	N.23	Mambau	1.8
Negeri Sembilan	N.24	Seremban Jaya	3.7
Negeri Sembilan	N.25	Paroi	2.3
Negeri Sembilan	N.26	Chembong	5.8
Negeri Sembilan	N.27	Rantau	6.6
Negeri Sembilan	N.28	Kota	5.5
Negeri Sembilan	N.29	Chuah	2.2
Negeri Sembilan	N.30	Lukut	4.8
Negeri Sembilan	N.31	Bagan Pinang	1.9
Negeri Sembilan	N.32	Linggi	3.9
Negeri Sembilan	N.33	Sri Tanjung	7.1

Negeri	Kod DUN	Nama DUN	Insiden kemiskinan (%)
Negeri Sembilan	N.34	Gemas	5.5
Negeri Sembilan	N.35	Gemencheh	5.8
Negeri Sembilan	N.36	Repah	4.1
Melaka	N.01	Kuala Linggi	11.0
Melaka	N.02	Tanjung Bidara	3.0
Melaka	N.03	Ayer Limau	8.8
Melaka	N.04	Lendu	5.9
Melaka	N.05	Taboh Naning	2.0
Melaka	N.06	Rembia	2.7
Melaka	N.07	Gadek	4.9
Melaka	N.08	Machap Jaya	1.0
Melaka	N.09	Durian Tunggal	0.4
Melaka	N.10	Asahan	6.5
Melaka	N.11	Sungai Udang	4.1
Melaka	N.12	Pantai Kundor	10.4
Melaka	N.13	Paya Rumput	3.8
Melaka	N.14	Kelebang	6.7
Melaka	N.15	Pengkalan Batu	7.8
Melaka	N.16	Ayer Keroh	1.1
Melaka	N.17	Bukit Katil	6.2
Melaka	N.18	Ayer Molek	5.9
Melaka	N.19	Kesidang	2.1
Melaka	N.20	Kota Laksamana	0.0
Melaka	N.21	Duyong	7.8
Melaka	N.22	Bandar Hilir	0.0
Melaka	N.23	Telok Mas	6.8
Melaka	N.24	Bemban	2.0
Melaka	N.25	Rim	4.7
Melaka	N.26	Serkam	0.5
Melaka	N.27	Merlimau	4.1
Melaka	N.28	Sungai Rambai	4.5
Johor	N.01	Buloh Kasap	3.4
Johor	N.02	Jementah	2.1
Johor	N.03	Pemanis	2.3
Johor	N.04	Kemelah	4.1
Johor	N.05	Tenang	4.4
Johor	N.06	Bekok	0.0
Johor	N.07	Bukit Kepong	8.9
Johor	N.08	Bukit Pasir	5.0
Johor	N.09	Gambir	7.0
Johor	N.10	Tangkak	2.1
Johor	N.11	Serom	1.9
Johor	N.12	Bentayan	2.3
Johor	N.13	Simpang Jeram	4.0
Johor	N.14	Bukit Naning	4.4

Negeri	Kod DUN	Nama DUN	Insiden kemiskinan (%)
Johor	N.15	Maharani	8.0
Johor	N.16	Sungai Balang	0.0
Johor	N.17	Semerah	4.5
Johor	N.18	Sri Medan	6.2
Johor	N.19	Yong Peng	1.5
Johor	N.20	Semarang	4.2
Johor	N.21	Parit Yaani	2.0
Johor	N.22	Parit Raja	2.6
Johor	N.23	Penggaram	1.8
Johor	N.24	Senggarang	5.5
Johor	N.25	Rengit	2.1
Johor	N.26	Machap	10.4
Johor	N.27	Layang-Layang	9.0
Johor	N.28	Mengkibol	3.2
Johor	N.29	Mahkota	4.0
Johor	N.30	Paloh	0.0
Johor	N.31	Kahang	7.6
Johor	N.32	Endau	14.4
Johor	N.33	Tenggaroh	11.0
Johor	N.34	Panti	5.7
Johor	N.35	Pasir Raja	4.0
Johor	N.36	Sedili	13.2
Johor	N.37	Johor Lama	6.9
Johor	N.38	Penawar	3.9
Johor	N.39	Tanjung Surat	5.2
Johor	N.40	Tiram	5.1
Johor	N.41	Puteri Wangsa	2.7
Johor	N.42	Johor Jaya	5.9
Johor	N.43	Permas	3.9
Johor	N.44	Larkin	3.7
Johor	N.45	Stulang	3.0
Johor	N.46	Perling	0.5
Johor	N.47	Kempas	2.5
Johor	N.48	Skudai	3.4
Johor	N.49	Kota Iskandar	1.6
Johor	N.50	Bukit Permai	5.7
Johor	N.51	Bukit Batu	5.9
Johor	N.52	Senai	2.4
Johor	N.53	Benut	5.5
Johor	N.54	Pulai Sebatang	4.7
Johor	N.55	Pekan Nanas	5.3
Johor	N.56	Kukup	8.0
Sabah	N.01	Banggi	61.7
Sabah	N.02	Bengkoka	75.0
Sabah	N.03	Pitas	45.7

Negeri	Kod DUN	Nama DUN	Insiden kemiskinan (%)
Sabah	N.04	Tanjong Kapor	37.5
Sabah	N.05	Matunggong	49.8
Sabah	N.06	Bandau	49.9
Sabah	N.07	Tandek	31.9
Sabah	N.08	Pintasan	53.3
Sabah	N.09	Tempasuk	19.4
Sabah	N.10	Usukan	32.7
Sabah	N.11	Kadamaian	34.5
Sabah	N.12	Sulaman	15.8
Sabah	N.13	Pantai Dalit	11.6
Sabah	N.14	Tamparuli	19.8
Sabah	N.15	Kiulu	19.5
Sabah	N.16	Karambunai	10.0
Sabah	N.17	Darau	10.5
Sabah	N.18	Inanam	9.2
Sabah	N.19	Likas	0.8
Sabah	N.20	Api-Api	1.4
Sabah	N.21	Luyang	2.1
Sabah	N.22	Tanjong Aru	17.7
Sabah	N.23	Petagas	15.5
Sabah	N.24	Tanjung Keramat	6.5
Sabah	N.25	Kapayan	3.2
Sabah	N.26	Moyog	6.5
Sabah	N.27	Limbahau	10.6
Sabah	N.28	Kawang	12.0
Sabah	N.29	Pantai Manis	13.8
Sabah	N.30	Bongawan	16.3
Sabah	N.31	Membakut	21.8
Sabah	N.32	Klias	26.7
Sabah	N.33	Kuala Penyu	29.7
Sabah	N.34	Lumadan	10.1
Sabah	N.35	Sindumin	10.5
Sabah	N.36	Kundasang	29.8
Sabah	N.37	Karanaan	14.6
Sabah	N.38	Paginatn	33.6
Sabah	N.39	Tambunan	16.7
Sabah	N.40	Bingkor	15.7
Sabah	N.41	Liawan	12.7
Sabah	N.42	Melalap	9.2
Sabah	N.43	Kemabong	28.6
Sabah	N.44	Tulid	28.4
Sabah	N.45	Sook	25.0
Sabah	N.46	Nabawan	36.6
Sabah	N.47	Telupid	39.8
Sabah	N.48	Sugut	49.2

Negeri	Kod DUN	Nama DUN	Insiden kemiskinan (%)
Sabah	N.49	Labuk	41.7
Sabah	N.50	Gum-Gum	25.7
Sabah	N.51	Sungai Manila	26.0
Sabah	N.52	Sungai Sibuga	16.1
Sabah	N.53	Sekong	7.6
Sabah	N.54	Karamunting	22.6
Sabah	N.55	Elopura	14.2
Sabah	N.56	Tanjong Papat	32.3
Sabah	N.57	Kuamut	56.6
Sabah	N.58	Lamag	41.2
Sabah	N.59	Sukau	24.8
Sabah	N.60	Tungku	18.5
Sabah	N.61	Segama	17.3
Sabah	N.62	Silam	25.0
Sabah	N.63	Kunak	23.8
Sabah	N.64	Sulabayan	69.8
Sabah	N.65	Senallang	20.9
Sabah	N.66	Bugaya	31.6
Sabah	N.67	Balung	15.0
Sabah	N.68	Apas	30.0
Sabah	N.69	Sri Tanjong	4.3
Sabah	N.70	Kukusan	10.5
Sabah	N.71	Tanjung Batu	18.8
Sabah	N.72	Merotai	9.0
Sabah	N.73	Sebatik	26.6
Sarawak	N.01	Opar	8.8
Sarawak	N.02	Tasik Biru	10.1
Sarawak	N.03	Tanjong Datu	9.3
Sarawak	N.04	Pantai Damai	10.4
Sarawak	N.05	Demak Laut	14.4
Sarawak	N.06	Tupong	5.0
Sarawak	N.07	Samariang	7.5
Sarawak	N.08	Satok	9.2
Sarawak	N.09	Padungan	4.1
Sarawak	N.10	Pending	5.7
Sarawak	N.11	Batu Lintang	3.5
Sarawak	N.12	Kota Sentosa	1.4
Sarawak	N.13	Batu Kitang	4.3
Sarawak	N.14	Batu Kawah	2.9
Sarawak	N.15	Asajaya	21.4
Sarawak	N.16	Muara Tuang	11.6
Sarawak	N.17	Stakan	3.5
Sarawak	N.18	Serembu	10.0
Sarawak	N.19	Mambong	8.1
Sarawak	N.20	Tarat	16.5

Negeri	Kod DUN	Nama DUN	Insiden kemiskinan (%)
Sarawak	N.21	Tebedu	28.6
Sarawak	N.22	Kedup	21.7
Sarawak	N.23	Bukit Semuja	11.8
Sarawak	N.24	Sadong Jaya	12.8
Sarawak	N.25	Simunjan	21.6
Sarawak	N.26	Gedong	16.0
Sarawak	N.27	Sebuyau	20.6
Sarawak	N.28	Lingga	22.4
Sarawak	N.29	Beting Maro	40.7
Sarawak	N.30	Balai Ringin	19.9
Sarawak	N.31	Bukit Begunan	11.3
Sarawak	N.32	Simanggang	5.3
Sarawak	N.33	Engkilili	6.2
Sarawak	N.34	Batang Ai	10.6
Sarawak	N.35	Saribas	33.2
Sarawak	N.36	Layar	11.7
Sarawak	N.37	Bukit Saban	20.4
Sarawak	N.38	Kalaka	7.5
Sarawak	N.39	Krian	17.7
Sarawak	N.40	Kabong	26.8
Sarawak	N.41	Kuala Rajang	12.9
Sarawak	N.42	Semop	17.6
Sarawak	N.43	Daro	19.5
Sarawak	N.44	Jemoreng	23.8
Sarawak	N.45	Repok	6.3
Sarawak	N.46	Meradong	13.5
Sarawak	N.47	Pakan	20.2
Sarawak	N.48	Meluan	13.8
Sarawak	N.49	Ngemah	32.9
Sarawak	N.50	Machan	15.1
Sarawak	N.51	Bukit Assek	13.5
Sarawak	N.52	Dudong	8.8
Sarawak	N.53	Bawang Assan	15.6
Sarawak	N.54	Pelawan	0.5
Sarawak	N.55	Nangka	3.9
Sarawak	N.56	Dalat	11.6
Sarawak	N.57	Tellian	7.9
Sarawak	N.58	Balingian	15.3
Sarawak	N.59	Tamin	17.4
Sarawak	N.60	Kakus	6.5
Sarawak	N.61	Pelagus	4.1
Sarawak	N.62	Katibas	6.0
Sarawak	N.63	Bukit Goram	3.8
Sarawak	N.64	Baleh	8.4
Sarawak	N.65	Belaga	5.6

Negeri	Kod DUN	Nama DUN	Insiden kemiskinan (%)
Sarawak	N.66	Murum	5.5
Sarawak	N.67	Jepak	10.9
Sarawak	N.68	Tanjong Batu	0.0
Sarawak	N.69	Kemena	4.3
Sarawak	N.70	Samalaju	0.2
Sarawak	N.71	Bekenu	3.4
Sarawak	N.72	Lambir	9.0
Sarawak	N.73	Piasau	3.1
Sarawak	N.74	Pujut	2.7
Sarawak	N.75	Senadin	4.8
Sarawak	N.76	Marudi	12.1
Sarawak	N.77	Telang Usan	14.3
Sarawak	N.78	Mulu	22.7
Sarawak	N.79	Bukit Kota	10.4
Sarawak	N.80	Batu Danau	14.8
Sarawak	N.81	Ba` Kelalan	23.1
Sarawak	N.82	Bukit Sari	12.2

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TAN SRI DATO' HAJI MAHIADDIN BIN
HAJI MOHD. YASSIN [PAGOH]**

SOALAN

**TAN SRI DATO' HAJI MAHIADDIN BIN HAJI MOHD. YASSIN
[PAGOH] minta PERDANA MENTERI menyatakan:**

- (a) statistik jumlah individu yang bankrap bagi tahun 2022 mengikut pecahan kategori; dan
- (b) impak kenaikan Kadar Dasar Semalaman (OPR) terhadap peminjam yang mungkin tidak lagi mampu membayar ansuran bulanan.

JAWAPAN**YB DATO' SERI AZALINA OTHMAN SAID,
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

(a) statistik jumlah individu yang bankrap bagi tahun 2022 mengikut pecahan kategori; dan

1. Untuk makluman Ahli Yang Berhormat, jumlah keseluruhan kes kebangkrutan bagi tahun 2022 ialah sebanyak 5,695 kes. Jumlah kes kebangkrutan mengikut pecahan negeri ialah seperti berikut:

NEGERI	JUMLAH
WILAYAH PERSEKUTUAN	823
SELANGOR	1,044
JOHOR	692
PERAK	349
PULAU PINANG	357
KEDAH	591
SABAH	468
KELANTAN	303
MELAKA	125
NEGERI SEMBILAN	206
PAHANG	277
SARAWAK	270
TERENGGANU	145
PERLIS	45
JUMLAH	5695

2. Selanjutnya, jumlah kes kebangkrutan mengikut pecahan umur bagi tahun yang sama ialah seperti berikut:

GOLONGAN UMUR	JUMLAH
DI BAWAH UMUR 25 TAHUN	11
25-34 TAHUN	759
35-44 TAHUN	2,237
45-54 TAHUN	1,630

55 TAHUN DAN KE ATAS	1,024
TIADA MAKLUMAT	34
JUMLAH	5,695

Catatan :Bagi golongan umur "Tiada Maklumat, dokumen petisyen tidak mengandungi butiran usia bankrap (Pengenalan Polis / Tentera).

3. Jumlah kes kebangkrapan mengikut pecahan jantina ialah seperti berikut:

JANTINA	JUMLAH
LELAKI	4,183
PEREMPUAN	1,506
TIDAK PASTI	6
JUMLAH	5,695

Catatan: Bagi kategori "Tidak Pasti", dokumen petiysen tidak mengandungi butiran jantina bankrap (Bukan Warganegara).

4. Jumlah kes kebangkrapan mengikut pecahan bangsa pula ialah

BANGSA	JUMLAH
MELAYU	3,268
CINA	1,574
INDIA	417
LAIN-LAIN	417
BUKAN WARGANEGARA	19
JUMLAH	5,695

seperti berikut:

Catatan : Kategori "Bukan Warganegara" baharu dimasukkan bermula Januari 2020.

- (b) impak kenaikan Kadar Dasar Semalaman (OPR) terhadap peminjam yang mungkin tidak lagi mampu membayar ansuran bulanan.

1. Peningkatan OPR secara kumulatif sebanyak 100 mata asas daripada 1.75% kepada 2.75% pada tahun lalu sedikit sebanyak telah memberi kesan kepada peminjam serta peniaga khususnya bagi pinjaman berkadar terapung berikutan impak OPR terhadap peningkatan kepada ansuran bulanan yang dihadapi oleh mereka.
2. Bagi peminjam yang terkesan dengan peningkatan OPR serta menghadapi masalah untuk melunaskan pembayaran ansuran bulanan mereka, Kerajaan menerusi Bank Negara Malaysia (BNM) ingin mengesyorkan supaya para peminjam yang terkesan untuk menghubungi institusi kewangan masing-masing bagi mendapatkan sokongan yang diperlukan. Peminjam boleh memohon untuk menstruktur semula bayaran balik pinjaman mereka melalui pengurangan ansuran bulanan dan pelanjutan tempoh bayaran balik yang bersesuaian dengan keadaan kewangan masing-masing. Tindakan ini membolehkan institusi kewangan untuk menawarkan pakej bayaran balik pinjaman yang sesuai dengan keadaan dan situasi kewangan peminjam bagi membantu mereka ketika menghadapi kesulitan kewangan.
3. Di samping itu, para peminjam yang menghadapi kesulitan kewangan juga boleh mendapatkan bantuan dan khidmat nasihat daripada Agensi Kaunseling dan Pengurusan Kredit (AKPK) seperti Program Pengurusan Kredit (atau Debt Management Programme, DMP) dan Skim Penyelesaian Pinjaman Kecil (atau *Small Debt Resolution Scheme, SDRS*). Bagi peminjam individu, Program Pengurusan Kredit boleh membantu peminjam untuk menstrukturkan semula pinjaman sedia ada dan membolehkan peminjam untuk terus membayar balik pinjaman.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TAN SRI DATO' HJ. MUHYIDDIN BIN MD
YASIN [PAGOH]**

SOALAN

Tan Sri Dato' Haji Mahiaddin bin Haji Mohd. Yassin [Pagoh] minta **MENTERI DALAM NEGERI** menyatakan pendirian Kerajaan terhadap Akta Kesalahan Keselamatan (Langkah-Langkah Khas) (SOSMA) dan kenyataan YB. Damansara bertarikh 14 Disember 2022 bahawa pendirian YB. Menteri mengenai SOSMA dilihat bercanggah dengan pendirian Pakatan Harapan.

JAWAPAN

Tuan Yang Di Pertua,

SOSMA 2012 merupakan undang-undang berbentuk prosedur yang digunakan untuk kesalahan-kesalahan keselamatan spesifik dan ada diperincikan dalam Jadual Pertama SOSMA 2012. Kerajaan berpandangan bahawa undang-undang keselamatan yang berada di bawah tanggungjawab Kementerian ini termasuklah Akta Kesalahan Keselamatan (Langkah-langkah Khas) 2012 atau SOSMA masih relevan dan penting bagi memelihara ketenteraman awam dan keselamatan negara. Polis Diraja Malaysia (PDRM) masih memerlukan undang-undang berkenaan agar tindakan segera boleh diambil untuk mengelakkan sebarang kegentaran awam dan ancaman kepada kedaulatan negara dan kesejahteraan rakyat.

Walaupun begitu, Kementerian komited untuk menambahbaik undang-undang tersebut bagi memastikan keamanan dan keselamatan Negara sentiasa terpelihara, namun ia harus diimbangi dengan hak masyarakat serta kepentingan dan ketenteraman negara. Dalam melaksanakan penambahbaikan terhadap undang-undang tersebut, pihak Kementerian telah mengadakan perbincangan dan bengkel dalaman untuk melihat cadangan penambahbaikan. Pihak berkepentingan termasuklah pertubuhan bukan kerajaan, pakar akademik, komuniti dan sebagainya akan dilibatkan dalam sesi pengumpulan maklum balas terhadap cadangan penambahbaikan tersebut.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TAN SRI DATO' HAJI MAHIADDIN BIN
HAJI MOHD. YASSIN [PAGOH]**

SOALAN

TAN SRI DATO' HAJI MAHIADDIN BIN HAJI MOHD. YASSIN [PAGOH] minta **PERDANA MENTERI** menyatakan perincian mengenai agenda “Memperkasakan Demokrasi dan Ketelusan Dewan Bandaraya Kuala Lumpur (DBKL)” seperti yang dinyatakan dalam manifesto Pakatan Harapan dalam Pilihan Raya Umum Ke-15 (PRU15).

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, hal ehwal perbandaran Bandar Raya Kuala Lumpur adalah di bawah pentadbiran Datuk Bandar Bandaraya Kuala Lumpur yang merupakan perbadanan tunggal dengan nama Datuk Bandar Kuala Lumpur di bawah Akta Ibu Kota Persekutuan 1960 [Akta 190].
2. Walaupun Datuk Bandar Kuala Lumpur merupakan Pihak Berkuasa Tempatan (PBT) bagi Wilayah Persekutuan Kuala Lumpur di bawah Akta Kerajaan Tempatan 1976 [Akta 171], entiti ini mempunyai ciri-ciri berbeza berbanding dengan PBT yang lain.
3. Berbeza dengan PBT di bawah Pihak Berkuasa Negeri (PBN) yang menggunakan Akta 171 sebagai Akta utama bagi kerajaan tempatan, Akta 190 merupakan Akta utama yang digunapakai oleh Datuk Bandar Kuala Lumpur dan Dewan Bandaraya Kuala Lumpur (DBKL). Oleh itu, sekiranya berlakunya percanggahan antara kedua-dua Akta, Akta 190 adalah terpakai bagi Datuk Bandar Kuala Lumpur dan DBKL.
4. Di bawah seksyen 4 Akta 190, Datuk Bandar Kuala Lumpur hendaklah dilantik oleh Yang di-Pertuan Agong selama tempoh 5 tahun atau, jika Yang di-Pertuan Agong dalam mana-mana hal tertentu menentukan sedemikian, selama apa-apa tempoh yang lebih pendek sebagaimana yang ditentukan sedemikian. Oleh kerana perlantikan Datuk Bandar Kuala Lumpur merupakan kuasa mutlak Yang di-Pertuan Agong di bawah Akta 190, pilihan raya kerajaan tempatan tidak boleh diadakan bagi Wilayah Persekutuan Kuala Lumpur.
5. Dalam mengurus tadbir Bandar Raya Kuala Lumpur, Datuk

Bandar Kuala Lumpur dan DBKL, antara lain, terikat kepada perundangan berikut:

- i. Akta Ibu Kota Persekutuan 1960;
- ii. Akta Perancangan Wilayah Persekutuan (1982);
- iii. Akta Kerajaan Tempatan 1976;
- iv. Peruntukan-peruntukan Undang-undang Kecil; dan
- v. Kaedah-kaedah Perancangan yang berkuat kuasa di bawah Akta 267.

6. Akta dan peruntukan undang-undang berkaitan tetap memberi ruang kepada penyertaan rakyat dalam merancang pembangunan bandar raya Kuala Lumpur. DBKL terus menggalakkan keterlibatan orang awam di semua peringkat dalam memberi input dan maklum balas terhadap projek pembangunan setempat dan dasar-dasar tempatan yang boleh mendatangkan impak yang besar kepada kehidupan rakyat di Kuala Lumpur. Sehubungan itu, DBKL telah merangka pelan-pelan pembangunan yang diaspirasikan bersama warga kota termasuk Ahli-ahli Parlimen di Wilayah Persekutuan Kuala Lumpur.

7. Bagi meningkatkan elemen demokrasi dan ketelusan, pada masa kini DBKL telah memulakan program *engagement* atau libat urus yang lebih menyeluruh bersama Ahli-ahli Parlimen di Wilayah Persekutuan Kuala Lumpur seperti Mesyuarat Konsultasi Datuk Bandar Kuala Lumpur bersama Ahli-ahli Parlimen Wilayah Persekutuan Kuala Lumpur. Tujuan mesyuarat ini diadakan adalah bagi mendapatkan input-input dalam menyelesaikan masalah-masalah rakyat yang dipanjangkan melalui Ahli-ahli Parlimen di WPKL. Mesyuarat ini diadakan sebanyak dua belas (12) kali setahun.

8. Seterusnya, Mesyuarat Konsultasi ini disusuli pula dengan Mesyuarat Pemantauan Tindakan bersama Ahli-ahli Parlimen Wilayah Persekutuan Kuala Lumpur bagi membentangkan maklumbalas serta tindakan yang dilakukan oleh DBKL terhadap masalah-masalah rakyat.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT,
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN(BERTULIS)

DARIPADA : TUAN MANNDZRI BIN NASIB (TENGGARA)

SOALAN

TUAN MANNDZRI BIN NASIB (TENGGARA) minta **MENTERI PEMBANGUNAN USAHAWAN DAN KOPERASI** menyatakan adakah Skim Pembiayaan TEKUN Mobilepreneur akan diteruskan bagi membantu golongan yang terlibat dengan ekonomi gig seperti penghantar makanan khususnya golongan belia.

JAWAPAN

Tuan Yang di-Pertua,

1. Pelaksanaan program pembiayaan TEKUN Mobilepreneur telah dimulakan pada tahun 2020 sebagai salah satu program bantuan semasa tempoh pandemik COVID-19 bagi membantu individu yang diberhentikan kerja dan juga menyediakan peluang pekerjaan kepada golongan belia. Ciri-ciri produk di bawah pembiayaan TEKUN Mobilepreneur ialah:

- i. bantuan modal segera untuk pembelian motosikal, dan membaik pulih motosikal;
- ii. terbuka kepada semua individu yang mempunyai lesen dan berdaftar dengan syarikat penyedia perkhidmatan penghantaran;
- iii. pembiayaan sehingga RM10,000 untuk pembelian motosikal; dan
- iv. pembiayaan sehingga RM5,000 untuk baik pulih motosikal.

2. Sehingga Disember 2022, TEKUN Nasional telah membiayai seramai 6,429 usahawan melalui program TEKUN Mobilepreneur dengan melibatkan pembiayaan berjumlah RM58 juta. Pelaksanaan program TEKUN Mobilepreneur akan diteruskan pada tahun 2023 dengan peruntukan berjumlah RM10 juta yang dijangka akan memberi manfaat kepada 1,000 orang usahawan dengan tumpuan di kawasan bandar yang mempunyai kepadatan penduduk yang tinggi.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGKAL KEDUA
PARLIMEN KELIMA BELAS**

PERTANYAAN : JAWAB BERTULIS

**DARIPADA : TUAN MANNDZRI BIN NASIB
(TENGGARA)**

SOALAN

TUAN MANNDZRI BIN NASIB [TENGGARA] minta **MENTERI BELIA DAN SUKAN** menyatakan dapatan dan maklum balas Skim Perantisan Nasional (SPN) terhadap kebolehpasaran belia.

JAWAPAN

Tuan Yang Di Pertua,

Untuk makluman Ahli Yang Berhormat, pada tahun 2020 Kementerian Belia dan Sukan (KBS) telah memperkenalkan program Skim Perantisan Nasional (SPN). SPN merupakan program tawaran baharu berkonsepkan “*place and train*” yang bertujuan untuk membantu melonjakkan kebolehpasaran belia dan menyediakan lebih banyak peluang untuk belia mendapatkan pengalaman bekerja.

Kementerian Belia dan Sukan bekerjasama dengan Kementerian Sumber Manusia di bawah inisiatif Pelan Jana Semula Ekonomi Negara (PENJANA) bagi merancakkan pelaksanaan program SPN. Ini kerana, PENJANA merupakan agensi yang menguruskan penglibatan sektor swasta dan Syarikat Berkaitan Kerajaan (GLC).

Program SPN melibatkan penempatan latihan perantisan selama 3 hingga 6 bulan. Perantis akan ditempatkan di syarikat mengikut keperluan bidang kerja dan kemahiran yang diperlukan oleh syarikat tersebut. Dalam tempoh penempatan ini, perantis mengikuti latihan kemahiran *soft skills* yang dikendalikan oleh penyedia latihan secara berkala.

SOALAN NO : 287

Pada tahun 2021 seramai 23,939 orang telah menyertai program ini dan daripada jumlah tersebut seramai 7,679 orang telah mendapat penempatan di 175 syarikat swasta dan badan pembekal latihan. Sejumlah peruntukan disalurkan oleh kerajaan untuk program PENJANA tiga peringkat iaitu, PENJANA KERJAYA 1.0, PENJANA KERJAYA 2.0 dan PENJANA KERJAYA 3.0 bermula dari 15 Jun 2021 sehingga 31 Disember 2023. Objektif pemberian dana ini oleh kerajaan adalah untuk merangsang ekonomi ketika tempoh pandemik COVID-19 melalui Program Insentif Pengambilan Pekerja dan Program Latihan Pekerja.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN MANNDZRI BIN NASIB [TENGGARA]

SOALAN

TUAN MANNDZRI BIN NASIB [TENGGARA] minta **MENTERI PERTANIAN DAN KETERJAMINAN MAKANAN** menyatakan pendirian terkini Kerajaan terhadap penggunaan ganja dalam sektor perkhidmatan kesihatan.

JAWAPAN

Tuan Yang di-Pertua,

Penggunaan ganja atau kanabis pada masa kini adalah tertakluk di bawah Akta Dadah Berbahaya 1952 (Akta 234) yang dikawal selia oleh Kementerian Kesihatan Malaysia (KKM). Sebarang aktiviti termasuklah penanaman, pemprosesan, pengilangan, penjualan dan pengedaran kanabis adalah dikawal di bawah akta tersebut. Seksyen 6(B) akta tersebut telah memperuntukkan kuasa kepada Menteri Kesihatan bagi kebenaran kepada mana-mana pegawai awam untuk menanam kanabis bagi tujuan pembelajaran, eskperimen atau perubatan tertakluk kepada terma dan syarat yang ditetapkan.

Penggunaan kanabis dalam sektor perkhidmatan kesihatan masih diperingkat penelitian Kerajaan. Dua (2) jawatankuasa telah ditubuhkan di peringkat KKM untuk meneliti perkara ini iaitu:

- i. Jawatankuasa Induk Pembangunan Industri Kanabis dan Ketum Bagi Tujuan Perubatan; dan
- ii. Jawatankuasa Kajian Kebolehgunaan Kanabis dan Ketum Untuk Tujuan Perubatan.

Jawatankuasa ini akan meneliti secara holistik aspek kesihatan dan penggunaan kanabis dalam rawatan pesakit.

Jawatankuasa Kerja Kajian Kebolehlaksanaan Pembangunan Cannabinoid Perubatan juga telah ditubuhkan di peringkat Kementerian Pertanian dan Keterjaminan Makanan (KPKM) bagi melaksanakan Kajian Kebolehlaksanaan Pembangunan Cannabinoid (Kanabis) Perubatan melibatkan aspek kesihatan, keselamatan, perundangan dan sosioekonomi.

KPKM dijangka akan membentangkan laporan akhir pelaksanaan Kajian Kebolehlaksanaan Pembangunan Industri Cannabinoid (Kanabis) Perubatan di peringkat Jawatankuasa Induk Pembangunan Industri Kanabis dan Ketum Bagi Tujuan Perubatan di KKM selewat-lewatnya pada suku ke-2 tahun 2023. Dapatan daripada kajian ini akan dijadikan sebagai rujukan bagi penetapan halatuju berhubung penggunaan kanabis dalam perkhidmatan kesihatan.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN MANNDZRI BIN NAJIB (TENGGARA)

SOALAN

TUAN MANNDZRI BIN NAJIB (TENGGARA) minta **MENTERI
KEMAJUAN DESA DAN WILAYAH** menyatakan status terkini
Program Pemajuan Kawasan (PPK) yang telah berlangsung sejak
Rancangan Malaysia Ke-9.

JAWAPAN

Tuan Yang Di-Pertua,

Untuk makluman Ahli Yang Berhormat, Projek Pemajuan Kawasan (PPK) telah dilaksanakan sejak Rancangan Malaysia Kesembilan (RMKe-9). PPK adalah salah satu program di bawah Kementerian Kemajuan Desa dan Wilayah (KKDW) yang bertujuan untuk membangunkan petempatan baharu atau menyusun semula kampung sedia ada secara terancang di kawasan luar bandar yang dilengkapi dengan kemudahan asas dan ameniti sosial.

Sehingga kini, sebanyak 34 projek telah dan sedang dalam pelaksanaan melibatkan kos projek keseluruhan berjumlah RM590 juta di atas 474 hektar tanah di seluruh negara dan akan memberi manfaat kepada kira-kira 20,000 penerima manfaat yang terdiri daripada golongan miskin tegar, miskin dan golongan berpendapatan rendah.

Untuk makluman Ahli Yang Berhormat, projek yang telah siap sepenuhnya akan diserahkan kepada agensi penerima (Kerajaan Negeri) dan pemilihan peserta adalah di bawah tanggungjawab agensi penerima. Kerajaan Negeri boleh membuat permohonan sekiranya berminat dan mempunyai tanah yang bersesuaian untuk dibangunkan dengan petempatan bersepadu. Permohonan boleh dikemukakan melalui pejabat daerah dan tanah dan diselaraskan oleh Unit/Bahagian Perancang Ekonomi Negeri.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN MANNDZRI BIN NASIB (TENGGARA)

SOALAN

TUAN MANNDZRI BIN NASIB (TENGGARA) minta **MENTERI KEMAJUAN DESA DAN WILAYAH** menyatakan status kejayaan Pusat Komuniti Desa dalam membantu pembangunan masyarakat luar bandar.

JAWAPAN

Tuan Yang di-Pertua,

Pusat Komuniti Desa (PKD) berperanan sebagai pusat sehenti yang berfungsi menawarkan program-program dan aktiviti berbentuk kemahiran bagi memberi kemahiran asas kepada penduduk desa. Selain tu, PKD turut memberi perkhidmatan setempat seperti pembayaran bil utiliti dan perkhidmatan bergerak Kerajaan seperti Pos, Jabatan Pengangkutan Jalan (JPJ), Tabung Haji, Kumpulan Wang Simpanan Pekerja (KWSP) melalui kerjasama strategik dengan Jabatan/Agensi terbabit.

Antara kejayaan jika diambilkira dari tempoh pasca pandemik COVID-19 iaitu pada tahun 2021 dan 2022, PKD telah melatih seramai 32,368 orang penduduk desa di seluruh negara melalui 3,266 program latihan kemahiran seperti masakan, jahitan, gubahan bunga, urutan tradisional, pembuatan sabun, pembuatan baja dan pelbagai kemahiran lain lagi. Melalui program-program latihan ini, sehingga Disember 2022, seramai 688 orang peserta yang telah mengikuti program latihan kemahiran di PKD telah berjaya memulakan perniagaan dan menjadi usahawan dengan jumlah produk yang berjaya diusahakan adalah sebanyak 1,047.

Selain itu, PKD juga telah menganjurkan program-program keagamaan dan kerohanian di peringkat komuniti bertujuan menjadikan desa sebagai tempat tinggal yang sejahtera, aman dan harmoni seperti tadarus Al-Quran, berzanji, sambutan hari kebesaran Islam dan lain-lain. Sebanyak 962 program keagamaan dan kerohanian telah dilaksanakan pada tahun 2021 dan 2022 dengan penyertaan seramai 14,298 orang peserta di seluruh negara.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : JAWAB BERTULIS

**DARIPADA : DATUK WIRA HAJAH MAS ERMIEYATI
BINTI SAMSUDIN [MASJID TANAH]**

SOALAN

Minta **MENTERI BELIA DAN SUKAN** menyatakan status perwartaan had umur belia kepada 30 tahun dan apakah komitmen serta perancangan pihak Kementerian bagi memperkasakan persatuan belia yang dilihat semakin lesu.

JAWAPAN

Untuk makluman, Kementerian Belia dan Sukan (KBS) telah melaksanakan *Sesi Townhall* bersama Dewan Tertinggi Majlis Belia Malaysia (MBM) pada 17 Januari 2023. Melalui sesi ini, pihak MBM sebagai rakan strategik KBS diminta untuk membentuk pasukan petugas atau *taskforce* untuk menyediakan pelan transisi kepimpinan belia supaya Akta Pertubuhan Belia dan Pembangunan Belia (Pindaan) 2019 [Akta A1602] dapat dilaksanakan secara teratur dengan mengambil kira pandangan pemegang taruh. Justeru, KBS dijangka akan menetapkan tarikh kuat kuasa Akta A1602 dalam masa terdekat.

Satu Jawatankuasa yang turut melibatkan MBM diwujudkan untuk menyelaraskan transisi kepada semua pertubuhan belia serta melaksanakan program/ aktiviti ke arah menyediakan pelapis kepimpinan dan pada masa yang sama usaha ini berupaya menggalakkan belia untuk berpersatuan.

Justeru itu, Pejabat Pendaftar Pertubuhan Belia (ROY) juga telah melaksanakan beberapa program Sesi Libat Urus Pertubuhan Belia di setiap negeri bagi memberi kefahaman dan persediaan kepada

pertubuhan belia mengenai perubahan ini. Inisiatif ini dilihat mampu untuk menggerakkan pertubuhan belia agar lebih bersedia dalam menyediakan barisan pelapis pemimpin muda.

Pada tahun 2023, sebanyak tiga (3) program Konvensyen Pemimpin Muda Pertubuhan Belia dirancang dilaksanakan bersama Institut Pembangunan dan Kecemerlangan Kepimpinan (i-LEAD). Program ini menyediakan platform kepada golongan anak muda berpersatuan dalam mendengar suara dan menerapkan nilai pemimpin yang cemerlang.

Selain ROY, pihak Jabatan Belia dan Sukan (JBSN) juga sentiasa menyokong persatuan-persatuan supaya aktif dalam melaksanakan program-program yang dirancang. Peruntukan berupa pemberian geran Kerajaan kepada persatuan-persatuan disalurkan mengikut prosedur sedia ada bagi membiayai sepenuhnya atau sekurang-kurangnya sebahagian kos pentadbiran dan pelaksanaan program atau aktiviti persatuan khususnya kepada persatuan belia dan sukan dan amnya.

JBSN juga menyediakan platform untuk membimbing dan mendedahkan golongan belia dengan urus tadbir pertubuhan, keorganisasian dan menggerakkan program pembangunan belia di peringkat akar umbi melalui Kursus Pengurusan Organisasi (KPO). Melalui kursus ini, peserta akan diberi pendedahan mengenai modul asas berkaitan urus tadbir organisasi seperti: Kepimpinan, Pemimpin dan Pengikut; Penulisan dan Dokumentasi; Pengurusan Kewangan; dan Media Kreatif. Pada tahun 2022, sebanyak 32 siri telah dilaksanakan dengan penyertaan seramai 1,280 orang peserta. Pelaksanaan kursus ini akan diteruskan oleh Pejabat Pendaftar Pertubuhan Belia bermula tahun 2023.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK WIRA HAJAH MAS ERMIEYATI BINTI
SAMSUDIN [MASJID TANAH]**

SOALAN

**DATUK WIRA HAJAH MAS ERMIEYATI BINTI SAMSUDIN [MASJID
TANAH]** minta **MENTERI PENDIDIKAN** menyatakan komitmen
Kementerian terhadap isu infrastruktur sekolah-sekolah uzur yang ada
dalam Parlimen Masjid Tanah seperti Sekolah Kebangsaan Kampung
Tengah yang masih ada lagi menggunakan kabin sebagai bilik darjah dan
ini tidak kondusif buat pelajar dan guru sekolah ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha secara berterusan dalam memastikan penyediaan kemudahan sekolah adalah mencukupi dan berada dalam keadaan baik dan kondusif agar menjamin keselamatan dan keselesaan warga sekolah.

Untuk makluman Ahli Yang Berhormat, KPM telah melaksanakan penetapan projek pembangunan semula atau menaik taraf bangunan sekolah yang daif berdasarkan analisis skor gred impak bagi menentukan tahap keadaan komponen fizikal atau fasiliti bangunan di sekolah. Skor gred impak ini mempunyai 7 tahap skala. Permohonan projek pembangunan semula atau menaik taraf bangunan yang daif berskala 6 dan skala 7 akan dikemukakan kepada pihak agensi pusat untuk dipertimbangkan dalam Rancangan Malaysia Lima Tahun (RMLT).

Untuk makluman Ahli Yang Berhormat, berdasarkan data KPM, terdapat tiga buah sekolah yang mempunyai bangunan daif di negeri Melaka, namun KPM mendapati tiada sekolah yang mempunyai bangunan daif di Parlimen Masjid Tanah.

KPM turut merancang untuk mengemukakan permohonan bangunan gantian tiga bilik darjah dan lain-lain kemudahan di Sekolah Kebangsaan Kampung Tengah dalam Rancangan Malaysia Ke-12 *Rolling Plan* 4 Tahun 2024. Walau bagaimanapun kelulusan dan pelaksanaan projek ini adalah tertakluk kepada keutamaan dan kedudukan kewangan semasa kerajaan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : DATUK WIRA MAS ERMIEYATI BINTI
SAMSUDIN [MASJID TANAH]

SOALAN

DATUK WIRA MAS ERMIEYATI BINTI SAMSUDIN [MASJID TANAH]
minta **MENTERI KEWANGAN** menyatakan tentang keperluan untuk memperluas dan meneruskan bagi penerima Sumbangan Tunai Rahmah (STR) terutama bagi ahli keluarga yang menghadapi penyakit kritikal melalui Program Skim Perlindungan Nasional (MySalam) sebelum ini.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan amat komited untuk memastikan kumpulan B40 terus diberikan perlindungan kesihatan percuma di bawah Program Skim Perlindungan Nasional (mySalam). Sejak dilaksanakan pada tahun 2019, pelaksanaan mySalam telah diperluaskan kepada penerima Bantuan Sara Hidup (BSH) yang terdiri daripada individu B40 dan pasangannya dan kini merupakan penerima Bantuan Keluarga Malaysia (BKM) dengan had umur ditingkatkan kepada 65 tahun.

Dalam mendepani cabaran ekonomi semasa, Kerajaan pada 16 Januari 2023 telah mengumumkan penjenamaan semula BKM kepada Sumbangan Tunai Rahmah (STR). Selaras dengan penjenamaan semula tersebut, pelaksanaan mySalam akan terus ditambahbaik dan diperluaskan kepada penerima STR agar kumpulan B40 terus dibantu disaat menghadapi kesulitan dan kecemasan agar dapat meneruskan kelangsungan hidup.

Pada masa ini, Kerajaan masih lagi dalam proses permohonan baharu dan membuat semakan data penerima STR yang layak bagi mySalam dan dijangkakan hanya akan dapat dimuktamadkan pada pertengahan tahun 2023.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN LIMA BELAS**

PERTANYAAN : JAWAB BERTULIS

**DARIPADA : TUAN MOHAMAD SHAFIZAN HAJI KEPLI
(BATANG LUPAR)**

SOALAN

TUAN MOHAMAD SHAFIZAN HAJI KEPLI (BATANG LUPAR) minta **MENTERI BELIA DAN SUKAN** menyatakan inisiatif yang diambil Kementerian dalam mencari bakat dan menggalakkan penyertaan belia dari kawasan luar bandar dalam aktiviti sukan dan olah raga.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Belia dan Sukan (KBS) memang komited dalam melaksanakan pencarian bakat – bakat baru dalam sukan bersama agensi KBS di peringkat persekutuan dan juga negeri. Kementerian ini melalui Jabatan Belia dan Sukan Negara (JBSN) turut melaksanakan Program Aktif @ Sukan Luar Bandar 2022 di empat belas (14) buah negeri yang bertujuan untuk membudayakan aktiviti sukan dan kecergasan di kalangan masyarakat terutamanya golongan belia di kawasan luar bandar dengan penglibatan seramai 7,152 orang di seluruh Malaysia.

Program ini turut meluaskan akses kemudahan sukan kepada masyarakat di kawasan luar bandar serta menyerlahkan potensi serta bakat mereka dalam bidang sukan dan akan diteruskan pelaksanaannya bagi tahun 2023.

SOALAN NO : 294

Bagi pembangunan sukan Orang Kurang Upaya (OKU) pula, Jabatan Belia dan Sukan Negara melaksanakan pembangunan OKU melalui pencarian bakat baharu seperti i-Talent & i-Train dengan melibatkan seramai 1403 orang di seluruh Malaysia.

Selain itu juga, pelbagai inisiatif serta program pengenalanpastian bakat dalam kalangan kanak-kanak dan belia dari kawasan luar bandar telah dilaksanakan oleh KBS melalui Institut Sukan Negara (ISN) seperti Program MYTID. Program ini telah diperkenalkan dalam usaha mengesan dan mengenal pasti bakat berpotensi di peringkat sekolah rendah bagi kanak-kanak berumur 7 hingga 12 tahun. Program ini merupakan satu jaringan kerjasama antara Kementerian Pendidikan Malaysia (KPM) dan KBS.

Program akar umbi ini dijalankan melalui pendekatan saintifik baharu yang melibatkan kemahiran pergerakan motor dan kaedah penilaian kematangan. Program ini akan dilaksanakan secara *Proof of Concept* (POC) bermula tahun 2023 sehingga 2024 yang melibatkan seramai 60,000 orang murid sekolah rendah (Tahun 1 hingga 6) daripada 152 buah sekolah bandar dan kawasan luar bandar yang mana akan turut melibatkan 100 buah sekolah di Semenanjung Malaysia, 25 buah sekolah di Sarawak, 25 buah sekolah di Sabah termasuk dua (2) buah sekolah di Labuan. Pemilihan sekolah yang terlibat akan dibuat oleh Kementerian Pendidikan Malaysia.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN MOHAMAD SHAFIZAN BIN HAJI
KEPLI (BATANG LUPAR)**

SOALAN

TUAN MOHAMAD SHAFIZAN BIN HAJI KEPLI [BATANG LUPAR]
minta **MENTERI KERJA RAYA** menyatakan status terkini pembinaan
Second Trunk Road yang bakal menjadi laluan alternatif untuk
menghubungkan Sibu dan Kuching.

JAWAPAN

Tuan Yang Di-Pertua,

Untuk makluman Ahli Yang Berhormat, Projek *Second Trunk Road* adalah inisiatif Kerajaan Negeri Sarawak bagi menghubungkan jaringan Lebuhraya Pan Borneo Sarawak dengan Jalan Pesisir Pantai Sarawak. Oleh itu, perkembangan terkini dan perincian lanjut mengenai projek tersebut boleh diperolehi daripada Kerajaan Negeri Sarawak memandangkan ianya bukan di bawah bidang kuasa Kementerian Kerja Raya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN MOHAMAD SHAFIZAN HAJI KEPLI
[BATANG LUPAR]**

SOALAN

TUAN MOHAMAD SHAFIZAN HAJI KEPLI [BATANG LUPAR] minta **MENTERI PERTANIAN DAN KETERJAMINAN MAKANAN** menyatakan nisbah sara diri (self-sufficiency ratio) bahan makanan utama negara seperti beras, sayuran, buah-buahan, sayur-sayuran, daging, ayam, telur dan produk tenusu serta usaha Kementerian ke arah meningkatkan sekuriti makanan dan kedudukan Malaysia dalam Global Food Security Index.

JAWAPAN

Self-Sufficiency Ratio (SSR) atau nisbah sara diri merupakan pengukuran terhadap kemampuan sesebuah negara untuk memenuhi keperluan domestik melalui pengeluaran tempatan. Dalam konteks sekuriti makanan, Kementerian ini memantau status bekalan lapan (8) komoditi makanan utama iaitu beras, sayur, buah, daging ayam/itik, telur ayam/itik, daging lembu, susu segar dan ikan makanan (*edible fish*).

SSR yang dicatatkan bagi bahan makanan utama negara pada tahun 2021 adalah seperti berikut:

Bil	Komoditi	Kadar SSR
i	Beras	65.0 %
ii	Telur Ayam	114.4%
iii	Daging Ayam	99.9%
iv	Daging Lembu/Kerbau	18.9%
v	Buah-buahan	77.4%
vi	Sayur-sayuran	46.7%
vii	Susu Segar	56.7%
viii	Ikan Makanan	91.7 %

Kementerian turut berusaha untuk meningkatkan sekuriti makanan dan kedudukan Malaysia dalam *Global Food Security Index* (GFSI). Tindakan ini tidak hanya bertujuan untuk mengukuhkan kedudukan negara dalam GFSI, tetapi juga memastikan sistem makanan negara terus kekal rentan dalam pelbagai keadaan.

Antara langkah yang telah dan akan diambil adalah:

- (i) menubuhkan Jawatankuasa Kabinet Mengenai Dasar Sekuriti Makanan Negara (FSCC) yang dipengerusikan oleh YAB Perdana Menteri untuk membincangkan hala tuju dan isu-isu berkaitan sekuriti makanan;

- (ii) membangunkan Pelan Tindakan Dasar Sekuriti Makanan Negara 2021-2025, dengan penglibatan pelbagai Kementerian dan Agensi yang mempunyai peranan di bawah empat (4) dimensi sekuriti makanan Food and Agriculture Organization of the United Nations (FAO);
- (iii) membangunkan platform khusus berkaitan sekuriti makanan negara sebagai sumber rasmi untuk rujukan umum dan pihak yang berkepentingan;
- (iv) mengadakan sesi libat urus secara berkala dengan Kementerian serta Agensi yang bertanggungjawab di bawah kategori penilaian sekuriti makanan; dan
- (v) mengadakan sesi libat urus dengan pelbagai organisasi antarabangsa yang menjadi sumber rujukan maklumat dan data GFSI.

Dengan usaha ini, Kementerian mampu meningkatkan kedudukan negara ke tahap yang lebih baik dalam GFSI, pada masa yang sama menjamin bekalan makanan yang cukup, mampu beli, selamat dan berkhasiat kepada supaya semua lapisan masyarakat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN MOHAMAD SHAFIZAN HAJI KEPLI
[BATANG LUPAR]**

SOALAN

TUAN MOHAMAD SHAFIZAN HAJI KEPLI [BATANG LUPAR]
minta **MENTERI PERTANIAN DAN KETERJAMINAN MAKANAN**
menyatakan senarai penuh program bantuan dan subsidi termasuk
kemudahan pinjaman yang disediakan oleh jabatan dan agensi
Kementerian kepada golongan petani, penternak, nelayan dan
pengusaha industri makanan untuk membantu mereka dalam aspek
pemasaran, pemodenan, serta meningkatkan pendapatan dan
produktiviti pertanian.

JAWAPAN

Tuan Yang di-Pertua,

Kementerian Pertanian dan Keterjaminan Makanan (KPKM) sentiasa komited untuk membantu golongan petani, penternak, nelayan dan pengusaha makanan dengan menyediakan pelbagai bantuan dan subsidi bagi meningkatkan pendapatan dan produktiviti pertanian seperti:

- i. Insentif bagi penanaman padi meliputi pemberian input pertanian melalui Skim Baja Padi Persekutuan (SBPKP), Insentif Benih Padi Sah (IBPS), Skim Insentif Pengeluaran Padi (SIPP) dan Skim Baja dan Racun Padi Bukit (SBRPB);
- ii. Subsidi output padi melalui Skim Subsidi Harga Padi (SSHP);
- iii. Elaun Sara Hidup Nelayan sebanyak RM300 sebulan kepada nelayan laut dan RM250 sebulan kepada nelayan darat;
- iv. Subsidi dan insentif kepada nelayan seperti Skim Subsidi Diesel dan Petrol Nelayan dan Insentif Hasil Tangkapan Ikan,
- v. Subsidi kepada penternak ayam dan telur bermula dari 5 Februari 2022;
- vi. Geran padanan diantara kerajaan dan golongan sasar termasuk Agropreneur;
- vii. Bantuan insentif meliputi input pertanian, pembangunan kawasan, pembinaan pusat pengumpulan serta pemprosesan dan lain-lain;
- viii. Latihan dan khidmat nasihat teknikal oleh jabatan teknikal.

KPKM sentiasa peka akan keperluan bagi membantu usahawan tanaman, ternakan dan perikanan khususnya usahawan mikro bagi dana-dana pembiayaan dalam usaha meningkatkan aspek pemasaran, pemodenan serta meningkatkan pendapatan dan produktiviti pertanian. KPKM melalui Agrobank menawarkan kemudahan pembiayaan seperti berikut:

- i. Dana Pembiayaan Agromakanan Keluarga Malaysia (DPAKM) kepada pengusaha-pengusaha ternakan dan tanaman dengan

peruntukan sebanyak RM800 juta. Pembiayaan ini ditawarkan khusus mengikut agihan pembiayaan seperti berikut:

- a) RM300 juta bagi ternakan ayam;
- b) RM200 juta bagi ternakan ruminan (lembu & kambing)
- c) RM100 juta bagi tanaman sayur-sayuran
- d) RM100 juta bagi usahawan mikro
- e) RM50 juta bagi usahawan mikro baharu; dan
- f) RM50 juta bagi usahawan muda.

Had maksimum pembiayaan bagi ternakan ayam, ternakan ruminan dan sayur-sayuran ditetapkan sehingga RM5 juta untuk setiap permohonan dan had maksimum bagi usahawan mikro, usahawan mikro baharu dan usahawan muda adalah sehingga RM500 ribu untuk setiap permohonan dengan kadar pembiayaan sebanyak 3% berserta moratorium 6 bulan pertama.

- ii. Dana Pembiayaan Agromakanan 3 (DPA3) berjumlah RM150 juta bagi tahun 2023. Dana ini boleh dimohon bagi golongan petani, penternak, nelayan dan pengusaha industri makanan tertakluk kepada keputusan yang akan dimuktamadkan diantara Kementerian Kewangan (MOF) dan pihak Bank Pertanian Malaysia Berhad (Agrobank); dan
- iii. Kemudahan pembiayaan dibawah Program Modenisasi Rantaian Nilai Agromakanan (PMRNA) dengan peruntukan berjumlah RM 60 juta bagi membolehkan usahawan agromakanan di seluruh rantai nilai sektor agromakanan mendapatkan peralatan dan teknologi pertanian pintar berteraskan teknologi 4IR menerusi kemudahan pembiayaan sehingga RM1 juta pada kadar 3.5 peratus setahun bagi tempoh pinjaman sehingga 10 tahun;
- iv. Dana pembiayaan melalui Program Modenisasi Vesel dan Mekanisasi Tangkapan di bawah Dana Jaminan Makanan (DJM) sebanyak RM136 juta kepada 420 penerima seluruh

negara bagi tujuan pemodenan vesel dan meningkatkan mekanisasi, menaiktaraf peralatan dan keselamatan. Program ini dapat memberi peluang kepada nelayan-nelayan di Zon A dan Zon B untuk menerokai kawasan perairan laut baharu

Selain itu, Kementerian juga menyediakan bantuan pemasaran kepada usahawan tani melalui program Khidmat Pemasaran KPKM atau lebih dikenali sebagai Program Ladang Kontrak. Melalui program ini, pada tahun 2022 seramai 1,522 orang peserta telah diberi bantuan berbentuk khidmat pemasaran dan *business matching*, sokongan harga lantai dan insentif MyGAP, kursus pemasaran, pembangunan Pusat Pengumpulan Ladang Baharu/Naik taraf serta sokongan peralatan pemasaran.

Kementerian, melalui Lembaga Pemasaran Pertanian Persekutuan (FAMA) juga menyalurkan pelbagai perkhidmatan berkaitan pemasaran produk agromakanan menerusi strategi persediaan produk, pembangunan pasaran dan pembangunan outlet pemasaran. Antara yang dilaksanakan oleh FAMA adalah seperti:

- i. Insentif pengukuhan pasaran melalui menaiktaraf ruang jualan, imej outlet dan peralatan perniagaan;
- ii. Bantuan bagi meningkatkan imej produk dari segi reka bentuk pembungkusan dan pelabelan mengikut kehendak pasaran dan kepatuhan kepada Akta Makanan 1983 dan Peraturan-Peraturan Makanan 1985; dan
- iii. Bantuan penyediaan tapak dan kelengkapan peralatan usahawan baru serta naiktaraf imej dan peralatan peragaan

Pelaksanaan program-program ini adalah tertakluk kepada kedudukan kewangan semasa Kerajaan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

**DARIPADA : TUAN MOHAMAD SHAFIZAN HAJI
KEPLI (BATANG LUPAR)**

SOALAN

TUAN MOHAMAD SHAFIZAN HAJI KEPLI (BATANG LUPAR) minta **MENTERI BELIA DAN SUKAN** menyatakan usaha dan hala tuju Kementerian dan Kerajaan Perpaduan amnya dalam membantu memperkasa dan meningkatkan tahap sosioekonomi golongan belia di luar bandar dalam bidang keusahawanan, perniagaan, pertanian dan sebagainya.

JAWAPAN

Untuk makluman Ahli Yang Berhormat, Kementerian Belia dan Sukan (KBS) sememangnya sentiasa cakna dan mengambil berat soal meningkatkan taraf ekonomi dan berusaha sedaya upaya untuk mengurangkan kadar pengangguran golongan belia di negara ini. KBS turut mengambil langkah proaktif untuk melaksanakan beberapa program dalam membantu memperkasakan taraf ekonomi dan mewujudkan pekerjaan golongan belia luar bandar. Bahkan, dedikasi KBS dalam hal ini diterjemahkan melalui teras Pelan Strategik KBS melibatkan belia iaitu Pemerksaan Belia yang inklusif melalui Model Baharu Pembangunan Ekonomi. Teras ini didukung oleh salah satu strategi berkaitan iaitu penjanaaan ekonomi.

Pada tahun 2022 KBS telah menganjurkan *Program Social Entrepreneurship for Rural Youth (SERY)* yang berkonsepkan latihan, bimbingan dan pementoran untuk mengupayakan pembangunan sosioekonomi dan komuniti 80 orang belia luar bandar di negeri sabah. Program ini telah memberi impak kepada belia dari golongan B40 dan komuniti di Kota Marudu, Sabah menghasilkan baja organik daripada sisa kulit pisang berjumlah 900 kg untuk dipasarkan. Pada tahun 2023 program SERY mensasarkan keseluruhan penyertaan seramai 30 kumpulan yang membabitkan 80 orang belia.

Selain dari itu, Kementerian ini turut melaksanakan program *Youth Career (Y-Career)* kepada 6,676 belia di negeri Sabah dan seramai 1,179 berjaya ditawarkan pekerjaan. Program *Y-Career* ini telah diadakan di Dewan Seri Sulaman, Tuaran pada 15 hingga 17 Julai 2022.

Namun begitu, Kementerian sedar bahawa usaha mengurangkan kadar pengangguran serta memperkasakan taraf ekonomi belia di negara ini tidak hanya terletak di bahu KBS sahaja, sebaliknya melibatkan pelbagai Kementerian/agensi yang berkaitan. Sungguhpun begitu, KBS akan memastikan kerjasama rentas agensi dalam menangani isu ini akan terus dipergiatkan di masa-masa akan datang.

Secara keseluruhannya, KBS telah melaksanakan pelbagai bentuk program bagi membantu menangani masalah pengangguran di kalangan belia seperti Program Social Entrepreneurship for Rural Youth (SERY); Program Youth Career; Program Ekonomi Digital; Program myPRENEUR; Program MyGig; Program Skim Perantisan Nasional (SPN); Program Webinar Jom Cipta Kerja; dan Program Webinar Inspire! Kerjaya Agro.

Selain itu juga, Kementerian ini sentiasa mendekati golongan belia di kawasan luar bandar melalui pelaksanaan program-program seperti berikut:-

1. Hari Belia Negara Peringkat Daerah. Pada tahun 2022, 117 program telah dilaksanakan di seluruh daerah dengan penyertaan seramai 446,662 orang peserta;
2. Program myPRENEUR. Pada tahun 2022, 29 aktiviti telah dilaksanakan dengan penyertaan seramai 3,115 orang peserta;
3. Program Ekonomi Digital. Pada tahun 2022, 150 aktiviti peringkat negeri dan daerah telah dilaksanakan dengan penyertaan seramai 46,431 orang peserta;
4. Program Intervensi Sosial (*Youth to Youth*). Pada tahun 2022, 30 program telah dilaksanakan di seluruh negeri dan daerah dengan penyertaan seramai 5,065 orang peserta; dan
5. Program Kursus Kepimpinan Organisasi (KPO). Pada tahun 2022, sebanyak 32 siri telah dilaksanakan dengan penyertaan seramai 1,280 orang peserta.

KBS turut melaksanakan agenda pemerkasaan belia luar bandar melalui pendidikan dan latihan teknikal dan vokasional (TVET) kepada belia melalui 22 buah Institusi Latihan Kemahiran Belia dan Sukan (ILKBS) di seluruh negara. Sebanyak 200 kursus atau latihan kemahiran jangka pendek untuk golongan belia yang boleh diikuti oleh belia massa seperti program *Star@U*, *Bootcamp*, *Skill for Life*, *TVETPreneur Makerspace*, Inkubator dan lain-lain.

Pelbagai usaha dilaksanakan bagi mendekati golongan belia di kawasan luar bandar khususnya bagi menceburi bidang latihan kemahiran TVET. Antara yang dilaksanakan adalah: -

1. Menjalin kerjasama dengan pihak Pejabat Pendidikan Daerah/ Negeri serta sekolah-sekolah di kawasan luar bandar untuk mempromosikan peluang menyambung pengajian di ILKBS serta laluan kerjaya yang terbuka luas dalam bidang industri pada masa kini;
2. Melaksanakan program-program *outreach* dengan melibatkan pihak Pejabat Belia dan Sukan Daerah, agensi kerajaan negeri dan daerah yang berkaitan, persatuan belia dan komuniti setempat bagi mengenalpasti dan membantu golongan belia kawasan luar bandar yang tidak mempunyai akses kepada peluang-peluang menyambung pengajian ke peringkat yang lebih tinggi; dan
3. Mewujudkan kerjasama dengan pihak Baitulmal, Pusat Zakat dan agensi/ yayasan di bawah Kerajaan Negeri untuk membantu membiayai bayaran asas dan teknikal pelajar yang tidak berkemampuan tetapi ingin melanjutkan pengajian ke ILKBS. Pelajar juga diberi elaun bulanan sebanyak RM100 hingga RM300 mengikut tahap pengajian yang dibiayai oleh KBS.

KBS sentiasa membuka peluang kepada belia-belia kawasan luar bandar untuk mengikuti latihan kemahiran di ILKBS. Ia bukan hanya memberi tumpuan kepada pendidikan dan latihan kemahiran untuk para pelajar namun pemeraksanaan pembangunan modal insan turut diberi keutamaan bagi menghasilkan pelajar-pelajar yang cemerlang dan seimbang.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : DR. MOHAMMED TAUFIQ BIN JOHARI
[SUNGAI PETANI]**

SOALAN :

DR. MOHAMMED TAUFIQ BIN JOHARI [SUNGAI PETANI] minta **PERDANA MENTERI** menyatakan perkembangan terkini program dan projek pembangunan bersasar untuk negeri Kedah yang terkandung di dalam Rancangan Malaysia Kedua Belas (RMK-12), 2021-2025.

JAWAPAN

**DIJAWAB OLEH YB DATUK ARMIZAN BIN MOHD ALI
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)**

Tuan Yang di-Pertua,

1. Adalah dimaklumkan bahawa antara tahun 2021 hingga tahun 2023 sejumlah RM3.77 bilion telah diperuntukkan bagi melaksanakan 465 projek pembangunan di negeri Kedah. Sebanyak 147 projek berstatus pra pelaksanaan, 165 projek dalam pelaksanaan dan 153 projek pasca pelaksanaan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DR. MOHAMMED TAUFIQ BIN JOHARI
[SUNGAI PETANI]**

SOALAN

DR. MOHAMMED TAUFIQ BIN JOHARI [SUNGAI PETANI] minta **MENTERI EKONOMI** menyatakan perangkaan terkini butiran kategori pendapatan berkenaan isi rumah mengikut kategori B40, M40, T20 menurut pecahan tahun 2019, 2020, 2021 dan 2022 dan senaraikan menurut negeri.

JAWAPAN

Tuan Yang di-Pertua,

Untuk makluman Yang Berhormat, statistik terkini kategori kumpulan pendapatan adalah berdasarkan Survei Pendapatan, Perbelanjaan Isi Rumah dan Kemudahan Asas (HIES & BA) pada tahun 2019. Survei ini dilaksanakan oleh Jabatan Perangkaan Malaysia (DOSM) dengan kekerapan dua kali bagi setiap lima tahun. Survei terkini adalah pada tahun 2022 dan Laporan HIES & BA 2022 akan diterbitkan pada pertengahan tahun 2023.

Perincian bilangan isi rumah, had pendapatan, pendapatan isi rumah dan agihan pendapatan kumpulan isi rumah mengikut negeri adalah seperti di **Jadual 1** dan **Jadual 2**.

Jadual 1: Bilangan isi rumah mengikut kumpulan isi rumah dan negeri, Malaysia, 2019

Negeri	Tertinggi 20%	Pertengahan 40%	Terendah 40%
Bilangan isi rumah ('000)			
Malaysia	1,455.3	2,910.7	2,910.7
Johor	175.7	351.9	351.7
Kedah	99.5	199.1	199.1
Kelantan	69.1	138.2	138.2
Melaka	45.6	91.1	91.2
Negeri Sembilan	54.1	108.3	108.4
Pahang	69.8	139.5	139.5
Pulau Pinang	89.7	179.5	179.5
Perak	127.8	255.8	255.8
Perlis	11.8	23.5	23.5
Selangor	324.5	649.3	649.3
Terengganu	51.4	103.1	103.1
Sabah	102.6	205.3	205.3
Sarawak	125.0	250.2	250.2
W.P. Kuala Lumpur	96.9	193.7	193.7
W.P. Labuan	4.7	9.5	9.5
W.P. Putrajaya	6.5	13.1	13.1

Jadual 2: Had pendapatan kasar isi rumah bulanan mengikut kumpulan isi rumah dan negeri, Malaysia, 2019

Negeri	Had pendapatan (RM)		
	Tertinggi 20%	Pertengahan 40%	Terendah 40%
Malaysia	$\geq 10,960$	4,850 - 10,959	$< 4,850$
Johor	$\geq 10,880$	5,400 - 10,879	$< 5,400$
Kedah	$\geq 7,550$	3,710 - 7,549	$< 3,710$
Kelantan	$\geq 6,620$	3,030 - 6,619	$< 3,030$
Melaka	$\geq 10,730$	5,110 - 10,729	$< 5,110$
Negeri Sembilan	$\geq 9,300$	4,210 - 9,299	$< 4,210$
Pahang	$\geq 7,600$	3,900 - 7,599	$< 3,900$
Pulau Pinang	$\geq 10,680$	5,310 - 10,679	$< 5,310$
Perak	$\geq 7,640$	3,660 - 7,639	$< 3,660$
Perlis	$\geq 7,930$	3,870 - 7,929	$< 3,870$
Selangor	$\geq 14,440$	6,960 - 14,439	$< 6,960$
Terengganu	$\geq 9,260$	4,720 - 9,259	$< 4,720$
Sabah	$\geq 8,200$	3,490 - 8,199	$< 3,490$
Sarawak	$\geq 8,650$	3,720 - 8,649	$< 3,720$
W.P. Kuala Lumpur	$\geq 16,640$	9,150 - 16,639	$< 9,150$
W.P. Labuan	$\geq 11,390$	5,910 - 11,389	$< 5,910$
W.P. Putrajaya	$\geq 16,330$	8,650 - 16,329	$< 8,650$

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN JAWAB LISAN

**DARIPADA : DR. MOHAMMED TAUFIQ BIN JOHARI
[SUNGAI PETANI]**

SOALAN

DR. MOHAMMED TAUFIQ BIN JOHARI [SUNGAI PETANI] minta
MENTERI SUMBER MANUSIA menyatakan :

- (a)perangkaan terkini guna tenaga tidak penuh berkaitan kemahiran melibatkan warganegara berusia 24 tahun ke bawah serta jumlah terkini siswazah menganggur; dan
- (b)langkah menyeluruh yang diambil bagi menangani isu berbangkit.

JAWAPAN

Tuan Yang Di Pertua,

1. Berdasarkan Laporan Survei Tenaga Buruh oleh Jabatan Perangkaan Malaysia, guna tenaga tidak penuh berkaitan kemahiran adalah merujuk kepada golongan yang mempunyai pendidikan tertiar dan bekerja dalam kategori separuh mahir dan berkemahiran rendah.

2. Pada suku tahun **ketiga 2022**, seramai **1.84 juta** orang direkodkan sebagai **guna tenaga tidak penuh** berkaitan kemahiran dengan kadar sebanyak 36.8%. Perincian mengikut kumpulan umur mendapati, sebanyak **18.7%** atau seramai **344.1 ribu** terdiri daripada mereka yang berumur **15 hingga 24 tahun** dengan **87.4%** merupakan **warganegara Malaysia**.

3. Manakala **kadar pengangguran siswazah** yang direkodkan bagi tahun **2021** adalah **4.1%** berbanding **4.4%** pada tahun **2020**. Dari segi bilangan siswazah menganggur pada tahun 2021 ialah seramai 197.4 ribu orang berbanding 202.4 ribu orang pada tahun 2020. Sebanyak **54.6% atau 107.7 ribu** siswazah menganggur memiliki **ijazah** manakala 45.4% atau 89.7 ribu adalah mereka yang memiliki **diploma**.

4. Bagi meningkatkan kadar penyertaan tenaga buruh serta mengurangkan kadar pengangguran khususnya di kalangan siswazah, Kerajaan telah mempergiatkan usaha mengadakan program melalui TalentCorp dengan fokus terhadap pembangunan kebolehpasaran dan kebolehkkerjaan bakat muda negara melalui melalui sinergi dan kerjasama merentasi kementerian, jabatan, agensi Kerajaan, pemain industri dan institusi pengajian tinggi awam/ swasta serta teknikal. Antara inisiatif tersebut ialah:

- (i) **Platform pemprofilan Mynext** dibangunkan untuk menganalisis penilaian psikometrik, penilaian 360 darjah pelaksanaan latihan industri (pelatih industri – majikan) dan intervensi solusi seperti

bimbingan Kerjaya (*coaching & mentoring*) serta peningkatan kemahiran bakat muda;

- (ii) **Program Latihan Industri Berstruktur Nasional (National Structured Internship Programme - MySIP)** pula bertindak sebagai penggalak kepada penyertaan dan penglibatan lebih banyak syarikat dan industri untuk melatih bakat muda negara dengan membuka lebih banyak peluang penempatan latihan industri berkualiti melalui insentif potongan cukai berganda;
- (iii) **Kolaborasi Industri-Akademia (*Industry-Academia Collaboration*)** berperanan dalam memastikan institusi supaya lebih proaktif melibatkan diri dalam intervensi industri berdasarkan keperluan dan tahap ketersediaan institusi tersebut melatih bakat muda; dan
- (iv) **Young Employable Student (YES): We Are Ready!** dibangunkan selaras dengan keperluan graduan dalam negara dengan diberi pendedahan dalam meningkatkan kemahiran *soft-skills*, pendedahan kerjaya awal, tips kebolehpasaran graduan, tips kerjaya dan kesedaran kerjaya, *self-branding*, *self-awareness*, kepimpinan, program kesukarelawan, program impak sosial, perancangan kerjaya dan peningkatan sendiri.

5. Kerajaan secara berterusan merangka dan melaksanakan pelbagai inisiatif merentasi kementerian dan agensi bagi membantu mengurangkan kadar pengangguran secara keseluruhannya termasuk di kalangan siswazah. Antara inisiatif yang dilaksanakan adalah seperti berikut:

- (i) Kementerian Sumber Manusia (KSM) melalui PERKESO telah menyediakan **platform MYFutureJobs** bagi menangani masalah ketidaksepadanan pekerjaan untuk siswazah selain memastikan peluang pekerjaan dikawal selia serta dibuka untuk semua golongan yang mencari pekerjaan. Portal berteknologi tinggi dan terkini ini membuat padanan pekerjaan berdasarkan kelayakan,

kemahiran, pengalaman, gaji dan lain-lain mengikut keperluan majikan (*job matching*);

- (ii) KSM menerusi Jabatan Tenaga Manusia, Jabatan Pembangunan Kemahiran, HRD Corp dan PERKESO turut aktif dalam menawarkan dan menyediakan pelbagai **program latihan semula (*re-skilling*)**, **program peningkatan kemahiran (*up-skilling*)** dan **pembelajaran sepanjang hayat (*life-long learning*)** yang menjadi instrumen penting dalam membantu golongan pekerja termasuk siswazah dilengkapi dengan kemahiran yang bersesuaian dan terkini. Menerusi inisiatif ini, siswazah berpeluang mendalami kemahiran berkaitan pekerjaan mereka atau kemahiran baharu sebagai persiapan mencari pekerjaan lain;
- (iii) Selain itu, Kementerian Sumber Manusia melalui HRD Corp juga telah menubuhkan **Placement Centre** yang berperanan sebagai platform untuk memadankan pekerja dengan peluang pekerjaan yang tersedia oleh majikan. Sehingga **31 Disember 2022**, sebanyak **44,109 peluang pekerjaan** tersedia melalui platform ini di mana lebih **7,000 pekerja telah berjaya** mendapat pekerjaan dalam **pelbagai sektor** seperti **Perkhidmatan, Perkilangan, Borong dan Runcit** serta lain-lain lagi. Daripada jumlah tersebut, sebanyak **60 peratus (4,200 pekerja)** adalah daripada golongan belia dan sebahagian besar mereka memperoleh gaji sebanyak **RM2,000** dan ke atas.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

**DARIPADA : DR. MOHAMMED TAUFIQ BIN JOHARI
(SUNGAI PETANI)**

SOALAN

DR. MOHAMMED TAUFIQ BIN JOHARI (SUNGAI PETANI) minta **MENTERI BELIA DAN SUKAN** menyatakan program-program pembangunan insan yang telah dilaksanakan menurut negeri dan apakah matlamat program-program tersebut.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Belia dan Sukan (KBS) komited dan cakna dalam membangunkan insan selari dengan Dasar Belia Malaysia; Pelan Strategik KBS 2021 – 2025 serta Pelan Strategik JBSN 2021 – 2025. Dalam usaha mendepani pembangunan insan belia di negara ini KBS memfokuskan kepada empat teras iaitu pembangunan ekonomi; pembangunan kepimpinan; pembangunan sosial dan pengantarabangsaan belia.

Pada tahun 2022, sebanyak 27 program telah dilaksanakan KBS merangkumi 508 aktiviti dengan penyertaan seramai 3,286,695 orang peserta. Antara pelaksanaan program tersebut adalah seperti, Hari Belia Negara; Majlis Perundingan Belia; Parlimen Belia; Felo Perdana dan Felo Korporat; Youth Career; Social Entrepreneurship for Rural Youth (SERY); MyPreneur; SSEAYP Youth Conference; Program Pertukaran Belia Antarabangsa dan lain-lain lagi.

Matlamat utama pelaksanaan program – program ini adalah bertujuan untuk meningkatkan inisiatif pemeraksanaan agenda sosial belia di peringkat kebangsaan dan antarabangsa, menyediakan platform peluang dan penciptaan pekerjaan, mengupayakan pertubuhan belia, serta menyediakan program keilmuan dan latihan melalui kerjasama pintar pelbagai pihak berkepentingan.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN DR. TAUFIQ JOHARI
[SUNGAI PETANI]**

SOALAN

Dr. Mohammed Taufiq bin Johari [Sungai Petani] minta **MENTERI DALAM NEGERI** menyatakan adakah Kerajaan akan memastikan pendaftaran semua warga asing yang tidak berdokumen yang berada di dalam negeri dan memberikan peluang kepada mereka untuk menyumbang tenaga kerja terutama kepada sektor perladangan dan pembinaan.

JAWAPAN

Tuan Yang Di Pertua,

Untuk makluman Ahli Yang Berhormat, Kerajaan telah memperkenalkan Pelan Rekalisasi Pendatang Asing Tanpa Izin (PATI) yang bertujuan untuk menyelaraskan pendaftaran PATI melalui pendaftaran maklumat oleh PATI dan majikan yang terlibat. Pelan tersebut yang mula dilaksanakan pada 16 November 2020 pada asalnya mensasarkan pemulihan semula sektor ekonomi negara di samping membendung penularan pandemik COVID-19 di dalam negara.

PATI yang melakukan kesalahan tidak memiliki dokumen perjalanan yang sah, tinggal lebih masa dan menyalahgunakan pas boleh digajikan secara sah oleh majikan di bawah Program Rekalisasi Tenaga Kerja (RTK) yang merupakan salah satu komponen Pelan Rekalisasi PATI. Sehingga 31 Disember 2022, seramai 418,649 orang PATI telah berdaftar di bawah RTK melibatkan 30,137 majikan. Kutipan hasil yang dijana oleh Kerajaan melalui bayaran Fi Rekalisasi, levi, pas, visa dan proses adalah berjumlah RM784,537,937.00.

Bagi menyokong keperluan industri untuk beroperasi pada tahap optimum tercapai, Kerajaan pada 10 Januari 2023 antara lain telah bersetuju untuk melanjutkan pelaksanaan RTK di bawah Pelan Rekalisasi PATI 2.0 dengan syarat-syarat yang ditambah baik. Terkini, semua sektor penggajian pekerja asing akan dibuka kecuali sektor beku. Selain itu, JIM juga tidak akan mengenakan wang cagaran ketika pendaftaran berbanding pelaksanaan RTK terdahulu.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' MOHD ISAM BIN MOHD ISA
[TAMPIN]**

SOALAN

DATO' MOHD ISAM BIN MOHD ISA [TAMPIN] minta **MENTERI PENDIDIKAN** menyatakan perancangan untuk memperkasakan semula subjek vokasional di sekolah harian biasa seperti Program Vokasional Menengah Atas (PVMA) dan Mata Pelajaran Vokasional (MPV) supaya murid peringkat menengah atas yang tidak berminat dengan pembelajaran akademik boleh didorong dengan jurusan kemahiran tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk memperkasakan Program Vokasional Menengah Atas (PVMA) dan Mata Pelajaran Vokasional (MPV) di sekolah menengah kebangsaan (SMK) bagi murid peringkat menengah atas yang berkecenderungan dalam bidang kemahiran.

Untuk makluman Ahli Yang Berhormat, KPM telah melaksanakan dwi persijilan iaitu Sijil Pelajaran Malaysia (SPM) dan Sijil Kemahiran Malaysia (SKM) untuk meningkatkan laluan kerjaya yang lebih luas dan jelas bagi murid PVMA sejak tahun 2015.

Manakala bagi MPV pula, mulai tahun 2020 KPM telah melaksanakan Kurikulum Standard Sekolah Menengah (KSSM) yang menerapkan elemen teknologi terkini selari dengan Pendidikan Sains, Teknologi, Kejuruteraan dan Matematik (STEM) dan revolusi perindustrian.

Sekian, terima kasih.

RT33

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)
DARIPADA : DATO' MOHD ISAM BIN MOHD ISA
[TAMPIN]

SOALAN

DATO' MOHD ISAM BIN MOHD ISA [TAMPIN] minta **MENTERI
PERTANIAN DAN KETERJAMINAN MAKANAN** minta menyatakan statistik semasa golongan belia yang berkecimpung dalam bidang pertanian, penternakan dan perikanan mengikut pecahan negeri serta mekanisma baharu untuk memperkasa Program Agropreneur Muda (PAM) agar dapat menyokong Pelan Tindakan Dasar Sekuriti Makanan 2021 - 2025.

JAWAPAN

Tuan Yang Dipertua,

Untuk makluman Ahli Yang Berhormat, Program Agropreneur Muda (PAM) yang mula diperkenalkan sejak tahun 2016 menumpukan kepada empat skop utama bidang pertanian iaitu penanaman, penternakan, perikanan dan industri asas tani. Melalui pemberian Geran Agropreneur Muda (GAM) di bawah PAM, ia telah memanfaatkan seramai 8,403 golongan belia atau usahawan muda seramai 3,238 orang usahawan terlibat dalam bidang tanaman, 683 orang dalam bidang perikanan, 1,632 orang dalam bidang ternakan dan 2,850 orang dalam bidang industri asas tani.

Bagi memperkasa PAM seiring dengan Pelan Tindakan Dasar Sekuriti Makanan Negara 2021-2025, KPKM akan terus memperkukuhkan perancangan untuk sentiasa menambahbaik pelaksanaan program ini. Antara mekanisme baharu yang akan diperkenalkan ialah permohonan GAM secara atas talian yang bertujuan untuk mempercepatkan proses permohonan.

Adalah menjadi harapan KPKM agar pelaksanaan PAM akan dapat menarik lebih ramai penglibatan golongan belia dalam sektor pertanian. Di samping membantu untuk meningkatkan pendapatan, penglibatan golongan muda dalam sektor pertanian dan agromakanan ini juga boleh menyumbang untuk memacu pertumbuhan ekonomi dan sosial negara dan menyokong agenda keterjaminan makanan negara.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : DATO' MOHD ISAM BIN MOHD ISA [TAMPIN]

SOALAN

YB DATO' MOHD ISAM BIN MOHD ISA [TAMPIN] minta **MENTERI PEMBANGUNAN KERAJAAN TEMPATAN** menyatakan inisiatif terkini bagi meningkatkan kemampuan pemilikan rumah pertama terhadap individu yang tergolong dalam kumpulan isi rumah 40 peratus terendah (B40), khususnya belia.

JAWAPAN

Tuan Yang di-Pertua,

Untuk makluman Ahli Yang Berhormat, bagi membantu pembeli rumah pertama, Kementerian Pembangunan Kerajaan Tempatan (KPKT) telah melaksanakan inisiatif-inisiatif seperti berikut:

- (1) mengadakan kerjasama dengan Kementerian Kewangan melancarkan Inisiatif Pembiayaan Perumahan Malaysia (i-Biaya). Salah satu inisiatif di bawahnya adalah Skim Jaminan Kredit Perumahan (SJKP) iaitu pembiayaan perumahan tanpa perlu membayar wang pendahuluan yang ditawarkan kepada golongan yang tidak mempunyai pendapatan tetap atau kumpulan gig ekonomi; dan
- (2) melaksanakan inisiatif i-Miliki yang melibatkan pemberian insentif pengecualian sepenuhnya duti setem ke atas surat cara pindah milik dan perjanjian pinjaman bagi rumah bernilai RM500,000 ke bawah dan pengecualian duti setem sebanyak 75 peratus (75%) untuk rumah bernilai RM500,000 sehingga RM 1 juta bagi pemilikan rumah pertama.

Untuk makluman Ahli Yang Berhormat, KPKT telah memperkenalkan program perumahan sewa beli atau Skim *Rent-To-Own* (RTO) untuk golongan B40 iaitu **RTO Program Perumahan Rakyat (PPR)**. Skim RTO PPR telah diperkenalkan pada tahun 2017 dan merupakan skim pembiayaan mudah khusus bagi membantu pemilikan rumah golongan berpendapatan B40 yang telah ditawarkan unit PPR tapi gagal mendapatkan pembiayaan daripada mana-mana institusi kewangan. Skim RTO PPR telah dilaksanakan di 14 PPR di seluruh negara yang melibatkan 6,166 unit rumah. Sehingga 31 Januari 2023, sebanyak 4,690 keluarga telah ditawarkan skim RTO PPR di seluruh negara.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : DATO' MOHD ISAM BIN MOHD ISA [TAMPIN]

SOALAN

DATO' MOHD ISAM BIN MOHD ISA [TAMPIN] minta **MENTERI PERDAGANGAN DALAM NEGERI DAN KOS SARA HIDUP** menyatakan pelan jangka pendek, sederhana dan panjang bagi mempersiapkan rakyat untuk mendepani isu kos sara hidup yang dijangka bakal lebih serius bermula tahun ini.

JAWAPAN

Yang di-Pertua,

Menangani kos sara hidup secara tuntas dan menyeluruh merupakan satu usaha berterusan dan panjang. Kos sara hidup bukan hanya masalah ekonomi tetapi terdapat cabaran yang melibatkan pelbagai dimensi termasuklah yang bersifat struktural. Dalam hubungan ini, inisiatif yang dirangka oleh Majlis Tindakan Sara Hidup Negara (NACCOL) yang dipengerusikan YAB Perdana Menteri akan menumpukan kepada strategi serampang dua mata pertama adalah menangani kenaikan harga barangan dan perkhidmatan dan kedua adalah dengan meningkatkan pendapatan rakyat. Secara realitinya kos sara hidup timbul kerana kuasa beli rakyat tidak dapat menampung perbelanjaan.

Menyedari bahawa isu kos sara hidup ini merentasi bidang tugas banyak Kementerian dan agensi maka selaras dengan nama Kementerian Perdagangan Dalam Negeri dan Kos Sara Hidup (KPDN), kementerian ini diberikan kuasa untuk melaksanakan tanggungjawab berkaitan kos sara hidup dengan lebih efektif dan efisien dan mendukung pendekatan keseluruhan Kerajaan (*whole of government approach*). Tanggungjawab KPDN bukan lagi hanya bersifat keurusetiaan dan penyelarasan semata-mata malah bertindak untuk mengkaji serta menganalisa kesan dan implikasi pelaksanaan polisi dan program Kerajaan terhadap kos sara hidup rakyat.

Tiga (3) cabaran NACCOL dalam usaha untuk menangani kos sara hidup adalah pemberian subsidi secara bersasar, ketirisan subsidi dan kenaikan harga barangan yang didorong oleh faktor luaran. Pada ketika ini sedang berlangsung Makmal Kos Sara Hidup: Subsidi Bersasar yang dikendalikan oleh KPDN bersama Kementerian Kewangan dan Kementerian Ekonomi bagi menetapkan kumpulan penerima faedah subsidi bersasar, keperluan atau barangan yang akan disubsidikan oleh Kerajaan serta mekanisme untuk melaksanakan subsidi secara bersasar. Kerajaan Perpaduan ingin memberi jaminan bahawa kumpulan yang paling terkesan dengan kos sara hidup akan menjadi penerima bantuan subsidi yang paling utama. Mekanisme pemberian subsidi yang lebih terkawal seperti penggunaan teknologi dan sistem ICT akan memastikan ketirisan subsidi dapat dibendung. Ini merupakan kaedah proaktif

Kerajaan selain meneruskan usaha-usaha penguatkuasaan oleh Bahagian Penguatkuasaan KPDN.

Sebagai makluman Inisiatif RAHMAH di bawah perancangan jangka pendek yang diambil oleh KPDN adalah Program Payung Rahmah bagi membantu terutamanya kumpulan berpendapatan rendah untuk mendapatkan barangan keperluan asas. Program ini telah dilaksanakan secara berperingkat bermula pada awal bulan ini. Terdapat lima (5) inisiatif di bawah program ini :

PERTAMA : Bakul Rahmah iaitu inisiatif yang menyasarkan sumbangan berbentuk bakul makanan (keperluan harian) bernilai RM100. Barangan keperluan yang dikenalpasti adalah beras, gula, minyak masak, tepung, susu pekat, mihun dan telur yang akan disumbangkan oleh rakan strategik kepada kumpulan miskin tegar secara berterusan pada setiap bulan. Program ini bukan hanya akan menyediakan bantuan barangan tetapi juga peluang pekerjaan bagi mereka yang layak;

KEDUA : Jualan Rahmah iaitu inisiatif program jualan murah sepanjang tahun 2023 oleh pasaraya besar dan pasaraya. Untuk tujuan ini KPDN akan memberi permit Notis Jualan Murah (NJM) bagi Jualan Rahmah sehingga maksimum 4 bulan berbanding 1 bulan pada masa sekarang;

KETIGA : Pakej Rahmah iaitu inisiatif yang menyokong Jualan Rahmah yang mana pasaraya besar dan pasaraya menyediakan beberapa barangan keperluan asas berbentuk pakej. Barangan keperluan dalam pakej berkenaan adalah bernilai RM70 namun pakej tersebut akan dijual kepada pengguna pada harga RM50 sahaja;

KEEMPAT : Kafe Rahmah yang bertujuan untuk menyediakan makanan yang dijual pada harga yang berpatutan kepada penuntut IPTA serta memberikan hidangan makanan percuma kepada penuntut Institusi Pengajian Tinggi Awam (IPTA) dari keluarga berpendapatan rendah; dan

KELIMA : Menu Rahmah yang sedang hangat diperkatakan sekarang iaitu inisiatif pengusaha-pengusaha makanan secara sukarela untuk menawarkan makanan pada harga RM5 bagi setiap hidangan. Menu Rahmah bertujuan untuk memastikan terutamanya golongan

berpendapatan rendah mendapat akses kepada pilihan harga yang mampu bayar.

Di samping itu juga, KPDN akan meneruskan program sedia ada yang memberi impak tinggi dalam membantu kos sara hidup rakyat iaitu Program Penyeragaman Harga tujuh (7) barangan asas iaitu beras putih, gula, minyak masak 1kg, tepung gandum, LPG, petrol RON95 dan diesel supaya bekalan barangan tersebut sampai kepada penduduk di kawasan luar bandar/ pedalaman Semenanjung, Sabah dan Sarawak pada harga kawalan sama dengan kawasan bandar melalui subsidi pengangkutan yang dibayar Kerajaan.

KPDN juga mengorak langkah dalam inisiatif jangka masa sederhana dan panjang melalui inisiatif DAYA supaya kumpulan sasar Kementerian dapat menjana pendapatan di dalam sektor perdagangan dan pengedaran. Melalui program baharu yang dikenali sebagai **Rezeki Suri**, akan memberi peluang kepada suri rumah untuk menambahkan pendapatan dengan menjalankan perniagaan bahan keperluan asas dari rumah. KPDN juga akan meneruskan **Program Pembangunan Francais Mikro dan Francais Mampu Milik** bagi membantu golongan M40 dan B40 menjadi usahawan dengan menceburi bidang francais. Memandangkan potensi dan pendapatan besar yang boleh disumbangkan oleh bidang francais kepada pendapatan rakyat dan negara maka KPDN turut memohon peruntukan yang lebih besar bagi program ini untuk tahun 2023.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

**DARIPADA : DATO' MOHD ISAM BIN MOHD ISA
[TAMPIN]**

SOALAN

DATO' MOHD ISAM BIN MOHD ISA [TAMPIN] minta **MENTERI SUMBER MANUSIA** menyatakan perancangan penambahbaikan bagi memperkasa golongan pekerja lepasan latihan Pendidikan Teknikal dan Latihan Vokasional (TVET) agar lebih berdaya saing serta dapat mengubah stigma masyarakat terhadap bidang tersebut.

JAWAPAN

Tuan Yang di-Pertua,

1. Pelaksanaan program Pendidikan dan Latihan Teknikal dan Vokasional (TVET) penting dalam membantu kerajaan membangunkan tenaga kerja mahir yang diperlukan industri. TVET merupakan satu proses pendidikan dan latihan yang mempunyai hala tuju pekerjaan dengan penekanan utama terhadap amalan industri. Dalam usaha meningkatkan kompetensi dan kebolehpasaran graduan TVET, penyedia TVET turut secara berterusan membuat penambahbaikan terhadap kurikulum dan pendekatan latihan bagi memastikan ia relevan dengan keperluan semasa industri.
2. Selain itu, pelajar TVET bagi sesetengah bidang turut dilengkapi dengan persijilan profesional yang memberikan nilai tambah kepada pengetahuan dan kemahiran ikhtisas dalam melaksanakan tugas tertentu. Persijilan profesional seperti *CISCO Certified Network Associate (CCNA)* dalam bidang teknologi computer rangkaian, *CSWIP 3.0 Welding Inspector* dalam bidang kimpalan, dan *Autodesk Certified Professional* dalam bidang rekabentuk berbantu computer dapat mempertingkatkan kemahiran yang khusus dalam bidang pekerjaan yang berkaitan.
3. Kerajaan turut memberi penekanan terhadap pelaksanaan program peningkatan kemahiran (*upskilling*) dan latihan semula (*reskilling*) di kalangan tenaga kerja sedia ada. Menerusi program ini, pekerja berpeluang untuk menambah baik dan mempertingkatkan kemahiran mereka agar selari dengan perubahan teknologi yang dinamik.
4. Kementerian Sumber Manusia telah menerbitkan buku Panduan Gaji Permulaan 200 Pekerjaan Terpilih Berasaskan Kemahiran, Edisi Kedua (Tahun 2020) sebagai langkah berterusan Kementerian bagi menyokong strategi memperkukuh penjenamaan dan profil TVET di Malaysia. Buku panduan ini dapat menjadi rujukan dan asas kepada majikan dalam melaksanakan gaji permulaan yang disyorkan kepada graduan TVET berdasarkan tahap kemahiran, dan sekaligus mampu meningkatkan motivasi dan produktiviti pekerja di negara ini.
5. Bagi meningkatkan penerimaan masyarakat terhadap TVET, kerajaan mengambil langkah proaktif melalui program *outreach* yang lebih agresif berkenaan dengan prospek program TVET termasuk penyampaian maklumat

SOALAN NO: 308

berkenaan kebolehpasaran pekerjaan yang tinggi bagi membolehkan lebih ramai golongan muda memilih bidang kemahiran ini.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : TUAN HAJI MOHD MISBAHUL MUNIR BIN
MASDUKI [PARIT BUNTAR]**

SOALAN

**TUAN HAJI MOHD MISBAHUL MUNIR BIN MASDUKI
[PARIT BUNTAR]** minta **MENTERI EKONOMI** menyatakan perbandingan
hasil pendapatan kepada negara antara sektor pertanian dengan sektor
industri dari tahun 1990 – 2022

JAWAPAN

Tuan Yang di-Pertua,

Untuk makluman Ahli Yang Berhormat, ekonomi Malaysia telah berkembang pesat sejak empat dekad yang lalu walaupun berhadapan dengan beberapa krisis ekonomi. Dalam tempoh 1990 hingga 2022, ekonomi negara telah berkembang secara purata sebanyak 5.4% setahun. Prestasi pertumbuhan yang berterusan ini diiringi dengan perubahan struktur yang ketara bagi lima sektor utama ekonomi. Transformasi ekonomi ini berlaku berikutan dasar yang dilaksanakan oleh Kerajaan dan keadaan persekitaran ekonomi global yang berubah-ubah telah turut mempengaruhi ekonomi dalam negara.

Malaysia bermula dengan ekonomi berasaskan kepelbagaian komoditi pada tahun 1960-an dan 1970-an seiring dengan peningkatan permintaan getah, minyak sawit dan minyak mentah di peringkat global. Namun, dasar negara telah beralih kepada sektor perindustrian atau pembuatan pada tahun 1980-an untuk mengurangkan kebergantungan sektor berasaskan komoditi dan meningkatkan nilai ditambah aktiviti ekonomi hiliran. Semenjak tahun 2000, tumpuan Kerajaan mula beralih kepada sektor perkhidmatan. Bagi menyokong kepada peningkatan nilai rantai global dalam sektor perkhidmatan dan pembuatan, Kerajaan memberi tumpuan untuk memperkuat infrastruktur, fizikal dan digital. Kerajaan juga melancarkan inisiatif Koridor Raya Multimedia (MSC) untuk mendorong Malaysia menjadi sebuah ekonomi berasaskan pengetahuan.

Dalam tempoh 1990 hingga 2022, sektor pertanian telah meningkat sebanyak 1.7% setahun, manakala sektor pembuatan berkembang lebih tinggi sebanyak 6.4% setahun. Sektor pertanian telah menyumbang sebanyak RM57.4 bilion atau 19.8% kepada keluaran dalam negeri kasar (KDNK) pada tahun 1990, manakala sektor pembuatan menyumbang sebanyak RM54.1 bilion atau 18.6% kepada KDNK. Walaupun sumbangan sektor pertanian telah berkurangan kepada 6.6% pada tahun 2022, namun dari segi nilai, sektor pertanian telah meningkat kepada RM98.9 bilion, iaitu berkembang hampir dua kali ganda berbanding tahun 1990. Sektor pembuatan pula telah berkembang lebih enam kali ganda dalam tempoh

1990 hingga 2022 dengan nilai sebanyak RM364.5 bilion pada tahun 2022. Jika dilihat kepada subsektor dalam sektor pembuatan pula, industri berasaskan pertanian telah berkembang pada kadar 3.7% dengan sumbangan sebanyak 19.8% kepada sektor pembuatan.

Pada masa sekarang, tumpuan diberikan untuk memperkembangkan sektor perkhidmatan dan pembuatan sebagai sumber pertumbuhan ekonomi. Penekanan turut diberikan bagi memastikan sektor pembuatan beralih kepada industri yang mempunyai nilai ditambah yang tinggi serta berteknologi tinggi. Pada tahun 2022, sektor perkhidmatan merupakan sektor terbesar yang menyumbang sebanyak 58.2% kepada KDNK. Sektor kedua terbesar pula adalah sektor pembuatan yang menyumbang sebanyak 24.2%, diikuti oleh sektor pertanian (6.6%), sektor perlombongan dan pengkuarian (6.4%) dan sektor pembinaan (3.5%).

Walaupun tumpuan diberikan kepada sektor perkhidmatan dan pembuatan, namun sektor pertanian masih lagi penting dan akan terus disokong dengan meningkatkan penerimgunaan pendigitalan menerusi pertanian pintar. Usaha ini akan membolehkan hasil pengeluaran yang lebih tinggi dan mampan serta peningkatan produktiviti bagi menjamin bekalan makanan negara mencukupi.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN MOHD MISBAHUL MUNIR MASDUKI
[PARIT BUNTAR]**

SOALAN

Tuan Haji Mohd Misbahul Munir bin Masduki [Parit Buntar] minta **MENTERI DALAM NEGERI** menyatakan jumlah rakyat Malaysia sekarang yang terlibat dengan penyalahgunaan dadah mengikut pecahan kaum, jantina dan umur.

JAWAPAN

Tuan Yang Di Pertua,

Dari Januari 2019 hingga Disember 2022, jumlah penagih dadah mengikut pecahan kaum, jantina dan umur adalah seperti berikut:

STATISTIK PENAGIH DADAH MENGIKUT KAUM, 2019-2022				
	2022	2021	2020	2019
Jumlah	23,188	17,987	20,313	25,809
Melayu	18,829	14,817	16,750	20,586
India	1,555	1,016	1,092	1,534
Cina	1,192	1,082	1,267	1,766
Pribumi Sabah	702	628	810	1,354
Pribumi Sarawak	520	298	267	301
Lain-lain	390	146	127	268

STATISTIK PENAGIH DADAH MENGIKUT JANTINA, 2019-2022				
	2022	2021	2020	2019
Jumlah	23,188	17,987	20,313	25,809
Lelaki	22,184	17,058	19,352	24,682
Perempuan	1,004	929	961	1,127

STATISTIK PENAGIH DADAH MENGIKUT UMUR, 2019-2022				
	2022	2021	2020	2019
Jumlah	23,188	17,987	20,313	25,809
Remaja (13-18 tahun)	224	268	323	436
Belia (19-39 tahun)	7,305	13,100	14,850	18,806
Dewasa (≥40 tahun)	15,659	4,619	5,140	6,567

PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS

PERTANYAAN : BUKAN LISAN

**DARIPADA : TUAN HAJI MOHD MISBAHUL MUNIR
BIN MASDUKI [PARIT BUNTAR]**

SOALAN

Minta **Perdana Menteri** menyatakan menyatakan jumlah orang Islam yang murtad kerana memeluk agama lain dan nyatakan agama apakah yang dianuti.

JAWAPAN

YB SENATOR DATO' SETIA DR. HAJI MOHD NAI'IM BIN HAJI MOKHTAR
MENTERI DI JABATAN PERDANA MENTERI (HAL EHWAL AGAMA)

Tuan Yang di-Pertua,

1. Untuk maklumat Ahli yang Berhormat, berdasarkan statistik yang dikeluarkan Jabatan Kehakiman Syariah Malaysia (JKSM), sebanyak **1979** permohonan pengisytiharan status agama telah yang diterima oleh mahkamah syariah dari seluruh Malaysia dari tahun 2013 hingga 2023 mengikut pecahan seperti berikut:

Negeri	2013	2014	2015	2016	2017	2018	2019	2020	2021	2022	2023	Jumlah
Johor	4	0	2	2	3	2	6	2	1	4	1	27
Kedah	1	3	7	4	3	2	5	8	2	2	0	37
Melaka	4	0	2	2	2	6	3	1	2	5	2	29
Negeri Sembilan	25	25	17	24	19	25	34	13	9	18	2	211
Pahang	0	3	2	1	2	0	1	3	1	1	0	14
Perak	20	16	31	16	29	19	29	19	21	16	0	216
Perlis	0	1	2	1	1	0	1	0	0	0	0	6
Pulau Pinang	5	3	3	2	5	8	6	10	10	2	1	55
Sabah	8	8	4	67	94	108	102	63	36	77	11	578
Sarawak	0	0	0	0	0	0	47	9	0	0	0	56
Selangor	34	36	68	71	70	61	69	48	48	46	3	554
Terengganu	2	0	0	0	0	0	0	0	0	0	0	2
Wilayah Persekutuan	28	13	24	25	23	28	14	9	15	15	0	194
Jumlah	131	108	162	215	251	259	317	185	145	186	20	1,979

2. Namun yang demikian, maklumat pertukaran agama dari agama Islam kepada agama yang lain adalah di bawah bidang kuasa Jabatan Pendaftaran Negara (JPN).

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN HAJI MOHD MISBAHUL MUNIR BIN
MASDUKI [PARIT BUNTAR]**

SOALAN

Tuan Haji Mohd Misbahul Munir bin Masduki [Parit Buntar] minta **MENTERI DALAM NEGERI** menyatakan jumlah pekerja-pekerja asing terkini yang masih bekerja di Malaysia mengikut pecahan berdasarkan negara asal mereka.

JAWAPAN

Tuan Yang Di Pertua,

Untuk makluman Ahli Yang Berhormat, sehingga 08 Mac 2023, Jabatan Imigresen Malaysia merekodkan jumlah pekerja asing aktif yang memegang Pas Lawatan (Kerja Sementara) (PLKS) adalah seramai **1,549,725** orang.

Daripada jumlah keseluruhan **1,549,725** pekerja asing tersebut, warganegara Bangladesh mencatatkan jumlah tertinggi iaitu **455,434** orang diikuti oleh warganegara Indonesia seramai **415,375**, warganegara Nepal seramai **310,995** orang, warganegara Myanmar seramai **140,102** orang dan warganegara India seramai **87,195** orang. Baki seramai **140,624** orang terdiri daripada warganegara Pakistan, Filipina, Vietnam, Thailand, Sri Lanka, Kemboja, Laos, Uzbekistan dan Kazakhstan.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN MOHD MISBAHUL MUNIR MASDUKI
[PARIT BUNTAR]**

SOALAN

Tuan Haji Mohd Misbahul Munir bin Masduki [Parit Buntar] minta **MENTERI DALAM NEGERI** menyatakan statistik terkini bilangan anak tidak sah taraf mengikut pecahan negeri-negeri daripada tahun 2010 hingga 2022.

JAWAPAN

Tuan Yang Di Pertua,

Statistik kelahiran Anak Tak Sah Taraf (ATST) dalam tempoh lima tahun mulai 2010 sehingga 2022 adalah seperti di berikut:-

LAMPIRAN A

**STATISTIK PENDAFTARAN KELAHIRAN ANAK TIDAK SAH TARAF
MENGIKUT NEGERI DAFTAR DAN TAHUN
2010 - 2022**

NEGERI	2010	2011	2012	2013	2014	2015	2016	2017	2018	2019	2020	2021	2022	JUMLAH
JOHOR	2,629	3,022	3,414	2,916	2,806	2,682	2,640	2,407	2,341	2,124	2,171	2,063	1,785	33,000
KEDAH	866	858	1,020	909	1,027	1,140	1,150	1,072	950	886	928	918	916	12,640
KELANTAN	629	574	548	598	580	564	567	554	547	532	516	475	550	7,234
MELAKA	551	545	532	518	504	443	431	421	425	372	409	298	289	5,738
NEGERI SEMBILAN	978	1,042	1,023	934	890	842	648	651	666	599	660	582	487	10,002
PAHANG	978	1,080	1,224	1,126	1,150	911	811	730	700	704	626	648	604	11,292
PERAK	1,617	1,881	1,779	1,696	1,672	1,586	1,297	1,240	1,236	1,116	1,032	1,117	880	18,149
PERLIS	107	125	157	155	188	228	136	141	125	116	115	146	127	1,866
PULAU PINANG	849	834	900	859	1,015	976	830	755	688	597	955	1,068	1,026	11,352
SABAH	6,965	10,466	13,079	12,967	12,093	9,833	9,132	9,100	9,831	10,703	7,998	8,977	9,805	130,949
SARAWAK	1,587	1,744	1,861	1,872	1,745	1,800	1,749	1,715	1,565	1,459	1,335	1,021	871	20,324
SELANGOR	3,371	4,070	4,373	4,053	3,604	3,150	2,762	2,528	2,237	2,305	2,128	2,729	2,307	39,617
TERENGGANU	297	412	525	471	417	476	463	378	426	410	440	339	292	5,346
W.P. KUALA LUMPUR	2,268	2,569	2,388	2,561	2,829	2,630	2,072	1,667	1,452	1,427	1,242	1,333	1,702	26,140
W.P. LABUAN	157	234	262	289	268	266	195	163	157	170	180	206	144	2,691
W.P. PUTRAJAYA	500	654	846	802	626	572	536	518	626	486	540	534	555	7,795
JUMLAH	24,349	30,110	33,931	32,726	31,414	28,099	25,419	24,040	23,972	24,006	21,275	22,454	22,340	344,135

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN MOHD NAZRI BIN ABU HASSAN
[MERBOK]**

SOALAN

TUAN MOHD NAZRI BIN ABU HASSAN [MERBOK] minta **MENTERI PERTANIAN DAN KETERJAMINAN MAKANAN** menyatakan apakah langkah-langkah membangun, menyelaraskan dan menilai pelaksanaan Pelan Pengurusan Perikanan (FMP), Pelan Pengurusan Perikanan Melalui Pendekatan Ekosistem (EAFM) dan *National Plan of Action (NPOA)* bagi komponen pengurusan sumber perikanan khususnya di Sungai Merbok, Kedah.

JAWAPAN

Tuan Yang di-Pertua,

Kementerian Pertanian dan Keterjaminan Makanan (KPKM) sentiasa mempertingkatkan usaha dalam membangunkan, menyelaraskan dan menilai pelaksanaan pelan-pelan bagi komponen pengurusan sumber perikanan agar stok ikan di perairan negara diurus serta dipelihara dengan baik.

Kementerian kini sedang membangunkan Pelan Pengurusan Perikanan atau FMP (*Fisheries Management Plan*) mengikut kumpulan spesies ikan utama dan kawasan di seluruh negara termasuk Kedah bagi menambah baik pengurusan perikanan sedia ada. Penilaian pelaksanaan FMP akan dilakukan pada RMKe-13 setelah ia dilaksanakan sepenuhnya dalam tempoh RMKe-12.

Pengurusan Perikanan Melalui Pendekatan Ekosistem atau EAFM (*Ecosystem Approach to Fisheries Management*) merupakan satu kaedah praktikal untuk melaksanakan pembangunan sektor perikanan secara mampan bagi mengimbangi kesejahteraan ekologi dan kehidupan manusia melalui tadbir urus yang baik. Beberapa projek EAFM sedang dilaksanakan di Semenanjung Malaysia, Sarawak dan Sabah. Pulau Langkawi, Kedah telah dipilih sebagai projek perintis EAFM mengkhususkan kepada Gugusan Kepulauan Dangli yang melibatkan seramai 352 nelayan tradisional berlesen. Setakat ini, projek EAFM hanya ditumpukan kepada pengurusan ekosistem marin.

NPOA (*National Plan of Action*) bagi komponen pengurusan sumber perikanan merupakan suatu garis panduan di peringkat kebangsaan bagi pengurusan perikanan yang mampan. Pihak Kementerian melalui Jabatan Perikanan Malaysia (DOF) telah menerbitkan dan sedang melaksanakan program-program yang digariskan dalam beberapa NPOA pada skala nasional seperti NPOA *Illegal, Unregulated & Unreported (IUU) Fishing* dan NPOA *Fishing Capacity*. Penilaian terhadap pelaksanaan NPOA dijalankan secara berkala pada setiap 5 tahun.

Bagi pengurusan sumber perikanan di Sungai Merbok, sehingga kini tiada komponen pengurusan dilaksanakan oleh pihak Kementerian memandangkan pengurusan sungai adalah di bawah bidang kuasa Kerajaan Negeri.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN JAWAB LISAN

**DARIPADA : YB TUAN MOHD NAZRI BIN ABU HASSAN
[MERBOK]**

SOALAN

YB TUAN MOHD NAZRI BIN ABU HASSAN [MERBOK] minta **MENTERI PELANCONGAN, SENI DAN BUDAYA** menyatakan Tapak Arkeologi Sungai Batu telah diwartakan di dalam Majlis Pengistiharan Warisan Kebangsaan 2012. Apakah langkah yang berkaitan dengan perlindungan, pemeliharaan dan pemuliharaan dan sebarang usaha berkaitan.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Tapak Arkeologi Sungai Batu telah diisytiharkan sebagai Tapak Warisan Kebangsaan di bawah peruntukan Akta Warisan Kebangsaan 2005 [Akta 645]. Pengisytiharan ini merupakan satu bentuk perlindungan di bawah instrumen perundangan negara di peringkat nasional.

2. Kementerian Pelancongan, Seni dan Budaya (MOTAC) melalui agensinya Jabatan Warisan Negara (JWN) telah melaksanakan pelbagai langkah dan inisiatif dalam memastikan Tapak Arkeologi Sungai Batu terpelihara, terpelihara dan seterusnya berkembang maju dari masa ke semasa. Antara langkah dan usaha yang dilakukan adalah:

- i. menjalinkan kerjasama penyelidikan dan pembangunan dengan pihak Institusi Pengajian Tinggi. Sehingga kini, usaha penyelidikan dan pembangunan (R&D) diteruskan bagi melengkapkan data persejarahan Lembah Bujang khususnya di Sungai Batu agar ia terus berkembang maju dan terpelihara dengan kerjasama universiti tempatan terutamanya pihak Universiti Sains Malaysia (USM);
- ii. mengadakan program promosi, kesedaran dan penyebaran ilmu. Antara program yang telah dijalankan termasuk penganjuran persidangan antarabangsa '*The International Conference on Bujang Valley and Early Civilisations in Southeast Asia*' pada tahun 2010; Seminar *Kedah Tua International Conference 2016* pada tahun 2016; penganjuran Festival Kedah Tua pada tahun 2019 dan 2021. Antara pengisian di dalam program Festival Kedah Tua adalah Wacana Kedah Tua; Dokumentasi Khas Kedah Tua; Bual Bicara Kedah Tua; Pameran Maya 360° Tapak Sungai Batu, Kedah;

- iii. menerbitkan buku-buku yang menceritakan berkaitan tapak Sungai Batu dan Lembah Bujang seperti *Bujang Valley and Early Civilisations In Southeast Asia* (2011), Warisan Arkeologi Malaysia (2013), Jurnal Warisan (2016) dan Bicara Arkeologi (2019); dan
 - iv. mengadakan pameran-pameran berkaitan Sungai Batu, Lembah Bujang di beberapa tempat termasuk pameran di Karnival Lenggong, Hari UNESCO Malaysia dan sebagainya.
 - v. melaksanakan usaha untuk mencalonkan Tapak Arkeologi Sungai Batu ke Peringkat UNESCO. Pihak Kementerian melalui Jabatan Warisan Negara telah mengadakan perbincangan dengan pakar-pakar dari universiti tempatan sejak Mac 2018. Namun begitu, tapak arkeologi sungai batu dan Lembah Bujang memerlukan kajian lanjut bagi memenuhi kriteria serta mempunyai *Outstanding Universal Value* (nilai keunggulan sejagat) seperti yang telah dinyatakan dalam *UNESCO Operational Guidelines*; dan
 - vi. pelaksanaan kerja-kerja pembangunan di tapak arkeologi Sungai Batu yang meliputi kerja-kerja naik taraf kemudahan pelancongan di tapak arkeologi sungai batu dan kerja-kerja berkaitan.
3. Pada tahun 2022, MOTAC telah membuat perancangan untuk melaksanakan program perintis Pemandu Pelancong Tapak Warisan dan telah memilih tapak arkeologi Sungai Batu, Lembah Bujang sebagai projek rintis untuk program ini. Objektif program ini antara lain adalah untuk mempelbagaikan kaedah individu melancong dan mempelbagaikan fungsi lesen pemandu pelancong. Ini secara tidak langsung dapat mempromosikan tapak arkeologi Sungai Batu dan seterusnya merancakkan sektor pelancongan bukan sahaja dalam negara tetapi juga di luar negara.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN MOHD NAZRI BIN ABU HASSAN
(MERBOK)**

SOALAN

**TUAN MOHD NAZRI BIN ABU HASSAN [MERBOK] minta MENTERI
KERJA RAYA menyatakan :**

- (a) terangkan status terkini rancangan jambatan kedua jalan raya Semeling (K167) dan nyatakan masalah dan halangan yang menyebabkan projek tersebut masih tidak dilaksanakan; dan
- (b) kemukakan kajian dan cadangan untuk menangani masalah kesesakan lalu lintas jalan raya Semeling (K167).

JAWAPAN

Tuan Yang Di-Pertua,

(a)

Untuk makluman Ahli Yang Berhormat, jalan tersebut telah diwartakan sebagai Jalan Persekutuan : Jalan Sungai Layar / Semeling (FT270) pada 15 Januari 2019.

Kementerian ini telah mengangkat cadangan Menaiktaraf Jalan Dan Jambatan Laluan FT 270, Sg. Layar – Semeling, Daerah Kuala Muda, Kedah Darul Aman.pada *Rolling Plan 3* (RP3), Rancangan Malaysia Kedua Belas (RMKe-12) untuk pertimbangan Agensi Pusat. Kelulusan bagi cadangan projek ini tertakluk kepada pertimbangan Agensi Pusat berdasarkan keutamaan dan kedudukan kewangan Kerajaan.

(b)

Untuk makluman Ahli Yang Berhormat, laluan ini merupakan salah satu laluan yang telah dikenalpasti dalam kajian Pelan Pembangunan Rangkaian Jalan Raya 2030 atau *Highway Network Development Plan 2030* (HNDP 2030) untuk dinaiktaraf bagi menampung pertambahan kenderaan yang melalui laluan tersebut. Kementerian ini telahpun mengambil tindakan sewajarnya dengan mengangkat cadangan menaiktaraf laluan ini dalam RP3, RMKe-12.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN MOHD NAZRI BIN ABU HASSAN
[MERBOK]**

SOALAN

TUAN MOHD NAZRI BIN ABU HASSAN [MERBOK] minta **MENTERI PENGANGKUTAN** menyatakan usaha Kementerian untuk melindungi hak pengguna penerbangan termasuk penerbangan yang terpaksa ditangguhkan dan cadangan pindaan terhadap Kod Perlindungan Pengguna Penerbangan Malaysia (MACPC) 2022.

JAWAPAN

Tuan Yang di-Pertua,

1. Untuk makluman Yang Berhormat, Suruhanjaya Penerbangan Malaysia (MAVCOM) pada 5 Januari 2023 telah mengingatkan semua syarikat penerbangan untuk memperkukuhkan pengurusan pengendalian penundaan dan pembatalan penerbangan bertujuan untuk menambahbaik komunikasi kepada penumpang serta menyediakan penjagaan dan keperluan seperti yang digariskan di dalam MACPC.
2. Di samping itu, bagi memastikan syarikat penerbangan mematuhi jadual-jadual penerbangan yang telah ditetapkan, pihak MAVCOM sedang mempertimbangkan cadangan untuk mengenakan penalti kewangan kepada syarikat penerbangan atau tindakan-tindakan lain yang bersesuaian dengan syarat-syarat lesen/permit yang ditetapkan. Cadangan ini boleh dilaksanakan dengan perubahan atau tambahan kepada syarat lesen/permit sedia ada. Tindakan tegas seperti ini boleh diambil bagi memastikan kejadian pembatalan/ penjadualan semula penerbangan tidak lagi berulang.
3. Bagi maksud bayaran pampasan kepada penumpang, Kod Perlindungan Pengguna Penerbangan Malaysia 2016 (*Malaysian Aviation Consumer Protection Code 2016*, MACPC) telah memperuntukkan tanggungjawab syarikat penerbangan terhadap pengguna. Kod ini bertujuan untuk melindungi hak dan kepentingan pengguna dengan memastikan semua aduan terhadap syarikat-syarikat penerbangan diambil tindakan dan diselesaikan.
4. Syarikat penerbangan yang menunda penerbangan atas faktor di bawah kawalan syarikat penerbangan seperti masalah operasi, komersial atau teknikal adalah tertakluk untuk menawarkan pampasan dan penjagaan kepada penumpang sepertimana yang diperuntukkan di dalam MACPC.
5. Syarikat penerbangan yang membatalkan penerbangan atas faktor di bawah kawalan syarikat penerbangan seperti teknikal atau kapasiti

penumpang yang tidak memuaskan menyebabkan penerbangan tersebut dilewatkan atau dibatalkan adalah tertakluk untuk menawarkan pembayaran ganti dalam masa 30 hari atau perubahan laluan sepertimana yang diperuntukkan di dalam MACPC.

6. Sekiranya syarikat penerbangan gagal mematuhi MACPC, MAVCOM boleh mengenakan penalti kewangan sebanyak amaun yang tidak melebihi RM200,000, dan ketidakpatuhan kedua atau berikutnya, amaun sepuluh kali daripada penalti kewangan yang dikenakan bagi ketidakpatuhan yang pertama. Dari tahun 2018 sehingga Januari 2023, MAVCOM telah mengenakan penalti sebanyak RM4.72 juta ke atas kegagalan syarikat penerbangan dalam mematuhi Pelbagai kesalahan di bawah MACPC.

7. Dalam situasi berbeza di mana pengguna sendiri yang membatalkan penerbangan, maka bayaran balik tiket kepada pengguna adalah tertakluk kepada terma dan syarat tiket penerbangan yang telah dipersetujui oleh kedua-dua pihak iaitu syarikat penerbangan dan pengguna.

8. MAVCOM pada masa ini sedang mengkaji beberapa penambahbaikan ke atas MACPC termasuk cadangan agar syarikat penerbangan menawarkan pembayaran balik (*refund*) dalam cara bayaran balik asal (*original mode*) kepada penumpang bagi pembatalan penerbangan. Cadangan ini juga termasuk bagi pembatalan penerbangan dalam 'hal keadaan luar biasa', iaitu sesuatu keadaan di luar kawalan syarikat penerbangan itu.

9. Sebagai sebahagian daripada usaha berterusan untuk meningkatkan kod perlindungan pengguna, MAVCOM kini dalam proses penambahbaikan MACPC berdasarkan maklum balas pengguna dan juga pengajaran-pengajaran penting yang berlaku semasa pandemik COVID-19. Penambahbaikan itu termasuk peningkatan perlindungan pengguna dalam kes-kes yang tidak pernah berlaku sebelum tempoh pandemik ini. MAVCOM menganggarkan proses penambahbaikan tersebut akan selesai pada suku kedua 2023.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : TUAN MOHD NAZRI BIN ABU
HASSAN [MERBOK]**

SOALAN

TUAN MOHD NAZRI BIN ABU HASSAN [MERBOK] minta **MENTERI KESIHATAN** menyatakan bahan-bahan kempen seperti video, montaj, brosur dan bahan percetakan yang digunakan sebagai medium penyampai boleh dikatakan ketinggalan dan tidak relevan dengan gaya masa kini. Apakah usaha Kementerian dalam mendayakan semula medium penyampai khususnya dalam kempen mencegah denggi.

JAWAPAN

Tuan Yang di-Pertua,

1. Bagi memastikan penyampaian mesej dan kempen kesihatan khususnya pencegahan demam denggi dapat disalurkan kepada masyarakat dengan lebih berkesan, Kementerian Kesihatan Malaysia (KKM) sentiasa peka dalam menyampaikan maklumat kesihatan seiring dengan perkembangan teknologi dan komunikasi.
2. Kaedah penyampaian yang digunakan adalah melalui platform media sosial seperti Facebook, Instagram, TikTok, Twitter, Youtube dan Telegram. Selain itu, video dan infografik yang dihasilkan juga akan dimuat naik ke platform media sosial supaya rakyat dapat mendapat akses secara mudah dan pantas. KKM juga tidak ketinggalan menyampaikan maklumat secara berkala dengan bersiaran secara langsung di Facebook “Live Streaming” dan “TikTok live” selain menjadi ahli panel jemputan dalam membincangkan isu-isu kesihatan semasa di stesen tv dan radio.
3. Penyampaian mesej kesihatan oleh KKM juga dilaksanakan melalui aplikasi atas talian dengan menggunakan syarikat telekomunikasi tempatan serta memaparkan mesej-mesej kesihatan melalui skrin paparan LED di pusat-pusat membeli-belah, lebuhraya dan stesen pengangkutan awam. Pihak KKM juga sentiasa bekerjasama dengan pengengaruh (*influencer*) dan selebriti yang akan memuat naik mesej kesihatan di media sosial masing-masing.
4. Walau bagaimanapun buat masa ini, pihak KKM juga meneruskan pendekatan secara konvensional dalam menyampaikan mesej kesihatan melalui edaran risalah, ceramah, poster, media luar dan hebahan awam (*Public Service Announcement*) khususnya kepada golongan rentan dan komuniti tanpa akses digital supaya maklumat kesihatan ini dapat diterima oleh kesemua lapisan masyarakat.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : DR. RADZI JIDIN [PUTRAJAYA]

SOALAN

DR. RADZI JIDIN [PUTRAJAYA] minta **MENTERI EKONOMI** menyatakan sama ada Wawasan Kemakmuran Bersama 2030 (WKB2030) akan terus menjadi asas kepada pembangunan negara memandangkan pelaksanaan Rancangan Malaysia Ke-12 (RMK-12) telah dijangka sepenuhnya dengan WKB 2030. Sekiranya tidak, mohon dijelaskan sebabnya.

JAWAPAN

Tuan Yang di-Pertua,

Pembangunan Malaysia adalah berdasarkan kepada Rancangan Malaysia Lima Tahun yang mana Kerajaan telah memperkenalkan Rancangan Malaysia Pertama pada tahun 1966. Sejak tahun 1966 dan sehingga kini sebanyak 12 Rancangan Malaysia telah diperkenalkan. Matlamat dan tujuan Rancangan Malaysia Lima Tahun ini adalah untuk memberikan tumpuan kepada pembangunan ekonomi dan sosial yang mampan seiring dengan pengagihan ekonomi yang adil, saksama dan inklusif pada semua peringkat kumpulan pendapatan, etnik, politik, wilayah dan rantai bekalan. Matlamat dan hasrat Kerajaan ini telah diteruskan dalam Rancangan Malaysia seterusnya sehinggalah Rancangan Malaysia Kedua Belas.

Untuk makluman Ahli Yang Berhormat, pada masa ini Kementerian Ekonomi sedang giat melaksanakan Kajian Separuh Penggal Rancangan Malaysia Kedua Belas, 2021 – 2025 (KSP RMKe-12) dengan kerjasama dan penglibatan aktif semua pihak berkepentingan. Penyediaan Kajian Separuh Penggal Rancangan Malaysia Kedua Belas, 2021 – 2025 (KSP RMKe-12) ini adalah termasuk penelitian semula dasar-dasar sedia ada Kerajaan termasuk Dasar Wawasan Kemakmuran Bersama 2030 (WKB 2030). Selain itu, penyediaan Kajian Separuh Penggal Rancangan Malaysia Kedua Belas, 2021 – 2025 (KSP RMKe-12) ini juga akan merangkumi kajian semula sasaran, strategi, inisiatif, program dan projek pembangunan bagi mencapai matlamat pembangunan serta pertumbuhan ekonomi yang inklusif dan mampan. Laporan Kajian Separuh Penggal Rancangan Malaysia Kedua Belas, 2021 – 2025 (KSP RMKe-12) ini dijadual dibentangkan di Parlimen dalam Mesyuarat Ketiga, Penggal Kedua ini.

Sekian, terima kasih.

**PEMBERITAHUAN PERTANYAAN BUKAN LISAN (BERTULIS)
DEWAN RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : DR. RADZI JIDIN [PUTRAJAYA]

SOALAN

DR. RADZI JIDIN [PUTRAJAYA] minta **MENTERI PERDAGANGAN DALAM NEGERI DAN KOS SARA HIDUP** menyatakan sama ada terdapat inisiatif baharu yang berkesan telah dirangka oleh Majlis Tindakan Sara Hidup Negara (NACCOL) dalam tempoh 2 bulan yang lalu bagi menangani peningkatan kos sara hidup rakyat serta perancangan untuk jangka masa pendek, sederhana dan panjang.

JAWAPAN

Yang di-Pertua,

Menangani kos sara hidup secara tuntas dan menyeluruh merupakan satu usaha berterusan dan panjang. Kos sara hidup bukan hanya masalah ekonomi tetapi terdapat cabaran yang melibatkan pelbagai dimensi termasuklah yang bersifat struktural. Dalam hubungan ini, inisiatif yang dirangka oleh Majlis Tindakan Sara Hidup Negara (NACCOL) yang dipengerusikan YAB Perdana Menteri akan menumpukan kepada strategi serampang dua mata pertama adalah menangani kenaikan harga barangan dan perkhidmatan dan kedua adalah dengan meningkatkan pendapatan rakyat. Secara realitinya kos sara hidup timbul kerana kuasa beli rakyat tidak dapat menampung perbelanjaan.

Menyedari bahawa isu kos sara hidup ini merentasi bidang tugas banyak Kementerian dan agensi maka selaras dengan nama Kementerian Perdagangan Dalam Negeri dan Kos Sara Hidup (KPDN), kementerian ini diberikan kuasa untuk melaksanakan tanggungjawab berkaitan kos sara hidup dengan lebih efektif dan efisien dan mendukung pendekatan keseluruhan Kerajaan (*whole of government approach*). Tanggungjawab KPDN bukan lagi hanya bersifat keurusetiaan dan penyelarasan semata-mata malah bertindak untuk mengkaji serta menganalisa kesan dan implikasi pelaksanaan polisi dan program Kerajaan terhadap kos sara hidup rakyat.

Tiga (3) cabaran NACCOL dalam usaha untuk menangani kos sara hidup adalah pemberian subsidi secara bersasar, ketirisan subsidi dan kenaikan harga barangan yang didorong oleh faktor luaran. Pada ketika ini sedang berlangsung Makmal Kos Sara Hidup: Subsidi Bersasar yang dikendalikan oleh KPDN bersama Kementerian Kewangan dan Kementerian Ekonomi bagi menetapkan kumpulan penerima faedah subsidi bersasar, keperluan atau barangan yang akan disubsidikan oleh Kerajaan serta mekanisme untuk melaksanakan subsidi secara bersasar. Kerajaan Perpaduan ingin memberi jaminan bahawa kumpulan yang paling terkesan dengan kos sara hidup akan menjadi penerima bantuan subsidi yang paling utama. Mekanisme pemberian subsidi yang lebih terkawal seperti penggunaan teknologi dan sistem ICT akan memastikan ketirisan subsidi dapat dibendung. Ini merupakan kaedah proaktif

Kerajaan selain meneruskan usaha-usaha penguatkuasaan oleh Bahagian Penguatkuasaan KPDN.

Sebagai makluman Inisiatif RAHMAH di bawah perancangan jangka pendek yang diambil oleh KPDN adalah Program Payung Rahmah bagi membantu terutamanya kumpulan berpendapatan rendah untuk mendapatkan barangan keperluan asas. Program ini telah dilaksanakan secara berperingkat bermula pada awal bulan ini. Terdapat lima (5) inisiatif di bawah program ini :

PERTAMA : Bakul Rahmah iaitu inisiatif yang menyasarkan sumbangan berbentuk bakul makanan (keperluan harian) bernilai RM100. Barangan keperluan yang dikenali adalah beras, gula, minyak masak, tepung, susu pekat, mihun dan telur yang akan disumbangkan oleh rakan strategik kepada kumpulan miskin tegar secara berterusan pada setiap bulan. Program ini bukan hanya akan menyediakan bantuan barangan tetapi juga peluang pekerjaan bagi mereka yang layak;

KEDUA : Jualan Rahmah iaitu inisiatif program jualan murah sepanjang tahun 2023 oleh pasaraya besar dan pasaraya. Untuk tujuan ini KPDN akan memberi permit Notis Jualan Murah (NJM) bagi Jualan Rahmah sehingga maksimum 4 bulan berbanding 1 bulan pada masa sekarang;

KETIGA : Pakej Rahmah iaitu inisiatif yang menyokong Jualan Rahmah yang mana pasaraya besar dan pasaraya menyediakan beberapa barangan keperluan asas berbentuk pakej. Barangan keperluan dalam pakej berkenaan adalah bernilai RM70 namun pakej tersebut akan dijual kepada pengguna pada harga RM50 sahaja;

KEEMPAT : Kafe Rahmah yang bertujuan untuk menyediakan makanan yang dijual pada harga yang berpatutan kepada penuntut IPTA serta memberikan hidangan makanan percuma kepada penuntut Institusi Pengajian Tinggi Awam (IPTA) dari keluarga berpendapatan rendah; dan

KELIMA : Menu Rahmah yang sedang hangat diperkatakan sekarang iaitu inisiatif pengusaha-pengusaha makanan secara sukarela untuk menawarkan makanan pada harga RM5 bagi setiap hidangan. Menu Rahmah bertujuan untuk memastikan terutamanya golongan

berpendapatan rendah mendapat akses kepada pilihan harga yang mampu bayar.

Di samping itu juga, KPDN akan meneruskan program sedia ada yang memberi impak tinggi dalam membantu kos sara hidup rakyat iaitu Program Penyeragaman Harga tujuh (7) barangan asas iaitu beras putih, gula, minyak masak 1kg, tepung gandum, LPG, petrol RON95 dan diesel supaya bekalan barangan tersebut sampai kepada penduduk di kawasan luar bandar/ pedalaman Semenanjung, Sabah dan Sarawak pada harga kawalan sama dengan kawasan bandar melalui subsidi pengangkutan yang dibayar Kerajaan.

KPDN juga mengorak langkah dalam inisiatif jangka masa sederhana dan panjang melalui inisiatif DAYA supaya kumpulan sasar Kementerian dapat menjana pendapatan di dalam sektor perdagangan dan pengedaran. Melalui program baharu yang dikenali sebagai **Rezeki Suri**, akan memberi peluang kepada suri rumah untuk menambahkan pendapatan dengan menjalankan perniagaan bahan keperluan asas dari rumah. KPDN juga akan meneruskan **Program Pembangunan Francais Mikro dan Francais Mampu Milik** bagi membantu golongan M40 dan B40 menjadi usahawan dengan menceburi bidang francais. Memandangkan potensi dan pendapatan besar yang boleh disumbangkan oleh bidang francais kepada pendapatan rakyat dan negara maka KPDN turut memohon peruntukan yang lebih besar bagi program ini untuk tahun 2023.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA,
PARLIMEN KE-15**

PERTANYAAN : BERTULIS
DARIPADA : DR. MOHD RADZI MD JIDIN
[PUTRAJAYA]

SOALAN

YB DR. MOHD RADZI MD JIDIN [PUTRAJAYA] minta **KEMENTERIAN
PERDAGANGAN ANTARABANGSA DAN INDUSTRI** menyatakan

(a) jumlah pelaburan asing ke negara ini bagi tahun 2018 hingga 2022 dan sasaran untuk tahun 2023 hingga 2027; dan

(b) inisiatif baharu Kerajaan untuk memastikan pelaburan asing terus meningkat.

JAWAPAN

Tuan Yang di-Pertua,

Bagi tempoh tahun 2018 sehingga bulan Disember 2022, Malaysia telah berjaya menarik pelaburan sebanyak RM1.2 trillion yang diluluskan merangkumi sektor perkilangan, perkhidmatan dan utama. Pelaburan ini melibatkan 24,085 projek dan dijangka menjana sebanyak 614,037 peluang pekerjaan.

Daripada jumlah ini, sebanyak 51.9 peratus atau RM601.2 bilion adalah pelaburan langsung asing (FDI). Bagi tahun 2022, FDI kekal sebagai penyumbang utama pelaburan yang diluluskan iaitu 61.7 peratus atau RM163.3 bilion.

Berhubung sasaran untuk tahun 2023 hingga 2027, setakat 7 Februari 2023, terdapat 248 projek dalam peringkat rundingan, atau dengan izin *pipeline* dengan jumlah cadangan pelaburan sebanyak RM7.4 bilion. Daripada jumlah tersebut, pelaburan langsung domestik adalah sebanyak RM5.2 bilion atau 70.3% dan pelaburan langsung asing

adalah sebanyak RM2.2 bilion atau 29.7%. Jumlah pelaburan ini merangkumi projek-projek daripada sektor perkilangan dengan cadangan pelaburan sebanyak RM3.3 bilion melibatkan 30 cadangan projek serta 218 cadangan projek dalam sektor perkhidmatan di bawah bidang kuasa Lembaga Penggalakan Pelaburan Malaysia (MIDA) dengan cadangan pelaburan sebanyak RM4 bilion.

Kerajaan menerusi MITI dan MIDA juga berjaya mendapatkan komitmen pelaburan FDI sejumlah RM3.25 billion melalui misi pelaburannya ke Milan, Itali pada 20 hingga 23 Januari 2023 dan RM13 bilion melalui misi pelaburannya ke Republik Singapura pada 28 hingga 31 Januari 2023.

Meskipun ekonomi global berdepan persekitaran yang mencabar, Kerajaan melalui MITI dan MIDA terus melipatgandakan usaha dalam memastikan FDI ke dalam negara terus meningkat. Ini termasuklah inisiatif-inisiatif baharu seperti berikut:

- i. Melaksanakan Dasar Pelaburan Baharu (NIP) berteraskan Aspirasi Pelaburan Nasional (NIA) bagi mendorong pertumbuhan jangka panjang melalui pelaburan berkualiti yang mampan selain menjadi asas untuk menggiatkan semula dan memangkin ekosistem pelaburan Malaysia. NIA juga memberi penekanan terhadap elemen pelaburan baharu yang berteraskan alam sekitar, sosial dan tadbir urus (*Environmental, Social and Governance* – ESG);
- ii. Melaksanakan pendekatan keseluruhan negara (*Whole-of-Nation Approach*) dan industri bersasar agar dapat menjadi hab alternatif bagi aktiviti perkilangan dan pengedaran selain memberi penekanan kepada pelaburan bagi sektor kawasan pembangunan baharu termasuk kenderaan elektrik, kilang pintar menggunakan teknologi 5G, ekonomi digital, teknologi hijau, pertanian pintar dan ekosistem rantai bekalan;
- iii. Melaksanakan kajian semula cukai secara holistik dan komprehensif ke atas rangka kerja galakan cukai sedia ada melibatkan pindaan kepada Akta Cukai Pendapatan, 1967 dan Akta Penggalakan Pelaburan, 1986 bagi memastikan galakan cukai negara kekal berdaya saing dalam menarik pelaburan asing dan domestik sambil menyokong landskap perniagaan semasa;
- iv. Melaksanakan Program Misi Galakan Perdagangan dan Pelaburan (TIM) untuk menarik projek berkualiti dari seluruh dunia;

SOALAN NO : 321

- v. Mengadakan sesi '*Strike Force*', Misi Projek Khusus dan lawatan kerja spesifik bagi memfokuskan kepada syarikat-syarikat berpotensi dan bertaraf dunia;
- vi. Mengukuhkan dan mempelbagaikan lagi kerjasama dengan dewan perniagaan, bank dan komuniti perniagaan antarabangsa dalam meneroka peluang ke arah menjana hasil yang saling menguntungkan serta menganjurkan program perdana (*flagship programmes*);
- vii. Mempertingkatkan lagi sesi libat urus dengan pelabur baharu dan sedia ada melalui penganjuran seminar / webinar, mesyuarat meja bulat, lawatan kerja, mesyuarat dengan syarikat individu dan majlis rangkaian; dan
- viii. Menyediakan bekalan tenaga kerja pakar-pakar teknologi kepada syarikat asing di Malaysia.

Malaysia mengutamakan pelaburan tertumpu, bersasar dan terpilih untuk memastikan pelaburan berkualiti dan berimpak tinggi bagi merealisasikan matlamat Malaysia sebagai hab inovasi global berteknologi tinggi dengan ekosistem pelaburan yang berdaya tahan dan mampan, sekaligus mengekalkan daya saing dalam persekitaran industri global yang baharu.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : DR. RADZI JIDIN [PUTRAJAYA]

SOALAN

DR. RADZI JIDIN [PUTRAJAYA] minta **MENTERI PENDIDIKAN** menyatakan status pembinaan SK Putrajaya Presint 8(3), Kompleks Sekolah Presint 15, SK Putrajaya Presint 17(2) dan Kompleks Sekolah Presint 5(2), pembinaan bangunan tambahan SK Putrajaya 18(2), pembinaan trek balapan dan padang bola di SMK Putrajaya Presint 8(1) dan Sekolah Sultan Alam Shah, Putrajaya, pembinaan dewan terbuka di SK Putrajaya Presint 5(1), SK Putrajaya Presint 11(1), SK Putrajaya Presint 14(1), SK Putrajaya Presint 18(1) dan SK Putrajaya Presint 18(2) dan permohonan pembinaan Kompleks Sekolah Presint 6(1) dan SK Putrajaya Presint 14(2).

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di Wilayah Persekutuan Putrajaya.

Untuk makluman Ahli Yang Berhormat, projek Pembinaan Sekolah Baharu 36 Bilik Darjah dan Lain-Lain Kemudahan di SK Putrajaya Presint 8(3) telah diluluskan dalam Rancangan Malaysia Kesebelas (RMKe-11) *Rolling Plan* 4 (RP4) tahun 2019 dengan kos keseluruhan sebanyak RM 54 juta. Status terkini pelaksanaan projek adalah di peringkat pembinaan. Kemajuan fizikal projek ini telah mencapai sebanyak 19.57 peratus. Projek ini dijangka siap pada Mei 2024.

Manakala bagi, projek Pembinaan Sekolah Baharu Kompleks Sekolah Presint 15 telah diluluskan dalam RMKe-12 RP1 tahun 2021 dengan kos keseluruhan sebanyak RM121.2 juta. Status terkini pelaksanaan projek adalah di peringkat pembinaan. Kemajuan fizikal projek ini telah mencapai sebanyak 1.03 peratus. Projek ini dijangka siap pada Ogos 2025.

Projek Pembinaan Bangunan Tambahan dan Padang SK Putrajaya Presint 18(2) telah diluluskan dalam RMKe-12 RP1 tahun 2021 dengan kos keseluruhan berjumlah RM24.8 juta termasuk pembinaan dewan terbuka berbumbung. Status terkini pelaksanaan projek adalah di peringkat pembinaan dengan kemajuan fizikal semasa adalah 11.9 peratus. Projek ini dijangka siap pada Mei 2024.

Selain itu, projek Penggantian Trek Sintetik dan Padang Bola Sepak di SMK Putrajaya Presint 8(1) telah diluluskan dalam RMKe-12 RP1 tahun 2021 dengan kos keseluruhan sebanyak RM9 juta. Status terkini pelaksanaan projek adalah di peringkat penilaian tender dan dijangka dikeluarkan Surat Setuju Terima kepada kontraktor pada awal Mac 2023.

Projek Pembinaan Gantian dan Naik Taraf Trek Sintetik dan Padang Bola Sepak di Sekolah Sultan Alam Shah, Wilayah Persekutuan Putrajaya telah diluluskan dalam RMKe-12 RP 1 tahun 2021 dengan kos keseluruhan sebanyak RM9 juta. Status terkini pelaksanaan projek adalah di peringkat pembinaan dengan kemajuan fizikal semasa telah mencapai sebanyak 2 peratus. Projek ini dijangka siap pada Disember 2023.

Projek Pembinaan Sekolah Baharu 30 Bilik Darjah dan Lain-Lain Kemudahan Sekolah Kebangsaan Putrajaya Presint 17(2) telah diluluskan dalam RMKe-12 RP2 tahun 2022. Status terkini pelaksanaan projek adalah di peringkat pra bina. KPM telah menyelaraskan permohonan keperluan skop tambahan bagi Program Pendidikan Khas Integrasi (PPKI). Projek ini dijangka diiklankan pada Ogos 2023.

Projek Pembinaan Baharu Kompleks Sekolah Presint 5 (2) Yang Mengandungi 36 Bilik Darjah Sekolah Rendah dan 42 Bilik Darjah Sekolah Menengah serta Lain-Lain Kemudahan telah diluluskan dalam RMKe-12 RP2 tahun 2022. Status terkini pelaksanaan projek adalah di peringkat reka bentuk. Projek ini dijangka diiklankan pada Ogos 2023.

Pembinaan dewan terbuka berbumbung di SK Putrajaya Presint 5(1) dan SK Putrajaya Presint 14(1) masing-masing kini telah mencapai kemajuan kerja sebanyak 50 peratus dan 46 peratus. Manakala SK Putrajaya Presint 11(1) masih menunggu kelulusan rasmi permohonan permit sementara daripada Perbadanan Putrajaya bagi membolehkan perunding yang dilantik untuk mengemukakan permohonan kebenaran memulakan kerja di tapak.

Pembinaan dewan terbuka berbumbung di SK Putrajaya Presint 18(1) akan dilaksanakan dalam *Rolling Plan* seterusnya memandangkan peruntukan Projek Dewan Terbuka Berbumbung bagi Sekolah-Sekolah di Wilayah Persekutuan Putrajaya sedia ada tidak mencukupi.

KPM telah mengemukakan permohonan kepada agensi pusat cadangan pembinaan Kompleks Sekolah (Sekolah Menengah dan Sekolah Rendah) Presint 6(1) dan SK Putrajaya Presint 14(2) dalam RMKe-12 RP3 tahun 2023. Walau bagaimanapun, kelulusan permohonan ini adalah

SOALAN NO : 322

tertakluk kepada pertimbangan agensi pusat serta kedudukan semasa kewangan kerajaan.

Sekian, terima kasih.

RT34

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

DARIPADA : DR. RADZI JIDIN (PUTRAJAYA)

SOALAN

DR. RADZI JIDIN (PUTRAJAYA) minta **MENTERI BELIA DAN SUKAN** menyatakan apakah usaha Kementerian dalam menjadikan Tasik Putrajaya sebagai destinasi sukan air terkemuka dunia mengambil kira keunikan dan potensi besar tasik ini.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Belia dan Sukan (KBS) komited dan sentiasa bekerjasama erat dengan pihak Perbadanan Putrajaya menjadikan Tasik Putrajaya sebagai destinasi sukan air terkemuka. Ini dapat dilihat apabila penganjuran Sukan Malaysia (SUKMA) 2022 telah memilih Tasik Putrajaya sebagai salah satu lokasi pertandingan bagi acara sukan air.

Selain dari itu, Kementerian juga turut berkerjasama dengan pihak Perbadanan Putrajaya (PPJ) dalam menganjurkan Karnival Sukan Air Keluarga Malaysia Putrajaya 2022 yang berjaya menarik hampir 3,000 orang penggiat sukan air termasuk dari kalangan komuniti setempat ke Tasik Putrajaya. Kementerian sentiasa menggalakkan dan memberikan sokongan kepada semua persatuan dan kelab sukan air yang ingin menganjurkan kejohanan dan aktiviti sukan air di Tasik Putrajaya.

Kementerian juga terbuka untuk menjalinkan kerjasama strategik dengan agensi, syarikat atau persatuan-persatuan berkaitan melalui sokongan serta bantuan yang bersesuaian bagi penganjuran kejohanan dan aktiviti sukan air di Tasik Putrajaya. Ini selaras dengan hasrat kerajaan menjadikan Tasik Putrajaya sebagai sebagai salah satu lokasi sukan air yang terkenal.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : DATUK SERI PANGLIMA MOHD SHAFIE
BIN APDAL [SEMPORNA]

SOALAN

DATUK SERI PANGLIMA MOHD SHAFIE BIN APDAL [SEMPORNA] minta **MENTERI KEWANGAN** menyatakan pelan dan tindakan Kumpulan Wang Simpanan Pekerja (KWSP) bagi memastikan anggaran jumlah simpanan ideal pencarum mencapai RM500,000 - RM600,000 untuk bersara dengan selesa di bandar utama dan luar Lembah Klang sepertimana yang dilaporkan baru-baru ini.

JAWAPAN

Tuan Yang di-Pertua,

Berdasarkan konsep Simpanan Asas KWSP, ahli perlu mempunyai simpanan sebanyak RM240 ribu pada umur 55 tahun bagi membolehkan ahli memperolehi jumlah minimum sebanyak RM1,000 sebulan bagi membiayai keperluan asas persaraan mereka untuk tempoh sekurang-kurangnya 20 tahun iaitu daripada umur 55 tahun hingga 75 tahun. Setakat 31 Disember 2022, 19% daripada ahli yang berumur 55 tahun dan ke bawah mencapai kuantum Simpanan Asas mengikut umur.

Walau bagaimanapun, jumlah RM1,000 sebulan adalah amat rendah dan di bawah paras kemiskinan. Bagi membolehkan ahli mencapai taraf hidup persaraan yang lebih selesa dan bermaruah, KWSP mencadangkan jumlah simpanan sebanyak RM600 ribu bagi menampung keperluan perbelanjaan persaraan untuk tempoh 20 tahun. Kajian oleh Social Well-Being Research Center (SWRC) dengan kerjasama KWSP menunjukkan perbelanjaan minimum sebulan untuk seorang individu warga emas di kawasan Lembah Klang adalah sebanyak RM2,520. Ini bersamaan dengan jumlah simpanan minimum sebanyak RM600 ribu bagi menampung keperluan persaraan untuk tempoh sekurang-kurangnya 20 tahun dari umur 55 sehingga umur 75 tahun. Setakat 31 Disember 2022, hanya 3% daripada ahli yang berumur 55 tahun dan ke bawah dijangka boleh mencapai tahap simpanan minimum ini pada umur 55 tahun.

Pelan dan Tindakan KWSP bagi membina simpanan

KWSP menyediakan pelbagai saluran untuk memudahkan ahli mencarum ke dalam KWSP dalam usaha membantu ahli membina dan meningkatkan simpanan. Bagi ahli yang bekerja dan mempunyai majikan, mereka boleh memilih untuk mencarum sendiri pada bila-bila masa ke dalam akaun KWSP mereka melalui Caruman Sukarela selain daripada caruman 11% iaitu kadar caruman berkanun syer pekerja.

Bagi menggalakkan lebih ramai ahli meningkatkan simpanan KWSP mereka melalui Caruman Sukarela, Kerajaan akan meluaskan skop pelepasan cukai bagi premium insurans nyawa atau caruman takaful hayat untuk meliputi caruman sukarela kepada KWSP sehingga RM3,000 setahun mulai tahun taksiran 2023.

Bagi ahli yang bekerja sendiri, tiada pendapatan tetap atau di luar tenaga buruh seperti suri rumah yang berumur di bawah 60 tahun boleh memilih untuk mencarum secara sukarela pada bila-bila masa mengikut kemampuan di bawah Program i-Saraan. Sebagai insentif untuk menggalakkan golongan ini menyimpan di bawah i-Saraan, Kerajaan memberikan sumbangan sebanyak 15% daripada jumlah caruman, tertakluk kepada had tahunan insentif yang telah dinaikkan daripada RM250 kepada RM300 bagi setiap pencarum melalui pengumuman Belanjawan 2023.

Secara keseluruhannya, seramai 291,743 ahli telah membuat caruman sukarela di bawah program i-Saraan pada tahun 2022 dengan jumlah keseluruhan insentif Kerajaan sebanyak RM33.21 juta telah dikreditkan ke dalam Akaun 1 ahli.

Ahli juga boleh menambah simpanan persaraan pasangan (suami/isteri), ibu bapa atau anak-anak mereka yang merupakan ahli KWSP pada bila-bila masa. Pada masa yang sama, pihak ketiga iaitu individu dan institusi yang diluluskan turut boleh mencarum untuk ahli KWSP.

Selain itu, selaras dengan perubahan lanskap pekerjaan yang menyaksikan peningkatan dalam pekerjaan tidak formal dan pekerjaan yang boleh menjana pendapatan yang besar namun tidak konsisten, Kerajaan telah bersetuju untuk meningkatkan had tahunan caruman sukarela daripada RM60 ribu kepada RM100 ribu bagi setiap pencarum. Tarikh efektif pelaksanaan penambahbaikan ini akan dimaklumkan oleh KWSP dalam masa terdekat.

Melalui pengumuman Belanjawan 2023 juga, Kerajaan telah bersetuju untuk memberikan caruman tambahan sebanyak RM500 kepada hampir 2 juta ahli kumpulan sasaran iaitu yang berumur 40 tahun hingga 55 tahun dan yang mempunyai simpanan RM10 ribu dan ke bawah di dalam Akaun 1. Caruman tambahan ini adalah bertujuan untuk membantu ahli yang mempunyai simpanan rendah untuk mempercepatkan pengumpulan simpanan persaraan mereka.

Kemudahan saluran bayaran caruman dan promosi

Bagi menyediakan kemudahan kepada ahli membuat bayaran caruman sukarela, KWSP telah memperkenalkan fungsi baharu iaitu Bayaran Caruman Sukarela melalui aplikasi i-Akaun ahli secara atas talian mulai Julai 2022. Secara keseluruhannya, kemudahan ini telah

mendapat sambutan yang menggalakkan di mana setakat 31 Januari 2023, seramai lebih 315,702 ahli telah memanfaatkan kemudahan ini dengan jumlah amaun caruman sebanyak RM527.70 juta.

KWSP juga telah melancarkan kempen 'Jom Tambah' yang diperkenalkan mulai bulan Januari 2023 yang lalu bagi merancakkan lagi promosi Caruman Sukarela ke seluruh negara.

Bagi tahun 2023, KWSP bakal memperkasakan lagi pasukan Mobile Team KWSP yang dilengkapi oleh kemudahan 15 kenderaan bergerak ke seluruh negara bagi mempergiatkan lagi aktiviti jangkauan terutamanya di kawasan-kawasan luar bandar dan kawasan terpencil.

Khidmat nasihat dan panduan Belanjawanku

KWSP juga menitikberatkan kepentingan kesedaran dan pengetahuan mengenai perancangan kewangan dan persaraan dalam menyeimbangkan keperluan kewangan untuk hari ini dan kepentingan persaraan di masa hadapan. Oleh itu, KWSP telah memperkenalkan Retirement Advisory Service (RAS) sejak 2014 yang bertujuan memberi khidmat nasihat dan rundingan mengenai perancangan kewangan dan persaraan. Perkhidmatan ini diberi secara percuma dan terbuka kepada ahli dan bukan ahli di cawangan-cawangan KWSP di seluruh negara. Sepanjang tahun 2022, seramai hampir 200 ribu ahli telah menjalani program kesedaran pengetahuan kewangan melalui perkhidmatan ini.

KWSP juga telah melancarkan Belanjawanku, satu panduan perbelanjaan minimum bulanan mengikut pelbagai kategori individu dan isi rumah untuk 12 bandar-bandar utama di Malaysia. Belanjawanku boleh digunakan untuk merancang perbelanjaan peribadi dan keluarga.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATUK SERI PANGLIMA HAJI MOHD SHAFIE
BIN HAJI APDAL [SEMPORNA]**

SOALAN

YB DATUK SERI PANGLIMA HAJI MOHD SHAFIE BIN HAJI APDAL [SEMPORNA] minta **MENTERI PEMBANGUNAN KERAJAAN TEMPATAN** menyatakan definisi terkini Rumah Mampu Milik yang ditetapkan Kementerian mengikut harga dan keluasan dan adakah Kementerian bercadang untuk menyediakan skim pembelian tanah lot perumahan kepada golongan belia dan pemilik rumah pertama.

JAWAPAN

Tuan Yang di-Pertua

Untuk makluman Ahli Yang Berhormat, melalui Dasar Rumah Mampu Milik (DRMM), Kerajaan telah memperkenalkan dan menetapkan siling harga Rumah Mampu Milik (RMM) pada RM300,000. Definisi RMM mengikut DRMM adalah rumah yang memenuhi keperluan asas yang lain. Walau bagaimanapun, siling harga RMM ini turut tertakluk kepada dasar perumahan di peringkat negeri.

Kementerian Pembangunan Kerajaan Tempatan (KPKT) tidak menawarkan program atau skim pembelian tanah lot perumahan buat masa ini. Namun, KPKT komited untuk meneruskan Program Rumah

SOALAN NO : 325

Mesra Rakyat (RMR) di bawah Syarikat Perumahan Negara Berhad (SPNB) yang terbukti memberi manfaat perumahan khusus kepada rakyat berpendapatan rendah (B40) yang mempunyai tanah sendiri atau tanah milik ahli keluarga yang diberi kebenaran berdasarkan syarat-syarat yang ditetapkan. Setakat ini, sebanyak 55,055 unit telah siap dibina, 4,181 unit sedang dalam pembinaan dan baki 657 unit dalam perancangan di seluruh negara.

KPKT juga sedang merancang pembinaan Rumah Belia Madani (RBM) di kawasan Lembah Klang. Inisiatif RBM adalah inisiatif Kerajaan dalam penyediaan perumahan secara transit untuk golongan belia yang berumur 35 tahun dan ke bawah untuk mendiami rumah tersebut bagi sesuatu tempoh yang dirasakan cukup sehingga mereka dapat mengukuhkan kedudukan kewangan dan seterusnya memiliki kediaman sendiri. RBM yang pertama akan dibangunkan di Mukim Batu, Sentul melibatkan 1,048 unit rumah.

Untuk makluman Ahli Yang Berhormat, melalui Belanjawan MADANI 2023, Kerajaan menerusi Skim Jaminan Kredit Perumahan (SJKP) bersedia menjamin nilai pinjaman sehingga RM5 billion bagi memanfaatkan 20,000 peminjam perumahan, khususnya pembeli rumah pertama. Jaminan Kerajaan ini adalah bagi membantu peminjam yang tidak mempunyai pendapatan tetap. Berdasarkan data yang dilaporkan oleh SJKP sehingga 31 Januari 2023, sebanyak 16,808 pinjaman pembiayaan telah diluluskan di bawah skim ini. 65.11% (10,945) pemohon yang berjaya adalah dalam julat umur 35 tahun ke bawah. Nilai keseluruhan pembiayaan yang telah diluluskan oleh SJKP sejak mula dilancarkan adalah sebanyak RM2.32 bilion.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK SERI PANGLIMA HAJI MOHD
SHAFIE BIN HAJI APDAL [SEMPORNA]**

SOALAN

**DATUK SERI PANGLIMA HAJI MOHD SHAFIE BIN HAJI APDAL
[SEMPORNA] minta PERDANA MENTERI menyatakan :-**

- a) jumlah keseluruhan (jumlah penerima dan amaun) yang telah disalurkan melalui Tanggungjawab Sosial dan Korporat (CSR) oleh Petronas bagi tujuan pendidikan dan latihan kemahiran; dan
- b) daripada jumlah amaun dan penerima tersebut, nyatakan pecahan mengikut negeri kelahiran penerima (Terengganu, Kelantan, Sabah dan Sarawak).

JAWAPAN:

YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)

Tuan Yang di-Pertua,

1. PETRONAS telah membelanjakan lebih dari RM1.022 bilion bagi melaksanakan pelbagai inisiatif dan program pendidikan dan pembangunan modal insan di peringkat rendah, menengah dan pengajian tinggi untuk pelajar di seluruh negara. In contohnya *PETRONAS Education Sponsorship Program (PESP)*, *Vocational Institution Sponsorship and Training Assistance (VISTA)*, *Graduate Employability Enhancement Scheme (GEES)*, *Discover PETRONAS @ Schools*, dan Program Duta Guru.
2. Selain itu, terdapat juga program dan inisiatif yang berfokuskan pembelajaran Sains, Teknologi, Kejuruteraan dan Matematik (STEM) bertujuan melahirkan modal insan yang berpengetahuan dan berkemahiran untuk membantu pertumbuhan ekonomi, sosial dan *matlamat kelestarian negara*. Antara program-program tersebut adalah *RBTX Challenge*, *Coding4All*, *STEM School Adoption*, dan *Young Technologist Program*.
3. Setakat ini, seramai 4.3 juta pelajar telah menerima manfaat dari program-program tersebut. Sejak 2014 hingga kini, pecahan bilangan penerima adalah seperti berikut:

Negeri	Bilangan Penerima
Sarawak	23,428
Sabah	23,449
Terengganu	17,509
Kelantan	12,859

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT PERTAMA, PENGGAL KEDUA,
PARLIMEN KELIMA BELAS DEWAN RAKYAT**

PERTANYAAN : BUKAN LISAN

**DARIPADA : DATUK SERI PANGLIMA HAJI MOHD
SHAFIE BIN HAJI APDAL [SEMPORNA]**

SOALAN

Minta **PERDANA MENTERI** menyatakan:

- (a) pencapaian projek-projek pembangunan Rancangan Malaysia ke-11 (RMK-11) bagi Parlimen Semporna (jumlah yang diperuntukkan/jumlah yang dibelanjakan); dan
- (b) pencapaian projek pembangunan Rolling Plan (RP-1 dan RP-2) Rancangan Malaysia Ke-12 (RMK-12) bagi Sabah amnya dan Parlimen Semporna khususnya.

JAWAPAN

DIJAWAB OLEH YB DATUK ARMIZAN BIN MOHD ALI
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)

Tuan Yang di-Pertua,

Jawapan (a)

Bilangan projek dan program pembangunan di Parlimen Semporna dalam Rancangan Malaysia Ke-11 (RMKe-11) yang telah diluluskan adalah sebanyak 42 dengan jumlah peruntukan sebanyak RM485,865,560. Daripada jumlah peruntukan tersebut, sebanyak RM274,338,983 telah dibelanjakan sepanjang tempoh pelaksanaan RMKe-11.

Jawapan (b)

1. Secara keseluruhannya, jumlah projek dan program pembangunan yang telah diluluskan beserta pancapaian bagi negeri Sabah dalam *Rolling Plan* (RP) 1 dan *Rolling Plan* (RP) 2 Rancangan Malaysia Ke-12 (RMKe-12) adalah seperti yang berikut:

<i>Rolling Plan</i> (RP)	Bilangan Projek/ Program	Peruntukan (RM bilion)	Belanja (RM bilion)	Status Pelaksanaan		
				Pra Pelaksanaan	Dalam Pelaksanaan	Pasca Pelaksanaan
RP1	1,106	5.61	4.37	515	339	252
RP2	1,142	5.71	4.46	584	346	212

2. Dalam tempoh yang sama, jumlah projek dan program yang telah diluluskan beserta pancapaian bagi Parlimen Semporna adalah seperti berikut:

<i>Rolling Plan</i> (RP)	Bilangan Projek/ Program	Peruntukan (RM bilion)	Belanja (RM bilion)	Status Pelaksanaan		
				Pra Pelaksanaan	Dalam Pelaksanaan	Pasca Pelaksanaan
RP1	31	0.145	0.131	11	13	7
RP2	30	0.146	0.131	13	13	4

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : DATO' INDERA MOHD SHAHAR BIN
ABDULLAH [PAYA BESAR]**

SOALAN

DATO' INDERA MOHD SHAHAR BIN ABDULLAH [PAYA BESAR]
minta **MENTERI KESIHATAN** menyatakan berapa jumlah terkini kanak-
kanak yang didiagnos menghidap penyakit jarang jumpa (*Rare Disease*)
mengikut negeri dan daerah daripada tahun 2012 hingga tahun 2022.

JAWAPAN

Tuan Yang di-Pertua,

1. Berdasarkan data terkini daripada dua (2) pusat rujukan rawatan Penyakit Jarang Jumpa iaitu Hospital Kuala Lumpur dan Hospital Pulau Pinang, jumlah pesakit Penyakit Jarang Jumpa bagi tahun 2022 adalah sebanyak 13,036 pesakit. Selangor merekodkan jumlah tertinggi pesakit sebanyak 4,800 pesakit, manakala Perlis merekodkan jumlah pesakit terendah iaitu 12 pesakit. Perincian mengikut negeri adalah seperti berikut:

Bil	Negeri	Jumlah pesakit
1.	Selangor	4,800
2.	KL	3,581
3.	Johor	914
4.	Perak	865
5.	Negeri Sembilan	715
6.	Pahang	673
7.	Melaka	480
8.	Kedah	225
9.	Putrajaya	170
10.	Penang	162
11.	Terengganu	154
12.	Kelantan	112
13.	Sarawak	107
14.	Sabah	66
15.	Perlis	12
JUMLAH		13,036

2. Pada masa ini, pangkalan data (registry) yang mengumpul data-data pesakit Penyakit Jarang Jumpa di Malaysia belum lagi tersedia secara terperinci. KKM dalam usaha untuk membangunkan pangkalan data bagi penyakit ini bagi membolehkan analisis data dilaksanakan secara *AI-driven* bagi mempercepat tempoh diagnosis, *predict disease progression* dan seterusnya rawatan awal dapat diberikan. Walau bagaimanapun, dianggarkan bilangan pesakit jarang jumpa kanak-kanak adalah sebanyak 70% daripada jumlah keseluruhan di atas.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN JAWAB LISAN

**DARIPADA : YB DATO' INDERA MOHD SHAHAR BIN
ABDULLAH
[PAYA BESAR]**

SOALAN

YB DATO' INDERA MOHD SHAHAR BIN ABDULLAH [PAYA BESAR] minta **MENTERI PELANCONGAN, SENI DAN BUDAYA** menyatakan status terkini dan usaha Kementerian untuk mengiktiraf Pekan Sungai Lembing sebagai salah satu bandar warisan bersejarah di peringkat antarabangsa oleh Pertubuhan Pendidikan Saintifik dan Kebudayaan Bangsa-Bangsa Bersatu (UNESCO).

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Kementerian Pelancongan Seni dan Budaya (MOTAC) melalui Jabatan Warisan Negara (JWN) menyambut baik hasrat pihak Ahli Yang Berhormat untuk mengiktiraf Pekan Sungai Lembing sebagai Tapak Warisan Dunia UNESCO. Pada masa ini, JWN sedang melaksanakan kajian komprehensif bagi melihat potensi tapak Sungai Lembing untuk mengiktirafnya sebagai Tapak Warisan Dunia UNESCO. Ini kerana untuk mendapatkan pengiktirafan UNESCO, ia perlu memenuhi kriteria ketat yang telah ditetapkan oleh pihak UNESCO serta disokong dengan kajian yang saintifik. Sesi perbincangan awal telah diadakan bersama agensi berkepentingan termasuk PLANMalaysia@Pahang, Jabatan Mineral dan Geosains, Jabatan Perhutanan dan Majlis Perbandaran Kuantan dan telah menjelaskan kepada pihak yang berkenaan mengenai proses bagi cadangan untuk mencalonkan tapak tersebut sebagai Tapak Warisan Dunia UNESCO.

2. Selain itu juga, MOTAC melalui JWN sentiasa berusaha untuk memulihara, memelihara dan melindungi tapak yang mempunyai kepentingan sejarah di peringkat kebangsaan melalui pewartaan di bawah Akta Warisan Kebangsaan 2005 (Akta 645). Pihak Kerajaan Negeri Pahang telah memutuskan untukewartakan keseluruhan Kompleks Perlombongan Bersejarah Sungai Lembing sebagai tapak warisan ini termasuklah bangunan Kelab Sungai Lembing, Muzium Sungai Lembing, Panggung Wayang Sungai Lembing dan Balai Polis Sungai Lembing.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN SANISVARA NETHAJI RAYER A/L
RAJAJI [JELUTONG]**

SOALAN

DATO' INDERA MOHD SHAHAR BIN ABDULLAH [Paya Besar]
minta **MENTERI DALAM NEGERI** menyatakan:

- a) berapa jumlah kes tangkapan melibatkan pendatang tanpa izin yang menggunakan identiti rakyat tempatan secara sah atau tidak bagi menjalankan perniagaan, memiliki dan memandu kenderaan persendirian serta memiliki hartanah; dan
- b) apakah tindakan Kerajaan membanterasnya.

JAWAPAN

Tuan Yang Di-Pertua,

Untuk makluman Ahli Yang Berhormat, kemasukan dan keberadaan warga asing di Malaysia adalah tertakluk kepada dasar, peraturan dan perundangan yang berkuat kuasa. Hal ini termasuklah keperluan untuk memiliki dokumen perjalanan yang sah, mematuhi tempoh keberadaan yang dibenarkan serta pematuhan kepada syarat-syarat pas yang dikeluarkan. Kementerian Dalam Negeri (KDN) memandang serius berkaitan masalah Pendatang Asing Tanpa Izin (PATI) di negara ini yang memerlukan strategi pembanterasan secara berterusan. Justeru, sebagai langkah memperkukuhkan tadbir urus dan menambah baik sistem kerja penguatkuasaan sedia ada, KDN sedang memperhalusi pelan strategik penguatkuasaan PATI yang lebih komprehensif dan menyeluruh.

Berdasarkan 5,206 operasi penguatkuasaan yang dilaksanakan oleh pihak Jabatan Imigresen Malaysia (JIM) sepanjang tahun 2021, seramai 12,462 orang PATI dan 206 majikan telah ditangkap atas pelbagai kesalahan imigresen. Antara kesalahan-kesalahan yang direkodkan adalah tiada dokumen perjalanan yang sah, tinggal lebih masa, salah guna pas dan melindungi PATI. Manakala 2022 menyaksikan JIM merekodkan 8,033 operasi penguatkuasaan melibatkan tangkapan 22,804 orang PATI daripada pelbagai negara dan 371 majikan. Daripada jumlah PATI yang ditangkap bagi tempoh berkenaan (2021 - 2022), 596 daripadanya melakukan kesalahan di bawah seksyen 56(1)(I), Akta Imigresen 1959/63 [*Akta 155*] kerana memalsukan dokumen perjalanan.

Berhubung isu warga asing yang menjalankan aktiviti perniagaan, JIM secara khususnya melaksanakan Ops Belanja dan Ops Jaja bagi mengatasi isu tersebut. Ops Belanja menyasarkan premis-premis antaranya seperti pasar mini atau pasar raya, kedai runcit dan kedai perabot. Bagi tempoh 1 Januari 2019 sehingga 7 Mac 2023, seramai 5,658 orang warga asing telah ditangkap semasa Ops Belanja. Manakala Ops Jaja yang menumpukan kawasan-kawasan seperti pasar malam, pasar tani, pasar borong dan gerai-gerai jalanan merekodkan 1,240 tangkapan.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DATO' INDERA MOHD SAHAR BIN ABDULLAH
[PAYA BESAR]**

SOALAN

Dato' Indera Mohd Sahar Bin Abdullah [Paya Besar] meminta
MENTERI KOMUNIKASI DAN DIGITAL menyatakan:

- (a) apakah langkah Kerajaan untuk mewujudkan '*talent pool*' dalam bidang teknologi digital aras tinggi untuk melahirkan lebih ramai pakar digital yang kini menjadi salah satu industri utama di peringkat global; dan
- (b) berapa jumlah ekspatriat dalam bidang digital yang bekerja di Malaysia.

JAWAPAN:

Tuan Yang di-Pertua,

Bagi mewujudkan '*talent pool*' dalam bidang teknologi digital aras tinggi untuk melahirkan lebih ramai pakar digital, Kementerian Komunikasi dan Digital (KKD) melalui agensinya Malaysia Digital Economy Corporation (MDEC) telah melaksanakan program-program pembangunan bakat dan kemahiran dari peringkat sekolah, peringkat universiti hingga ke peringkat industri. Antara program-program yang dilaksanakan oleh MDEC adalah:

- (i) *#mydigitalmaker* yang merupakan sebuah inisiatif bagi mendekatkan generasi muda terutama murid sekolah dari dalam dan luar bandar, untuk memahami teknologi seperti pengaturcaraan dan pembuatan 3D agar dapat memupuk minat serta kesedaran untuk mereka meneroka dan seterusnya merangsang idea baharu dalam menghasilkan ciptaan inovasi digital;
- (ii) Program *Digital Innovator Program* (DIP) yang telah dilancarkan pada tahun 2021 menawarkan laluan kurikulum yang baharu bagi murid-murid pintar dan berbakat tinggi dalam teknologi digital bertujuan untuk melahirkan pakar teknologi yang berdaya saing di peringkat global;
- (iii) Program *Premier Digital Tech Institutions* (PDTI) yang bertujuan untuk melahirkan graduan berkualiti tinggi yang menepati kehendak industri. Di bawah program ini, MDEC bekerjasama dengan Kementerian Pengajian Tinggi untuk memberi penarafan kepada institusi pengajian tinggi (IPT) yang terpilih khususnya mempunyai rekod prestasi dalam menghasilkan graduan berkualiti tinggi untuk pekerjaan bernilai tinggi berasaskan teknologi digital;
- (iv) *#mydigitalworkforce* yang merupakan satu inisiatif untuk mewujudkan tenaga kerja/modal insan yang berdaya saing

SOALAN NO: 331

dan memenuhi keperluan ekonomi industri digital. Terdapat pelbagai program yang sedang dan akan dilaksanakan bersama kementerian, rakan strategik dan agensi berkaitan antaranya Kementerian Sumber Manusia, Jabatan Pembangunan Kemahiran, Human Resource Development Corporation (HRD Corp), Pertubuhan Keselamatan Sosial (PERKESO) dan Talent Corporation Malaysia.

Di bawah insentif Malaysia Digital (MD) yang dahulu dikenali sebagai MSC Malaysia, MDEC menawarkan insentif kepada syarikat-syarikat berstatus MD/MSM untuk menggaji pekerja mahir asing (ekspatriat). MDEC juga telah mendapat mandat untuk memproses, menilai dan meluluskan pekerja mahir asing di bawah sektor ICT. Pada tahun 2022, sebanyak 26,234 pas pengajian pekerja mahir asing telah dikeluarkan untuk syarikat-syarikat yang berdaftar dengan MDEC.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATO' INDERA MOHD SHAHAR BIN ABDULLAH
[PAYA BESAR]**

SOALAN

DATO' INDERA MOHD SHAHAR BIN ABDULLAH [PAYA BESAR]
minta **MENTERI PERTANIAN DAN KETERJAMINAN MAKANAN**
menyatakan :

- (a) apakah senarai barang makanan keperluan asas yang diimport dari luar negara; dan
- (b) apakah senarai GLC/GLIC yang telah, sedang dan akan terlibat secara langsung pelaburannya dalam industri makanan yang tidak diproses dan telah diproses.

JAWAPAN

- (a) Senarai jenis kumpulan makanan dan nilai import bagi tahun 2022 adalah seperti berikut:

Jenis Kumpulan Makanan	Nilai Import (RM)
Binatang hidup (binatang ternakan)	193,816,961
Daging dan sediaan daging	6,747,891,856
Hasil tenusu	6,264,392,775
Telur unggas	52,287,681
Ikan, krustasea, moluska dan sediaan (tidak termasuk ikan hiasan)	6,777,131,761
Bijirin dan sediaan bijirin	10,856,258,296
Sayur-sayuran	6,225,513,340
Buah-buahan	5,109,881,588
Gula, sediaan gula dan madu	4,943,805,541
Kopi, koko, teh dan rempah	9,966,816,334
Bahan makanan untuk ternakan	9,429,647,221
Keluaran dan sediaan makanan lain	8,974,698,448

- (b) Kementerian Pertanian dan Keterjaminan Makanan (KPKM) menyambut baik usaha GLC/GLIC dalam membangunkan sektor agromakanan negara. Antaranya ialah Syarikat Padi Beras Nasional Berhad (BERNAS) yang mengusahakan projek *Smart Sawah Berskala Besar* dan bekalan jentera dengan nilai pelaburan berjumlah RM17 juta. BERNAS turut menaiktaraf kilang pemprosesan padi wangi dengan pelaburan sebanyak RM7 juta.

Syarikat Blue Archipelago Berhad yang merupakan syarikat milik penuh Khazanah Nasional Berhad melalui Agrifood Resources Holdings menjalankan projek ternakan udang putih dan udang harimau dengan jumlah pelaburan sebanyak RM485.9 juta. Syarikat ini mempunyai 2 ladang bertempat di Kerpan, Kedah (Ladang Kerpan) dan di Setiu, Terengganu (Ladang iSharp) dengan jumlah keseluruhan 445 kolam dan kapasiti pengeluaran 6,000 tan metrik setahun. Sebanyak 10% hingga 12% daripada pengeluarannya dieksport ke China melalui jenama Pelagos. Syarikat ini turut mempunyai Pusat Pembenihan Udang di kedua-dua lokasi tersebut untuk kegunaan pengeluarannya dengan

kapasiti tahunan satu (1) bilion *post larva* serta Kilang Pemprosesan Udang bertempat di Kerpan, Kedah dengan kapasiti pengeluaran tahunan sebanyak 3,000 tan metrik.

FELCRA Berhad terlibat dalam industri ternakan seperti ayam pedaging secara reban tertutup di Rompin, Pahang melalui dana berjumlah RM60 juta dan ternakan lembu melalui sistem fidlot sebanyak 4,000 ekor di Johor, Perak dan Sabah. FELCRA Berhad turut mengusahakan tanaman padi di kawasan seluas 3,263 hektar di Seberang Perak, Perak.

Syarikat FGV Holding Berhad melabur di dalam pelbagai sektor agromakanan seperti ternakan tenusu melalui anak syarikatnya RedAgriFarm Sdn. Bhd. dan tanaman kontan seperti Nanas MD2 di Johor serta ladang kontrak untuk pengeluaran Pisang Cavendish, nangka dan melon. Dalam industri makanan ternakan pula, syarikat ini menghasilkan 400 ribu tan metrik palm kernel expeller (PKE) yang merupakan bahan dalam makanan ternakan.

Terdapat juga GLIC yang membuat pelaburan melalui pegangan saham syarikat berasaskan industri makanan yang telah diproses contohnya Kumpulan Wang Simpanan Pekerja (KWSP) yang memiliki pegangan sebanyak 22% di dalam syarikat QSR Brands. Lembaga Tabung Haji melalui TH Plantations memiliki pegangan saham dalam Nihon Canpack yang melaksanakan operasi pembungkusan minuman dalam tin bagi syarikat Nestle.

Beberapa GLC/GLIC milik kerajaan negeri turut memainkan peranan penting dalam pelaburan industri makanan antaranya Aquapreneur Sdn. Bhd. iaitu anak syarikat di bawah Johor Corporation; Sawit Kinabalu Sdn. Bhd (industri ternakan lembu pedaging secara integrasi); dan Makmur Akuakultur Sdn. Bhd. serta Makmur Dairy Sdn. Bhd yang dimiliki oleh Perbadanan Kemajuan Pertanian Negeri Pahang.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN LISAN

**DARIPADA : DATO' HAJI MOHD SUHAIMI BIN
ABDULLAH [LANGKAWI]**

SOALAN

DATO' HAJI MOHD SUHAIMI BIN ABDULLAH [LANGKAWI] minta **MENTERI PEMBANGUNAN WANITA, KELUARGA DAN MASYARAKAT** menyatakan berapa banyak bantuan yang diperuntukan kepada penduduk miskin tegar dan juga mohon senarai nama penduduk miskin tegar di kawasan Parlimen Langkawi.

JAWAPAN

Bilangan penerima bantuan JKM bagi Parlimen Langkawi pada tahun 2022 adalah seramai **2,063 penerima** dengan peruntukan yang disalurkan adalah sebanyak **RM7.9 juta**. Bilangan ini adalah lebih tinggi berbanding tahun 2021 iaitu seramai 1,897 orang (RM7.2 juta) dan tahun 2020 seramai 1,780 penerima (RM5.6 juta).

Pecahan penerima bantuan mengikut skim bantuan adalah seperti jadual di bawah.

BANTUAN KEWANGAN KEBAJIKAN MENGIKUT JENIS BANTUAN DI PARLIMEN LANGKAWI BAGI TAHUN 2020 - 2022							
Bil	Jenis Bantuan	2020		2021		2022	
		Bil. Kes	RM	Bil. Kes	RM	Bil. Kes	RM
1	Bantuan Kanak-Kanak (BKK)	211	525,700	219	807,600	232	857,350
2	Bantuan Warga Emas (BWE)	215	766,150	195	1,065,500	199	1,055,000
3	Elaun Pekerja Orang Kurang Upaya (EPOKU)	411	1,923,000	442	2,281,950	513	2,548,350
4	Bantuan OKU Tidak Berupaya Bekerja (BTB)	229	659,550	257	863,700	308	972,900
5	Bantuan Penjagaan OKU Terlarat/ Pesakit Kronik Terlarat (BPT)	178	603,400	187	937,000	220	1,028,500
6	Bantuan Am Negeri (BA)	532	1,160,640	589	1,292,020	584	1,422,600
7	Bantuan Latihan Perantis (BLP)	-	-	3	9,000	5	22,800
8	Bantuan Anak Pelihara (BAP)	1	6,000	2	9,500	2	7,000
9	Geran Pelancaran (GP)	3	8,100	3	8,100	-	-
10	Bantuan Alat Tiruan/Sokongan (BAT)	10	13,767	7	6,670	5	4,151
Jumlah Keseluruhan		1,780	5,652,540	1,897	7,274,370	2,063	7,914,500

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' HAJI MOHD SUHAIMI BIN ABDULLAH
[LANGKAWI]**

SOALAN

DATO' HAJI MOHD SUHAIMI BIN ABDULLAH [LANGKAWI] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan adakah Kementerian telah mengadakan kaji selidik penilaian kesan kepada alam sekitar (EIA) sebelum projek-projek besar tambatan laut dan tebus guna laut diluluskan khususnya di pulau pelancongan.

JAWAPAN

Tuan Yang di-Pertua,

1. Sebarang projek penambakan laut dan tebus guna tanah termasuk di pulau pelancongan perlu menyediakan Laporan *Environmental Impact Assessment* (EIA) dan perlu mendapatkan kelulusan daripada Ketua Pengarah Jabatan Alam Sekitar (JAS) sekiranya tertakluk di bawah Perintah Kualiti Alam Sekeliling (Aktiviti yang Ditetapkan)(Penilaian Kesan kepada Alam Sekeliling) 2015 (Perintah EIA 2015).
2. Perkara ini adalah selaras dengan kehendak Seksyen 34A, Akta Kualiti Alam Sekeliling 1974 (Akta 127), dan selaras ketetapan aktiviti di bawah Perintah EIA 2015 sama ada tertakluk kepada Jadual Pertama atau Jadual Kedua yang menyatakan:

Jadual Pertama:

Aktiviti 7. Penebusgunaan Tanah

Penebusgunaan kawasan pantai atau penebusgunaan tanah sepanjang tebing sungai yang melibatkan kawasan kurang daripada 50 hektar.

Jadual Kedua:

Aktiviti 7. Penebusgunaan Tanah:

- (a) Penebusgunaan kawasan pantai atau penebusgunaan tanah sepanjang tebing sungai yang melibatkan kawasan seluas 50 hektar atau lebih.*
- (b) Penebusgunaan kawasan pantai atau penebusgunaan tanah sepanjang tebing sungai di dalam atau bersebelahan atau berdekatan dengan kawasan sensitif alam sekitar dan sensitif reseptor.*
- (c) Penebusgunaan bagi pulau buatan manusia.*

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATO' HAJI MOHD SUHAIMI BIN ABDULLAH
[LANGKAWI]**

SOALAN

DATO' HAJI MOHD SUHAIMI BIN ABDULLAH [LANGKAWI]
minta **MENTERI PERTANIAN DAN KETERJAMINAN MAKANAN**
menyatakan jenis dan jumlah bantuan yang disalurkan kepada
petani, nelayan dan penternak mengikut kawasan Parlimen
semenjak pandemik COVID-19 sehingga kini.

JAWAPAN

Tuan Yang di-Pertua,

Untuk makluman, Kementerian Pertanian dan Keterjaminan Makanan (KPKM) sentiasa prihatin dan komited untuk membantu golongan petani, nelayan dan penternak dengan menyediakan pelbagai bantuan dan insentif bagi meningkatkan pendapatan dan produktiviti agromakanan agar kesejahteraan rakyat terjamin.

Antara bantuan yang ditawarkan kerajaan kepada petani melalui Jabatan Pertanian adalah seperti:

- i. Projek Pembangunan Tanaman Buah-Buahan Jangka Panjang;**
- ii. Pembangunan Tanaman Buah-Buahan Jangka Pendek;**
- iii. Pembangunan Tanaman Sayuran;**
- iv. Program Pembangunan Pertanian Komuniti;**
- v. Pembangunan Industri Tanaman Kelapa, Kopi, Cendawan dan Makanan Ternakan;**
- vi. Pengeluaran Benih Tanaman Berkualiti;**
- vii. Peningkatan Pendapatan Pesawah Luar Jelapang (B40); dan**
- viii. Pembangunan Agrofood Park (AFP) Baharu / Sedia Ada.**

Melalui pelaksanaan projek-projek ini, Kementerian menawarkan insentif seperti berikut:

- i. pembangunan infrastruktur ladang;
- ii. pembekalan input pertanian, jentera ladang, mesin dan peralatan ladang;
- iii. pemindahan teknologi beserta keperluan peralatan untuk pensijilan amalan pertanian baik; dan
- iv. penyediaan kemudahan lepas tuai.

Antara bantuan yang ditawarkan kerajaan kepada penternak melalui Jabatan Perkhidmatan Veterinar adalah seperti:

- i. **Program Peningkatan Ruminan** – pakej bantuan perolehan ternakan dan peralatan kepada penternak yang berkonsepkan geran padanan pada kadar nisbah 50% Kerajaan: 50% penternak.
- ii. **Skim Rezeki Ternakan Ruminan dan Unggas** –pakej bantuan bagi perolehan ternakan, makanan ternakan dan input peralatan ladang.
- iii. **Program Pembangunan Industri Tenusu Negara**
 - a) **Skop Transformasi Usahawan Berskala Besar**

Bantuan bayaran balik (*reimbursement*) sebanyak 30% daripada harga perolehan mengikut harga siling yang telah ditetapkan dengan kaedah *reimbursement* pada nisbah 70% Kerajaan: 30% peserta. Bantuan adalah meliputi induk lembu tenusu bunting (*heifers*), tangki penyejuk susu (RFT) dan perincih rumput.
 - b) **Skop Transformasi Penternak Kecil**

Bantuan bayaran balik (*reimbursement*) sebanyak 70% daripada harga perolehan mengikut harga siling yang telah ditetapkan dengan kaedah *reimbursement* pada nisbah 30% peserta :70% Kerajaan. Bantuan adalah meliputi induk lembu tenusu bunting (*heifers*), tangki penyejuk susu (RFT) dan lori tangki susu.

Sementara itu, jenis dan jumlah bantuan yang diberikan kepada golongan nelayan melalui Lembaga Kemajuan Ikan Malaysia (LKIM) adalah seperti berikut:

- i. **Skim Subsidi Petrol dan Diesel**

Bantuan bagi menampung sebahagian dari kos operasi penangkapan ikan nelayan akibat dari kenaikan harga bahan api di pasaran. Secara tidak langsung skim ini menggalakkan

nelayan untuk keluar menangkap ikan bagi didaratkan dalam negara.

ii. Program Elaun Sara Hidup Nelayan (ESHN)

Bantuan secara bulanan kepada pemilik individu vesel perikanan dan pekerja warganegara yang bekerja di atas vesel berlesen sebanyak RM300 bagi nelayan laut dan RM250 bagi nelayan darat.

iii. Dana Khas Persatuan Nelayan

Dana Khas Persatuan Nelayan adalah inisiatif dibawah Pakej Rangsangan Ekonomi Prihatin Rakyat (PRIHATIN) yang bertujuan untuk meningkatkan pengeluaran industri agromakanan negara, memacu aktiviti pemulihan ekonomi dalam subsektor perikanan dan memastikan bekalan makanan terjamin dalam tempoh mencabar.

iv. Program Rezeki Tani

Bantuan peralatan menangkap hasil laut dan lain-lain aktiviti ekonomi berasaskan pertanian yang boleh menjana pendapatan alternatif kepada nelayan yang ingin menceburi bidang lain bagi menambahkan pendapatan serta telah berdaftar dengan e-Kasih.

v. Program Dana Nelayan

Bantuan pinjaman mudah bagi pembelian bot dan peralatan baru atau meningkatkan keupayaan bot sedia ada.

vi. Program Pembangunan Pelan Peningkatan Pendapatan Golongan B40: Nelayan Melalui Projek Tanaman Kontan

Program ini bertujuan untuk memberi pendapatan sampingan kepada golongan nelayan melalui bantuan input Pertanian.

vii. Skim Perlindungan Nelayan

Skim perlindungan di bawah Skim Keselamatan Sosial Pekerjaan Sendiri (SKSPS) oleh PERKESO yang memberi perlindungan kepada nelayan daripada bencana pekerjaan termasuk penyakit pekerjaan dan kemalangan semasa

menjalankan pekerjaan bertujuan untuk membela nasib nelayan dan keluarga nelayan sekiranya berlaku kejadian yang tidak diinginkan atau kemalangan.

viii. Program Insentif Hasil Tangkapan Ikan (IHTI)

Insentif yang diberikan kepada pemilik vesel berdasarkan kuantiti pendaratan ikan yang diisytiharkan. Pemberian insentif ini bertujuan untuk memberi galakan kepada pemilik vesel perikanan untuk mendaratkan hasil perikanan di dalam negara sekaligus menjana pendapatan.

Sekian, terima kasih

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB DATO' HAJI MOHD SUHAIMI BIN ABDULLAH
[LANGKAWI]**

SOALAN

Dato' Haji Mohd Suhaimi bin Abdullah [Langkawi] minta **MENTERI DALAM NEGERI** menyatakan adakah Kerajaan akan mengambil alih peranan PEMADAM di seluruh Malaysia dan adakah agensi Kerajaan dibenarkan mengambil alih NGO sepertimana berita menyatakan bahawa AADK Negeri Melaka telah menguasai PEMADAM Melaka dengan penglibatan 25 orang kakitangannya sebagai Jawatankuasa Penyelaras PEMADAM Negeri Melaka.

JAWAPAN

Tuan Yang Di Pertua,

Setiap lapisan masyarakat mempunyai peranan yang signifikan dalam bersama-sama Kerajaan untuk memerangi gejala dadah. Penglibatan pertubuhan bukan kerajaan sama ada di peringkat Kebangsaan, Negeri atau Daerah dalam memikul tanggungjawab untuk melaksanakan program-program pencegahan dadah adalah amat dialu-alukan.

Kerjasama erat yang ditunjukkan oleh pelbagai pihak perlu terus diperkukuhkan dan dilihat saling melengkapi antara satu sama lain. Sehubungan dengan itu, penglibatan kakitangan awam dalam sebarang pertubuhan berdaftar perlulah mengikut perlembagaan yang telah diwujudkan untuk memastikan matlamat penubuhan persatuan tersebut tercapai.

Berkaitan keahlian PEMADAM Negeri yang dibangkitkan, semakin mendapati Perlembagaan Persatuan Mencegah Dadah Malaysia (PEMADAM) membenarkan untuk pegawai Kerajaan menjadi sebahagian daripada ahli jawatankuasa PEMADAM Negeri. Sehubungan dengan itu, terdapat 15 orang pegawai AADK Negeri dan Daerah yang telah dilantik sebagai ahli jawatankuasa PEMADAM Negeri Melaka bersama wakil Jabatan / Agensi yang lain serta 3 orang bekas klien AADK.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB DATO' HAJI MOHD SUHAIMI BIN ABDULLAH
[LANGKAWI]**

SOALAN

Dato' Haji Mohd Suhaimi bin Abdullah [Langkawi] minta **MENTERI
DALAM NEGERI** menyatakan hala tuju Kementerian dalam memerangi
dadah di negara kita.

JAWAPAN

Tuan Yang Di Pertua,

Usaha Negara dalam membanteras gejala dadah dipandu oleh Dasar Dadah Negara (DDN) yang merupakan kerangka kerja komprehensif untuk mencegah, merawat dan memulih, menguatkuasakan undang-undang dan mengurangkan kemudaratan masalah penagihan dadah. Pelan Dadah Terkawal 2025 dijadikan sebagai kerangka hala tuju yang inklusif dan holistik bertujuan menangani permasalahan dadah yang melibatkan pelbagai Agensi Kerajaan, Sektor Swasta dan Badan Bukan Kerajaan.

Kementerian melalui Agensi Antidadah Kebangsaan (AADK) sedang melaksanakan pendekatan bersasar bagi menangani masalah penyalahgunaan dadah, bahan dan pelencongan sosial menerusi Program Penghijauan Kawasan Berisiko Tinggi Penagihan Dadah (KBT). Sebanyak 155 KBT telah dikenalpasti yang merupakan kawasan tumpuan masalah penagihan dadah berdasarkan peratusan populasi klien dalam komuniti seluruh negara.

Program Penghijauan KBT ini melibatkan 4 fasa yang menggariskan beberapa strategi program iaitu i) mencegah penagih baharu; ii) mengekalkan kadar kepulihan klien; iii) meningkatkan pengesanan penagih dadah; iv) meningkatkan kerjasama dan penglibatan agensi serta komuniti; dan v) menyekat kemasukan dadah.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : TUAN HAJI MOHD SYAHIR BIN CHE
SULAIMAN [BACHOK]

SOALAN

TUAN HAJI MOHD SYAHIR BIN CHE SULAIMAN [BACHOK] minta **MENTERI KEWANGAN** menyatakan anggaran saiz 'ekonomi bayangan' (*shadow economy*) daripada nilai KDNK negara dan apakah langkah bersepadu untuk mengatasi ketirisan hasil dan ketidakpatuhan 'ekonomi bayangan' yang dikhuatiri makin berleluasa dalam negara.

JAWAPAN

Tuan Yang di-Pertua,

Untuk makluman Ahli Yang Berhormat, Ekonomi Bayangan (SE) wujud di setiap negara sama ada maju ataupun membangun termasuk Malaysia. Walaupun saiz SE dapat dianggarkan tetapi pengukurannya agak sukar dan mencabar. Ini adalah disebabkan tiada definisi, data dan kaedah yang standard diguna pakai bagi pengukuran saiz SE, maka terdapat saiz ukuran yang berbeza dalam sesuatu kajian bergantung kepada definisi, kaedah dan data yang diguna pakai.

Laporan daripada Kementerian Kewangan (MOF) – *Economic Outlook* bagi tahun 2021 dan 2023 menunjukkan bahawa saiz SE menunjukkan kadar penurunan. Secara puratanya, bagi tempoh 2010 hingga 2019 saiz SE di Malaysia adalah dianggarkan 21.2% berbanding tempoh 2000 – 2009, di mana saiz SE adalah 30.2%. Berdasarkan laporan *Economic Outlook* tersebut, dianggarkan saiz SE adalah kurang dari 18% berbanding KDNK negara. Saiz ini adalah bersamaan dengan RM277.024 bilion daripada anggaran KDNK tahun 2023.

Jumlah RM277.024 bilion ini hanyalah anggaran nilai aktiviti SE tetapi jumlah cukai dapat dikutip adalah jauh lebih rendah memandangkan pengenaan cukai adalah bergantung kepada keuntungan, pelbagai belanja, pelepasan dan rebat cukai yang layak dituntut oleh individu atau perniagaan. Selain daripada itu, individu ataupun perniagaan yang terlibat di dalam aktiviti ini akan berusaha memastikan aktiviti mereka tidak dapat dikesan oleh Lembaga Hasil Dalam Negeri Malaysia (LHDNM) atau agensi penguat kuasa yang lain.

Untuk makluman Ahli Yang Berhormat juga, bagi mengatasi ketirisan hasil dan ketidakpatuhan SE, Kerajaan melalui LHDNM sentiasa proaktif dalam menangani isu SE bagi meningkatkan kadar pematuhan cukai, mengekang ketirisan hasil dan seterusnya meningkatkan kepercayaan orang awam terhadap sistem percukaian negara. Menyedari kepentingan data dan maklumat bagi memerangi SE, Kerajaan melalui

LHDNM telah melaksanakan dua inisiatif utama, iaitu nombor pengenalan cukai (*Tax Identification Number –TIN*) dan E-Invois (*e-Invoicing*).

Penjelasan lanjut mengenai TIN dan E-Invois adalah seperti berikut:

1. TIN:

- a. Matlamat utama pengenalan TIN adalah untuk membina budaya pematuhan cukai sebagai *a way of life* dan kewajipan kepada negara; dan
- b. Pelaksanaan TIN yang bermula pada 1 Januari 2022 akan memastikan pelbagai dokumen atau borang diwajibkan mempunyai TIN. Ini akan meningkatkan aktiviti pengesanan LHDNM, asas percukaian negara dan seterusnya berupaya menangani isu ekonomi bayangan dan ketirisan hasil negara.

2. E-Invois:

- a. Inisiatif ini akan memberikan pelbagai manfaat kepada banyak pihak iaitu dari segi meningkatkan kecekapan perniagaan, menangani ekonomi bayangan dan mengekang ketirisan hasil cukai negara; dan
- b. Selaras dengan pelaksanaan TIN, e-Invois yang menyalurkan data invois secara *real-time* sekaligus dapat meningkatkan kecekapan pengesanan, tren aktiviti ekonomi, analisa risiko dan fokus audit / siasatan yang lebih tepat dan keberhasilan yang tinggi. Ini sekaligus dapat menangani isu ketirisan cukai dan ekonomi bayangan yang dianggarkan 18% daripada KDNK negara bersamaan dengan 277.024 bilion yang wujud di Malaysia.

Selain daripada polisi di atas, LHDNM telah menyusun setiap isu – isu ekonomi bayangan dan strategi menanganinya melalui Jawatankuasa Pemandu SE dan Rangka Kerja Strategi Menangani Isu SE di Malaysia.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : TUAN MOHD SYAHIR BIN CHE SULAIMAN
[BACHOK]**

SOALAN

TUAN MOHD SYAHIR BIN CHE SULAIMAN [BACHOK] minta **MENTERI EKONOMI** menyatakan status pelaksanaan Program Pembasmian Kemiskinan Tegar Keluarga Malaysia (BMTKM) yang diterajui oleh Unit Perancang Ekonomi (EPU) dan Unit Penyelarasan Pelaksanaan (ICU) sehingga Disember 2022, bagi mencapai sasaran kemiskinan tegar sifar pada penghujung tahun 2025 dengan pendekatan baharu yang holistik.

JAWAPAN

Program Pembasmian Kemiskinan Tegar (BMT) telah diperkenal dalam Rancangan Malaysia Kedua Belas, 2021-2025 (RMKe-12) sebagai usaha Kerajaan untuk membasmi kemiskinan tegar mengguna pakai pendekatan baharu yang lebih holistik. Pendekatan baharu ini mengguna pakai pendekatan keseluruhan negara (*whole-of-nation approach*), pendekatan dari bawah ke atas serta penyelesaian kemiskinan secara bersasar di peringkat pusat, negeri dan daerah.

Dalam hubungan ini, Unit Perancang Ekonomi, Jabatan Perdana Menteri (EPU, JPM) atau kini, Kementerian Ekonomi dan Unit Penyelarasan Pelaksanaan (ICU), JPM telah diberi tanggungjawab untuk menyelaras dan memudah cara pelaksanaan IPR. Pelaksanaan IPR ini melibatkan kerjasama pihak kerajaan peringkat pusat, negeri dan daerah, universiti awam (UA), pihak swasta, syarikat berkaitan kerajaan (GLC),

pertubuhan masyarakat sivil (CSO) dan organisasi berasaskan komuniti (CBO).

Pelaksanaan BMT adalah secara berfasa di 1,000 lokaliti seluruh negara bermula pada tahun 2022 hingga 2025. Fasa 1 telah mula dilaksanakan pada bulan Jun 2022 di 80 lokaliti secara rintis dan melibatkan kira-kira 2,600 ketua isi rumah (KIR) miskin tegar.

Daripada jumlah tersebut, Jawatankuasa Penilaian Permohonan Projek BMT Peringkat Kementerian Ekonomi dan ICU, JPM telah meluluskan projek berbentuk peningkatan pendapatan serta pembangunan modal insan dan minda bagi 76 lokaliti melibatkan 1,699 KIR dan 56 ahli isi rumah (AIR) dengan kos berjumlah RM22.4 juta. Terdapat seramai 317 KIR (11.8) masih dalam proses penilaian, 106 KIR (3.9%) yang akan menyertai fasa berikutnya dan 568 KIR (21.4%) tidak berminat untuk menyertai IPR atas pelbagai faktor seperti masalah kesihatan, komitmen terhadap pekerjaan sedia ada dan kecenderungan untuk menerima bantuan secara tunai.

Semenjak program BMT ini diperkenalkan, terdapat isi rumah yang telah berjaya meningkatkan pendapatan bulanan mereka. Sehingga 31 Januari 2022, seramai 92 isi rumah telah berjaya meningkatkan purata pendapatan isi rumah sehingga RM800.00 sebulan. Manakala, sebanyak 58 isi rumah telah berjaya meningkatkan purata pendapatan melepasi PGK Makanan.

Kementerian Ekonomi telah melancarkan Inisiatif Pendapatan Rakyat (IPR) pada 26 Februari 2023 yang merupakan penjenamaan semula kepada BMT. Di bawah IPR, sebanyak 3 inisiatif rintis telah diperkenalkan iaitu Inisiatif Usahawan Tani (INTAN), Inisiatif Usahawan Makanan (INSAN) dan Inisiatif Operator Perkhidmatan (IKHSAN). Inisiatif ini melibatkan kerjasama antara Kerajaan, rakyat dan rakan-rakan strategik melalui *whole-of-nation approach* dalam usaha menangani kemiskinan dan ketidaksamaan di bawah RMKe-12 serta prinsip Ihsan dalam Kerangka Dasar MADANI.

Kehadapan, Kementerian Ekonomi sedang menambah baik lagi pendekatan pelaksanaan IPR dengan mencipta peluang ekonomi yang lebih mampan kepada peserta berdasarkan keperluan rantai nilai ekonomi nasional dan disokong oleh komuniti setempat. Aktiviti pemetaan sedang dilaksanakan terhadap peserta dan rantai nilai ekonomi setempat bagi memastikan peserta dapat dipadankan dengan syarikat atau perniagaan setempat yang sesuai berdasarkan latar belakang dan kebolehan sedia ada. Selain itu, penglibatan koperasi setempat dengan penyertaan pemegang taruh akan dimanfaatkan bagi membolehkan peserta diberi bimbingan dan dipantau secara berterusan oleh pihak koperasi sekaligus mengurangkan kebergantungan terhadap pihak Kerajaan.

Secara keseluruhannya, pelaksanaan IPR mengguna pakai pendekatan baharu ini dijangka akan dapat melengkapi pelaksanaan program pembasmian kemiskinan tegar sedia ada dalam usaha Kerajaan untuk mengeluarkan lebih banyak KIR dari kepompong kemiskinan tegar. Dengan komitmen dan penyertaan kolektif semua pihak, berpaksikan prinsip Ihsan di bawah kerangka MADANI, Insya-Allah sasaran untuk mencapai objektif kemiskinan tegar sifar pada akhir tahun 2025 dapat direalisasikan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT,
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN(BERTULIS)

**DARIPADA : TUAN MOHD SYAHIR BIN CHE SULAIMAN
(BACHOK)**

SOALAN

TUAN MOHD SYAHIR BIN CHE SULAIMAN (BACHOK) minta **MENTERI PEMBANGUNAN USAHAWAN DAN KOPERASI** menyatakan program-program serta bengkel-bengkel bimbingan keusahawanan yang telah dilaksanakan di seluruh negeri Kelantan pada tahun 2022 dan apakah program-program tersebut berjaya mencapai sasaran dan objektif yang ditetapkan bagi melahirkan lebih ramai usahawan baharu di Kelantan.

JAWAPAN

Tuan Yang di-Pertua,

1. Kementerian Pembangunan Usahawan dan Koperasi (KUSKOP) telah melaksanakan pelbagai program keusahawanan di Negeri Kelantan bagi meningkatkan kemahiran usahawan sedia ada serta melahirkan lebih ramai usahawan baharu melalui program *Professional Training and Education for Growing Entrepreneurs* (PROTÉGÉ) dan agensi-agensi di bawah Kementerian.
2. Program-program yang telah dilaksanakan oleh KUSKOP melalui PROTEGE adalah seperti berikut:
 - i. seramai 100 graduan daripada Universiti Malaysia Kelantan (UMK) telah menerima latihan bagi pembangunan produk melalui **Program Usahawan Perantis (SPACE)** pada tahun 2022. Daripada jumlah tersebut, seramai 15 peserta yang menamatkan program dan menepati kriteria ditetapkan, telah menerima geran sebanyak RM10,000 setiap seorang;
 - ii. seramai 93 peserta dalam kalangan belia dan graduan di negeri Kelantan telah menyertai **Program Latihan Intensif Dalam Talian Bagi Usahawan Generasi Baru (N-GENE)** yang menyediakan latihan secara *end-to-end* untuk membantu graduan memulakan perniagaan merangkumi latihan asas keusahawanan, bimbingan perniagaan bersama *business coach* dan penyaluran geran mikro permulaan perniagaan.
3. Selain itu, KUSKOP menerusi agensinya telah melaksanakan **program latihan** pada tahun 2022 yang memberi peluang kepada usahawan mendalami ilmu keusahawanan seperti berikut:
 - i. **TEKUN Nasional** telah menganjurkan tiga (3) siri **Seminar Asas Keusahawanan** di Negeri Kelantan di mana seramai 974 orang usahawan telah mendapat pendedahan berkaitan asas keusahawanan, pemasaran dan kewangan;

- ii. **Institut Keusahawanan Negara (INSKEN)** telah melaksanakan 20 **program keusahawanan** di Negeri Kelantan melibatkan 1,264 peserta. INSKEN juga melaksanakan 2 program bimbingan bersama pakar industri INSKEN selama 4 bulan melibatkan 55 orang peserta di Kelantan;
- iii. SME Corp. telah melaksanakan **Program Tunas Usahawan Belia Bumiputera (TUBE)** melibatkan seramai **26 belia Bumiputera** dari Negeri Kelantan dengan jumlah penyaluran geran permulaan perniagaan sebanyak RM270,000; dan
- iv. **Bank Rakyat** telah melaksanakan program bimbingan keusahawanan di Negeri Kelantan seperti Program *Cooperative Advisory Desk (CAD) Bank Rakyat*, Program *Business Matching*, RAKYATpreneur dan Bank Rakyat UNIPreneur. Seramai **299 usahawan** telah diberi bimbingan melalui program-program tersebut.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN HAJI MOHD SYAHIR BIN CHE
SULAIMAN (BACHOK)**

SOALAN

TUAN HAJI MOHD SYAHIR BIN CHE SULAIMAN [BACHOK] minta **MENTERI KERJA RAYA** menyatakan perancangan Kerajaan untuk mengatasi masalah kesesakan lalu lintas di sekitar bandar Jelawat yang menyulitkan penduduk dan pengunjung luar khususnya jangkaan trafik apabila Hospital Bachok siap kelak.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian ini amat mengambil berat akan masalah kesesakan lalu lintas yang berlaku khususnya di kawasan-kawasan bandar. Bagi lokasi yang dimaksudkan oleh Ahli Yang Berhormat, bandar Jelawat terletak di laluan D10 yang mana ianya adalah merupakan jalan Negeri.

Kementerian mengambil maklum akan Hospital Bachok yang dibangunkan di laluan D14 yang berhubung dengan laluan D10. Oleh demikian, Kementerian telah mengambil kira keperluan untuk menambahbaik laluan sedia ada selari dengan keperluan *Traffic Impact Assessment* (TIA) dalam skop pembinaan Hospital Bachok.

Bagi jalan-jalan Negeri yang lain di sekitar Bandar Jelawat, sebarang cadangan penambahbaikan bagi tujuan mengurangkan kesesakan di jalan-jalan Negeri adalah di luar bidang kuasa Kementerian.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN (BERTULIS)

**DARIPADA : TUAN MOHD SYAHIR BIN CHE SULAIMAN
[BACHOK]**

SOALAN

TUAN MOHD SYAHIR BIN CHE SULAIMAN [Bachok] minta **MENTERI PERDAGANGAN DALAM NEGERI DAN KOS SARA HIDUP** menyatakan adakah perancangan di pihak Kerajaan untuk menetapkan harga siling DOC (Day-Old Chick) memandangkan ianya merupakan salah satu faktor utama kenaikan harga ayam pada hari ini.

JAWAPAN

Yang di-Pertua,

Kerajaan buat masa ini hanya mengawal harga ayam hidup, ayam standard dan ayam super sahaja. Harga DOC tidak dikawal kerana ianya dipengaruhi oleh pelbagai kos pengeluaran yang sukar dijangka seperti kenaikan harga jagung dan kacang soya, ubat, vaksin, kos ayam baka dan sebagainya. Harga-harga ini dipengaruhi oleh kos import dari luar negara.

Kos utama anak ayam juga dipengaruhi oleh jumlah ayam pembaka yang kurang pada masa ini akibat kesan penyakit selesema burung yang melanda negara pengeluar.

Berbanding dengan DOC, kos utama pengeluaran ayam ialah makanan ternakan seperti jagung dan soya yang merupakan bahan utama penghasilan dedak. Makanan ternakan tersebut menyumbang antara 65% - 70% daripada kos pengeluaran utama dalam sektor ini.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

DARIPADA : TUAN MORDI BIMOL [MAS GADING]

SOALAN

Minta **PERDANA MENTERI** menyatakan jumlah kos serta bilangan Projek Infrastruktur Asas (PIAS) yang telah dilaksanakan sepanjang 2019 hingga 2022 bagi seluruh Sarawak dan juga di Kawasan Parlimen Mas Gading.

JAWAPAN

**DIJAWAB OLEH YB DATUK ARMIZAN BIN MOHD ALI,
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)**

Tuan Yang di-Pertua,

1. Sepanjang tahun 2019 hingga 2022, Kerajaan tidak menyediakan sebarang peruntukan khusus bagi melaksanakan projek di bawah program Projek Infrastruktur Asas (PIAS). Walau bagaimanapun, Kerajaan sentiasa komited dalam melaksanakan projek-projek kecil bagi menambah baik fasiliti melibatkan ameniti sosial untuk kesejahteraan rakyat. Dari tahun 2019 hingga 2022, sebanyak **1,329 projek kecil** telah dilaksanakan di seluruh Sarawak melibatkan kos sebanyak **RM163,197,852.84**. Manakala, sebanyak **42 projek kecil** telah dilaksanakan di Kawasan Parlimen Mas Gading melibatkan kos sebanyak **RM2,810,000.00**.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAJAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN MORDI BIMOL [MAS GADING]

SOALAN

TUAN MORDI BIMOL [MAS GADING] minta **PERDANA MENTERI** menyatakan jumlah bayaran royalti minyak dan gas yang diterima secara tahunan dari PETRONAS kepada Kerajaan Negeri Sabah dan Kerajaan Negeri Sarawak bermula dari tahun 1974 sehingga tahun 2021.

JAWAPAN:

YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)

Tuan Yang di-Pertua,

Berdasarkan rekod PETRONAS dari tahun 1975 sehingga tahun 2022, jumlah bayaran tunai petroleum oleh PETRONAS yang dibayar secara terus kepada Kerajaan Negeri Sabah dan Sarawak adalah seperti berikut:

Sabah : RM21.2 bilion
 Sarawak : RM44.0 bilion

Tahun	Sabah (RM billion)	Sarawak (RM billion)
2018	1.7	1.9
2019	1.5	1.9
2020	0.9	1.3
2021	1.2	1.6
2022	1.9	2.9
1975-2022	21.2	44.0

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN MORDI BIMOL [MAS GADING]

SOALAN

TUAN MORDI BIMOL [MAS GADING] minta **MENTERI PENDIDIKAN** menyatakan statistik jumlah pelajar lepasan SPM menyambung pelajaran dan tidak menyambung pelajaran dari tahun 2018 sehingga tahun 2021 bagi S.M.K. Bau, S.M.K. Lake, SM.K. Singai, S.MK. Senibong, S.M.K. Lundu dan S.M.K. Sematan. Nyatakan jumlah bagi mereka yang menyambung pelajaran sama ada ke tingkatan 6, kolej matrikulasi, politeknik, diploma IPTA/IPTS, IPG, asasi, A-Level dan kolej komuniti.

JAWAPAN

Tuan Yang di-Pertua,

Kementerian Pendidikan Malaysia (KPM) telah mengambil inisiatif mengumpulkan maklumat Pengesanan Lepas Sijil Pelajaran Malaysia (SPM) melalui Sistem eProfil Kerjaya Murid (ePKM).

Jadual di bawah adalah statistik mengikut pecahan lepasan SPM melanjutkan pelajaran mengikut sekolah yang telah dilaporkan melalui sistem ePKM pada tahun 2018, 2019 dan 2020 manakala lepasan SPM 2021 masih lagi dalam proses pelaporan dalam sistem ePKM yang akan berakhir pada 17 Februari 2023.

	SMK BAU					
	2018	%	2019	%	2020	%
TINGKATAN 6	38	11.73	42	13.25	66	32.20
KOLEJ MATRIKULASI		0.00	3	0.95	6	2.93
POLITEKNIK	10	3.09	15	4.73	8	3.90
KOLEJ KOMUNITI		0.00	5	1.58		0.00
A-LEVEL		0.00		0.00		0.00
DIPLOMA IPTA	11	3.40	14	4.42	8	3.90
DIPLOMA IPTS		0.00	6	1.89		0.00
IPG	1	0.31	1	0.32	5	2.44
ASASI		0.00	9	2.84	4	1.95
KEMAHIRAN (ILKA)	50	15.43	5	1.58	2	0.98
KEMAHIRAN (ILKS)	2	0.62	4	1.26	1	0.49
JUMLAH SAMBUNG BELAJAR	112	34.57	104	32.81	100	48.78
JUMLAH TIDAK SAMBUNG BELAJAR	212	65.43	213	67.19	105	51.22
JUMLAH KESELURUHAN	324	100	317	100	205	100

SOALAN NO : 345

	SMK LAKE					
	2018	%	2019	%	2020	%
TINGKATAN 6	89	25.65	92	34.07	66	20.37
KOLEJ MATRIKULASI	3	0.86	3	1.11	6	1.85
POLITEKNIK	9	2.59	7	2.59	8	2.47
KOLEJ KOMUNITI		0.00		0.00		0.00
A-LEVEL		0.00		0.00		0.00
DIPLOMA IPTA	1	0.29	3	1.11	11	3.40
DIPLOMA IPTS		0.00	2	0.74	7	2.16
IPG		0.00		0.00		0.00
ASASI	2	0.58	1	0.37		0.00
KEMAHIRAN (ILKA)	1	0.29	7	2.59	1	0.31
KEMAHIRAN (ILKS)	8	2.31	2	0.74		0.00
JUMLAH SAMBUNG BELAJAR	113	32.56	117	43.33	99	30.56
JUMLAH TIDAK SAMBUNG BELAJAR	234	67.44	153	56.67	225	69.44
JUMLAH KESELURUHAN	347	100	270	100	324	100

SOALAN NO : 345

	SMK SINGAI					
	2018	%	2019	%	2020	%
TINGKATAN 6	Tiada maklumat				29	18.71
KOLEJ MATRIKULASI					1	0.65
POLITEKNIK					11	7.10
KOLEJ KOMUNITI						0.00
A-LEVEL						0.00
DIPLOMA IPTA					3	1.94
DIPLOMA IPTS					5	3.23
IPG						0.00
ASASI					1	0.65
KEMAHIRAN (ILKA)					18	11.61
KEMAHIRAN (ILKS)						0.00
JUMLAH SAMBUNG BELAJAR					68	43.87
JUMLAH TIDAK SAMBUNG BELAJAR					87	56.13
JUMLAH KESELURUHAN	0	0	0	0	155	100

*SMK Singai tidak melaporkan keberadaan lepasan SPM pada tahun 2018 dan 2019 oleh kerana terdapat masalah teknikal dan tidak dapat menghubungi lepasan SPM.

	SMK SENIBONG					
	2018	%	2019	%	2020	%
TINGKATAN 6	Tiada maklumat		3	3.66	24	4.46
KOLEJ MATRIKULASI				0.00		0.00
POLITEKNIK			2	2.44		2.97
KOLEJ KOMUNITI				0.00		0.00
A-LEVEL				0.00		0.00
DIPLOMA IPTA				0.00		0.00
DIPLOMA IPTS			1	1.22		1.49
IPG				0.00		0.00
ASASI				0.00		0.00
KEMAHIRAN (ILKA)				0.00	2	0.00
KEMAHIRAN (ILKS)				0.00	2	0.00
JUMLAH SAMBUNG BELAJAR			6	7.32	28	34.15
JUMLAH TIDAK SAMBUNG BELAJAR			76	92.68	54	65.85
JUMLAH KESELURUHAN	0	0	82	100	82	100

*SMK Senibong tidak melaporkan keberadaan lepasan SPM pada tahun 2019 oleh kerana tidak dapat menghubungi lepasan SPM.

	SMK LUNDU					
	2018	%	2019	%	2020	%
TINGKATAN 6	37	12.46	44	22.92	50	26.88
KOLEJ MATRIKULASI	9	3.03	10	5.21	2	1.08
POLITEKNIK	8	2.69	12	6.25	8	4.30
KOLEJ KOMUNITI		0.00		0.00		0.00
A-LEVEL		0.00		0.00		0.00
DIPLOMA IPTA	15	5.05	10	5.21	12	6.45
DIPLOMA IPTS	13	4.38	6	3.13	9	4.84
IPG		0.00	1	0.52	3	1.61
ASASI	4	1.35	3	1.56	4	2.15
KEMAHIRAN (ILKA)	16	5.39	4	2.08	2	1.08
KEMAHIRAN (ILKS)	1	0.34	1	0.52	5	2.69
JUMLAH SAMBUNG BELAJAR	103	34.68	91	47.40	95	51.08
JUMLAH TIDAK SAMBUNG BELAJAR	194	65.32	101	52.60	91	48.92
JUMLAH KESELURUHAN	297	100	192	100	186	100

	SMK SEMATAN					
	2018	%	2019	%	2020	%
TINGKATAN 6	11	6.18	41	20.40	56	31.46
KOLEJ MATRIKULASI	2	1.12	4	1.99	2	1.12
POLITEKNIK	4	2.25		0.00		0.00
KOLEJ KOMUNITI	1	0.56		0.00		0.00
A-LEVEL		0.00		0.00		0.00
DIPLOMA IPTA	3	1.69	2	1.00		0.00
DIPLOMA IPTS		0.00		0.00		0.00
IPG	1	0.56		0.00		0.00
ASASI	2	1.12		0.00		0.00
KEMAHIRAN (ILKA)		0.00	3	1.49		0.00
KEMAHIRAN (ILKS)	2	1.12	1	0.50		0.00
JUMLAH SAMBUNG BELAJAR	26	14.61	51	25.37	58	32.58
JUMLAH TIDAK SAMBUNG BELAJAR	152	85.39	150	74.63	120	67.42
JUMLAH KESELURUHAN	178	100	201	100	178	100

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
**DARIPADA : TUAN MORDI ANAK BIMOL [MAS
GADING]**

SOALAN

TUAN MORDI ANAK BIMOL [MAS GADING] minta **MENTERI KEWANGAN** menyatakan senarai jumlah kutipan cukai yang telah dikutip oleh Kerajaan Persekutuan daripada Sarawak pada tahun 2018, 2019, 2020 dan 2021.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan Persekutuan melalui Lembaga Hasil Dalam Negeri dan Jabatan Kastam Diraja Malaysia mengutip hasil cukai langsung dan cukai tidak langsung dari Negeri Sarawak yang merangkumi cukai pendapatan syarikat dan individu, cukai pendapatan petroleum, cukai keuntungan harta tanah, duti setem, duti import, duti eksport, duti eksais, cukai jualan dan cukai perkhidmatan. Hasil bukan cukai pula seperti bayaran lesen, permit, denda, penalti dan sewaan dikutip oleh Jabatan/Agensi Persekutuan yang lain.

Berhubung pertanyaan Yang Berhormat mengenai jumlah hasil cukai yang dikutip oleh Kerajaan Persekutuan dari Negeri Sarawak, adalah dimaklumkan bahawa perkara ini ada kaitannya dengan tuntutan Pemberian Khas oleh Kerajaan Negeri Sarawak di bawah Perjanjian Malaysia 1963 (MA63) yang masih lagi dalam proses rundingan dengan Kerajaan Persekutuan. Oleh yang demikian, maklumat mengenai jumlah hasil cukai yang dikutip oleh Kerajaan Persekutuan dari Negeri Sarawak adalah tidak sesuai dikemukakan pada masa ini. Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

**PERTANYAAN : BUKAN LISAN
DARIPADA : TUAN MORDI ANAK BIMOL [MAS
GADING]**

SOALAN

TUAN MORDI ANAK BIMOL [MAS GADING] minta **MENTERI KEWANGAN** menyatakan:’

- (a)jumlah peruntukan tahunan di bawah perbelanjaan bekalan dan pembangunan untuk Sarawak bagi tahun 2018 hingga 2022 (mengikut setiap Kementerian); dan
- (b)berapa jumlah peruntukan yang dipulangkan semula kepada Kementerian Kewangan disebabkan peruntukan tidak sempat digunakan pada tahun semasa.

JAWAPAN

Tuan Yang di-Pertua,

Untuk makluman Yang Berhormat, peruntukan mengurus (atau OE) dan perbelanjaan pembangunan (atau DE) bagi negeri Sarawak pada tahun 2022 adalah masing-masing sebanyak 12.04 bilion ringgit dan 4.67 bilion ringgit. Secara keseluruhan, peruntukan OE dan DE untuk negeri Sarawak bagi tahun 2018 hingga 2022 berjumlah masing-masing 43.78 bilion ringgit dan 22.31 bilion ringgit. Jumlah OE ini adalah merangkumi pembiayaan pengoperasian kementerian/jabatan Persekutuan di negeri Sarawak serta pemberian tahunan kepada Kerajaan Negeri Sarawak. Pemberian ini telah meningkat daripada 1.30 bilion ringgit pada tahun 2018 kepada 1.31 bilion ringgit pada tahun 2022.

Peruntukan DE untuk projek pembangunan di negeri Sarawak telah meningkat daripada 4.31 bilion ringgit pada tahun 2018 kepada 4.67 bilion ringgit pada tahun 2022. Perbelanjaan DE di negeri Sarawak antaranya adalah bagi pelaksanaan projek Lebuhraya Pan Borneo (LPB) Sarawak, jalan perhubungan desa, jalan-jalan luar bandar, bekalan elektrik luar bandar dan bekalan air luar bandar serta menaik taraf sekolah daif. Pecahan perbelanjaan DE mengikut kementerian seperti di Lampiran.

Tuan Yang Di-Pertua,

Pada setiap tahun, terdapat pelaksanaan projek-projek pembangunan Kerajaan Persekutuan yang tidak dapat dilaksanakan mengikut jadual yang dirancang. Tiada istilah peruntukan dipulangkan semula tetapi kementerian akan memohon sekatan berdasarkan prestasi pelaksanaan dan peruntukan akan disediakan pada tahun seterusnya jika ada keperluan. Kementerian/Jabatan Persekutuan kebiasaannya akan memohon sekatan peruntukan DE kepada Kementerian Kewangan terutamanya pada suku tahun keempat tahun berkenaan. Ini termasuk peruntukan yang dipohon untuk disekat oleh kementerian bagi projek-projek pembangunan yang tidak dapat dilaksanakan mengikut jadual di negeri-negeri termasuk Sarawak. Walau bagaimanapun, peruntukan bagi projek-projek pembangunan yang telah bermula akan terus disediakan pada tahun berikutnya bagi memastikan projek disiapkan mengikut perancangan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' MUHAMMAD BAKHTIAR BIN
WAN CHIK [BALIK PULAU]**

SOALAN

DATO' MUHAMMAD BAKHTIAR BIN WAN CHIK [BALIK PULAU]
minta **MENTERI SUMBER ASLI, ALAM SEKITAR DAN PERUBAHAN
IKLIM** menyatakan kedudukan dan ketersediaan Kementerian dalam
merangka polisi yang mampan bagi berdepan dengan isu perubahan
iklim.

JAWAPAN

1. Untuk makluman Ahli Yang Berhormat, Kementerian telah menggubal Dasar Perubahan Iklim 2009 bagi tujuan untuk mengarusperdanakan perubahan iklim. Selain itu, Kementerian juga telah mengemukakan laporan *Malaysia Third National Communication (NC3)* pada tahun 2019 yang mengandungi maklumat berkenaan inventori gas rumah kaca (GHG) disamping mengenalpasti isu dan cabaran perubahan iklim dari sudut mitigasi dan adaptasi perubahan iklim.

2. Dengan mengambil kira cabaran yang bakal dihadapi negara dalam mengurangkan pelepasan GHG, Kementerian dalam proses membangunkan dokumen polisi *Nationally Determined Contributions (NDC) Roadmap and Action Plan*. Polisi ini antara lain akan:

(i) menetapkan sasaran jumlah pelepasan GHG yang perlu dikurangkan bagi sektor-sektor tenaga, industri pemprosesan dan guna produk, pertanian, guna tanah, pertukaran guna tanah dan perhutanan, dan sisa (sector-specific GHG emission reductions target) sehingga tahun 2030;

(ii) mengenalpasti struktur tadbir urus dan membangunkan rangka pemantauan dan penilaian bagi membantu Kementerian menjalankan penyelarasan, pemantauan dan penilaian di peringkat kebangsaan; dan

(iii) mengenalpasti sumber dan kapasiti merangkumi kewangan, teknologi dan keperluan lain bagi mencapai sasaran yang ditetapkan dan mengenalpasti kekangan yang dihadapi.

3. Dalam masa yang sama, Kementerian turut dalam proses membangunkan dokumen komunikasi Strategi Rendah Karbon Jangka Masa Panjang (Long Term Low Emission Development Strategies - LT-LEDS) yang dijangka dikemukakan kepada Konvensyen Rangka Kerja Perubahan Iklim Pertubuhan Bangsa-Bangsa Bersatu (United Nations Framework Convention on Climate Change - UNFCCC) pada tahun ini. LT-LEDS akan memberikan konteks perancangan jangka panjang,

keutamaan pembangunan, wawasan serta halatuju pembangunan akan datang. Ini termasuk maklumat mengenai bilakah negara boleh mencapai pelepasan GHG sifar bersih atau net zero samada pada tahun 2050 atau lebih awal.

4. Selain pengurangan GHG, Kementerian juga mengambil kira keperluan untuk menyesuaikan negara kepada kesan perubahan iklim yang telah dan sedang dirasakan ketika ini. Bagi tujuan tersebut, Kementerian juga dalam proses untuk memohon dana di bawah *Green Climate Fund* untuk membangunkan Pelan Tindakan Adaptasi Kebangsaan (National Adaptation Plan, NAP) yang akan melihat kesan perubahan iklim seperti banjir, kenaikan paras laut, hakisan pantai dan kemarau terhadap lima sektor utama iaitu:

- (i) jaminan air dan sumber pesisir;
- (ii) pertanian dan jaminan makanan;
- (iii) infrastruktur, tenaga dan persekitaran terbina termasuk bandaraya;
- (iv) perhutanan dan biodiversiti; dan
- (v) kesihatan awam.

5. Pembangunan ketiga-tiga dokumen polisi ini akan dijadikan rujukan dalam memastikan inisiatif perubahan iklim dapat dilaksanakan secara berkesan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN MUHAMMAD BAKHTIAR BIN WAN
CHIK (BALIK PULAU)**

SOALAN

TUAN MUHAMMAD BAKHTIAR BIN WAN CHIK [BALIK PULAU] minta **MENTERI KERJA RAYA** menyatakan jangkaan projek pembesaran jalan dari Teluk Kumbar ke Lapangan Terbang Antarabangsa Bayan Lepas akan disambung semula yang melibatkan jalan dari Sungai Batu hingga ke PUSPAKOM.

JAWAPAN

Tuan Yan Di-Pertua,

Untuk makluman Ahli Yang Berhormat, cadangan projek yang dimaksudkan adalah Projek Menaiktaraf Jalan Tunggal 2 Lorong Kepada Jalan Berkembar 4 Lorong Di Laluan Persekutuan FT006 Dari Bayan Lepas Ke Teluk Kumbar, Pulau Pinang. (Pakej 2a)- Samb. Pakej 2b (*missing link*).

Kementerian ini telah menerima permohonan cadangan projek tersebut dalam *Rolling Plan* 3 (RP3) Rancangan Malaysia Kedua Belas (RMke-12). Namun tidak dapat dipertimbangkan berdasarkan kedudukan keutamaan projek dan agihan siling peruntukan pembangunan yang terhad untuk projek baharu.

Walau bagaimanapun, Kementerian ini akan meneliti semula cadangan projek ini apabila dimohon dalam *Rolling Plan* RMKe-12 yang akan datang dan akan dipertimbangkan untuk diangkat kepada Agensi Pusat untuk kelulusan, tertakluk kepada kedudukan keutamaan projek dan ketersediaan agihan peruntukan pembangunan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

**DARIPADA : DATO' MUHAMMAD BAKHTIAR BIN WAN CHIK
[BALIK PULAU]**

SOALAN

DATO' MUHAMMAD BAKHTIAR BIN WAN CHIK [BALIK PULAU] minta **MENTERI SUMBER MANUSIA** menyatakan berkenaan sindiket kos pengambilan pekerja asing yang begitu tinggi dan apakah jaminan Kementerian agar isu ini tidak berulang lagi.

JAWAPAN

Tuan Yang di-Pertua,

1. Kerajaan memandang serius terhadap isu ini dan telah mengambil langkah-langkah yang sesuai bagi menangani permasalahan ini. Antara langkah-langkah yang telah dan akan diambil oleh kerajaan untuk membendung masalah ini adalah seperti berikut:
 - i. mengawal dan menetapkan jumlah fi yang boleh dikenakan terhadap majikan yang ingin menggajikan pekerja sebagaimana yang dinyatakan di dalam Jadual Pertama Akta Agensi Pekerjaan Swasta 1981;
 - ii. mengetatkan penguatkuasaan akta-akta perburuhan seperti Akta Kerja 1955, Akta Standard Minimum Perumahan, Penginapan dan Kemudahan Pekerja 1990 serta Akta Imigresen;
 - iii. mewajibkan penglibatan Agensi Pekerjaan Swasta (APS) berdaftar di Malaysia dan di negara sumber dalam proses pengambilan pekerja asing. Keperluan ini telah mula diperkenalkan di dalam Perjanjian Persefahaman (MoU) di antara kerajaan Malaysia dan Republik Indonesia di mana penglibatan APS di kedua-dua buah negara adalah diwajibkan di dalam proses pengambilan pekerja asing;
 - iv. menetapkan kadar siling bagi kos pengambilan pekerja asing melalui perbincangan dan persetujuan bersama antara kerajaan Malaysia dan negara sumber di mana kadar siling yang dipersetujui tersebut akan dimasukkan ke dalam MoU. Trend penetapan kadar siling bagi kos pengambilan pekerja asing akan diteruskan di dalam MoU-MoU yang akan datang ; dan
 - v. menganjurkan sesi libat urus bersama pertubuhan dan persatuan majikan bagi memastikan mereka mengambil pekerja asing melalui saluran yang sah dan mengikut lunas undang-undang bagi mengelakkan mereka terlibat dengan isu pemerdagangan orang

SOALAN NO: 350

dan buruh paksa yang akan memberi kesan lebih buruk kepada perusahaan mereka dan juga imej Negara.

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KE-15**

PERTANYAAN : BUKAN LISAN

**DARIPADA : TUAN MUHAMMAD BAKHTIAR BIN
WAN CHIK [BALIK PULAU]**

SOALAN

**Tuan Muhammad Bakhtiar bin Wan Chik [Balik Pulau] minta
MENTERI KOMUNIKASI DAN MULTIMEDIA** menyatakan hasil
daripada penelitian Kementerian berkenaan kebajikan artis veteran
tanah air.

JAWAPAN

Tuan Yang di-Pertua,

Kementerian Komunikasi dan Digital (KKD) sentiasa prihatin terhadap kebajikan artis veteran dan telah melaksanakan pelbagai program di bawah Jabatan Penyiaran Malaysia (RTM) dan Perbadanan Kemajuan Filem Nasional Malaysia (FINAS) untuk membantu golongan ini.

RTM misalnya telah menyediakan peluang kepada artis-artis veteran muncul di televisyen dan radio dalam rancangan berbentuk hiburan dan drama-drama terbitan *in-house* RTM seperti “Istimewa Lejen”, “Konsert Minggu Ini”, Program Radio Klasik Drama “Purbawara”, Selangor FM “Layar Merah” dan lain-lain. Kemunculan artis veteran dalam program seumpama ini telah mempromosikan bakat mereka dan secara tidak langsung membuka lebih banyak peluang untuk terus berkarya dan menjana pendapatan.

Manakala, FINAS telah melaksanakan Program Kebajikan FINAS untuk meringankan beban penggiat industri kreatif termasuk artis veteran yang mengalami masalah kesihatan, keuzuran dan lain-lain. Melalui program ini, selain daripada lawatan bagi melihat keadaan, sumbangan dalam bentuk kewangan dan keperluan harian turut disampaikan kepada mereka. Antara artis yang pernah dibantu dalam program ini adalah Datuk Deddy M. Borhan (penyanyi dan pengarah filem), Datuk Hajah Sarimah Ahmad (pelakon), Abdul Rasip Yahya atau Mat Sentul (pelakon, pengarah dan pelawak), Allahyarham Hamid Gurkha (pelakon dan pelawak), Wahid Satay (penyanyi, pelakon dan pelawak), Murali Abdullah (penerbit filem) dan Tuan Haji Kassim Daud (pelakon veteran Sarawak).

Kementerian masih meneruskan program-program sedia ada dan turut merangka program baharu dalam memastikan penglibatan artis veteran tidak dipinggirkan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN MUHAMMAD BAKHTIAR BIN WAN
CHIK (BALIK PULAU)**

SOALAN

TUAN MUHAMMAD BAKHTIAR BIN WAN CHIK [BALIK PULAU] minta **MENTERI KERJA RAYA** menyatakan sasaran secara terperinci Kementerian dalam mengadaptasi teknologi bagi sistem lampu isyarat pintar sebagai usaha penggunaan trafik yang lebih lancar.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya mengambil maklum dan bersetuju berkenaan pertanyaan Yang Berhormat mengenai mengadaptasi sistem lampu isyarat pintar sebagai usaha pergerakan trafik yang lebih lancar.

Kementerian Kerja Raya telah merancang untuk inisiatif ini dilaksanakan di lokasi-lokasi terpilih di seluruh negara. Permohonan bagi menaiktaraf lampu isyarat sedia ada kepada lampu isyarat pintar telah dikemukakan kepada Kementerian Kewangan bagi bajet 2023. Kelulusan bagi cadangan penggunaan lampu isyarat pintar tertakluk kepada pertimbangan agensi pusat berdasarkan keutamaan dan kedudukan kewangan semasa negara.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : TUAN MUHAMMAD FAWWAZ BIN MOHAMAD
JAN [PERMATANG PAUH]**

SOALAN

**TUAN MUHAMMAD FAWWAZ BIN MOHAMAD JAN [PERMATANG
PAUH]** minta **MENTERI EKONOMI** menyatakan senarai projek-projek
yang terkandung dalam RMK-12 bagi seluruh negeri Pulau Pinang.

JAWAPAN

Tuan Yang di-Pertua,

Dalam tempoh dua tahun pertama RMKe-12, sebanyak 227 projek telah dilaksanakan di Pulau Pinang dengan kos berjumlah RM12.89 bilion. Bagi tahun 2021, iaitu tahun pertama RMKe-12, sebanyak 182 projek dengan kos berjumlah RM9.37 bilion dilaksanakan di Pulau Pinang yang mana 104 daripadanya merupakan projek sambungan RMKe-11 dan 78 projek baharu. Bagi tahun 2022 pula, terdapat sebanyak 208 projek dengan kos berjumlah RM12.67 bilion dilaksanakan di Pulau Pinang yang terdiri daripada 163 projek sambungan dan 45 projek baharu. Antara contoh projek adalah seperti di bawah:

- i. Pembesaran Empangan Mengkuang, Pulau Pinang;
- ii. Pembinaan Blok Klinik Pakar Dan Wad Hospital Pulau Pinang;
- iii. Menaiktaraf Jalan Persekutuan FT006 Dari Teluk Kumbar Ke Lapangan Terbang Antarabangsa Pulau Pinang, Bayan Lepas, Pulau Pinang;
- iv. Projek Menaik Taraf Loji Rawatan Kumbahan Serantau Di Mak Mandin Dan Pembinaan Rangkaian Paip Pembedungan Dalam Kawasan Tadahan Butterworth North, Pulau Pinang; dan
- v. Pembinaan Baharu Kompleks Sekolah Sungai Tiram, Barat Daya, Pulau Pinang Yang Mengandungi 24 Bilik Darjah Sekolah Rendah Dan 24 Bilik Darjah Sekolah Menengah Serta Lain-Lain Kemudahan Mengikut Piawai.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : TUAN MUHAMMAD FAWWAZ BIN
MOHAMAD JAN [PERMATANG
PAUH]**

SOALAN

**TUAN MUHAMMAD FAWWAZ BIN MOHAMAD JAN [PERMATANG
PAUH]** minta **MENTERI KESIHATAN** menyatakan jumlah klinik
kesihatan dan klinik desa di seluruh negeri Pulau Pinang serta adakah
Kerajaan mempunyai perancangan untuk menaik taraf bangunan klinik
tersebut.

JAWAPAN

Tuan Yang di-Pertua,

1. Negeri Pulau Pinang mempunyai 36 Klinik Kesihatan dan 57 Klinik Desa. Projek-projek klinik kesihatan baharu dan naik taraf yang telah diluluskan pelaksanaannya ialah:

- a) Projek Klinik Kesihatan Jenis 3 dengan kuarters Air Putih, Barat Daya yang dijadual siap pada pertengahan tahun 2023; dan
- b) Projek Klinik Kesihatan Jenis 3 Bandar Tasek Mutiara, Seberang Perai Selatan dalam fasa awal pembinaan dengan kemajuan projek 27%

2. Selain itu, Kementerian juga telah mengenal pasti 15 klinik kesihatan dan klinik desa di Negeri Pulau Pinang yang dikategorikan sebagai klinik daif. Kementerian Kesihatan akan mengkaji kerja-kerja naik taraf yang bersesuaian dan akan dilaksanakan secara secara berperingkat bagi memastikan pengoperasian klinik dapat berjalan lancar dalam keadaan selamat.

3. KKM juga telah memohon sebuah klinik kesihatan baharu di kawasan Mak Mandin dalam *Rolling Plan* ke 4 (2023) dan sedang dalam pertimbangan Kementerian Ekonomi.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

**DARIPADA : TUAN MUHAMMAD FAWWAZ BIN
MOHAMMAD JAN [PERMATANG PAUH]**

SOALAN

TUAN MUHAMMAD FAWWAZ BIN MOHAMAD JAN [Permatang Pauh] minta **MENTERI BELIA DAN SUKAN** menyatakan perancangan jangka pendek dan panjang bagi infrastruktur sukan bagi kawasan Permatang Pauh.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Belia dan Sukan (KBS) pada masa ini tiada perancangan jangka pendek dan jangka panjang bagi infrastruktur sukan di kawasan Permatang Pauh. Keutamaan yang diberikan Kementerian pada masa ini adalah untuk menaik taraf kemudahan KBS sedia ada. Ini adalah kerana pembinaan kemudahan sukan baharu memerlukan penyelenggaraan yang tinggi serta pertambahan perjawatan bagi menguruskannya.

Selain itu, KBS memandang serius ketersediaan tapak dalam pembinaan kemudahan sukan baharu sebagaimana syarat yang ditetapkan oleh Kementerian Ekonomi, iaitu;

- Memastikan tapak/tanah perlu didaftarkan atas nama Pesuruhjaya Tanah Persekutuan (PTP) dengan memperoleh pengesahan pihak Jabatan Ketua Pengarah Tanah dan Galian (JKPTG); dan
- Tapak adalah bebas bebanan dan sedia untuk dimasuki serta tiada isu tapak/tanah projek seperti setingan, bantahan penduduk dan lokasi tidak sesuai apabila membuat permohonan projek fizikal binaan baharu. Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN MUHAMMAD FAWWAZ BIN
MOHAMAD JAN (PERMATANG PAUH)**

SOALAN

TUAN MUHAMMAD FAWWAZ BIN MOHAMAD JAN [PERMATANG PAUH] minta **MENTERI KERJA RAYA** menyatakan perancangan jangka pendek dan panjang bagi menyelesaikan masalah kesesakan di kawasan Juru hingga Sungai Dua yang melibatkan pertembungan pengguna lebuh raya PLUS serta penduduk setempat khususnya waktu puncak.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya mengambil maklum mengenai isu kesesakan lalu lintas di antara kawasan Sungai Dua hingga Juru, Pulau Pinang. Laluan tersebut merupakan jajaran terbuka (*open access*) Lebuhraya PLUS dengan anggaran trafik di antara 30,000 hingga 40,000 kenderaan setiap hari. Jajaran ini juga melibatkan kawasan berkepadatan tinggi dan melibatkan kawasan sekitar seperti Kampung Juru, Bukit Tengah, Seberang Perai, Seberang Jaya, Permatang Pauh dan sebagainya. Kawasan perusahaan utama iaitu Kawasan Perusahaan Juru (*Juru Autocity*), dan Kawasan Perusahaan Perai (*Perai Industrial Park*) juga terletak dalam jajaran ini seterusnya menyumbang kepada jumlah kenderaan berat di laluan ini. Secara amnya, trafik tempatan (*local traffic*) di jajaran ini mempunyai jumlah yang tinggi dan di tambah pula oleh bilangan yang tinggi untuk kenderaan berat yang turut menggunakan laluan itu.

Selain itu, kawasan tersebut menempatkan Plaza Tol Juru dan Plaza Tol Sg.Dua yang merupakan plaza tol terakhir (*end barrier toll plaza*) untuk sistem tertutup jajaran Hutan Kampung ke Sg. Dua (Utara), dan juga jajaran Juru ke Skudai (Selatan). Oleh itu, pengguna trafik terus atau (*through traffic*) yang ingin meneruskan perjalanan dari Utara ke Selatan harus melalui jajaran tersebut dan ini akan menambah bilangan aliran trafik sedia ada. Kesesakan trafik ini akan meningkat berkali ganda khususnya pada musim cuti persekolahan, musim perayaan dan hujung minggu.

Kementerian Kerja Raya (KKR) adalah melalui Lembaga Lebuh Raya (LLM) telahpun membuat beberapa inisiatif dengan pihak PLUS bagi mengurangkan kesesakan di laluan berkenaan bagi penyelesaian jangka pendek. Ini termasuklah:

- i) Menyediakan maklumat awalan kepada pengguna menerusi *Variable Message System* (VMS) dan media sosial;
- ii) Menambah baik konfigurasi lorong di Seberang Jaya;
- iii) Berkerjasama dengan pihak PDRM, JPJ dan APAD bagi tindakan penguatkuasaan lalulintas dan;
- iv) Menggalakkan pengguna dari arah Kuala Lumpur untuk menggunakan Jambatan Sultan Abdul Halim Muadzam Shah atau Jambatan Kedua sebagai laluan ke Pulau Pinang.

Manakala bagi perancangan jangka panjang, Kementerian Kerja Raya bersama pihak *Northern Corridor Economic Region* (NCER) dalam proses perbincangan pelan tindakan untuk menyelesaikan isu kesesakan di kawasan Sungai Dua dan Juru. Selain itu, pada masa ini satu kertas cadangan bagi Lebuhraya Koridor Utara (Northern Corridor Highway – NCH) telah disediakan oleh KKR di mana Lebuhraya NCH ini akan menyediakan *by pass* dari Juru ke Sungai Dua untuk trafik dari selatan menuju ke Kedah dan Perlis tanpa melalui laluan Juru ke Sungai Dua di Lebuhraya PLUS. Cadangan Lebuhraya NCH tersebut akan dilaksanakan secara Kerjasama Awam Swasta dan dalam proses penyediaan Request for Proposal (RfP) di peringkat Unit Kerjasama Awam Swasta. RfP tersebut akan diiklankan secara tender terbuka kepada syarikat – syarikat yang berminat untuk melaksanakan Lebuhraya NCH.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN LISAN

**DARIPADA : TUAN MUHAMMAD FAWWAZ BIN
MOHAMAD JAN [PERMATANG PAUH]**

SOALAN

TUAN MUHAMMAD FAWWAZ BIN MOHAMAD JAN [PERMATANG PAUH] minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah golongan ibu tunggal di sekitar Pulau Pinang serta perancangan untuk meringankan beban sara hidup golongan yang tidak berkemampuan bagi menghadapi suasana inflasi dan kenaikan harga barang.

JAWAPAN

Penemuan utama data Banci Penduduk dan Perumahan 2020 (Banci Malaysia 2020) oleh Jabatan Perangkaan Malaysia (DOSM) telah merekodkan jumlah ibu tunggal meningkat kepada 940,735 orang berbanding 808,787 orang pada tahun 2010 di seluruh Malaysia.

Negeri Pulau Pinang merekodkan peningkatan jumlah ibu tunggal kepada 58,865 orang bagi tahun 2020 berbanding 51,006 orang pada tahun 2010. Perincian jumlah ibu tunggal adalah seperti di **JADUAL 1**.

JADUAL 1: Jumlah ibu tunggal mengikut negeri Banci Penduduk dan Perumahan Malaysia, 2010 dan 2020

Negeri/ Tarf Perkahwinan	2010		2020	
	Jumlah	Peratus	Jumlah	Peratus
Malaysia	808,787	100.0%	940,735	100.0%
Balu/Duda	697,058	86.2%	693,949	73.8%
Bercerai/Berpisah	111,729	13.8%		
Bercerai			216,142	23.0%
Berpisah			30,644	3.3%
Pulau Pinang	51,006	100.0%	58,865	100.0%
Balu/Duda	44,576	87.4%	42,981	73.0%
Bercerai/Berpisah	6,430	12.6%		
Bercerai			13,486	22.9%
Berpisah			2,398	4.1%

(Sumber: DOSM)

Kementerian Pembangunan Wanita, Keluarga dan Masyarakat (KPWK) sentiasa cakna akan keperluan dan menyantuni wanita dalam semua peringkat termasuklah golongan ibu tunggal. Pelbagai inisiatif telah dilaksanakan oleh KPWK menerusi Jabatan Pembangunan Wanita (JPW) antaranya adalah seperti **Advokasi Penjanaan, Ekonomi dan Literasi Kewangan**.

Advokasi Penjanaan, Ekonomi dan Literasi Kewangan adalah program yang dilaksanakan dalam kumpulan yang kecil dan berbentuk seperti kursus / bengkel. Program ini telah membantu membangunkan kapasiti wanita melalui kursus dan latihan, memberi bimbingan mengenai pengurusan kewangan serta menggalakkan wanita menceburi bidang keusahawanan.

Sepanjang tahun 2022, KPWKM menerusi JPW telah melaksanakan sebanyak 156 program advokasi penjanaan pendapatan, 445 program ekonomi (kemahiran) dan 165 program literasi kewangan. Program ini melibatkan seramai 67,516 orang bagi program ekonomi, 57,766 orang bagi program literasi kewangan dan 12,231 orang peserta bagi program advokasi penjanaan pendapatan.

Manakala, JPW melalui Pejabat Pembangunan Wanita Negeri Pulau Pinang telah melaksanakan 28 program advokasi penjanaan pendapatan, 131 program ekonomi (kemahiran) dan 3 program literasi kewangan dengan penyertaan 3,623 peserta pada tahun 2022. Program dan kelas latihan yang diadakan ini merangkumi Seni Kulinari, Seni Jahitan, Seni Jahitan Kreatif dan Seni Rekaan Kreatif. Penyertaan adalah terbuka kepada semua golongan wanita termasuk ibu tunggal. Program dan kelas latihan ini telah diadakan di lima (5) pejabat Laman Wanita (LAWA) di bawah seliaan Pejabat Pembangunan Wanita Negeri Pulau Pinang.

Selain itu, KPWKM melalui Jabatan Kebajikan Masyarakat turut menyediakan Skim Bantuan Kebajikan iaitu bantuan yang diberikan **bukan untuk menampung kos sara hidup** sepenuhnya sebaliknya adalah untuk membantu **meringankan beban kewangan yang dialami** oleh kumpulan sasar untuk hidup yang lebih selesa dan sempurna. Pemberian skim bantuan ini juga adalah tertakluk kepada kelayakan dan syarat bantuan tersebut. Antara Skim Bantuan Kebajikan (Bantuan Bulanan) yang disediakan adalah seperti berikut:

JADUAL 2: Skim Bantuan Kebajikan (Bantuan Bulanan)

BIL.	JENIS BANTUAN	KADAR
1.	Bantuan Kanak-Kanak	Minimum RM150 sehingga maksimum RM1,000 sebulan: <ul style="list-style-type: none"> • RM200 seorang bagi anak berumur 6 tahun dan ke bawah • RM150 seorang bagi anak berumur 7 tahun sehingga 18 tahun
2.	Bantuan Anak Pelihara	RM250 sebulan seorang kanak-kanak Maksimum RM500 sebulan bagi yang memelihara dua orang kanak-kanak atau lebih.
3.	Bantuan Warga Emas	RM500 sebulan seorang
4.	Elaun Pekerja Orang Kurang Upaya	RM450 sebulan seorang
5.	Bantuan Am Persekutuan	Minimum sebanyak RM100 sebulan seorang dan maksimum sebanyak RM350 sekeluarga
6.	Bantuan Am Negeri	Berdasarkan kadar yang ditetapkan oleh Kerajaan Negeri masing-masing
7.	Bantuan OKU Tidak Berupaya Bekerja	RM300 sebulan seorang
8.	Bantuan Penjagaan OKU Terlantar / Pesakit Kronik Terlantar	RM500 sebulan seorang
9.	Bantuan Latihan Perantis	RM200 seorang sebulan

(Sumber: JKM)

KPWKM berharap melalui pelaksanaan program-program sebegini dan Skim Bantuan Kebajikan yang disediakan dapat membantu secara tidak langsung golongan wanita termasuk ibu tunggal untuk menjana dan meningkatkan pendapatan bagi meringankan beban sara hidup.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN HAJI MUHAMMAD ISLAHUDDIN BIN
ABAS (MERSING)**

SOALAN

TUAN HAJI MUHAMMAD ISLAHUDDIN BIN ABAS (MERSING) minta **MENTERI KEMAJUAN DESA DAN WILAYAH** menyatakan rancangan strategik pembangunan infrastruktur di Mersing dan status terkini projek pembinaan jalan raya *bypass* di Mersing.

JAWAPAN

Tuan Yang di-Pertua,

Untuk makluman Yang Berhormat, Kementerian sentiasa komited dalam membuat perancangan pembangunan desa dan wilayah yang inklusif, mampan dan holistik agar memenuhi kehendak, jangkaan dan keperluan rakyat khususnya bagi memastikan masyarakat desa juga mempunyai akses kepada infrastruktur dan kemudahan sosial yang setanding dengan kawasan bandar.

Selaras dengan Wawasan ‘Luar Bandar Sejahtera’, semua definisi dan deskripsi mengenai ciri pembangunan infrastruktur desa akan diperhalusi dengan teliti sesuai dengan wacana serta naratif masyarakat setempat. Proses ini turut merangkumi aspek koordinasi dan libat urus secara strategik di semua peringkat setempat, daerah, wilayah serta Negeri dengan menghubungkan sektor swasta,

SOALAN NO : 358

masyarakat awam dan agensi kerajaan. Hal ini penting bagi memastikan imperatif konsep pembangunan infrastruktur desa tersebut bergerak sejajar dengan misi dan visi kementerian.

Untuk makluman Yang Berhormat, sepanjang tahun 2021 sehingga tahun 2022 di bawah RMKe-12 sejumlah RM398.9 juta telah diperuntukkan secara langsung ke Parlimen Mersing melibatkan pembinaan infrastruktur dan kemudahan awam termasuklah pembinaan Jalan Perhubungan Desa, Membina Dewan Mini Serbaguna, Pembelian Bangunan Untuk Pejabat Kemas, Projek Bekalan Air Luar Bandar dan Jalan Luar Bandar.

Manakala dalam pembentangan Bajet Mini 2023 pula, sejumlah RM205 juta telah diperuntukkan bagi maksud yang sama. Ini menjadikan jumlah keseluruhan projek di bawah Parlimen Mersing adalah berjumlah RM603.9 juta.

Untuk rekod sehingga tahun 2021, sejumlah RM2.04 juta telah diperuntukkan di bawah Parlimen Mersing melibatkan 2 projek iaitu satu (1) projek Jalan Perhubungan Desa Kampung Orang Asli (KOA) dan satu (1) membina Jalan dan Jambatan menghubungkan Jalan Felda Nitar-Mersing

Pada tahun 2022, sejumlah RM8.94 juta telah diperuntukkan di bawah Parlimen Mersing melibatkan 5 (lima) projek iaitu dua (2) Program Pusat Kegiatan Masyarakat, satu (1) Projek Jalan Perhubungan Desa Kampung Orang Asli (KOA), satu (1) Projek Bekalan Air Luar Bandar dan satu (1) Jalan Luar Bandar.

Manakala pada tahun 2023, sejumlah RM5.53 juta telah diperuntukkan dalam Bajet Mini di bawah Parlimen Mersing melibatkan empat (4) projek iaitu satu (1) Program Pusat Kegiatan Masyarakat, satu (1) Projek Jalan Perhubungan Desa Kampung Orang Asli (KOA), satu (1) Projek Bekalan Air Luar Bandar dan satu (1) Jalan Luar Bandar.

SOALAN NO : 358

Pelaksanaan projek-projek infrastruktur seperti ini diharap dapat menyumbang kepada kesejahteraan hidup masyarakat desa khususnya dari aspek pembangunan ekonomi dan sosial. Sesuai dengan fokus pelaksanaannya yang bersifat *touch point* dan *people centric*, Kementerian komited untuk memastikan semua kampung dan penduduk menerima manfaat ini serta memenuhi tuntutan pembangunan sosio-ekonomi terlibat di kawasan desa.

Manakala untuk Projek Membina Jalan Dan Jambatan Menghubungkan Jalan Felda Nitar-Mersing (FT1425) Ke Jalan Air Merah (J85) Dan Jalan Johor Bahru-Kuantan (FT0003), Mersing, Johor telah diluluskan oleh Kementerian Ekonomi di bawah Rancangan Malaysia Kedua Belas (RMK-12) *Rolling Plan* 1 tahun 2021 dengan siling berjumlah RM130 juta. Skop projek ini ialah membina jalan sepanjang 6.2 km dengan spesifikasi JKR R2 dan 2 buah jambatan. Agensi Pelaksana projek ini ialah Jabatan Kerja Raya (JKR).

Untuk makluman Yang Berhormat jua, projek ini dijangka tender pada pertengahan tahun 2023. Projek ini dijangka siap pada tahun 2027.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : TUAN HAJI MUHAMMAD ISLAHUDDIN BIN
ABAS [MERSING]**

SOALAN

YB TUAN HAJI MUHAMMAD ISLAHUDDIN BIN ABAS [MERSING] minta **MENTERI PEMBANGUNAN KERAJAAN TEMPATAN** menyatakan mekanisme terbaik yang dilaksanakan dalam usaha melupuskan sisa pepejal dan menyelesaikan masalah sampah sarap khususnya di Mersing, Johor.

JAWAPAN

Tuan Yang di-Pertua,

Untuk makluman Ahli Yang Berhormat, sisa pepejal di Mersing, Johor akan dilupuskan ke Tapak Pelupusan (TP) Jemaluang di Jalan Meta, Mukim Jemaluang, Mersing, Johor. Tapak ini merupakan tapak pelupusan yang mula beroperasi pada tahun 1990 dan diambil alih pengoperasiannya oleh Kerajaan Persekutuan pada tahun 2016 setelah Akta Pengurusan Sisa Pepejal dan Pembersihan Awam 2007 (Akta 672) dikuatkuasakan di negeri Johor. Tapak ini menerima sisa pepejal sebanyak 45 tan sehari dan mampu beroperasi sehingga tahun 2026.

Untuk makluman Ahli Yang Berhormat juga, Kementerian Pembangunan Kerajaan Tempatan (KPKT) telah merancang untuk membina tapak pelupusan sisa pepejal sanitari di Mukim Triang, Mersing, Johor bagi menampung penjaan sisa yang semakin meningkat sepanjang tahun. Pembinaan tapak pelupusan sanitari ini akan dilengkapi dengan *liner* (HDPE) dan sistem pengumpulan serta rawatan air larut resap (*leachate*). Air larut resap terawat ini perlu mengikut *standard* yang telah ditetapkan oleh Jabatan Alam Sekitar (JAS) sebelum dilepaskan ke sungai.

Untuk makluman Ahli Yang Berhormat, tapak pelupusan sanitari di Mersing, Johor ini kelak akan menerima sisa dari kawasan Mersing, Rompin dan sisa abu (*bottom ash*) hasil proses rawatan sisa daripada Insinerator Tioman, Pahang. Kos pembinaan Projek Pembangunan Tapak Pelupusan Sisa Pepejal di Mersing, Johor adalah dianggarkan RM43,790,000.00. Projek ini telah mendapat kelulusan Kajian Impak Alam Sekitar (EIA) daripada pihak JAS. Projek ini dijangka ditender pada pertengahan tahun 2023. Tempoh pembinaan bagi tapak pelupusan ini adalah selama dua (2) tahun dan dijangka dapat beroperasi pada tahun 2025.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN HAJI MUHAMMAD ISLAHUDDIN BIN
ABAS [MERSING]**

SOALAN

TUAN HAJI MUHAMMAD ISLAHUDDIN BIN ABAS [MERSING]

minta **MENTERI PERTANIAN DAN KETERJAMINAN MAKANAN** menyatakan usaha Kerajaan bagi meningkatkan kemudahan para nelayan dan adakah Kerajaan bercadang menaik taraf jeti di kuala Sungai Mersing, dan kuala Sungai Endau, Johor untuk kemudahan nelayan dan pelancong.

JAWAPAN

Untuk makluman Ahli Yang Berhormat, Kementerian Pertanian Dan Keterjaminan Makanan (KPKM) melalui Lembaga Kemajuan Ikan Malaysia (LKIM) bertanggungjawab dalam mengurus, mengawal selia serta memantau pengoperasian Kompleks/Labuhan Perikanan dan Jeti Pendaratan Ikan bagi memastikan ianya beroperasi dengan cekap dan sempurna untuk faedah pengguna.

Pembinaan atau naik taraf jeti pendaratan ikan hanya digunakan bagi tujuan pendaratan ikan sahaja dan ia tidak dibenarkan kepada pelancong.

Bagi memastikan usaha-usaha meningkatkan kemudahan para nelayan, LKIM telah melaksanakan beberapa projek menaik taraf dan projek pembinaan jeti pendaratan ikan di kawasan Parlimen Mersing seperti berikut :

BIL.	TAHUN	JETI	PERUNTUKAN	KOS MENAIKTARAF (RM)
1.	2020	Jeti Teluk Buih, Mersing	PRE II	150,000.00
2.	2021	Slipway di Kompleks LKIM Mersing	M&A	400,000.00

SOALAN NO: 360

3.		Jeti Penyabung, Mersing	Peruntukan Khas	100,000.00
----	--	----------------------------	--------------------	------------

BIL.	TAHUN BINA	JETI	PERUNTUKAN	KOS BINA (RM)
1.	2012	Jeti Penyabung, Endau	PRE II	302,576.00
2.	2012	Jeti Penyabung, Endau	ICU, JPM	48,850.00
3.	2013	Jeti PNK Mersing	ICU, JPM	85,540.00

Sebagai makluman, projek menaik taraf yang dilaksanakan oleh LKIM adalah di jeti yang dibina oleh LKIM. Manakala, bagi program di bawah Rancangan Malaysia Kedua Belas (RMKe-12), belum ada lagi perancangan bagi cadangan Menaiktaraf Jeti Pendaratan Ikan di kawasan Mersing.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI MUHAMMAD ISLAHUDDIN BIN
ABBAS [MERSING]**

SOALAN

TUAN HAJI MUHAMMAD ISLAHUDDIN BIN ABBAS [MERSING]
minta **PERDANA MENTERI** menyatakan tindakan Kerajaan menjaga
kebajikan para peneroka FELDA generasi kedua khususnya di negeri
Johor.

JAWAPAN

**YB DATO' SRI AZALINA BINTI OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman ahli Yang Berhormat, bagi generasi kedua FELDA yang menjadi peneroka ganti atau pentadbir, FELDA memberikan bantuan kebajikan peneroka yang mana terpakai bagi membantu dari segi sakit kronik, bantuan peralatan kesihatan dan bencana alam.
2. Bagi pesakit kronik dan bantuan keperluan peralatan kesihatan, kadar bantuan diberikan sehingga RM5,000 dan bantuan bencana alam sehingga RM10,000 bagi setiap keluarga peneroka yang bersama-sama FELDA dan tertakluk kepada terma dan syarat yang telah ditetapkan. Bantuan ini terhad sehingga RM15,000 bagi setiap keluarga peneroka seumur hidup.
3. Dalam menggalakan golongan belia Felda atau generasi kedua Felda terlibat dalam bidang keusahawanan, FELDA memperkenalkan inisiatif Tabung Usahawan Belia FELDA (TUBF). Inisiatif ini dapat membantu usahawan FELDA bagi memulakan atau mengembangkan perniagaan dengan diberi latihan dan bimbingan perniagaan secara percuma.
4. Selain itu, FELDA juga memperkenalkan Program Pembangunan Peneroka (PPP). Program ini bertujuan untuk memberi tambahan pendapatan kepada peneroka mahupun generasi baru Felda melalui aktiviti pertanian dan ternakan selain dapat menyumbang kepada keselamatan makanan negara.
5. Antara inisiatif lain adalah melibatkan pendidikan, perumahan, peluang pekerjaan dan lain-lain inisiatif dalam menjaga kebajikan peneroka FELDA khususnya kepada generasi kedua dan belia Felda.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : TUAN HAJI MUHAMMAD
ISLAHUDDIN BIN ABAS [MERSING]**

SOALAN

TUAN HAJI MUHAMMAD ISLAHUDDIN BIN ABAS [MERSING] minta **MENTERI KESIHATAN** menyatakan adakah Kerajaan mempunyai perancangan dan peruntukan untuk menaik taraf Klinik Kesihatan Mersing, Johor.

JAWAPAN

Tuan Yang di-Pertua,

1. Kementerian ini sedia maklum Klinik Kesihatan Mersing merupakan bangunan klinik sedia ada yang telah uzur dengan usianya menjangkau 51 tahun dengan populasi penduduk yang ramai dan semakin meningkat menyebabkan pertambahan kedatangan pesakit yang meningkat.

2. Untuk makluman Ahli Yang Berhormat, pembinaan baru Klinik Kesihatan 3 Mersing bersama 6 unit kuarters telah dimohon di dalam *Rolling Plan 4* (RP4), Rancangan Malaysia ke-12.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : TUAN MUHAMMAD ISMI BIN MAT TAIB
[PARIT]

SOALAN

TUAN MUHAMMAD ISMI BIN MAT TAIB [PARIT] minta **MENTERI KEWANGAN** menyatakan usaha-usaha awal yang akan dibuat oleh Kementerian untuk menambah simpanan hari tua rakyat Malaysia terutamanya golongan B40 yang kebanyakannya tidak mempunyai jumlah simpanan persaraan yang banyak.

JAWAPAN

Tuan Yang di-Pertua,

Dalam usaha membantu ahli membina semula simpanan yang telah dikeluarkan, KWSP menyediakan pelbagai insentif, kemudahan dan perkhidmatan untuk menggalakkan ahli mencarum ke dalam KWSP.

Bagi memudahkan ahli meningkatkan semula simpanan, KWSP telah memperkenalkan beberapa insentif dan perkhidmatan, antaranya:

- Program i-Saraan: Diperkenalkan untuk ahli yang bekerja sendiri, tiada pendapatan tetap atau di luar tenaga buruh seperti suri rumah yang berumur di bawah 60 tahun. Kerajaan memberikan sumbangan sebanyak 15% daripada jumlah caruman atau sehingga RM250 setahun.
- Bayaran Caruman Sukarela: Fungsi baharu yang menyediakan kemudahan kepada ahli membuat bayaran caruman sukarela kepada akaun sendiri, pasangan, ibu bapa dan anak-anak yang merupakan ahli KWSP pada bila-bila masa mulai Julai 2022 melalui aplikasi i-Akaun ahli secara atas talian.
- Kempen 'Jom Tambah': Diperkenalkan mulai bulan Januari 2023 yang lalu bagi merancakkan lagi promosi caruman sukarela ke seluruh negara.
- *Retirement Advisory Service (RAS)*: Memberi khidmat nasihat dan rundingan secara percuma mengenai perancangan kewangan dan persaraan terbuka kepada ahli dan bukan ahli di cawangan-cawangan KWSP di seluruh negara.
- Belanjawanku: Satu panduan perbelanjaan minimum bulanan mengikut pelbagai kategori isi rumah di bandar utama di semua negeri. Belanjawanku boleh digunakan untuk merancang perbelanjaan peribadi dan keluarga.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS (2023)**

PERTANYAAN : BUKAN LISAN

**DARIPADA : TUAN MUHAMMAD ISMI BIN MAT TAIB
[PARIT]**

SOALAN

YB TUAN MUHAMMAD ISMI BIN MAT TAIB [PARIT] minta **MENTERI PEMBANGUNAN KERAJAAN TEMPATAN** menyatakan sama ada Kementerian akan memperkenalkan semula dana RM3 bilion untuk menjamin pembiayaan rumah bagi pembeli rumah pertama membeli rumah mampu milik seperti mana tertera di dalam manifesto Pakatan Harapan sebelum ini.

JAWAPAN

Tuan Yang di-Pertua,

Untuk makluman Ahli Yang Berhormat, melalui Belanjawan MADANI 2023, Kerajaan menerusi Syarikat Jaminan Kewangan Perumahan (SJKP) bersedia menjamin nilai pinjaman sehingga RM5 billion bagi memanfaatkan 20,000 peminjam perumahan, khususnya pembeli rumah pertama. Jaminan Kerajaan ini adalah bagi membantu peminjam yang tidak mempunyai pendapatan tetap. Berdasarkan data yang dilaporkan oleh SJKP sehingga 31 Januari 2023, sebanyak 16,808 pinjaman pembiayaan telah diluluskan di bawah skim ini. 65.11% (10,945) pemohon yang berjaya adalah dalam julat umur 35 tahun ke bawah. Nilai keseluruhan pembiayaan yang telah diluluskan oleh SJKP sejak mula dilancarkan adalah sebanyak RM2.32 billion. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN MUHAMMAD ISMI BIN MAT TAIB
[PARIT]**

SOALAN

TUAN MUHAMMAD ISMI BIN MAT TAIB [PARIT] minta **PERDANA MENTERI** menyatakan sama ada Kerajaan akan mewujudkan sistem ombudsman bagi menangani masalah salah laku dalam kalangan ahli politik dan penjawat awam termasuk pihak berkuasa.

JAWAPAN

**YB DATO' SRI AZALINA BINTI OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, buat masa ini, di Malaysia, Biro Pengaduan Awam (BPA) merupakan agensi utama yang menguruskan aduan berhubung salah tadbir (*maladministration*) dalam perkhidmatan awam berdasarkan kepada Pekeliling Am Bilangan 2 Tahun 2022 dengan hanya kekuatan jentera pentadbiran seramai 178 orang bagi menangani aduan perkhidmatan awam. Terdapat banyak cabaran dalam proses pengendalian aduan awam yang sedia ada melalui BPA, antaranya;

- (a) tiada perundangan yang khusus dengan kuasa-kuasa tertentu termasuk menyiasat sesuatu aduan;
- (b) agensi awam tidak ambil tindakan atau lambat mengambil tindakan terhadap aduan yang dikemukakan;
- (c) tindakan yang tidak adil oleh agensi awam terhadap aduan yang dikemukakan;
- (d) pemantauan aduan terhadap agensi awam yang longgar; dan
- (e) tiada cengkaman kuasa BPA ke atas agensi awam dalam menyelesaikan aduan yang dikemukakan.

2. Kerajaan sebelum ini telah bersetuju dengan cadangan penubuhan Ombudsman Malaysia tanpa memperuntukkan apa-apa kuasa berkaitan penyiasatan dalam mengendalikan aduan berhubung salah tadbir. Keadaan ini menyebabkan cabaran sedia ada tidak dapat ditangani sepenuhnya, malah tidak membawa apa-apa perubahan yang ketara dalam pengendalian aduan berkenaan.

3. Kerajaan Perpaduan komited dan berpegang kepada prinsip asas bahawa Ombudsman adalah satu badan bebas (*independent*) yang

wajar mengamalkan konsep tidak memihak (*impartial*) dalam menyiasat apa-apa aduan yang disalurkan oleh orang awam terhadap sistem penyampaian perkhidmatan awam dengan prosedur yang teratur dari segi undang-undang, sistematik, cepat dan telus.

4. Dalam hal ini, Kerajaan akan mempertimbangkan semula beberapa perkara penting termasuk dasar baharu supaya agensi Ombudsman Malaysia benar-benar diberi kuasa menyiasat tertentu melalui Rang Undang-Undang (RUU) Ombudsman Malaysia. Selain itu, RUU Ombudsman Malaysia juga dicadang untuk memperuntukkan obligasi mandatori supaya Laporan Tahunan dibentang dan dibahas dalam Parlimen.

5. Dalam usaha menggubal RUU Ombudsman Malaysia ini, Kerajaan akan meneliti semula model dan undang-undang Ombudsman negara lain seperti United Kingdom, New Zealand, Sweden, Australia, Hong Kong, Filipina, Thailand, Gambia dan Namibia, serta undang-undang institusi agensi Kerajaan Malaysia khususnya berkenaan kuasa siasatan dan tindakan yang boleh diambil.

6. Penubuhan Ombudsman yang berfungsi dan berkuasa adalah amat penting bagi memastikan pentadbiran awam cekap dan berkesan serta tadbir urus yang lebih baik dalam perkhidmatan awam.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA,
PARLIMEN KE-15**

**PERTANYAAN : BERTULIS
DARIPADA : TUAN MUHAMMAD ISMI BIN MAT TAIB
[PARIT]**

SOALAN

YB TUAN MUHAMMAD ISMI BIN MAT TAIB [PARIT] minta
KEMENTERIAN PERDAGANGAN ANTARABANGSA DAN INDUSTRI
menyatakan dasar Kementerian berkenaan kenderaan elektrik (EV) serta
impaknya kepada industri automatif di negara kita pada waktu ini.

JAWAPAN

Tuan Yang Dipertua,

Di bawah Dasar Automotif Nasional 2020 (NAP 2020), halatuju industri automotif tempatan adalah ke arah membangunkan *Next Generation Vehicle* (NxGV) termasuk kenderaan elektrik (EV) yang cekap tenaga, mesra alam sekitar serta mempunyai kepintaran teknologi. NAP 2020 turut disokong oleh Pelan Tindakan Mobiliti Rendah Karbon (*Low Carbon Mobility Blueprint* - LCMB) di bawah Kementerian Sumber Asli, Alam Sekitar dan Perubahan Iklim yang mendukung prinsip mobiliti mampan dan Dasar Pengangkutan Negara di bawah Kementerian Pengangkutan yang antaranya bertujuan untuk mencapai matlamat pengangkutan hijau negara.

Berdasarkan kajian LCMB, sasaran Kerajaan adalah sekurang-kurangnya 15% daripada *Total Industry Volume* (TIV) adalah xEV (kenderaan elektrik bermotor termasuk hibrid) bagi kategori kenderaan-kenderaan penumpang, perdagangan (kecuali bas) dan motosikal menjelang 2030, manakala Dasar Tenaga Negara 2022-2040 pula telah menetapkan 38% menjelang 2040.

Bagi merencanakan pembangunan industri EV serta menarik pelaburan berkaitan, Kerajaan telah menawarkan pelbagai insentif cukai seperti pengecualian cukai pendapatan melalui Galakan Taraf Perintis atau Elaun Cukai Pelaburan sehingga 100 % bagi tempoh sehingga 10 tahun bagi pelaburan yang melibatkan aktiviti pengeluaran EV dan komponen kritikal berkaitan seperti bateri, motor dan lain-lain; dan pengecualian sepenuhnya cukai tidak langsung seperti duti import dan duti eksais untuk EV yang diimport dan dipasang tempatan, serta pengecualian sepenuhnya cukai jualan untuk EV pemasangan tempatan seperti diumumkan di bawah Belanjawan tahun 2022 dan tahun 2023.

Pasukan Petugas EV Kebangsaan (National EV Task Force – NEVTF) yang diterajui MITI bertanggungjawab untuk menyelaras dan menilai dasar dan memantau pelaksanaan program dan inisiatif berkaitan pembangunan industri kenderaan elektrik (EV) dalam negara. NEVTF ini turut diwakili oleh pelbagai Kementerian, agensi Kerajaan dan pihak industri yang berkaitan. Melalui NEVTF, Kementerian-Kementerian dan

agensi Kerajaan dapat membentuk sinergi kerjasama yang padu dalam menjayakan inisiatif-inisiatif yang merentasi skop dan bidang kuasa masing-masing (*whole of Government*).

Beberapa dasar dan strategi juga telah dilaksanakan di bawah MITI untuk menyokong pembangunan ekosistem EV, seperti:

- i. Pengecualian fi sebanyak RM10,000 untuk pengimportan EV *Completely Built-Up* (CBU) yang terpakai dan baharu melalui Lesen Import (AP) Terbuka;
- ii. Pengenalan inisiatif Lesen Import (AP) baharu untuk Peneraju Global BEV (*Battery Electric Vehicle*) bagi menarik pelaburan daripada syarikat terkemuka;
- iii. Pembangunan standard-standard berkaitan industri EV seperti sistem pengecasan, aktiviti pelupusan bateri, *battery swapping*, *wireless charging* dan lain-lain; dan
- iv. Bantuan dan sokongan dalam pembangunan kemahiran kepada syarikat-syarikat yang berhasrat untuk membangunkan komponen kritikal untuk EV dan modal insan dalam bidang ini.

Pelaksanaan dasar dan inisiatif Kerajaan telah memberi impak yang positif kepada industri automotif tempatan. Jumlah EV berdaftar telah meningkat kepada lebih 3,400 unit pada tahun 2022 berbanding 300 unit secara purata pada tahun-tahun sebelumnya. Jumlah pengecasan EV pula telah mencecah 900 unit sehingga 2022 berbanding 533 unit sehingga tahun 2021. Dari segi pelaburan, jumlah yang diluluskan dalam ekosistem EV dari tahun 2018 sehingga September 2022 adalah bernilai RM14.7 bilion merangkumi aktiviti pemasangan kenderaan, komponen EV dan komponen pengecasan.

Pelaburan baharu dalam ekosistem EV seperti pemasangan kenderaan, pengeluaran komponen kritikal dan penyediaan pengecasan EV telah menghasilkan limpahan ekonomi termasuk peluang pekerjaan, pemindahan teknologi dan pembangunan rantai bekalan. Sebagai contoh, Syarikat Samsung SDI Energy Malaysia Sdn. Bhd. telah memilih Malaysia sebagai lokasi pengeluaran pertamanya di Asia Tenggara untuk

penubuhan kilang pembuatan sel bateri EV dengan melibatkan nilai pelaburan sebanyak RM7 bilion dan menawarkan kira-kira 1,700 peluang pekerjaan baharu.

Pengenalan inisiatif baharu di bawah sistem AP Peneraju Global BEV telah berjaya menarik minat syarikat TESLA untuk menubuhkan ibu pejabat, pusat jualan dan servis di samping membangunkan rangkaian *Supercharger* TESLA di Malaysia. Kehadiran TESLA di Malaysia kelak akan membuka peluang kepada syarikat-syarikat tempatan untuk terlibat secara langsung dan tidak langsung dalam menyokong ekosistem perniagaan TESLA di dalam negara.

MITI yakin dengan usahasama berterusan bersama-sama Kementerian-kementerian lain dan agensi-agensi Kerajaan yang berkaitan, Kerajaan akan dapat mewujudkan satu suasana perniagaan yang sangat kondusif untuk menarik pelaburan berkualiti dalam industri automotif khususnya EV dan memberi impak tinggi kepada industri, ekonomi dan negara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGKAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : TUAN MUHAMMAD ISMI BIN MAT
TAIB [PARIT]**

SOALAN

TUAN MUHAMMAD ISMI BIN MAT TAIB [PARIT] minta **MENTERI KESIHATAN** menyatakan sama ada Kementerian akan menambah bilangan klinik kesihatan terutamanya di kawasan yang berkepadatan tinggi di seluruh negara.

JAWAPAN

Tuan Yang di-Pertua,

1. KKM akan memastikan tahap penyampaian perkhidmatan kesihatan yang berkualiti dan menepati kehendak pelanggan. Justeru itu, Kementerian ini sentiasa mengkaji keperluan prasarana klinik kesihatan negara sama ada pembinaan fasiliti baharu atau menaik taraf fasiliti sedia ada berdasarkan faktor-faktor berikut:

- a. peningkatan bilangan pesakit / kepadatan penduduk;
- b. keadaan infrastruktur bangunan sedia ada;
- c. perkembangan perkhidmatan kesihatan; dan
- d. akses kepada perkhidmatan sedia ada.

2. Walau bagaimanapun, keperluan ini tertakluk kepada ketersediaan tapak yang mana agak terhad di kawasan berkepadatan tinggi, sumber manusia dan peruntukan kerajaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATO' HAJAH MUMTAZ BINTI MD NAWI
[TUMPAT]**

SOALAN

DATO' HAJAH MUMTAZ BINTI MD NAWI [TUMPAT] minta
MENTERI PERTANIAN DAN KETERJAMINAN MAKANAN
menyatakan berapa jenis makanan asasi yang diimport dan nilainya.

JAWAPAN

Secara umumnya, keperluan bekalan makanan negara dipenuhi sama ada melalui pengeluaran tempatan atau sumber import. Pada tahun 2021, jumlah import sektor agromakanan adalah sebanyak RM63.59 bilion, manakala jumlah import agromakanan bagi tahun 2022 telah mencecah RM75.54 bilion dengan peningkatan sebanyak 18.8% berbanding tahun 2021.

Untuk makluman, terdapat komoditi makanan yang tidak dapat dihasilkan secara domestik antaranya disebabkan ianya tidak ekonomik, faktor kesesuaian iklim serta kekangan sumber tanah dan tenaga kerja. Selain itu, permintaan pengguna turut mempengaruhi import makanan, kesan daripada pilihan gaya hidup, peningkatan pendapatan dan perubahan persekitaran. Justeru, bagi memenuhi keperluan dan permintaan pengguna dalam negara terdapat beberapa barang asas yang diimport dari negara luar negara bagi tahun 2022 seperti berikut:

- (i) sayur-sayuran *temperate* - RM4.80 bilion;
- (ii) buah-buahan *temperate* - RM3.28 bilion;
- (iii) ubi kentang - RM1.54 bilion;
- (iv) bawang - RM0.94 bilion; dan
- (v) susu segar - RM0.28 bilion.
- (vi) daging dan sediaan daging - RM6.74 bilion
- (vii) beras - RM2.67 bilion

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATO' HAJAH MUMTAZ BINTI MD NAWI
[TUMPAT]**

SOALAN

YB DATO' HAJAH MUMTAZ BINTI MD NAWI [TUMPAT] minta **MENTERI PEMBANGUNAN KERAJAAN TEMPATAN** menyatakan adakah Kementerian bercadang untuk merangka satu SOP audit mesra keluarga bagi diguna pakai oleh PBT di semua prasarana awam untuk ke arah kesejahteraan masyarakat.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) melalui Jabatan Perancangan Bandar dan Desa (PLANMalaysia) telah menyediakan Garis Panduan Perancangan Fizikal bagi Warga Emas, Panduan Inisiatif Persekitaran Mesra Autisme (PRISMA) dan Garis Panduan Perancangan Reka Bentuk Sejagat (*Universal Design*) untuk diguna pakai oleh semua Pihak Berkuasa Tempatan (PBT) ke arah kesejahteraan masyarakat.

Garis Panduan Perancangan Fizikal bagi Warga Emas merangkumi perancangan bagi penyediaan pusat jagaan, perumahan dan reka bentuk kemudahan sokongan mesra warga emas. Garis Panduan Perancangan Reka Bentuk Sejagat (*Universal Design*) bertujuan menyediakan kemudahan sokongan dan persekitaran yang mesra Orang Kurang Upaya (OKU) fizikal manakala penyediaan PRISMA adalah sebagai pelengkap keperluan OKU yang tidak dapat dilihat secara fizikal iaitu autisme.

Sehubungan itu, audit mesra warga emas dan OKU boleh dijalankan oleh Pihak Berkuasa Tempatan (PBT) di semua prasarana awam merujuk kepada Garis Panduan Perancangan yang telah disediakan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATO' HAJAH MUMTAZ BINTI MD NAWI
[TUMPAT]**

SOALAN

YB DATO' HAJAH MUMTAZ BINTI MD NAWI [TUMPAT] minta **MENTERI PEMBANGUNAN KERAJAAN TEMPATAN** menyatakan adakah Kementerian bercadang untuk memperkenalkan skim subsidi sewa rumah kepada pasangan muda B40 yang baru berkahwin untuk memberikan kemudahan kehidupan yang lebih selesa.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) sedang merancang pembinaan Rumah Belia Madani (RBM) di kawasan Lembah Klang. Inisiatif RBM adalah inisiatif Kerajaan dalam penyediaan perumahan secara transit untuk golongan belia yang berumur 35 tahun dan ke bawah untuk mendiami rumah tersebut bagi sesuatu tempoh yang dirasakan cukup sehingga mereka dapat mengukuhkan kedudukan kewangan dan seterusnya memiliki kediaman sendiri. RBM yang pertama akan dibangunkan di Mukim Batu, Sentul melibatkan 1,048 unit rumah.

Sekian, terima kasih.

PEMBERITAHUAN PERTANYAAN BUKAN LISAN DEWAN RAKYAT,
MESYUARAT PERTAMA, PENGGAL KEDUA
PARLIMEN KELIMA BELAS 2023

PERTANYAAN : BUKAN LISAN(BERTULIS)

**DARIPADA : DATO' HAJAH MUMTAZ BINTI MD NAWI
(TUMPAT)**

SOALAN

DATO' HAJAH MUMTAZ BINTI MD NAWI (TUMPAT) minta **MENTERI PEMBANGUNAN USAHAWAN DAN KOPERASI** menyatakan apakah pelan tindakan di bawah Kementerian untuk mendidik dan membangunkan usahawan remaja sejajar dengan trend semasa perniagaan atas talian yang didominasi oleh generasi milenia ini.

JAWAPAN

Tuan Yang di-Pertua,

1. Kementerian Pembangunan Usahawan dan Koperasi (KUSKOP) melalui agensi-agensi di bawahnya telah melaksanakan beberapa program keusahawanan untuk mendidik dan membangunkan usahawan remaja sejajar dengan *trend* semasa perniagaan dalam talian seperti berikut:

i. **Institut Keusahawanan Negara (INSKEN)** telah melaksanakan seminar **Program Usahawan Dropship dan Ejen (DNA)** kepada pelajar di universiti, kolej dan politeknik pada tahun 2022. Program ini bertujuan untuk memberikan pendedahan kepada pelajar untuk menjadi *dropship* dan ejen semasa atau selepas sesi pengajian. Program dengan kerjasama Institusi Pengajian Tinggi (IPT) telah memanfaatkan seramai 5,338 pelajar daripada 17 IPT seperti Universiti Malaysia Kelantan dan Universiti Sains Malaysia;

ii. **INSKEN** turut menyediakan **Program Konsultasi (BizClinic)** secara percuma bagi membantu usahawan mendapatkan maklumat

berkaitan latihan, bimbingan dan kewangan. Antara lokasi pelaksanaan program adalah di Bazar Tok Guru dan K Castle, Kelantan yang telah memanfaatkan seramai 55 usahawan;

iii. **Skim Pembiayaan Online TEKUN (SPOT)** oleh **TEKUN Nasional** yang menyediakan pembiayaan secara mudah merangkumi modal pusingan, pembelian peralatan / perkakasan, bil utiliti dan lain-lain kepada 3,000 usahawan mikro (termasuk usahawan muda) yang menjalankan perniagaan secara dalam talian dengan nilai sehingga RM5,000 untuk usahawan Informal dan RM10,000 untuk usahawan yang mempunyai lesen/permit perniagaan atau pendaftaran SSM; dan

iv. **Perbadanan Nasional Berhad (Pernas)** menyediakan **platform e-dagang** iaitu **Pybli** yang direka khusus kepada Perusahaan Mikro, Kecil dan Sederhana (PMKS), perniagaan francais dan usahawan *Business In Transformation* (BIT) di bawah Pernas untuk mempromosikan produk secara digital. Melalui platform ini juga, usahawan akan menikmati bantuan pemasaran dan latihan secara percuma, tawaran 0% komisen, pendaftaran percuma dan fi transaksi yang rendah berbanding portal e-dagang yang lain.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT PERTAMA,
PENGAL KEDUA, PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' HAJAH MUMTAZ BINTI MD NAWI
[TUMPAT]**

SOALAN

Minta **MENTERI PENDIDIKAN TINGGI** menyatakan apakah impak positif dan negatif 'pendidikan dalam talian' kepada kualiti dan prestasi mahasiswa pasca pandemik COVID-19.

JAWAPAN

Tuan Yang di-Pertua,

1. Untuk makluman Ahli Yang Berhormat, 'pendidikan dalam talian' mempunyai impak positif dan negatif kepada kualiti dan prestasi mahasiswa pasca pandemik COVID-19.

2. Dari sudut positif, impak 'pendidikan dalam talian' adalah"

(a) pelajar boleh pada bila-bila masa mengakses bahan pembelajaran dalam pelantar ePembelajaran universiti ataupun mana-mana platform sama ada secara berbayar atau percuma. Dalam hal ini, terdapat pelbagai platform yang menyediakan kursus-kursus dalam talian seperti *Massive Open Online Courses (MOOCs)* dan *Microcredential* yang bersifat interaktif dan mudah diakses bagi tujuan pembelajaran dalam talian.

(b) bahan pembelajaran dalam talian kebanyakannya berasaskan video yang majoritinya melibatkan interaksi bersama rakan sebaya, perbincangan kumpulan atau kolaborasi kumpulan yang akan merangsang maklum balas automatik menerusi penilaian seperti kuiz dan peperiksaan dalam talian.

(c) memberi mahasiswa lebih banyak fleksibiliti untuk mencorak pembelajaran mereka, seterusnya membantu mereka merancang jadual bagi mengulang kaji pelajaran atau menyelesaikan tugas kerja kursus yang diberikan oleh pensyarah.

(d) memberi impak yang lebih signifikan kerana berupaya meningkatkan daya imaginasi dan ingatan selain dapat menarik minat pelajar untuk belajar. Dalam hal ini, berdasarkan dapatan kajian pembelajaran secara dalam talian: tahap kesediaan dan keberkesanan pelaksanaannya kepada pelajar oleh Universiti Pendidikan Sultan Idris (UPSI), pada dasarnya kaedah pembelajaran secara dalam talian memerlukan pensyarah menyediakan bahan bantu mengajar yang bersifat interaktif dengan mengintegrasikan semua elemen multimedia dalam sesuatu bahan termasuklah video, audio, animasi, grafik dan sebagainya.

3. Sebaliknya, kekurangan pelaksanaan PdP dalam talian adalah:
- (a) pelaksanaan PdP dalam talian secara tidak langsung boleh menyebabkan pengurangan interaksi secara fizikal dengan pensyarah dan rakan sekuliah. Interaksi yang terhad ini memberi cabaran dalam membina aspek kemahiran insaniah pelajar, mempengaruhi kemahiran sosial serta boleh mengundang masalah kesihatan mental. Malah sesetengah PdP perlu lebih menumpukan aspek praktikaliti berbanding teori pembelajaran di kelas semata-mata bagi memantapkan lagi ciri personaliti, keyakinan diri, komunikasi dan sikap para pelajar.
 - (b) pensyarah dan pelajar sukar dalam mendapat capaian kepada bahan rujukan dan pembelajaran secara dalam talian berikutan terdapat cabaran-cabaran seperti gangguan akses internet yang terhad disebabkan PdP dalam talian amat bergantung kepada penggunaan teknologi. Berhubung perkara ini juga, kajian berkaitan cabaran pelajar melalui kaedah pembelajaran atas talian di Institusi Pendidikan Tinggi Awam Malaysia telah dijalankan oleh Pusat Pengajian Sains Kemasyarakatan Universiti Sains Malaysia (USM) dan Pusat Pengajian Pascasiswazah Universiti Teknologi MARA (UiTM). Melalui kajian ini, salah satu faktor yang dikenalpasti menjadi cabaran kepada proses pembelajaran dalam talian adalah kemudahan internet yang agak terhad bagi sesetengah kawasan. Selain itu, dalam sesetengah keadaan, pakej internet asas tidak mampu menampung penggunaan data untuk mengakses aplikasi berbentuk video seperti Google Meet, ZOOM dan sebagainya.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATUK HAJI MUSLIMIN BIN YAHAYA
(SUNGAI BESAR)**

SOALAN

**DATUK HAJI MUSLIMIN BIN YAHAYA (SUNGAI BESAR) minta
MENTERI PEMBANGUNAN USAHAWAN DAN KOPERASI**
menyatakan berapa bilangan koperasi terkini yang aktif dan berapa
jumlah aset koperasi sehingga tahun 2022.

JAWAPAN

Tuan Yang di-Pertua,

1. Gerakan koperasi telah berkembang dengan pesat sejak 100 tahun penubuhannya hasil daripada usaha Kerajaan untuk memperkasa gerakan koperasi di negara ini. Gerakan koperasi merupakan salah satu penyumbang utama kepada pembangunan ekonomi negara selepas sektor awam dan swasta.

2. Sehingga 30 Jun 2022, jumlah koperasi berdaftar adalah sebanyak 14,975 dengan keanggotaan seramai 7.04 juta orang. Daripada jumlah ini, **bilangan koperasi yang aktif adalah sebanyak 9,126** atau 61% daripada jumlah koperasi berdaftar. **Jumlah aset koperasi pula bernilai RM156 bilion**, manakala jumlah modal syer/yuran koperasi adalah sebanyak **RM16.5 bilion** serta perolehan koperasi berjumlah **RM22.4 bilion**.

3. Kementerian Pembangunan Usahawan dan Koperasi (KUSKOP) dengan kerjasama Suruhanjaya Koperasi Malaysia (SKM) akan terus melaksanakan inisiatif-inisiatif yang telah dirancang dalam usaha untuk meningkatkan bilangan pendaftaran koperasi dan bergerak secara aktif bagi memastikan gerakan koperasi dapat terus memainkan peranan yang penting dalam mensejahterakan anggota-anggota koperasi seterusnya meningkatkan sosioekonomi rakyat.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB DATUK HJ. MUSLIMIN YAHAYA
[SUNGAI BESAR]**

SOALAN

Datuk Haji Muslimin bin Yahaya [Sungai Besar] minta **MENTERI DALAM NEGERI** menyatakan usaha Kementerian untuk menaik taraf prasarana semua balai-balai polis serta kuarters-kuarters polis yang sangat daif dan tidak memberi keselesaan kepada anggota.

JAWAPAN

Tuan Yang Di Pertua,

Kerajaan melalui Kementerian Dalam Negeri telah memperuntukkan sejumlah RM38,124,400.70 pada tahun 2021 dan RM30,615,797.85 pada tahun 2022 bagi menaik taraf prasarana semua 338 buah balai polis serta 649 buah kuarters polis yang sangat daif di seluruh Malaysia.

Kementerian turut memberi tumpuan kepada usaha menaiktaraf premis-premis Polis Diraja Malaysia (PDRM) yang terlalu uzur dan tidak dapat digunakan dengan sempurna demi memberikan perkhidmatan yang terbaik kepada rakyat secara keseluruhannya.

1. Kerajaan sedang melaksanakan pembinaan balai-balai polis baru seperti berikut:
 - a. Pembinaan Balai Polis Matang Jaya, Padawan, Sarawak;
 - b. Pembinaan Balai Polis Spaoh, Betong, Sarawak;
 - c. Pembinaan Balai Polis Rantau Panjang, Kelantan;
 - d. Pembinaan Balai Polis Bukit Jelutong, Selangor.
 - e. Pembinaan Balai Polis Kuala Penyu, Beaufort, Sabah; dan
 - f. Pembinaan Balai Polis Simpangan, Tumpat, Kelantan;
2. Kementerian telah merancang untuk menambah baik skim perumahan anggota polis di seluruh negara. Antara rancangan yang telah dilaksanakan adalah seperti berikut:
 - 2.1 Melaksanakan pembinaan kuarters-kuarters baru berdasarkan permohonan projek di dalam bajet pembangunan dari **tempoh RP4 RMK10 sehingga RP2 RMK12** berjumlah 1,580 unit (*RM1.98 Bilion kos keseluruhan projek termasuk Bangunan Pentadbiran, Sokongan dan Kuarters*) di seluruh negara.

Antara projek pembinaan yang telah diluluskan adalah seperti berikut:

SOALAN NO: 374

- a. Pembinaan 102 Unit Kwarters Balai Polis Inanam, Kota Kinabalu, Sabah;
- b. Pembinaan 63 Unit Kwarters Ibu Pejabat Polis Daerah Muallim, Perak;
- c. Pembinaan 54 Unit Kwarters Ibu Pejabat Polis Daerah Lawas, Sarawak;
- d. Pembinaan 103 Unit Kwarters Ibu Pejabat Polis Daerah Jeli, Kelantan;
- e. Pembinaan 11 Unit Kwarters Balai Polis Matang Jaya, Padawan, Sarawak;
- f. Pembinaan 8 Unit Kwarters Balai Polis Spoah, Betong, Sarawak;
- g. Pembinaan 273 Unit Kwarters Kem Batalion 10 Pasukan Gerakan Am Sarikei, Sarawak;
- h. Pembinaan 486 Unit Kwarters Kem Batalion 20 Pasukan Gerakan Am Beluran Sabah;
- i. Pembinaan 10 Unit Kwarters Balai Polis Rantau Panjang, Kelantan;
- j. Pembinaan 96 Unit Kwarters Ibu Pejabat Polis Daerah Klang Utara;
- k. Pembinaan 55 Unit Kwarters Ibu Pejabat Polis Daerah Hulu Terengganu, Terengganu;
- l. Pembinaan 200 Unit Kwarters di Ibu Pejabat Polis Kontinjen Pulau Pinang;
- m. Pembinaan 55 Unit Kwarters di Balai Polis Bukit Jelutong, Selangor;
- n. Pembinaan 38 Unit Kwarters di Ibu Pejabat Polis Daerah Belaga, Sarawak;
- o. Pembinaan 14 Unit Kwarters di Balai Polis Kuala Penyu, Beaufort, Sabah;
- p. Pembinaan 2 Unit Kwarters di Pondok Polis Kampung Pimping, Beaufort, Sabah; dan
- q. Pembinaan 10 Unit Kwarters Balai Polis Pulau Redang, Terengganu.

SOALAN NO: 374

- 2.2 Melaksanakan pembinaan kuarters secara PBLT iaitu sebanyak 97 Unit (*RM114.139 juta kos keseluruhan projek termasuk Bangunan Pentadbiran, Sokongan dan Kuarters*) seperti berikut:
- a. Pembinaan 10 Unit Kuarters Balai Polis Kuala Krau, Temerloh, Pahang;
 - b. Pembinaan 13 Unit Kuarters Balai Polis Simpangan, Tumpat, Kelantan; dan
 - c. Pembinaan 74 Unit Kuarters Markas Operasi Pasukan Polis Marin Wilayah 3 Tok Bali, Kelantan.
- 2.3 Melaksanakan kerja-kerja menaik taraf dan membaik pulih kuarters polis seperti berikut:
- a. Pembaikan Dan Menaiktaraf Kuarters Kediaman PDRM dengan kos sebanyak RM10,000,000.00. Sebanyak 11,498 unit kuarters daripada keseluruhan 61,781 unit kuarters di seluruh Malaysia telah dibaiki dengan tumpuan diberikan terhadap kerja-kerja pembaikan infra; dan
 - b. Pembaikan Pejabat Dan Kuarters Ibu Pejabat Polis Daerah Kajang dengan kos RM1,685,000.00.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK HAJI MUSLIMIN BIN YAHAYA
[SUNGAI BESAR]**

SOALAN

DATUK HAJI MUSLIMIN BIN YAHAYA [SUNGAI BESAR] minta **MENTERI PENDIDIKAN** menyatakan berapa bilangan pelajar-pelajar yang tidak layak atau tidak memperolehi sijil SPM pada tahun 2021 dan apa usaha Kementerian untuk mengatasi masalah ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk memastikan calon peperiksaan Sijil Pelajaran Malaysia (SPM) mendapat sijil SPM bagi membolehkan mereka melanjutkan pengajian ke institusi pengajian tinggi atau mendapatkan pekerjaan. Bagi peperiksaan SPM tahun 2021, seramai 45,526 orang iaitu 11.9 peratus daripada 382,156 calon yang menduduki peperiksaan tidak layak mendapat sijil kerana gagal mata pelajaran Bahasa Melayu atau Sejarah atau kedua-duanya.

Untuk makluman Ahli Yang Berhormat, inisiatif KPM bagi membantu calon yang tidak mendapat sijil adalah seperti berikut:

- i. calon boleh menduduki peperiksaan SPM Ulangan (SPMU) yang dilaksanakan pada setiap tahun. SPMU menawarkan tiga mata pelajaran, iaitu Bahasa Melayu, Sejarah dan Matematik; dan
- ii. calon boleh menduduki peperiksaan SPM sebagai Calon Persendirian pada tahun-tahun berikutnya.

Keputusan bagi peperiksaan tersebut boleh digabungkan dalam satu sijil peperiksaan melalui perkhidmatan *patching* sijil peperiksaan SPM yang disediakan oleh KPM melalui Lembaga Peperiksaan. Calon yang telah memperoleh sijil SPM kali pertama mulai tahun 2009 layak untuk memohon perkhidmatan ini. Dengan cara ini, calon masih berpeluang untuk mendapatkan sijil SPM atau memperbaiki keputusan mereka.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATUK HAJI MUSLIMIN BIN YAHAYA
(SUNGAI BESAR)**

SOALAN

DATUK HAJI MUSLIMIN BIN YAHAYA minta **MENTERI PEMBANGUNAN USAHAWAN DAN KOPERASI** menyatakan usaha Kementerian untuk membantu usahawan perusahaan mikro, kecil dan sederhana (PMKS) terutama di negeri negeri yang terjejas akibat banjir yang berlaku.

JAWAPAN

Tuan Yang di-Pertua,

1. Kementerian Pembangunan Usahawan dan Koperasi (KUSKOP) menerusi agensi-agensi telah menyediakan beberapa program dan inisiatif bagi membantu usahawan PMKS di negeri-negeri yang terjejas akibat bencana banjir pada hujung bulan Disember 2022 baru-baru ini.

2. Berikut merupakan antara program yang telah dilaksanakan oleh agensi-agensi di bawah KUSKOP bagi usahawan PMKS yang terjejas akibat banjir tersebut seperti berikut:

(i) **Bank Rakyat** telah melaksanakan program pembiayaan iaitu program Kemudahan Bantuan Bencana 2022 (DRF 2022) di bawah Bank Negara Malaysia (BNM). BNM telah mengumumkan ketersediaan kemudahan pembiayaan sebanyak RM200 juta untuk perusahaan mikro, kecil dan sederhana (PMKS) yang terjejas akibat banjir baru-baru ini. Program ini dijalankan bersama-sama Bank Rakyat dan SME Bank. Seramai 14 PKS telah menerima kelulusan berjumlah RM14 juta melalui program ini. Program ini membantu PMKS untuk menampung kos pembaikan dan/atau penggantian aset untuk kegunaan perniagaan (contohnya loji dan jentera) yang telah rosak akibat banjir dan/atau untuk modal kerja.

(ii) **SME Bank** telah memperkenalkan program *Flood Relief Program* yang menawarkan kemudahan seperti penjadualan semula (moratorium) bayaran pembiayaan dan pemanjangan pembiayaan kepada pelanggannya yang terkesan akibat bencana banjir yang melanda negara. SME Bank turut memberi pemansuhan pembayaran sewa sehingga 6 bulan pertama dan memberi potongan khas 50% bayaran balik sewa premis untuk tempoh 6 bulan kepada penyewa yang terkesan oleh

bencana banjir di Selangor. Program ini telah memberi manfaat kepada 251 usahawan dan 373 lot premis dengan nilai **RM12.8 juta**.

- (iii) **SME Corp. Malaysia** telah menyediakan bantuan pembiayaan di bawah Program Dana Kecemasan PKS (SMEEF 2.0). Ia menawarkan pinjaman kepada syarikat bersaiz kecil dan sederhana sehingga RM100 ribu tanpa faedah dengan tempoh bayaran balik sehingga 5 tahun termasuk moratorium selama 12 bulan.
- (iv) **Suruhanjaya Koperasi Malaysia (SKM)** telah menganjurkan program pemberian bakul makanan di Negeri Kelantan dan Negeri Terengganu yang telah memberi manfaat kepada 1,100 peserta dengan peruntukan sebanyak RM110,000. Program ini turut menerima sokongan daripada pelbagai pihak antaranya pemberian sumbangan sebanyak tiga tan pelbagai produk Nestle daripada Bulan Sabit Merah Malaysia.

3. KUSKOP dan agensi-agensinya akan terus membantu usahawan PMKS yang terkesan akibat banjir pada masa-masa akan datang.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK HAJI MUSLIMIN BIN YAHAYA
[SUNGAI BESAR]**

SOALAN

DATUK HAJI MUSLIMIN BIN YAHAYA [SUNGAI BESAR] minta **MENTERI PENDIDIKAN** menyatakan secara jelas dan terperinci adakah Dasar Pendidikan Digital di Kementerian Pendidikan telah dilaksanakan sepenuhnya.

JAWAPAN

Tuan Yang di-Pertua,

Pelan Pembangunan Pendidikan Malaysia (PPPM) 2013-2025 memberikan tumpuan kepada pengajaran dan pembelajaran (PdP) yang mengupayakan teknologi seperti yang dinyatakan dalam Anjakan 7: Memanfaatkan ICT Bagi Meningkatkan Kualiti Pembelajaran di Malaysia.

Kementerian Pendidikan Malaysia (KPM) terus memperkasakan penggunaan teknologi dalam PdP dengan memberi tumpuan kepada peningkatan keupayaan pendidikan digital di sekolah yang merupakan satu daripada 7 Teras Nadi Keunggulan KPM dalam menerajui sistem pendidikan negara.

Untuk makluman Ahli Yang Berhormat, pada masa ini, KPM dalam proses akhir memuktamadkan Dasar Pendidikan Digital (DPD). KPM sedang berkerjasama dengan agensi-agensi berkaitan bagi memastikan kesemua pandangan dan input diambil kira dengan sewajarnya. KPM sentiasa komited untuk menambah baik sistem pembelajaran berasaskan digital secara berterusan untuk memenuhi keperluan pendidikan masa hadapan.

Sekian, terima kasih.

RT37

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

DARIPADA : YB DATO' NGEH KOO HAM (BERUAS)

SOALAN

DATO' NGEH KOO HAM [BERUAS] minta **MENTERI KERJA RAYA** menyatakan kenapa pembinaan jejantas pejalan kaki di Batu 16, Ayer Tawar, Perak (Laluan FT-5, daerah Manjung) yang dikatakan dibina untuk memanfaatkan Sekolah Kebangsaan Ayer Tawar dan Masjid Al-Falah, Ayer Tawar masih diteruskan sungguhpun kedua-dua pihak tersebut sebelum permulaan projek tersebut telah menukar pendirian dan tidak bersetuju dengan projek tersebut. Projek ini akan menjadi satu projek gajah putih.

JAWAPAN

Tuan Yang Di-Pertua,

Untuk makluman Ahli Yang Berhormat, Program Menaiktaraf Infrastruktur Keselamatan Jalan Raya di bawah skop pembinaan jejantas pejalan kaki, akan mengenal pasti dan membina jejantas pejalan kaki berdasarkan justifikasi (teknikal) untuk mengurangkan kemalangan yang melibatkan pejalan kaki. Program Menaiktaraf Infrastruktur Keselamatan Jalan Raya ini telah dimulakan di bawah Rancangan Malaysia Ke-11 (RMK-11), dan Projek Membina Jejantas Pejalan Kaki Di Sekolah Kebangsaan Ayer Tawar, Laluan FT5, Daerah Manjung ini telah tersenarai didalam Rancangan Malaysia ke-12 (RMK-12).

Terdapat permohonan daripada pihak Sekolah Kebangsaan Ayer Tawar dan pihak Pengerusi Masjid Al-Falah untuk membina jejantas pejalan kaki di kawasan berhampiran sekolah dan masjid. Hasil semakan Bahagian Audit dan Program Keselamatan, Jabatan Kerja Raya lokasi cadangan ini adalah waran berdasarkan pertimbangan terdapat pejalan kaki daripada Sekolah Kebangsaan Ayer Tawar dan masjid berhampiran. Cadangan rekabentuk jejantas pejalan kaki dengan laluan motosikal ini adalah berdasarkan isipadu trafik yang tinggi pada waktu puncak 300 pejalan kaki/jam dan 1279 kenderaan/jam. Pembinaan satu jejantas pejalan kaki dan motosikal merentas lebuh raya laluan FT5 ke Sekolah Kebangsaan Ayer Tawar di Batu 16, Ayer Tawar, Perak adalah berdasarkan pertimbangan kejuruteraan (*engineering judgement*) berikut:

- 1) Keadaan di tapak dengan lebar jalan dan bilangan lorong iaitu Jalan Berkembar 6 Lorong (25.5 meter lebar keseluruhan, 4.5 meter lebar median);
- 2) Terdapat kawasan sekolah rendah untuk keperluan keselamatan pelajar sekolah melintas jalan;

- 3) Terdapat sebuah Masjid Al-Falah untuk penduduk tempatan yang berulang-alik bersembahyang yang memerlukan laluan motosikal;
- 4) Kawasan kampung yang berhampiran menyebabkan banyak aktiviti menyeberangi laluan FT5 yang membahayakan terutamanya kepada pejalan kaki untuk melintas jalan;
- 5) Pembinaan jejantas pejalan kaki dan laluan motosikal tersebut adalah untuk memastikan keselamatan orang awam diambilkira.

Kos pembinaan yang diluluskan sebanyak RM 8,712,900.00 telah mengambil kira rekabentuk jejantas pejalan kaki beserta laluan motosikal. Ini juga telah termasuk kos Pengambilan Tanah dengan keluasan 0.56 ekar dan kos utiliti. Status tanah Masjid Al-Falah pula berada merupakan tanah kerajaan yang diwakafkan sebagai tapak masjid yang berada dibawah seliaan Majlis Agama Islam Perak (MAIP). Pembayaran pampasan secara Ex-gratia telah diberikan kepada pihak MAIP bagi nilai harga tanah yang telah diduduki dan struktur yang terlibat Disember 2022. Manakala pembayaran Pengambilan Tanah bagi lot persendirian telah selesai pada Oktober 2022.

Kerja pembinaan Jejantas Pejalan Kaki di Sekolah Kebangsaan Ayer Tawar, Laluan FT5, Daerah Manjung, Perak telah dimulakan pada 12 Oktober 2021 dan dijangka siap pada 03 Julai 2023. Kemajuan terkini adalah melibatkan kerja cerucuk.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

DARIPADA : DATO' NGEH KOO HAM [BERUAS]

SOALAN

Minta **PERDANA MENTERI** menyatakan bilakah baki wang untuk projek Pembangunan Tapak Warisan Kampong Koh, Sitiawan, Perak (No.Projek: A0120KWKW068, Surat Kuasa UPP Bil. 20AKW0001) akan disalurkan untuk membolehkan projek ini diteruskan. (Nota: Peruntukan awal RM3.0 juta telah diluluskan dan disalurkan melalui Vot B11 Unit Penyelarasan Pelaksanaan Jabatan Perdana Menteri Kod PTJ: 21030701/2401010 Kod Aktiviti: 021201/050100 pada tahun 2020).

JAWAPAN

**DIJAWAB OLEH YB DATUK ARMIZAN BIN MOHD ALI,
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)**

Tuan Yang di-Pertua,

1. Projek Pembangunan Pekan Warisan Kg Koh, Sitiawan, Perak telah diluluskan sebanyak **RM3.0 juta** di bawah Peruntukan Kementerian Kewangan pada tahun 2020. Sehingga **16 Mac 2023**, projek ini sedang dalam pelaksanaan dengan peratus fizikal sebanyak **98%** dan dijangka siap pada penghujung Mac 2023. Daripada kelulusan sebanyak RM3.0 juta tersebut, jumlah perbelanjaan adalah sebanyak **RM1.86 juta** dan berbaki sebanyak **RM1.13 juta**.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

DARIPADA : YB DATO' NGEH KOO HAM (BERUAS)

SOALAN

DATO' NGEH KOO HAM [BERUAS] minta **MENTERI KERJA RAYA** menyatakan berapakah jumlah peruntukan yang akan diberikan untuk membaiki jalan-jalan Persekutuan di daerah Manjung yang sekarang dalam keadaan begitu teruk untuk tahun 2023.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian ini menyenggara Jalan Persekutuan sepanjang 144 km yang terletak di Daerah Manjung, Perak. Kerja-kerja penyenggaraan ini dilaksanakan melalui syarikat konsesi merangkumi penyenggaraan rutin, penyenggaraan berkala pavemen dan bukan pavemen.

Untuk makluman Ahli Yang Berhormat, jumlah keseluruhan peruntukan yang telah diluluskan bagi kerja-kerja penyenggaraan di Daerah Manjung pada tahun 2021 dan 2022 adalah sebanyak RM6.2 juta dan RM9.3 juta. Kementerian ini telah meluluskan peruntukan tahun 2023 bagi kerja-kerja penyenggaraan rutin di daerah Manjung iaitu sebanyak RM2.994 juta.

Bagi rancangan pembaikan jalan yang begitu teruk seperti mana yang dibangkitkan oleh Ahli Yang Berhormat, Jabatan Kerja Raya telah mengenal pasti kerosakan yang berlaku di jalan tersebut dan telah mengangkat Anggaran Penyenggaraan Jalan (APJ) sebanyak RM16.757 juta untuk menjalankan kerja-kerja pembaikan jalan.

Walau bagaimanapun, pelaksanaan kerja-kerja tersebut adalah tertakluk kepada kelulusan peruntukan oleh Kementerian Kewangan dan senarai keutamaan kerja berdasarkan penilaian tahap kritikal keseluruhan jaringan jalan persekutuan daripada pihak Jabatan Kerja Raya.

Kementerian Kerja Raya melalui Jabatan Kerja Raya Malaysia komited dalam memastikan jalan sentiasa dalam keadaan yang selamat dan selesa.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

DARIPADA : YB DATO' NGEH KOO HAM (BERUAS)

SOALAN

DATO' NGEH KOO HAM [BERUAS] minta **MENTERI KERJA RAYA** menyatakan berapakah jumlah peruntukan yang akan diberikan untuk membaiki lampu-lampu jalan di daerah Manjung yang sudah rosak bertahun-tahun.

JAWAPAN

Tuan Yang Di-Pertua,

Untuk makluman Ahli Yang Berhormat, jumlah peruntukan yang telah disalurkan bagi penyenggaraan lampu-lampu jalan di Jalan Persekutuan di Daerah Manjung pada tahun 2021 dan 2022 adalah berjumlah RM128,580 dan RM147,000.

Kementerian Kerja Raya mengambil maklum dan telah meminta pihak Jabatan Kerja Raya (JKR) memberi perhatian yang serius terhadap perkara yang telah dibangkitkan oleh Yang Berhormat berkaitan kerosakan lampu jalan. Dianggarkan kos bagi kerja-kerja penyenggaraan lampu jalan dan lampu isyarat yang diperlukan di Jalan Persekutuan di Daerah Manjung pada tahun 2023 adalah sebanyak RM4.1 juta.

Walau bagaimanapun, pelaksanaan kerja-kerja tersebut adalah tertakluk kepada had nilai kelulusan peruntukan oleh Kementerian Kewangan serta senarai keutamaan kerja pembaikan kerosakan lampu jalan bagi keseluruhan aset lampu jalan seluruh Malaysia daripada pihak Jabatan Kerja Raya.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : DATO' NGEH KOO HAM [BERUAS]

SOALAN

YB DATO' NGEH KOO HAM [BERUAS] minta **MENTERI PEMBANGUNAN KERAJAAN TEMPATAN** menyatakan berapakah jumlah peruntukan akan diberikan oleh Kerajaan kepada Majlis Perbandaran Manjung untuk tahun 2023.

JAWAPAN

Tuan Yang di-Pertua,

Untuk makluman Ahli Yang Berhormat, bagi tahun 2023, Kementerian Pembangunan Kerajaan Tempatan (KPKT) memperuntukkan sejumlah RM2 juta bagi pelaksanaan projek-projek berskala kecil BP.1 kepada Majlis Perbandaran Manjung. KPKT sedia mempertimbangkan permohonan peruntukan yang dikemukakan oleh Majlis Perbandaran Manjung berdasarkan asas-asas penilaian kebolehlaksanaan projek.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATUK DR. NIK MUHAMMAD ZAWAWI BIN
HAJI SALLEH [PASIR PUTEH]**

SOALAN

**DATUK DR. NIK MUHAMMAD ZAWAWI BIN HAJI SALLEH [PASIR
PUTEH]** minta **MENTERI EKONOMI** menyatakan apakah bidang ekonomi utama yang menjadi tumpuan pihak Kerajaan ketika ini dalam meningkatkan pertumbuhan ekonomi negara dan adakah kadar inflasi keseluruhan negara berada dalam situasi yang membimbangkan.

JAWAPAN

Tuan Yang di-Pertua,

Malaysia telah mencatatkan pertumbuhan keluaran dalam negeri kasar (KDNK) sebanyak 8.7% pada tahun 2022 (2021: 3.1%). Prestasi ekonomi yang baik ini menunjukkan pemulihan ekonomi yang berterusan dan mencerminkan daya tahan ekonomi negara.

Bagi tahun 2023, pertumbuhan ekonomi negara dijangka berkembang sekitar 4.5% dengan mengambil kira risiko persekitaran luar yang lebih mencabar. Walaupun KDNK pada tahun 2023 dianggar lebih rendah berbanding tahun sebelumnya, namun pembukaan semula negara China baru-baru ini dijangka dapat meningkatkan pertumbuhan ekonomi Malaysia dan akan mendorong kepada pemulihan yang lebih cepat bagi sektor berkaitan pelancongan.

Walaupun ekonomi negara telah menunjukkan pemulihan dan secara keseluruhannya telah melepasi tahap pra-pandemik, namun situasi persekitaran global yang tidak menentu menjadi cabaran utama kepada pengukuhan daya tahan ekonomi negara. Cabaran ini, termasuklah konflik Rusia-Ukraine, gangguan rantai bekalan global, kenaikan inflasi dan ketidaktentuan dasar monetari. Negara turut berhadapan dengan beberapa isu domestik seperti peningkatan harga barang, penyusutan nilai ringgit dan kedudukan kewangan Kerajaan Persekutuan yang terhad.

Pada masa ini, Kerajaan memberi tumpuan kepada tiga perkara utama, iaitu mengukuhkan kedudukan fiskal negara melalui peningkatan hasil dan rasionalisasi perbelanjaan, mengenal pasti sumber pertumbuhan baharu dan melaksanakan reformasi struktur ekonomi. Penekanan diberi untuk mereformasi struktur ekonomi ke arah rantai nilai yang lebih tinggi bagi mengukuhkan pertumbuhan serta meningkatkan daya saing dan produktiviti dalam semua sektor.

Sumber pertumbuhan yang berkualiti dan berasaskan produktiviti seperti sektor strategik yang dapat mempercepatkan kemasukan pelaburan baharu akan diberi penekanan. Tumpuan akan diberi kepada usaha untuk membina keupayaan teknologi 4IR yang berupaya menyokong perluasan dan pengoptimuman teknologi 4IR, iaitu kecerdasan buatan, internet benda, *blockchain*, pengkomputeran awan dan analitis data raya serta bahan dan teknologi termaju. Industri sedia ada akan digalakkan untuk meningkatkan keupayaan penyelidikan, pembangunan, pengkomersialan dan inovasi (R&D&C&I) serta penggunaan teknologi dan menerima guna pendigitalan.

Kerajaan juga memberi penekanan kepada sektor yang berpotensi seperti sektor berkaitan pelancongan serta sektor berasaskan pertanian dan komoditi yang dapat meningkatkan nilai ditambah dalam rantai bekalan, di samping mengukuhkan daya tahan negara. Pada masa yang sama, industri yang mengutamakan alam sekitar seperti kereta elektrik dan tenaga boleh diperbaharui, termasuk tenaga solar dan teknologi bateri turut diberi perhatian.

Sektor swasta akan terus dipacu sebagai rakan pembangunan dan menjadi pemangkin pertumbuhan ekonomi melalui peningkatan pelaburan yang berkualiti dan berteknologi tinggi. *Invest Malaysia Council* dan Jawatankuasa Nasional Mengenai Pelaburan (NCI) akan menerajui usaha mempercepatkan kelulusan projek yang berpotensi tinggi. Pelaburan ditumpukan kepada jentera dan peralatan, terutamanya ICT bagi mempercepatkan pendigitalan. Kerajaan juga akan memberi penekanan kepada pelaburan dalam industri berimpak tinggi yang dapat mewujudkan lebih banyak peluang pekerjaan berkemahiran dan berpendapatan tinggi. Perusahaan mikro, kecil dan sederhana akan turut diperkasa sebagai pemacu pertumbuhan melalui pendigitalan.

Tuan Yang di-Pertua,

Kerajaan akan terus memberi tumpuan terhadap isu kenaikan harga barang yang sedang dirasakan oleh rakyat. Kadar inflasi yang diukur oleh Indeks Harga Pengguna (IHP) dilihat semakin mereda kepada 3.7% pada Januari 2023 selepas mencatat kadar tertinggi 4.7% pada Ogos 2022. Kenaikan kadar inflasi ini didorong oleh komponen Makanan dan Minuman bukan Alkohol, terutamanya sub-komponen Makanan di luar rumah.

Penyederhanaan kadar inflasi yang berlaku selama 5 bulan berturut-turut didorong oleh pelbagai inisiatif yang telah dilaksanakan oleh Kerajaan, termasuk:

- i. Skim Harga Maksimum Musim Perayaan (SHMMP) Tahun Baru Cina 2023 bagi tempoh 15 Januari hingga 29 Januari 2023, melibatkan 8 jenis barangan, antaranya ikan bawal putih, udang putih, bawang putih dan daging babi;
- ii. Program Penyeragaman Harga (PPH) meliputi kawasan luar bandar/pedalaman Semenanjung, Sabah dan Sarawak bagi 7 barangan asas, iaitu beras putih, gula, minyak masak 1 kilogram, tepung gandum, LPG, petrol RON95 dan diesel;
- iii. Program Jualan Terus dari Ladang yang dijalankan sebulan sekali bagi menggalakkan penjualan secara terus kepada pengguna di lokasi strategik pada harga yang lebih murah;

- iv. Menu Rahmah, iaitu sebahagian daripada inisiatif awal di bawah Program Payung Rahmah yang menawarkan harga makanan sebanyak RM5 bagi setiap hidangan; dan
- v. Pakej Perpaduan Prabayar Internet Mudah Alih (Pakej Perpaduan) bernilai RM30 bagi meningkatkan akses internet untuk golongan belia, B40, orang kurang upaya (OKU), warga emas dan veteran Angkatan Tentera Malaysia (ATM) serta veteran polis.

Kerajaan juga terus menyediakan pelbagai bantuan sosial termasuk bantuan tunai kepada kumpulan sasar bagi mengurangkan kos sara hidup yang lebih tinggi. Pembayaran Sumbangan Tunai Rahmah (STR) Fasa 1 kepada 8.7 juta golongan B40 bernilai RM1.67 bilion telah disalurkan secara berperingkat mulai 17 Januari 2023.

Berdasarkan situasi semasa, kadar inflasi dijangka kekal terkawal, iaitu antara 2.8% - 3.8% pada 2023 berikutan prospek ekonomi yang lebih perlahan serta harga komoditi yang lebih stabil. Kerajaan sentiasa komited untuk memastikan ekonomi negara kekal kukuh, berdaya tahan dan mampan bagi memastikan kebajikan dan kesejahteraan rakyat terus terpelihara. Usaha akan ditumpukan bagi memastikan strategi dan inisiatif untuk menstrukturkan semula ekonomi mengambil kira keperluan rakyat. Ini bagi membolehkan matlamat negara berpendapatan tinggi, inklusif dan mampan dapat dicapai selaras dengan aspirasi Malaysia Madani.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DATUK DR. NIK MUHAMMAD ZAWAWI
BIN HAJI SALLEH [PASIR PUTEH]**

SOALAN

DATUK DR. NIK MUHAMMAD ZAWAWI BIN HAJI SALLEH [PASIR PUTEH] minta **MENTERI KOMUNIKASI DAN DIGITAL** menyatakan statistik aduan yang diterima SKMM mengikut kategori dan apakah tindakan yang telah diambil terhadap pengguna yang seringkali mengganggu gugat keharmonian negara dengan membuat penghinaan terhadap agama Islam di media sosial.

JAWAPAN

Tuan Yang di-Pertua,

Setakat Januari 2023, Suruhanjaya Komunikasi dan Multimedia Malaysia (SKMM) telah menerima sejumlah 1,712 aduan awam berhubung penyalahgunaan media sosial. Perincian aduan adalah seperti berikut:

Kategori aduan	Jumlah
Akaun/Halaman palsu, Penyamaran, Kandungan/Berita Palsu, Penipuan, Fitnah/Konflik Interpersonal (Sivil)	827
Gangguan, Penyebaran gambar/video intim, Ucapan kebencian	427
Penggodaman	237
Judi, Penyebaran Rahsia Rasmi, Perlindungan Data Peribadi, Penyalahgunaan Hakcipta/Cap Dagangan, Iklan/Promos/Produk/ Servis Yang Tidak Dibenarkan	88
Pertanyaan/cadangan umum	86
Pornografi, Pelacuran	41
Satira/Parodi	3
Penyelewengan agama	3
Jumlah	1,712

Antara tahun 2020 sehingga Januari 2023, sejumlah 39 kertas siasatan telah dibuka oleh SKMM melibatkan 3R (*Race, Religion and Royalty*). Daripada jumlah tersebut, tiga kes masih dalam siasatan, empat kes telah pun dihadapkan ke mahkamah, dua kes telah dikeluarkan notis amaran dan baki 30 kes adalah berstatus Tiada Kesalahan Lanjut dan Tiada Kesalahan Dizahirkan.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DATUK DR. NIK MUHAMMAD ZAWAWI
BIN HAJI SALLEH [PASIR PUTEH]**

SOALAN

Datuk Dr. Nik Muhammad Zawawi bin Haji Salleh [Pasir Puteh] minta **MENTERI KOMUNIKASI DAN DIGITAL** menyatakan perancangan terperinci projek pihak Kerajaan Persekutuan dalam membantu negeri-negeri Pantai Timur umumnya dan negeri Kelantan khususnya dalam menaik taraf sistem jaringan jalur lebar yang menjadi keutamaan dalam bidang pendidikan bagi mengelakkan gangguan capaian internet sempurna.

JAWAPAN

Tuan Yang di-Pertua,

Kementerian Komunikasi dan Digital (KKD) melalui Suruhanjaya Komunikasi dan Multimedia Malaysia (SKMM) telah dan sedang membuat penaiktarafan sistem jaringan jalur lebar di negeri-negeri Pantai Timur seperti Kelantan, Pahang dan Terengganu, melalui pelaksanaan inisiatif JENDELA Fasa 1 (2020-2022) dan Fasa 2 (2023-2025), di mana capaian internet sedang diperluaskan secara berperingkat.

Bagi membekalkan capaian internet yang lebih sempurna kepada masyarakat terutamanya bagi tujuan bidang pendidikan di Negeri Kelantan, Pahang dan Terengganu, setakat suku keempat 2022, secara keseluruhannya sebanyak 182,357 premis telah siap disediakan dengan sambungan gentian optik bagi jalur lebar talian tetap, manakala baki sebanyak 86,715 dalam peringkat pelaksanaan daripada 268,532 premis yang dirancang.

Selain itu, sebanyak 5,471 alat pemancar komunikasi telah siap dinaik taraf sepenuhnya kepada teknologi 4G, manakala baki sebanyak 17 alat pemancar dalam peringkat pelaksanaan daripada sejumlah 5,488 yang dirancang. Kementerian juga telah merancang sebanyak 577 buah menara baharu di Negeri Kelantan, Pahang dan Terengganu. Daripada jumlah tersebut, sebanyak 202 buah menara telah siap dilaksanakan di ketiga-tiga negeri ini. Manakala, baki sebanyak 375 alat pemancar dalam peringkat pelaksanaan. Kesemua inisiatif yang sedang dalam peringkat pelaksanaan dijangka akan siap sepenuhnya pada suku keempat 2023.

Perkembangan pelaksanaan Pelan JENDELA Fasa 1 bagi pemasangan gentian optik adalah perlahan berikutan perlaksanaan polisi baharu pihak Kerajaan Negeri berkaitan pemasangan utiliti awam termasuk kemudahan gentian fiber yang dikenakan caj dan fi baharu. Pihak SKMM sedang berunding dengan pihak Kerajaan Negeri agar dapat dikaji semula kadar caj dan fi baharu ini bagi memastikan

kesannya kepada projek JENDELA dapat diminimumkan.

Sebagai tambahan, Kerajaan telah mempercepatkan penyediaan perkhidmatan jalur lebar melalui teknologi satelit di 87 lokasi di kawasan pedalaman di Kelantan dan Pahang yang pada asalnya dirancang untuk dilaksanakan pada tahun 2023 di bawah JENDELA Fasa 2 yang berjaya disiapkan sepenuhnya di bawah JENDELA Fasa 1 pada tahun 2022.

Selain daripada pembinaan menara-menara telekomunikasi dan satelit bagi menangani isu akses internet berkualiti, KKD juga turut melaksanakan penyediaan infrastruktur jalur lebar menggunakan kaedah *Point of Presence* (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluaskan ke kawasan sekitar sekolah dan berpenduduk di kawasan luar bandar dan pedalaman di seluruh negara dengan lebih baik.

Pelaksanaan PoP bagi Fasa 1 di Pantai Timur adalah sebanyak 165 projek manakala bagi PoP Fasa 2 pula adalah sebanyak 660 projek yang menjadikan jumlah keseluruhannya sebanyak 825 projek. Bagi negeri Kelantan secara khususnya, sebanyak 164 projek PoP telah dirancang. Jumlah ini merangkumi sebanyak 55 projek bagi projek PoP Fasa 1 dan sebanyak 109 projek bagi Fasa 2.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATUK DR. NIK MUHAMMAD ZAWAWI
BIN HAJI SALLEH [PASIR PUTEH]**

SOALAN

DATUK DR. NIK MUHAMMAD ZAWAWI BIN HAJI SALLEH [PASIR PUTEH] minta **MENTERI PERTANIAN DAN KETERJAMINAN MAKANAN** menyatakan perancangan jangka pendek dan jangka panjang dalam membangunkan kawasan tanah terbiar bagi aktiviti pertanian dan berapakah statistik semasa tanah terbiar yang berjaya dibangunkan dalam tempoh 5 tahun mengikut negeri dan Parlimen.

JAWAPAN

Tuan Yang di-Pertua,

Tanah Terbiar didefinisikan sebagai tanah darat atau tanah sawah yang berkeluasan minima 0.4 hektar ke atas sama ada bersambungan atau bertaburan yang merupakan tanah milik yang tidak diusahakan selama tiga tahun berturut-turut. Berdasarkan rekod Jabatan Pertanian, seluas 103,563 hektar tanah terbiar telah dikenal pasti melibatkan sejumlah 46,382 lot di Semenanjung Malaysia termasuk Wilayah Persekutuan Labuan.

Data Tanah Terbiar Mengikut Negeri

Bil.	Negeri	Bil. Lot	Luas (Ha.)
1	JOHOR	4,561	10,098
2	KEDAH	1,774	2,655

SOALAN NO : 386

3	KELANTAN	3,690	4,815
4	MELAKA	1,915	2,332
5	N.SEMBILAN	5,885	11,324
6	PAHANG	11,292	29,391
7	PERAK	4,004	11,013
8	PERLIS	14	12
9	PULAU PINANG	877	2,622
10	SELANGOR	4,485	20,058
11	TERENGGANU	7,027	7,862
12	W.P. LABUAN	858	1,381
	JUMLAH	46,382	103,563

Tanah terbiar dikategorikan kepada tanah darat dan tanah sawah. Tanah darat seluas 89,464.35 hektar sesuai untuk tanaman sayuran, buah-buahan dan aktiviti pertanian selain padi, manakala tanah sawah dengan keluasan 14,098.26 hektar khusus untuk tanaman padi.

Pemilikan tanah ini antaranya pemilik-pemilik individu, syarikat dan tanah kerajaan negeri yang memerlukan kebenaran untuk diusahakan sebagai aktiviti pertanian.

Bagi tanah-tanah milik individu/syarikat, KPKM melalui Jabatan Pertanian menyediakan insentif dalam bentuk inkind di bawah projek seperti Projek Pembangunan Tanaman Buah-Buahan Jangka Panjang, Projek Pembangunan Tanaman Buah-Buahan Jangka Pendek dan Projek Pembangunan Tanaman Sayuran.

Bagi tanah milik Kerajaan Negeri, KPKM telah mencadangkan beberapa inisiatif melalui sinergi antara Kerajaan Persekutuan dan Kerajaan Negeri yang dibentangkan di dalam Mesyuarat Menteri Besar dan Ketua Menteri Ke-139 seperti berikut:-

- i. meningkatkan keluasan tanah yang sesuai khususnya tanah milik negeri untuk aktiviti pertanian melalui pewartaan kawasan tanah pertanian sebagai tanah rizab di bawah Seksyen 62 Kanun Tanah Negara (KTN) dan kemudiannya memajukan tanah rizab berikut di bawah Seksyen 63 KTN untuk tempoh sekurang-kurangnya 10 sehingga 21 tahun.
- ii. memperkasakan pemberian tanah milik negeri kepada anak syarikat kerajaan negeri berkaitan pertanian yang kemudiannya akan memajukan tanah tersebut kepada usahawan tani untuk tempoh 30 tahun.
- iii. pihak berkuasa negeri tertakluk kepada kaedah-kaedah tanah negeri boleh meluluskan tempoh sekurang-kurangnya tiga tahun dan boleh dilanjutkan seterusnya bagi setiap Lesen Pendudukan Sementara (TOL) bagi tujuan pertanian.
- iv. mengekalkan zon kawasan jelapang padi dan pewartaan Taman Kekal Pengeluaran Makanan (TKPM)
- v. Penubuhan Jawatankuasa Pembangunan Tanah pertanian peringkat daerah bagi memudahkan cara urusan membangunkan tanah persendirian yang tidak diusahakan.

Tanah-tanah Kerajaan Negeri yang telah mendapat kebenaran untuk diusahakan juga boleh mendapat insentif dalam bentuk inkind di bawah projek seperti Projek Pembangunan Tanaman Buah-Buahan Jangka Panjang, Projek Pembangunan Tanaman Buah-Buahan Jangka Pendek dan Projek Pembangunan Tanaman Sayuran.

Kementerian Pertanian dan Keterjaminan Makanan (KPKM) sangat mengalu-alukan cadangan untuk memajukan tanah yang terbiar atau belum dibangunkan bagi tujuan pertanian. Seperti Dewan sedia maklum, urusan tanah untuk pertanian adalah di bawah bidang kuasa Pihak Berkuasa Negeri (PBN) selaras dengan Seksyen 40 Kanun Tanah Negara (KTN) yang secara jelas memperuntukkan bahawa PBN

mempunyai hak ke atas semua tanah yang termasuk di dalam sempadan negeri masing-masing.

KPKM mempunyai program dan projek Rancangan Malaysia Ke-12 di bawah Jabatan dan Agensi yang memperuntukkan insentif kepada pengusaha tanaman dalam mengusahakan tanaman di mana-mana tanah hak milik atau sewaan sama ada milik Kerajaan atau orang perseorangan.

KPKM juga sentiasa membuat libat urus dengan kerajaan Negeri melalui Mesyuarat Menteri Pertanian bersama Exco Pertanian Negeri dalam membincangkan isu-isu berkaitan sektor agromakanan termasuk isu penggunaan tanah yang berada di bawah kuasa Kerajaan Negeri.

Bagi tanah-tanah persekutuan di bawah kawalan pelbagai Kementerian dan Agensi, KPKM juga mengalu-alukan sebarang cadangan bagi memajukan tanah-tanah yang masih belum ada pembangunan untuk digunakan bagi tanaman-tanaman sayuran dan tanaman kontan yang boleh memberikan pulangan hasil sementara menunggu perancangan pembangunan lain di tanah-tanah tersebut.

Sekian, terima kasih

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN JAWAB LISAN

**DARIPADA : DATUK DR. NIK MUHAMMAD ZAWAWI BIN HAJI
SALLEH [PASIR PUTEH]**

SOALAN

DATUK DR. NIK MUHAMMAD ZAWAWI BIN HAJI SALLEH [PASIR PUTEH] minta **MENTERI SUMBER MANUSIA** menyatakan berapakah peruntukan yang disediakan dan apakah langkah-langkah yang sedang diambil dalam menangani peningkatan *Out of Labour Force (OLF)* atau tenaga kerja tidak aktif seperti suri rumah, pelajar, pesara, OKU atau individu yang memilih untuk tidak bekerja.

JAWAPAN

Tuan Yang Di Pertua,

1. Kementerian Sumber Manusia melalui PERKESO telah merangka dan melaksanakan pelbagai strategi dalam menangani peningkatan *Out of Labour Force (OLF)* atau tenaga kerja tidak aktif seperti suri rumah, pelajar, pesara, OKU atau individu yang memilih untuk tidak bekerja melalui:

- (i) Mengaktifkan platform MYFutureJob yang merupakan portal berteknologi tinggi dan terkini bagi membuat padanan pekerjaan berdasarkan kelayakan, kemahiran, pengalaman, gaji dan lain-lain mengikut keperluan majikan (*job matching*). Secara tidak langsung, portal ini dilihat membantu untuk mengurangi berlakunya ketidakpadanan dalam pasaran buruh. Platform ini perlu dimanfaatkan oleh setiap pencari kerja termasuk golongan muda kerana ianya merupakan langkah awal untuk golongan ini berada dalam pasaran kerja sekaligus membantu kebolehpasaran dalam kalangan mereka;
- (ii) Selain itu, Kementerian Sumber Manusia melalui PERKESO juga secara berterusan mempergiatkan Karnival Kerjaya atau *Job Carnival* di setiap negeri agar program pengambilan pekerjaan untuk siswazah termasuk golongan siswazah dan belia dapat dilaksanakan dengan berkesan;
- (iii) Disamping itu, sistem Insurans Pekerjaan (SIP) PERKESO turut menyediakan program-program bagi peningkatan modal insan dan kebolehpasaran pekerja seperti khidmat kaunseling kerjaya, skills profiling, penulisan *resume*, *mock interview*, latihan kemahiran bahasa dan penyampaian serta seminar pekerjaan bagi mereka yang mencari pekerjaan.

2. Melalui inisiatif-inisiatif ini, kebolehpasaran dan peluang kerjaya yang baharu akan dipertingkatkan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

DARIPADA : YB DATUK SERI DR. NORAINI [PARIT SULONG]

SOALAN

DATUK SERI DR. NORAINI [PARIT SULONG] minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah kes keganasan rumah tangga yang telah dilaporkan dari 2020 dan apakah langkah yang telah diambil oleh Kementerian dalam memastikan kes keganasan rumah tangga dapat dikawal sepanjang masa.

JAWAPAN

Berdasarkan statistik Polis Diraja Malaysia (PDRM), sebanyak 19,268 kes keganasan rumah tangga telah dilaporkan dari tahun 2020 hingga 2022. Jumlah kes yang direkodkan pada tahun 2020 adalah sebanyak 5,260 kes, diikuti dengan 7,468 kes pada tahun 2021 dan 6,540 kes pada tahun 2022. Perincian statistik kes adalah seperti di **Lampiran 1**.

Isu keganasan rumah tangga adalah dikendalikan selaras dengan peruntukan perundangan di bawah Akta Keganasan Rumah Tangga 1994 [Akta 521] seliaan Kementerian Pembangunan Wanita, Keluarga dan Masyarakat (KPWKM) untuk melindungi hak dan keselamatan mangsa keganasan rumah tangga sama ada wanita, lelaki, warga emas, Orang Kurang Upaya (OKU) dan kanak-kanak.

Bagi menangani serta mengurangkan kes keganasan rumah tangga dalam kalangan masyarakat, pelbagai inisiatif telah dan dilaksanakan secara berterusan oleh kementerian khususnya menerusi Jawatankuasa Menangani Keganasan Rumah Tangga seperti berikut:

- a) **memperluaskan pelaksanaan program advokasi** berkaitan keganasan rumah tangga untuk meningkatkan tahap kesedaran serta pemahaman dalam kalangan masyarakat mengenai isu, hak, perkhidmatan dan tindakan yang boleh diambil berkaitan keganasan rumah tangga;
- b) **memperbanyakkan program kekeluargaan dan keibubapaan** bagi menerapkan elemen bertanggungjawab dan saling menghormati antara satu sama lain untuk kesejahteraan institusi keluarga;
- c) **menerapkan elemen keganasan rumah tangga dalam program sedia ada** di bawah agensi kerajaan seperti kekeluargaan, keibubapaan, keagamaan, kursus pra perkahwinan dan sebagainya;
- d) **melipatganda usaha mempromosikan perkhidmatan aduan atas talian melalui Talian Kasih 15999 dan aplikasi WhatsApp 019-**

26 15999 yang beroperasi 24 jam setiap hari sebagai *single point of contact* untuk mengemukakan aduan, mendapatkan khidmat nasihat serta mengakses bantuan dan sokongan yang disediakan oleh KPWKM termasuk perkhidmatan psiko-sosial;

- e) **menyediakan khidmat psiko-sosial, kaunseling dan nasihat** yang boleh diakses oleh mangsa atau mana-mana individu yang memerlukan menerusi Talian Kasih 15999, Lembaga Penduduk dan Pembangunan Keluarga (LPPKN), Pusat Sokongan Sosial Setempat (PSSS) dan lain-lain;
- f) **mempergiatkan Skwad Wanita Anti Jenayah (WAJA)** untuk melaksanakan program bimbingan psikososial dalam komuniti yang meliputi bimbingan, nasihat dan rujukan kepada pihak-pihak berkaitan merangkumi advokasi mengenai keselamatan dan perlindungan di peringkat komuniti khususnya dalam kalangan wanita. Sehingga 31 Disember 2022, terdapat seramai 328,558 orang ahli telah didaftarkan di bawah Skwad WAJA; dan
- g) **memperbanyakkan program kemahiran, keusahawanan dan penjagaan khususnya untuk golongan wanita** bagi memperkasa mereka selain membantu menjana pendapatan dan kelangsungan hidup;
- h) **menggunakan Pusat Sokongan Sosial Setempat (PSSS)** di bawah KPWKM sebagai pusat rujukan khusus untuk mengemukakan pertanyaan atau aduan, memperoleh maklumat dan nasihat, mendapatkan perkhidmatan segera seperti kaunseling serta transit sementara. Sehingga 31 Januari 2023, sebanyak tiga (2) buah PSSS tetap (fizikal) telah ditubuhkan di negeri Kuala Lumpur dan Kelantan manakala sebanyak tujuh (9) buah PSSS bergerak disediakan di zon tengah, zon utara, selatan, timur, Sabah dan Sarawak;
- i) **menyediakan Pusat Transit Sementara di masjid** yang telah dikenal pasti bagi mangsa keganasan rumah tangga. Sehingga 31 Januari 2023, tiga (4) buah masjid iaitu Masjid Wilayah Persekutuan, Masjid Al Ghufuran Pinggiran Taman Tun Dr. Ismail dan Masjid Alwi

dan Masjid Oran Mata Ayer di Perlis telah dijadikan sebagai Masjid Pusat Transit manakala 12 buah masjid lagi digunakan sebagai pusat aduan bagi kes keganasan rumah tangga;

- j) **memastikan perkhidmatan perlindungan iaitu penyediaan Tempat Selamat atau Rumah Perlindungan serta pengeluaran Perintah Perlindungan Kecemasan (EPO)** sentiasa dapat diakses oleh mangsa. Sehingga 31 Januari 2023, terdapat sebanyak 44 buah Tempat Selamat di seluruh negara yang dikendalikan oleh kerajaan dan Badan Bukan Kerajaan (NGO); dan
- k) **menambah baik prosedur kerja** bagi memastikan kes keganasan rumah tangga dapat dikendalikan secara bersistematik dan berkesan.

Kementerian ini akan terus komited dalam usaha untuk menangani dan mengurangkan kes keganasan rumah tangga secara bersepadu dengan kerjasama agensi kerajaan dan NGO untuk kesejahteraan sesebuah institusi keluarga dan pembangunan masyarakat.

LAMPIRAN 1

**PERINCIAN STATISTIK KES KEGANASAN RUMAH TANGGA
DI BAWAH POLIS DIRAJA MALAYSIA DARI TAHUN 2020 HINGGA
2022**

1. Statistik mengikut negeri, jantina dan bangsa

a) Negeri

Negeri	2020	2021	2022
Johor	507	545	397
Kedah	510	815	874
Kelantan	392	578	489
Melaka	247	288	272
Negeri Sembilan	268	375	308
Pahang	185	299	278
Pulau Pinang	271	487	473
Perak	370	507	493
Perlis	67	105	85
Selangor	944	1,713	1,284
Terengganu	308	392	296
Sabah	266	394	385
Sarawak	599	649	624
WP Kuala Lumpur	326	321	282
Jumlah	5,260	7,468	6,540

b) Jantina

Jantina	2020	2021	2022
Lelaki	1,644	2,337	1,778
Perempuan	3,616	5,131	4,762
Jumlah	5,260	7,468	6,540

c) Bangsa

Bangsa	2020	2021	2022
Melayu	3,094	4,442	3,693
Cina	434	501	498
India	969	1,515	1,314
Etnik Sabah	365	377	396
Etnik Sarawak	367	335	391
Warga Asing	21	253	233
Lain-lain	10	38	0
Jumlah	5,260	7,468	6,540

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA,
PARLIMEN KE-15**

**PERTANYAAN : BERTULIS
DARIPADA : DATUK SERI DR. NORAINI AHMAD
[PARIT SULONG]**

SOALAN

DATUK SERI DR. NORAINI AHMAD [PARIT SULONG] minta **KEMENTERIAN PERDAGANGAN ANTARABANGSA DAN INDUSTRI** menyatakan kadar pelaburan langsung asing (FDI) terkini serta prestasi aliran pelaburan terkumpul di luar negara dan apakah perancangan Kementerian bagi meningkatkan kadar FDI negara.

JAWAPAN

Tuan Yang di-Pertua,

Kerajaan melalui Kementerian Perdagangan Antarabangsa dan Industri (MITI) dan Lembaga Pembangunan Pelaburan Malaysia (MIDA) sentiasa komited menggembeleng usaha bagi terus menggalakkan kemasukan Pelaburan Langsung Asing (FDI) ke dalam negara. Komitmen tinggi Kerajaan menarik masuk FDI dizahirkan menerusi Laporan 2022 *Milken Country Institute Global Opportunity Index* (GIO) yang telah memperakui keberkesanan usaha-usaha Kerajaan dalam membawa masuk FDI, di mana Malaysia telah diiktiraf sebagai destinasi pelaburan paling menarik di kalangan negara-negara Asia Tenggara bagi pelabur-pelabur asing.

Bagi tahun 2022, 4,454 projek telah diluluskan dengan jumlah pelaburan bernilai sebanyak RM264.6 bilion pelaburan telah diluluskan dalam sektor perkilangan, perkhidmatan dan utama. Daripada jumlah pelaburan ini, FDI kekal sebagai penyumbang utama pelaburan yang diluluskan iaitu 61.7 peratus atau RM163.3 bilion. Pelaburan Langsung Domestik (DDI) pula menyumbang 38.3 peratus atau RM101.3 bilion daripada jumlah pelaburan diluluskan. Jumlah pelaburan yang diluluskan ini adalah sebanyak 14.5% lebih rendah daripada jumlah pelaburan yang diluluskan pada tahun 2021.

Dalam pada itu, MITI juga telah berjaya mendapatkan komitmen pelaburan FDI sejumlah RM3.25 billion melalui misi pelaburan ke Milan, Itali pada 20 hingga 23 Januari 2023 dan RM13 bilion daripada tiga syarikat melalui misi pelaburan ke Republik Singapura bersempena lawatan rasmi pertama Yang Amat Berhormat Perdana Menteri ke negara tersebut pada 31 Januari 2023.

Berhubung pelaburan langsung ke luar negara (*Direct Investments Abroad* - DIA) pula, berdasarkan data daripada Jabatan Perangkaan Negara, jumlah DIA oleh syarikat Malaysia pada tahun 2022 adalah RM602.1 bilion, meningkat 10.1 peratus daripada tahun 2021 sebanyak RM547.0 bilion.

DIA bagi tahun 2022 telah mencatatkan peningkatan ketara dengan pelaburan paling tinggi ke Singapura iaitu sebanyak RM126.8 bilion diikuti oleh Indonesia sebanyak RM63.5 bilion dan Belanda sebanyak RM 38.8 bilion. Aliran keluar DIA yang meningkat terutamanya dalam aktiviti kewangan, perlombongan, perkilangan, dan pertanian menunjukkan daya saing yang tinggi syarikat Malaysia untuk berkembang dan bersaing serta mengambil bahagian dalam rantaian bekalan di peringkat serantau dan global.

Kerajaan melalui MITI dan MIDA akan terus melipatgandakan inisiatif bagi menarik FDI melalui inisiatif-inisiatif berikut:

- i. Melaksanakan Dasar Pelaburan Baharu (NIP) berdasarkan Aspirasi Pelaburan Nasional (NIA). NIA akan mendorong pertumbuhan jangka panjang untuk Malaysia melalui kemasukan pelaburan berkualiti yang mampan dalam bidang pertumbuhan baharu dan kompleks. NIA juga memberi tumpuan kepada keterangkuman dan kemampanan yang serasi dengan matlamat Alam Sekitar, Sosial dan Tadbir Urus (ESG);
- ii. Melaksanakan Rangka Tindakan (Blueprint) Ekonomi Digital Malaysia bagi membina ekosistem digital yang lengkap serta Dasar '4th Industrial Revolution' Negara untuk mendorong pembangunan ekonomi digital;
- iii. Penubuhan Pejabat Pelaburan Digital (*Digital Investment Office - DIO*) dengan kolaborasi digital sepenuhnya antara MIDA dan Perbadanan Ekonomi Digital Malaysia (MDEC) bertujuan untuk mengkoordinasi, memantau dan mempercepatkan pelaburan digital di negara ini. Peranan DIO adalah sejajar dengan Rangka Tindakan MyDIGITAL untuk menarik pelaburan bernilai RM70 bilion dalam sektor digital menjelang tahun 2025;
- iv. Melaksanakan Program Misi Galakan Perdagangan dan Pelaburan (TIM) untuk menarik projek berkualiti dari seluruh dunia;
- v. Mengadakan sesi '*Strike Force*', Misi Projek Khusus dan lawatan kerja spesifik bagi memfokuskan kepada syarikat-syarikat berpotensi dan bertaraf dunia;

- vi. Memperkenalkan inisiatif memudahkan urusan menjalankan perniagaan (*ease of doing business*) seperti #MyMudah di bawah Perbadanan Produktiviti Malaysia (MPC) sebagai langkah bukan fiskal bagi mengurangkan beban peraturan tidak wajar dan mengurangkan kos perniagaan sekaligus meningkatkan produktiviti dan daya saing negara;
- vii. Mengukuhkan dan mempelbagaikan lagi kerjasama dengan dewan perniagaan, bank dan komuniti perniagaan antarabangsa dalam meneroka peluang ke arah menjana hasil yang saling menguntungkan serta menganjurkan program perdana (flagship programmes);
- viii. Mempertingkatkan lagi sesi libat urus dengan pelabur baharu dan sedia ada melalui penganjuran seminar / webinar, mesyuarat meja bulat, lawatan kerja, mesyuarat dengan syarikat individu dan majlis rangkaian; dan
- ix. Menyediakan bekalan tenaga kerja pakar-pakar teknologi bagi memenuhi keperluan syarikat asing di Malaysia.

Kerajaan sentiasa komited dan proaktif dalam melaksanakan misi-misi pelaburan bagi merealisasikan matlamat Malaysia sebagai hab inovasi global berteknologi tinggi dengan ekosistem pelaburan yang berdaya tahan dan mampan. Ini juga adalah selaras dengan kerangka Malaysia MADANI yang mendorong pembangunan keupayaan yang lestari dan pemindahan teknologi melalui jalinan kerjasama luar, dalam sektor berpotensi dan berkepentingan strategik, ke arah memacu ekonomi yang berasaskan kesejahteraan terangkum.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB DATUK SERI DR. NORAINI BT AHMAD
[PARIT SULONG]**

SOALAN

Datuk Seri Dr. Noraini Ahmad [Parit Sulong] minta **MENTERI DALAM NEGERI** menyatakan mengenai kemungkinan satu kad pengenalan boleh digunakan untuk urusan bank, Touch n Go dan lain-lain berbanding pelbagai kad sesuai dengan era teknologi dan kemajuan dasar digital negara.

JAWAPAN

Tuan Yang Di Pertua,

Untuk makluman Ahli Yang Berhormat, Kerajaan mengambil maklum dan sentiasa terbuka untuk menambahbaik kualiti dan fungsi kad pengenalan dari semasa ke semasa sejajar dengan arus perkembangan teknologi, disamping meningkatkan tahap keselamatan kad pengenalan yang dikeluarkan.

Kad pengenalan MyKAD sedia ada telahpun dilengkapi dengan kemudahan *Touch 'n' Go* yang boleh digunakan untuk pembayaran tol dan transaksi *e-wallet* dan lain-lain aplikasi yang digunakan oleh Agensi Kerajaan menerusi *Third Party Gateway* (TPG). Antara agensi yang menggunakan TPG ini adalah Jabatan Perikanan Malaysia dalam menguruskan subsidi kepada nelayan, Lembaga Pemasaran Pertanian Persekutuan (FAMA) dan Jabatan Keselamatan dan Kesihatan Pekerjaan (DOSH).

Dalam konteks keselamatan, kualiti MyKad Struktur Baharu telah dipertingkatkan dan mempunyai ciri-ciri keselamatan bermutu tinggi dan lebih canggih seperti berikut:-

- i. Ia diperbuat daripada bahan polikarbonat sepenuhnya dan telah diuji ketahanannya di makmal yang diiktiraf;
- ii. Cip MyKad Struktur Baharu melalui beberapa peringkat pengujian termasuklah sebelum proses memasukkan cip ke dalam MyKad; dan
- iii. Turisan laser pada nama, nombor kad pengenalan dan gambar kecil (*ghost image*) yang tidak membolehkan maklumat dipinda dan sekiranya terdapat pindaan, pindaan tersebut dapat dikesan dengan mudah dan pantas.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : DATUK SERI DR. NORAINI BINTI AHMAD
[PARIT SULONG]

SOALAN

DATUK SERI DR. NORAINI BINTI AHMAD [PARIT SULONG] minta **MENTERI KEWANGAN** menyatakan keberkesanan program Skim Jamin Penjanaan Pekerjaan (JanaKerja) yang pernah diumumkan daripada Belanjawan 2021 dahulu dan apakah perancangan Kerajaan dalam memastikan golongan Orang Kurang Upaya (OKU) tidak tercicir dalam mendapatkan pekerjaan bagi meringankan bebanan harian.

JAWAPAN

Tuan Yang di-Pertua,

Program Skim Jamin Penjanaan Pekerjaan (JanaKerja) yang diumumkan semasa Belanjawan 2021 telah menyasarkan 500,000 peluang pekerjaan kepada rakyat Malaysia termasuk melalui pelbagai program peningkatan kemahiran dan latihan.

Untuk makluman Yang Berhormat, pada tahun 2021, Kerajaan telah berjaya menempatkan sebanyak 558,633 peluang pekerjaan melalui 27 inisiatif yang dipantau oleh Majlis Pekerjaan Negara (NEC). Jumlah ini melebihi sasaran awal yang ditetapkan iaitu sebanyak 500,000 peluang pekerjaan di mana inisiatif penempatan pekerjaan Penjana Kerjaya 2.0 menjadi penyumbang tertinggi iaitu sebanyak 273,803. Malaysia *Short Term Employment Program* (MySTEP) pula telah berjaya memberi peluang pekerjaan kepada 63,221 rakyat iaitu melebihi sasaran awal sebanyak 50,000 penempatan.

Di samping itu juga, pelbagai program latihan dan peningkatan kemahiran yang dijalankan merentasi pelbagai Kementerian dan Agensi telah dilaksanakan dan pencapaian keseluruhan bagi program-program ini adalah sebanyak 156,257. Selain itu, program perantisan dengan kerjasama Kementerian Belia dan Sukan (KBS) serta Kementerian Sumber Manusia (KSM) juga telah menyediakan sebanyak 65,352 peluang penempatan bagi golongan belia melalui Skim Perantisan Nasional. Skim ini membantu golongan belia untuk mendapatkan pengalaman pekerjaan dan pada masa yang sama meningkatkan kemahiran untuk membantu mendapat pekerjaan dengan lebih baik setelah tamat program.

Kejayaan inisiatif JanaKerja merupakan salah satu penyumbang kepada pemulihan pasaran buruh yang merekodkan penurunan kadar pengangguran negara ke paras 4.3% pada Disember 2021 berbanding 5.0% pada bulan yang sama tahun sebelumnya. Program JanaKerja juga telah menyumbang kepada peningkatan kadar kebolehpasaran graduan (GE) bagi graduan IPT dan graduan TVET sebanyak 1% pada tahun 2021

berbanding tahun sebelumnya. Antara program yang menyumbang kepada kejayaan ini adalah program KPT-CAP di bawah Kementerian Pengajian Tinggi (KPT) yang menyediakan latihan dan peningkatan kemahiran untuk meningkatkan kebolehpasaran pelajar tahun akhir dan para graduan baharu di mana sebanyak 19,266 pelajar telah berjaya ditempatkan melalui program ini.

Tuan Yang di-Pertua,

Keberkesanan dan kejayaan program-program di bawah JanaKerja ini telah mendorong Kerajaan untuk meneruskan program-program tersebut pada tahun 2022 dengan sasaran sebanyak 600,000 peluang pekerjaan. Sukacita dimaklumkan Kerajaan telah berjaya mencatatkan sebanyak 600,984 penempatan pekerjaan iaitu melebihi sasaran yang ditetapkan menerusi tiga komponen utama iaitu Insentif Penggajian Jamin Kerja, Program Peningkatan Latihan dan Kemahiran serta Program MySTEP yang diteruskan pada tahun lalu.

Sejajar dengan usaha untuk memastikan golongan OKU tidak dipinggirkan dan turut mendapat peluang untuk menceburi bidang pekerjaan, Kerajaan telah mengumumkan penetapan 1% kuota khas kepada golongan Orang Kurang Upaya (OKU) untuk program MySTEP 2022. Selain itu, bagi memastikan kebajikan serta sokongan kepada golongan OKU dalam bidang pekerjaan, Kerajaan telah memperuntukkan lebih daripada RM40 juta melalui pelbagai inisiatif yang antaranya melibatkan penambahbaikan infrastruktur serta menaik taraf bangunan Kerajaan agar menjadi lebih mesra OKU. Kerajaan juga telah melanjutkan program Insentif Penggajian Jamin Kerja sehingga 31 Disember 2022 khusus bagi golongan rentan. Pelanjutan ini memberi tumpuan kepada usaha pengambilan pekerja daripada sektor pelancongan, pekerja yang menggantikan pekerja asing, golongan OKU wanita dan pekerja yang kehilangan pekerjaan.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB DATUK SERI DR. NORAINI BT AHMAD
[PARIT SULONG]**

SOALAN

Datuk Seri Dr. Noraini Ahmad [Parit Sulong] minta **MENTERI DALAM NEGERI** menyatakan jumlah terkini pelancong asing yang masuk ke dalam dan keluar dari negara serta jumlah mereka yang masih tidak keluar negara setelah tamat tempoh visa.

JAWAPAN

Tuan Yang Di Pertua,

Berdasarkan statistik pergerakan pelawat yang menggunakan Pas Lawatan Sosial (PLS) pada tahun 2019 hingga dan 8 Mac 2023, seramai **723,116** yang masih berada di negara ini.

Daripada jumlah warganegara asing di atas, mereka memasuki Malaysia dengan menggunakan Pas Lawatan Sosial (PLS) dan bukan semuanya masuk bertujuan untuk melancong. Selain daripada tujuan pelancongan, terdapat warga asing yang masuk menggunakan PLS melanjutkan pas atau menukarkan pas PLS kepada Pas Jangka Panjang yang merangkumi pelbagai pas seperti berikut:

- PLS Pas warga tua
- PLS kes rawatan
- PLS kes mahkamah
- PLS anak kepada warganegara
- PLS Pengiring kepada pesakit
- PLS anak kepada PR
- PLS penjaga/ibu bapa/ tanggungan kepada pas pelajar
- PLS tanggungan kepada peserta MM2H
- Pas Penggajian
- Pas Pelajar

Pergerakan pelawat yang menggunakan Pas Lawatan Sosial pada tahun 2019 hingga 08 Mac 2023:

PAS LAWATAN SOSIAL		
TAHUN	MASUK (A)	KELUAR (B)
2019	27,695,800	31,109,725
2020	5,173,576	5,959,861
2021	386,306	464,046
2022	15,851,091	12,316,811
2023	5,501,576	4,034,790
JUMLAH	54,608,349	53,885,233

*Data PLS ini berdasarkan janaan dari Sistem MyIMMS pada 08 Mac 2023

Sumber: BTMR, Jabatan Imigresen Malaysia, Putrajaya

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS 2023**

PERTANYAAN : BUKAN LISAN

**DARIPADA : KOMANDER NORDIN BIN AHMAD
ISMAIL TLDM (BERSARA) [LUMUT]**

SOALAN

**YB KOMANDER NORDIN BIN AHMAD ISMAIL TLDM (BERSARA)
[LUMUT]** minta **MENTERI PEMBANGUNAN KERAJAAN TEMPATAN** menyatakan adakah Kementerian mempunyai perancangan untuk menaik taraf bomba dan penyelamat Zon 3 Perak di Manjung ke Kategori A di mana pembangunan pesat dan terdapat sasaran penting seperti penjana kuasa elektrik seperti Janamanjung Sdn. Bhd dan Malakoff Corporation Bhd.

JAWAPAN

Tuan Yang di-Pertua,

Untuk makluman Ahli Yang Berhormat, di bawah pentadbiran Zon 3 Perak terdapat sebanyak lapan (8) buah Balai Bomba dan Penyelamat (BPP) yang beroperasi iaitu dua (2) buah BBP kategori B (Seri Manjung dan Sitiawan), empat (4) buah BBP kategori C (Seri Iskandar, Parit, Pulau Pangkor dan Pantai Remis) dan dua (2) buah BBP kategori D (Ayer Tawar dan Kampung Gajah).

Sekiranya berlaku kes kecemasan seperti yang dinyatakan, Jabatan Bomba dan Penyelamat Malaysia (JBPM) telah mempunyai pelan kontigensi dan juga peralatan yang mencukupi. Kawasan janakuasa TNB yang dinyatakan adalah di bawah jagaan BBP Seri Manjung dan terdapat balai bantuan yang berhampiran seperti BBP Sitiawan, BBP Pantai Remis serta Ayer Tawar bagi keperluan logistik serta keanggotaan. Janakuasa tersebut juga telah menubuhkan pasukan *Emergency Response Team* sendiri yang sentiasa memberikan kerjasama kepada JBPM dalam melaksanakan latihan pembiasaan.

Untuk memastikan operasi kebombaan dapat ditangani dengan berkesan, balai-balai ini juga telah dilengkapi dengan jentera, peralatan dan juga kekuatan anggota yang mencukupi. Pada asasnya, berdasarkan kajian keperluan risiko, JBPM telah menetapkan kategori balai berkenaan sebagai kategori B. Walau bagaimanapun, JBPM sentiasa memantau dan menjalankan kajian risiko keperluan bagi sesebuah balai bomba untuk dinaik taraf, sesuai dengan keadaan pembangunan semasa.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT, MESYUARAT PERTAMA,
PENGAL KEDUA, PARLIMEN KELIMA BELAS TAHUN
2023**

PERTANYAAN : BUKAN LISAN

**DARIPADA : KOMANDER NORDIN BIN AHMAD
ISMAIL TLDM (BERSARA) [LUMUT]**

SOALAN

minta **PERDANA MENTERI** menyatakan apakah perancangan Kerajaan bagi penempatan baru untuk Angkatan Malaysia daerah Manjung di mana penempatan sementara keadaan tidak bersesuaian dari segi lokasi. Untuk makluman jabatan ini telah mendapat arahan untuk berpindah keluar. Kita sedia maklum bahawa jabatan ini amatlah penting di mana mereka adalah pasukan yang pertama hadir di sesuatu tempat kejadian atau bencana.

JAWAPAN

**DIJAWAB OLEH YB DATUK ARMIZAN BIN MOHD ALI,
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)**

Tuan Yang di-Pertua,

1. Bagi memastikan penyampaian perkhidmatan Angkatan Pertahanan Awam Malaysia (APM) sampai ke peringkat akar umbi, APM dari semasa ke semasa memperluaskan pejabat operasi APM di semua daerah di Negeri Perak. Pengoperasian di semua pejabat operasi berkenaan melibatkan penugasan seramai 331 anggota setiap hari terutamanya yang menjalankan tugas operasi harian (24 jam) di bawah perkhidmatan *Malaysia Emergency Response Services 999* ataupun *MERS 999*.

2. Pada masa kini, APM Daerah Manjung masih beroperasi di kuarters JKR bertempat di Jalan Tok Perdana, Setiawan milik Kerajaan Negeri yang disediakan secara percuma. Bagi pelan jangka masa pendek, bermula pertengahan tahun 2023 kontrak sewaan bagi bangunan sedia ada akan dilaksanakan bagi membolehkan APM melaksanakan penyelenggaraan dan pembaikan bangunan secara berkala mengikut peraturan dan tatacara kewangan yang dibenarkan. Manakala, bagi pelan jangka masa panjang, APM sedang berusaha mendapatkan kelulusan pemilikan tanah di tapak pejabat dan rumah kakitangan Telekom di Lot 31861 seluas 28,328 meter persegi daripada Kementerian Komunikasi dan Digital Malaysia (KKOM) untuk dijadikan sebagai pejabat operasi APM Daerah Manjung. Ini kerana ia kedudukan tanah yang strategik berhampiran dengan kawasan perumahan dan agensi-agensi kerajaan yang lain.

3. Perluasan pejabat operasi APM ini bukan sahaja bagi mempersiapkan aset dan sumber manusia menghadapi bencana tetapi juga bagi memastikan rakyat segenap lapisan dilatih untuk mampu bertindakbalas sendiri dan berdaya tahan untuk sebarang situasi kecemasan, bencana atau kemungkinan ancaman krisis.

4. Keberadaan APM secara menyeluruh di semua daerah hendaklah disokong oleh Ahli-Ahli Yang Berhormat dalam usaha APM meningkatkan taraf perkhidmatan yang akan memberikan manfaat yang besar kepada rakyat khususnya dalam menjayakan misi APM bagi memperkasa kesiapsiagaan awam untuk keselamatan dan kesejahteraan Negara.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB KOMANDER NORDIN BIN AHMAD ISMAIL
TLDM (B) [LUMUT]**

SOALAN

**Komander Nordin Bin Ahmad Ismail TLDM (B) [Lumut] minta
MENTERI DALAM NEGERI menyatakan:**

- a) usaha Kerajaan untuk menjamin kedaulatan dan keselamatan sempadan negara susulan pembukaan sempadan negara termasuk peranan Kawasan Keselamatan Khas Pantai Timur Sabah (ESSCOM); dan
- b) usaha Kerajaan menangani isu pencerobohan kapal-kapal pengawal pantai China di Zon ZEE Malaysia

JAWAPAN

Tuan Yang Di Pertua,

Kerajaan melaksanakan pelbagai inisiatif bagi memelihara kedaulatan serta menjamin keselamatan dan kesejahteraan di ESS Zone seperti berikut:

- i. Memperkasa Operasi Sanggah ESSCOM melalui koordinasi operasi pasukan keselamatan secara bersepadu bagi mengesan dan mengekang anasir luar, tali barut, penjenayah rentas sempadan serta kemasukan pendatang asing tanpa izin (PATI) ke ESS Zone menerusi pelaksanaan Op GASAK Laut dan Darat, Op Bersepadu (OB), *Road Check Point* (RCP) dan *Sea Check Point* (SCP);
- ii. Mengukuhkan kerjasama merentasi agensi melibatkan ATM, PDRM, APMM dan pihak berkuasa dari negara-negara jiran membabitkan pertukaran dan perkongsian maklumat perisikan melalui jaringan komunikasi yang berkesan;
- iii. Mempertingkatkan atur gerak trup dan memperkukuhkan infrastruktur di pos kawalan sedia ada selain rancangan hadapan bagi pewujudan pos-pos kawalan dan penempatan aset-aset keselamatan yang baharu di sempadan;
- iv. Mempergiatkan atur gerak dan koordinasi aset-aset ATM, PDRM dan APMM secara bersepadu di sempadan darat, laut dan udara melalui maklumat yang diperolehi daripada sumber risikan dan sistem pengawasan yang berupaya mengesan dan memantau sasaran yang mencurigakan; dan
- v. Memupuk jaringan hubungan dan kerjasama yang erat antara ESSCOM dengan golongan sasaran iaitu penduduk serta pemimpin tempatan melalui pendekatan sesi libat urus, program-program kemasyarakatan dan sosio-ekonomi.

Tuan Yang Di Pertua,

Berhubung isu pencerobohan kapal-kapal pengawal pantai China di Zon Ekonomi Eksklusif (ZEE) Malaysia, APMM melaksanakan pemantauan secara bersama dan berterusan dengan melaksanakan strategi “*show of presence*” aset negara di lokasi tumpuan seperti di Beting Patinggi Ali (BPA) dan Beting Raja Jarum (BRJ). Bagi memastikan keselamatan dan kedaulatan perairan negara di BPA dan BRJ sentiasa terpelihara dari gangguan China Coast Guard, APMM telah melaksanakan Op Khas Raja Laut. Selain itu, APMM juga dalam usaha menaik taraf sistem sedia ada seperti SWASLA, sistem C4ISR serta sistem RMPnet. Sistem ini amat penting dalam melaksanakan tugas operasi dengan mendapatkan cerapan maklumat seperti pengesanan, pengawasan dan komunikasi pantas serta pengumpulan maklumat penting berkaitan keselamatan di Zon Maritim Malaysia (ZMM).

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : KOMANDER NORDIN BIN AHMAD ISMAIL
TLDM (BERSARA) [LUMUT]**

SOALAN

**YB KOMANDER NORDIN BIN AHMAD ISMAIL TLDM (BERSARA)
[LUMUT]** minta **MENTERI PEMBANGUNAN KERAJAAN TEMPATAN** menyatakan tuduhan dan ugutan beliau terhadap Yang Dipertua Majlis Perbandaran Manjung mengenai fi kenaikan lesen anjing yang tular di media sosial dan apakah pendirian sebenar Kementerian dalam hal ini.

JAWAPAN

Tuan Yang di-Pertua,

Untuk makluman Ahli Yang Berhormat, setelah mengkaji semua aspek serta mengambil kira tahap kesediaan pihak-pihak berkepentingan dalam melaksanakan Dasar Lesen Digital Anjing, Majlis Perbandaran Manjung mengambil keputusan untuk mengekalkan kadar lesen anjing seperti yang termaktub sebelum ini iaitu sebanyak RM10 bagi seekor anjing. Begitu juga bagi pemilik anjing yang didapati tidak mempunyai lesen yang sah akan dikenakan kompaun sebanyak RM250.

Pihak Berkuasa Tempatan (PBT) amat menitikberatkan kerjasama bagi menjamin kesejahteraan dan keharmonian dalam kalangan komuniti. Semua pemilik haiwan peliharaan perlu bertanggungjawab memastikan masalah kacau ganggu tidak menggugat hubungan sesama jiran.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN NURUL AMIN BIN HAMID (PADANG
TERAP)**

SOALAN

TUAN NURUL AMIN BIN HAMID [PADANG TERAP] minta **MENTERI KERJA RAYA** menyatakan status terkini perancangan untuk membina jalan empat lorong dari Pokok Sena ke Durian Burung, bagi merancakkan pembangunan infrastruktur di sempadan Malaysia - Thailand, berikutan terdapat Kompleks Kastam, Imigresen, Kuarantin dan Keselamatan (ICQS) di kawasan tersebut.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian ini telah mengangkat cadangan projek **Menaiktaraf Jalan Dari Jambatan Sungai Durian FT175 Ke Simpang Ke Kota Putra, Durian Burung, Daerah Padang Terap, Kedah** pada *Rolling Plan* 3 (RP3), Rancangan Malaysia Kedua Belas (RMKe-12) untuk pertimbangan Agensi Pusat. Kelulusan bagi cadangan projek ini tertakluk kepada pertimbangan Agensi Pusat berdasarkan keutamaan dan kedudukan kewangan Kerajaan.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS

PERTANYAAN : BUKAN LISAN

DARIPADA : TUAN NURUL AMIN BIN HAMID

[PADANG TERAP]

SOALAN

Minta **Perdana Menteri** apakah terdapat sebarang usaha dari Kerajaan untuk menyeragamkan silibus pendidikan KAFA bagi seluruh negeri di Malaysia.

JAWAPAN

YB SENATOR DATO' SETIA DR. HAJI MOHD NAI'IM BIN HAJI MOKHTAR
MENTERI DI JABATAN PERDANA MENTERI (HAL EHWAL AGAMA)

Tuan Yang di-Pertua,

1. Kerajaan amat prihatin dalam aspek pendidikan agama terutama kepada murid-murid yang berada di peringkat sekolah rendah yang mengikuti program KAFA. Bagi tujuan tersebut, JAKIM telah membuat penambahbaikan dari aspek kurikulum dan buku teks KAFA dalam usaha menyeragamkan silibus Pendidikan KAFA di seluruh Malaysia.
2. Antara penambahbaikan yang telah dilaksanakan adalah:
 - (a) Penyeragaman kurikulum dan buku teks KAFA.
 - (b) Menyeragamkan penggunaan Modul Suaian Murid Berkeperluan Pendidikan Khas (MBPK) masalah pekak dan bisu serta masalah pembelajaran.
3. Kurikulum KAFA sedia ada telah dibuat semakan dan penambahbaikan, dan kurikulum baharu ini dikenali sebagai Kurikulum KAFA 2.0 yang mula digunapakai pada tahun 2020 kepada Murid Tahun 1 dan akan selesai pada tahun 2025.
4. Oleh itu semua murid yang mengikuti Program KAFA sepenuhnya telah menerima pendidikan yang seragam dari segi kurikulum, buku teks dan peperiksaan.

Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN NURUL AMIN BIN HAMID
[PADANG TERAP]**

SOALAN

TUAN NURUL AMIN BIN HAMID [PADANG TERAP] minta **MENTERI PENDIDIKAN** menyatakan adakah terdapat sebarang tindakan dari pihak Kementerian dalam memastikan anak-anak tidak perlu lagi membawa beg yang berat untuk ke sekolah.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk mencari jalan penyelesaian yang terbaik dalam menangani isu beg berat murid. Usaha ini masih diteruskan demi kesejahteraan murid untuk ke sekolah.

Untuk tujuan tersebut, KPM telah melaksanakan penambahbaikan inisiatif bagi menangani isu beg berat secara holistik seperti berikut:

1. Penyediaan Lokar Sekolah Rendah Secara Berfasa

KPM telah melaksanakan pembekalan lokar fasa 1 pada tahun 2022 sebagai salah satu pendekatan bagi menangani isu beg berat murid. Pembekalan lokar fasa 1 berfokus kepada murid Tahun 1 dan Tahun 2 di sekolah rendah yang beroperasi secara dua sesi. Keseluruhan bilangan lokar yang dibekalkan dalam fasa 1 adalah sebanyak 249,646 unit dengan melibatkan peruntukan sebanyak 37.3 juta. Perancangan penyediaan lokar Fasa 2 tahun 2023 diperluas kepada semua murid Tahap 1 termasuk Tahun 3 di sekolah rendah yang beroperasi secara dua sesi. Bagi sekolah satu sesi pula, murid akan menyimpan buku di dalam laci meja di bilik darjah masing-masing.

2. Penyusunan Semula Jadual Waktu

KPM telah melaksanakan penyusunan semula jadual waktu pada peringkat sekolah melalui surat makluman bertarikh 23 Mac 2022. KPM memutuskan agar jadual waktu disusun antara tiga hingga empat mata pelajaran bagi Tahap 1 dan lima hingga enam mata pelajaran bagi Tahap 2 dalam sehari. Penyusunan jadual waktu ini membolehkan guru merancang pengajaran dan pembelajaran (PdP) secara optimum dengan memperuntukkan masa bagi melaksanakan pendekatan modular dan bertema serta pembelajaran berasaskan projek dan pendekatan lain yang bersesuaian agar menjadikan pembelajaran murid lebih bermakna. Penyusunan ini dibuat berdasarkan prinsip mengurangkan bilangan mata pelajaran dalam jadual waktu sehari dengan mengambil kira peruntukan minimum jam

setahun.

3. Buku Latihan

Mengehadkan penggunaan bilangan buku latihan iaitu tidak melebihi dua buah buku bagi setiap mata pelajaran pada satu-satu masa. Setiap satu buku latihan hendaklah tidak melebihi 80 muka surat.

4. Buku Aktiviti dan Buku Kerja

Murid hanya dibenarkan untuk menggunakan buku aktiviti yang disediakan oleh KPM manakala buku kerja hanya boleh digunakan sebagai bahan rujukan atau bahan ulang kaji di luar waktu PdP.

5. Buku Teks Digital

KPM menerbitkan buku teks dalam format digital secara berterusan. Sehingga 2 Februari 2023, sebanyak 754 judul buku teks digital telah dimuat naik dalam pelantar *Digital Educational Learning Initiative Malaysia* (DELIMa). Murid yang mempunyai peranti digital boleh mengakses buku teks digital melalui pelantar DELIMa.

6. Pendekatan pengajaran dan pembelajaran (PdP)

Selaras dengan pelaksanaan KSSR (Semakan 2017), KPM menggalakkan guru menggunakan pendekatan PdP berpusatkan murid, iaitu pembelajaran bertema, modular, pembelajaran berasaskan projek, simulasi amali (virtual lab) atau pembelajaran terbeza.

7. Kerjasama dengan Jabatan Kemajuan Agama Islam Malaysia (JAKIM)

KPM bekerjasama dengan pihak JAKIM dari aspek penyelarasan uniform agar murid diberi kelonggaran untuk memakai uniform sekolah masing-masing semasa sesi persekolahan KAFA. Pihak JAKIM juga telah mengeluarkan surat makluman bertariikh 24 Mac 2022 kepada semua pihak berkuasa agama negeri yang melaksanakan Kelas Al-Quran dan Fardu Ain (KAFA) di sekolah kebangsaan. Murid yang mengikuti sesi KAFA di sekolah kebangsaan dibenarkan untuk memakai pakaian seragam sekolah kebangsaan. Kebenaran ini melibatkan seramai 469,815 orang murid daripada 2,277 buah sekolah

di seluruh negara.

KPM yakin pendekatan yang dilaksanakan ini dapat menangani isu beg berat murid di sekolah secara berterusan.

Sekian, terima kasih.

RT38

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN NURUL AMIN HAMID
[PADANG TERAP]**

SOALAN

Tuan Nurul Amin bin Hamid [Padang Terap] minta **MENTERI DALAM NEGERI** menyatakan pendirian terkini Kerajaan tentang kebenaran mengeksport daun ketum ke Thailand, bagi meningkatkan ekonomi penduduk terutama di negeri Kedah yang menanam daun ketum dengan skala yang besar.

JAWAPAN

Tuan Yang Di Pertua,

Kawalan terhadap tanaman ketum telah dilaksanakan di negara kita sejak tahun 2003 dengan penyenaraian *alkaloid mitragynine* yang terdapat dalam tanaman ketum sebagai bahan psikotropik yang memberi kesan khayalan ke atas penggunaannya di bawah Jadual Ketiga, Akta Racun 1952.

Mesyuarat Jemaah Menteri pada 29 Ogos 2019 telah memutuskan supaya Kementerian Pertanian dan Industri Makanan menjalankan kajian secara holistik mengenai cadangan penanaman pokok ketum bagi tujuan komersial dengan mengambil kira aspek perundangan, sosioekonomi, kesihatan, pasaran dan penanaman. Kajian kebolehlaksanaan ini sedang dilaksanakan oleh Institut Penyelidikan dan Kemajuan Pertanian Malaysia (MARDI).

Mesyuarat Jemaah Menteri pada 13 April 2022 telah memutuskan untuk menubuhkan Jawatankuasa Induk bagi membincangkan mengenai hala tuju penanaman ketum dan hemp. Jawatankuasa Induk ini akan dipengerusikan oleh YB Menteri Kesihatan dan kedua-dua Jawatankuasa Teknikal yang ditubuhkan bagi mengkaji tanaman ketum akan diletakkan di bawah jawatankuasa tersebut.

Sehubungan dengan itu sehingga sebarang dapatan dan keputusan dibuat berdasarkan hasil kajian tersebut, pihak Kementerian melalui Jabatan / Agensi berkaitan akan terus menguatkuasakan perundangan semasa yang berkaitan terutama Akta Racun 1952.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN NURUL AMIN BIN HAMID
[PADANG TERAP]**

SOALAN

TUAN NURUL AMIN BIN HAMID [PADANG TERAP] minta
MENTERI PERTANIAN DAN KETERJAMINAN MAKANAN
menyatakan apakah agenda jangka pendek Kerajaan untuk
membangunkan kawasan tanah terbiar bagi aktiviti pertanian.

JAWAPAN

Tuan Yang di-Pertua,

Kementerian Pertanian dan Keterjaminan Makanan (KPKM) sangat mengalu-alukan cadangan untuk memajukan tanah yang terbiar atau belum dibangunkan bagi tujuan pertanian. Seperti Dewan sedia maklum, urusan tanah untuk pertanian adalah di bawah bidang kuasa Pihak Berkuasa Negeri (PBN) selaras dengan Seksyen 40 Kanun Tanah Negara (KTN) yang secara jelas memperuntukkan bahawa PBN mempunyai hak ke atas semua tanah yang termasuk di dalam sempadan negeri masing-masing.

KPKM mempunyai program dan projek Rancangan Malaysia Ke-12 di bawah Jabatan dan Agensi yang memperuntukkan insentif kepada pengusaha tanaman dalam mengusahakan tanaman di mana-mana tanah hak milik atau sewaan sama ada milik Kerajaan atau orang perseorangan.

KPKM juga sentiasa membuat libat urus dengan kerajaan Negeri melalui Mesyuarat Menteri Pertanian bersama Exco Pertanian Negeri dalam membincangkan isu-isu berkaitan sektor agromakanan termasuk isu penggunaan tanah yang berada di bawah kuasa Kerajaan Negeri.

Bagi tanah-tanah persekutuan di bawah kawalan pelbagai Kementerian dan Agensi, KPKM juga mengalu-alukan sebarang cadangan bagi memajukan tanah-tanah yang masih belum ada pembangunan untuk digunakan bagi tanaman-tanaman sayuran dan tanaman kontan yang boleh memberikan pulangan hasil sementara menunggu perancangan pembangunan lain di tanah-tanah tersebut.

Sekian, terima kasih

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN(BERTULIS)

**DARIPADA : TUAN ONN BIN ABU BAKAR
(BATU PAHAT)**

SOALAN

TUAN ONN BIN ABU BAKAR (BATU PAHAT) minta **MENTERI PEMBANGUNAN USAHAWAN DAN KOPERASI** menyatakan tempoh serangan COVID-19 dan PKP telah menyebabkan banyak koperasi mengalami masalah, adakah langkah jangka pendek dan langkah jangka panjang yang dirancang untuk memberi rangsangan ke arah mengaktifkan kembali koperasi- koperasi berkenaan.

JAWAPAN

Tuan Yang di-Pertua,

1. Kementerian Pembangunan Usahawan dan Koperasi (KUSKOP) amat menyedari bahawa tempoh pandemik COVID-19 dan PKP telah mengehadkan aktiviti perniagaan dan ekonomi koperasi. Bagi membantu koperasi yang terkesan dalam tempoh tersebut, Kementerian ini melalui Suruhanjaya Koperasi Malaysia (SKM) telah mengambil beberapa inisiatif seperti berikut:

- i. menawarkan penangguhan bayaran balik pembiayaan (moratorium) kepada koperasi yang mempunyai pembiayaan di bawah **Tabung Modal Pusingan Suruhanjaya Koperasi Malaysia (TMP SKM)**. Bermula tahun 2020, sebanyak 206 koperasi yang melibatkan RM30.3 juta telah menerima manfaat tersebut manakala pada tahun 2021, sebanyak 160 koperasi yang melibatkan RM20.2 juta telah menerima manfaat.

- ii. mewujudkan **Skim Pembiayaan Khas COVID-19** bagi membantu koperasi yang terjejas mendapatkan kemudahan pembiayaan sekaligus merangsang semula aktiviti perniagaan koperasi. Skim ini telah dijenamakan semula sebagai Pembiayaan Khas Tanpa Cagaran (PKTC) selari dengan peralihan ke fasa endemik. Bermula April 2020 hingga Disember 2022, sebanyak 222 koperasi telah menerima kemudahan pembiayaan ini melibatkan jumlah pembiayaan sebanyak RM16.4 juta.
 - iii. memperkenalkan beberapa **skim pembiayaan baharu di bawah TMPSKM** seperti Pembiayaan Permulaan (SuFi-1), Pembiayaan Koperasi Mikro (MicCoopFi-1), Pembiayaan Lestari (LesFi-1), Pembiayaan Pembayar Terbaik (GPMFi-1), Pembiayaan Koperasi 100 Terbaik (Best100Fi-1) dan yang terbaharu Pembiayaan Agro Makanan (AFi-1). Kemudahan-kemudahan pembiayaan ini disediakan mengikut kategori khusus bagi memberi rangsangan kepada aktiviti dan perniagaan koperasi yang terkesan setelah menempuh tempoh yang mencabar sepanjang penularan pandemik COVID-19 dan PKP.
2. KUSKOP melalui SKM juga turut memperkenalkan **Program Pembiayaan Intervensi Pemulihan Ekonomi Koperasi** yang bertujuan untuk memulih dan merangsang kembali perniagaan koperasi yang terjejas akibat pandemik COVID-19. Sebanyak RM30 juta telah diperuntukkan di bawah program ini yang bermula pada tahun 2021 hingga 2022.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : JAWAB BUKAN LISAN

DARIPADA : TUAN ONN BIN ABU BAKAR [BATU PAHAT]

SOALAN

TUAN ONN BIN ABU BAKAR [BATU PAHAT] minta **MENTERI SUMBER MANUSIA** menyatakan ketika ini setiap tahun seramai lebih kurang 250,000 pelajar/mahasiswa menamatkan pengajian mereka. Kebanyakan mereka mendapat tawaran kerja dengan gaji minima RM1,800 sebulan. Mereka yang telah bekerja sebelum ini yang mendapat gaji sekitar RM1,500 kini berpeluang mendapat gaji minima tersebut. Ini menjadikan mereka yang lebih awal memasuki alam pekerjaan mendapat gaji yang sama dengan mereka yang baru memasuki pasaran buruh. Apakah langkah untuk mengatasi perkara ini.

JAWAPAN

Tuan Yang Di Pertua,

1. Dasar gaji minimum kebangsaan digubal untuk menetapkan gaji lantai (*floor wages*) bagi pekerja kategori terendah dalam pasaran buruh. Intervensi terhadap pasaran buruh dengan pelaksanaan dasar gaji minimum adalah bertujuan untuk meningkatkan pendapatan dan kuasa beli rakyat supaya dapat memenuhi keperluan asas diri dan keluarga mereka.

2. **Penetapan gaji bagi pekerjaan yang memerlukan kelayakan pendidikan tertiar** pula **tertakluk** kepada **kuasa penawaran dan permintaan dalam pasaran buruh**. Kadar gaji yang setimpal dengan taraf pendidikan, kemahiran dan pengalaman boleh dirundingkan dengan pihak majikan melalui kontrak perkhidmatan atau perundingan Perjanjian Kolektif bagi pekerja yang mempunyai kesatuan sekerja.

3. Dalam menyelaraskan kadar kenaikan gaji, majikan boleh menilai berdasarkan jenis pekerjaan, taraf kelayakan, tempoh dan pengalaman bekerja supaya keharmonian perusahaan lebih terjamin.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

DARIPADA : YB TUAN HAJI ONN BIN ABU BAKAR (BATU PAHAT)

SOALAN

TUAN HAJI ONN BIN ABU BAKAR [BATU PAHAT] minta **MENTERI KERJA RAYA** menyatakan Jalan Batu Pahat – Pontian, terdapat satu laluan yang masih berliku-liku dan membahayakan iaitu dari persimpangan Tanjung Labuh hingga ke persimpangan Bukit Kelicap. Jaraknya sekitar 8 kilometer. Diharap pihak KKR dapat mengambil inisiatif untuk meluruskan laluan tersebut untuk memberi keselesaan kepada penduduk-penduduk di Senggarang, Rengit dan Pontian yang berulang alik setiap hari antara Batu Pahat dan Pontian.

JAWAPAN

Tuan Yang Di-Pertua,

Untuk makluman Ahli Yang Berhormat, jalan yang dimaksudkan adalah Jalan Batu Pahat – Pontian laluan FT005 di antara persimpangan Tanjung Labuh hingga ke persimpangan Bukit Kelicap (J207).

Untuk Makluman Ahli Yang Berhormat, Kementerian ini tiada perancangan untuk menaiktaraf jalan tersebut pada masa ini. Walau bagaimanapun, Kementerian ini akan meneliti sekiranya cadangan projek ini dimohon dalam *Rolling Plan* RMKe-12 yang akan datang dan akan dipertimbangkan untuk diangkat kepada Agensi Pusat untuk kelulusan, tertakluk kepada kedudukan keutamaan projek dan ketersediaan agihan peruntukan pembangunan.

Untuk makluman Ahli Yang Berhormat, berkenaan isu keselamatan yang melibatkan jalan yang berselekoh, Kementerian Kerja Raya akan mempertimbangkan untuk merawat lokasi tertentu secara *localised* sekiranya memenuhi kriteria untuk menggunakan peruntukan di bawah Program Keselamatan Infrastruktur Keselamatan Jalan Raya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN ONN BIN ABU BAKAR
[BATU PAHAT]**

SOALAN

Minta **PERDANA MENTERI** menyatakan bolehkah Kerajaan pertimbangkan untuk menukar syarat-syarat bon biasiswa JPA (Jabatan Perkhidmatan Awam) sedia ada kepada biasiswa penuh.

JAWAPAN

**DIJAWAB OLEH YB DATUK ARMIZAN MOHD ALI,
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)**

Tuan Yang di-Pertua,

1. Untuk makluman, model penajaan semasa adalah Pinjaman Boleh Ubah (PBU) berasaskan Merit Tempat Berkhidmat yang telah diputuskan oleh Kerajaan bermula tahun 2016. Pengurangan atau pengecualian PBU yang layak diterima oleh pelajar sekiranya memenuhi ikatan kontrak berdasarkan sektor pekerjaan adalah seperti yang diperincikan dalam dokumen Perjanjian Pinjaman Pelajaran Persekutuan. Dokumen ini dimeterai atas persetujuan pelajar dan penjamin.
2. Untuk makluman, Kerajaan dari semasa ke semasa sentiasa meneliti ruang-ruang penambahbaikan penajaan. Sebarang keputusan atau perubahan akan diberi maklum sewajarnya kepada pihak-pihak berkepentingan yang terlibat.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT PERTAMA,
PENGAL KEDUA, PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN ONN BIN ABU BAKAR
[BATU PAHAT]**

SOALAN

Minta **MENTERI PENDIDIKAN TINGGI** menyatakan adakah semakan atas bidang-bidang pengajian/ kursus di universiti telah mengambil kira keperluan dalam pasaran buruh. Ada bidang-bidang tertentu menunjukkan lebih penawaran berbanding permintaan. Apakah langkah yang dilakukan untuk menangani suasana ini.

JAWAPAN

Tuan Yang di-Pertua,

1. Kementerian Pendidikan Tinggi (KPT) sentiasa mengambil langkah proaktif untuk memastikan program akademik yang ditawarkan oleh Institusi Pendidikan Tinggi (IPT) kekal relevan dalam melahirkan graduan yang memberi manfaat kepada guna tenaga negara selain dapat merapatkan jurang kemahiran graduan dengan keperluan pihak industri.

2. Antara langkah yang diambil untuk merasionalisasikan program pengajian di IPT adalah:

- i. Melaksanakan transformasi pendidikan tinggi awam melalui **semakan semula kurikulum program akademik** selaras dengan kemajuan teknologi IR4.0.
- ii. **Melaksanakan saringan awal yang ketat** terhadap setiap program akademik yang hendak ditawarkan oleh IPT. Saringan awal ini juga merupakan salah satu keperluan untuk permohonan akreditasi sementara selaras dengan ketetapan Kod Amalan Akreditasi Program (*Code of Practice for Programme Accreditation* (COPPA)) MQA.
- iii. Memperkenal **Kurikulum Tersedia Masa Hadapan (*Future Ready Curriculum* (FRC))** yang merangkumi tiga (3) elemen utama iaitu Struktur Kurikulum Lentur dan Organik, Penyampaian Transformatif PdP dan Pentaksiran Holistik dalam program akademik sama ada baharu atau semakan kurikulum sedia ada.
- iv. **Memperkukuh inisiatif sedia ada** seperti program pengajian mod 2u2i iaitu program pembelajaran berasaskan pekerjaan (*work-based learning*) yang menggabungkan pembelajaran akademik di dalam kampus dan pengalaman di industri.

3. KPT juga melaksanakan **kolaborasi dengan pelbagai kementerian dan agensi lain** dalam memperkasa kerjasama untuk menyokong keperluan tenaga negara iaitu dengan Kementerian Pembangunan Usahawan dan Koperasi (KUSKOP), Kementerian Sumber Manusia (KSM), PERKESO, TalentCorp, MDEC dan NACDA.

4. Malah, KPT turut menjalin **kerjasama dengan Kementerian Perdagangan Antarabangsa dan Industri (MITI)** bagi mengenalpasti keperluan industri pada masa hadapan melibatkan isu penawaran dan permintaan.
5. **Laporan ‘Critical Occupations List 2020/2021’** yang dikeluarkan oleh TalentCorp juga menjadi naskah rujukan utama KPT dalam mengenal pasti keperluan industri dan bidang-bidang pekerjaan kritikal seperti sektor pembuatan yang meliputi pekerjaan profesional pembuatan, pekerjaan teknikal, dan juga jawatan dalam bidang pengurusan dan kewangan.
6. Pada masa akan datang, **profesion digital** turut dikenal pasti menawarkan peluang pekerjaan yang baik dalam pembangunan sektor pembuatan yang sedang beralih ke arah adaptasi teknologi dan digitalisasi.
7. Untuk makluman Ahli Yang Berhormat, laporan *World Economic Forum* (WEF) juga menjadi rujukan KPT. Di bawah WEF terdapat tujuh (7) kluster pekerjaan masa hadapan yang dikenal pasti iaitu Data dan Kecerdasan Buatan; Ekonomi Penjagaan (*Care Economy*); Ekonomi Hijau; Kejuruteraan dan Pengkomputeran Awan; Manusia dan Kebudayaan; Pembangunan Produk; dan Jualan, Pemasaran & Kandungan antara yang menjadi bidang fokus KPT kini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN OSCAR LING CHAI YEW [SIBU]

SOALAN

TUAN OSCAR LING CHAI YEW [SIBU] minta **MENTERI PENGANGKUTAN** menyatakan jumlah kos dalam perancangan MRT3, nyatakan mengapa dalam perancangan pembangunan MRT3 ini tidak mempunyai perancangan untuk menjana dana melalui penambahan *business opportunity* supaya ia boleh membantu menanggung sebahagian kos pembinaan.

JAWAPAN

Tuan Yang Di Pertua,

1. Untuk makluman, kos pelaksanaan projek MRT3 (MRT Laluan Lingkar) adalah sebanyak RM50.2 bilion, di mana ianya meliputi kos pengambilan tanah, kerja -kerja binaan (*civil and construction work*), kos pengurusan projek, reka bentuk dan penyeliaan serta kos bagi sistem kereta api dan stok kereta.
2. Salah satu sumber pembiayaan bagi projek MRT3 ini adalah melalui pembiayaan secara bayaran tertangguh (*deferred payment*) atau pembiayaan berasaskan kerjasama awam swasta (*Public Private Partnership – PPP*) bagi komponen sistem dan stok kereta. Melalui kaedah ini, syarikat yang dilantik secara tender terbuka akan diberi konsesi *build -operate-maintain-transfer* (BOMT) untuk mengoperasikan MRT3 bagi mendapatkan semula pulangan yang setimpal dengan pelaburan yang dilakukan. Kaedah ini dilihat dapat mengurangkan beban kerajaan bagi membiayai kos pembinaan projek ini.
3. Perancangan projek MRT3 turut mengambilkira kerjasama dengan pemilik-pemilik tanah di sepanjang jajaran bagi mencari peluang untuk mengurangkan kos projek. Antara contoh kerjasama adalah *Mutual Agreement* (MA) di mana MRT Corp tidak perlu membayar pampasan untuk pembelian tanah tetapi dapat membangunkan stesen-stesen MRT bersama (*co-exist*) dengan pembangunan yang diusahakan oleh tuan tanah seperti untuk tujuan perumahan atau komersil. Kaedah sama telah dipraktikkan untuk projek-projek MRT sebelum ini.
4. Selain itu, perancangan projek MRT3 juga telah mengambil kira pelaksanaan Pembangunan Berorientasikan Transit (TOD) di lokasi-lokasi yang berpotensi di sepanjang jajaran MRT3. Dengan pelaksanaan TOD ini, ianya dapat memberi peluang kepada pihak MRT Corp untuk menjana pendapatan sampingan (*non fare revenue*). Hasil pendapatan melalui TOD ini juga akan digunakan sebagai sumber tambahan bagi menampung kos operasi (*OPEX*), kerja-kerja penyelenggaraan aset dan baik pulih.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN OSCAR LING CHAI YEW [SIBU]

SOALAN

TUAN OSCAR LING CHAI YEW [SIBU] minta **MENTERI LUAR NEGERI** menyatakan jumlah kes Job Scam Cambodia yang dilaporkan di seluruh Malaysia, senaraikan mengikut negeri dan pecahan mengikut daerah di Sarawak. Nyatakan kes yang berjaya diselamatkan tanpa wang tebusan dan berapa yang melibatkan pembayaran wang tebusan.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat SibU atas pertanyaan yang dikemukakan.

2. Untuk makluman Yang Berhormat, sehingga 13 Februari 2023, KLN melalui Kedutaan Besar Malaysia Phnom Penh telah menerima sejumlah 277 laporan mengenai warganegara Malaysia yang menjadi mangsa sindiket jenayah penipuan tawaran pekerjaan di Kemboja. Daripada jumlah tersebut, seramai 247 orang telah berjaya diselamatkan, dengan 243 orang daripada mereka telah dihantar pulang. Baki seramai 4 orang yang lain sedang ditahan di depoh tahanan sementara menunggu proses pengusiran pulang, manakala 30 orang lagi masih sedang dikesan.

3. Daripada jumlah mangsa yang dilaporkan, seramai 31 orang berasal dari Sarawak namun Kementerian tidak mempunyai maklumat berdasarkan perincian daerah asal para mangsa.

4. Kementerian tidak mempunyai maklumat berhubung urusan menyelamatkan mangsa melalui kaedah pembayaran wang tebusan. Hal

ini kerana pembayaran wang tebusan kepada sindiket, jika ada, dibuat secara terus oleh pihak keluarga, tanpa merujuk kepada Kementerian mahupun pihak Polis Diraja Malaysia (PDRM). Dari rekod kita juga, tiada sebarang laporan berhubung pembayaran tersebut dibuat.

5. Pihak keluarga tidak pernah digalakkan untuk membuat sebarang pembayaran kepada pihak sindiket dalam apa cara sekalipun, sebaliknya masyarakat umum adalah dinasihatkan untuk merujuk dengan pihak Kementerian dan PDRM dalam menangani permasalahan ini.

6. Kementerian sentiasa prihatin akan permasalahan melibatkan warganegara Malaysia di luar negara dan sentiasa bersedia untuk menghulurkan bantuan konsular yang sewajarnya kepada para mangsa sindiket jenayah ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN OSCAR LING CHAI YEW
[SIBU]**

SOALAN

TUAN OSCAR LING CHAI YEW [SIBU] minta **PERDANA MENTERI** menyatakan langkah yang akan diambil oleh Kerajaan untuk menyediakan anak-anak (Undi18) kita supaya mereka sedar terhadap peranan mereka dalam PRU16 yang akan datang.

JAWAPAN

**YB DATO' SRI AZALINA OTHMAN SAID,
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Suruhanjaya Pilihan Raya (SPR) melalui Akademi Pilihan Raya (APR) telah melaksanakan Program Pendidikan Pengundi sejak tahun 2017 bertujuan supaya segenap lapisan masyarakat diberi kefahaman terhadap pentingnya demokrasi, aplikasi demokrasi melalui platform pilihan raya, proses pilihan raya yang dijalankan di Malaysia, tanggungjawab sebagai seorang pengundi dan implikasinya terhadap negara serta menjelaskan isu-isu / cabaran yang sering dibangkitkan semasa pilihan raya diadakan.
2. APR melalui kerjasama pelbagai pihak seperti agensi-agensi Kerajaan, pertubuhan-pertubuhan, persatuan-persatuan, badan-badan bukan Kerajaan telah mempergiat pelaksanaan Program Pendidikan Pengundi khususnya kepada golongan anak muda sama ada di peringkat institusi-institusi pengajian tinggi, masyarakat dan komuniti, acara-acara Kementerian / Jabatan dan pentauliahan kepada golongan pendidik / mahasiswa untuk memberikan pendidikan dan kefahaman mengenai proses pilihan raya.
3. Seperti yang dinyatakan, konsep pendekatan kepada anak muda adalah berdasarkan kecenderungan anak muda yang berkaitan dengan aplikasi teknologi / media sosial, pengaruh rakan sebaya dan keterlibatan mereka dalam proses pilihan raya sama ada di peringkat nasional ataupun institusi / komuniti masing-masing.
4. Berhubung dengan cadangan untuk membuka ruang di sekolah dan universiti untuk program-program pendidikan pengundi, APR terbuka serta sangat mengalu-alukan perkara ini kerana dapat menyebarkan lagi kefahaman mengenai proses pilihan raya di Malaysia khususnya kepada pelajar sekolah.

5. Pada masa ini, APR juga telah mengadakan kerjasama bersama Jabatan Penerangan Malaysia (JaPen) di bawah Kelab Malaysiaku dan Bahagian Pengurusan Sekolah Harian, Kementerian Pendidikan Malaysia di bawah Program Kecemerlangan Murid. Program Pendidikan Pengundi melibatkan pelajar universiti juga telah dimulakan dan masih diteruskan sehingga kini, di samping jalinan kerjasama strategik melalui Memorandum Persefahaman antara Universiti Awam dan SPR.

Sekian,

terima

kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN OSCAR LING CHAI YEW [SIBU]

SOALAN

TUAN OSCAR LING CHAI YEW [SIBU] minta **PERDANA MENTERI** menyatakan jumlah simpanan petroleum dan gas yang terdapat di Malaysia dan senaraikan mengikut negeri. Nyatakan berapa lama simpanan ini boleh membawa faedah kepada pendapatan negara kita. Bagaimana Kerajaan akan mengurangkan kebergantungan ekonomi negara kita terhadap hasil petroleum ini.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Berdasarkan rekod PETRONAS setakat 1 Januari 2022, anggaran rizab petroleum (2P) di Malaysia adalah sebanyak 6.9 bilion tong minyak setara (*Bboe - billion barrels of oil equivalent*), dengan 4.2 Bboe di perairan sekitar Sarawak, 1.3 Bboe di perairan sekitar Sabah dan 1.4 Bboe di perairan sekitar Semenanjung Malaysia.
2. Menurut pengiraan "*Reserves Life Index*", rizab petroleum semasa Malaysia bagi hasil minyak dan gas dijangka dapat bertahan selama 15 tahun. Ini boleh dipertingkatkan lagi kepada lebih 40 tahun dengan adanya pelaburan modal tinggi, penggunaan teknologi baharu dan lanskap pelaburan yang stabil lagi kompetitif.
3. Oleh yang demikian, PETRONAS sentiasa giat menjalankan usaha-usaha bagi menarik lebih ramai pelabur di dalam sektor hulu dan hiliran. Usaha ini adalah penting dalam memastikan kelangsungan pelaburan modal tinggi bagi mengembangkan lagi industri hulu dan hiliran minyak dan gas negara.
4. Petroleum ialah sumber tenaga yang penting bagi Malaysia. Dasar Tenaga Negara, 2022-2040 (DTN) yang dilancarkan pada 19 September 2022 menyatakan bahawa pendapatan berkaitan petroleum menyumbang sebanyak 31 peratus kepada pendapatan fiskal dan jumlah nilai eksport bagi produk petroleum dan gas asli pula dianggarkan mencecah RM130 bilion setahun.
5. Manakala data tahun 2019 oleh Suruhanjaya Tenaga menunjukkan penggunaan petrol merupakan 43% daripada keseluruhan penggunaan produk petroleum selain diesel (31.2%) khususnya bagi pengangkutan. Dari segi campuran jumlah bekalan tenaga utama

(TPES) pula, DTN melaporkan bahawa gas asli merupakan penyumbang terbesar bekalan tenaga utama sebanyak 41%; diikuti oleh minyak mentah dan produk petroleum (29%); arang batu (22%); dan tenaga boleh baharu (TBB) merangkumi hidro, solar dan biotenaga (7%).

6. Dalam menghadapi cabaran peralihan tenaga kepada tenaga bersih, DTN menyasarkan pertumbuhan sektor berkaitan tenaga baharu bagi menyokong matlamat untuk mengurangkan kebergantungan kepada pendapatan berasaskan petroleum dan perdagangan komoditi, dan seterusnya meningkatkan ketahanan fiskal dan kedudukan ekonomi negara. Antara strategi pelaksanaan termasuk mengurangkan keseluruhan intensiti tenaga, menambah baik intensiti campuran tenaga utama melalui peningkatan sumbangan sumber TBB, serta penurunan sumbangan produk arang batu dan petroleum dalam campuran tenaga utama.

7. DTN turut menyediakan insentif pemangkin untuk menggalakkan perniagaan menceburi dan beralih kepada bidang pertumbuhan ekonomi hijau yang berpotensi tinggi seperti mobiliti rendah karbon, bandar rendah karbon, TBB serta penyimpanan dan kecekapan tenaga.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA,
PARLIMEN KE-15**

PERTANYAAN : BERTULIS
DARIPADA : TUAN OSCAR LING CHAI YEW [SIBU]

SOALAN

TUAN OSCAR LING CHAI YEW [SIBU] minta **KEMENTERIAN PERDAGANGAN ANTARABANGSA DAN INDUSTRI** menyatakan impak ekonomi yang akan dibawa oleh keputusan Indonesia untuk memindah ibu kota ke bahagian Kalimantan. Adakah Kerajaan kita mempunyai rancangan untuk membina jalinan pengangkutan yang baru untuk membantu negara kita meningkatkan hasil perdagangan dengan pihak Indonesia.

JAWAPAN

Tuan Yang di-Pertua,

Pada 26 Ogos 2019, Presiden Republik Indonesia, Tuan Yang Terutama (TYT) Joko Widodo, telah mengumumkan pemindahan lokasi Ibu Kota Negara (IKN) Republik Indonesia dari Jakarta ke Kalimantan Timur, iaitu di antara Penajam Paser Utara dan Kutai Kartanegara, dengan diberi gelaran Nusantara di sebuah kawasan seluas 3,000 hektar dengan anggaran kos perbelanjaan keseluruhan sebanyak USD32 bilion atau RM141 bilion. Sebagai negara jiran yang terdekat dari segi geografi, Malaysia dijangka akan turut merasai impak limpahan ekonomi daripada pembangunan IKN Nusantara sama ada secara langsung atau tidak langsung, terutamanya bagi Sabah dan Sarawak.

Susulan daripada pengumuman tersebut, Kementerian Perdagangan Antarabangsa dan Industri (MITI) telah mengambil beberapa langkah untuk memastikan Malaysia dapat turut mengambil bahagian dalam pembangunan IKN Nusantara. Ini termasuk mengadakan

beberapa sesi perbincangan bersama pemegang-pemegang taruh, pihak industri, dan pihak berkepentingan lain bagi mengenal pasti cara terbaik untuk merealisasikan penglibatan Malaysia supaya dapat membawa pulangan yang terbaik kepada semua pihak.

Kementerian ini telah mengadakan beberapa sesi perbincangan bersama Kementerian Perencanaan Pembangunan Nasional Indonesia (BAPPENAS) pada 2021 dan 2022 bagi menzahirkan hasrat Malaysia untuk turut serta dalam pembangunan IKN Nusantara.

Berdasarkan sesi perbincangan tersebut, sektor-sektor keutamaan ekonomi yang dijangka dapat memberi peluang penglibatan pemain industri dari Malaysia meliputi petrokimia dan oleo kimia; produk farmaseutikal; pengajian tinggi; dan penjagaan kesihatan. Juga dimaklumkan bahawa, bagi jangka panjang, Kerajaan Indonesia turut berhasrat menjadikan IKN Nusantara dan Kalimantan Timur sebagai hab tenaga boleh diperbaharui, inovasi dan industri digital. Adalah dijangka kegiatan ekonomi ini akan memberi kesan secara langsung kepada kawasan sekitarnya termasuk Sabah dan Sarawak dari segi kewujudan pekerjaan baharu dan peluang perniagaan dalam sektor-sektor keutamaan ekonomi yang dinyatakan.

Kerjasama Malaysia dalam pembangunan Nusantara diyakini dapat memberikan impak yang positif terutamanya melalui pengeksportan barangan dan perkhidmatan serta sumbangan kepakaran dari Malaysia seperti dalam bidang pembinaan, pembangunan infrastruktur, reka bentuk, dan seni bina. Mengambil peluang kedudukan geografi yang dekat antara Malaysia dan Republik Indonesia, syarikat-syarikat dari Malaysia mempunyai kelebihan untuk membekalkan bahan-bahan pembinaan, jentera, peralatan, produk hijau serta perkhidmatan logistik yang sangat diperlukan dalam pembangunan IKN Nusantara.

Sebagai usaha untuk merealisasikan penglibatan syarikat-syarikat tempatan dalam pembangunan IKN Nusantara, Kementerian ini telah mengadakan satu sesi libat urus (*town hall*) antara pemain-pemain industri dari Malaysia bersama pihak kerajaan Republik Indonesia yang terdiri daripada Otorita Ibu Kota Nusantara (OIKN) dan Kementerian Pekerjaan Umum dan Perumahan Rakyat Republik Indonesia di Kuala

Lumpur pada 30 November 2022. Semasa sesi libat urus tersebut, syarikat-syarikat dari Malaysia telah menyatakan minat untuk meneroka sektor eko-pelancongan, farmaseutikal, bahan kimia, pembangunan hartanah, kawasan perindustrian, dan tenaga boleh diperbaharui.

Selanjutnya, pada 8 Januari 2023, 10 syarikat Malaysia telah menzahirkan kesungguhan dengan penyerahan 11 Surat Niat (*Letters of Intent*) untuk mengambil bahagian dalam pembangunan IKN Nusantara bersempena Lawatan Rasmi YAB Perdana Menteri ke Republik Indonesia. Surat-surat tersebut kemudiannya telah diserahkan oleh YB Menteri Perdagangan Antarabangsa dan Industri kepada Pengerusi OIKN di Istana Presiden pada 9 Januari 2023, dengan disaksikan oleh YAB Perdana Menteri dan TYT Presiden Republik Indonesia.

Bagi merancakkan lagi aktiviti ekonomi di kawasan sempadan, mengambil kesempatan daripada limpahan ekonomi pembangunan IKN Nusantara, Kerajaan melalui Kementerian Ekonomi telah merangka beberapa inisiatif seperti menyediakan jaringan pengangkutan yang baik di kawasan Sabah dan Sarawak yang bersempadan dengan Kalimantan, Indonesia. Ini juga adalah selaras dengan perancangan dalam Bab 7 Rancangan Malaysia Kedua Belas (RMKe-12), iaitu Memperkukuh Pembangunan Sosioekonomi di Sabah dan Sarawak dimana beberapa inisiatif yang telah dikenal pasti adalah Ketersambungan Infrastruktur untuk Menggalakkan Hubungan Ekonomi yang Lebih Kukuh dengan Kalimantan dan Mempertingkatkan Keselamatan Sempadan dan Maritim.

Selain itu, Melalui *Rolling Plan* 3 tahun 2023, Kerajaan telah mengambil kira keperluan projek pembangunan sempadan di Sabah yang merangkumi aspek infrastruktur dan keselamatan. Untuk makluman, Mesyuarat Majlis Tindakan Pelaksanaan Perjanjian Malaysia 1963 (MA63) Bil 1/2023 yang dipengerusikan oleh YAB Perdana Menteri pada 20 Januari 2023 telah bersetuju supaya Kementerian Kewangan memberikan kelulusan awal berjumlah RM1 bilion bagi menampung kos antaranya untuk pengambilan tanah, menaik taraf infrastruktur kompleks Imigresen, Kastam, Kuarantin dan Keselamatan (ICQS) di sempadan Sarawak dan Sabah, pembinaan jalan dan infrastruktur asas seperti utiliti. Ini adalah susulan daripada perbincangan YAB Perdana Menteri dengan TYT Presiden Indonesia Joko Widodo berhubung pemindahan IKN ke

Kalimantan semasa lawatan YAB Perdana Menteri ke Indonesia pada 8 hingga 9 Januari 2023.

Di masa yang sama, bagi memastikan usaha yang lebih bersepadu dan menyeluruh, pihak Kerajaan melalui Kementerian Ekonomi, telah mengadakan mesyuarat Koordinasi Perancangan Pembangunan Sempadan Sarawak-Kalimantan dan Sabah-Kalimantan pada 7 Februari 2023 yang dipengerusikan secara bersama oleh YB Menteri Ekonomi dan YB Menteri Dalam Negeri bagi membincangkan isu-isu berkaitan pembangunan di kawasan sempadan Sabah-Sarawak-Kalimantan.

Secara dasarnya, Kerajaan Republik Indonesia menyambut baik hasrat Malaysia dan mengalu-alukan minat syarikat-syarikat dari Malaysia untuk menyertai pembangunan IKN Nusantara. Dalam hal ini, Kerajaan akan terus memudahcara penglibatan syarikat-syarikat tempatan yang mana ianya juga akan dapat menyumbang ke arah peningkatan prestasi pelaburan dan perdagangan Malaysia dan Republik Indonesia, demi merealisasikan kesejahteraan rakyat di kedua-dua negara.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

DARIPADA : YB TUAN PANG HOK LIONG (LABIS)

SOALAN

TUAN PANG HOK LIONG [LABIS] minta **MENTERI KERJA RAYA** menyatakan bilakah fasa terakhir Projek Menaik Taraf Jalan Muar - Tangkak - Segamat, Johor akan bermula.

JAWAPAN

Tuan Yang Di-Pertua,

Untuk makluman Ahli Yang Berhormat, projek yang dimaksudkan adalah projek Menaiktaraf Laluan FT023 Segamat - Tangkak daripada dua (2) lorong dua (2) hala kepada empat (4) lorong dua (2) hala sepanjang 61.6 km. Keseluruhan pelaksanaan projek ini melibatkan kos sebanyak RM1.13 billion. Projek ini dilaksanakan secara berfasa seperti berikut:

- 1) Pakej 1A: Simpang FT12 dan FT01 di Jalan Buloh Kasap ke Pejabat Kemas Gemerah, Segamat (sepanjang 5.6 km). Status projek adalah dalam perancangan;
- 2) Pakej 1B: Pejabat Kemas Segamat ke Simpang UITM (sepanjang 8.5 km). Pakej ini telah siap dibina pada Julai 2015;
- 3) Pakej 2: Simpang UITM ke Jementah (sepanjang 13.4 km). Pakej ini telah siap dibina pada Julai 2015;
- 4) Pakej 3: Jementah ke Pintu A, Taman Negara (sepanjang 10.5 km). Pakej ini telah siap dibina pada Disember 2019;
- 5) Pakej 4: Pintu A, Taman Negara ke Kolej Matrikulasi Johor, Tangkak (sepanjang 11.9 km). Status projek adalah dalam perancangan;
- 6) Pakej 5: Kolej Matrikulasi Johor, Tangkak ke Kawasan Perindustrian Tangkak (sepanjang 8.1 km) yang kini sedang aktif dalam pembinaan. Pakej 5 ini melibatkan pembinaan jalan baharu 4 Lorong 2 hala dengan piawaian R5;

Sehingga 25 Januari 2023, kemajuan fizikal sebenar projek ini adalah 2.28% berbanding jadual 2.02% (awal 2 hari). Tarikh Milik Tapak bagi projek ini adalah pada 28 Februari 2022 dengan tempoh pembinaan

selama 36 bulan. Walaubagaimanapun, projek ini telah diberikan Lanjutan Masa (EOT) selama 287 hari disebabkan kelewatan penyerahan tanah kepada kontraktor. Projek ini dijangka akan siap sepenuhnya pada 11 Disember 2025.

7) Pakej 6: Bt 15 Kg Tanjung Batu ke Pusat Pentadbiran Ledang (sepanjang 3.6 km). Status projek adalah dalam perancangan.

Untuk makluman Ahli Yang Berhormat juga, bagi pakej-pakej yang dalam perancangan iaitu pakej 1A, pakej 4 dan pakej 6, Kementerian ini akan meneliti cadangan projek tersebut apabila dimohon oleh Kerajaan Negeri Johor dalam *Rolling Plan* yang akan datang dan akan diangkat untuk pertimbangan Agensi Pusat, tertakluk kepada keutamaan serta ketersediaan agihan peruntukan pembangunan.

Keseluruhan pakej-pakej ini apabila siap kelak akan menyediakan jajaran perhubungan jalan yang lebih baik, selamat dan selesa daripada bandar Segamat ke Lebuhraya Utara – Selatan melalui Plaza Tol Tangkak.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

DARIPADA : YB TUAN PANG HOK LIONG (LABIS)

SOALAN

TUAN PANG HOK LIONG [LABIS] minta **MENTERI KERJA RAYA** menyatakan bilakah jalan raya dari Chaah ke Yong Peng, Johor akan dinaik taraf.

JAWAPAN

Tuan Yang Di-Pertua,

Untuk makluman Ahli Yang Berhormat, cadangan projek yang dimaksudkan adalah Menaiktaraf Jalan Dari Gemas ke Ayer Hitam yang dirancang secara berfasa iaitu Fasa 1: Persimpangan Ayer Hitam (Seksyen 94.0) – Sempadan Segamat (Seksyen 134.0).

Kementerian ini pernah mengangkat permohonan projek tersebut di dalam *Rolling Plan 1* (RP1), Rancangan Malaysia Kesebelas (RMKe-11). Namun demikian, permohonan tersebut tidak mendapat kelulusan daripada Agensi Pusat pada tempoh tersebut.

Kementerian ini akan meneliti semula cadangan projek ini apabila dimohon dalam *Rolling Plan* RMKe-12 yang akan datang dan akan dipertimbangkan untuk diangkat kepada Agensi Pusat untuk kelulusan, tertakluk kepada kedudukan keutamaan projek dan ketersediaan agihan peruntukan pembangunan.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN PANG HOK LIONG (LABIS)

SOALAN

TUAN PANG HOK LIONG [LABIS] minta **MENTERI PERTAHANAN** menyatakan sama ada pihak Kerajaan bercadang untuk memberi apa-apa elaun atau bantuan sara hidup kepada seramai 300,000 veteran tentera tidak berpencen memandangkan 80% adalah daripada golongan B40 dan sebahagian daripada mereka hidup melarat kerana kemerosotan ekonomi yang melanda negara kita.

JAWAPAN

1. Sehingga 31 Disember 2022, statistik keseluruhan Veteran ATM adalah berjumlah 207,017 orang yang terdiri daripada Veteran ATM berpencen seramai 107,099 orang, penerima pencen terbitan (orang tanggungan) seramai 26,953 orang dan Veteran ATM tidak berpencen adalah seramai 72,965 orang. Daripada jumlah tersebut, seramai 195,542 orang (94.5%) adalah tergolong dalam kategori B40.

2. Dalam usaha untuk memastikan kebajikan warga Veteran ATM sentiasa terpelihara, kerajaan telah memperkenalkan skim Bantuan Sara Hidup yang untuk meringankan beban kos sara hidup. Kadar yang berkuatkuasa adalah sebanyak RM300 sebulan. Sehingga kini, terdapat lebih kurang 9,000 orang Veteran sedang menerima bantuan ini dan 97% merupakan warga Veteran ATM tidak berpencen.

3. Selaras dengan aspirasi kerajaan yang memberi perhatian kepada peningkatan kos sara hidup, Jabatan Hal Ehwal Veteran ATM (JHEV ATM) akan melipat gandakan usaha untuk mengenal pasti warga Veteran yang layak untuk menerima bantuan ini. Dalam hal ini, JHEV ATM akan memperluaskan bilangan penerima Bantuan Sara Hidup daripada 9,000 orang kepada 15,000 orang secara bersasar. Veteran ATM yang berumur 80 tahun ke atas yang turut disenaraikan dalam penerima Bantuan e-Kasih akan diberi keutamaan untuk menerima bantuan bulanan ini. Dengan ini, Kementerian Pertahanan memerlukan suntikan peruntukan kewangan tambahan sebanyak RM21.6 juta untuk memperluaskan bilangan penerima Bantuan Sara Hidup ini.

4. Ini menunjukkan nasib warga Veteran ATM tidak berpencen dalam kategori B40 sentiasa diberi perhatian oleh Kerajaan. Di samping itu, pelbagai penambahbaikan turut dilaksanakan dari semasa ke semasa untuk memastikan golongan ini tidak terjejas akibat peningkatan kos sara hidup.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN PANG HOK LIONG [LABIS]

SOALAN

TUAN PAK HOK LIONG [LABIS] minta **MENTERI PENGANGKUTAN** menyatakan langkah sewajarnya diambil untuk mengelakkan kesengsaraan kepada penduduk Labis secara berterusan kerana kesesakan lalu lintas yang kerap berlaku akibat kemalangan melibatkan kenderaan berat yang berlaku kerap di atas jambatan sementara berkaitan projek kereta api landasan berkembar antara Gemas dan Johor Bahru.

JAWAPAN

Tuan Yang Di-Pertua,

1. Projek Landasan Berkembar Elektrik Gemas Johor Bahru (PLBEGJB) adalah projek mega yang merupakan *people centric*. Pembinaan projek ini memakan masa yang panjang kerana melibatkan peningkatan kemudahan dan keselesaan penduduk setempat di masa akan datang. Projek ini juga akan memberikan impak yang tinggi kepada ekonomi negara dan generasi yang akan datang.
2. Untuk makluman Yang Di-Pertua, jambatan ROB8 di Jalan JKR FT01 dijangka akan dibuka secara Traffic Management Plan (TMP) pada penghujung bulan Februari 2023 dan diikuti dengan kerja-kerja perobohan jambatan sementara. Dengan ini, semua kenderaan sama ada ke Utara atau ke Selatan akan melalui jalan JKR FT01 dan tidak lagi melalui jalan di dalam bandar Labis dan kesesakan di bandar Labis tidak akan berlaku lagi.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN PANG HOK LIONG [LABIS]

SOALAN

TUAN PANG HOK LIONG [LABIS] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah langkah sementara segera perlu diambil untuk menyelesaikan masalah kekurangan air yang dihadapi oleh penduduk di keseluruhan kawasan Parlimen setiap minggu dan pada musim perayaan walaupun banyak aduan mengenai bekalan air yang kerap terputus telah dimajukan kepada pihak berkuasa tempatan.

JAWAPAN

Tuan Yang di-Pertua,

1. Gangguan bekalan air di kawasan Labis yang berlaku di waktu puncak dan musim perayaan adalah disebabkan oleh penggunaan air yang tinggi dengan paras air yang rendah di tangki servis Labis.

2. Pihak RSAJ telah melakukan tindakan segera bagi mengatasi masalah ini seperti berikut:

- i. menggerakkan bekalan melalui lori-lori tangki ke premis yang terjejas;
- ii. menempatkan tangki statik di kawasan yang terlibat sebagai alternatif pengguna untuk mendapatkan bekalan air sementara;
- iii. membuat *injection inline* menggunakan bantuan lori tanker berkapasiti 40 meter padu (m³) ke sistem retikulasi diaktifkan semasa musim perayaan; dan
- iv. pengolahan sistem bekalan air dengan bantuan dari sistem Loji Rawatan Air (LRA) Air Panas C ke kawasan Labis bagi tempoh sementara untuk mengelakkan kawasan yang lebih luas terkesan atau terjejas. Ini disebabkan kedua - dua LRA Air Panas A & C telah mencapai kapasiti maksimum pengeluaran.

3. Pihak RSAJ melalui pihak Pengurusan Aset Air Berhad (PAAB) sedang melaksanakan projek menaiktaraf sistem bekalan air bagi Segamat Selatan untuk meningkatkan tambahan pengeluaran LRA Air Panas C kepada 26 Juta Liter Sehari(JLH), pembinaan tangki air baru di Labis berkapasiti 4.5JLH dan pemasangan paip bersaiz 350mm sepanjang 6.5km dari pekan Chaah hingga Desa Temu Jodoh. Keseluruhan projek ini dijangka siap pada penghujung April 2023. Pelaksanaan dan pengoperasian projek ini berpotensi menangani isu-isu peningkatan penggunaan dan gangguan bekalan air secara holistik di kawasan Labis. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN PRABAKARAN A/L M
PARAMESWARAN [BATU]**

SOALAN

TUAN PRABAKARAN A/L M PARAMESWARAN [BATU] minta **MENTERI PENDIDIKAN** menyatakan adakah Kementerian mempunyai kajian terhadap tahap pendidikan pelajar terutama yang masih bersekolah rendah pasca PKP termasuk pendekatan yang bakal digunakan untuk mengembalikan sesi persekolahan seperti biasa iaitu Januari sehingga Disember.

JAWAPAN

Tuan Yang di-Pertua,

Untuk makluman Ahli Yang Berhormat, tahap penguasaan pengetahuan serta pendidikan murid boleh dikesan melalui sistem pentaksiran dan penilaian yang seiring dengan keperluan semasa. Susulan pemansuhan Ujian Pencapaian Sekolah Rendah (UPSR) mulai tahun 2021, KPM memberi tumpuan kepada pemerkasaan Pentaksiran Berasaskan sekolah (PBS) melibatkan komponen Pentaksiran Bilik Darjah (PBD), Pentaksiran Aktiviti Jasmani, Sukan dan Kokurikulum (PAJSK) serta Pentaksiran Psikometrik (PPSi).

PBS telah diperkenalkan mulai tahun 2011 pada peringkat sekolah rendah dan tahun 2012 pada peringkat sekolah menengah. Pentaksiran ini bertujuan untuk menilai murid dari aspek intelek, emosi, rohani, jasmani dan sosial selaras dengan Falsafah Pendidikan Kebangsaan. PBS merupakan proses ansur maju yang menumpukan perkembangan murid secara holistik serta membolehkan guru memantau perkembangan, kemajuan dan penguasaan setiap murid dalam proses pembelajaran mereka termasuk kemahiran asas membaca, menulis dan mengira. Guru juga boleh merancang dan mengubah suai kaedah pengajaran dan pembelajaran bagi membantu murid meningkatkan tahap penguasaan, pengetahuan, kemahiran dan nilai sebagai asas yang kukuh untuk mengikuti pembelajaran pada peringkat seterusnya. Ini akan membantu KPM merangka pendekatan yang bersesuaian sekiranya terdapat trend yang menunjukkan pencapaian bagi kohort atau kumpulan tertentu yang memerlukan intervensi khusus terutamanya bagi kumpulan murid yang terkesan semasa tempoh pandemik.

KPM juga akan meneliti cadangan untuk mengembalikan semula kalendar akademik persekolahan bermula pada Januari seperti sebelum ini. Walau bagaimanapun, perkara berkenaan masih belum boleh dilaksanakan tahun hadapan memandangkan perlu menyelesaikan pelbagai justifikasi berdasarkan kepada pematuhan kepada Akta Pendidikan 1996 (Akta 550). Perubahan semula kalendar akademik persekolahan juga perlu mengambil kira faktor ekonomi setempat dan

banjir pada hujung tahun, selain tidak mengganggu jadual peperiksaan Sijil Pelajaran Malaysia (SPM), Sijil Tinggi Persekolahan Malaysia (STPM) dan Sijil Tinggi Agama Malaysia (STAM).

Untuk makluman, sesi persekolahan bagi Kalendar Akademik Sesi 2023/2024 masih dikekalkan pada bulan Mac 2023 untuk memastikan KPM mematuhi Peraturan-Peraturan Pendidikan (Penggal, Hari dan Cuti Sekolah) 1998 (Pindaan) 2021 yang menetapkan bahawa jumlah hari persekolahan dalam kalendar akademik hendaklah tidak kurang daripada satu ratus sembilan puluh (190) hari.

KPM sentiasa melihat kepada keperluan dan kesesuaian penyediaan kalendar akademik untuk tahun seterusnya bagi memastikan pengajaran dan pembelajaran dapat dilaksanakan secara optimum.

Sekian, terima kasih.

RT39

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN LISAN

**DARIPADA : TUAN PRABAKARAN A/L
M PARAMESWARAN [BATU]**

SOALAN

TUAN PRABAKARAN A/L M PARAMESWARAN [BATU] minta
**MENTERI PEMBANGUNAN WANITA, KELUARGA DAN
MASYARAKAT** menyatakan :

- (a) syarat kelayakan bagi mendapatkan bantuan bulanan dari JKM haruslah kurang daripada RM1500 sebulan bagi setiap isi rumah dan jumlah ini dikira sekali dengan pendapatan suami, isteri dan anak-anak yang masih di bawah tanggungan; dan
- (b) adakah Kementerian boleh mengkaji semula jumlah pendapatan isi rumah bagi bantuan sara hidup bulanan JKM ini seperti bantuan Sumbangan Tunai Rahmah yang telah mengklasifikasikan golongan B40 yang layak menerima bantuan bermula daripada pendapatan isi rumah kurang RM2,500 sehingga RM5,000 sebulan.

JAWAPAN

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) telah menyediakan pelbagai jenis bantuan kepada kumpulan sasar kementerian. Antara skim-skim bantuan kewangan bulanan yang disediakan adalah Bantuan Kanak-Kanak (BKK), Bantuan Warga Emas (BWE), Elaun Pekerja Orang Kurang Upaya (EPOKU), Bantuan OKU Tidak Berupaya Bekerja (BTB), Bantuan Penjagaan OKU

Terlantar/Pesakit Kronik Terlantar (BPT), Bantuan Am (BA), Bantuan Anak Pelihara (BAP) dan Bantuan Latihan Aperantis (BLP).

Pada masa ini, JKM menggunakan nilai **Pendapatan Garis Kemiskinan (PGK) yang telah dinaikkan daripada PGK RM980 kepada PGK Makanan 2019 sebanyak RM1,169** mulai tahun 2022 sebagai kriteria asas bagi kelayakan skim bantuan kebajikan. Walau bagaimanapun, kelulusan bantuan JKM tidak semestinya berpanduan kepada perkiraan PGK semata-mata. Beberapa aspek lain turut di ambil kira dalam menentu dan membuat penilaian kelayakan seseorang itu mendapat bantuan JKM. Antaranya adalah daripada aspek sokongan sosial keluarga secara menyeluruh seperti tanggungan keluarga, masalah kesihatan yang kronik, keperluan penjagaan yang rapi, psikososial dan sebagainya.

Bantuan kebajikan yang diberikan **bukan untuk menampung kos sara hidup** sepenuhnya sebaliknya ia adalah untuk membantu **meringankan beban kewangan yang dialami** oleh kumpulan sasar untuk kelangsungan hidup. Bagi memastikan keperluan bantuan kepada penerima bantuan JKM mencukupi, **penilaian semula mengenai kadar-kadar bantuan** yang disediakan dilaksanakan dari semasa ke semasa secara berterusan. Semasa pembentangan Belanjawan Tahun 2021, Kerajaan telah menaikkan kadar bantuan yang melibatkan skim berkaitan orang kurang upaya (OKU), warga emas dan keluarga miskin. Kenaikan kadar skim bantuan kebajikan adalah seperti berikut:

- i. Bantuan Kanak-Kanak (BKK) daripada RM100.00 kepada RM150.00 bagi seorang kanak-kanak dengan kadar maksimum RM1,000.00 sebulan satu (1) keluarga: Memberi manfaat kepada **65,706 keluarga miskin** dan sebanyak **RM325.1 juta** peruntukan telah disalurkan sehingga **Disember 2022**.
- ii. Bantuan Penjagaan OKU/Pesakit Kronik Terlantar (BPT) daripada RM350.00 kepada maksimum RM500.00 mengikut keperluan kes : Memberi manfaat kepada **26,904 Penjaga OKU dan Pesakit Terlantar** dan sebanyak **RM160.2 juta** peruntukan telah disalurkan sehingga **Disember 2022**.

- iii. Bantuan OKU Tidak Berupaya Bekerja (BTB) daripada RM250.00 kepada RM300.00: Memberi manfaat kepada **94,336 OKU** yang tidak bekerja dan sebanyak **RM321.7 juta** peruntukan telah disalurkan sehingga **Disember 2022**.
- iv. Elaun Pekerja OKU (EPOKU) daripada RM 400.00 kepada RM 450.00 : Memberi manfaat kepada **97,898 OKU** yang bekerja dan sebanyak **RM 516.5 juta** peruntukan telah disalurkan sehingga **Disember 2022**.
- v. Bantuan Warga Emas (BWE) daripada RM 350.00 kepada RM 500.00 : Memberi manfaat kepada **140,447 warga emas** dan sebanyak **RM831.4 juta** peruntukan telah disalurkan sehingga **Disember 2022**.

Selain daripada kenaikan kadar bantuan, KPWK M juga telah menilai semula kadar kelayakan permohonan di mana pada tahun 2021 melalui Program Strategik Memperkasa Rakyat dan Ekonomi (PEMERKASA), penetapan hak kelayakan pendapatan baharu bagi Bantuan Elaun Orang Kurang Upaya (EPOKU) telah dinaikkan daripada RM1,200 ke bawah kepada RM1,500 ke bawah. Kenaikan syarat ini telah memberi peluang dan galakan kepada OKU untuk terus bekerja, serta mampu hidup berdikari dan menjadi ahli masyarakat yang produktif.

Bantuan bulanan Jabatan Kebajikan Masyarakat berbeza dengan bantuan Sumbangan Tunai Rahmah yang memfokuskan kepada golongan B40 yang layak menerima bantuan bermula daripada pendapatan isi rumah antara RM2,500 sehingga RM5,000 sebulan, bujang RM2,500 dan ke bawah serta warga emas sebatang kara RM5,000 dan ke bawah. Bantuan ini diberikan empat (4) kali setahun, sedangkan bantuan bulanan JKM adalah secara bulanan dan diberikan kepada ahli masyarakat daripada kategori miskin tegar yang berpendapatan di bawah RM1,169 dan yang berkeperluan khas.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN LISAN

**DARIPADA : TUAN PRABAKARAN A/L
M PARAMESWARAN [BATU]**

SOALAN

TUAN PRABAKARAN A/L M PARAMESWARAN [BATU] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kementerian boleh pertimbangkan untuk membina sebuah sistem bersepadu (*integrated system*) dengan pihak Lembaga Hasil Dalam Negeri kerana pihak LHDN mempunyai maklumat pendapatan penuh setiap warganegara agar tiada lagi permohonan yang akan ditolak oleh kerana alasan yang diandaikan oleh pihak JKM bahawa anak-anak warga emas ini mampu menanggung ibu bapa mereka.

JAWAPAN

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) telah membangunkan Sistem eBantuanJKM sejak tahun 2007 dan masih digunakan sehingga kini. Sistem ini telah melalui pelbagai evolusi dan penambahbaikan serta dapat memenuhi keperluan pengurusan bantuan JKM dari urusan permohonan bantuan, siasatan, kelulusan, proses bayaran bantuan, pemantauan sehinggalah kepada proses pengumpulan statistik.

Sistem eBantuanJKM sedia ada telahpun diintegrasikan secara *system-to-system* dengan beberapa agensi kerajaan seperti Jabatan Pendaftaran Negara (MyIDENTITY), Jabatan Akauntan Negara (iGFMAS), Bendahari Negeri (iSPEKS), ICU JPM (eKasih), dan KPWKM (MaNIS) (SMOKU) di mana Sistem eBantuanJKM memberi / menerima data dan maklumat secara terus kepada sistem-sistem ini. Dalam masa yang sama sistem eBantuanJKM juga membekalkan data secara manual kepada Majlis Perlindungan Sosial Malaysia (MySPC) dalam usaha pengintegrasian data bersama agensi-agensi kerajaan yang lain.

Setakat ini, Sistem eBantuanJKM tidak mempunyai akses *system-to-system* dengan LHDN. Walau bagaimanapun, JKM pernah berkongsi data maklumat penerima bantuan kepada LHDN semasa Program Bantuan Rakyat 1Malaysia (BR1M) bagi memastikan semua penerima bantuan menerima bantuan BR1M. JKM bersedia bekerjasama dengan LHDN dari segi pengintegrasian data memandangkan LHDN mempunyai data yang lebih komprehensif yang dapat membantu JKM dalam urusan permohonan bantuan kewangan. Melalui perkongsian data ini, kes-kes pertindihan penerima bantuan daripada pelbagai agensi pemberi bantuan juga dapat dielakkan. Ini bagi memastikan penyampaian bantuan kerajaan akan lebih telus dan tidak disalahgunakan.

Sumbangan atau tanggungjawab anak-anak adalah penting dalam memastikan kebajikan dan kesejahteraan ibu bapa serta tidak melepaskan tanggungjawab tersebut kepada pihak kerajaan semata-mata.

**PEMBERITAHUAN PERTANYAAN BUKAN BERTULIS DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

**PERTANYAAN : BUKAN LISAN (BERTULIS)
DARIPADA : TUAN PRABAKARAN A/L
M PARAMESWARAN [BATU]**

SOALAN

TUAN PRABAKARAN A/L M PARAMESWARAN [Batu] minta
MENTERI PERDAGANGAN DALAM NEGERI DAN KOS SARA HIDUP
menyatakan;

- (a) apakah tindakan Kementerian apabila harga kenderaan motorsikal dilihat seperti tiada penguatkuasaan dalam kawalan harga dan pengusaha-pengusaha rakus menaikkan harga kenderaan; dan
- (b) harga kenderaan motorsikal pembelian tunai juga ditawarkan dengan harga berbeza oleh setiap pengusaha malahan kerakusan melampau terhadap harga kenderaan motorsikal yang dibeli secara ansuran. Apakah rancangan kempen kesedaran oleh Kementerian buat pengguna.

JAWAPAN

Yang Dipertua,

a) Kementerian Perdagangan Dalam Negeri Dan Kos Sara Hidup tidak mengawal harga motosikal di pasaran. Harga motosikal dipengaruhi oleh penawaran dan permintaan daripada pengguna. Walau bagaimanapun, Kementerian menguatkuasakan pematuhan penandaan harga barangan dan caj perkhidmatan. Setiap barang yang dipamerkan untuk jualan hendaklah diletakkan tanda harga selaras dengan peruntukan undang-undang di bawah Akta Kawalan Harga dan Antipencatutan 2011.

Walaupun bagaimanapun, sekiranya terdapat aduan berhubung dengan kenaikan harga motosikal yang melampau, siasatan boleh dijalankan di bawah Peraturan-Peraturan Kawalan Harga dan Antipencatutan (Mekanisma Untuk Menentukan Keuntungan Tinggi Yang Tidak Munasabah) 2018. Sekiranya didapati mencatut denda yang boleh dikenakan adalah seperti berikut:

- i) Individu: Denda tidak melebihi RM100,000.00
- ii) Syarikat: Denda tidak melebihi RM500,000.00

b) Kementerian sentiasa menjalankan pemantauan secara berkala ke atas harga kenderaan motosikal yang dijual secara tunai dan ansuran di pasaran. Kementerian mengambil tindakan proaktif dengan menjalankan pemeriksaan ke atas institusi kewangan dan syarikat pemberi kemudahan kredit berhubung pematuhan kandungan perjanjian sewa beli selaras dengan peruntukan undang-undang di bawah Akta Sewa Beli 1967.

Sekiranya terdapat harga kenderaan motorsikal secara pembelian tunai dan harga yang ditawarkan secara ansuran berbeza, tindakan boleh diambil di bawah Seksyen 12 Akta Perlindungan Pengguna 1999 berhubung gambaran yang mengelirukan mengenai harga. Jika disabitkan kesalahan boleh didenda sepertimana berikut:

- i) Individu: Denda tidak melebihi RM100,000.00
- ii) Syarikat: Denda tidak melebihi RM250,000.00

Antara tindakan yang digunakan oleh Kementerian bagi melindungi hak-hak pengguna adalah:

- i) Menjalankan pemeriksaan berkala di premis-premis menjual motosikal, institusi kewangan dan pemberi kemudahan kredit;
- ii) Menjalankan penyiasatan ke atas aduan-aduan yang diterima dan juga isu-isu yang tular (*viral*) di media massa;
- iii) Membuat hebahan umum berkaitan pematuhan tanda harga yang jelas dan tepat melalui laman sesawang dan media sosial rasmi Kementerian;
- iv) Membuat publisiti ke atas kejayaan serbuan dan hasil rampasan di media cetak dan elektronik; dan
- v) Memberi kesedaran pengguna melalui kaedah temubual, wawancara dan advokasi kepada pengguna.

Melalui usaha dan langkah yang dijalankan oleh Kementerian diharap mampu mengekang manipulasi harga motosikal di pasaran di samping dapat melindungi pengguna daripada tertindas oleh peniaga yang mengaut keuntungan.

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : TUAN PRABAKARAN A/L M
PARAMESWARAN [BATU]**

SOALAN

Tuan Prabakaran A/L M Parameswaran [Batu] minta **MENTERI KOMUNIKASI DAN DIGITAL** menyatakan apakah tindakan Kementerian bagi mengawal harga perkhidmatan talian & internet yang ditawarkan oleh pengusaha Telco. Pengusaha Telco mensyaratkan pakej perkhidmatan talian dan internet yang tidak munasabah jika pengguna membuat pembelian tambahan bagi pembelian telefon secara ansuran. Apakah tindakan Kementerian bagi membendung perkara sebegini.

JAWAPAN

Tuan Yang di-Pertua,

Secara asasnya, harga runcit yang ditawarkan oleh pembekal perkhidmatan ditentukan oleh faktor harga pasaran bagi menggalakkan persaingan yang sihat dalam industri telekomunikasi negara. Namun, Kerajaan turut mengambil langkah-langkah tertentu bagi memastikan harga yang ditawarkan adalah lebih kompetitif dan mempunyai perkhidmatan yang lebih inovatif seperti data kuota yang lebih tinggi pada harga yang sama.

Panduan am bagi penetapan harga atau kadar oleh pemberi perkhidmatan adalah berdasarkan kepada peruntukan di bawah Akta Komunikasi dan Multimedia 1998 [Akta 588] di mana seksyen 197 membolehkan pemberi perkhidmatan untuk menetapkan kadar menurut harga pasaran. Walau bagaimana pun, kadar yang ditetapkan tersebut hendaklah mematuhi prinsip-prinsip penetapan kadar di bawah peruntukan seksyen 198 yang dinyatakan seperti berikut:

- (i) Kadar mestilah adil dan, bagi orang yang dalam keadaan yang sama, tidak secara yang munasabah tidak adil.
- (ii) Kadar hendaklah ditetapkan mengikut kos dan secara amnya, subsidi silang (*cross subsidisation*) hendaklah dihapuskan.
- (iii) Kadar tidak sepatutnya mengandungi diskaun yang secara yang tidak munasabah memudaratkan peluang persaingan pemberi lain.
- (iv) Kadar hendaklah distrukturkan dan peringkat ditetapkan untuk menarik pelaburan kepada industri komunikasi dan multimedia.
- (v) Kadar hendaklah mengambil kira peraturan-peraturan dan syor organisasi antarabangsa yang dianggotai oleh Malaysia.

Dari sudut syarat kontrak, bagi melindungi kepentingan dan hak pengguna, antara inisiatif yang telah diambil oleh Kerajaan adalah melalui Kod Amalan Am Pengguna (GCC) 2022 yang bertindak sebagai

kod amalan industri dalam memastikan hak pengguna terjamin menerusi kontrak yang adil, penyediaan maklumat produk yang lengkap dan saluran pertikaian yang jelas. Selaras dengan, perkara 3.2 (d) (i) dan 3.2.2, penetapan sebarang caj berkaitan perkhidmatan perlu dimaklumkan kepada pengguna melalui ringkasan maklumat penting (*Critical Information Summary*) oleh pemberi perkhidmatan.

Mana-mana pemberi perkhidmatan yang didapati ingkar serta gagal mematuhi boleh didenda di bawah Seksyen 242 Akta 588 yang memperuntukkan denda tidak melebihi RM100,000 atau dua tahun penjara atau kedua-duanya sekali. Untuk makluman, bagi tempoh 2020 hingga 2022, berdasarkan kepada aduan pengguna dan pemantauan, SKMM telah mengeluarkan sebanyak 503 kompaun bernilai RM24.6 juta kepada syarikat-syarikat telekomunikasi yang gagal mematuhi Akta 588 dan peraturan-peraturan subsidiarinya. Daripada jumlah tersebut, terdapat empat kompaun dikeluarkan atas pelanggaran GCC yang berjumlah RM170,000.

Pengguna sentiasa mempunyai pilihan untuk menyalurkan sebarang aduan yang tidak diselesaikan sewajarnya oleh pemberi perkhidmatan kepada Forum Pengguna Malaysia (CFM) dan Suruhanjaya Komunikasi dan Multimedia Malaysia (SKMM) bagi penyelesaian semula (*complaint redressal*). Ini bagi melindungi hak-hak pengguna jika terdapat ketidakadilan dari segi penyampaian perkhidmatan.

Dalam hal ini, SKMM melalui CFM giat melaksanakan program pemerkasaan dan pengupayaan amalan kawal selia sendiri pengguna dan industri sebagai mekanisme utama dalam memastikan amalan adil daripada segi harga, kualiti perkhidmatan dan penyampaian pemberi perkhidmatan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : PUAN RODZIAH BINTI ISMAIL [AMPANG]

SOALAN

PUAN RODZIAH BINTI ISMAIL [AMPANG] minta **MENTERI EKONOMI** menyatakan hasil kajian yang sudah dijalankan mengenai impak terhadap ekonomi Malaysia dan sebarang langkah mitigasi ekoran fenomena pemberhentian kerja besar-besaran di seluruh dunia oleh banyak gergasi teknologi global sejak pertengahan 2022 dengan hampir 60,000 orang sudah hilang pekerjaan sepanjang 2023 sahaja.

JAWAPAN

Tuan Yang di-Pertua,

Situasi pemberhentian pekerja secara besar-besaran dalam kalangan syarikat teknologi sepertimana yang berlaku di beberapa negara seperti Amerika Syarikat, China dan Singapura didapati berlaku susulan terdapatnya lebih pekerja akibat pengambilan yang mendadak semasa tempoh pandemik COVID-19. Syarikat teknologi telah melakukan pengambilan pekerja secara besar-besaran ekoran kenaikan permintaan untuk segmen membeli-belah secara dalam talian sejak COVID-19 melanda dunia. Walau bagaimanapun, setelah situasi pandemik COVID-19 bertambah baik di seluruh dunia dan permintaan mula berkurangan akibat keadaan ekonomi yang mula menyederhana berikutan ketidaktentuan ekonomi global, syarikat teknologi dilihat mula mengurangkan pekerja atau membekukan pengambilan pekerja.

Walaupun bagaimanapun, situasi pemberhentian pekerja secara besar-besaran didapati tidak berlaku di negara ini pada ketika ini. Ekonomi Malaysia diunjurkan menyederhana pada tahun 2023, namun permintaan domestik yang mengukuh dan pembukaan semula sempadan antarabangsa China dilihat berupaya untuk mengekang pemberhentian pekerja secara besar-besaran termasuklah dalam kalangan syarikat teknologi.

Berdasarkan laporan Sistem Insurans Pekerjaan oleh Pertubuhan Keselamatan Sosial (PERKESO), jumlah individu yang kehilangan pekerjaan pada tahun 2022 adalah seramai 34,388 orang. Jumlah ini didapati berkurangan berbanding seramai 61,360 orang yang hilang pekerjaan pada tahun 2021. Antara 1 hingga 27 Januari 2023, seramai 3,690 orang telah kehilangan pekerjaan. Daripada jumlah tersebut seramai 265 atau 7.2 peratus merupakan pekerja dalam industri ICT.

Berdasarkan Laporan Survei Tenaga Buruh yang dikeluarkan oleh Jabatan Perangkaan Malaysia (DOSM), kadar pengangguran bagi suku ketiga 2022 adalah 3.7 peratus dan kadar ini berkurangan berbanding 3.9 peratus yang dicatatkan pada suku kedua 2022. Kadar pengangguran

bagi bulan Oktober dan November 2022 adalah 3.6 peratus dengan bilangan penganggur berkurangan kepada 600,900 orang pada bulan November 2022 berbanding seramai 600,200 orang pada bulan Oktober 2022. Laporan Statistik Guna Tenaga pula menunjukkan bahawa jumlah jawatan dalam sektor ekonomi pada suku keempat 2022 adalah sebanyak 8,755.0 ribu jawatan berbanding sebanyak 8,675.4 ribu jawatan yang dicatatkan pada suku ketiga 2022. Ini menunjukkan bahawa situasi pasaran buruh negara terus mengukuh dengan kadar pengangguran berada pada tahap guna tenaga penuh dan hampir ke tahap sebelum pandemik COVID-19 iaitu 3.3 peratus.

Kerajaan sedar bahawa walaupun kadar pengangguran menurun, namun Negara sedang menghadapi cabaran dalam hal pengangguran belia. Selain itu, kadar gaji yang tidak setimpal dengan kelulusan belia juga menjadi perhatian utama Kerajaan.

Usaha kerajaan dalam melahirkan bakat berkualiti dan berkemahiran tinggi sekaligus menangani isu ketidakpadanan kemahiran dalam pasaran pekerjaan adalah melalui Program Pendidikan dan Latihan Teknikal dan Vokasional (TVET). Sebanyak 640 institusi TVET Awam, 22 institusi TVET di bawah kerajaan negeri dan 633 institusi latihan kemahiran swasta bertanggungjawab untuk melatih golongan belia dan B40. TVET akan terus diperkasa dengan menambah baik ekosistem, kualiti program melalui akreditasi, pengiktirafan dan pensijilan badan bertaraf antarabangsa serta memperkenalkan sistem penarafan institusi TVET. Di bawah RMKe-12 kekal menjadi keutamaan untuk membangunkan kemampanan ekonomi. TVET dikenal pasti sebagai salah satu daripada 14 pemacu perubahan dalam RMK-12 dengan pelbagai strategi dan inisiatif dilaksanakan termasuk merombak sistem tadbir urus TVET, mempromosikan TVET sebagai satu jenama, meningkatkan kualiti program TVET dan mewujudkan pangkalan data berpusat bagi menyelaraskan dan mengintegrasikan semua data berkaitan laluan TVET serta padanan kerjaya.

Melalui Majlis TVET Negara, pelaksanaan TVET *Collaboration Hub* (TCH), iaitu pembangunan Pusat Kecemerlangan Industri (one-stop

centre) di antara institusi TVET dan industri bagi perkongsian sumber, peralatan, kepakaran dan teknologi berdasarkan bidang teras serta penubuhan Badan Koordinasi TVET Kerajaan-Industri (GITC) dengan mempergiat kerjasama antara institusi TVET dan industri untuk menerapkan teknologi terkini dalam pembelajaran merupakan antara inisiatif yang menggalakkan penyertaan industri dalam pembangunan TVET. Pendekatan ini yang diketuai oleh pihak industri akan memanfaatkan kedua-dua belah pihak Kerajaan dan swasta dari aspek fungsi sektoral kemahiran (sector skills) merangkumi aspek standard, kurikulum, akreditasi dan pensijilan, permintaan dan penawaran guna tenaga, latihan dan perantisan, kolaborasi dan promosi TVET yang selaras dengan kehendak industri.

Kementerian Ekonomi akan terus memantau situasi dan sentiasa meneliti data jumlah individu yang kehilangan pekerja oleh PERKESO selain memperhalusi Statistik Guna Tenaga dan Laporan Survei Tenaga Buruh yang dikeluarkan oleh DOSM bagi memastikan sebarang isu berkaitan tenaga kerja dapat diatasi segera.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : PUAN RODZIAH BINTI ISMAIL [AMPANG]

SOALAN

PUAN RODZIAH BINTI ISMAIL [AMPANG] minta **MENTERI PENDIDIKAN** menyatakan langkah-langkah akan diambil untuk menangani krisis keciciran terutama anak-anak yang menamatkan persekolahan seawal selepas Tahun 6, masih bersekolah namun gagal membaca, menulis atau mengira selewat Tingkatan 3 serta tidak bersekolah akibat status kewarganegaraan dan isu sosioekonomi lain.

JAWAPAN

Kementerian Pendidikan Malaysia (KPM) merujuk definisi keciciran sebagai keciciran daripada sistem pendidikan iaitu murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat tempoh pendidikan. Selain daripada keciciran daripada sistem pendidikan, KPM turut melihat dalam konteks keciciran pembelajaran.

Untuk makluman Ahli Yang Berhormat, KPM telah melaksanakan beberapa strategi bagi membendung penularan masalah keciciran pembelajaran dalam kalangan murid sekolah. Dalam konteks penguasaan kemahiran asas literasi dan numerasi, KPM telah melaksanakan pelbagai inisiatif antaranya ialah Program Pemulihan Khas. Murid yang telah dikenal pasti belum menguasai kemahiran asas 3M ditempatkan di kelas pemulihan khas semasa mata pelajaran Bahasa Melayu atau Matematik diajar di kelas aliran perdana. Guru pemulihan dengan kerjasama guru mata pelajaran Bahasa Melayu dan Matematik memberi bimbingan yang bersesuaian kepada murid sehingga mereka dapat menguasai kemahiran asas literasi dan numerasi.

Pada peringkat sekolah rendah, KPM memperkenalkan Program Literasi dan Numerasi atau *Primary Literacy and Numeracy* (PLaN) sejak 2020 untuk memastikan murid menguasai sekurang-kurangnya tahap minimum (Tahap Penguasaan 3) dalam Bahasa Melayu, Bahasa Inggeris dan Matematik. Pelaksanaan program ini adalah sebagai sokongan pengajaran dan pembelajaran (PdP) yang menyeluruh untuk membantu memantapkan tahap penguasaan 3M. Modul latihan intervensi berfokus dan terbeza (MoLIB) dan *Schemes of Work* (SOW) juga disediakan untuk kegunaan guru bagi menangani isu penguasaan 3M dalam kalangan murid. Selain itu, PLaN juga menyediakan bahan bantu belajar murid serta item pentaksiran untuk menyokong pelaksanaan Pentaksiran Bilik Darjah (PBD).

Selain itu, KPM juga mengadakan Program Bantu Baca bagi semua murid sekolah rendah memperkukuhkan kemahiran membaca. Program ini dilaksanakan secara kolaboratif melibatkan pelatih Institut Pendidikan Guru

yang menjalani latihan praktikum di sekolah, pelajar matrikulasi dan murid sekolah berasrama penuh dengan kerjasama komuniti setempat.

Untuk makluman Ahli Yang Berhormat, KPM juga telah merancang untuk memugarkan semula pelaksanaan Program Bimbingan 3M (PROBIM) bagi murid sekolah menengah (kelas peralihan sehingga tingkatan 5) supaya murid dapat menguasai kemahiran membaca, menulis dan mengira sebelum menamatkan persekolahan.

Menyentuh tentang keciciran murid akibat masalah sosioekonomi, KPM juga menyediakan pelbagai bentuk bantuan untuk murid seperti menyediakan Biasiswa Kecil Persekutuan, Rancangan Makanan Tambahan (RMT), Kumpulan Wang Amanah Pelajar Miskin (KWAPM), Bantuan Awal Persekolahan (BAP) dan Bantuan Pakaian Seragam Badan Beruniform (BPS). Bantuan seperti pemberian pinjaman buku teks, menyediakan khidmat guru bimbingan dan kaunseling, serta guru pemulihan turut disediakan bagi meningkatkan minat murid untuk meneruskan persekolahan. KPM melaksanakan Sekolah Model Khas Komprehensif 9 (K9) dan sedang merancang peluasan K9 kepada K11 supaya semua murid dapat kekal bersekolah terutamanya murid di kawasan luar bandar dan pedalaman.

Selain itu, terdapat kerjasama sekolah dengan ibu bapa dan komuniti dalam menyediakan bantuan sokongan kepada keluarga B40 seperti pemberian bantuan pakaian, makanan (gerobok rezeki) dan bantuan keperluan persekolahan dapat meringankan beban keluarga murid berpendapatan rendah. Penggembleran segala sumber dipergiat antara agensi dan komuniti setempat seperti penghulu, Jabatan Kebajikan Masyarakat, majlis agama Islam, persatuan ibu bapa dan guru serta agensi swasta berkaitan dilaksanakan bagi membantu murid dan keluarga terlibat bagi meneruskan persekolahan.

Berhubung pertanyaan Ahli Yang Berhormat berkaitan murid yang tidak bersekolah akibat dokumen kewarganegaraan, Surat Pekeliling Ikhtisas (SPI) Bilangan 1 Tahun 2009: Kemasukan Kanak-Kanak Warganegara Malaysia Tanpa Dokumen Ke Sekolah bertarikh 11 Mac 2009 merupakan dokumen rujukan bagi penerimaan masuk kanak-kanak

tanpa kewarganegaraan atau tanpa dokumen pengenalan diri ke sekolah kerajaan atau sekolah bantuan kerajaan. Berdasarkan SPI tersebut, syarat kemasukan kanak-kanak berkenaan ke sekolah kerajaan atau sekolah bantuan kerajaan adalah tertakluk kepada salah seorang ibu bapa kanak-kanak tersebut adalah warganegara Malaysia. Di samping itu, surat pengesahan atau surat perakuan bahawa kanak-kanak tersebut adalah anak kepada ibu atau bapa warganegara Malaysia perlu diperolehi daripada ketua kampung.

Subperaturan 5(1) Peraturan-Peraturan Pendidikan (Penerimaan Masuk Murid Ke Sekolah, Penyimpanan Daftar dan Syarat Bagi Pengekalan Murid Belajar di Sekolah) 1998 (P.U.(A) 275/1998), Akta Pendidikan 1996 [Akta 550] telah menetapkan pembayaran fi oleh kanak-kanak bukan warganegara bagi memasuki sekolah kerajaan atau sekolah bantuan kerajaan. Kadar fi yang ditetapkan adalah RM120.00 setahun bagi murid sekolah rendah dan RM240.00 setahun bagi murid sekolah menengah. Fi ini hendaklah dijelaskan pada setiap awal tahun persekolahan sebelum kanak-kanak ini diterima masuk ke sekolah.

Untuk makluman Ahli Yang Berhormat, bagi kanak-kanak yang dijaga oleh ibu bapa atau penjaga atau mana-mana badan yang bertanggungjawab dengan penjagaan kanak-kanak ini secara sah perlu menyelesaikan urusan berkaitan dokumen pengenalan diri dan permohonan kewarganegaraan kanak-kanak tersebut dalam tempoh dua tahun setelah diterima masuk ke sekolah. Jika urusan berkenaan tidak dapat diselesaikan dalam tempoh dua tahun yang diberikan, ibu bapa atau penjaga perlu mengemukakan satu salinan status permohonan dokumen tersebut daripada Jabatan Pendaftaran Negara kepada pihak jabatan pendidikan negeri atau pejabat pendidikan daerah yang berhampiran bagi pengekalan kanak-kanak tersebut bersekolah.

KPM yakin semua usaha serta inisiatif yang dirancang ini dapat menangani keciciran murid dan memastikan mereka kekal dalam sistem pendidikan negara sehingga tamat persekolahan.

Sekian. Terima kasih.

RT40

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : PUAN RODZIAH BINTI ISMAIL
[AMPANG]**

SOALAN

PUAN RODZIAH BINTI ISMAIL [AMPANG] minta **MENTERI PENGANGKUTAN** menyatakan status rancangan, hala tuju dan prestasi Agensi Pengangkutan Awam Darat dalam menjamin ketersambungan pengangkutan awam terutama bagi mereka yang berulang-alik dalam Greater KL/Lembah Kelang atau di bandar utama lain termasuk peruntukan Kerajaan Persekutuan dalam membantu operasi bas intrabandar.

JAWAPAN

Tuan Yang di-Pertua,

1. Rangkaian pengangkutan awam darat seperti perkhidmatan rel dan bas merupakan salah satu mod utama yang digunakan oleh pengguna untuk berulang alik sama ada ke tempat kerja atau untuk menjalankan aktiviti harian di seluruh negara baik di Lembah Klang atau di lain-lain kawasan.
2. Bermula pada 1 Januari 2019, Agensi Pengangkutan Awam Darat (APAD) telah ditubuhkan di bawah Kementerian Pengangkutan dengan peranan utama selaku badan kawalselia yang mengeluarkan lesen dan permit kepada pengendali perkhidmatan pengangkutan awam darat dan kenderaan barangan, serta seterusnya memantau prestasi perkhidmatan yang disediakan oleh pengendali-pengendali tersebut berdasarkan keperluan syarat pelesenan. Selain itu, APAD juga menyelaraskan peruntukan Kerajaan Persekutuan untuk pengoperasian bas henti-henti intrabandar di bawah program MyBAS di Kangar, Seremban, Kuala Terengganu, Ipoh dan Johor Bahru, serta program bantuan subsidi dana *Interim Stage Bus Servis Fund* (ISBSF) di seluruh Semenanjung Malaysia.
3. Bagi Lembah Klang, rangkaian pengangkutan awam darat merangkumi 8 perkhidmatan rel yang dikendalikan oleh Rapid KL, Keretapi Tanah Melayu dan Express Rail Link selain perkhidmatan bas berhenti-henti yang disediakan oleh Rapid KL serta pengendali-pengendali lain sebanyak 298 laluan yang menghubungkan hub-hub utama pengangkutan awam darat di sekitar Lembah Klang. Bagi mengurangkan kos pengguna, Kerajaan Persekutuan melalui Kementerian Pengangkutan telah memperuntukkan dana sebanyak RM115 juta setahun untuk inisiatif my50 iaitu pas perjalanan tanpa had untuk 30 hari bagi perkhidmatan rel dan bas yang disediakan oleh Rapid KL.
4. Di luar Lembah Klang, perkhidmatan pengangkutan awam darat tertumpu kepada perkhidmatan bas berhenti-henti yang menghubungkan pusat-pusat petempatan dengan bandar terdekat. Bagi

menjamin penyediaan perkhidmatan bas berhenti-henti yang berterusan kepada rakyat yang memerlukan perkhidmatan tersebut, Kerajaan telah memperuntukkan dana sebanyak RM105 juta setahun di bawah program ISBSF sebagai bantuan kepada pengendali bas berhenti henti yang menanggung kerugian operasi untuk terus menyediakan perkhidmatan merangkumi 265 laluan di seluruh Semenanjung. Selain itu, melalui Program Transformasi Perkhidmatan Bas Berhenti-henti dengan nama MyBAS, Kerajaan telah memperuntukkan dana sebanyak RM124.5 juta setahun bagi membiayai perkhidmatan bas berhenti-henti di lima bandar iaitu Kangar, Seremban, Ipoh, Kuala Terengganu dan Johor Bahru, bertujuan untuk menambahbaik perkhidmatan dari aspek kemampanan (*sustainability*), kebolehharapan (*reliability*) dan meningkatkan penggunaan pengangkutan awam. Program ini juga dijangka akan dikembangkan ke bandar-bandar lain secara berfasa.

5. Kerajaan juga sedang dalam kajian untuk memperkenalkan perkhidmatan bas berdasarkan permintaan atau "*Demand Responsive Transport*" bagi tujuan meningkatkan kesalinghubungan perkhidmatan pengangkutan awam darat, terutamanya bagi perkhidmatan batuan terakhir yang menghubungkan stesen-stesen rel dengan kawasan petempatan dan lokasi pekerjaan.

5. Bagi memastikan prestasi pengangkutan awam di negara ini mencapai tahap yang baik setanding negara-negara maju, Kerajaan akan terus mendaya upaya dan mengukuhkan Agensi Pengangkutan Awam Darat (APAD) selaku agensi yang bertanggungjawab mengawal selia dan memantau sistem pengangkutan awam negara melalui pendigitalan perkhidmatan dan panambahbaikan struktur organisasi sesuai dengan keperluan semasa serta peranan yang telah diberikan kepada APAD.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : PUAN RODZIAH BINTI ISMAIL [AMPANG]

SOALAN

PUAN RODZIAH BINTI ISMAIL [AMPANG] minta **MENTERI PENDIDIKAN** menyatakan perancangan dalam masa terdekat untuk berkolaborasi mereformasi sistem pendidikan dengan merombak fokus serta kayu ukur kecemerlangan dan kejayaan kurikulum dan silibus agar kemenjadian dan kemandirian anak Malaysia yang madani menjadi objektif utama.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk memastikan kurikulum yang digubal relevan dengan keadaan semasa serta memenuhi keperluan dan aspirasi negara serta tuntutan global. Untuk memperkasakan kurikulum bersepadu, KPM mengambil kira agenda pendidikan digital, revolusi perindustrian, pendidikan karakter dan kewarganegaraan global yang merupakan trend dalam pembangunan kurikulum. Selain itu, KPM turut memberi penekanan kepada aspek karamah insaniah melalui pembentukan adab, akhlak dan integriti demi hindari gejala negatif.

Untuk makluman Ahli Yang Berhormat, kurikulum persekolahan turut mengambil kira konsep Malaysia MADANI yang menjadi kerangka dasar kerajaan. Enam rukun MADANI ini juga selari dengan Falsafah Pendidikan Kebangsaan yang sentiasa dijadikan rujukan dalam proses penggubalan dan penyemakan kurikulum di semua peringkat persekolahan.

Untuk makluman Ahli Yang Berhormat juga, sesi libat urus bersama pihak berkepentingan sedang giat dijalankan bagi mendapatkan input dan maklumat tentang pelaksanaan kurikulum semasa. Hasil dapatan sesi libat urus tersebut akan dianalisis dengan terperinci bagi mengenal pasti serta melaksana tindakan susulan yang perlu dilakukan.

KPM yakin usaha yang dilakukan ini dapat memastikan kurikulum pendidikan sentiasa relevan dengan perkembangan pendidikan pada masa ini dan masa depan dan seterusnya dapat mencapai aspirasi Malaysia MADANI.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA,
PARLIMEN KE-15**

PERTANYAAN : BERTULIS
DARIPADA : YB PUAN RODZIAH BINTI ISMAIL
[AMPANG]

SOALAN

YB PUAN RODZIAH BINTI ISMAIL [AMPANG] minta **KEMENTERIAN PERDAGANGAN ANTARABANGSA DAN INDUSTRI** menyatakan hasil kajian yang sudah dijalankan mengenai implikasi ekonomi terhadap Malaysia ekoran trend '*reshoring*', '*onshoring*', '*nearshoring*', '*allyshoring*' dan '*friendshoring*', satu proses deglobalisasi dipelopori oleh Amerika Syarikat dan EU yang World Trade Organisation anggarakan berpotensi mengakibatkan KDNK global susut sebanyak 5%.

JAWAPAN

Tuan Yang Di-Pertua,

Kementerian Perdagangan Antarabangsa dan Industri (MITI) buat masa ini belum melaksanakan mana-mana kajian secara spesifik mengenai impak proses deglobalisasi ke atas ekonomi Malaysia. Namun begitu, MITI sentiasa memantau trend deglobalisasi dari semasa ke semasa supaya kepentingan ekonomi negara sentiasa terpelihara.

Trend dunia ke arah proses deglobalisasi kini kian meningkat yang merangkumi aktiviti pembuatan dan pengeluaran produk kembali ke negara asal (*reshoring* dan *onshoring*), negara berhampiran (*nearshoring*) dan negara sekutu (*allyshoring* dan *friendshoring*). Situasi ini berlaku disebabkan oleh kesan pandemik COVID-19 dan ketegangan geopolitik semasa terutamanya antara Amerika Syarikat dan Republik Rakyat China serta Rusia dan Ukraine yang telah mewujudkan pelbagai halangan kepada perdagangan global, khususnya rantai bekalan global terganggu, isu kelestarian meningkat, kos logistik bertambah dan pertumbuhan perdagangan dan ekonomi global menurun dalam jangka panjang.

Keadaan ini telah menyebabkan beberapa negara maju memindahkan operasi pengilangan mereka dari negara-negara yang dianggap mengancam kepentingan perdagangan dan ekonomi ke negara sendiri, berdekatan atau ke negara yang menyokong kepentingan dan aspirasi negara-negara maju ini. Pendekatan tersebut boleh menyebabkan lebih banyak ketegangan berikutan pengasingan blok ekonomi global oleh kuasa-kuasa besar dunia. Dalam konteks ini, adalah penting untuk Pertubuhan Perdagangan Dunia (*World Trade Organisation* - WTO) sebagai badan kawal selia sistem perdagangan global memainkan peranan dalam memastikan trend baharu ini tidak menjejaskan prinsip-prinsip asas WTO untuk menyokong perdagangan global yang terbuka, bebas dan terangkum tanpa apa-apa bentuk diskriminasi terhadap mana-mana negara anggota WTO.

Bagi menjamin kedudukan Malaysia kekal sebagai sebuah negara perdagangan antarabangsa yang progresif dan berorientasikan eksport, MITI sentiasa mengukuhkan daya saing ekonomi negara melalui penyertaan di dalam perjanjian-perjanjian antarabangsa mega seperti Perjanjian Perkongsian Ekonomi Komprehensif Serantau (RCEP) dan Perjanjian Komprehensif dan Progresif bagi Perkongsian Trans-Pasifik (CPTPP) di samping memperluaskan skop Perjanjian Perdagangan

Bebas sedia ada di peringkat serantau dan dua hala. Malaysia juga diyakini akan terus kekal kompetitif sebagai destinasi pelaburan pilihan serantau. Keyakinan ini adalah berdasarkan beberapa faktor utama seperti lokasi Malaysia yang strategik di Asia Tenggara dengan penduduk kira-kira 680 juta serta berada dalam radius yang dekat di antara India dan China, dua pasaran terbesar dunia.

Selain itu, rantai bekalan yang mantap dan ekosistem yang kukuh serta persekitaran perniagaan yang kondusif di dalam negara seperti ekosistem sektor elektrik dan elektronik, peranti perubatan, industri halal serta industri sokongan kejuruteraan lain yang boleh dimanfaatkan oleh para pelabur. Ketersediaan bakat tempatan yang terlatih turut menjadi pemangkin untuk memacu pertumbuhan ekonomi yang mampan.

Kelebihan-kelebihan yang ada ini pula disinergikan dengan pelbagai pendekatan proaktif Kerajaan dalam menggalakkan pelaburan berkualiti seperti Dasar Pelaburan Baharu berteraskan Aspirasi Pelaburan Nasional (NIA) yang turut mengutamakan prinsip-prinsip Alam Sekitar, Sosial dan Tadbir Urus (ESG) serta mengambil kira *megatrends* pelaburan global. Ini termasuk dinamik geopolitik dan perubahan rantai bekalan global yang bergerak ke arah mampu diri (*self-sufficiency*) dan berkait dengan deglobalisasi.

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DR. RICHARD RAPU @ AMAN ANAK
BEGRI [BETONG]**

SOALAN

DR. RICHARD RAPU @ AMAN ANAK BEGRI [BETONG] minta **MENTERI KOMUNIKASI DAN DIGITAL** menyatakan jumlah usahawan kecil setakat ini yang telah menyertai Program Pemerkasaan Pendigitalan Usahawan Kecil (PUPUK) di Sarawak dan mendapat faedah dari program tersebut.

JAWAPAN

Tuan Yang di-Pertua,

Setakat 31 Disember 2022, seramai 3,426 orang usahawan telah dilatih dan dibantu oleh Pusat Ekonomi Digital (PEDi) di seluruh Sarawak untuk menembusi pasaran perniagaan sama ada secara dalam talian mahupun fizikal. Bagi Program Pemerkasaan Pendigitalan Usahawan Kecil (PUPUK) pula yang diterajui oleh Suruhanjaya Komunikasi dan Multimedia Malaysia (SKMM), seramai 835 orang usahawan PEDi di Sarawak telah dibantu untuk memasuki dan menjalankan perniagaan secara e-dagang melalui salah satu kerjasama strategik SKMM bersama Shopee iaitu PUPUK@Shopee sejak ianya diperkenalkan pada Jun tahun 2021.

Menerusi PUPUK@Shopee, usahawan dari Sarawak telah berjaya menjana RM329,000 hasil jualan menerusi platform e-dagang ini setakat 31 Disember 2022. Justeru, kesemua 835 orang usahawan PEDi tersebut telah dapat menikmati manfaat pendigitalan usahawan kecil bagi membantu perniagaan mereka ke platform digital di bawah inisiatif PUPUK.

Sehingga kini, pelbagai agensi kerajaan dan swasta, seperti Malaysia *Digital Economy Corporation* (MDEC), Shopee, Suruhanjaya Syarikat Malaysia (SSM), Pasaraya AEON, Pembangunan Sumber Manusia Berhad (HRDCorp), Bank Simpanan Nasional (BSN), MYNIC Berhad dan lain-lain telah melaksanakan lapan program keusahawanan di bawah inisiatif PUPUK bagi membantu mendigitalisasikan perniagaan usahawan tempatan serta membantu membangunkan perniagaan mereka.

Sebagai rakan strategik PUPUK, PEDi menyediakan capaian internet serta fasiliti PEDi seperti ruangan latihan dan modal insan untuk membantu menyelaraskan program-program yang dilaksanakan oleh rakan strategik agar menjangkau usahawan setempat dan seterusnya membantu meningkatkan pendigitalan perniagaan oleh usahawan tempatan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DR. RICHARD RAPU @ AMAN ANAK BEGRI
(BETONG)**

SOALAN

DR. RICHARD RAPU @ AMAN ANAK BEGRI (BETONG) minta **MENTERI KEMAJUAN DESA DAN WILAYAH** menyatakan jumlah penerima projek di bawah Program Pembangunan Sosioekonomi luar bandar di Sarawak dan berapakah jumlah peruntukan dan jenis projek yang telah diluluskan setakat ini.

JAWAPAN

Tuan Yang di-Pertua,

Pada tahun 2022, Kementerian Kemajuan Desa & Wilayah (KKDW) dan agensi-agensi di bawahnya telah melaksanakan pelbagai program pembangunan prasarana dan sosioekonomi luar bandar di Sarawak dengan peruntukan keseluruhan berjumlah RM851.64 juta seperti berikut:

- a) Penyediaan infrastruktur dan prasarana asas yang lengkap di luar bandar dalam menyokong pembangunan ekonomi seperti penyediaan Jalan Luar Bandar (JALB), Jalan Perhubungan Desa (JPD), Bekalan Air Luar Bandar (BALB), Bekalan Elektrik Luar Bandar (BELB) dan Program Ameniti Sosial (PAMS) yang berjumlah RM616.5 juta;
- b) Skim Pembangunan Kesejahteraan Rakyat (SPKR) yang merangkumi Program Perumahan Rakyat Termiskin (PPRT) dengan peruntukan RM87.9 juta dan 15,500 orang penerima manfaat serta Program Latihan Kemahiran dan Kerjaya (PLKK) dengan peruntukan RM790 ribu yang memberi manfaat kepada 158 orang peserta;
- c) Projek Agropolitan di Mukah dengan peruntukan sebanyak RM1.8 juta yang memberi manfaat kepada 365 orang peserta, Projek Pemajuan Kawasan (PPK) di daerah Lundu dan daerah Tatau dengan peruntukan RM3 juta serta Projek Bersepadu Pembangunan Ekonomi (PROSPEK) di daerah Matu dan daerah Lawas dengan peruntukan RM2.8 juta yang memberi manfaat kepada 4,100 orang penduduk luar bandar;

SOALAN NO : 428

- d) Program Desa Lestari bagi mewujudkan komuniti desa yang berpendapatan tinggi dengan peruntukan RM16.5 juta yang memberi manfaat kepada 13 buah kampung di Sarawak;
- e) Program DesaMall dengan peruntukan RM12 ribu yang melibatkan 24 orang usahawan bagi membantu usahawan luar bandar memasarkan produk secara dalam talian (e-Dagang);
- f) Program-program pembangunan dan pemerkasaan keusahawanan luar bandar termasuk Program Pembangunan Keusahawanan *Start Right* dengan peruntukan RM100 ribu yang memberi manfaat kepada 10 orang usahawan; dan
- g) Program pembangunan kawasan tanaman getah dan sawit di bawah Felcra Berhad, RISDA, Jabatan Pertanian Sarawak (JPS), Lembaga Kemajuan Tanah Sarawak (LKTS) dan Lembaga Penyatuan dan Pemulihan Tanah Sarawak (SALCRA) dengan jumlah peruntukan keseluruhan RM122.23 juta.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DR. RICHARD RAPU @ AMAN ANAK BEGRI
[BETONG]**

SOALAN

DR. RICHARD RAPU @ AMAN ANAK BEGRI [BETONG] minta **MENTERI PENGANGKUTAN** menyatakan syarat-syarat bagi membuka cawangan PUSPAKOM dan adakah Kementerian bercadang untuk menubuhkan cawangan PUSPAKOM di Bandar Betong.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Pengangkutan masih meneliti akan cadangan tersebut, daripada pelbagai aspek termasuk dari segi keperluan dan permintaan perkhidmatan pemeriksaan, populasi kenderaan dan implikasi kewangan serta pulangan pelaburan di sesuatu kawasan. Hal ini bagi mengelakkan pelbagai isu seperti isu integriti pemeriksaan, kelestarian perniagaan dan keperluan Kerajaan menanggung kos pembangunan dan operasi yang tinggi sedangkan populasi kenderaan dan permintaan perkhidmatan pemeriksaan di lokasi tersebut adalah di bawah kapasiti keperluan.
2. Pada masa ini, tiada cadangan untuk membuka satu pusat pemeriksaan kenderaan motor tetap di kawasan Bandar Betong. Perkara ini akan dikaji dari masa ke semasa dan akan diputuskan sekiranya terdapat keperluan di masa hadapan kelak.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DR. RICHARD RAPU @ AMAN ANAK
BEGRI [BETONG]**

SOALAN

DR. RICHARD RAPU @ AMAN ANAK BEGRI [BETONG] minta **MENTERI PERLADANGAN DAN KOMODITI** menyatakan jumlah pemegang kad PAT-G pekebun kecil getah di Sarawak yang aktif dan berapakah jumlah insentif pengeluaran getah dibayar pada tahun 2022 di Sarawak.

JAWAPAN

Yang di-Pertua,

1. Jumlah pemegang kad PAT-G pekebun kecil getah di Sarawak yang aktif 48,057 orang. Jumlah Insentif Pengeluaran Getah (IPG) dibayar sehingga tahun 2022 di Sarawak adalah sebanyak RM95,254. Jumlah ini tidak termasuk tuntutan pada Disember 2022 yang masih dalam proses pembayaran.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGKAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN LISAN

DARIPADA : TUAN RIDUAN BIN RUBIN [TENOM]

SOALAN

TUAN RIDUAN BIN RUBIN [TENOM] minta **MENTERI PEMBANGUNAN WANITA, KELUARGA DAN MASYARAKAT** menyatakan cadangan Kementerian untuk menambah baik sistem permohonan bantuan-bantuan Kerajaan kerana terdapat permohonan yang mengambil masa terlalu lama untuk diluluskan walaupun menepati semua kriteria.

JAWAPAN

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) menyediakan bantuan kewangan kebajikan untuk meringankan beban kumpulan sasar buat sementara waktu sehingga kumpulan sasar ini mampu untuk keluar daripada putaran kemiskinan dan mampu hidup berdikari. Bantuan kebajikan yang diberikan adalah bukan untuk menampung kos sara hidup sepenuhnya sebaliknya ia adalah untuk membantu meringankan beban kewangan yang dialami oleh kumpulan sasar untuk kelangsungan hidup.

Bagi memastikan penyampaian perkhidmatan sistem pengurusan bantuan dapat diberikan dengan cekap dan berkesan, JKJ mempunyai Piagam Pelanggan yang menetapkan bahawa tempoh pemakluman status permohonan bantuan kepada pemohon adalah dalam tempoh 30 hari daripada tarikh permohonan yang lengkap diterima. Dalam tempoh tersebut, proses siasatan dan penyediaan laporan siasatan oleh pegawai

kes akan dilaksanakan sebelum dikemukakan kepada Pegawai Kebajikan Masyarakat Daerah (PKMD) untuk kelulusan. Tempoh ini adalah relevan dengan mengambil kira lawatan ke rumah bagi membuat pengesahan butiran pemohon dan melengkapkan laporan siasatan. Walaupun proses siasatan dan kelulusan bantuan mengambil masa dalam 30 hari, sekiranya klien memerlukan bantuan segera, PKMD masih lagi boleh meluluskan bantuan segera melalui Tabung Bantuan Segera (TBS) bagi membantu klien mendapat bantuan awal.

JKM juga sentiasa memastikan penyampaian perkhidmatan bantuan dapat dipertingkatkan lagi melalui usaha-usaha berikut :

- i) **Menggalakkan Permohonan Bantuan dibuat secara Atas Talian.** Permohonan boleh dibuat secara atas talian melalui Sistem Pengurusan Bantuan Jabatan Kebajikan di laman sesawang <http://ebantuanjkm.jkm.gov.my> bagi tujuan mempercepatkan proses bantuan; dan
- ii) **Pembangunan Sistem Bantuan Kebajikan 2.0 (SPBK 2.0)** bagi menggantikan Sistem eBantuanJKM yang sedia ada yang telah lama digunakan dalam pengurusan bantuan. Sistem baharu ini akan membantu mempercepatkan proses kerja pengurusan bantuan dari segi permohonan, siasatan, kelulusan dan pembayaran bantuan kepada klien. Sistem baharu ini juga akan menyediakan platform permohonan bantuan secara online.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : TUAN RIDUAN BIN RUBIN [TENOM]

TUAN RIDUAN BIN RUBIN [TENOM] minta **MENTERI KESIHATAN** menyatakan : -

- (a) pelan jangka pendek Kementerian untuk mengatasi masalah kesesakan pesakit di Klinik Kesihatan Daerah Kecil Kemabong; dan
- (b) bilakah Kementerian akan menaik taraf klinik kesihatan tersebut untuk menjadi Pusat Kesihatan Kemabong atau Hospital Daerah Kemabong.

JAWAPAN

Tuan Yang di-Pertua,

1. Klinik Kesihatan Kemabong terletak di Tenom dengan jarak 30 km daripada Hospital Tenom. Klinik ini merupakan struktur binaan kayu yang dibina sejak tahun 1993 di atas tapak seluas 4.64 ekar dengan purata kehadiran pesakit melebihi 120 orang sehari.
2. Dalam jangka pendek, KKM merancang untuk menaik taraf makmal dan ruang kesihatan ibu dan anak (MCH). Bagi jangka masa panjang pula, KKM sememangnya melihat adanya keperluan untuk membina sebuah klinik kesihatan yang baharu di Kemabong.
3. Selain itu, KKM sedang membina Klinik Kesihatan (Jenis 3) Tenom yang dijangka siap pada tahun 2026, yang terletak 32km dari Kemabong.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : YB TUAN RIDUAN BIN RUBIN
[TENOM]**

SOALAN :

YB TUAN RIDUAN BIN RUBIN minta **PERDANA MENTERI** menyatakan jumlah permohonan status eKasih yang melibatkan golongan ibu tunggal, warga emas, OKU dan kanak-kanak yatim piatu dan berapa jumlah kelulusan permohonan di Parlimen Tenom pada tahun 2018, 2019, 2020, 2021 dan 2022 serta butiran terperinci.

JAWAPAN

DIJAWAB OLEH YB DATUK ARMIZAN BIN MOHD ALI
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)

Tuan Yang di-Pertua,

1. Perincian statistik kemiskinan di Parlimen Tenom berdasarkan sistem eKasih adalah seperti di Jadual 1, manakala statistik golongan ibu tunggal, warga emas dan OKU yang berdaftar dalam sistem eKasih adalah seperti di Jadual 2 di bawah:

Jadual 1: Perincian Statistik Kemiskinan di Parlimen Tenom

TAHUN	STATUS KEMISKINAN			JUMLAH
	MISKIN TEGAR	MISKIN	TERKELUAR	
2018	1,020	814	1,200	3,034
2019	839	957	1,397	3,193
2020	848	1,068	1,456	3,372
2021	1,868	920	729	3,517
2022	1,013	1,653	1,105	3,771

Jadual 2: Perincian Statistik Ibu Tunggal, Warga Emas, OKU di Parlimen Tenom

TAHUN	WARGA EMAS				IBU TUNGGAL				OKU			
	MT	M	T	JUMLAH	MT	M	T	JUMLAH	MT	M	T	JUMLAH
2018	141	149	586	876	76	100	133	309	7	1	8	16
2019	87	167	698	952	62	91	164	317	8	5	9	22
2020	106	189	788	1,083	63	107	165	335	8	5	10	23
2021	307	435	462	1,204	156	130	54	340	13	6	5	24
2022	166	494	628	1,288	63	226	92	381	8	20	5	33

Petunjuk

MT : Miskin Tegar

M : Miskin

T : Terkeluar

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN RIDUAN BIN RUBIN (TENOM)

SOALAN

TUAN RIDUAN BIN RUBIN (TENOM) minta **MENTERI KEMAJUAN DESA DAN WILAYAH** menyatakan sama ada Kementerian mempunyai cadangan untuk membina loji air baharu di daerah Tenom untuk mengatasi masalah kekurangan bekalan air sekaligus dapat meningkatkan bekalan air ke seluruh kawasan ini.

JAWAPAN

Tuan Yang di-Pertua,

Untuk makluman Yang Berhormat, terdapat perancangan untuk menaiktaraf loji air di Daerah Tenom oleh Kementerian Kemajuan Desa dan Wilayah (KKDW) melalui pelaksanaan Projek Bekalan Air Luar Bandar (BALB) Menaiktaraf Loji Rawatan Air Senagang, Sabah. Loji Rawatan Air Senagang sedia ada berkapasiti 12 juta liter sehari (JLH). Projek ini akan menaik taraf loji rawatan air sedia ada sebanyak 18 JLH dan akan beroperasi kepada 30 JLH.

Projek ini dalam fasa rekabentuk oleh perunding yang dilantik oleh Kementerian. Pelaksanaan projek ini dijangka memberi manfaat kepada 1,098 rumah/ akaun baharu di Daerah Tenom.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN RIDUAN BIN RUBIN (TENOM)

SOALAN

TUAN RIDUAN BIN RUBIN (TENOM) minta **MENTERI KEMAJUAN DESA DAN WILAYAH** menyatakan sama ada terdapat peruntukan di bawah Bajet 2023 khusus untuk menaik taraf atau membina semula Balai Budaya di kawasan Parlimen Tenom untuk keselesaan rakyat di kawasan ini.

JAWAPAN

Tuan Yang di-Pertua,

Kementerian Kemajuan Desa dan Wilayah (KKDW) prihatin dengan keperluan infrastruktur asas di kampung-kampung termasuk kemudahan seperti Balai Budaya ini untuk kegunaan bersama masyarakat setempat.

Pihak Yang Berhormat boleh mengemukakan permohonan terlebih dahulu untuk siasatan awal Kementerian. Permohonan akan dipertimbangkan sekiranya menepati skop projek di bawah Program Ameniti Sosial KKDW tertakluk kepada kos dan peruntukan yang diluluskan oleh agensi pusat.

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGKAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : PUAN RODIYAH BINTI SAPIEE
[BATANG SADONG]**

SOALAN

Puan Rodiyah binti Sapiee [Batang Sadong] minta **MENTERI KOMUNIKASI DAN DIGITAL** menyatakan apakah status pelaksanaan Pelan Jalinan Digital Negara (JENDELA) untuk memberi akses capaian internet menyeluruh di negeri Sarawak khususnya di kawasan Batang Sadong.

JAWAPAN

Tuan Yang di-Pertua,

Kerajaan telah dan sedang mempertingkatkan infrastruktur komunikasi di Sarawak dan Parlimen Batang Sadong termasuk di kawasan pedalaman dan luar bandar, melalui pelaksanaan inisiatif JENDELA Fasa 1 (2020-2022) dan Fasa 2 (2023-2025) di mana capaian jaringan dan liputan internet sedang diperluaskan secara berperingkat.

Setakat suku ketiga tahun 2022, peratusan liputan 4G di kawasan berpenduduk di Wilayah Sarawak telah meningkat kepada 84.68% berbanding 73.67% sebelum pelaksanaan JENDELA pada suku kedua 2020. Manakala, peratusan liputan 4G di kawasan berpenduduk di Parlimen Batang Sadong telah meningkat kepada 82.37% berbanding 75.78% sebelum pelaksanaan JENDELA pada suku kedua 2020.

Bagi meningkatkan akses capaian internet secara menyeluruh di Sarawak, setakat suku keempat 2022, sebanyak 90,840 premis telah siap disediakan dengan sambungan gentian optik bagi jalur lebar talian

tetap melebihi daripada 115,287 yang dirancang. Selain itu, sebanyak 3,546 alat pemancar komunikasi telah siap dinaik taraf kepada teknologi 4G, manakala baki sebanyak 43 lagi dalam peringkat pelaksanaan daripada 3,589 yang dirancang. Kerajaan juga telah menyiapkan 158 menara baharu dan dalam proses menyiapkan baki 684 menara daripada 842 menara yang dirancang, Kesemua inisiatif yang sedang dalam peringkat pelaksanaan dijangka akan siap sepenuhnya pada suku keempat 2023.

Kerajaan telah mempercepatkan penyediaan perkhidmatan jalur lebar melalui teknologi satelit di 523 lokasi di kawasan pedalaman di Sarawak yang pada asalnya dirancang untuk dilaksanakan pada tahun 2023 di dalam JENDELA Fasa 2 yang berjaya disiapkan sepenuhnya di dalam JENDELA Fasa 1 pada tahun 2022.

Di Parlimen Batang Sadong pula, setakat suku keempat tahun 2022, sebanyak 649 premis telah siap dengan ketersediaan sambungan gentian optik bagi jalur lebar talian tetap, manakala baki 468 premis lagi dalam peringkat pelaksanaan daripada 1,117 yang dirancang. Selain itu, sebanyak 49 alat pemancar komunikasi telah siap dinaik taraf sepenuhnya kepada teknologi 4G. Kerajaan juga telah merancang sebanyak lapan buah menara baharu, di mana kesemua inisiatif sedang dalam peringkat pelaksanaan dijangka akan siap sepenuhnya pada suku keempat 2023.

Kesemua inisiatif ini juga memerlukan kerjasama serta tindakan beberapa pihak berkepentingan lain terutamanya pihak Kerajaan Negeri. Suruhanjaya Komunikasi dan Multimedia akan terus bekerjasama dengan agensi kerajaan negeri iaitu *Sarawak Multimedia Authority* (SMA) bagi menambah baik liputan dan kualiti jalur lebar di Sarawak untuk mengenalpasti keperluan dan menyelaraskan inisiatif jalur lebar di negeri Sarawak bagi mengelakkan pertindihan lokasi pelaksanaan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : PUAN RODIYAH BINTI SAPIEE
[BATANG SADONG]**

SOALAN

YB PUAN RODIYAH BINTI SAPIEE [BATANG SADONG] minta
MENTERI PEMBANGUNAN KERAJAAN TEMPATAN menyatakan
apakah perancangan komprehensif Kementerian di dalam menangani isu
ketidakmampuan rakyat untuk memiliki rumah sendiri.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan komited untuk meneruskan inisiatif penyediaan Rumah Mampu Milik (RMM) yang berdaya huni dan berkualiti di bawah Rancangan Malaysia Kedua Belas (RMKe-12) dengan sasaran penyediaan sebanyak 500,000 unit RMM di seluruh negara. Dalam hal ini, Kementerian Pembangunan Kerajaan Tempatan (KPKT) telah dipertanggungjawabkan sebagai penyelaras bagi penyediaan dan pelaporan RMM yang akan dilaksanakan oleh agensi penyedia perumahan di peringkat Kerajaan Persekutuan, kerajaan negeri dan pemaju swasta. Sehingga 31 Disember 2022, sebanyak 538,731 unit RMM disasarkan pelaksanaannya di seluruh negara. Daripada jumlah tersebut, sebanyak 108,373 unit telah siap dibina, 131,573 dalam pembinaan, manakala baki sebanyak 298,785 unit dalam perancangan.

Bagi penyediaan RMM bagi golongan B40 dan M40, KPKT melaksanakan program perumahan seperti berikut:

(1) Program Perumahan Rakyat (PPR)

Sejak program ini mula dilaksanakan pada tahun 1982, terdapat 159 projek PPR yang merangkumi 99,296 unit rumah telah siap dibina di seluruh negara. Sebanyak 24 projek PPR dalam peringkat pembinaan merangkumi 9,737 unit. Seterusnya, tiga (3) projek PPR masih dalam peringkat perancangan merangkumi 2,300 unit. Ini menjadikan keseluruhan PPR yang sedang dan akan dibina adalah 27 projek dengan 12,037 unit.

(2) Program Rumah Mesra Rakyat (RMR)

Program ini dilaksanakan oleh Syarikat Perumahan Negara Berhad (SPNB) dan mampu memberi manfaat kepada golongan B40 yang mempunyai tanah sendiri atau tanah milik ahli keluarga

yang diberi kebenaran. Sehingga 31 Januari 2023, sebanyak 55,055 unit rumah RMR telah siap dibangunkan di seluruh negara, 4,181 unit sedang dalam pembinaan dan baki 657 unit dalam perancangan.

(3) Program Perumahan PR1MA

Program ini merupakan program RMM untuk golongan M40 yang dilaksanakan oleh PR1MA. Sehingga kini, terdapat 24,977 unit telah siap dibina, 17,595 unit dalam pembinaan dan 7,783 unit dalam perancangan.

(4) Kediaman SPNB

Program ini dilaksanakan SPNB dan merupakan program RMM untuk golongan M40. Sehingga kini, sebanyak 28,472 unit Kediaman SPNB telah siap dibina, 362 unit dalam pembinaan dan 1,492 unit dalam sedang dirancang untuk dibangunkan.

KPKT juga sedang merancang pembinaan Rumah Belia Madani (RBM) di kawasan Lembah Klang. Inisiatif RBM adalah inisiatif Kerajaan dalam penyediaan perumahan secara transit untuk golongan belia yang berumur 35 tahun dan ke bawah untuk mendiami rumah tersebut bagi sesuatu tempoh yang dirasakan cukup sehingga mereka dapat mengukuhkan kedudukan kewangan dan seterusnya memiliki kediaman sendiri. RBM yang pertama akan dibangunkan di Mukim Batu, Sentul melibatkan 1,048 unit rumah.

Untuk makluman Ahli Yang Berhormat, bagi membantu pembeli rumah pertama, KPKT telah melaksanakan inisiatif-inisiatif seperti berikut:

- (1) mengadakan kerjasama dengan Kementerian Kewangan telah melancarkan Inisiatif Pembiayaan Perumahan Malaysia (i-Biaya). Salah satu inisiatif di bawahnya adalah Skim Jaminan Kredit Perumahan (SJKP). Melalui Belanjawan MADANI 2023,

SOALAN NO : 437

Kerajaan menerusi SJKP bersedia menjamin nilai pinjaman sehingga RM5 billion bagi memanfaatkan 20,000 peminjam perumahan, khususnya pembeli rumah pertama. Jaminan Kerajaan ini adalah bagi membantu peminjam yang tidak mempunyai pendapatan tetap. Berdasarkan data yang dilaporkan oleh SJKP sehingga 31 Januari 2023, sebanyak 16,808 pinjaman pembiayaan telah diluluskan di bawah skim ini. 65.11% (10,945) pemohon yang berjaya adalah dalam julat umur 35 tahun ke bawah. Nilai keseluruhan pembiayaan yang telah diluluskan oleh SJKP sejak mula dilancarkan adalah sebanyak RM2.32 billion.

- (2) melaksanakan Inisiatif i-Miliki yang melibatkan pemberian insentif pengecualian sepenuhnya duti setem ke atas surat cara pindah milik dan perjanjian pinjaman bagi rumah bernilai RM500,000 ke bawah dan pengecualian duti setem sebanyak 75 peratus (75%) untuk rumah bernilai RM500,000 sehingga RM 1 juta bagi pemilikan rumah pertama.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : YB PUAN RODIYAH BINTI SAPIEE
[BATANG SADONG]**

SOALAN

PUAN RODIYAH BINTI SAPIEE [BATANG SADONG] minta **PERDANA MENTERI** menyatakan apakah tindakan Kementerian di dalam menangani kes penipuan siber yang sedang berleluasa yang melibatkan kehilangan ratusan juta ringgit dan melibatkan ribuan mangsa.

JAWAPAN

**YB DATUK SERI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Bagi menangani kes penipuan siber ini pihak Kerajaan telah dan akan mengambil beberapa langkah, antaranya, seperti berikut –

- a. Penaiktarafan Pusat Respon Scam (*Scam Response Centre*), JSJK, PDRM kepada Pusat Respon Scam Kebangsaan (*National Scam Response Centre – NSRC*) yang telah mula beroperasi pada 12 Oktober 2022 yang merupakan sebuah pusat tindakan respons setempat yang boleh dihubungi melalui panggilan pantas 997 yang menggabungkan sumber dan kepakaran pelbagai agensi kerajaan terdiri daripada Bank Negara Malaysia (BNM), PDRM, Suruhanjaya Komunikasi dan Multimedia (SKMM) dan Pusat Pencegahan Jenayah Kewangan Nasional (*National Anti-Financial Crime Centre - NFCC*), serta disokong oleh institusi perbankan dan syarikat telekomunikasi bagi menerima pelaporan daripada mangsa-mangsa penipuan untuk membolehkan tindakan segera, termasuk menjejaki dan menyekat pengaliran transaksi kewangan yang disyaki bagi mengurangkan kerugian dan selanjutnya mengambil tindakan penguatkuasaan terhadap pelaku jenayah.
- b. Bekerjasama dengan pihak institusi kewangan dalam memperkenalkan kaedah-kaedah yang bersesuaian bagi membolehkan dan memudahkan mangsa scam mengambil tindakan awal bagi menyekat sebarang urusan perbankan yang melibatkan akaun-akaun bank mereka yang disyaki telah digodam oleh para penipu (*scammer*) antaranya memperkenalkan kaedah '*kill switch*'.

- c. Dalam masa yang sama, berdasarkan aduan-aduan yang diterima daripada mangsa, pihak SKMM telah juga mengambil tindakan menyekat sebanyak 1.8 billion panggilan yang disyaki terlibat dalam perlakuan jenayah penipuan dalam talian ini.
- d. Sebagai suatu yang berterusan pihak NSRC akan melipat gandakan inisiatif kempen kesedaran orang awam mengenai scam dengan kerjasama pelbagai agensi kerajaan seperti PDRM, BNM, pihak institusi kewangan, Cyber Security Malaysia dan badan-badan bukan kerajaan (NGO) yang berkepentingan.
- e. Bagi memastikan tindakan yang lebih berkesan dilaksanakan bagi menangani jenayah penipuan siber ini pihak Kerajaan sedang secara serius meneliti beberapa peruntukan undang-undang yang boleh digunakan atau yang boleh dipinda termasuk kaedah-kaedah yang membolehkan pengembalian wang penipuan kepada mangsa-mangsa. Antara peruntukan undang-undang yang sedang diteliti adalah Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 [*Akta 613*], Kanun Keseksaan dan Kanun Tatacara Jenayah.

2. Pihak Kerajaan menerusi agensi penguat kuasa amat komited dalam mengambil tindakan sewajarnya bagi memerangi kesalahan penipuan dalam talian ini termasuk usaha untuk mengesan dalang utama dan mereka yang terlibat secara langsung dan tidak langsung dalam perlakuan kesalahan ini. Kerajaan amat berharap agar rakyat akan sentiasa peka dan berhati-hati sebelum mendedahkan maklumat perbankan mereka kepada pihak-pihak yang diragui identitinya.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : PUAN RODIYAH BINTI SAPIEE
(BATANG SADONG)**

SOALAN

PUAN RODIYAH BINTI SAPIEE [BATANG SADONG] minta **MENTERI PERDAGANGAN DALAM NEGERI DAN KOS SARA HIDUP** menyatakan kejayaan ke atas program-program membantu memperkasakan industri jualan langsung terutama bagaimana jualan langsung sebagai sumber baharu pendapatan kepada rakyat.

JAWAPAN

Tuan Yang di-Pertua,

Sukacita dimaklumkan **nilai jualan industri jualan langsung telah mencatatkan peningkatan sebanyak 5%** iaitu berjumlah **RM27 billion berbanding RM25.7 billion nilai jualan pada tahun 2021** dan pada tahun seterusnya, industri jualan langsung di Malaysia telah berjaya berada pada **kedudukan keenam (ke-6) di peringkat global** dan turut berjaya menduduki tangga **keempat (ke-4) di Asia Pasifik** melalui **Laporan Jualan Peruncitan Jualan Langsung Global 2021. Jumlah syarikat jualan langsung** yang aktif dan mempunyai Lesen Jualan Langsung yang sah sehingga 31 Disember 2022 adalah sebanyak **406 syarikat**.

Bagi memperkasakan industri jualan langsung sebagai sumber baharu pendapatan kepada rakyat, Kementerian telah merancang dan melaksanakan pelbagai program seperti **program advokasi** di beberapa lokasi seperti di **Kedah, Pulau Pinang, Selangor, Negeri Sembilan, Kelantan dan Terengganu**.

Dalam hal ini, Inisiatif Belanjawan 2022 yang lalu telah memperuntukkan **RM3 juta** kepada Kementerian bagi menyokong pengembangan industri langsung sebagai salah satu sektor ekonomi yang amat berpotensi. Kementerian telah meluluskan skop perbelanjaan peruntukan ini **untuk pelaksanaan Program Hari Industri Jualan Langsung Malaysia** bertujuan **mempromosikan perniagaan jualan langsung dan inisiatif pemberian Geran Kajian, Pembangunan, dan Pengkomersilan (R&D&C)** bagi menyokong pengembangan industri jualan langsung bertemakan **‘Khazanah Alam Jualan Langsung’**.

Penganjuran **Program Hari Industri Jualan Langsung Malaysia** merupakan usaha untuk mengembangkan industri dan memberikan pendedahan yang lebih meluas mengenai aktiviti perniagaan jualan langsung yang sah di Malaysia serta meningkatkan penglibatan lebih banyak pihak untuk menceburkan diri dalam industri ini yang mampu menjana sumber pendapatan. Program telah diadakan pada 27-29 Mei 2022 di Berjaya Times Square, Kuala Lumpur dengan kerjasama *Direct Selling Association of Malaysia* (DSAM) dan *Malaysian Direct Distribution Association* (MDDA) ini telah mencatatkan kehadiran seramai 2,650 pengunjung sepanjang 3 hari berlangsung dengan nilai potensi pelaburan sebanyak RM1.325 juta. Pengisian aktiviti program ini melibatkan 6 komponen utama iaitu sesi pitching dan pepadanan perniagaan, sesi konsultasi, sesi ceramah dan advokasi, pocket talk dan seminar, pameran dan jualan serta *product promotion and sampling*.

Pelaksanaan inisiatif **pemberian Geran R&D&C** pula bertujuan untuk **memperkembangkan perniagaan jualan langsung khususnya kepada syarikat jualan langsung yang mengeluarkan dan memasarkan produk tempatan berasaskan sumber alam semula jadi** seperti gamat, tongkat ali, kacip fatimah, pegaga, moringa, lidah buaya, ubi jaga dan sebagainya serta membantu syarikat **mengkomersilkan produk jualan langsung**. Terkini, Kementerian telah menerima permohonan bagi pemberian geran ini daripada lapan syarikat jualan langsung dan satu badan berkanun.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATUK SERI DR. RONALD KIANDEE
(BELURAN)**

SOALAN

DATUK SERI DR. RONALD KIANDEE (BELURAN) minta **MENTERI KEMAJUAN DESA DAN WILAYAH** menyatakan status naik taraf jalan Kampung Bintang Mas ke Kampung Manduring dalam kawasan Parlimen Beluran.

JAWAPAN

Untuk makluman Yang Berhormat, Projek Membina Jalan Manduring ke Jalan Bintang Mas – Jalan Sapi Nangoh, Beluran, Sabah telah diluluskan di bawah *Rolling Plan* Pertama (RP-1), RMKe-12 tahun 2021 dengan skop menaik taraf jalan sepanjang 20.4 km dengan spesifikasi JKR R2 dan dua (2) buah jambatan. Agensi pelaksana bagi projek ini adalah JKR Sabah.

Projek ini telah sedia untuk ditender dan sedang ditentukan halatuju baharu pelaksanaan serta perolehannya yang akan diputuskan dalam masa terdekat.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATUK SERI DR. RONALD KIANDEE
(BELURAN)**

SOALAN

DATUK SERI DR. RONALD KIANDEE (BELURAN) minta **MENTERI
KEMAJUAN DESA DAN WILAYAH** menyatakan status pembinaan
loji air bagi Mukim Lingkabau, Sugut, Beluran.

JAWAPAN

Tuan Yang di-Pertua,

Untuk makluman Yang Berhormat, Kementerian Kemajuan Desa dan Wilayah (KKDW) sedang dalam proses untuk melantik Perunding Utama (*Lead Consultant*) bagi Projek Bekalan Air Luar Bandar (BALB) Kawasan Labuk, Sugut dan Sekitarnya, Beluran, Sabah bagi membuat rekabentuk projek sebelum kontraktor dilantik bagi melaksanakan kerja-kerja pembinaan.

Projek ini dijangka akan memberi manfaat kepada 519 rumah/ akaun baharu di sekitar Mukim Lingkabau, Beluran, Sabah.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATUK SERI DR. RONALD KIANDEE
(BELURAN)**

SOALAN

DATUK SERI DR. RONALD KIANDEE (BELURAN) minta **MENTERI KEMAJUAN DESA DAN WILAYAH** menyatakan adakah pembinaan jambatan Sungai Labuk ke Kampung Ansuan Baba dalam daerah Telupid, Beluran akan disenaraiutamakan oleh Kementerian.

JAWAPAN

Untuk makluman Yang Berhormat,

Projek Pembinaan Jambatan Sungai Labuk Di KM0.50 Jalan Gambaron, Telupid, Sabah telah diluluskan di bawah *Rolling Plan* Kedua (RP-2), RMKe-12 tahun 2022 dengan skop menggantikan jambatan sepanjang 150 meter dan lebar 10 meter.

Status terkini projek adalah dalam proses rekabentuk oleh agensi pelaksana iaitu JKR Sabah.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATUK SERI DR. RONALD KIANDEE
(BELURAN)**

SOALAN

DATUK SERI DR. RONALD KIANDEE (BELURAN) minta **MENTERI KEMAJUAN DESA DAN WILAYAH** menyatakan perancangan Kementerian untuk membina baharu jambatan bagi menghubungkan Kampung Perancangan ke Kampung Tebidong-bidong, Telupid dalam kawasan Parlimen Beluran.

JAWAPAN

Untuk makluman Yang Berhormat, projek membina jambatan baharu yang menghubungkan Kampung Perancangan ke Kampung Tebidong-Bidong, Telupid, Sabah tiada dalam perancangan Kementerian pada masa ini kerana belum menerima permohonan projek daripada Kerajaan Sabah.

Untuk makluman, permohonan projek-projek Jambatan Luar Bandar (JMLB) dan Jalan Luar Bandar (JALB) di bawah Kementerian ini adalah berdasarkan permohonan yang diterima daripada Kerajaan Negeri melalui Unit Perancang Ekonomi Negeri (UPEN). Sehubungan itu, sekiranya terdapat keperluan mendesak bagi melaksanakan projek tersebut, kerjasama Yang Berhormat adalah dipohon bagi mengemukakan permohonan tersebut kepada Unit Perancang Ekonomi Negeri Sabah untuk dimasukkan ke dalam Senarai Keutamaan Negeri kepada Kementerian ini sebelum diangkat kepada Kementerian Ekonomi bagi kelulusan di bawah *Rolling Plan* yang akan datang.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATUK SERI DR. RONALD KIANDEE
(BELURAN)**

SOALAN

DATUK SERI DR. RONALD KIANDEE (BELURAN) minta **MENTERI KEMAJUAN DESA DAN WILAYAH** menyatakan apakah perancangan Kementerian untuk menyediakan bekalan elektrik bagi Kampung Jambongan dan menaik taraf kemudahan bekalan elektrik yang sedia ada di Kampung Keniogan dan Kampung Tetabuan dalam Kawasan Parlimen Beluran.

JAWAPAN

Tuan Yang di-Pertua,

Untuk makluman Yang Berhormat, Kementerian sedang dalam pelaksanaan satu (1) projek yang melibatkan Kampung Jambongan iaitu melalui Projek Bekalan Elektrik Luar Bandar (BELB) Sistem Solar Hibrid Pulau-Pulau Terpencil Di Negeri Sabah. Walau bagaimanapun, pelaksanaan projek ini kini digantung atas isu kelulusan Pelan Pembangunan (DP) dan Pelan Bangunan (BP). Dengan mengambil kira isu pelaksanaan ini, projek ini dijangka dapat disiapkan pada suku kedua tahun 2024.

Manakala bagi Kampung Kaniogan dan Kampung Tatabuan, pihak Kementerian telah pun menerima cadangan pelaksanaan menaiktaraf sistem pembekalan elektrik melibatkan kedua-dua buah kampung ini daripada pihak Unit Perancang Negeri Sabah semasa proses permohonan projek dibawah *Rolling Plan* ke-3 RMK-12 daripada sistem Janakuasa Diesel kepada Solar Hibrid dan kini masih dalam pertimbangan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN(BERTULIS)

**DARIPADA : TUAN ROSLAN BIN HASHIM
(KULIM BANDAR BAHARU)**

SOALAN

TUAN ROSLAN BIN HASHIM (KULIM BANDAR BARU) minta **MENTERI PEMBANGUNAN USAHAWAN DAN KOPERASI** menyatakan usaha Kementerian untuk menggalakkan keusahawanan menerusi tawaran geran dan pinjaman mikro kepada golongan anak muda dan wanita untuk menjana pendapatan harian di Kulim Bandar Baharu.

JAWAPAN

Tuan Yang di-Pertua,

1. Kementerian Pembangunan Usahawan dan Koperasi (KUSKOP) komited untuk terus membantu pembangunan usahawan di Malaysia secara amnya. Pelbagai program merangkumi geran dan pinjaman perniagaan telah disediakan kepada usahawan muda dan wanita termasuk di Parlimen Kulim Bandar Baharu seperti berikut:

- i. kemudahan pembiayaan khusus untuk membantu golongan usahawan mikro yang ditawarkan oleh TEKUN Nasional dengan nilai pembiayaan dari RM1,000 sehingga RM100,000. Ia terbuka kepada semua peringkat umur dan jantina.

Sejak tahun 2001 sehingga Disember 2022, TEKUN Nasional telah membiayai seramai 3,514 usahawan di

SOALAN NO : 445

Parlimen Kulim Bandar Baharu dengan nilai pembiayaan sebanyak RM34.3 juta. Daripada jumlah itu, seramai 1,829 usahawan adalah terdiri daripada kalangan wanita dengan jumlah pembiayaan sebanyak RM15.8 juta.

- ii. Bank Rakyat menyediakan pembiayaan untuk perniagaan mikro kepada golongan anak muda dan wanita melalui Program Pembiayaan BR Flex-i, untuk membantu kelangsungan perniagaan dan Program Pembiayaan Mikro untuk Penjaja dan Peniaga Kecil (MPPK 2.0). Bagi Parlimen Kulim Bandar Baharu, sehingga Disember 2022, Bank Rakyat telah meluluskan pembiayaan sebanyak RM519,100 kepada 25 usahawan wanita dan RM829,700 kepada 34 usahawan muda di bawah program pembiayaan BR Flex-i. Selain itu, Bank Rakyat melalui skim MPPK 2.0, telah meluluskan pembiayaan sebanyak RM128,000 kepada 7 usahawan wanita dan sebanyak RM228,000 untuk 9 usahawan muda.
- iii. PERNAS telah melancarkan Projek *Be Your Own Boss* (BYOB) pada awal tahun 2021. BYOB menawarkan dua (2) program di bawahnya iaitu program “*Successful Women Entrepreneurship Engagement Talent (SWEET)*” untuk golongan wanita dan program “*Young Entrepreneurship Engagement Talent (YOUNITY)*” untuk golongan belia. Bagi tahun 2021 dan 2022, PERNAS telah membiayai seramai 3 usahawan di Parlimen Kulim Bandar Baharu di bawah program BYOB dengan nilai pembiayaan sebanyak RM1.1 juta.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN ROSLAN BIN HASHIM
[KULIM BANDAR BAHARU]**

SOALAN

TUAN ROSLAN BIN HASHIM [KULIM BANDAR BAHARU] minta
MENTERI PENDIDIKAN menyatakan langkah Kementerian dalam
meningkatkan capaian internet di sekolah dan meningkatkan kemampuan
server KPM.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk meningkatkan capaian internet sekolah serta kualiti penyampaian perkhidmatan digital.

KPM telah menyediakan capaian jalur lebar internet dengan kelajuan 30Mbps hingga 300Mbps untuk 10,233 sekolah di bawah KPM. Sebanyak 5,027 sekolah disediakan dengan talian gentian optik, 4,701 sekolah disediakan talian jalur lebar tanpa wayar 4G dan 505 sekolah disediakan dengan talian satelit. Pada masa ini, capaian internet di sekolah hanya meliputi makmal komputer, bilik guru dan pejabat pentadbiran.

KPM juga sedang merancang untuk menaik taraf capaian internet yang mengutamakan teknologi fiber dengan kelajuan minimum 100Mbps sehingga 1,500Mbps bergantung kepada saiz dan populasi premis institusi pendidikan serta institusi lain bawah KPM. Selain itu, KPM juga bercadang untuk menaik taraf infrastruktur rangkaian dalaman yang membolehkan internet dicapai dari semua lokasi dalam kawasan premis institusi bawah KPM.

Bagi meningkatkan kemampuan *server* KPM untuk memastikan penyampaian perkhidmatan digital KPM sentiasa optimum, KPM telah menggunakan perkhidmatan pengkomputeran awan MyGovCloud seiring dengan Rangka Tindakan Ekonomi Digital Malaysia (MyDigital). Di antara perkhidmatan digital KPM yang menggunakan MyGovCloud adalah Pelantar Pembelajaran Digital (DELIMa) dan perkhidmatan semakan keputusan peperiksaan Sijil Pelajaran Malaysia (SPM) secara dalam talian.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN ROSLAN BIN HASHIM
[KULIM BANDAR BAHARU]**

SOALAN

minta **PERDANA MENTERI** menyatakan adakah Kementerian mempunyai perancangan dan peruntukan untuk penstrukturan semula kemudahan untuk APM.

JAWAPAN

**DI JAWAB OLEH YB DATUK ARMIZAN MOHD ALI
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)**

Tuan Yang Di-Pertua,

1. Angkatan Pertahanan Awam Malaysia (APM) mempunyai tiga (3) komponen utama iaitu anggota tetap, anggota sukarela dan anggota bantuan. Anggota Tetap adalah merujuk kepada Penjawat Awam yang dilantik melalui Suruhanjaya Perkhidmatan Awam (SPA) manakala Anggota Sukarela dan Anggota Bantuan adalah dilantik berdasarkan Kaedah-kaedah Pertahanan Awam (Pasokan Pertahanan Awam) 1970.

2. APM telah mengemukakan cadangan penstrukturan semula perjawatan bagi tugas dan peranan sebagai Sekretariat di peringkat Negeri dan Daerah melibatkan kenaikan gred Pengarah Pertahanan Awam Negeri dan Pegawai Pertahanan Awam Daerah bagi menjalankan peranan sebagai Sekretariat dalam Pengurusan Bencana. Setiap

peringkat pengurusan bencana dipengerusikan oleh Setiausaha Kerajaan Negeri dan Pegawai Daerah.

3. Cadangan kenaikan gred ini dibuat berikutan gred sedia ada adalah kurang bersesuaian selaku Sekretariat Pengurusan Bencana berbanding dengan gred ketua pentadbiran agensi lain di negeri dan daerah. Justeru, sewajarnya pihak APM mengangkat permohonan kenaikan gred bagi penstrukturan semula perjawatan Pengarah APM Negeri minima Gred KP48 sehingga gred KP54 dan Pegawai APM Daerah minima Gred KP29 ke atas. Kertas cadangan penstrukturan ini telah diangkat kepada JPM dan pemurnian semula dibuat bersama APM/JPM.

4. Disamping itu, cadangan pewujudan 1,501 jawatan kontrak yang ditangguhkan oleh agensi pusat pada tahun lepas akan diangkat semula bagi tujuan menampung fungsi dan operasi APM di peringkat komuniti, daerah, negeri dan Pusat. Cadangan jawatan kontrak ini adalah bermula daripada gred 11 dan ke atas. Peluang pengambilan pegawai dari kalangan penduduk/komuniti setempat bagi membantu karier masyarakat dan penduduk bagi peluang pekerjaan. Lebih daripada 800 perkhidmatan kontrak adalah pada gred yang tidak memerlukan kelulusan Sijil Pelajaran Malaysia (SPM) atau pada gred 11, bersesuaian dengan keperluan di luar bandar dan tugas tugas rencam fungsi APM.

5. Selain itu, pihak APM telah mendapat kelulusan perolehan aset/fasiliti bagi 100 buah ambulans 4WD. Pertambahan ini juga disertakan dengan 192 perjawatan baharu bagi menampung tugas dan kemudahan aset baharu tersebut. 192 perjawatan ini telah diangkat kertas cadangan penempatan sejajar dengan lokaliti penempatan ambulans tersebut. Setiap daerah setidak-tidaknya akan ditempatkan seorang pegawai baharu bagi membantu pengurusan dan pengoperasian aset serta fasiliti di daerah tersebut.

6. Pihak Kerajaan telah menyediakan pelbagai bentuk kemudahan dan imbuhan terutamanya kepada anggota sukarela yang aktif di dalam menyumbang bakti di dalam APM sama ada sebagai Pegawai Sukarela mahupun Anggota Lain-Lain Pangkat. Kemudahan serta imbuhan yang disediakan oleh pihak kerajaan adalah seperti :

- i. **Penyediaan Pakaian Seragam Percuma**
– Uniform No.2, Uniform No.3 dan Uniform No.4
- ii. **Elaun Kehadiran Latihan Tempatan (EKLT);**
- iii. **Bayaran Rawatan Terkurang Di Hospital Kerajaan;**
- iv. **Tabung Amanah Perwira Dan Pertahanan Negara; dan**
- v. **Kemudahan Caruman Insurans Berkelompok**

7. APM juga pada mulai April 2023 akan menaikkan kemudahan elaun kursus sedia ada iaitu RM5 sehari kepada RM 58.80 bagi Pegawai Pasukan dan RM48 sehari bagi Lain-lain Pangkat (LLP). Pembayaran elaun kursus kepada Pegawai Pasukan dan Anggota adalah dibayar maksima 6 jam sehari dengan mengambil kira makan minum disediakan di lokasi ILPA. Anggaran implikasi kewangan bagi kemudahan elaun kursus (April hingga Disember 2023) adalah seperti berikut :

KATEGORI PANGKAT	PERINCIAN	CATATAN
PEGAWAI PASUKAN	RM294.00 X 1,253 orang : RM368,382.00	RM294.00 = (RM9.80 X 6 jam X 5 hari)
LAIN-LAIN PANGKAT	RM240.00 X 5,012 orang : RM1,202,880.00	RM240.00 = (RM8.00 X 6 jam X 5 hari)
KESELURUHAN	RM1,571,262.00	

Ini secara tidak langsung akan dapat menarik minat anggota sukarela untuk menambah ilmu pertahanan awam di Institusi Latihan Pertahanan Awam (ILPA di seluruh negara.

8. Anggota APM yang berkhidmat juga mendapat kemudahan PERKESO mulai tahun 2021. Kerajaan telah membiayai caruman PERKESO di bawah inisiatif SPS Khidmat Sukarelawan sebanyak RM 232.80 setahun. Ia melibatkan seramai 9,201 anggota sukarela pada tahun 2021 dan 12,568 anggota sukarela bagi tahun 2022. Bagi tahun 2023, APM masih menunggu mengenai kemudahan ini sama ada dilanjutkan atau sebaliknya.

9. Mana-mana anggota sukarela yang berdaftar boleh mengikuti Latihan atau kursus pelbagai kemahiran di ILPA di beberapa lokasi mengikut zon seperti berikut :

- a. Akademi Latihan Pertahanan Awam Malaysia (ALPHA), Bangi;
- b. Pusat Latihan Pertahanan Awam Wilayah Utara (PULAPAU), Baling;
- c. Pusat Latihan Pertahanan Awam Wilayah Timur (PULAPAT), Jengka; dan
- d. Pusat Latihan Pertahanan Awam Wilayah Selatan (PULAPAS), Kluang

10. Anggota Sukarela yang mempunyai kemahiran berpeluang ditawarkan untuk bertugas di mana-mana pejabat pertahanan awam seluruh negeri. Penugasan boleh dilaksanakan di peringkat Ibu Pejabat Pertahanan Awam (IPPA), Institusi Latihan Pertahanan Awam (ILPA), Pejabat Negeri Pertahanan Awam (PNPA), Pejabat Daerah Pertahanan Awam (PDPA) atau Pejabat Unit Pertahanan Awam (PUPA).

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATO' ROSOL BIN WAHID
(HULU TERENGGANU)**

SOALAN

DATO' ROSOL BIN WAHID (HULU TERENGGANU) minta **MENTERI KEMAJUAN DESA DAN WILAYAH** menyatakan apakah perancangan Kerajaan untuk memajukan kawasan luar bandar di Terengganu khususnya di dalam kawasan yang digazetkan di bawah seliaan Lembaga Kemajuan Terengganu Tengah (KETENGAH) bagi memakmurkan lagi pembangunan ekonomi penduduk setempat.

JAWAPAN

Tuan Yang di-Pertua,

Lembaga Kemajuan Terengganu Tengah (KETENGAH) komited untuk melaksanakan pembangunan bagi memajukan kawasan luar bandar seterusnya memakmurkan pembangunan ekonomi penduduk setempat dengan pelbagai agenda pembangunan yang telah dilaksanakan atau yang akan dilaksanakan. Pembangunan mampan ini adalah untuk mensejahterakan kumpulan sasar di tiga (3) daerah dalam Wilayah KETENGAH bersandarkan kepada dasar-dasar kerajaan yang telah diwujudkan bagi meningkatkan tahap sosio ekonomi penduduk setempat agar lebih berdaya maju dan berdaya saing. Antara dasar-dasar yang digunapakai dalam menyeimbangkan pelaksanaan/perancangan pembangunan oleh KETENGAH adalah selaras dengan fungsi dalam AKTA 104 dengan pelaksanaan program/projek berdasarkan Dasar Pembangunan Luar Bandar (DPLB) 2030, Kampung Sejahtera, Dasar RMKe-12, Dasar-Dasar Semasa Kerajaan Persekutuan dan Kerajaan Negeri Terengganu.

KETENGAH sendiri juga melaksanakan pembangunan berpacuan kepada Pelan Perancangan Strategik KETENGAH 2021-2025 yang melibatkan lima (5) Teras Strategik iaitu Memperkasakan Pembangunan Ekonomi Dan Keusahawanan Bagi Meningkatkan Pendapatan Dan Daya Saing Perniagaan, Memperkasakan Modal Insan Yang Komprehensif Bagi Meningkatkan Kesejahteraan Penduduk Dalam Wilayah, Memperkasakan Prasarana Kemudahan Awam Serta Penempatan Bagi Menyokong Pertumbuhan Sosioekonomi, Memastikan Kelestarian Alam Sekitar Untuk Kesejahteraan Kehidupan Masyarakat Luar Bandar dan Memperkasakan Sistem Penyampaian Perkhidmatan Dan Tadbir Urus Organisasi Secara Berkesan, 16 Strategi dan 56 Program dalam meningkatkan taraf

dan kualiti hidup penduduk agar lebih sejahtera dan harmoni dalam masa lima (5) tahun. KETENGAH juga komited untuk melaksanakan pembangunan-pembangunan yang akan datang selaras dengan dasar-dasar baharu yang akan diperkenalkan oleh Kerajaan Persekutuan dan Kerajaan Negeri Terengganu di samping dasar terkini yang menjadi panduan kepada pembangunan KETENGAH berkonsepkan kepada Malaysia MADANI.

Bagi tempoh tahun 2021-2023, KETENGAH telah diluluskan peruntukan berjumlah RM102,760,500 untuk melaksanakan 27 program/projek melibatkan pecahan peruntukan mengikut tahun seperti berikut:

- (i) Tahun 2021 : RM38,255,500;
- (ii) Tahun 2022 : RM39,885,000; dan
- (iii) Tahun 2023 : RM24,620,000.

Bagi tahun 2023, terdapat 23 projek sambungan melibatkan lima (5) teras berjumlah RM24,620,000 yang telah diluluskan:

- (i) Ekonomi dan Keusahawanan melibatkan enam (6) projek berjumlah RM2,945,000. Antara output projek di bawah teras ini ialah naiktaraf kemudahan infrastruktur asas pelancongan di Kawasan Rekreasi Sungai Perlis dan Bumbung Raja, Dungun seperti membina dan menaiktaraf tapak perkhemahan, dewan terbuka dan pencahayaan. Bagi memperkasakan usahawan KETENGAH, tujuh (7) premis perniagaan dinaiktaraf dan dibaikpulih, bantuan peralatan usahawan, promosi dan pembungkusan/pelabelan produk serta memberikan kursus/latihan kepada usahawan. Tujuan projek ini dilaksanakan adalah untuk memperkasakan pembangunan ekonomi dan keusahawanan bagi meningkatkan pendapatan dan daya saing perniagaan di samping melahirkan usahawan luar bandar yang berjaya.

Projek ini memberi manfaat kepada 22,590 orang pelancong, usahawan dan penduduk.

- (ii) Pembangunan Masyarakat melibatkan tiga (3) projek berjumlah RM400,000. Antara output projek ialah memperkasakan satu (1) koperasi sedia ada melalui aktiviti penternakan, melahirkan lima (5) orang belia sebagai perintis tani dan melaksanakan program peningkatan pendapatan kos sara hidup kepada 10 orang suri dan ibu tunggal. Tujuan projek ini dilaksanakan adalah untuk memperkasakan modal insan yang komprehensif bagi meningkatkan kesejahteraan penduduk terutamanya ibu tunggal dan yang kurang berkemampuan. Projek ini memberi manfaat secara langsung kepada 65 orang penduduk.
- (iii) Pembangunan Prasarana melibatkan lapan (8) projek berjumlah RM14,160,000. Antara output projek ialah membina 10 unit gerai, membina satu (1) hentian kenderaan berat dan menaiktaraf sepanjang 5.8km jalan perhubungan di Pengkalan Utama dan Pengkalan Gawi Tasik Kenyir, Hulu Terengganu serta menyediakan kawasan pertapakan seluas 30 hektar di Bandar Baru Gawi, Tasik Kenyir, Hulu Terengganu. Projek ini dilaksanakan adalah untuk memperkasakan prasarana, kemudahan awam serta penempatan bagi menyokong pertumbuhan sosioekonomi selari dengan pembangunan mampan yang diperlukan oleh kumpulan sasar. Projek ini memberi manfaat kepada 884,590 orang pelancong, usahawan dan penduduk Wilayah KETENGAH.
- (iv) Alam Sekitar melibatkan empat (4) projek berjumlah RM5,215,000. Antara output projek ialah naiktaraf dan baikpulih longkang di perbandaran KETENGAH dan naiktaraf Sistem Kumbahan sepanjang 22.02 km dan empat (4)

kolam oksidasi di Bandar Al Muktafi Billah Shah. Tujuan projek ini dilaksanakan adalah untuk memastikan kelestarian alam sekitar untuk kesejahteraan kehidupan masyarakat luar bandar. Projek ini memberi manfaat kepada 307,930 orang penduduk.

- (v) Sistem Penyampaian melibatkan dua (2) projek berjumlah RM1,900,000. Antara output projek ialah membangun dan menyediakan peralatan Wifi Hotspot Desa di lima (5) lokasi iaitu empat (4) lokasi di daerah Kemaman dan satu (1) lokasi di daerah Dungun melibatkan kawasan tumpuan orang ramai. Tujuan projek ini dilaksanakan adalah untuk memperkasakan sistem penyampaian secara berkesan di samping melahirkan masyarakat yang celik teknologi maklumat ke arah kemodenan digitalisasi. Projek ini memberi manfaat kepada 168,200 orang penduduk.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : YB DATO' ROSOL BIN WAHID
[HULU TERENGGANU]**

SOALAN

YB DATO' ROSOL BIN WAHID [HULU TERENGGANU] minta **MENTERI PELANCONGAN, SENI DAN BUDAYA** menyatakan apakah usaha Kerajaan dalam mengatasi isu kenaikan kos mengerjakan umrah secara mendadak ketika ini yang meresahkan umat Islam.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. MOTAC pada 17 Oktober 2021 telah mengeluarkan harga panduan kepada orang ramai sebagai rujukan iaitu sebanyak RM6,900.00. Antara faktor-faktor penetapan harga tersebut adalah bilangan kapasiti di dalam bilik penginapan di Arab Saudi, kapasiti pergerakan pengangkutan yang membenarkan 50% dari jumlah kapasiti sebenar dan pengurusan mutawif serta ujian swab COVID-19. Harga ini adalah sebagai panduan secara umum kepada rakyat dalam memilih syarikat yang menawarkan harga pakej dalam mengerjakan umrah.
2. Berikutan permintaan yang tinggi untuk mengerjakan umrah dari seluruh dunia, terdapat peningkatan harga seperti kos penginapan, pengangkutan dan penerbangan ke Tanah Suci. Pihak Persatuan Pengendali Umrah iaitu Persatuan Syarikat Pengendali Pelancongan Bumitra (BUMITRA), Persatuan Ejen-ejen Pelancongan dan Pengembaraan Malaysia (MATTA) dan Persatuan Agensi Pelancongan Umrah & Haji (PAPUH) telah mengeluarkan kenyataan media secara bersama memaklumkan purata harga rujukan pakej yang bersesuaian berdasarkan senario ketika ini adalah bermula daripada RM7,890 dengan jarak penginapan lebih kurang 300 meter. Dalam masa yang sama, dimaklumkan juga supaya syarikat pengendali umrah dan jemaah umrah membuat pilihan pakej sewajarnya. Walau bagaimanapun, kenaikan harga pakej umrah seperti hotel, pengangkutan dan sebagainya di Arab Saudi adalah bergantung sepenuhnya kepada keadaan semasa pasaran yang mana di luar bidang kuasa MOTAC.
3. Namun yang demikian, MOTAC telah mengambil inisiatif untuk mengadakan mesyuarat bersama dengan pihak penerbangan umrah dalam meneliti isu berkaitan dakwaan kenaikan harga tiket penerbangan

umrah. Mesyuarat tersebut telah dipengerusikan oleh YB Timbalan Menteri MOTAC pada 31 Januari 2023 yang turut dihadiri bersama oleh Kementerian Luar Negeri, Kementerian Pengangkutan, Jabatan Wakaf, Zakat dan Haji (JAHWAR), Suruhanjaya Penerbangan Malaysia (MAVCOM), Suruhanjaya Persaingan Malaysia (MYCC), Malaysia Airlines Berhad dan AMAL by Malaysia Airlines. Ahli mesyuarat tersebut juga melibatkan penglibatan dari wakil Persatuan BUMITRA, MATTA dan PAPUH.

4. MOTAC serta badan-badan yang terlibat dalam pengurusan dan perkhidmatan umrah bekerjasama secara erat dengan ejen-ejen pelancongan untuk mendapatkan penyelesaian yang adil bagi semua pihak yang bukan sahaja terlibat secara langsung atau tidak langsung, seperti pengusaha hotel, syarikat penerbangan, pengusaha bas dan ramai lagi bagi memastikan keseluruhan rantai bekalan (*supply-chain*) dapat memaksimumkan kepentingan perniagaan masing-masing dalam memberikan perkhidmatan yang terbaik dan tidak membebankan para jemaah.

5. Bagi menyokong permintaan perkhidmatan perjalanan umrah yang tinggi, AMAL by Malaysia Airlines komited untuk meningkatkan kapasiti penerbangan untuk musim umrah yang baharu, tertakluk kepada ketersediaan pesawat dan kelulusan dari pihak-pihak berkuasa yang berkaitan. Sebagai syarikat yang sentiasa menegakkan tadbir urus, AMAL memastikan ia berurusan secara telus dengan ejen-ejen yang berdaftar dengan MOTAC dan IATA tentang penjualan tiket penerbangan. Melalui kerjasama yang erat dengan ejen-ejen bertauliah, AMAL dapat memastikan penumpang menerima perkhidmatan yang cekap dan boleh dipercayai dengan harga yang berpatutan dan maklumat perjalanan yang tepat dalam menjalani pengalaman umrah mereka.

6. Dalam pada itu bagi melindungi hak pengguna, MOTAC bercadang untuk mewajibkan setiap syarikat pengendali umrah perlu menyediakan perjanjian dengan jemaah dengan menyatakan terma-terma dan syarat-syarat yang terpakai, jadual, pakej yang ditawarkan berserta peruntukan

NO. SOALAN : 449

tentang ganti rugi sekiranya terdapat salah laku atau kemungkinan oleh syarikat pengendali umrah atau jemaah. Ia adalah selaras dengan Peraturan 6(1A)(d) di bawah Akta Industri Pelancongan 1992 (Akta 482).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' ROSOL BIN WAHID
[HULU TERENGGANU]**

SOALAN

DATO' ROSOL BIN WAHID [HULU TERENGGANU] minta **MENTERI PENDIDIKAN** menyatakan penambahbaikan yang boleh dilakukan untuk kejohanan sukan peringkat Majlis Sukan Sekolah Daerah (MSSD), Majlis Sukan Sekolah Negeri (MSSN) dan Majlis Sukan Sekolah Malaysia (MSSM) dalam mengesan bakat jaguh sukan negara. Adakah Kementerian mempunyai perancangan khusus memperkasakan guru sekolah yang melatih pelajar dalam bidang sukan terutama aspek psikologi sukan.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha mengoptimumkan potensi dan bakat murid dalam bidang sukan pada pelbagai peringkat bagi melahirkan modal insan secara holistik untuk memenuhi keperluan negara pada masa hadapan.

Untuk makluman Ahli Yang Berhormat, KPM menerusi Majlis Sukan Sekolah Malaysia (MSSM) telah berperanan untuk menyelaras aktiviti sukan melalui penganjuran 24 jenis sukan pada peringkat daerah, negeri, kebangsaan dan antarabangsa seperti mana yang termaktub di dalam Warta Pendidikan Peraturan-Peraturan Pendidikan MSSM 2009. Semua jabatan pendidikan negeri dan pejabat pendidikan daerah turut berperanan merancang dan melaksana program bagi penyertaan murid untuk mewakili daerah dan negeri ke peringkat kebangsaan.

Melalui penganjuran kejohanan MSSM pada pelbagai peringkat, KPM mengenal pasti bakat murid yang layak untuk ditawarkan mengikuti latihan secara berstruktur dan sistematik di pusat kecemerlangan sukan iaitu pusat latihan daerah, sekolah sukan negeri atau sekolah sukan Malaysia. Bakat murid ini diasah dan digilap untuk menjadi jaguh sukan negara melalui rekod pencapaian mereka bagi meneruskan kecemerlangan dalam bidang sukan di bawah kendalian jurulatih yang bertauliah.

Bagi memastikan pembangunan sukan pada peringkat sekolah terus cemerlang, KPM sentiasa menjalin kerjasama yang baik dengan Majlis Sukan Negara, Persatuan Sukan Kebangsaan, Institut Sukan Negara (ISN) dan organisasi korporat dalam membangunkan program sukan pada pelbagai peringkat. Murid yang berprestasi tinggi dalam bidang sukan diserapkan di bawah program pelapis negeri atau pelapis negara sebagai persediaan untuk bertanding ke peringkat yang lebih tinggi. Antara program kerjasama yang dijalankan adalah Program Pembangunan Bola Sepak Negara, Program Pembangunan Ragbi Negara dan Program Pembangunan Hoki Negara.

SOALAN NO : 450

Antara nama besar murid kelahiran MSSM yang berjaya mengharumkan nama negara di persada antarabangsa adalah Datuk Pandelega Rinong Pamg (Terjun), Khairul Hafiz Jantan (Olahraga), Muhammad Azeem bin Mohd Fahmi (Olahraga), Izzah Amzan (Gimrama berirama), Safawi Rasid (Bola sepak), Lee Zii Jia (Badminton) dan Farah Ann Abdul Hadi (Gimnastik).

Dalam usaha meningkatkan pengetahuan dan kemahiran guru penasihat dan jurulatih, KPM telah menyediakan Modul Latihan Sukan untuk kegunaan dan panduan dalam menjalankan aktiviti sukan dan permainan di sekolah sepanjang tahun. KPM juga sedang dalam usaha memperkasakan jurulatih di pusat latihan daerah dengan menambah baik isi kandungan modul kejurulatihan sedia ada. Selain itu, KPM dengan kerjasama ISN turut menganjurkan Kursus Sains Sukan Tahap 1, 2 dan 3 setiap tahun bagi meningkatkan pengetahuan dan kemahiran jurulatih khususnya dalam aspek sains sukan seperti psikologi, pemakanan, rawatan kecederaan dan program latihan. Usaha ini adalah ke arah memajukan lagi prestasi murid demi kecemerlangan sukan negara.

Sekian, terima kasih.

RT43

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

**DARIPADA : DATO' ROSOL BIN WAHID
[HULU TERENGGANU]**

SOALAN

DATO' ROSOL BIN WAHID [HULU TERENGGANU] minta **MENTERI BELIA DAN SUKAN** menyatakan pendirian dan usaha diambil Kementerian terhadap isu keengganan pasukan bola sepak negeri melepaskan pemain untuk wakili negara sehingga merencatkan usaha membentuk pasukan kebangsaan yang mantap untuk membawa nama Malaysia ke kejohanan besar.

JAWAPAN

Tuan Yang di-Pertua,

Untuk makluman Ahli Yang Berhormat, Persatuan Bola Sepak Malaysia (FAM) merupakan badan induk yang bertanggungjawab sepenuhnya terhadap pembangunan dan kemajuan sukan bola sepak negara. Namun begitu, pihak Kementerian sentiasa bersama-sama dengan pihak FAM bagi memastikan pasukan negara berada dalam landasan yang terbaik untuk menghadapi perlawanan di peringkat antarabangsa.

Keengganan pasukan bola sepak negeri melepaskan pemain untuk mewakili negara disebabkan pertindihan jadual dan tempoh rehat yang tidak mencukupi selepas penyertaan ke sesuatu pertandingan. Ini adalah kerana tarikh pertandingan seperti Kejohanan Persekutuan Bola Sepak ASEAN (AFF) tidak termasuk dalam kalender rasmi perlawanan antarabangsa seperti ditetapkan oleh Persekutuan Bola Sepak Antarabangsa (FIFA).

Justeru itu, pendekatan terbaik ialah untuk pasukan kejurulatihan skuad bola sepak negara membentuk kumpulan pemain berkualiti yang lebih besar, daripada lebih banyak pasukan, yang boleh dipilih secara penggiliran untuk mewakili negara di kejohanan antarabangsa.

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DATO' ROSOL BIN WAHID
[HULU TERENGGANU]**

SOALAN

Dato' Rosol bin Wahid [Hulu Terengganu] minta MENTERI KOMUNIKASI DAN DIGITAL menyatakan usaha Kementerian untuk memperkasa dan meningkatkan capaian internet di kawasan luar bandar termasuk di kawasan Parlimen Hulu Terengganu.

JAWAPAN

Tuan Yang di-Pertua,

Kerajaan telah dan sedang mempertingkatkan capaian internet di Parlimen Hulu Terengganu termasuk di kawasan pedalaman dan luar bandar, melalui pelaksanaan inisiatif JENDELA Fasa 1 (2020-2022) dan Fasa 2 (2023-2025).

Setakat suku ketiga tahun 2022, peratusan liputan 4G di kawasan berpenduduk di Negeri Terengganu telah meningkat kepada 96.71% berbanding 93.68% sebelum pelaksanaan JENDELA pada suku kedua 2020. Manakala, peratusan liputan 4G di kawasan berpenduduk di Parlimen Hulu Terengganu telah meningkat kepada 95.72% berbanding 84.78% sebelum pelaksanaan JENDELA pada suku kedua 2020.

Bagi membekalkan capaian internet yang baik di Parlimen Hulu Terengganu, sebanyak 2,143 premis telah siap disediakan dengan sambungan gentian optik bagi jalur lebar talian tetap, manakala baki sebanyak 2,945 premis dalam peringkat pelaksanaan daripada 5,088 yang dirancang. Selain itu, sebanyak 176 alat pemancar komunikasi telah siap dinaik taraf kepada teknologi 4G, manakala baki sebanyak empat lagi dalam peringkat pelaksanaan daripada 180 yang dirancang.

Kerajaan juga telah menyiapkan empat menara baharu dan dalam proses menyiapkan baki 22 menara daripada sejumlah 26 menara yang dirancang. Kesemua inisiatif yang sedang dalam peringkat pelaksanaan dijangka akan siap sepenuhnya pada suku keempat 2023.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN ROY ANGAU ANAK GINGKOI
[LUBOK ANTU]**

SOALAN

TUAN ROY ANGAU ANAK GINGKOI [LUBOK ANTU] minta **MENTERI PENDIDIKAN** menyatakan jumlah pelajar dan menyenaraikan sekolah yang dikategorikan sebagai sekolah daif di Parlimen Lubok Antu serta inisiatif yang sedang dan akan diambil Kementerian untuk menaik taraf infrastruktur di sekolah-sekolah tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah termasuk di negeri Sarawak.

Untuk makluman Ahli Yang Berhormat, berdasarkan data KPM, sehingga Februari 2023, bilangan sekolah yang masih mempunyai bangunan daif di Parlimen Lubok Antu adalah sebanyak 16 buah sekolah. Jumlah ini melibatkan lapan buah sekolah yang mempunyai bangunan daif pada skala 7 dan lapan buah sekolah yang mempunyai bangunan daif pada skala 6. Jumlah enrolmen murid di 16 buah sekolah tersebut adalah seramai 1,331 orang murid.

Khusus di Parlimen Lubok Antu, bagi tempoh tahun 2018 hingga 2022, sebanyak 14 projek menaik taraf dan membangunkan semula bangunan daif di sekolah telah diluluskan dengan kos berjumlah RM49.137 juta. Sehingga kini, lapan projek telah siap sepenuhnya, dua projek di peringkat pembinaan dan empat projek di peringkat pra bina.

KPM akan mengemukakan cadangan menaik taraf atau membina bangunan gantian bagi sekolah yang mempunyai bangunan daif pada skala 6 dan skala 7 yang belum mendapat kelulusan kepada pihak agensi pusat untuk dipertimbangkan dalam Rancangan Malaysia Lima Tahun. Walau bagaimanapun, kelulusan dan pelaksanaan projek ini adalah tertakluk kepada keutamaan dan kedudukan kewangan semasa kerajaan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

**DARIPADA : TUAN ROY ANGAU ANAK GINGKOI
(LUBOK ANTU)**

SOALAN

TUAN ROY ANGAU ANAK GINGKOI (LUBOK ANTU) minta **MENTERI BELIA DAN SUKAN** menyatakan usaha Kementerian untuk menggalakkan penyertaan belia dalam bidang keusahawanan sosial agar mereka dapat menyumbang dalam mewujudkan peluang pekerjaan dan meningkatkan tahap sosioekonomi komuniti setempat.

JAWAPAN

Tuan Yang Di Pertua,

Untuk makluman Ahli Yang Berhormat, Kementetian Belia dan Sukan (KBS) sememangnya prihatin dan sentiasa menggalakkan belia di negara ini terlibat secara langsung dalam bidang keusahawanan agar golongan ini dapat menyumbang dalam mewujudkan peluang pekerjaan dan meningkatkan tahap sosioekonomi komuniti setempat. Dalam usaha ini, KBS telah melaksanakan beberapa inisiatif bagi melahirkan usahawan di kalangan belia seperti berikut: -

1. Program Social Entrepreneurship for Rural Youth (SERY)

Program *Social Entrepreneurship for Rural Youth* atau lebih dikenali sebagai SERY merupakan inisiatif baharu Kementerian Belia dan Sukan (KBS) yang telah diperkenalkan pada Julai tahun 2022 dan merupakan kombinasi latihan, bimbingan dan pementoran yang dijangka mengambil masa selama 6 bulan. Program berbentuk latihan berstruktur ini bertujuan membangunkan potensi belia dalam bidang keusahawanan sosial dengan fokus untuk mengupayakan belia menyumbang kepada pembangunan sosioekonomi dan komuniti luar bandar.

Pelaksanaan program SERY merupakan inisiatif KBS bagi menyahut aspirasi tersebut untuk mengurus perdana perusahaan sosial dengan mengupayakan belia sebagai penyumbang efektif kepada pembangunan sosioekonomi negara yang inklusif, seimbang dan mampan bagi memperkasakan ekonomi belia selaras dengan Pelan Strategik KBS 2021 – 2025.

Fokus utama KBS dalam pelaksanaan SERY ini adalah untuk menyerlahkan potensi dan peranan belia sebagai pemacu pembangunan masyarakat luar bandar melalui projek perusahaan sosial yang dibangunkan melalui tiga (3) kategori iaitu Pembangunan Komuniti, Pendidikan dan Alam Sekitar.

Projek – projek yang dibangunkan menjadi alternatif bagi

menyelesaikan masalah sosial komuniti yang masih belum mampu ditangani sepenuhnya oleh mekanisme sedia ada. Projek ini telah menerima permohonan keseluruhan penyertaan berjumlah 42 penyertaan secara berkumpulan, melibatkan seramai 164 orang belia dan hanya 11 daripada 42 kumpulan telah bersaing di peringkat penilaian akhir.

Pelaksanaan program SERY juga telah melibatkan kerjasama banyak pihak dalam menyumbang tenaga, kepakaran, sumber dan peluang – peluang yang dinamik untuk memantapkan lagi keberkesanan dan kesinambungan program ini. Antaranya Youth Trust Foundation (myHarapan), Kementerian Kemajuan Desa dan Wilayah (KKDW), UNDP – UNICEF dan NAMA Foundation.

Program ini telah memberi impak kepada belia dari golongan B40. Sebagai contoh, melalui program yang dianjurkan ini komuniti di Kota Marudu, Sabah telah berjaya menghasilkan baja organik daripada sisa kulit pisang berjumlah 900kg untuk dipasarkan. Pada tahun 2023 program SERY mensasarkan keseluruhan penyertaan seramai 30 kumpulan yang membabitkan 80 orang belia.

2. Program myPRENEUR

Program berbentuk latihan/program yang dijalankan oleh Akademi Pembangunan Belia Malaysia (APBMBG) dalam konteks pembangunan keusahawanan, keusahawanan sosial dan pembangunan kapasiti untuk menyerlahkan potensi belia dalam bidang keusahawanan berpandukan Dasar Belia Malaysia (DBM), Dasar Keusahawanan Nasional (DKN) serta Model Baharu Pembangunan Belia (MBPB). Pada tahun 2022 KBS telah melaksanakan 29 aktiviti dengan penyertaan seramai 3115 orang belia.

3. Program TVETPreneur

KBS turut mengambil Inisiatif memperkenalkan program TVETPreneur melalui pemeraksanaan ke atas Kurikulum Bidang Keusahawanan bagi melengkapkan pengetahuan pelajar dan pelajar lepasan ILKBS untuk menceburi bidang keusahawanan di samping memberi peluang mencipta pekerjaan sendiri (*job creation*) dan penjanaan ekonomi.

Pembentukan TVETPreneur melalui pelaksanaan program Mybizhub@ILKBS yang berkonsep maker space di mana kemudahan untuk permulaan perniagaan seperti kursus, latihan, ruang kerja, khidmat nasihat serta geran permulaan disediakan kepada pelajar lepasan TVET ILKBS. Program ini dirangka bagi membantu graduan ILKBS dan belia setempat yang berkecayaan namun tidak mempunyai modal/ sumber untuk memulakan perniagaan dengan bimbingan selama 6 hingga 12 bulan di ILKBS. Inisiatif ini diperkenalkan untuk memperkasa keusahawanan di kalangan belia agar mereka dapat meningkatkan pendapatan jualan melalui kemudahan yang disediakan oleh KBS.

Untuk makluman Ahli Yang Berhormat juga, Program Inkubator@ILKBS diperkenalkan dalam usaha untuk membudayakan keusahawanan kepada belia TVET ILKBS. Program ini direka khusus untuk membantu pelajar ILKBS memulakan perniagaan dengan sokongan kursus, latihan dan bimbingan dalam bidang berkaitan dengan menggunakan fasiliti, ruang kerja dan kemudahan di dalam ILKBS untuk tujuan perniagaan dan latihan bagi mewujudkan sokongan persekitaran perniagaan yang kondusif. Pada tahun 2022, seramai 338 orang pelajar ILKBS dalam pelbagai bidang kemahiran telah menyertai program Inkubator dan 291 orang peserta program Makerspace Mybizhub yang terdiri daripada graduan ILKBS dan belia setempat.

Manakala bagi program keusahawanan digital di kalangan pelajar ILKBS pula, telah menghasilkan jualan sebanyak RM159,191.36 sehingga Oktober 2022. Data jualan ini direkodkan dan dipantau melalui platform *Go eCommerce* yang dibangunkan oleh Malaysia *Digital Economy Corporation* (MDEC).

Selain itu, KBS melalui Impact Integrated turut menyediakan program Picksum Labs dalam usaha untuk menggalakkan belia terlibat dalam bidang keusahawanan. Picksum Labs merupakan sebuah program inkubator perniagaan yang dirancang untuk membantu usahawan muda termasuklah usahawan sosial yang memperoleh jualan kurang dari RM1,000 sebulan, menerusi bengkel, coaching dan dana. Modul yang difokuskan adalah merangkumi kanvas model perniagaan, pengurusan kewangan, penjenamaan, pemasaran yang berkesan, jualan dan kemahiran pitching. Pada tahun 2022, sebanyak 26 perniagaan yang diasaskan belia telah berjaya menamatkan program ini dengan 4 daripadanya telah terpilih bagi menerima dana perniagaan berjumlah RM5,000 menerusi Demo Day (sesi pitching). Kesemua 26 perniagaan sedang melalui fasa coaching dan pemantauan selama 5 bulan yang akan berakhir Mac 2023 sebelum penilaian akhir dilakukan ke atas kemajuan dan peningkatan jualan.

Kesemua usaha dan inisiatif program-program keusahawanan untuk belia ini diharap dapat menggalakkan penyertaan belia dalam bidang keusahawanan dalam usaha mewujudkan peluang pekerjaan dan meningkatkan tahap sosioekonomi komuniti setempat.

Sekian, terima kasih.

**PEMBERITAHUAN PERTANYAAN BUKANBERTULIS DEWAN
RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN (LISAN)
DARIPADA : TUAN ROY ANGAU ANAK GINGKOI
[LUBOK ANTU]

SOALAN

TUAN ROY ANGAU ANAK GINGKOI [Lubok Antu] minta **MENTERI PERDAGANGAN DALAM NEGERI DAN KOS SARA HIDUP** menyatakan status terkini Program Penyeragaman Harga di bawah Kementerian serta apakah langkah penambahbaikan yang akan dilaksanakan dalam pengagihan barang-barang subsidi agar dapat sampai kepada golongan sasaran terutamanya di luar bandar.

JAWAPAN

Yang di-Pertua,

Program Penyeragaman Harga merupakan inisiatif Kementerian Perdagangan Dalam Negeri dan Kos Sara Hidup. Objektif program ini adalah membolehkan penduduk di kawasan luar bandar dan pedalaman membeli tujuh (7) barang keperluan pada harga yang ditetapkan oleh Kerajaan iaitu sama seperti di kawasan bandar.

Tujuh (7) barangan yang dikawal adalah Barang Perlu yang meliputi Beras Putih 10 Kg, Gula Putih 1 Kg, Minyak Masak Sawit Tulen (Paket 1 Kg), Tepung Gandum 1 Kg, Gas Petroleum Cecair (LPG) 14 Kg, Petrol Ron 95 dan Diesel.

Program Penyeragaman Harga ini sentiasa ditambahbaik setiap tahun menerusi naziran serta penilaian semula kawasan sedia ada dan baharu. Kaedah perolehan bagi program ini turut ditambah baik menerusi perolehan secara tender terbuka.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN ROY ANGAU ANAK GINGKOI
(LUBOK ANTU)**

SOALAN

TUAN ROY ANGAU ANAK GINGKOI (LUBOK ANTU) minta **MENTERI KEMAJUAN DESA DAN WILAYAH** menyatakan sejauh manakah pelaksanaan inisiatif Kementerian untuk menaik taraf guru tabika KEMAS ke peringkat ijazah dan rancangan Kementerian untuk memperbaiki bangunan kelas tabika KEMAS di kawasan luar bandar termasuk di Lubok Antu.

JAWAPAN

Tuan Yang di-Pertua,

Jabatan Kemajuan Masyarakat (KEMAS) sedang dalam proses penyusunan semula fungsi dan peranan serta tatacara pelaksanaan program dan aktiviti terutama pelaksanaan program yang memberi impak yang tinggi.

Sehubungan itu, KEMAS sedang menyediakan kertas cadangan kepada Agensi Pusat untuk mempertimbangkan pelaksanaan pertukaran lantikan Pendidik Masyarakat yang mempunyai ijazah dalam pendidikan awal kanak-kanak yang kini berada pada gred lantikan S29 kepada Skim Pegawai Pembangunan Masyarakat (PPM) Gred S41.

Sekiranya cadangan ini diluluskan, ia akan membantu menaikkan tahap profesionalisme para Pendidik Masyarakat kerana ini adalah salah satu bentuk pengiktirafan dalam kerjaya sebagai Pendidik Masyarakat dan juga pemangkin motivasi bekerja kepada para Pendidik Masyarakat untuk meningkatkan komitmen bekerja kepada tahap yang lebih baik.

Selain meningkatkan tahap profesionalisme Pendidik Masyarakat, KEMAS juga telah memperuntukkan sebanyak RM9.5 juta bagi tujuan penyelenggaraan dan baik pulih TABIKA. Pada tahun 2022, sebanyak RM741,500 telah diperuntukan untuk kerja-kerja penyelenggaraan dan baik pulih TABIKA di Sarawak. Daripada jumlah tersebut, sebanyak RM25,000 telah diperuntukkan bagi penyelenggaraan dan baik pulih TABIKA di Lubok Antu. Manakala pada tahun 2023, sebanyak RM60,000 akan dibelanjakan bagi penyelenggaraan dan baik pulih tiga (3) buah TABIKA di Lubok Antu.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : TUAN ROY ANGAU ANAK GINGKOI
[LUBOK ANTU]

SOALAN

TUAN ROY ANGAU ANAK GINGKOI [LUBOK ANTU] minta **PERDANA MENTERI** menyatakan statistik jumlah kes kebangkrapan, kategori mengikut umur, faktor-faktor yang menyumbang kepada masalah ini serta bantuan yang disediakan di bawah Jabatan Insolvensi Malaysia kepada individu-individu yang diisytiharkan muflis.

JAWAPAN**YB DATUK SERI AZALINA OTHMAN SAID,
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, berdasarkan rekod Jabatan Insolvency Malaysia (Mdl), jumlah keseluruhan kes kebangkrutan bagi tahun 2018 hingga tahun 2022 (tempoh tersebut) ialah 49,133 kes. Jumlah kes kebangkrutan mengikut pecahan umur bagi tempoh tersebut ialah seperti berikut:

GOLONGAN UMUR	TAHUN					JUMLAH
	2018	2019	2020	2021	2022	
DI BAWAH UMUR 25 TAHUN	139	54	21	20	11	245
25-34 TAHUN	4,139	2,603	1,741	1060	759	10,302
35-44 TAHUN	5,958	4,574	3,150	2535	2,237	18,454
45-54 TAHUN	4,022	3,087	2,211	1802	1,630	12,752
55 TAHUN DAN KE ATAS	2,106	1,707	1,204	1116	1,024	7,157
TIADA MAKLUMAT	118	26	24	21	34	223
JUMLAH	16,482	12,051	8,351	6,554	5,695	49,133

Catatan : Bagi golongan umur "Tiada Maklumat, dokumen petisyen tidak mengandungi butiran usia bankrap (Pengenalan Polis / Tentera).

2. Antara punca yang menyumbang kepada kebangkrutan di dalam tempoh tersebut ialah sebagaimana berikut:

KATEGORI KEBANKRAPAN	TAHUN					JUMLAH
	2018	2019	2020	2021	2022	
PINJAMAN PERIBADI	4,636	5,706	4,457	3,267	2,688	20,754
SEWABELI	3,392	1,543	1,006	690	441	7,072

KENDERAAN						
PINJAMAN PERNIAGAAN	1,424	1846	1223	1,202	1,241	6,936
PINJAMAN PERUMAHAN	1,982	1,138	583	459	491	4,653
HUTANG KAD KREDIT	1,811	880	600	438	207	3,936
KEBERHUTANGAN YANG LAIN	1770	425	91	126	187	2,599
PENJAMIN KORPORAT	626	221	114	118	159	1,238
HUTANG CUKAI PENDAPATAN	275	261	158	147	153	994
PENJAMIN SOSIAL	540	15	2	0	0	557
CARUMAN KWSP	0	0	105	92	110	307
BIASISWA / PINJAMAN PELAJARAN	26	16	12	15	18	87
JUMLAH	16,482	12,051	8,351	6,554	5,695	49,133

Catatan :

- (1) Bagi kategori “Keberhutangan Lain”, dokumen petisyen tidak mengandungi butiran Kategori Keberhutangan bankrap.
- (2) Kategori “ Caruman KWSP” baharu dimasukkan bermula Januari 2020

3. Jabatan Insolvensi Malaysia ialah agensi kerajaan yang bertanggungjawab mentadbir hal ehwal individu bankrap di bawah Akta Insolvensi 1967 (Akta 360). Pentadbiran kebangkrutan di bawah Akta 360 tidak terhad kepada pengurusan harta bankrap tetapi turut meliputi aspek kebajikan dan masa depan bankrap seperti yang berikut:

- a. Pelepasan automatik telah diperkenalkan melalui pindaan Akta Kebankrapan(Pindaan) 2017 bagi membantu individu bankrap untuk keluar daripada kebangkrutan dalam tempoh masa yang singkat iaitu 3 tahun daripada tarikh pemfailan pernyataan hal ehwal oleh bankrap. Ini bagi memberi peluang untuk bankrap memulihkan kedudukan kewangannya dan memulakan kehidupan baharu. Kerajaan juga sedang melihat cadangan untuk menambahbaik peruntukan tersebut bagi membantu lebih ramai bankrap

keluar dari status kebangkrapan dalam tempoh yang ditetapkan.

- b. Kerajaan sentiasa prihatin terhadap golongan yang tidak berkeupayaan. Peruntukan seksyen 33B(2A) Akta 360 memperuntukkan 4 kategori bankrap yang boleh diberikan Sijil Pelepasan Ketua Pengarah Insolvensi di bawah Seksyen 33A Akta 360 setelah tempoh 5 tahun pentadbiran kebangkrapan, tanpa bantahan yang boleh dibuat oleh pemiutang. 4 kategori tersebut adalah seperti berikut:

- i. Bankrap atas alasan penjamin sosial;
- ii. Bankrap didaftarkan sebagai Orang Kurang Upaya(OKU) di bawah Akta Orang Kurang Upaya 2008;
- iii. Bankrap yang telah meninggal dunia;
- iv. Bankrap yang menghidap penyakit serius yang telah disahkan oleh Pegawai Perubatan Kerajaan

4. Jabatan Insolvensi juga sedang mengkaji aspek kebajikan bankrap yang lain dan dalam tindakan mengemukakan cadangan penambahbaikan peruntukan undang-undang kepada kabinet. Antara perkara yang dipertimbangkan adalah menambah kategori bankrap yang boleh dilepaskan melalui sijil pelepasan Ketua Pengarah Insolvensi tanpa bantahan yang boleh dibuat oleh pemiutang, penambahbaikan peruntukan berkenaan harta yang boleh dikecualikan daripada pembahagian antara pemiutang seperti *tools of trade* dan peruntukan berkenaan kelayakan bankrap bagi pentadbiran kes kebangkrapan dibuat secara pentadbiran terus. Namun demikian, bankrap juga perlu memainkan peranan penting dengan tampil dan memberikan kerjasama penuh kepada Jabatan agar bankrap mendapat manfaat daripada peruntukan-peruntukan yang dinyatakan serta pindaan yang akan dicadangkan di bawah Akta 360.

Sekian. Terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN RUSHDAN BIN RUSMI
[PADANG BESAR]**

SOALAN

Minta **MENTERI PENDIDIKAN TINGGI** menyatakan kejayaan penubuhan Kolej Komuniti dan adakah Kementerian berhasrat untuk melaksanakan 1 Kolej Komuniti, 1 Parlimen terutamanya untuk Parlimen Padang Besar.

JAWAPAN

Tuan Yang di-Pertua,

1. Pertimbangan untuk kelulusan penubuhan kolej komuniti mengambil kira beberapa faktor antaranya kajian pasaran dan keperluan semasa, peruntukan kewangan, perjawatan kejut dan keperluan industri setempat.
2. Mesyuarat Jemaah Menteri pada 8 September 2004 bersetuju dengan pandangan bahawa keutamaan penubuhan kolej komuniti hendaklah diberi tumpuan kepada kawasan-kawasan yang tiada institusi-institusi latihan seperti Pusat Giat MARA, Institut Kemahiran MARA dan bukan di setiap parlimen.
3. Untuk makluman, terdapat tiga (3) buah kolej komuniti yang sedang beroperasi berhampiran dengan Parlimen Padang Besar iaitu Kolej Komuniti Arau dengan jarak dalam lingkungan 45 km, Kolej Komuniti Arau Cawangan Kangar dengan jarak dalam lingkungan 35 km dan Kolej Komuniti Bandar Darulaman Cawangan Jerlun dengan jarak dalam lingkungan 40 km daripada Parlimen Padang Besar.
4. Justeru, pihak Kementerian berpandangan bahawa kewujudan politeknik dan kolej komuniti lain di kawasan sekitar Parlimen Padang Besar masih mampu membantu keperluan dalam bidang Pendidikan dan Latihan Teknikal dan Vokasional (TVET).

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

**DARIPADA : TUAN RUSHDAN BIN RUSMI
[PADANG BESAR]**

SOALAN

TUAN RUSHDAN BIN RUSMI [PADANG BESAR] minta **MENTERI SUMBER MANUSIA** minta **MENTERI SUMBER MANUSIA** menyatakan tahap kesediaan Kementerian dalam pelaksanaan persijilan tunggal TVET dan berapa banyak program TVET yang telah dijumlahkan sepanjang 5 tahun terkini.

JAWAPAN

Tuan Yang di-Pertua,

1. Kementerian Sumber Manusia melalui Jabatan Pembangunan Kemahiran bertanggungjawab mengawal selia pelaksanaan program TVET berasaskan Sistem Persijilan Kemahiran Malaysia seperti termaktub dalam Akta Pembangunan Kemahiran Kebangsaan 2006 (Akta 652).
2. Sistem Persijilan Kemahiran Malaysia menggunakan Standard Kemahiran Pekerjaan Kebangsaan (NOSS) sebagai standard latihan, dan pelajar yang berjaya menamatkan latihan akan dianugerahkan Sijil Kemahiran Malaysia, Diploma Kemahiran Malaysia, atau Diploma Lanjutan Kemahiran Malaysia.
3. Berdasarkan kepada kapasiti dan peruntukan Akta 652 sedia ada, Kementerian ini bersedia untuk mengambil tanggungjawab pelaksanaan persijilan tunggal TVET bagi program TVET Tahap 1-5 dalam Kerangka Kelayakan Malaysia (MQF) sekiranya ia menjadi satu dasar yang ditetapkan oleh Kerajaan.
4. Sejak tahun 2017, sebanyak 338 Standard Kemahiran Pekerjaan Kebangsaan (NOSS) yang menjadi rujukan utama pelaksanaan Sistem Persijilan Kemahiran Malaysia telah dijumlahkan. Penjumlahan ini adalah selaras dengan kajian semula yang dilakukan secara berkala, dan mengambil kira keperluan teknologi semasa berdasarkan maklum balas daripada pihak industri dan pemegang taruh berkaitan.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN RUSHDAN BIN RUSMI
[PADANG BESAR]**

SOALAN

Minta **MENTERI PENDIDIKAN TINGGI** menyatakan langkah Kementerian dalam mendepani isu lambakan persijilan akademik luar negara yang belum diiktiraf.

JAWAPAN

Dato' Yang di-Pertua,

1. Pada prinsipnya, kelayakan luar negara mestilah diiktiraf oleh badan berautoriti di negara asal. Walau bagaimanapun, bagi kelayakan atau program pengajian profesional, pengiktirafan adalah mengikut perakuan dari badan profesional tempatan yang berkaitan.
2. Kementerian melalui Agensi Kelayakan Malaysia (MQA) melaksanakan langkah pencegahan (*preventive measures*) dengan menggalakkan dan mendidik masyarakat untuk menyemak pengiktirafan persijilan akademik luar negara sebelum menyambung pengajian terutamanya bagi pelajar yang belajar ke luar negara di bawah kategori pembiayaan sendiri.
3. Dalam konteks ini, terdapat beberapa saluran semakan pengiktirafan luar negara seperti berikut:
 - a. semakan melalui Sistem Pengiktirafan Kelayakan Perkhidmatan Awam (eSisraf). eSisraf adalah satu daftar yang menyenaraikan semua program pengajian dari peringkat Sijil, Diploma, Diploma Lanjutan dan Ijazah Sarjana Muda dan kelayakan

yang telah mendapat pengiktirafan Kerajaan Malaysia sehingga tahun 2016; dan

b. Bagi kelayakan luar negara yang tidak tersenarai dalam eSisraf, pengiktirafan kelayakan adalah berdasarkan status pengiktirafan institusi dan kelayakan pendidikan tinggi oleh badan berautoriti di negara asal, misalnya daripada badan berautoriti di Arab Saudi melalui National Commission for Academic Accreditation and Assessment (NCAAA). Permohonan pengesahan status pengiktirafan ini boleh dikemukakan kepada MQA melalui kaedah yang digariskan melalui pautan:

<https://www.mqa.gov.my/pv4/recognition.cfm>.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

**DARIPADA : TUAN RUSHDAN BIN RUSMI
[PADANG BESAR]**

SOALAN

TUAN RUSHDAN BIN RUSMI [PADANG BESAR] minta **MENTERI SUMBER MANUSIA** menyatakan langkah perancangan penguatkuasaan Akta Keselamatan Dan Kesihatan Pekerjaan Pindaan 2022.

JAWAPAN

Tuan Yang di-Pertua,

1. Akta Keselamatan dan Kesihatan Pekerjaan (Pindaan) 2022 [Akta A1648] telah diwartakan pada 16 Mac 2022. Walaupun demikian, tarikh kuatkuasa Akta ini dalam proses untuk diwartakan.

2. Dalam menetapkan tarikh kuatkuasa Akta ini, Kementerian menerusi Jabatan Keselamatan dan Kesihatan Pekerjaan sedang giat melakukan persediaan bagi memastikan kelancaran aktiviti penguatkuasaan berdasarkan peruntukan Akta pindaan ini. Antara langkah persediaan berkenaan termasuklah :

- i) membuat hebahan awal kepada semua pemegang taruh termasuk majikan, pekerja, pertubuhan bukan kerajaan, pengamal Keselamatan dan Kesihatan Pekerjaan;
- ii) menambahbaik infrastruktur penguatkuasaan termasuk naik taraf sistem perkhidmatan atas talian Jabatan Keselamatan dan Kesihatan Pekerjaan;
- iii) mengemaskini prosedur Sistem Pengurusan Kualiti ISO9001, Sistem Pengurusan Keselamatan dan Kesihatan Pekerjaan ISO45001 dan Sistem Pengurusan Anti Rasuah ISO37001;
- iv) membangun dan memantapkan perundangan subsidiari berkaitan; dan
- v) melaksanakan program latihan, bagi meningkatkan kefahaman pegawai penguatkuasa mengenai Akta pindaan.

3. Walaupun Akta pindaan ini masih belum berkuatkuasa, Akta sedia ada iaitu Akta Keselamatan dan Kesihatan Pekerjaan 1994 dan Akta Kilang dan Jentera 1967 masih terpakai bagi melindungi aspek keselamatan dan kesihatan pekerja di negara ini.

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : TUAN RUSHDAN BIN RUSMI
[PADANG BESAR]**

SOALAN

TUAN RUSHDAN BIN RUSMI [PADANG BESAR] minta MENTERI KOMUNIKASI DAN DIGITAL menyatakan kadar penembusan jalur lebar generasi ke-5 (5G) terutama bagi segmen mudah alih.

JAWAPAN

Tuan Yang di-Pertua,

Setakat suku keempat 2022, jumlah langganan 5G telah direkodkan sebanyak 2.51 juta dengan kadar penembusan 5G nasional bagi 100 penduduk adalah pada 7.6%. Jumlah langganan ini melibatkan empat syarikat pemberi perkhidmatan dengan CelcomDigi, U Mobile dan Telekom Malaysia mula menawarkan pakej 5G komersial pada bulan November 2022. Manakala, YTL Comms telah memulakan penawaran komersial 5G bermula suku pertama 2022.

Peratusan ini dilihat akan meningkat selepas lebih banyak pakej 5G ditawarkan oleh penyedia perkhidmatan selari dengan peningkatan ketersediaan rangkaian 5G di dalam kawasan berpenduduk di seluruh negara. Kerajaan menyasarkan 80 peratus ketersediaan rangkaian 5G di dalam kawasan berpenduduk menjelang akhir 2023. Berikut adalah bilangan langganan serta kadar penembusan bagi 100 penduduk bagi jalur lebar mudah alih 5G setakat suku keempat 2022:

Bilangan Langganan 5G	Kadar Penembusan 5G bagi 100 Penduduk
2.51 juta	7.6%

Digital Nasional Berhad (DNB) sedang giat memperluaskan liputan perkhidmatan komersial 5G menerusi penglibatan empat pemberi perkhidmatan mudah alih iaitu CelcomDigi, U Mobile, YTL Comms dan Telekom Malaysia. Selain itu, DNB serta rakan-rakan strategiknya juga melaksanakan beberapa inisiatif sosioekonomik dalam usaha meningkatkan kesedaran dan pengetahuan berkenaan teknologi 5G kepada orang awam. Sebagai contoh, DNB, Malaysia *Digital Economy Corporation* (MDEC) dan Ericsson telah bekerjasama untuk melancarkan program dengan izin, '*Let's Learn Digital*' yang merupakan sebuah platform atas talian bagi membolehkan lebih ramai orang awam mempelajari topik-topik berkaitan teknologi 5G.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN JAWAB LISAN

DARIPADA : TUAN SABRI BIN AZIT [JERAI]

SOALAN

TUAN SABRI BIN AZIT [JERAI] minta **MENTERI SUMBER MANUSIA** menyatakan statistik jumlah pengangguran di seluruh negara yang masih menunggu permohonan pekerjaan.

JAWAPAN

Tuan Yang Di Pertua,

Berdasarkan Laporan Survei Tenaga Buruh oleh Jabatan Perangkaan Malaysia, kadar pengangguran keseluruhan yang direkodkan bagi bulan November 2022 ialah **3.6%**. Dari segi bilangan, jumlah penganggur pada November 2022 adalah seramai **600.9 ribu orang**. Daripada jumlah itu, **81.2%** bersamaan dengan **488 ribu orang** adalah **penganggur aktif** yang bersedia untuk bekerja dan aktif mencari pekerjaan.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS

PERTANYAAN : BUKAN LISAN

DARIPADA : TUAN SABRI BIN AZIT
[JERAJ]

SOALAN

Minta **Perdana Menteri** menyatakan statistik kadar buta Al-Quran dalam kalangan kanak-kanak berusia 7 hingga 12 tahun.

JAWAPAN

**YB SENATOR DATO' SETIA DR. HAJI MOHD NAI'IM BIN HAJI
MOKHTAR
MENTERI DI JABATAN PERDANA MENTERI (HAL EHWAL AGAMA)**

Yang di-Pertua,

1. Kerajaan amat mengambil berat berkenaan isu buta Al-Quran dalam kalangan kanak-kanak terutama yang masih berada di peringkat sekolah rendah.
2. Berdasarkan keputusan Ujian Penilaian Kelas KAFA (UPKK) pada tahun 2021, data menunjukkan 97.47% murid KAFA lulus bidang Al-Quran dan dapat menguasai bacaan Al-Quran. Ini menunjukkan kadar buta Al-Quran tidak akan menjadi suatu isu sekiranya murid-murid mengikuti pengajian yang disediakan oleh kerajaan yang sesuai dengan arus perdana.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN SABRI BIN AZIT [JERAI]

SOALAN

TUAN SABRI BIN AZIT [JERAI] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah langkah yang telah dibuat untuk membantu memudahkan harta pusaka alih kenderaan seperti kereta/motosikal dapat diwariskan setelah berlaku kematian pemilik kenderaan.

JAWAPAN

Tuan Yang di-Pertua,

Berdasarkan peruntukan perundangan semasa, sekiranya simati mempunyai harta alih sahaja seperti kereta atau motosikal, maka waris boleh membuat permohonan ke Amanah Raya Berhad (ARB) dengan syarat nilai keseluruhananya tidak melebihi RM600,000.00.

Bagi memudahkan lagi pengurusan harta pusaka terutama bagi kes simati hanya meninggalkan aset alih sahaja, Kementerian ini telah membuat pindaan Akta Harta Pusaka Kecil (Pembahagian) 1955 [Akta 98] yang telahpun diwartakan pada 25 Januari 2022. Dalam pindaan ini, waris-waris simati boleh membuat permohonan di JKPTG jika simati hanya mempunyai harta alih sahaja. Bidang kuasa baru ini secara dasarnya akan memberi pilihan kepada rakyat mengenai agensi yang menjadi pilihan dalam menyelesaikan harta pusaka mereka. Pindaan Akta 98 ini akan dikuatkuasakan bersekali dengan peraturan harta pusaka kecil bagi memudahkan pelaksanaan di peringkat negeri.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN SABRI BIN AZIT [JERAJ]

SOALAN

TUAN SABRI BIN AZIT [JERAJ] minta **MENTERI PENDIDIKAN** menyatakan adakah jumlah elaun yang diterima oleh warden asrama akan dinaikkan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah melaksanakan penambahbaikan kepada portfolio warden asrama di 1,874 buah sekolah berasrama bawah KPM.

Berkuat kuasa 1 Ogos 2022 kadar Elaun Warden Asrama (EWA) telah dinaikkan sebanyak 25 peratus. Kadar baharu EWA adalah seperti berikut:

- i. RM350 sebulan bagi Ketua Warden Asrama; dan
- ii. RM300 sebulan bagi Warden Asrama.

KPM komited untuk melaksanakan penambahbaikan berterusan kepada portfolio warden asrama di sekolah KPM.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN SABRI BIN AZIT [JERAI]

SOALAN

TUAN SABRI BIN AZIT [JERAI] minta **MENTERI PERTANIAN DAN KETERJAMINAN MAKANAN** menyatakan mengapa lesen pukot 'bubu naga' tidak dibenarkan untuk nelayan pesisir pantai.

JAWAPAN

Tuan Yang di-Pertua,

Bubu naga tidak dibenarkan penggunaannya oleh pihak Kementerian Pertanian dan Keterjaminan Makanan (KPKM) kerana ia telah menimbulkan konflik sosial dan menjejaskan sumber perikanan memandangkan kaedah penangkapan ikannya tidak selektif serta tidak mesra sumber dan alam sekitar.

Bubu naga ini merupakan peralatan yang statik dan bersifat tidak selektif yang mana turut menangkap anak-anak ikan. Strukturnya yang sangat panjang dan banyak injap ini telah menyebabkan berlakunya pertelingkahan dan perebutan kawasan penangkapan ikan antara nelayan tradisional berlesen (khususnya nelayan pukat hanyut) dan nelayan bubu naga yang tidak berlesen.

Sehubungan dengan itu, berkuat kuasa 1 November 2018, Kementerian Pertanian dan Keterjaminan Makanan (KPKM) telah menetapkan syarat perlesenan dengan spesifikasi yang menghalang penggunaan bubu naga atau sebarang bubu yang mempunyai lebih daripada dua (2) injap seunit. Penggunaan bubu naga juga merupakan satu kesalahan di bawah seksyen 11(3) Akta Perikanan 1985 iaitu kesalahan menggunakan peralatan menangkap ikan tanpa lesen.

Pihak KPKM juga dalam perancangan untuk memasukkan bubu naga sebagai peralatan larangan dalam Peraturan-peraturan Perikanan (Larangan Cara Menangkap Ikan) 1980 demi menjaga keharmonian dan kesejahteraan komuniti nelayan serta menjamin sumber perikanan yang mapan melalui penggunaan peralatan mesra alam.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SRI SAIFUDDIN ABDULLAH
[INDERA MAHKOTA]**

SOALAN

DATO' SRI SAIFUDDIN ABDULLAH [INDERA MAHKOTA] minta **MENTERI PENDIDIKAN** menyatakan apakah status inisiatif Sekolahku Sejahtera bagi memperkasakan aspirasi Falsafah Pendidikan, Pelan Pembangunan Pendidikan (PPPM) 2013 - 2025 serta anjakan 3 yang terkandung dalam PPPM.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) akan meneruskan dasar dan inisiatif sedia ada dengan menambah baik proses penyampaian bagi menjamin kecekapan dan keberkesanannya.

Aspirasi Falsafah Pendidikan Kebangsaan (FPK) serta Anjakan 3: Melahirkan Rakyat Yang Menghayati Nilai dalam Pelan Pembangunan Pendidikan Malaysia (PPPM) 2013 – 2025 akan diperkukuhkan lagi melalui Teras 2 dalam 7 Teras Nadi Keunggulan KPM yang memberi penekanan kepada aspek karamah insaniah melalui pembentukan adab, akhlak dan integriti, selaras dengan FPK. Pemerkasaan ini akan mengangkat darjat kemuliaan seluruh warga pendidikan, warga sekolah dan murid-murid keseluruhannya.

KPM akan terus komited untuk memperkasa dan menyokong aspirasi Falsafah Pendidikan Kebangsaan (FPK), serta Anjakan 3 daripada Pelan Pembangunan Pendidikan Malaysia (PPPM) 2013 – 2025, dalam melahirkan anak bangsa yang tinggi sopan dan susilanya, mulia pekertinya serta halus adab santunnya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SRI SAIFUDDIN ABDULLAH
[INDERA MAHKOTA]**

SOALAN

DATO' SRI SAIFUDDIN ABDULLAH [INDERA MAHKOTA] minta **MENTERI PENDIDIKAN** menyatakan sama ada Kementerian akan mengekalkan formula pengagihan peruntukan penyelenggaraan sekolah Kerajaan dan sekolah bantuan Kerajaan yang diperkenalkan oleh KPM sejak Belanjawan 2021.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian kepada semua kategori sekolah dalam usaha pembaikan infrastruktur dan fasiliti bangunan. Ini bagi memastikan kesemua sekolah bawah KPM dapat berfungsi dalam keadaan baik.

Untuk makluman Ahli Yang Berhormat, KPM akan menyalurkan peruntukan penyelenggaraan kepada sekolah dengan adil dan sewajarnya. Peruntukan penyelenggaraan juga akan diagihkan berdasarkan permohonan dan susunan keutamaan.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : PUAN HAJAH SALAMIAH BINTI MOHD
NOR [TEMERLOH]**

SOALAN :

Minta **PERDANA MENTERI** menyatakan apakah langkah-langkah yang akan diambil Kementerian bagi memastikan dasar 1% pekerja OKU yang menjadi KPI semua Kementerian seperti yang telah ditetapkan dapat dicapai.

JAWAPAN

**DI JAWAB OLEH YB DATUK ARMIZAN MOHD ALI,
MENTERI DI JABATAN PERDANA MENTERI
(TUGAS-TUGAS KHAS)**

1. Untuk makluman, inisiatif agar satu peratus (1%) peluang pekerjaan bagi Orang Kurang Upaya (OKU) dalam perkhidmatan awam **bukanlah merupakan KPI** bagi semua kementerian, sebaliknya ia adalah polisi dalam perkhidmatan awam.
2. **Pelan Perancangan Bersepadu Penambahbaikan Penyertaan Orang Kurang Upaya Dalam Perkhidmatan Awam** telah dibangunkan oleh JPA pada tahun **2019** melalui sesi libat urus dengan Pihak Berkuasa Melantik, Kementerian-Kementerian, Pertubuhan-Pertubuhan Bukan Kerajaan (NGO) serta persatuan-persatuan OKU yang melaksanakan projek untuk mempromosikan pemerkasaan OKU. Fokus pelan ini adalah untuk meningkatkan kompetensi dan keupayaan golongan OKU, supaya lebih ramai dapat mengisi pasaran kerja. Pendekatan secara bersepadu antara pelbagai pihak adalah perlu bagi menjayakan Pelan ini.
3. **Meningkatkan peranan Jawatankuasa Pekerjaan yang dipengerusikan oleh KSU Kementerian Sumber Manusia (KSM)** di bawah Majlis Kebangsaan Bagi Orang Kurang Upaya (MKBOKU). Fokus utama adalah ke arah pembangunan kapasiti OKU dan bukan semata-mata untuk mencapai sasaran 1% OKU dalam sektor awam.
4. **Meningkatkan peranan Jabatan Pembangunan OKU (JPOKU) di bawah Jabatan Kebajikan Masyarakat (JKM)** selaku institusi yang bertanggungjawab membangunkan golongan OKU, untuk melaksana dan memantau inisiatif penambahbaikan yang disenaraikan di dalam Pelan Perancangan Bersepadu Penambahbaikan Penyertaan Orang Kurang Upaya Dalam Perkhidmatan Awam.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS 2023**

PERTANYAAN : BUKAN LISAN

**DARIPADA : PUAN HAJAH SALAMIAH BINTI MOHD
NOR [TEMERLOH]**

SOALAN

YB PUAN HAJAH SALAMIAH BINTI MOHD NOR [TEMERLOH] minta
MENTERI PEMBANGUNAN KERAJAAN TEMPATAN menyatakan
apakah status balai Jabatan Bomba dan Penyelamat Malaysia di
Lanchang Temerloh, yang telah diluluskan pada tahun 2022.

JAWAPAN

Tuan Yang di-Pertua,

Untuk makluman Ahli Yang Berhormat, pihak Kementerian Pembangunan Kerajaan Tempatan (KPKT) sentiasa komited dalam memperluaskan capaian perkhidmatan kebombaan bagi memastikan aspek keselamatan dan kesejahteraan rakyat terus terjamin.

Pada masa kini, kawasan Lanchang telah mendapat khidmat kebombaan daripada Balai Bomba dan Penyelamat (BBP) Mentakab dengan jarak 22 kilometer yang mengambil masa lebih kurang 25 minit untuk sampai ke kawasan tersebut.

Berhubung dengan cadangan pembinaan balai bomba di kawasan Lanchang, Kementerian melalui Jabatan Bomba dan Penyelamat Malaysia (JBPM) telah memiliki sebidang tapak tanah seluas 1.132 ekar di kawasan tersebut bagi tujuan pembinaan BBP kategori D. Cadangan pembinaan BBP Lanchang ini telah dirancang untuk dimasukkan dalam Rancangan Malaysia Kedua Belas (RMKe-12) mengikut keutamaan. Walau bagaimanapun, pelaksanaan bagi pembinaan BBP tersebut adalah bergantung kepada kelulusan agensi pusat dan juga kos yang terlibat. Mulai tahun 2023 juga, KPKT akan memberi keutamaan projek pembinaan BBP bagi tapak tanah yang disediakan secara percuma atau dengan kadar premium nominal oleh kerajaan negeri atau pemaju perumahan. Faktor ini akan diambil kira selain dari skor kajian *fire cover* yang dilaksanakan oleh JBPM.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : PUAN HAJAH SALAMIAH BINTI MOHD NOR [TEMERLOH]

SOALAN

PUAN HAJAH SALAMIAH BINTI MOHD NOR [TEMERLOH] minta **MENTERI KEWANGAN** menyatakan sama ada Kerajaan bercadang untuk mengembalikan Cukai Barang dan Perkhidmatan (GST) menggantikan Cukai Jualan dan Perkhidmatan (SST) sedia ada serta adakah Kerajaan bercadang untuk menambah hasil pendapatan negara melalui percukaian.

JAWAPAN

Tuan Yang di-Pertua,

Untuk makluman Ahli Yang Berhormat, pada masa ini, Kerajaan belum bercadang untuk memperkenalkan semula Cukai Barang dan Perkhidmatan (GST).

Pada masa ini, rakyat sedang dalam fasa pemulihan pasca krisis COVID-19 serta menghadapi cabaran kos sara hidup. Inflasi makanan tahun 2022 pada kadar 5.8 peratus dan ini lebih menjejaskan golongan yang berpendapatan rendah. Pada masa yang sama, GST juga merupakan cukai yang bersifat regresif.

Dengan itu, cadangan untuk memperkenalkan GST hanya dapat dipertimbangkan setelah pemulihan dan pertumbuhan ekonomi berada di landasan yang lebih kukuh serta setelah ditentukan bagaimana dapat

menambahbaik mekanisme GST berbanding dengan sebelum ini supaya mengurangkan impak kepada golongan berpendapatan rendah.

Sebarang perubahan polisi berkaitan cukai akan mengambil kira kesan terhadap ekonomi dan kos sara hidup rakyat. Sehubungan itu, Kerajaan sentiasa mengawasi kedudukan ekonomi semasa dan mempertimbangkan langkah-langkah fiskal yang bersesuaian dengan keperluan jangka pendek dan sederhana.

Dalam Belanjawan 2023, Kerajaan telah mengambil pendekatan lebih progresif sebagai langkah baharu meluaskan asas cukai kepada mereka yang punyai kemampuan. Ini termasuk :-

- i. meningkatkan cukai pendapatan bagi individu bagi mereka dengan pendapatan bercukai melebihi RM230,000 setahun; dan
- ii. pengumuman cadangan Cukai Barangan Mewah dan Cukai Keuntungan modal ke atas jualan saham tidak tersenarai

Kerajaan akan terus mengadakan libat urus dengan semua pihak berkepentingan bagi mengkaji aspek pembaharuan sistem percukaian. Tidak semestinya ianya melibatkan GST kerana terdapat juga ruang untuk menambahbaik SST sedia ada.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

DARIPADA : PUAN HAJAH SALAMIAH BINTI MOHD NOR [TEMERLOH]

SOALAN

PUAN HAJAH SALAMIAH BINTI MOHD NOR [TEMERLOH] minta **MENTERI PERLADANGAN DAN KOMODITI** menyatakan adakah Kementerian bercadang menaikkan kadar Insentif Pengeluaran Getah (IPG) dari kadar RM2.50 sekilogram ke paras yang lebih tinggi serta nyatakan impak yang diterima terhadap pekebun kecil hasil daripada Skim Insentif Pengeluaran Getah (SIPG) oleh Kerajaan sebelum ini.

JAWAPAN

Yang di-Pertua,

1. Berhubung cadangan untuk meningkatkan harga lantai getah sekerap ke paras yang lebih tinggi, Kementerian ini bersama agensi terlibat seperti Kementerian Kewangan, Kementerian Ekonomi, Kementerian Kemajuan Desa Dan Wilayah, Kementerian Industri Makanan, Komoditi Dan Pembangunan Wilayah Sarawak (MFICORD), Lembaga Getah Malaysia dan Lembaga Industri Getah Sabah (LIGS) telah mengkaji mekanisme penambahbaikan kadar IPG. Melalui pelaksanaan IPG, pekebun kecil akan menerima harga getah peringkat ladang (farm gate) (50% kandungan getah kering - KGK) sekurang-kurangnya pada harga RM2.50 sekilogram. Sebagai contoh, sekiranya kadar Insentif Pengeluaran Getah (IPG) dinaikkan sebanyak 50 sen sekilogram daripada RM2.50 pada masa ini, anggaran keperluan kewangan Kerajaan pada tahun 2023 diunjurkan sebanyak RM513 juta berdasarkan unjuran jumlah pengeluaran getah sebanyak 450,000 tan dengan harga purata tahunan SMR20 RM6.10/kg.

2. Berhubung impak yang diterima oleh pekebun kecil getah, IPG telah membantu pekebun kecil getah mengurangkan beban kehidupan mereka yang mana sehingga Disember 2022, Kerajaan telah membuat pembayaran sebanyak RM446 juta kepada 207,128 orang pekebun kecil getah di seluruh negara.

Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : PUAN HAJAH SALAMIAH BINTI MOHD NOR
[TEMERLOH]**

SOALAN

PUAN HAJAH SALAMIAH BINTI MOHD NOR [TEMERLOH] minta **MENTERI PENDIDIKAN** menyatakan apakah perancangan Kementerian bagi menguruskan kuarters guru yang tidak digunakan.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha menyediakan prasarana pendidikan termasuk kuarters guru yang selamat dan kondusif untuk diduduki.

KPM telah membuat perancangan dengan mengoptimumkan penggunaan kuarters guru yang kosong yang boleh diduduki dengan melaksanakan pelbagai pendekatan. Antara pendekatan tersebut adalah membuat penyewaan kepada agensi kerajaan dan swasta untuk pelbagai kegunaan.

Di samping itu, kerjasama dengan kementerian lain turut diadakan bagi membenarkan kakitangan daripada kementerian berkenaan untuk menduduki kuarters KPM.

Bagi kuarters guru yang tidak diduduki, KPM telah melantik perunding hartanah bagi menjalankan kajian mengoptimumkan penggunaan kuarters guru tidak berpenghuni milik KPM di seluruh negara. Skop kajian adalah merangkumi cadangan penyelesaian bagi mengoptimumkan kuarters kosong di seluruh negara. Kajian ini dijangka selesai pada akhir April 2023.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN SANISVARA NETHAJI RAYER A/L
RAJAJI [JELUTONG]**

SOALAN

Tuan Sanisvara Nethaji Rayer A/L Rajaji [Jelutong] minta **MENTERI
DALAM NEGERI** menyatakan perkembangan dan keputusan siasatan
polis dalam kes kehilangan Pastor Raymond Koh dan Ustaz Amri Che Mat.

JAWAPAN

Tuan Yang Di Pertua,

Siasatan PDRM di dalam kes Pastor Raymond dan Amri Che Mat masih
berjalan sehingga terdapat perkembangan lanjut. Sehubungan itu, saya
tidak berhasrat untuk mengulas lebih lanjut berhubung kes ini bagi
mengelakkan ianya mengganggu siasatan.

Untuk makluman Yang Berhormat juga, tarikh bicara kes sivil Amri Che Mat
telah ditetapkan pada 19 sehingga 22 Jun 2023 manakala tarikh bicara kes
sivil Pastor Raymond telah ditetapkan pada 6 sehingga 8 Jun 2023.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN SANISVARA NETHAJI RAYER A/L
RAJAJI [JELUTONG]**

SOALAN

Tuan Sanisvara Nethaji Rayer A/L Rajaji [Jelutong] minta **MENTERI DALAM NEGERI** menyatakan sebabnya seorang wartawan Pakistan bernama Syed Fawad Ali Shah diusir keluar dari Malaysia walaupun kehadiran beliau di sini secara berterusan tidak mendatangkan apa-apa ancaman kepada keharmonian dan ketenteraman kaum.

JAWAPAN

Tuan Yang Di-Pertua,

Untuk makluman Ahli Yang Berhormat, kemasukan dan keberadaan warga asing di Malaysia adalah tertakluk kepada dasar, peraturan dan perundangan yang berkuat kuasa. Hal ini termasuklah keperluan untuk memiliki dokumen perjalanan yang sah, mematuhi tempoh keberadaan yang dibenarkan serta pematuhan kepada syarat-syarat pas yang dikeluarkan. Kementerian Dalam Negeri (KDN) memandang serius berkaitan masalah Pendatang Asing Tanpa Izin (PATI) di negara ini yang memerlukan strategi pambanterasan secara berterusan.

Sabjek yang merupakan warganegara Pakistan telah ditangkap kerana melakukan kesalahan di bawah seksyen 6(1)(c) Akta Imigresen 1959/63 yang memperuntukkan bahawa tiada sesiapa pun selain daripada seseorang warganegara yang boleh memasuki Malaysia melainkan ia memiliki suatu pas yang sah yang dikeluarkan dengan sah kepadanya bagi memasuki Malaysia. Subjek telah diusir pulang ke negara asal pada 25 Ogos 2022 melalui Lapangan Terbang Kuala Lumpur.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN SANISVARA NETHAJI RAYER A/L
RAJAJI (JELUTONG)**

SOALAN

TUAN SANISVARA NETHAJI RAYER A/L RAJAJI [JELUTONG] minta **MENTERI KERJA RAYA** menyatakan sama ada Kerajaan Perpaduan akan melaksanakan apa-apa projek pelebaran jalan ataupun elevated highway di sepanjang jalan besar di Jelutong bermula dari Bukit Dumar sehingga Jalan Sungai Pinang untuk mengatasi kesesakan lalu lintas yang teruk semasa waktu puncak di Jelutong.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian ini tiada perancangan untuk projek pelebaran jalan ataupun *elevated highway* di sepanjang jalan besar di Jelutong bermula dari Bukit Dumbar sehingga Jalan Sungai Pinang pada masa ini. Walau bagaimanapun, Kementerian ini akan meneliti sekiranya cadangan projek ini dimohon dalam *Rolling Plan* RMKe-12 yang akan datang dan akan dipertimbangkan untuk diangkat kepada Agensi Pusat untuk kelulusan, tertakluk kepada kedudukan keutamaan projek dan ketersediaan agihan peruntukan pembangunan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN SANISVARA NETHAJI RAYER AL
RAJAJI [JELUTONG]**

SOALAN

TUAN SANISVARA NETHAJI RAYER AL RAJAJI [JELUTONG] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan bilakah projek tebatan banjir Sungai Pinang di Jelutong yang tertangguh sekian lama dijangka mula dilaksanakan.

JAWAPAN

Tuan Yang Di-Pertua,

Projek Rancangan Tebatan Banjir Lembangan Sungai Pinang, Pulau Pinang telah diluluskan dibawah Program Touch-Point Kepada Rakyat pada 3 Mac 2023 dan dijangka akan dikeluarkan Surat Setuju Terima (SST) pada tahun 2023.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN SANISVARA NETHAJI RAYER A/L
RAJAJI [JELUTONG]**

SOALAN

YB TUAN SANISVARA NETHAJI RAYER A/L RAJAJI [JELUTONG]
minta **MENTERI PEMBANGUNAN KERAJAAN TEMPATAN**
menyatakan adakah Kerajaan Perpaduan hari ini berhasrat untuk
membina lebih banyak rumah mampu milik supaya lebih ramai golongan
B40 dapat memiliki mahligai sendiri di Pulau Pinang.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan komited untuk meneruskan inisiatif penyediaan Rumah Mampu Milik (RMM) yang berdaya huni dan berkualiti di bawah Rancangan Malaysia Kedua Belas (RMKe-12) dengan sasaran penyediaan sebanyak 500,000 unit RMM di seluruh negara. Dalam hal ini, Kementerian Pembangunan Kerajaan Tempatan (KPKT) telah dipertanggungjawabkan sebagai penyelaras bagi penyediaan dan pelaporan RMM yang akan dilaksanakan oleh agensi penyedia perumahan di peringkat Kerajaan Persekutuan, kerajaan negeri dan pemaju swasta. Sehingga 31 Disember 2022, sebanyak 538,731 unit RMM disasarkan pelaksanaannya di seluruh negara. Daripada jumlah tersebut, sebanyak 108,373 unit telah siap dibina, 131,573 dalam pembinaan, manakala baki sebanyak 298,785 unit dalam perancangan. Bagi pelaksanaan 500,000 unit dalam tempoh RMKe-12 ini, Kerajaan Negeri Pulau Pinang telah menyasarkan penyediaan 19,493 unit RMM bagi memenuhi keperluan penduduk setempat.

Untuk makluman Ahli Yang Berhormat, melalui Belanjawan MADANI 2023, projek Program Perumahan Rakyat (PPR) baharu dan sambungan diperuntukkan RM389.5 juta yang bakal memanfaatkan 12,400 bakal penghuni baharu. Selain PPR, Syarikat Perumahan Negara Berhad (SPNB) menawarkan dua (2) program RMM bagi golongan B40 dan M40 di seluruh negara iaitu Program Rumah Mesra Rakyat (RMR) dan Program Kediaman SPNB. RMR adalah program untuk memenuhi keperluan rakyat berpendapatan rendah dengan pendapatan bulanan isi rumah RM5,000 ke bawah untuk membina rumah di atas tanah sendiri atau tanah milik ahli keluarga yang diberi kebenaran berdasarkan syarat-syarat yang ditetapkan dan terbuka kepada semua warganegara Malaysia tanpa mengira kaum.

Sehingga kini, sebanyak 55,055 unit RMR telah siap dibina, 4,181 unit sedang dalam pembinaan dan 657 unit telah diluluskan untuk

pembinaan di seluruh negara. Bagi negeri Pulau Pinang, sebanyak 526 unit telah siap dibina dan 66 unit dalam pembinaan. Bagi tahun 2023, sebanyak 15 unit lagi akan dilaksanakan di negeri Pulau Pinang.

Program Kediaman SPNB pula adalah projek pembangunan perumahan bercampur di atas tanah kerajaan/agensi Persekutuan/negeri dan swasta yang terbuka kepada semua golongan terutamanya kepada M40 dengan kebanyakan harga jualan tidak melebihi RM300,000. Setakat ini, sejumlah 28,472 unit Kediaman SPNB telah siap dibina, 362 unit dalam pembinaan dan 1,492 unit dalam perancangan di seluruh negara. Bagi negeri Pulau Pinang, sebanyak 404 unit Kediaman SPNB telah siap dibina.

Untuk makluman Ahli Yang Berhormat seterusnya, Perbadanan PR1MA Malaysia (PR1MA) menyediakan kediaman mampu milik untuk golongan M40 dan mempunyai sebanyak dua (2) projek di negeri Pulau Pinang dengan jumlah unit sebanyak 3,867. Satu (1) projek dengan 1,017 unit telah siap dibina terletak di Permatang Pauh dan satu (1) projek dengan 2,850 unit sedang dalam pembinaan terletak di Timur Laut.

Buat masa ini, fokus PR1MA adalah untuk menyiapkan projek-projek sedia ada dan masih belum mempunyai perancangan untuk memulakan sebarang projek baharu di negeri Pulau Pinang. Namun begitu, PR1MA sentiasa bersedia untuk bekerjasama dengan kerajaan negeri dan agensi swasta dalam menyediakan perumahan berkualiti yang mampu dimiliki oleh rakyat Pulau Pinang.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPAD : DATUK SH MOHMED PUZI BIN SH ALI
[PEKAN]**

SOALAN

DATUK SH MOHMED PUZI BIN SH ALI [PEKAN] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan statistik aduan yang diterima berkenaan kawasan berisiko tinggi tanah runtuh seluruh negara dan nyatakan lokasi panas terkini yang dikategorikan sebagai kawasan potensi berlakunya ancaman tanah runtuh. Sejauh manakah kesiapsiagaan dan kerjasama agensi di bawah Kementerian dan Kementerian lain yang berkaitan dalam mengkaji aspek keselamatan di lokasi panas ini. Apakah bentuk pemulihan dan penambahbaikan di kawasan terjejas.

JAWAPAN

1. Berdasarkan rekod tanah runtuh yang diterima oleh Jabatan Mineral dan Geosains (JMG) sepanjang Fasa Peralihan Monsun dan Monsun Timur Laut (MTL) dari 19 September 2022 hingga 7 Februari 2023), terdapat 95 kejadian tanah runtuh yang direkodkan di seluruh negara (tidak termasuk kawasan jalan di bawah Jabatan Kerja Raya (JKR) dan lebuh raya di bawah konsesi). Negeri Sabah mencatatkan jumlah tertinggi iaitu sebanyak 27 kejadian tanah runtuh diikuti Sarawak (17), Selangor (14), Pahang (13), Terengganu dan Negeri Sembilan (6), Perak (5), Johor (3) serta Kelantan dan Melaka (2).

2. JMG telah mengenal pasti sebanyak 31 lokasi panas (*hotspot*) tanah runtuh di seluruh negara. Antara kawasan-kawasan *hotspot* yang terdedah kepada ancaman tanah runtuh dan sentiasa dipantau adalah di Pahang (Cameron Highlands, Bukit Fraser), Selangor (Bukit Antarabangsa-Hulu Langat, Kuala Kubu Bharu), Kedah (Gunung Jerai, Baling), Pulau Pinang (Tanjung Bungah, Paya Terubong), Negeri Sembilan (Genting Peras, Jalan Seremban–Simpang Pertang), Perak (Ipoh, Kledang), Terengganu (Aring-Kuala Berang-Kenyir), Kelantan (Lojing Gua Musang), Johor (Gunung Pulai), Sarawak (Miri, Kapit, Bau) dan Sabah (Kota Kinabalu, Kundasang, Sandakan).

3. Sebagai langkah kesiapsiagaan dan kerjasama agensi di bawah Kementerian dan Kementerian lain yang berkaitan, tindakan berikut telah dijalankan oleh JMG iaitu:

- i. Penilaian Bencana Geologi Tanah Runtuh melalui Projek Penghasilan Peta Bahaya dan Risiko Cerun di lima (5) kawasan *hotspot* seluas 1,850km persegi iaitu di sekitar Cameron Highlands, Pahang, Ipoh, Perak, Hulu Langat, Selangor, Kundasang, Sabah dan Kota Kinabalu, Sabah. Hasil projek ini diintegrasikan ke dalam Pangkalan Data Sistem Maklumat Geospasial Terain dan Cerun Negara (NATSIS) yang mana sistem ini telah digunapakai oleh Pihak Berkuasa Tempatan (PBT) dan Agensi Perancang dan Teknikal yang berkepentingan sebagai input penting dalam

perancangan pembangunan dan kawalan guna tanah terutamanya bagi kawasan bercerun di kawasan tanah tinggi dan lereng bukit.

- ii. Pemantauan di 254 Cerun Kritikal seluruh negara (selain cerun di bawah JKR dan konsesi lebuh raya) dan laporan tersebut disebarluaskan kepada PBT terlibat dan Agensi/Jabatan Teknikal berkepentingan bagi membantu dalam penyelenggaraan dan mitigasi cerun. Maklumat cerun kritikal juga dikongsi kepada Agensi Responder sebagai persediaan menghadapi bencana geologi.
- iii. Pembangunan Sistem Amaran Awal (EWS) Bencana Geologi Tanah Runtuh dan Tolok Hujan di Gunung Jerai, Yan, Kg. Dumpiring Atas, Kundasang dan Lata Bukit Hijau, Baling termasuk lapan (8) Taman Eko Rimba bagi meningkatkan kesiapsiagaan komuniti setempat dalam mendepani bencana geologi. Pelaksanaan EWS ini adalah berteraskan komuniti yang melibatkan segenap penglibatan Jawatankuasa Pengurusan Bencana (JPB) Daerah dan Negeri, PBT dan pemimpin tempatan dan komuniti setempat bagi memastikan pelaksanaannya lebih inklusif dan berkesan.
- iv. Program pemeraksanaan komuniti berkonsepkan pengurusan risiko bencana geologi berasaskan komuniti (CBDRM) telah dilaksanakan di 14 lokasi hotspot tanah runtuh yang terletak di kawasan petempatan, Taman Eko Rimba dan Hutan Simpan di Negeri Kedah, Terengganu, Pahang, Sabah dan Negeri Sembilan. Program CBDRM ini telah disertai oleh lebih 600 peserta yang terdiri daripada pemimpin tempatan, komuniti dan usahawan ekopelancongan setempat bersama-sama agensi berkepentingan peringkat daerah dengan dianggarkan 200,000 penduduk sekitar mendapat manfaat kesan pelaksanaan program ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN LISAN

**DARIPADA : DATUK SH MOHMED PUZI BIN SH ALI
[PEKAN]**

SOALAN

DATUK SH MOHMED PUZI BIN SH ALI [PEKAN] minta **MENTERI PEMBANGUNAN WANITA, KELUARGA DAN MASYARAKAT** menyatakan statistik terkini taman asuhan kanak-kanak (TASKA) dan pusat jagaan yang berdaftar dengan Kementerian. Nyatakan juga statistik TASKA yang dikenakan tindakan kerana beroperasi tanpa lesen dan apakah bentuk pemantauan dan penguatkuasaan yang dilakukan dalam mengenal pasti TASKA yang beroperasi tanpa lesen.

JAWAPAN

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat Malaysia (JKM) yang diberi tanggungjawab untuk menguatkuasakan Akta Taman Asuhan Kanak-Kanak 1984 [*Akta 308*] dan Akta Pusat Jagaan 1993 [*Akta 506*]. KPWKM sentiasa memandang serius berkaitan isu-isu melibatkan kes berkaitan kecuiaan, pengabaian dan penderaaan kanak-kanak dan penghuni yang berlaku di Taman Asuhan Kanak-Kanak (TASKA) dan Pusat Jagaan.

Sehingga tahun 2022 sebanyak 1,933 pusat jagaan telah berdaftar dengan Jabatan Kebajikan Masyarakat di bawah Akta Pusat Jagaan 1993. Daripada jumlah tersebut sebanyak 1,248 adalah merupakan Pusat Jagaan Kanak-Kanak.

Manakala bagi TASKA sebanyak 3,061 buah TASKA berdaftar di bawah Akta Taman Asuhan Kanak-Kanak 1984 merangkumi TASKA Institusi, TASKA Tempat Kerja, TASKA Komuniti dan TASKA Di Rumah.

Terdapat tiga tindakan penguatkuasaan yang boleh diambil ke atas TASKA dan Pusat Jagaan tidak berdaftar iaitu Lak, Kompaun dan Dakwa.

Sepanjang tahun 2020 hingga 2022 sebanyak empat (4) TASKA tidak berdaftar telah dikenakan tindakan Lak, lapan (8) tindakan kompaun dan dua (2) tindakan pendakwaan. Jumlah keseluruhan tindakan ke atas TASKA tidak berdaftar daripada tahun 2020 hingga 2022 adalah sebanyak 14 tindakan.

Manakala bagi pusat jagaan tidak berdaftar sepanjang tahun 2020 hingga 2022 sebanyak 12 pusat Jagaan tidak berdaftar dikenakan tindakan Lak, sembilan (9) tindakan kompaun dan satu (1) tindakan pendakwaan. Jumlah keseluruhan tindakan ke atas pusat jagaan tidak berdaftar daripada tahun 2020 hingga 2022 adalah sebanyak 22 tindakan.

Berikut adalah usaha-usaha yang telah dilaksanakan oleh pihak kementerian bagi mengenalpasti TASKA dan Pusat Jagaan tidak berdaftar :

- i. Pemeriksaan mengejut dilaksanakan oleh Pegawai Diberikuasa TASKA atau Pusat Jagaan ke atas aduan atau laporan yang diperolehi daripada agensi kerajaan, orang awam atau masyarakat setempat;
- ii. Memperkasakan tindakan penguatkuasaan ke atas Pusat Jagaan yang melanggar Akta dan peraturan-peraturan di bawahnya;
- iii. Tindakan Pemutihan TASKA dan Pusat Jagaan tidak berdaftar seluruh negeri; dan
- iii. Program kesedaran masyarakat sentiasa diadakan agar menjadi mata dan telinga Jabatan bagi melaporkan kejadian-kejadian yang disyaki melanggar Akta dan peraturan-peraturan yang ditetapkan.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK SH MOHMED PUZI BIN SH ALI
[PEKAN]**

SOALAN

DATUK SH MOHMED PUZI BIN SH ALI [PEKAN] minta **MENTERI PENGANGKUTAN** menyatakan apakah statistik aduan pengguna mengenai kegagalan syarikat penerbangan untuk beroperasi mengikut jadual seperti penukaran penerbangan saat akhir dan penundaan tarikh. Apakah bentuk penambahbaikan yang boleh dilaksanakan yang memihak kepada pengguna apabila operasi syarikat penerbangan diubah sehingga menjejaskan serta merugikan penumpang. Adakah Kementerian mempunyai cadangan untuk melaksanakan garis panduan tertentu yang wajib dipatuhi oleh syarikat penerbangan sekiranya gagal beroperasi seperti jadual ditetapkan.

JAWAPAN

Tuan Yang di-Pertua,

1. Untuk makluman Yang Berhormat Pekan, Suruhanjaya Penerbangan Malaysia (MAVCOM) telah mencatatkan sebanyak 1,418 aduan berhubung penundaan penerbangan, pembatalan penerbangan dan penukaran tarikh penerbangan bagi tempoh Januari 2022 sehingga Januari 2023.
2. Sebagai sebuah Kerajaan yang berteraskan Malaysia Madani, Kementerian Pengangkutan memandang serius akan hak-hak pengguna syarikat penerbangan agar sentiasa dipelihara dan dilindungi melalui Kod Perlindungan Pengguna Penerbangan Malaysia 2016 (*Malaysian Aviation Consumer Protection Code 2016*, MACPC).
3. MACPC telah memperuntukkan tanggungjawab syarikat penerbangan terhadap pengguna. Kod ini bertujuan untuk melindungi hak dan kepentingan pengguna dengan memastikan semua aduan terhadap syarikat-syarikat penerbangan diambil tindakan dan diselesaikan.
4. Syarikat penerbangan yang menunda penerbangan atas faktor di bawah kawalan syarikat penerbangan seperti masalah operasi, komersial atau teknikal adalah tertakluk untuk menawarkan pampasan dan penjagaan kepada penumpang sepertimana yang diperuntukkan di dalam MACPC.
5. Syarikat penerbangan yang membatalkan penerbangan atas faktor di bawah kawalan syarikat penerbangan seperti teknikal atau kapasiti penumpang yang tidak memuaskan menyebabkan penerbangan tersebut dilewatkan atau dibatalkan adalah tertakluk untuk menawarkan pembayaran ganti dalam masa 30 hari atau perubahan laluan sepertimana yang diperuntukkan di dalam MACPC.
6. Sekiranya syarikat penerbangan gagal mematuhi MACPC, MAVCOM boleh mengenakan penalti kewangan sebanyak amaun yang

tidak melebihi RM200,000, dan ketidakpatuhan kedua atau berikutnya, amaun sepuluh kali daripada penalti kewangan yang dikenakan bagi ketidakpatuhan yang pertama. Dari tahun 2018 sehingga Januari 2023, MAVCOM telah mengenakan penalti sebanyak RM4.72 juta ke atas kegagalan syarikat penerbangan dalam mematuhi pelbagai kesalahan di bawah MACPC.

7. Di samping itu, bagi memastikan syarikat penerbangan mematuhi jadual-jadual penerbangan yang telah ditetapkan, pihak MAVCOM sedang mempertimbangkan cadangan untuk mengenakan penalti kewangan kepada syarikat penerbangan atau tindakan-tindakan lain yang bersesuaian dengan syarat-syarat lesen/permit yang ditetapkan. Cadangan ini boleh dilaksanakan dengan perubahan atau tambahan kepada syarat lesen/permit sedia ada. Tindakan tegas seperti ini boleh diambil bagi memastikan kejadian pembatalan/ penjadualan semula penerbangan tidak lagi berulang.

8. Selain itu, MAVCOM pada masa ini sedang mengkaji beberapa penambahbaikan ke atas MACPC termasuk cadangan agar syarikat penerbangan menawarkan pembayaran balik (*refund*) dalam cara bayaran balik asal (*orginal mode*) kepada penumpang bagi pembatalan penerbangan. Cadangan ini juga termasuk bagi pembatalan penerbangan dalam 'hal keadaan luar biasa', iaitu sesuatu keadaan di luar kawalan syarikat penerbangan itu.

9. Sebagai sebahagian daripada usaha berterusan untuk meningkatkan kod perlindungan pengguna, MAVCOM kini dalam proses penambahbaikan MACPC berdasarkan maklum balas pengguna dan juga pengajaran-pengajaran penting yang berlaku semasa pandemik COVID-19. Penambahbaikan itu termasuk peningkatan perlindungan pengguna dalam kes-kes yang tidak pernah berlaku sebelum tempoh pandemik ini. MAVCOM menganggarkan proses penambahbaikan tersebut akan selesai pada suku kedua 2023.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATUK SH MOHMED PUZI BIN SH ALI
[PEKAN]**

SOALAN

YB DATUK SH MOHMED PUZI BIN SH ALI [PEKAN] minta **MENTERI PEMBANGUNAN KERAJAAN TEMPATAN** menyatakan statistik aduan yang diterima berkenaan syarikat kredit komuniti yang berdaftar dengan Kementerian namun beroperasi seperti pemberi pinjaman wang haram atau ahlong dan jumlah syarikat yang telah dikenakan tindakan. Apakah bentuk kawal selia yang dilaksanakan oleh Kementerian dalam memastikan pengoperasian syarikat ini dilakukan mengikut standard yang ditetapkan dan tidak menyeleweng.

JAWAPAN

Tuan Yang di-Pertua,

Untuk makluman Ahli Yang Berhormat, dalam tempoh dua (2) tahun terakhir sehingga bulan Mac 2023, terdapat dua (2) kes syarikat Kredit Komuniti yang didapati mengenakan kadar faedah yang lebih tinggi daripada kadar faedah yang ditetapkan berdasarkan Subseksyen 17A (1) Akta Pemberi Pinjam Wang 1951 (Akta 400) iaitu melebihi 12% setahun (1.0% sebulan) bagi pinjaman dengan cagaran atau melebihi 18% setahun (1.5% sebulan) bagi pinjaman tanpa cagaran. Salah satu kes tersebut telah selesai tindakan pertuduhan berdasarkan rekod tahun 2022 manakala kes kedua yang diterima aduan pada bulan Februari 2023 masih dalam peringkat siasatan.

Berdasarkan aduan yang diterima, syarikat yang telah selesai tindakan pertuduhan didapati telah melanggar kadar faedah yang ditetapkan bagi pinjaman tidak bercagar sepertimana yang dinyatakan dalam Seksyen 17A Akta 400 serta telah melanggar peruntukan berkenaan catatan palsu atau mengelirukan dalam Seksyen 29A (1) (c). Bagi kes ini, syarikat tersebut telah mengaku bersalah dan dikehendaki membayar denda sebanyak RM5,000.00 bagi setiap kesalahan tersebut.

Kementerian ini sentiasa komited dalam memastikan segala urusan niaga pemberian pinjaman wang yang dijalankan oleh Syarikat Kredit Komuniti (SKK) berlesen adalah teratur dan selaras dengan peruntukan Akta 400 serta Peraturan-peraturan berkaitan. Bagi tujuan tersebut, Kementerian Pembangunan Kerajaan Tempatan (KPKT) melalui Bahagian Kawalan Kredit Komuniti (BKK) sentiasa melaksanakan siasatan dan pemantauan berkala ke atas premis SKK dengan bantuan pegawai polis kader yang ditempatkan khas di BKK. Bagi tahun 2022, Kementerian telah melaksanakan 862 pemantauan premis SKK dan telah merekodkan bilangan kompaun sebanyak 245 ke atas syarikat-syarikat yang melakukan kesalahan.

Selain itu, Kementerian juga menjalankan kerjasama dengan agensi-agensi pemantauan yang lain seperti Jabatan Siasatan Jenayah

Komersil (JSJK), Polis Diraja Malaysia (PDRM) di Bukit Aman, Bank Negara Malaysia (BNM), Lembaga Hasil Dalam Negeri (LHDN) serta Suruhanjaya Pencegahan Rasuah Malaysia (SPRM). Dengan adanya inisiatif ini, perkongsian maklumat dapat dilaksanakan secara efisien dan ianya membantu Kementerian dalam melaksanakan siasatan ke atas syarikat bagi membanteras kegiatan seperti *fraud*, pengubahan wang haram dan sebagainya.

Selaras dengan hasrat pelaksanaan pemantauan secara efisien, Kementerian telah mewajibkan SKK untuk menghantar penyata transaksi melalui sistem *Integrated Data Electronic Pawn and Lending* mulai 28 September 2022. Dengan adanya rekod transaksi secara digital, maklumat transaksi dapat dijana dengan cepat bagi membantu pihak penyiasatan dalam sebarang kes serta semakan aduan. Sekiranya mana-mana SKK didapati melakukan kesalahan di bawah Akta 400 dan Peraturan-Peraturan berkaitan, syarikat tersebut akan dikenakan tindakan di bawah Kementerian.

Bagi memastikan orang awam tidak terpengaruh untuk mendapatkan pinjaman daripada pemberi pinjam wang tidak berlesen atau Ah Long, orang awam disarankan untuk berhubung dengan KPKT bagi memastikan mereka tidak terjerat dengan kegiatan Ah Long. Sebarang kemusykilan berkenaan aktiviti pemberian pinjam wang berlesen, boleh disalurkan terus kepada pihak Kementerian melalui Sistem Aduan Bersepadu KPKT iaitu di pautan aduan.kpkt.gov.my.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATUK SH MOHMED PUZI BIN SH ALI
[PEKAN]**

SOALAN

DATUK SH MOHMED PUZI BIN SH ALI [PEKAN] minta **MENTERI LUAR NEGERI** menyatakan statistik rasmi terkini warganegara Malaysia yang menjadi mangsa sindiket-sindiket jenayah penipuan tawaran pekerjaan di negara asing seperti Thailand, Laos, Myanmar, dan Kemboja. Nyatakan juga kos yang telah digunakan bagi membiayai perbelanjaan membawa mangsa-mangsa ini pulang semula ke Malaysia.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Pekan atas pertanyaan yang dikemukakan.

2. Untuk makluman Yang Berhormat, sehingga 13 Februari 2023, KLN melalui Kedutaan-Kedutaan Besar Malaysia di Bangkok, Phnom Penh, Vientiane dan Yangon telah menerima sejumlah 564 laporan mengenai warganegara Malaysia yang menjadi mangsa sindiket jenayah penipuan tawaran pekerjaan di luar negara. Daripada jumlah tersebut, seramai 401 orang telah berjaya diselamatkan, dengan 377 orang daripada mereka telah dihantar pulang. Baki seramai 24 orang yang lain sedang ditahan di depoh tahanan sementara menunggu proses pengusiran pulang, manakala 163 orang lagi masih sedang dikesan.

3. Negara yang mempunyai bilangan kes paling ramai dilaporkan adalah Kemboja dengan 277 kes. Ini diikuti dengan Myanmar 135 kes, Laos 92 kes dan Thailand 60 kes. Daripada jumlah tersebut, bilangan mangsa yang telah diselamatkan di Kemboja adalah seramai 247 orang, 37 orang di Myanmar, 68 orang di Laos dan 49 orang di Thailand. Bagi yang masih belum dikesan, terdapat 98 orang di Myanmar, 24 orang di Laos, 11 orang di Thailand dan 30 orang di Kemboja.4. Untuk makluman Yang Berhormat, Kementerian ini tidak mempunyai rekod untuk kos membiayai perbelanjaan membawa mangsa-mangsa berkenaan pulang semula ke Malaysia. Ini kerana urusan tersebut adalah atas tanggungan persendirian, sama ada oleh individu tersebut mahupun pihak keluarga atau badan-badan persendirian/bukan kerajaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

SOALAN

TUAN SHAHARIZUKIRNAIN BIN ABD. KADIR [SETIU] minta **MENTERI PENDIDIKAN** menyatakan sama ada murid tahap satu sekolah rendah 2023 bakal menggunakan silibus baharu menggantikan silibus sedia ada.

JAWAPAN

Tuan Yang di-Pertua,

Untuk makluman Ahli Yang Berhormat, KPM masih mengekalkan kurikulum sedia ada pada tahun ini bagi semua peringkat persekolahan. KPM telah melaksanakan kajian dan libat urus bersama-sama pihak berkepentingan pada tahun 2022 dan dapatan menunjukkan bahawa kurikulum sedia ada masih relevan untuk digunakan dan memenuhi tuntutan semasa.

Dalam konteks penggubalan kurikulum, KPM sedang melaksanakan semakan semula kurikulum selepas kitaran kurikulum lengkap pusingannya penghasilan sesuatu kurikulum persekolahan memerlukan masa dan dilaksanakan dengan mematuhi prinsip dan prosedur yang telah ditetapkan. Prinsip pembangunan kurikulum yang diguna pakai oleh KPM bercorak kitaran yang mengandungi enam proses iaitu analisis keperluan, perancangan, pembangunan dan pengembangan, uji rintis/pelaksanaan terhad, penyebaran dan pelaksanaan, pengesanan dan penilaian.

KPM sedang merancang untuk menyediakan kurikulum baharu yang bersesuaian dengan keperluan masa hadapan berdasarkan analisis dapatan daripada kajian keperluan dan sesi libat urus.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN SHAHARIZUKIRNAIN BIN ABD.
KADIR [SETIU]**

SOALAN

TUAN SHAHARIZUKIRNAIN BIN ABD. KADIR [SETIU] minta **MENTERI PENDIDIKAN** menyatakan sejauh mana penggunaan lokar dalam kelas mampu menyelesaikan isu beg sekolah yang berat untuk tempoh jangka panjang.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk mencari jalan penyelesaian yang terbaik dalam menangani isu beg berat murid. Usaha ini masih diteruskan demi kesejahteraan murid untuk ke sekolah.

Untuk tujuan tersebut, KPM telah melaksanakan penambahbaikan inisiatif bagi menangani isu beg berat secara holistik termasuk menyediakan lokar untuk sekolah rendah secara berfasa. Pembekalan lokar fasa 1 berfokus kepada murid Tahun 1 dan Tahun 2 di sekolah rendah yang beroperasi secara dua sesi. Keseluruhan bilangan lokar yang dibekalkan dalam fasa 1 adalah sebanyak 249,646 unit dengan melibatkan peruntukan sebanyak 37.3 juta. Perancangan penyediaan lokar Fasa 2 tahun 2023 diperluas kepada semua murid Tahap 1 termasuk Tahun 3 di sekolah rendah yang beroperasi secara dua sesi. Bagi sekolah satu sesi pula, murid akan menyimpan buku di dalam laci meja di bilik darjah masing-masing.

KPM amat yakin bahawa penyediaan lokar akan dapat memberi kesan yang positif dalam tempoh jangka panjang bagi menangani isu tersebut. Dengan adanya lokar, murid-murid boleh menyimpan buku teks, pakaian kokurikulum dan alat tulis di dalam lokar masing-masing. Barangan tersebut tidak perlu dibawa secara berulang alik ke rumah pada setiap hari. Perkara ini akan dapat membantu meringankan beg murid serta mengurangkan risiko sakit tulang belakang yang sering kali menjadi kebimbangan para ibu bapa. Selain itu, proses pengajaran dan pembelajaran (PdP) bagi murid juga akan dapat berjalan secara lebih berkesan, dengan tiada lagi isu mengenai murid sering tidak membawa buku teks atau peralatan yang diperlukan ke sekolah dan murid membawa semua buku teks dan buku tulis pada setiap hari.

Penyediaan lokar juga dapat menjamin keselamatan barangan dan peralatan murid. Jadual harian murid yang pada kebiasaannya melibatkan aktiviti kurikulum dan kokurikulum menyebabkan murid cenderung untuk meninggalkan beg atau barangan mereka sama ada di dalam kelas atau ruang tertentu di sekitar sekolah tanpa pengawasan atau sebarang jaminan keselamatan. Dengan penyediaan lokar untuk

SOALAN NO : 486

murid juga akan dapat mengurangi kebimbangan dalam kalangan murid serta ibu bapa tentang berlaku masalah kehilangan atau kecurian barangan. Selain itu, penyediaan lokar turut dapat mendidik murid agar lebih berdisiplin serta bertanggungjawab dalam urusan menjaga peralatan milik masing-masing.

KPM yakin pendekatan yang dilaksanakan ini dapat menangani isu beg berat murid di sekolah secara berterusan.

Sekian, terima kasih.

RT50

**PEMBERITAHUAN PERTANYAAN BUKANBERTULIS DEWAN
RAKYAT MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN BERTULIS (BERTULIS)

**DARIPADA : TUAN SHAHARIZUKIRNAIN BIN ABD. KADIR
[SETIU]**

SOALAN

TUAN SHAHARIZUKIRNAIN BIN ABD. KADIR [Setiu] minta **MENTERI PERDAGANGAN DALAM NEGERI DAN KOS SARA HIDUP** menyatakan inisiatif Kementerian untuk mengawal harga bahan bakeri yang semakin meningkat sehingga menjejaskan usahawan kecil dalam bidang tersebut.

JAWAPAN:

Yang di-Pertua,

Kenaikan harga adalah bersifat global dan kesannya dirasai di seluruh negara kerana sumber bahan bakeri seperti tepung gandum, produk tenusu, keju, minyak sawit hiliran seperti minyak masak, marjerin, *shortening*, bahan pengawet, pewarna dan perasa serta bahan-bahan pembungkusan dan pemprosesan makanan kebanyakannya adalah diimport.

Kerajaan memastikan peniaga mematuhi penandaan harga dipamer dengan jelas serta mengambil tindakan pencatutan jika berlaku kegiatan mengambil untung secara berlebihan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN(BERTULIS)

**DARIPADA : TUAN SHAHARIZUKIRNAIN BIN ABD
KADIR (SETIU)**

SOALAN

TUAN SHAHARIZUKIRNAIN BIN ABD KADIR (SETIU) minta **MENTERI PEMBANGUNAN USAHAWAN DAN KOPERASI** menyatakan inisiatif dan perancangan Kementerian untuk membantu usahawan dalam industri PMKS khususnya bagi mendepani cabaran ekonomi 2023.

JAWAPAN

Tuan Yang di-Pertua,

1. Kementerian Pembangunan Usahawan dan Koperasi (KUSKOP) komited dalam membantu sektor Perusahaan Mikro, Kecil dan Sederhana (PMKS) dalam menempuhi cabaran ekonomi pada tahun 2023 bagi menyokong dan memacu pemulihan, pertumbuhan dan kestabilan sektor keusahawanan negara serta mempertingkatkan daya tahan dan daya saing usahawan pasca pandemik.
2. Pada tahun 2023, Kementerian telah merancang sebanyak 185 program yang akan dilaksanakan oleh pelbagai agensi di bawah Kementerian meliputi program peningkatan kapasiti, latihan dan bimbingan, akses pembiayaan, akses pasaran dan adaptasi teknologi yang dijangka akan memanfaatkan 543,080 usahawan dan usahawan baru.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN LIMA BELAS TAHUN 2023**

PERTANYAAN : BUKAN LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

SOALAN

TUAN SHAHARIZUKIRNAIN BIN ABD. KADIR [SETIU] minta **MENTERI
PENDIDIKAN** menyatakan:

- (a) bilangan sekolah kurang murid seluruh negara bagi kategori sekolah rendah dan sekolah menengah; dan
- (b) apakah langkah Kementerian bagi menyelesaikan isu ini.

JAWAPAN

Tuan Yang di-Pertua,

Kementerian Pendidikan (KPM) mendefinisikan Sekolah Kurang Murid (SKM) sebagai sekolah yang berenrolmen 150 orang murid dan ke bawah. Data seperti pada 31 Januari 2023 menunjukkan terdapat 3,017 buah sekolah rendah yang mempunyai enrolmen 150 orang murid dan ke bawah yang menepati definisi SKM. Bilangan sekolah rendah ini tidak mengambil kira SK Pendidikan Khas, SK (Asli), Sekolah Model Khas, Sekolah Model Khas K9, dan Sekolah Agama Bantuan Kerajaan. Walau bagaimanapun definisi SKM ini tidak terpakai kepada sekolah menengah

KPM telah mengenalpasti antara isu yang dihadapi di SKM adalah kesukaran untuk melaksanakan aktiviti kurikulum dan kokurikulum disebabkan enrolmen yang terlalu rendah. Keadaan ini turut mempengaruhi interaksi sosial dan daya saing sesama rakan sebaya berbanding sekolah harian biasa.

Untuk makluman Ahli Yang Berhormat, KPM sedang melaksanakan beberapa strategi di bawah Pelan Hala Tuju SKM. Strategi tersebut ialah:

- i. pelaksanaan kelas bercantum dengan pengajaran dan pembelajaran pelbagai gred;
- ii. penggabungan SKM;
- iii. pemindahan atau penempatan semula SKM; dan
- iv. pengekalan SKM atas keperluan.

Strategi pelaksanaan kelas bercantum dengan pengajaran dan pembelajaran pelbagai gred dilaksanakan dengan melibatkan percantuman kelas Tahun 2 dengan Tahun 3 dan Tahun 4 dengan Tahun 5 di sekolah berenrolmen 30 murid dan ke bawah.

Strategi penggabungan sekolah pula dilaksanakan dengan menggabungkan dua atau lebih sekolah yang sama jenis dalam lingkungan 5 kilometer. Walau bagaimanapun, penggabungan SKM dalam kawasan penempatan yang sama ini tertakluk kepada persetujuan bertulis ibu bapa atau penjaga secara majoriti. Bagi SKM yang tidak boleh digabungkan atau

dipindahkan seperti SKM di kawasan pedalaman dan pulau, sekolah berkenaan akan dikekalkan demi memastikan kelangsungan pendidikan kepada murid yang tinggal di lokasi berkenaan.

Strategi pemindahan atau penempatan semula SKM ke lokasi baharu di kawasan yang mempunyai bilangan penduduk yang tinggi dilaksanakan bagi membantu untuk meningkatkan enrolmen SKM. Strategi ini dilaksanakan sekiranya SKM memenuhi kriteria seperti tapak baharu telah dikenal pasti dan persetujuan bertulis ibu bapa atau penjaga murid secara majoriti diperoleh.

KPM berkeyakinan bahawa menerusi strategi yang telah digariskan dan dilaksanakan di bawah Pelan Hala Tuju SKM tersebut, isu SKM akan dapat ditangani dan sumber pendidikan yang dibekalkan oleh KPM dapat dioptimumkan serta dapat dimanfaatkan oleh murid. KPM akan terus meneliti pendekatan terbaik bagi memastikan aspirasi sistem pendidikan berkaitan akses, ekuiti dan kualiti yang dilaksanakan di semua institusi pendidikan termasuklah di SKM dapat direalisasikan secara berkesan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : DATUK IR. SHAHELMEY BIN YAHYA
[PUTATAN]**

SOALAN

DATUK IR. SHAHELMEY BIN YAHYA [PUTATAN] minta **MENTERI KESIHATAN** menyatakan perancangan untuk membina fasiliti kesihatan di Pulau Gaya memandangkan tiada sebarang fasiliti kesihatan di Pulau Gaya. Untuk makluman pihak Kementerian, Pulau Gaya sehingga kini tidak mempunyai sebarang fasiliti kesihatan di kawasan tersebut, pesakit atau orang awam yang ingin mendapatkan rawatan terpaksa ke Tanah Besar (Kota Kinabalu).

JAWAPAN

Tuan Yang di-Pertua,

1. Untuk makluman, inisiatif untuk menyediakan sebuah klinik kesihatan sementara di Pulau Gaya sudah pun dimulakan oleh Kementerian Kesihatan dengan kerjasama Kerajaan Negeri Sabah, Jabatan Air Negeri Sabah (JANS) dan Jabatan Kerja Raya Sabah (JKRS). Tapak yang telah dikenal pasti ialah di kuarters milik JANS di pulau tersebut.
2. KKM akan menyelesaikan proses perolehan tanah bagi tujuan pembangunan klinik kesihatan yang baharu.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK IR. SHAHELMY BIN YAHYA
[PUTATAN]**

SOALAN

YB DATUK IR. SHAHELMY BIN YAHYA [PUTATAN] minta **MENTERI PEMBANGUNAN KERAJAAN TEMPATAN** menyatakan inisiatif untuk melakukan penyelenggaraan bagi mengendali dan mengawal selia bangunan PPR ini untuk dilakukan secara berkala memandangkan kemudahan asas seperti lif, tangki air, pagar, paip kumbahan dan paip air di PPR Serigai sering terganggu.

JAWAPAN

Tuan Yang di-Pertua,

Untuk makluman Ahli Yang Berhormat, semua projek Program Perumahan Rakyat (PPR) di negeri Sabah yang telah siap sepenuhnya akan diserahkan kepada pihak Kerajaan Negeri Sabah melalui Kementerian Kerajaan Tempatan dan Perumahan (KKTP), Sabah untuk tujuan pengurusan dan pengisian PPR tersebut. Aspek pengurusan ini juga adalah termasuk dari segi kutipan hasil sewaan unit PPR serta mengawal selia dan menyelenggara bangunan PPR tersebut.

Merujuk kepada PPR Taman Seri Serigai, Putatan, Sabah, pengurusan dan penyelenggaraan bangunan PPR tersebut telah diserahkan kepada KKTP Sabah pada 11 Mei 2015. Oleh yang demikian, KPKT berpandangan pihak KKTP Sabah melalui pihak Pengurusan Bangunan yang telah dilantik pastinya mempunyai perancangan dan telah mengambil tindakan sewajarnya di dalam aspek penyelenggaraan berkala bangunan yang melibatkan kemudahan bersama seperti lif, tangki air, paip kumbahan, paip air dan sebagainya bagi memastikan kemudahan asas yang disediakan di PPR tersebut berada dalam keadaan baik.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN IR. SHAHELMY BIN YAHYA
[PUTATAN]**

SOALAN

Datuk Ir. Shahelmy bin Yahya [Putatan] minta **MENTERI DALAM NEGERI** menyatakan perancangan untuk mewujudkan Pejabat Pendaftaran Negara Daerah Putatan kerana sehingga kini, daerah Putatan masih berkongsi Jabatan/Agensi tersebut dengan daerah Penampang. (Untuk makluman, daerah Putatan adalah sebuah daerah penuh).

JAWAPAN

Tuan Yang Di Pertua,

Untuk makluman Ahli Yang Berhormat, pada masa ini, penduduk Daerah Putatan mempunyai pilihan sama ada ke Pejabat JPN Daerah Penampang atau JPN UTC Kota Kinabalu dengan jarak masing-masing iaitu 9.5km dan 7.5km. Berdasarkan statistik tahun 2022, purata urus niaga harian di Pejabat JPN Daerah Penampang dan JPN UTC Kota Kinabalu adalah masing-masing 195 pelanggan dan 525 pelanggan sehari termasuk pelanggan dari Daerah Putatan. Justeru, kedua-dua pejabat ini masih dapat menampung keperluan pelanggan dari Daerah Putatan.

Sehubungan itu, berdasarkan keperluan semasa, Kementerian Dalam Negeri (KDN) tiada perancangan untuk mewujudkan pejabat JPN yang baharu untuk Daerah Putatan. Walau bagaimanapun, KDN sedia mempertimbangkan pewujudan pejabat KDN baharu di Daerah Putatan sekiranya terdapat keperluan mendesak di masa hadapan tertakluk kepada peruntukan kewangan dan kelulusan Kerajaan. Namun, sebagai makluman Ahli Yang Berhormat, KDN sedang dalam perancangan untuk memindahkan Pejabat JPN Daerah Penampang ke premis baharu yang lebih luas dan lebih dekat dengan Daerah Putatan berbanding pejabat sedia ada pada masa ini bagi memudahkan urusan penduduk terutamanya penduduk Daerah Putatan dengan JPN.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK IR. SHAHELMEY BIN YAHYA
(PUTATAN)**

SOALAN

DATUK IR. SHAHELMEY BIN YAHYA [PUTATAN] minta **MENTERI PERTAHANAN** menyatakan inisiatif Kementerian Pertahanan dalam menambah baik dan menaik taraf sistem perpaipan yang telah lama dan uzur dalam kawasan Kem Lok Kawi.

JAWAPAN

1. Kerja-kerja menambah baik dan menaik taraf sistem perpaipan di dalam kawasan Kem Lok Kawi, Kota Kinabalu, Sabah dilaksanakan secara berperingkat. Pada tahun 2022, sejumlah RM147 ribu telah diperuntukkan bagi pembaikan *balancing tank* utama dan sebanyak RM177 ribu diperuntukkan bagi kerja-kerja pembaikan paip-paip dan sistem pam yang rosak di kem berkenaan.
2. Sebagai makluman, isu bekalan air di Kem Lok Kawi juga turut dipengaruhi oleh faktor luaran iaitu kerja-kerja penambahbaikan empangan Babagon di Penampang oleh pihak Jabatan Bekalan Air Sabah (JBAS) yang telah menjejaskan sumber bekalan air bersih (*in coming supply*) dan menyebabkan catuan bekalan air terpaksa dilaksanakan. Perkara ini juga turut melibatkan keseluruhan Bandaraya Kota Kinabalu.
3. Bagi rancangan jangka panjang, sejumlah RM2.8 juta diperlukan untuk mengatasi permasalahan tersebut yang melibatkan kerja-kerja penambahan tangki sedutan (*suction tank*) yang berkapasiti 100 ribu gelen air bagi meningkatkan kapasiti air simpanan di dalam Kem Lok kawi serta kerja- kerja menggantikan paip yang telah lama sepanjang 2.53 km bagi mengurangkan kadar air hilang atau tidak berhasil (*Non-Revenue Water*). Walau bagaimanapun, perancangan ini masih belum dapat dilaksanakan sepenuhnya disebabkan kekangan peruntukan kewangan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK IR. SHAHELMY BIN YAHYA
[PUTATAN]**

SOALAN

DATUK IR. SHAHELMY BIN YAHYA [PUTATAN] minta **MENTERI PENDIDIKAN** menyatakan status pembaikan blok bilik darjah Sekolah Kebangsaan Tansau yang telah diisytiharkan tidak selamat untuk diguna oleh Jabatan Kerja Raya Malaysia (Cawangan Kejuruteraan Awam dan Struktur) pada 15 Disember 2015. Pihak Jabatan Kerja Raya Malaysia juga telah membuat pemeriksaan susulan pada 21 Oktober 2022 namun sehingga kini, belum ada status terkini berhubung dengan kerja-kerja pembaikan tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara.

Untuk makluman Ahli Yang Berhormat, KPM telah diluluskan projek Pembinaan Gantian 6 Bilik Darjah dan Lain-Lain Kerja Berkaitan di SK Tansau, Penampang, Sabah, di bawah program menaik taraf dan membangunkan semula bangunan daif di sekolah pada tahun 2020.

Projek ini dilaksanakan secara berfasa. Fasa pertama melibatkan pembinaan gantian enam bilik darjah dan lain-lain kemudahan mengikut piawai dengan kos projek berjumlah RM1.69 juta. Bagi pelaksanaan fasa ini, projek telah siap dibina dan diserahkan untuk digunakan pada 24 November 2022.

Fasa kedua projek pula adalah melibatkan kerja pembaikan struktur bagi satu blok bangunan pentadbiran dan akademik. Pihak Jabatan Kerja Raya (JKR) Malaysia dan JKR Sabah telah selesai melaksanakan siasatan forensik pada November 2022. Laporan siasatan tersebut telah menyatakan bahawa terdapat keperluan untuk menentusahkan integriti struktur bangunan melalui ujian bahan terlebih dahulu. Ujian bahan sedang dalam tindakan JKR Sabah untuk dilaksanakan dan dijangkakan keputusan diperolehi pada bulan April 2023. Ini bertujuan untuk membolehkan pihak JKR melaksanakan analisis struktur bagi menentukan hala tuju kerja pembaikan dan pengukuhan yang perlu dijalankan serta anggaran kos yang terlibat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SERI DR. SHAHIDAN BIN KASIM
[ARAU]**

SOALAN

DATO' SERI DR. SHAHIDAN BIN KASIM [ARAU] minta **MENTERI PENDIDIKAN** menyatakan apakah Kementerian berhasrat untuk menambahkan sebuah lagi Sekolah Berasrama Penuh (SBP) di Perlis khususnya di Arau bagi menampung keperluan semasa penempatan pelajar bagi kategori sekolah terbabit.

JAWAPAN

Tuan Yang di-Pertua,

Untuk makluman, terdapat satu Sekolah Berasrama Penuh (SBP) yang sedang beroperasi di negeri Perlis iaitu SM Sains Tuanku Syed Putra, Kangar Perlis. Berdasarkan kepada rekod Kementerian Pendidikan Malaysia (KPM), enrolmen murid di SM Sains Tuanku Syed Putra masih mampu menampung permintaan murid di negeri tersebut. Walaubagaimanapun, KPM akan terus meneliti pembinaan SBP dari semasa ke semasa berdasarkan perancangan serta keperluan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATO' SERI DR. SHAHIDAN BIN KASIM
[ARAU]**

SOALAN

DATO' SERI DR. SHAHIDAN BIN KASIM [ARAU] minta **MENTERI EKONOMI** menyatakan penjelasan berkenaan kenyataan media Menteri Ekonomi yang tular baru-baru ini bahawa rakyat seharusnya mengurangkan makan ayam bagi mengatasi masalah kekurangan bekalan tersebut serta menyarankan rakyat supaya memboikot restoran yang mahal.

JAWAPAN

Tuan Yang di-Pertua,

Pertanyaan yang dibangkitkan oleh YB Arau adalah berkaitan satu kenyataan yang dibuat oleh Menteri Ekonomi dalam sidang media Kementerian Ekonomi berkaitan Indeks Harga Pengguna dan Inflasi pada 23 Disember 2023.

Dalam sidang media tersebut Menteri Ekonomi menyentuh tentang *Elasticity* dan *Behaviourial Economics* yang memainkan peranan penting dalam mempengaruhi inflasi dan harga barang. Data yang dikeluarkan oleh Jabatan Perangkaan Malaysia (DOSM) telah menunjukkan berlaku ketidakanjalan dalam permintaan dan penawaran bagi barang makanan siap.

Justeru Menteri Ekonomi menegaskan bahawa usaha untuk mengawal inflasi memerlukan kerjasama kolektif semua pihak dalam mewujudkan ekonomi yang lebih anjal. Di samping campur tangan Kerajaan di sebelah penawaran, peranan pengguna juga amat penting bagi menstabilkan harga barang.

Oleh itu tema utama yang seharusnya diberi perhatian oleh YB Arau adalah peranan kolektif semua pihak dalam memastikan inflasi dapat dikawal. Masyarakat perlu menjadi pengguna bijak dalam membuat pembelian dengan membuat perbandingan harga. Pengguna yang bijak akan mendorong pasaran yang sihat apabila penjual tidak lagi boleh menaikkan harga barang secara keterlaluan.

Untuk membantu masyarakat menjadi pengguna bijak, Kementerian Ekonomi telah melancarkan laman sesawang open.dosm.gov.my untuk membolehkan para pengguna menyemak dan mengetahui kadar harga barangan setempat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : YB DATO' SERI DR. SHAHIDAN BIN KASSIM
[ARAU]**

SOALAN

YB DATO' SERI DR. SHAHIDAN BIN KASSIM [ARAU] minta **MENTERI PELANCONGAN, SENI DAN BUDAYA** menyatakan apakah inisiatif yang akan dilakukan oleh Kementerian bagi menarik minat rakyat Malaysia melancong di dalam negara kerana statistik baru-baru ini yang dikeluarkan Kementerian menunjukkan lebih daripada sejuta pelancong Malaysia telah melancong ke Thailand pada tahun lalu.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Menurut data yang dikeluarkan oleh Kementerian Pelancongan dan Sukan Thailand, jumlah pelancong Malaysia yang berkunjung ke Thailand pada 2022 adalah 398,295 manakala berdasarkan statistik Tourism Malaysia pula, jumlah pelancong Thailand yang berkunjung ke Malaysia pada 2022 adalah 715,528. Ia menunjukkan bahawa pada asasnya perniagaan pelancongan antarabangsa lebih memihak kepada pihak Malaysia jika dibandingkan dengan Thailand.

2. Namun begitu, Kementerian Pelancongan, Seni dan Budaya (MOTAC) melalui agensinya Tourism Malaysia kekal komited dalam mempromosikan sektor pelancongan domestik secara berterusan bagi memastikan pertumbuhan industri pelancongan domestik positif khususnya difasa pemulihan dari pandemik Covid-19.

3. Salah satu usaha yang telah dijalankan adalah melalui Pelan Pemulihan Pelancongan 2022. Di bawah Pelan ini, Tourism Malaysia meneruskan penyaluran insentif kepada rakyat Malaysia dalam bentuk diskaun, baucar dan rebat dengan kerjasama pemain industri dalam tempoh 29 April 2022 sehingga 31 Disember 2022 bagi menyemarakkan pelancongan domestik. Kerjasama ini melibatkan 5 kluster iaitu:

- i) Kluster Pengangkutan Darat – kerjasama strategik dengan perkhidmatan KLIA Ekspres dan Keretapi Tanah Melayu Berhad (KTMB);
- ii) Kluster Persatuan Pelancongan - kerjasama strategik dengan Persatuan Pelancongan Domestik Malaysia (MITA), Persatuan Penggalakan Pelancongan Inbound Cina Malaysia

(MICA), Persatuan Pelancongan Cina Malaysia (MCTA), Persatuan Pengembaraan dan Pelancongan India Malaysia (MITTA) dan Persatuan Syarikat Pengendalian Pelancongan Bumiputera Malaysia (BUMITRA) dalam penawaran pelbagai pakej destinasi pelancongan domestik oleh ejen pelancongan berdaftar menerusi aplikasi e-marketplace Shopee;

- iii) Kluster Pelancongan Minat Khas – kerjasama strategik dengan Persatuan Taman Tema dan Pusat Hiburan Keluarga Malaysia (MATFA), Persatuan Penyelam Skuba Malaysia (MSDA) dan Persatuan Kampungstay & Homestay Malaysia (MKHA);
- iv) Kluster Pengangkutan Udara – kerjasama strategik dengan Malaysia Airlines, AirAsia, Batik Air (Malindo Air), Firefly dan MASwings; dan
- v) Kluster Penginapan – kerjasama strategik dengan Persatuan Hotel Malaysia (MAH), Persatuan Pemilik Hotel Malaysia (MAHO), Persatuan Hotel Bajet dan Bisnes Malaysia (MyBHA) dan rangkaian Hotel Seri Malaysia (HSM).

4. Bagi meningkatkan aktiviti penebusan diskaun, baucar dan rebat ini yang ditawarkan kepada rakyat, Tourism Malaysia telah melancarkan program Jom Cuti-Cuti Malaysia Roadshow Siri Ke-2 bermula di AEON Mall Kinta City, Ipoh pada 27-29 Mei 2022. Tujuh lokasi lain ialah di AEON Mall Nilai (3-5 Jun 2022), AEON Mall Bukit Tinggi, Klang (22-24 Julai 2022), Blue Atrium, Sunway Pyramid (26-28 Ogos 2022), AEON Mall Shah Alam (2-4 September 2022), AEON Mall Kota Bharu (23-25 September 2022), AEON Mall Tebrau City (7-9 Oktober 2022) dan AEON Mall Bandaraya Melaka (25-27 November 2022). Ini termasuk JCCM Travel Fair Edisi Khas berlangsung di MyTown Shopping Centre dari 21-23 Oktober 2022.

5. Kesemua lokasi ini telah merekodkan jualan sebanyak RM10,566,357.37 dari 29,345 pakej yang terjual. Hasil jualan ini telah merekodkan keuntungan sebanyak 629% dari jumlah peruntukan penganjuran keseluruhan bagi 9 lokasi JCCM2022 tersebut.

6. Selain itu, antara aktiviti promosi yang telah dijalankan dan memberi impak positif adalah melalui penyertaan Tourism Malaysia di dalam dua MATTA *Fair* Kuala Lumpur yang telah berlangsung pada 9-10 April 2022 dan 2-4 September 2022. Sejumlah 42 pempamer (April 2022) dan 45 pempamer (September 2022) yang terdiri daripada agensi pelancongan, pengusaha produk pelancongan dan hotel telah dilibatkan di bawah Astaka Tourism Malaysia sebagai usaha membantu penggiat industri pelancongan domestik ini meraih pendapatan dalam usaha memulihkan dan merencanakan pelancongan domestik. Untuk rekod, Astaka Tourism Malaysia meraih sebanyak RM4,095,086.71 hasil jualan melalui 514 pakej yang dibangunkan.

7. Berdasarkan kepada statistik terkini yang dikeluarkan oleh Jabatan Perangkaan Malaysia di bawah Jabatan Perdana Menteri, jumlah pelawat domestik dalam negara masih kekal sebagai penyumbang terbesar kepada industri ini. Secara kumulatif, seramai 116.7 juta pelawat domestik direkodkan dari Januari sehingga September 2022. Jumlah perbelanjaan terus meningkat dalam tempoh tersebut dengan catatan sebanyak RM40.34 billion diterima.

8. Berdasarkan kepada perancangan berterusan oleh Tourism Malaysia, program-program yang telah dijayakan memberikan impak positif terhadap pertumbuhan aktiviti pelancongan domestik dengan menggalakkan pengunjung untuk melakukan percutian terancang sepanjang tahun dengan tawaran harga yang menarik dan berpatutan. Program-program promosi ini akan diteruskan dalam tahun 2023 dengan penambahbaikan bagi memastikan produk-produk pelancongan yang dibangunkan dapat dipasarkan dan dikunjungi oleh masyarakat Malaysia.

Sekian, terima kasih

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : DATO' SERI DR. SHAHIDAN BIN KASIM (ARAU)

SOALAN

DATO' SERI DR. SHAHIDAN BIN KASIM (ARAU) minta **MENTERI KEMAJUAN DESA DAN WILAYAH** menyatakan apakah relevansi mewujudkan JPKKP di negeri yang dimenangi Perikatan Nasional sedangkan JPKK yang sedia ada sudah teratur organisasi mengendalikan isu penduduk tanpa mengira agama dan bangsa.

JAWAPAN

Untuk makluman Yang Berhormat, penubuhan JPKKP di negeri-negeri yang tidak sealiran dengan Kerajaan Persekutuan bukanlah suatu perkara baharu atau asing kerana ianya telah lama dilaksanakan oleh kerajaan yang memerintah sebelum ini.

Sebagai contoh, pada tahun 2008, JPKKP telah ditubuhkan di negeri-negeri yang tidak sealiran dengan Kerajaan Persekutuan pada masa itu yang bertujuan untuk melancarkan pelaksanaan program-program pembangunan Kerajaan Persekutuan di peringkat kampung. Untuk makluman Yang Berhormat jua, peranan utama pewujudan JPKKP ini adalah untuk:

- (i) membantu Kerajaan Persekutuan dalam penyediaan perancangan dan pelaksanaan pembangunan di peringkat kampung;
- (ii) menyalurkan maklumat keperluan pembangunan masyarakat kampung kepada Kerajaan Persekutuan;
- (iii) menyampaikan maklumat program Kerajaan Persekutuan dan menggalakkan penglibatan masyarakat; dan
- (iv) menyebarkan luas maklumat dan memberi penjelasan berkaitan dasar-dasar Kerajaan Persekutuan di peringkat akar umbi.

Dalam erti kata lain, kesemua fungsi yang dinyatakan di atas adalah memerlukan penglibatan JPKKP sebagai penghubung di antara masyarakat kampung dengan agensi-agensi Kerajaan Persekutuan di peringkat negeri. Oleh yang demikian, adalah penting bagi JPKKP ditubuhkan di negeri-negeri berkenaan agar Kerajaan Persekutuan dapat merancang dan melaksanakan pembangunan di kawasan luar bandar dengan lebih berkesan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SERI DR. SHAHIDAN BIN KASSIM
[ARAU]**

SOALAN

DATO' SERI DR. SHAHIDAN BIN KASSIM [ARAU] minta **PERDANA MENTERI** menyatakan adakah Kerajaan berhasrat untuk menarik balik *development charge* yang dikenakan oleh Dewan Bandaraya Kuala Lumpur dan lain-lain pihak berkuasa tempatan (PBT) bagi mengurangkan beban pemaju dalam menghadapi kenaikan kos barang binaan dan ketidakstabilan ekonomi semasa yang boleh menyebabkan projek-projek yang dirancang terbengkalai sementara menunggu ekonomi pulih semula.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, caj pembangunan yang dikenakan oleh Dewan Bandaraya Kuala Lumpur terus dikekalkan buat masa ini bagi tujuan menampung kos menyediakan dan menambahbaik infrastruktur, melaksanakan projek pengindahan dan mempertingkatkan kemudahan masyarakat di sekitar kawasan terlibat akibat daripada pembangunan yang dicadangkan oleh pihak pemaju.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATO' HAJI SHAMSHULKAHAR BIN MOHD
DELI [JEMPOL]**

SOALAN

DATO' HAJI SHAMSHULKAHAR BIN MOHD DELI [JEMPOL] minta **MENTERI EKONOMI** menyatakan perincian jumlah dan butiran pelaburan di Negeri Sembilan yang dikatakan tertinggi dalam sejarah setakat ini dan sekiranya benar apakah faktor kenaikan jumlah pelaburan tersebut.

JAWAPAN

Tuan Yang di-Pertua,

Untuk makluman Ahli Yang Berhormat, statistik Pelaburan Langsung Asing (FDI) yang diterbitkan oleh Jabatan Perangkaan Malaysia adalah pada peringkat nasional sahaja.

Berdasarkan kepada statistik terkini, jumlah aliran masuk bersih FDI bagi tahun 2022 adalah berjumlah **RM73.3 bilion**, yang mana pada suku tahun pertama 2022 (Januari – Mac) berjumlah **RM24.4 bilion**, **RM17.3 bilion** suku tahun kedua 2022 (April – Jun), **RM12.3 bilion** pada suku tahun ketiga 2022 (Julai – Ogos) dan **RM19.3 bilion** pada suku tahun keempat 2022. Ini merupakan peningkatan berbanding RM48.1 bilion yang dicatatkan pada tahun 2021.

Maklumat pelaburan peringkat subnasional bagi Negeri Sembilan adalah tidak tersedia.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

**DARIPADA : DATO' HAJI SHAMSHULKAHAR BIN
MOHD DELI (JEMPOL)**

SOALAN

DATO' HAJI SHAMSHULKAHAR BIN MOHD DELI (JEMPOL) minta **MENTERI BELIA DAN SUKAN** menyatakan adakah Kementerian boleh memberi pertimbangan untuk meningkatkan bantuan dan peruntukan pentadbiran majlis belia daerah di seluruh negara sebagai salah satu usaha memperkasakan persatuan- persatuan belia di akar umbi sesuai dengan konsep Malaysia Madani.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Belia dan Sukan telah menyalurkan bantuan pentadbiran bagi membantu meningkatkan keberkesanan tadbir urus pertubuhan belia serta memberikan kesan langsung kepada ahli-ahli pertubuhan belia termasuklah Majlis Belia Daerah; Majlis Belia Negeri; Majlis Belia Malaysia dan Pertubuhan Belia Peringkat Kebangsaan; dan Badan Beruniform. Bantuan pentadbiran yang telah diperuntukan pada tahun 2019 hingga 2021 adalah seperti berikut: -

BIL	PERTUBUHAN	2019 (RM)	2020 (RM)	2021 (RM)
1.	Majlis Belia Malaysia (MBM) dan Pertubuhan Belia Peringkat Kebangsaan	1,000,000.00 (MBM Sahaja)	2,000,000.00	1,976,000.00
2.	Majlis Belia Negeri (MBN)	Tiada	1,025,000.00	1,025,000.00
3.	Majlis Belia Daerah (MBD)	Tiada	3,780,000.00	3,024,000.00
4.	Badan Beruniform	Tiada	195,000.00	240,000.00
JUMLAH KESELURUHAN		1,000,000.00	7,000,000.00	6,265,000.00

Setiap pertubuhan perlu melalui proses penyaluran bantuan pentadbiran yang dilaksanakan berdasarkan prosedur pemberian bantuan dan garis panduan yang sedang berkuatkuasa. Pertubuhan yang menghantar Maklumat Yang Kena Diberi (MYKD) pada tahun yang ditetapkan dan telah mendapat pengesahan oleh Pejabat Pendaftar Pertubuhan Belia (ROY) layak mendapatkan bantuan pentadbiran. Jumlah bantuan yang disalurkan adalah tertakluk kepada kategori kadar pemberian bantuan yang ditetapkan.

KBS sentiasa menyokong persatuan supaya aktif dan persatuan berpeluang untuk memohon bantuan pelaksanaan program dan aktiviti persatuan khususnya kepada persatuan belia dan sukan yang berdaftar dengan ROY.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATO' HAJI SHAMSHULKAHAR BIN MOHD
DELI [JEMPOL]**

SOALAN

YB DATO' HAJI SHAMSHULKAHAR BIN MOHD DELI [JEMPOL] minta **MENTERI PEMBANGUNAN KERAJAAN TEMPATAN** menyatakan apakah faktor kekerapan banjir kilat di beberapa kawasan di Negeri Sembilan dan apakah respon serta langkah Kementerian dalam mengatasi masalah banjir kilat tersebut.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) telah mengenal pasti faktor-faktor yang menyebabkan kekerapan banjir kilat di Negeri Sembilan iaitu:

- i. sistem saliran yang tidak dapat menampung peningkatan kapasiti air larian hujan;
- ii. keadaan sistem perparitan yang telah uzur dan rosak menyekat air larian hujan;
- iii. kapasiti air sungai melebihi reka bentuk menyebabkan air sungai melimpah terutama semasa hujan tahap ekstrim dan air pasang;
- iv. kekurangan penyelenggaraan sistem perparitan dan sungai; dan
- v. kerja tanah di tapak pembinaan yang tidak mengikut perundangan.

SOALAN NO : 502

KPKT telah mewujudkan Jawatankuasa *Task Force* Bagi Mengatasi Masalah Banjir Kilat yang dianggotai oleh pelbagai agensi seperti Jabatan Pengairan dan Saliran (JPS), Jabatan Kerja Raya (JKR) dan kerajaan negeri. Jawatankuasa ini berperanan untuk menyelaraskan cadangan inisiatif penyelesaian masalah banjir kilat di kawasan Pihak Berkuasa Tempatan (PBT) dengan mengambil kira faktor-faktor banjir kilat seperti sistem perparitan yang telah uzur, tidak berfungsi dan tidak sistematik.

Jawatankuasa ini telah menyediakan Pelan Tindakan Bagi Mengatasi Masalah Banjir di Kawasan PBT bagi tempoh lima (5) tahun iaitu tahun 2021 hingga 2025 untuk dilaksanakan oleh KPKT, JPS, JKR, Pejabat Setiausaha Kerajaan Negeri dan PBT. Pelan tindakan tersebut memberikan penekanan kepada perkara-perkara berikut:

- i. menaik taraf sistem saliran yang tidak sistematik/ tersumbat/ tidak berfungsi;
- ii. mewujudkan penyelenggaraan sistem saliran;
- iii. mewujudkan kawalan hakisan dan enapan;
- iv. menyediakan Pelan Induk Saliran Mesra Alam (PISMA); dan
- v. mempergiatkan kempen kesedaran dan pembangunan kapasiti kepada orang awam.

Pada tahun 2021 dan 2022, KPKT telah meluluskan peruntukan sebanyak RM2,510,000 dan RM960,000 kepada PBT di Negeri Sembilan bagi menaik taraf sistem perparitan untuk mengatasi masalah banjir kilat. Daripada keseluruhan peruntukan tersebut, sebanyak RM100,000 dan RM80,000 (masing-masing pada tahun 2021 dan tahun 2022) telah diluluskan kepada Majlis Perbandaran Jempol. KPKT sedia mempertimbangkan permohonan peruntukan bagi mengatasi banjir kilat daripada PBT di kawasan Parlimen Jempol.

Di samping itu, PBT juga melaksanakan beberapa tindakan bagi mengelakkan kejadian banjir kilat, antaranya:

- i. kolam takungan dimasukkan dalam senarai kawasan di bawah pemantauan Operasi Lumpur bersama Jabatan Pengairan dan Saliran (JPS) untuk pemantauan secara berkala bagi mengenal pasti, mengawal serta menguruskan sebarang risiko berlakunya banjir di kawasan berkenaan;
- ii. mewajibkan pihak pemaju untuk membina kolam takungan di bahagian hilir tapak cadangan dengan mengambil kira keseluruhan kawasan cadangan dengan merujuk kepada Manual Saliran Mesra Alam (MSMA) dan ulasan daripada JPS Daerah;
- iii. menyelenggara sistem perparitan/ longkang secara berjadual supaya ia berada dalam keadaan yang baik dan berfungsi;
- iv. mengenakan syarat kepada pemaju untuk menaik taraf parit utama yang berada di sekeliling kawasan pembangunan bagi pembangunan baharu agar impak banjir dapat dikurangkan kepada tahap yang minimum;
- v. membuat rondaan dan pemantauan pada musim hujan (di lokasi yang menunjukkan taburan hujan yang tinggi) dan bersedia mengeluarkan amaran banjir jika paras air meningkat; dan
- vi. melaksanakan penyelarasan pengurusan banjir antara Jabatan dan Agensi terlibat seperti JKR, JPS, Pejabat Daerah dan Tanah, SWCorp, Alam Flora, Ibu Pejabat Polis Daerah, Pejabat Penghulu dan Jabatan Kesihatan Negeri.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATO' HAJI SHAMSHULKAHAR BIN MOHD
DELI [JEMPOL]**

SOALAN

DATO' HAJI SHAMSHULKAHAR BIN MOHD DELI [JEMPOL] minta **MENTERI PERTANIAN DAN KETERJAMINAN MAKANAN** menyatakan adakah benar kurang 500 hektar tanah sawah diusahakan bagi tanaman padi di Negeri Sembilan berbanding luas tanah sawah keseluruhan 1,194.49 hektar. Apakah langkah Kementerian bagi membantu petani supaya memanfaatkan tanah sawah yang berbaki supaya diusahakan sepenuhnya bagi menjayakan dasar keterjaminan makanan.

JAWAPAN

Tuan Yang Di Pertua,

Untuk makluman Ahli Yang Berhormat, mengikut Laporan Awal Penyiasatan Pengeluaran Padi keluasan bertanam bagi musim utama 2021/2022 di Negeri Sembilan adalah seluas 736 hektar. Jumlah ini rendah berbanding jumlah keluasan lazim bertanam di Negeri Sembilan iaitu seluas 1,239 hektar. Kekurangan keluasan bertanam ini adalah disebabkan oleh kerja-kerja menaiktaraf sistem pengairan oleh Jabatan Pengairan dan Saliran yang bermula pada bulan Jun 2021 hingga November 2022 di daerah Kuala Pilah, Tampin dan Jempol.

Bagi menjayakan dasar keterjaminan makanan, beberapa langkah telah diambil oleh Kementerian Pertanian dan Keterjaminan Makanan (KPKM) bagi membantu pesawah memanfaatkan tanah sawah yang berbaki supaya diusahakan sepenuhnya. Antara langkah tersebut ialah:

- I. Menyediakan subsidi dan insentif kepada industri padi dan beras negara yang meliputi subsidi input dan output pertanian. Bentuk bantuan subsidi input pertanian yang telah diberikan meliputi Skim Baja Padi Kerajaan Persekutuan (SBPKP), Skim Insentif Pengeluaran Padi (SIPP), Skim Baja dan Racun Padi Bukit/Huma (SBRPB) dan Skim Insentif Benih Padi Sah (IBPS). Bentuk bantuan subsidi output pertanian yang diberikan melalui Skim Subsidi Harga Padi (SSHP) yang mana pesawah mendapatkan insentif apabila menjual hasil padi.
- II. *Soil profiling* bagi mengenalpasti kandungan nutrien yang tersedia di dalam tanah dan membolehkan penggunaan baja dilaksanakan secara efisien mengikut kuantiti yang diperlukan oleh tanaman sahaja.
- III. Menggalakan pesawah menggunakan benih padi sah dan penggunaan varieti padi yang berkualiti, rintang penyakit serta mengeluarkan hasil yang tinggi.
- IV. Memperkenalkan program *SMART* sawah berskala besar (SMART SBB). Program ini telah dilaksanakan sebagai penanaman padi luar jelapang seluas 120 hektar di daerah Jempol, Negeri Sembilan.

Langkah turut diambil oleh Kerajaan negeri yang mana, Kerajaan Negeri Sembilan sedang dalam tindakan membangunkan seluas 20 ekar sawah terbiar dan membuka 30 ekar kawasan padi baru di daerah Tampin.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATO' HAJI SHAMSHULKAHAR
BIN MOHD DELI [JEMPOL]**

SOALAN

DATO' HAJI SHAMSHULKAHAR BIN MOHD DELI [Jempol] minta **MENTERI LUAR NEGERI** menyatakan sejauh mana komitmen pelaksanaan Kerajaan dalam melaksanakan syor-syor pemegang taruh berkaitan isu hak asasi manusia yang telah menghantar laporan kepada Majlis Hak Asasi Manusia (UNHRC) dalam proses Semakan Berkala Sejagat (UPR).

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Jempol atas pertanyaan yang dikemukakan.

Tuan Yang di-Pertua,

2. Seperti Yang Berhormat sedia maklum, proses UPR ini merangkumi (3) dokumen utama iaitu;

- i. laporan negara ahli;
- ii. laporan PBB; dan
- iii. laporan masyarakat madani dan Suruhanjaya Hak Asasi Manusia, yang diambil kira oleh negara-negara ahli PBB dalam menganalisis dan mengemukakan saranan-saranan penambahbaikan. Kerajaan telah mengambil **dua inisiatif penting** untuk meningkatkan komitmen dalam pelaksanaan saranan UPR.

Sesi konsultasi pelbagai pihak berkepentingan (*multi-stakeholder consultation*)

3. Pertama, Kerajaan telah mewujudkan sesi konsultasi pelbagai pihak berkepentingan (*multi-stakeholder consultation*). Sejak 2019, Kerajaan telah mengadakan dua sesi konsultasi setiap tahun bagi membincangkan saranan-saranan UPR yang telah diterima oleh Malaysia.

4. Sesi rundingan tersebut telah berjaya mencapai objektif dalam meningkatkan perbincangan menyeluruh dan konstruktif antara pihak Kerajaan dan pemegang taruh yang lain, terutamanya masyarakat madani.

Sistem pemantauan dan pelaksanaan saranan yang menyeluruh dan sistematik

5. Kedua, Kerajaan dengan kerjasama Pejabat Pesuruhjaya Tinggi PBB bagi Hak Asasi Manusia (OHCHR) dan *United Nations Country Team* (UNCT) di Malaysia telah berjaya membangunkan Matriks Pemantauan dan aplikasi *National Recommendation and Tracking Database* (NRTD) yang dibangunkan oleh OHCHR.

6. Justeru itu, Malaysia kini dalam proses akhir pelaksanaan aplikasi NRTD yang mampu menjadi '*one stop centre*' bagi Kerajaan dalam usaha memantau dan melaksanakan komitmen serta obligasi hak asasi manusia Malaysia.

7. Mengambil kira komitmen serta usaha yang telah diambil oleh Malaysia dalam melaksanakan saranan-saranan UPR, Malaysia telah dipilih oleh OHCHR sebagai salah satu daripada enam negara model untuk terlibat dalam "Kajian Amalan Baik Proses UPR", pada tahun 2020.

8. Melalui usaha pelaksanaan saranan UPR yang lebih sistematik dan menyeluruh, Kerajaan juga telah berjaya menyediakan laporan separuh penggal UPR (*UPR Mid-Term Review*) pada September 2021. Ini merupakan kali pertama laporan tersebut berjaya disediakan oleh Malaysia.

9. Dalam hubungan ini, jelas bahawa Kerajaan melalui Kementerian Luar Negeri sentiasa komited dalam melaksanakan saranan-saranan yang telah diterima pada tahun 2018, iaitu sebanyak 184 saranan yang berkaitan dengan isu hak asasi manusia. Kerajaan akan terus bekerjasama dengan semua pemegang taruh untuk memastikan Malaysia melaksanakan komitmen dan kewajipan hak asasi manusia melalui proses Semakan Berkala Sejangat (UPR) dengan jayanya.

Sekian, terima kasih.

**PEMBERITAHUAN PERTANYAAN BUKAN LISAN DEWAN
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN JAWAB LISAN

DARIPADA : TUAN SIM TZE TZIN [BAYAN BARU]

SOALAN

TUAN SIM TZE TZIN [BAYAN BARU] minta **MENTERI PENDIDIKAN TINGGI** menyatakan jumlah biasiswa yang ditawarkan oleh pelbagai agensi Kerajaan di peringkat ijazah, sarjana dan PhD tahun 2017 - 2021. Berapa jumlah yang telah dibelanjakan oleh Kementerian.

JAWAPAN

Tuan Yang di-Pertua,

1. Untuk makluman Ahli Yang Berhormat, kemudahan biasiswa di Malaysia ditawarkan oleh pelbagai agensi Kerajaan dan di kawal selia oleh jabatan masing-masing.
2. Kementerian Pendidikan Tinggi (KPT) pada masa ini ada menawarkan 18 program penajaan biasiswa, dermasiswa atau bantuan kewangan bermula daripada peringkat sijil sehingga ke peringkat pasca kedoktoran kepada golongan sasaran yang telah ditetapkan seperti tenaga pengajar Institusi Pengajian Tinggi Awam (IPTA), atlet, pelajar cemerlang, orang kurang upaya (OKU) dan pelajar B40.
3. Program-program yang menawarkan kemudahan biasiswa di peringkat ijazah sarjana muda hingga pasca siswazah antaranya adalah:
 - a. Skim Latihan Akademik Bumiputera (SLAB),
 - b. Skim Latihan Akademik IPTA (SLAI),

- c. Hadiah Latihan Persekutuan Pegawai Pendidikan Pengajian Tinggi (HLP PPPT),
- d. Hadiah Latihan Persekutuan Kakitangan Bukan Akademik Universiti Awam (HLPNA),
- e. *MyBrain Science*,
- f. Biasiswa Atlet Cemerlang IPT,
- g. Biasiswa Pelajar Cemerlang Politeknik, dan
- h. Biasiswa Tokoh Siswa.

4. Jumlah keseluruhan penajaan dan perbelanjaan biasiswa dari peringkat Ijazah Sarjana Muda sehingga peringkat PhD antara tahun 2017 hingga tahun 2022 adalah seperti berikut:

TAHUN	PROGRAM PENAJAAN	PERINGKAT PENGAJIAN			JUMLAH PELAJAR	PERBELANJAAN (RM)
		IJAZAH	SARJANA	PHD		
2017	SLAB	0	82	443	525	46,392,943.56
	SLAI	0	1	1	2	851,088.72
	HLP PPPT	0	0	3	3	8,851,590.67
	SLPP	0	7	4	11	1,712,793.55
	MYBRAIN sCIENCE	124	14	12	150	20,893,830.22
	SUKAN	16	1	0	17	4,241,109.45
	JUMLAH KESELURUHAN PELAJAR TAHUN 2017	140	105	463	708	82,943,356.17
2018	SLAB	0	94	400	494	47,314,956.68
	SLAI	0	22	20	42	198,925.00
	HLP PPPT	0	37	34	71	5,396,483.74
	SLPP	0	20	7	27	999,386.12
	MYBRAIN sCIENCE	113	16	26	155	13,150,172.52
	PCP	78	0	0	78	227,850.00
	SUKAN	53	6	0	59	3,372,023.55
	TOKOH SISWA	0	4	0	4	51,366.90

TAHUN	PROGRAM PENAJAAN	PERINGKAT PENGAJIAN			JUMLAH PELAJAR	PERBELANJAAN (RM)
		IJAZAH	SARJANA	PHD		
	JUMLAH KESELURUHAN PELAJAR TAHUN 2018	244	199	487	930	70,711,164.51
2019	SLAB	0	33	322	355	46,383,353.90
	SLAI	0	6	39	45	2,383,014.78
	HLP PPPT	0	25	52	77	6,305,764.52
	SLPP	0	14	10	24	1,397,524.83
	MYBRAIN sCIENCE	74	8	1	83	11,446,015.88
	PCP	18	0	0	18	690,139.85
	SUKAN	56	4	0	60	2,702,701.64
	TOKOH SISWA	0	6	0	6	75,005.17
	JUMLAH KESELURUHAN PELAJAR TAHUN 2019	148	96	424	668	71,383,520.57
2020	SLAB	0	15	222	237	30,608,001.12
	SLAI	0	5	52	57	2,815,879.56
	HLP PPPT	0	120	31	151	4,812,487.59
	SLPP	0	9	24	33	921,558.50
	MYBRAIN sCIENCE	36	6	5	47	6,928,848.92
	PCP	27	0	0	27	673,009.00
	SUKAN	66	5	1	72	1,962,597.53
	TOKOH SISWA	0	4	0	4	116,287.48
	JUMLAH KESELURUHAN PELAJAR TAHUN 2020	129	164	335	628	48,838,669.70
2021	SLAB	0	17	194	211	27,816,515.51
	SLAI	0	19	66	85	5,630,156.43
	HLP PPPT	0	73	39	112	5,439,295.81
	SLPP	0	13	23	36	1,267,521.96

TAHUN	PROGRAM PENAJAAN	PERINGKAT PENGAJIAN			JUMLAH PELAJAR	PERBELANJAAN (RM)
		IJAZAH	SARJANA	PHD		
	MYBRAIN sCIENCE	93	11	24	128	9,175,184.57
	PCP	58	0	0	58	919,911.95
	SUKAN	76	3	0	79	4,327,583.29
	TOKOH SISWA	0	1	0	1	80,527.25
	JUMLAH KESELURUHAN PELAJAR TAHUN 2021	227	137	346	710	54,656,696.77
2022	SLAB	0	22	142	164	24,726,311.26
	SLAI	0	17	58	75	10,673,755.02
	HLP PPPT	0	67	57	124	4,179,888.21
	SLPP	0	14	23	37	1,310,800.73
	MYBRAIN sCIENCE	95	10	24	129	11,388,770.73
	PCP	61	0	0	61	1,272,311.50
	SUKAN	86	7	3	96	4,336,863.50
	TOKOH SISWA	1	5	0	6	118,566.54
	JUMLAH KESELURUHAN PELAJAR TAHUN 2022	243	142	307	692	58,007,267.49

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN SIM TZE TZIN [BAYAN BARU]

SOALAN

TUAN SIM TZE TZIN [BAYAN BARU] minta **MENTERI PERTANIAN
DAN KETERJAMINAN MAKANAN** menyatakan jumlah susu segar
yang dikeluarkan untuk 36 bulan yang lalu. Nyatakan mengikut bulan.

JAWAPAN

Maklumat pengeluaran susu segar bagi tempoh 36 bulan bermula Januari 2020 sehingga Disember 2022 adalah seperti berikut:

BULAN	TAHUN		
	2020 (Liter)	2021 (Liter)	2022 (Liter)
Januari	3,792,442.27	3,553,642.49	3,656,957.35
Februari	3,411,159.25	3,019,208.01	3,213,926.81
Mac	3,545,284.53	3,169,711.39	3,282,751.31
April	3,430,719.03	3,282,381.48	3,292,924.71
Mei	3,484,336.44	3,156,607.93	3,185,629.19
Jun	3,475,951.96	3,090,980.14	3,135,536.73
Julai	3,442,490.39	3,099,763.77	3,114,769.97
Ogos	3,419,371.46	3,189,879.46	3,151,204.02
September	3,460,285.38	3,302,805.01	3,238,060.02
Oktober	3,524,921.33	3,271,103.54	3,243,062.05
November	3,331,417.81	3,329,874.19	3,302,561.79
Disember	3,459,310.65	3,262,940.88	3,261,889.36
JUMLAH	41,777,690.50	38,728,898.29	39,079,273.31

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN SIM TZE TZIN [BAYAN BARU]

SOALAN

TUAN SIM TZE TZIN [BAYAN BARU] minta **MENTERI
PERTANIAN DAN KETERJAMINAN MAKANAN** menyatakan jumlah
durian yang dihasilkan 36 bulan yang lalu. Nyatakan mengikut bulan.

JAWAPAN

Maklumat pengeluaran durian bagi tempoh 36 bulan yang lalu adalah seperti berikut:

Tahun/bulan	Pengeluaran (Metrik Tan)		
	2020	2021	2022
Januari	7,904	5,438	19,141
Februari	7,967	5,035	1,123
Mac	1,092	9,349	1,021
April	238	3,508	125
Mei	4,764	9,441	1,783
Jun	16,854	11,952	38,680
Julai	49,381	95,492	94,412
Ogos	138,506	135,229	119,767
September	70,916	64,142	76,155
Oktober	19,455	29,273	54,233
November	5,908	5,572	5,242
Disember	67,649	73,839	33,919

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN SIM TZE TZIN [BAYAN BARU]

SOALAN

TUAN SIM TZE TZIN [BAYAN BARU] minta **MENTERI PERTANIAN DAN KETERJAMINAN MAKANAN** menyatakan jumlah nilai import makanan mengikut kategori untuk tahun 2021 dan 2022.

JAWAPAN

Pada tahun 2021, jumlah import sektor agromakanan adalah sebanyak RM63.59 bilion. Manakala nilai import agromakanan bagi tahun 2022 telah mencecah RM75.54 bilion dengan peningkatan sebanyak 18.8% berbanding tahun 2021.

Jumlah import bagi setiap kumpulan makanan adalah seperti berikut:

Sektor Makanan	Nilai Import (RM)	
	2021	2022
Binatang hidup (binatang ternakan)	275,186,786	193,816,961
Daging dan sediaan daging	4,225,056,572	6,747,891,856
Hasil tenusu	4,978,647,488	6,264,392,775
Telur unggas	26,832,755	52,287,681
Ikan, krustasea, moluska dan sediaan (tidak termasuk ikan hiasan)	5,379,239,390	6,777,131,761
Bijirin dan sediaan bijirin	8,808,231,288	10,856,258,296
Sayur-sayuran	5,434,492,280	6,225,513,340
Buah-buahan	4,725,509,523	5,109,881,588
Gula, sediaan gula dan madu	4,632,171,415	4,943,805,541
Kopi, koko, teh dan rempah	9,524,922,871	9,966,816,334
Bahan makanan untuk ternakan	7,763,311,969	9,429,647,221
Keluaran dan sediaan makanan lain	7,814,048,918	8,974,698,448

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN SIM TZE TZIN [BAYAN BARU]

SOALAN

TUAN SIM TZE TZIN [BAYAN BARU] minta **MENTERI
PERTANIAN DAN KETERJAMINAN MAKANAN** menyatakan jumlah
beras padi huma yang dihasilkan di negeri Sabah dan Sarawak pada
tahun 2017 hingga 2021.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan Kajian Penyiasatan Pengeluaran Padi Musim Utama yang dilaksanakan oleh Jabatan Pertanian Sabah, purata pengeluaran beras huma di Sabah bagi tempoh 2017 hingga 2021 adalah sebanyak 13,778 tan metrik sahaja. Pada tahun 2017, jumlah pengeluaran adalah sebanyak 14,183 tan metrik dan menurun kepada 10,696 tan metrik pada tahun 2018. Namun demikian, mulai 2019 tren pengeluaran menunjukkan peningkatan daripada 12,475 tan metrik kepada 16,215 tan metrik pada tahun 2021.

Di negeri Sarawak pula, bagi tempoh 2017 hingga 2021, purata penghasilan beras huma adalah sebanyak 21,735 tan metrik setahun. Penghasilan beras pada tahun 2017 menunjukkan tren peningkatan iaitu 23,672 tan metrik kepada 27,225 pada tahun 2018. Namun demikian, mulai tahun 2019 tren penghasilan beras menunjukkan penurunan daripada 21,785 tan metrik kepada 16,995 tan metrik pada tahun 2021. Tren penurunan ini adalah disebabkan oleh beberapa faktor antaranya ialah pemutihan senarai pesawah, pesawah yang telah berusia dan juga pandemik COVID-19 yang mempengaruhi hasil beras huma di Sarawak.

Seian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB PUAN DR. USTAZAH SITI MASTURA
MUHAMMAD [KEPALA BATAS]**

SOALAN

**Puan Siti Mastura binti Muhammad [Kepala Batas] minta MENTERI
DALAM NEGERI menyatakan :**

- (a) nisbah anggaran antara polis dan rakyat di Parlimen Kepala Batas dan amnya berbanding nisbah yang ditetapkan antarabangsa; dan
- (b) adakah pihak Kementerian bersetuju bahawa penambahan anggota dapat membantu mengurangkan jenayah.

JAWAPAN

Tuan Yang Di Pertua,

Berdasarkan statistik Jabatan Perangkaan Malaysia tahun 2020, Parlimen Kepala Batas (P41) mempunyai 117,043 orang penduduk. Ia terletak di bawah pentadbiran Ibu Pejabat Polis Daerah (IPD) Seberang Prai Utara, Pulau Pinang. Jumlah perjawatan pegawai/anggota polis bagi IPD ini adalah seramai 945 orang. Nisbah anggaran pegawai/anggota polis dengan jumlah penduduk Parlimen Kepala Batas adalah 1:123 dan anggaran ini kurang berbanding nisbah yang digariskan oleh *The International Criminal Police Organization* (INTERPOL) iaitu 1:250. Walau bagaimanapun, nisbah yang digariskan oleh INTERPOL bukan bersifat mutlak dan ia merupakan panduan untuk dirujuk oleh pihak yang berkepentingan.

Selain penambahan anggota polis, penggunaan teknologi seperti kamera litar tertutup (CCTV) di kawasan strategik; kekerapan rondaan polis di kawasan yang berisiko tinggi; serta kerjasama padu masyarakat dalam menyampaikan maklumat kepada pihak polis dapat membantu menurunkan kadar jenayah di sesuatu kawasan.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB PUAN DR. USTAZAH SITI MASTURA
MUHAMMAD [KEPALA BATAS]**

SOALAN

**Puan Siti Mastura binti Muhammad [Kepala Batas] minta MENTERI
DALAM NEGERI menyatakan :**

- (a) jumlah pelarian Rohingya yang berdaftar dan tidak berdaftar di Parlimen Kepala Batas; dan
- (b) mekanisme penguatkuasaan dan pengawalan terhadap kumpulan pelarian ini.

JAWAPAN

Tuan Yang Di Pertua,

Untuk makluman Ahli Yang Berhormat, sehingga 31 Disember 2022 data keberadaan Pendatang Asing Tanpa Izin (PATI) yang memegang Kad *United Nations High Commissioner for Refugees* (UNHCR) di Malaysia sepertimana yang diterbitkan menunjukkan bahawa bilangan keseluruhan pemegang Kad UNHCR dan Pemohon Suaka adalah seramai 182,990 orang. Manakala, khusus untuk Pulau Pinang, terdapat 20,129 PATI yang memegang Kad UNHCR dan Pemohon Suaka sedang bermastautin di sana.

Bagi tujuan penguatkuasaan dan kawalan terhadap PATI yang memegang Kad UNHCR di Malaysia, Kerajaan berpandukan kepada Arahan Majlis

SOALAN NO: 511

Keselamatan Negara No.23: Mekanisme Pengurusan PATI Yang Memegang Kad UNHCR yang berkuat kuasa sejak 24 Ogos 2009.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PETAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : PUAN SITI MASTURA BINTI MUHAMMAD
[KEPALA BATAS]**

SOALAN

YB PUAN SITI MASTURA BINTI MUHAMMAD [KEPALA BATAS] minta **MENTERI PEMBANGUNAN KERAJAAN TEMPATAN** menyatakan status Projek Perumahan Rakyat (PPR) Kepala Batas sehingga kini yang telah dilaksanakan majlis pecah tanah pada 2 November 2022 yang lalu.

JAWAPAN

Tuan Yang di-Pertua,

Untuk maklumat Ahli Yang Berhormat, status terkini Projek Perumahan Rakyat (PPR) di Kepala Batas, Pulau Pinang adalah melibatkan pelaksanaan Makmal Pengurusan Nilai (*Value Assessment – VA*) yang telah diadakan pada 5 hingga 9 Disember 2022 dan Makmal Kejuruteraan (*Value Engineering-VE*) yang telah diadakan pada 15 hingga 17 Februari 2023. Seterusnya, proses perolehan projek ini akan dilaksanakan secara Tender Terbuka (Reka dan Bina).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : PUAN SITI MASTURA BINTI MUHAMMAD
[KEPALA BATAS]**

SOALAN

PUAN SITI MASTURA BINTI MUHAMMAD [KEPALA BATAS] minta
MENTERI PENDIDIKAN menyatakan :

- (a) status kuarters pendidikan yang telah diduduki dan tidak didiami sebab rosak di Taman Seri Serdang, Kepala Batas; dan
- (b) adakah Kerajaan berhasrat untuk memperbaiki rumah yang rosak untuk penempatan semula guru-guru dan pegawai tadbir sekolah.

JAWAPAN

Tuan Yang di-Pertua,

Untuk makluman Ahli Yang Berhormat, semua 180 unit kuarters guru di Taman Seri Serdang, Kepala Batas tidak diduduki. Kementerian Pendidikan Malaysia (KPM) mendapati faktor utama kuarters tersebut tidak menjadi pilihan untuk diduduki disebabkan kedudukan kuarters Taman Seri Serdang yang berada berhampiran dengan kawasan perumahan mampu milik atau mampu sewa. Faktor tersebut telah menyebabkan guru dan pegawai tadbir sekolah lebih memilih untuk mendiami kawasan perumahan berbanding kuarters.

Untuk makluman Ahli Yang Berhormat, KPM telah melantik perunding hartanah bagi menjalankan kajian mengoptimumkan penggunaan kuarters guru tidak berpenghuni milik KPM di seluruh negara termasuk juga kuarters di Taman Seri Serdang, Kepala Batas. Skop kajian adalah merangkumi cadangan penyelesaian bagi mengoptimumkan kuarters kosong di seluruh negara. Kajian ini dijangka selesai pada akhir April 2023.

Sekian, terima kasih.

RT54

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : PUAN SITI MASTURA BINTI MUHAMMAD
[KEPALA BATAS]**

SOALAN

PUAN SITI MASTURA BINTI MUHAMMAD [KEPALA BATAS]
minta **MENTERI PERTANIAN DAN KETERJAMINAN MAKANAN**
menyatakan :

- (a) senarai ladang ternakan ayam telur bagi pasaran tempatan di Pulau Pinang dan Malaysia secara am; dan
- (b) senarai jumlah pembekal dan pemborong telur ayam bagi pasaran Kepala Batas dan Pulau Pinang.

JAWAPAN

Tuan Yang di-Pertua,

Untuk makluman Ahli Yang Berhormat, secara amnya, terdapat 265 ladang ayam penelur di Malaysia. Daripada jumlah tersebut, sebanyak 45 buah ladang ayam penelur terletak Pulau Pinang dengan kapasiti populasi sebanyak 1,312,900 ekor.

BIL.	NAMA SYARIKAT	NAMA PENTERNAK	NEGERI
1	Hin Yeah Farm (162060 X)	Soh Tong Tian	Johor
2	Hin Yeah Farm (162060 X)	Soh Tong Tian	
3	Hin Yeah Farm (162060 X)	Soh Tong Tian	
4		Tey Ton Leok	
5		Teey Tong Hoon	
6	Premier Layer Sdn Bhd	Datuk Wira Lim Yeow Siong	
7	Khwan Hup Poultry Farm Sdn Bhd	Ho Tong Ceng	
8	Sungai Tiram Farms Sdn Bhd	Lim Ka Cheng	
9	Lew Peng & Son Poultry Farm	Lew Kim Huat	
10	Hua Teck Poultry S/B	Wong Tee Hua / Hua Teck Poultry S/B	
11	PK Agro-Industrial Products (M) Sdn. Bhd	Ng Kui Chong Pk Agro-Industrial Products (M) Sdn. Bhd	
12		Tan Eng Guan	
13		Fam Fit Teck Chong	
14	Zenxin Agriculture Sdn Bhd	Tai Kok Kong	

BIL.	NAMA SYARIKAT	NAMA PENTERNAK	NEGERI
15		Appaduria A/L Kuppusamy	
16	Nong Shun Farm	Ghoh Hang Tong / Nong Shun Farm	
17	Henritex (M) Sdn Bhd	Lee Shian Fan	
18	Leong Hup Agribusiness	Lau Jui Peng	
19	Teo Seng Farming Sdn.Bhd	Nam Hiok Joo	
20		Nam Hiok Joo	
21		Nam Hiok Joo	
22		Nam Hiok Joo	
23		Phua Soo Yong	
24		Nam Hiok Joo	
25		Nam Hiok Joo	
26		Teh Kah Hong	
27		Kua Kwe Moi	
28		Nam Hiok Joo	
29		Nam Hiok Joo	
30		Nam Hiok Joo	
31		Nam Hiok Joo	
32		Lee Swee Lee	
33		Nam Hiok Joo	
34		Na Hap Cheng	
35		Na Hap Cheng	
36		Nam Hiok Joo	
37		Na Hap Cheng	
38		Lee Swee Chuan	
39		Na Hap Cheng	
40		Na Hap Cheng	

BIL.	NAMA SYARIKAT	NAMA PENTERNAK	NEGERI
41		Na Hap Cheng	
42		Nam Hiok Joo	
43		Nam Hiok Joo	
44		Na Hap Cheng	
45		Nam Hiok Joo	
46		Na Hap Cheng	
47		Na Hap Cheng	
48	Heng Lim Farm	Lim Seng Hai	Kedah
49		Teoh Poh Ching	
50	Lim Song Ju	Lim Song Ju	
51	Tan Keng Agriculture Sdn. Bhd.	Tan Keng Lee	
52	Ladang Ternakan Sungai Petani S/B	Tan Sun Un	
53	Lim Brother Farming	Lim Eng Sim	
54	Ql Ansan Poultry Farm Sdn Bhd	Tan Eng Hai	
55	Pw Nutri Eggs Sdn. Bhd.	Dato' Siah Gim Eng	
56		Ismail Bin Abd. Shukor	
57	Huat Lai Resources Bhd. (Tiang Dua)		Melaka
58	Huat Lai Resources Bhd. (Farm C)		
59	Huat Lai Resources Bhd. (Selandar A)		
60	Huat Lai Resources Bhd. (Selandar B)		
61	Huat Lai Resources Bhd. (Farm D)		
62	Huat Lai Resources Bhd. (Farm F)		
63	Huat Lai Resources		

BIL.	NAMA SYARIKAT	NAMA PENTERNAK	NEGERI
	Bhd. (Farm A)		
64	Huat Lai Resources Bhd. (Kesang Farm)		
65	Huat Lai Resources Bhd.		
66	Huat Lai Resources Bhd. (Chohong D)		
67	Huat Lai Resources Bhd. (Chohong A)		
68	Huat Lai Resources Bhd. (Farm B)		
69	Chuan Hong Hatchery Sdn. Bhd. (Layer Farm C)		
70	Lay Hong Berhad		
71	Linggi Agriculture Sdn. Bhd.		
72	Ng Hup Heng Enterprise Sdn. Bhd.		
73	Chong Yee Nam Sdn. Bhd.		
74	Chong Wei Chit Sdn. Bhd. (Ladang A)		
75	Chong Wei Chit Sdn. Bhd. (Ladang B)		
76	Chuan Hong Poultry Farm Sdn. Bhd. (Farm A)		
77	Chuan Hong Poultry Farm Sdn. Bhd. (Farm A1-pullet)		
78	Chuan Hong Poultry Farm Sdn. Bhd. (Farm A2-pullet)		
79	Chuan Hong Poultry		

BIL.	NAMA SYARIKAT	NAMA PENTERNAK	NEGERI
	Farm Sdn. Bhd. (Farm B)		
80	Chuan Hong Poultry Farm Sdn. Bhd. (Farm B2)		
81	Lian Foo Poultry Farm Sdn. Bhd.		
82	LTK (Melaka) Sdn. Bhd.		
83	Teck Ping Chan Agriculture Sdn. Bhd		
84	Eng Lean Heng Poultry Farm Sdn. Bhd.	Tan Boon Hooi	Negeri Sembilan
85	Ng Loon Em & Son Poultry Farm (M) S/B	Ng See Kuan	
86	Ns Agriculture Sdn. Bhd.	Ng See Kuan	
87	Yong's Farm Sdn.Bhd.	Tong Ah Foh@Yong Ah Foh	
88	QI Poultry Farms Sdn. Bhd.(Farm A)	Chia Seong Pow	
89	Sumitomo Chemical Enviro-Agro Asia Pacific Sdn. Bhd.		
90	QI Poultry Farms Sdn. Bhd.(Farm B)	Chia Seong Pow	
91	Ladang Ternak Prudence Sdn. Bhd.	Ng. Ping An	
92	Teck Ping Chan Agriculture Sdn. Bhd.	Lim Yew Kwang	
93	Pk3 Agro Industial Product Sdn. Bhd.	Ng Kui Chong	Pahang
94	Pk3 Agro Industial Product Sdn. Bhd.	Chareon Pokphand Sdn. Bhd.	
95	Eastern Poultly	Soh Boon Keong	
96	Hybrid Figures Sdn. Bhd.	Chia Seong Pow	

BIL.	NAMA SYARIKAT	NAMA PENTERNAK	NEGERI
97	Hybrid Figures Sdn. Bhd.	Chia Seong Pow	
98	Lu Brothers Agricultures Sdn. Bhd	Lee Sen	
99	Mentakab Poultry Trading	Le Wee Yap	
100	Liew Sung Poultry	Liew Sung	
101	Gsy Poultry Enterprise	Goh Swee Yum	Pulau Pinang
102	Heop Soon Farming Sdn Bhd	Ong Tenh Lye	
103	Tan Yeat Poh	Tan Yeat Poh	
104		Chia Teck Bee	
105		Eng Soy Leck	
106		Ang Mong Pect	
107		Tan Son Eik	
108		Peh Teik Chye	
109		Lim Teck Eng	
110		Loo Kah Chai	
111		Lee Chin Hak	
112		Lee Chin Hak	
113		Lee Chin Hak	
114		Lee Chin Hak	
115		Lee Chin Hak	
116		Ng Yam Keng	
117		Ng Yam Keng	
118		Yew Kok Tiong	
119		Yew Kok Tiong	
120		Law Hann Khoon	
121		Law Hann Khoon	
122		Law Hann Kiak	

BIL.	NAMA SYARIKAT	NAMA PENTERNAK	NEGERI
123		Low Tee Kiah	
124		Lee Kiang Huat	
125		Tan Boon Hwa	
126		Tang Tan Seng	
127		Lee Sia Kooi	
128		Teoh Siong Hong	
129	Kwang Cheng Poultry	Tang Ah Ba	
130		Ngan Chin Chin	
131		Gooi Boon Meng	
132		Teoh Chiew Chin	
133		Teoh Mooi Huat	
134		Lee Cheng Chay	
135		Lai Chang Sim	
136		Lai Ah Kong	
137		Chuah Soon Keat	
138		Tan Guek Ee	
139		Kang Teck Chy	
140		Ng Chin Boon	
141		Lee Kian Teik	
142		Chua Boo Ngee	
143		Lim Eng Swee	
144		Ng Cheik Keong	
145		Tan Ah Huat	
146		Tan Joo Kheong	
147		Ng Meng Siew	
148		Lim Chong Teng	
149		Muhammad Safiyudin Bin Shavukath Ali	

BIL.	NAMA SYARIKAT	NAMA PENTERNAK	NEGERI
150		Amirul Bin Mad Isa	Perak
151	Swee Sim Agriculture Farming Sdn Bhd		
152		Sin Yew Lee Farm	
153		Leow Kar Khing	
154		Cheng Foong Farming	
155	Kim Poh Sitt Tat Feedmill Sdn Bhd		
156	Ngei Sing Farm Sdn Bhd		
157	TCT Farm Sdn Bhd		
158	KCK Poultry Farm		
159	Hock Soon Poultry Farm Sdn. Bhd.		
160	Liang Kee Farming Sdn. Bhd		
161	Hong Guan Agriculture Sdn. Bhd		
162	Koo For Cheong Poultry Farm Sdn Bhd		
163	Lee Chan Wai Farming		
164	Woon Hing Poultry Farm		
165	Liew Yin Fah Poultry Farm		
166	Leong Huat Poultry Sdn. Bhd		
167	Liew Brother Farm Sdn Bhd		
168	Lumut Aquaculture Sdn. Bhd		
169	Ffm Farms Sdn. Bhd. Trong Layer Farm		
170	Heap Soon Farming		

BIL.	NAMA SYARIKAT	NAMA PENTERNAK	NEGERI
	Sdn. Bhd		
171	Southern LTY Farm Sdn Bhd		
172	Sheng Tat Farming Sdn Bhd		
173	Sheng Tat Farming Sdn Bhd		
174	Low Tuck Cheng (Seng Kong Poultry)	Low Tuck Cheng	Selangor
175	Frangipani Natural Farm Sdn Bhd	Shahruddin Bin Ahmad	
176	-	Coach Fadzil Sdn Bhd	
177	Tan Eng Hai	Tan Eng Hai	
178	QI Rawang Poultry	Tan Eng Hai	
179	Selasih Aman Sdn Bhd	Azman Bin Mat Zin	
180		Loo Eng Guan	
181		Lee Wee Liit (BKLAT 001)	
182	Tee Lai Seng	Tee Lai Seng (BKLAT 085)	
183		Tiew Kong Seng (BKLAT 144)	
184	Lee Yew Cheong	Lee Yew Cheong (BKLAT 039)	
185	Innofarm Sdn Bhd	Yap Hong Chai (Innofarm Sdn Bhd)	
186	Innofarm Sdn Bhd	Innofarm Sdn Bhd	
187	Lay Hong Bhd (Pullet 1,2,4)	Yap Hong Chai (Lay Hong Bhd Pullet 1)	
188	Lay Hong Bhd (Layer 1)	Yap Hong Chai (Lay Hong Bhd Layer 1)	
189	Lay Hong Bhd (Layer 2)	Yap Hong Chai (Lay Hong Bhd Layer 2)	

BIL.	NAMA SYARIKAT	NAMA PENTERNAK	NEGERI
190	Hing Hong Sdn Bhd (Layer 4)	Yap Hong Chai (Lay Hong Sdn Bhd) Layer 4	
191	Lay Hong Bhd (Layer 3)	Yap Hong Chai (Lay Hong Bhd Layer 3)	
192	Lay Hong Bhd (Pullet 3)	Yap Hong Chai (Lay Hong Bhd Pullet 2)	
193	Lay Hong Bhd (Layer 5)	Lay Hong Bhd (Layer 5)	
194	Eminent Sdn Bhd	Lay Hong Bhd (Layer 6)	
195		Yong Kok Foo	WP Labuan
196		Sittharanjanan A/L Subraniam	
197		Geok Hen @ Ong Geok Heong	
198		Muhammad Irwan Shah Bin Abdullah	Sabah
199		Shamendra A/L Pathumanathan	
200		Sze Chi Ngai	
201	Menggatal Farm	Menggatal Farm (Christopher Ng)	
202		Chuan Guan Farm (Wong Sound Sing)	
203	Jabatan Perkhidmatan Veterinar Sabah	Jawanting Ilai	
204		Aursli Bin Sinsyom	
205		Siti Meriam Binti Johor	
206		Nornatasya Binti Musreh	
207		Abdul Murad Bin Soleh	
208		Siti Jawadan@Aming Binti Lio@Lih	
209		Ahmad Jasi Bin Busna	
210	Kelatuan	Chia Seong Fatt	

BIL.	NAMA SYARIKAT	NAMA PENTERNAK	NEGERI
211	Kelatuan	Chia Seong Fatt	
212	Mook	Chia Seong Fatt	
213	Melingan	Chia Seong Fatt	
214	Ambawa	Chia Seong Fatt	
215		Valentino Batin	
216		Hazrin Bin Isnirin	
217		Ashley Francis	
218	QL Farms Sdn Bhd	Dr. Koh Kim Sing	
219	QL Farms Sdn Bhd	Dr. Koh Kim Sing	
220		Maryati Kassim	
221	Profilic Quality Sdn Bhd	Wong Wah Peng	
222		Yoon Vui Pin	
223		Maryati Kassim	
224		Osmond Bin Satim	
225	Eng Peng Farm		
226	Foh Lim Agric Development		
227	Sri Tawau Food Sdn.Bhd		
228	Sri Tawau Food Sdn.Bhd		
229	Chai Koh Chia Farm	Chai Sze Nin	Sarawak
230	Poultry Industry (S) Sdn Bhd	Chong Min Fui	
231	Poultry Industry (S) Sdn Bhd	Chong Min Fui	
232	Lee Shin Fook	Lee Shin Fook	
233	Chang Chung Kong	Chang Chung Kong	
234	Bong Kim Sin	Bong Kim Sin	
235	Chai Yian Foh	Chai Yian Foh	

BIL.	NAMA SYARIKAT	NAMA PENTERNAK	NEGERI
236	Datuk Chew Chian Han	Datuk Chew Chian Han	
237	Ling Chee Kiong	Ling Chee Kiong	
238	Wong Sing King	Wong Sing King	
239	Tang Tee Sing	Tang Tee Sing	
240	Ngu Hew Huat	Ngu Hew Huat	
241	Ngu Hew Huat	Ngu Hew Huat	
242	Chai Shin Poo	Chai Shin Poo	
243	Yong Vui Kong	Yong Vui Kong	
244	King Teck Lee	King Teck Lee	
245	Tee Chee Hoo	Tee Chee Hoo	
246	Chong Sze Kian	Chong Sze Kian	
247	Lang Lay Toon	Lang Lay Toon	
248	Huong Yiew Siong	Huong Yiew Siong	
249	Wong Ling King	Wong Ling King	
250	Bong Nee Nyat	Bong Nee Nyat	
251	Yuan Shun Farm	Bong Nee Yew	
252	Chong Chiau Chin	Chong Chiau Chin	
253	Ah Tat Poultry Farm	Phang See Kung	
254	Ng Hock Hua	Ng Hock Hua	
255	Chai Chan Shin	Chai Chan Shin	
256	Then Lih Mew	Then Lih Mew	
257	Liew Thian Jan	Liew Thian Jan	
258	Chen Chiaw Han	Chen Chiaw Han	
259	Bong Joon Haw	Bong Joon Haw	
260	Chai Yian Foh	Chai Yian Foh	
261	Chong Khee Chong	Chong Khee Chong	
262	Khor Kok Chhuan	Khor Kok Chhuan	
263	Kiew Joon Shui	Kiew Joon Shui	

BIL.	NAMA SYARIKAT	NAMA PENTERNAK	NEGERI
264	Chia Mak Hooi	Chia Mak Hooi	
265	Chia Mak Hooi	Chia Mak Hooi	

Kapasiti ladang ayam penelur di Negeri Pulau Pinang adalah seperti berikut:

Bil.	Daerah	Nama Syarikat	Alamat	Kapasiti (Ekor)
1	Seberang Perai Tengah	Tan Yeat Poh	Lot 725, 726, Mukim 13, Juru	140,000
2		GSY Poultry Enterprise	Lot 559, 560, Mukim 16, Machang Bubok	38,000
3		Wei Neng Farm	Lot 940, Mukim 12, Kampung Tok Subuh, Permatang Tinggi	10,000
4		Heop Soon Farming Sdn. Bhd.	Lot 1129, Mukim 14, Permatang Tinggi	3,000
5	Seberang Perai Selatan	SHH Poultry Farm Sdn. Bhd.	Lot 771, Kg. Changkat Dain	300,000
6		Lee Kian Teik	Lot 1695 Mukim 15, Kg. Valdor	75,000
7		Tan Joo Kheong	Lot 1307, Mukim 15, Kg. Valdor	60,000
8		Lee Chin Hak	Lot 1675 Kg. Hujung Valdor	55,000
9		Lee Kiang Huat	Lot 236 & 237 Mukim 15, Kg. Valdor	50,000
10		Kang Ching Nai	Lot 1680 Kg. Hujung Valdor	45,000
11		Yew Kok Tiong	Lot 276, Jalan 20, Kg. Valdor	43,900
12		Chuah Boon Ngee	Lot 1696 & 1697 Mukim 15, Kg. Valdor	32,000

Bil.	Daerah	Nama Syarikat	Alamat	Kapasiti (Ekor)
13		Ngan Chin Chin	Lot 292, Jalan 12, Kg. Valdor	32,000
14		Heng Huat Farm	Lot 1307, Jalan 18, Kg. Valdor	30,000
15		Ng Chin Boon	Lot 2127 Mukim 15, Kg. Valdor	30,000
16		Lee Kiang Tong	Lot 130 Mukim 15, Kg. Valdor	30,000
17		Lee Chin Hak	Lot 268 Kg. Valdor	30,000
18		Cheah Teck Bee	Lot 283 Mukim 3, Jalan Tasek	27,000
19		Ng Yam Keng	Lot 291, 274, Mukim 15, Kg. Valdor	24,000
20		Gooi Boon Meng	Lot 294 Kg. Hujung Valdor	15,000
21		Lee Chin Hak	Lot 249 Mukim 15	14,000
22		Teoh Heng Soon	Lot 304 Mukim 15, Kg. Valdor	13,000
23		Kwang Cheng Poultry	Lot 288, Jalan 20, Kg. Valdor	11,000
24		Low Tee Kiah	Lot 187 Mukim 15, Kg. Valdor	11,000
25		Law Brother Farm	Lot 218 Jalan 18, Kg. Valdor	11,000
26		Lee Chin Hak	Lot 266 Kg. Valdor	11,000
27		Ng Meng Siew	Jalan 17 Kg. Valdor	10,000
28		Lim Eng Swee	1648 Jalan 18, Kg. Valdor	10,000
29		Soon Keat Farm	Lot 1966 Kg. Valdor	10,000

SOALAN NO: 514

Bil.	Daerah	Nama Syarikat	Alamat	Kapasiti (Ekor)
30		Lai Chang Sim	Lot 142 @ 1170 Jalan 6, Kg. Valdor	10,000
31		Teoh Mooi Huat	Lot 134 @ 1140 Jalan 18, Kg. Valdor	10,000
32		Tan Boon Hwa	Lot 232, Jalan 8, Kg. Valdor	10,000
33		Yew Kok Tiong	Lot 273 Jalan 20, Kg. Valdor	10,000
34		Ng Yam Keng	Lot 239 Luar Kg. Valdor	10,000
35		Lee Chin Hak	Lot 301 Kg. Valdor	10,000
36		Lee Chin Hak	Lot 224, Mukim 15	10,000
37		Ang Mong Pect	Lot 140, Lima Kongsu	10,000
38		Teoh Chiew Chin	Lot 224, Kg. Hujung Valdor	9,000
39		Lee Sia Kooi	Lot 275 Kg. Valdor	9,000
40		Law Brother Farm	Lot 239 Luar Kg. Valdor	9,000
41		Law Brother Farm	Lot 258 Kg. Valdor	9,000
42		Thian Chor Farming	No. 802 Jalan 9, Kg. Valdor	8,000
43		Tan Guek Ee	Lot 1678 Jalan 17 Kg. Valdor	7,000
44		Lai Ah Kong	No. 1326 Jalan 18, Kg. Valdor	5,000
45	Barat Daya	Lim Chong Teng	No. 51 Mukim 5, Titi Serong, 11000 Balik Pulau	6,000
Jumlah				1,312,900

SOALAN NO: 514

Senarai pembekal dan pemborong telur bagi pasaran Kepala Batas dan Pulau Pinang adalah di bawah fungsi Kementerian Perdagangan Dalam Negeri dan Kos Sara Hidup (KPDN).

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB DATUK SITI ZAILAH MOHD YUSOFF
[RANTAU PANJANG]**

SOALAN

Dato' Hajah Siti Zailah binti Mohd Yusoff [Rantau Panjang] minta **MENTERI DALAM NEGERI** menyatakan adakah pihak Kementerian berhasrat untuk memberikan kad hijau kepada mana-mana individu yang disahkan tidak memiliki kewarganegaraan bagi memastikan semua pihak memiliki identiti.

JAWAPAN

Tuan Yang Di Pertua,

Untuk makluman Ahli Yang Berhormat, Kad Pengenalan Pemastautin Sementara atau MyKAS adalah kad pengenalan berwarna hijau yang dikeluarkan di bawah Peraturan 5(3)(c) Peraturan-Peraturan Pendaftaran Negara 1990 [PPN1990].

Pada masa ini, MyKAS hanya dikeluarkan kepada individu yang lahir di Malaysia dan tidak mempunyai tuntutan kewarganegaraan dari mana-mana negara lain. Pemegang MyKAS adalah bertaraf “Bukan Warganegara” dan pemohon perlu memperbaharui Kad Pengenalan itu setiap lima tahun setelah tempoh sah laku tamat.

MyKAS hanya dikeluarkan kepada individu yang memenuhi syarat-syarat permohonan yang ditetapkan oleh Kerajaan dan pemegang MyKAS tidak mempunyai hak dan keistimewaan yang sama seperti individu berstatus warganegara. Antara syarat yang ditetapkan adalah, pemohon mestilah memiliki Sijil Kelahiran Malaysia dan dapat membuktikan bahawa tidak mempunyai tuntutan kewarganegaraan mana-mana negara ketika permohonan dibuat.

Kerajaan komited untuk memastikan individu yang layak untuk memiliki dokumen pengenalan diri yang teratur dan sah. Individu yang ingin menyemak kelayakan bolehlah hadir terus ke mana-mana Pejabat Jabatan Pendaftaran Negara untuk semakan dan dinasihatkan untuk tidak menggunakan khidmat orang tengah atau ejen.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' HAJAH SITI ZAILAH BINTI MOHD
YUSOFF [RANTAU PANJANG]**

SOALAN

**DATO' HAJAH SITI ZAILAH BINTI MOHD YUSOFF [RANTAU
PANJANG]** minta **MENTERI PENDIDIKAN** menyatakan jumlah anak-anak
yang tercicir daripada arus pendidikan negara dan apakah perancangan
pihak Kementerian bagi mengurangkan masalah tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) merujuk kepada definisi keciciran iaitu murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat tempoh pendidikan. Kadar keciciran murid pada peringkat sekolah rendah adalah 0.07 peratus manakala pada peringkat sekolah menengah pula adalah 0.99 peratus pada tahun 2022.

KPM amat memandang serius kepada isu keciciran. Pelbagai langkah telah dilaksanakan bagi mengurangkan kadar keciciran murid. Pihak KPM telah menyediakan Garis Panduan Mengurus Murid Berisiko Cicir di Sekolah (GPMBC) dan telah dikuatkuasakan sejak 1 Jun 2018 ke semua sekolah kerajaan dan sekolah bantuan kerajaan. Objektif GPMBC ini adalah untuk membantu pihak sekolah mengenal pasti murid berisiko cicir serta mengurus murid berisiko cicir secara berkesan dan sistematik. GPMBC ini juga bertujuan untuk memastikan pemantauan murid khususnya murid berisiko cicir dapat dilaksanakan oleh pihak jabatan pendidikan negeri (JPN), pejabat pendidikan daerah (PPD) dan sekolah secara berterusan.

KPM turut menyediakan modul Serlahkan Keunggulan Diri (SUDI) sebagai panduan kepada sekolah untuk melaksanakan intervensi dalam menangani isu murid berisiko cicir. Melalui modul ini, aktiviti sokongan yang sistematik dapat dilaksanakan secara berterusan bagi memastikan murid kekal bersekolah sehingga tamat persekolahan.

KPM juga telah menjalankan program *outreach* murid cicir di semua PPD dengan kerjasama komuniti setempat. Objektif program *outreach* murid cicir ini adalah memberi intervensi berfokus bagi membantu murid cicir untuk kembali bersekolah. Pada tahun 2022, program ini telah berjaya mengembalikan seramai 5,121 orang murid sekolah rendah dan 1,711 orang murid sekolah menengah ke sekolah berdasarkan data murid kembali ke sekolah JPN.

KPM juga menyediakan pelbagai bentuk bantuan untuk murid seperti menyediakan Biasiswa Kecil Persekutuan, Rancangan Makanan Tambahan (RMT), Kumpulan Wang Amanah Pelajar Miskin (KWAPM), Bantuan Awal Persekolahan (BAP) dan Bantuan Pakaian Seragam Badan Beruniform (BPS). Bantuan seperti pemberian pinjaman buku teks, menyediakan khidmat guru bimbingan dan kaunseling, serta guru pemulihan turut disediakan bagi meningkatkan minat murid untuk meneruskan persekolahan.

KPM juga melaksanakan program Sekolah Model Khas Komprehensif 9 (K9). K9 merupakan sekolah yang memberi pendidikan mulai tahun 1 sehingga tingkatan 3. Matlamat utama sekolah komprehensif 9 atau K9 diwujudkan bagi menangani isu keciciran di kawasan pedalaman, terutamanya dalam kalangan murid Orang Asli dan Peribumi yang menghadapi kesukaran untuk meneruskan pendidikan ke peringkat menengah atas faktor lokasi ke sekolah menengah yang jauh, bentuk muka bumi yang mencabar dan sosio ekonomi keluarga. Sehingga kini terdapat sembilan buah sekolah K9. Setelah melihat kejayaan pelaksanaan K9, KPM telah meluaskan konsep sekolah komprehensif 9 kepada sekolah komprehensif 11 atau K11 iaitu pendidikan bermula dari tahun 1 sehingga tingkatan 5 di sekolah yang sama. Sebagai permulaan, KPM sedang melaksanakan rintis K11 di SK RPS Batau, Kuala Lipis, Pahang dan SK Long Bedian, Baram, Sarawak bermula pada sesi persekolahan 2023/2024.

KPM yakin semua usaha serta inisiatif yang dirancang dan dilaksanakan ini dapat menangani keciciran murid dan memastikan mereka kekal dalam sistem pendidikan negara sehingga tamat persekolahan.

Sekian, terima kasih.

**PEMBERITAHUAN PERTANYAAN BUKAN LISAN (BERTULIS) DEWAN
RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : DATO' HAJAH SITI ZAILAH BINTI MOHD
YUSOFF [RANTAU PANJANG]**

SOALAN

Dato' Hajah Siti Zailah Binti Mohd Yusoff [Rantau Panjang] minta **MENTERI PERDAGANGAN DALAM NEGERI DAN KOS SARA HIDUP** menyatakan status Program Bank Makanan Malaysia dan adakah pihak Kementerian berhasrat untuk mengembangkannya di semua peringkat komuniti dan berapakah peruntukan yang disediakan.

JAWAPAN

Tuan Yang di-Pertua,

1. Kementerian Perdagangan Dalam Negeri dan Kos Sara Hidup (KPDN) telah mula memperkenalkan Program Food Bank Malaysia (PFBM) pada **22 Disember 2018**. PFBM telah diperkenalkan sebagai salah satu inisiatif untuk membantu golongan kurang berkemampuan bagi mendapatkan bekalan makanan yang mana secara tidak langsung dapat meringankan kos sara hidup golongan tersebut. Pelaksanaan PFBM adalah bertujuan:

- i. Membantu golongan kurang berkemampuan mendapatkan akses bekalan makanan agar dapat meringankan kos sara hidup golongan tersebut;
- ii. Memberikan kesedaran kepada pengguna berkenaan inisiatif *zero waste* bagi mengelakkan pembaziran;
- iii. Mengurangkan pembaziran makanan yang masih boleh diguna semula dan mengurangkan kos operasi pasaraya-pasaraya; dan
- iv. Mewujudkan struktur pengurusan lebih makanan yang lebih tersusun dan terancang sebagai salah satu inisiatif peringkat nasional.

2. Sehingga Januari 2023, PFBM telah mengagihkan sumbangan sebanyak **2862 tan metrik lebih makanan** kepada **684,056 ahli isi rumah** di seluruh negara dan telah mengembangkan **Program Food Bank Siswa di 29 Institusi Pengajian Tinggi (IPT)** bagi membantu pelajar untuk mengurangkan beban kos sara hidup di kampus. Untuk makluman juga, pelaksanaan PFBM **tidak menggunakan sebarang peruntukan**.

3. Kementerian sedang giat membuat perancangan untuk meningkatkan lagi program ini untuk terus membantu golongan yang disasarkan seperti berikut:

- i. Pembelian **empat belas (14) unit lori** yang dilengkapi pendingin bagi menggerakkan pengagihan sumbangan makanan kepada penerima;

- ii. Bagi menjamin kelangsungan dan pengukuhan PFBM, Kementerian telah menjalinkan kerjasama dengan Badan Bukan Kerajaan (NGO) sebagai Rakan Strategik Utama (RSU) PFBM.
- iii. Memperkenalkan Inisiatif Teknologi Pembungkusan Makanan secara Retort, ianya mampu memanjangkan jangka hayat makanan antara 18 sehingga 24 bulan. Sehingga Disember 2022, **sebanyak dua belas (12) mesin retort** telah dipasang di seluruh negara.
- iv. Memperkenalkan **Akta Perlindungan Penderma Makanan 2020** di mana akta ini akan melindungi mana-mana pihak penderma daripada liabiliti sivil sekiranya terjadi perkara yang tidak diingini.
- v. Menambahbaik dan mengembangkan lagi Pelaksanaan PFBM dengan menerapkan **konsep “RAHMAH”** yang sedang giat diperkenalkan oleh pihak Kementerian di seluruh negara bagi membantu kumpulan miskin tegar dan golongan kurang berkemampuan untuk mendapatkan bantuan makanan dan barangan keperluan asas dalam mendepani kenaikan kos sara hidup. Untuk makluman, program RAHMAH yang dikenali sebagai **payung RAHMAH** ini terdiri daripada lima (5) indikator utama iaitu :
 - i. **Bakul Rahmah;**
 - ii. **Jualan Rahmah;**
 - iii. **Pakej Rahmah;**
 - iv. **Kafe Rahmah; dan**
 - v. **Menu Rahmah**

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

**DARIPADA : DATO' HAJAH SITI ZAILAH BINTI
MOHD YUSOFF (RANTAU PANJANG)**

SOALAN

DATO' HAJAH SITI ZAILAH BINTI MOHD YUSOFF (RANTAU PANJANG) minta **MENTERI BELIA DAN SUKAN** menyatakan status program Parlimen Belia Malaysia, Malaysia Future Leader School & Perdana Felo serta adakah pihak Kementerian melakukan profiling ke atas setiap alumni yang terlibat.

JAWAPAN

Tuan Yang di-Pertua,

Untuk makluman Yang Berhormat, Kementerian Belia dan Sukan telah melaksanakan Parlimen Belia Malaysia (PBM) sejak tahun 2015 yang mana program ini merupakan satu platform bagi golongan belia untuk menyumbang idea, suara dan pandangan dalam usaha membentuk masa depan negara yang aman, makmur serta dinamis. Manakala program *Malaysia Future Leaders School* (MFLS) pula adalah khusus untuk melahirkan pemimpin masa hadapan negara dan kini MFLS telah memasuki tahun kelima pelaksanaannya. Felo Perdana pula merupakan platform untuk golongan belia melibatkan diri dalam perancangan dan penggubalan dasar kerajaan. Felo Perdana ialah program berkonsepkan mentoring melibatkan penempatan mantee (felo) bersama Ahli Jemaah Menteri dan mula diperkenalkan pada tahun 2013.

SOALAN NO. 518

Sehingga tahun 2022, seramai 424 orang Ahli Parlimen Belia telah mengikuti program ini dan daripada jumlah tersebut, KBS telah mengenalpasti pencapaian individu seperti berikut : -

1. Allen Siden Gramong (2015) - ADUN Machan, Sarawak
2. Mohd Firdaus Ahmad (2015) - ADUN Langkawi, Kedah dan EXCO Kerajaan Negeri Kedah
3. Royston Valentine (2015) - ADUN Tellian, Sarawak
4. Dr. Muhamad Akmal bin Saleh (2015) - ADUN Merlimau, Melaka dan EXCO Kesihatan dan Anti Dadah Negeri Melaka
5. Chiong Sen Sern (2017) - ADUN Bukit Batu, Johor
6. Danesh Raj Nagarajan (2019) - Ahli Lembaga Pengarah Universiti Malaya 21/24 dan SUSK Dato' Seri Azalina Othman Said

Berhubung dengan program MFLS pula, bermula dari tahun 2019 sehingga tahun 2022, seramai 76,157 orang belia telah menerima manfaat daripada program ini. Berikut merupakan statistik keterlibatan peserta berdasarkan jantina dan pecahan etnik dan kaum masing-masing:

Jantina	Tahun Pelaksanaan			
	2019	2020	2021	2022
Lelaki	13,238	3,850	7,583	8,402
Perempuan	14,550	4,490	12,231	11,813
Jumlah	27,788	8,340	19,814	20,215
Jumlah Keseluruhan	76,157			

Pecahan peserta MFLS mengikut jantina

Jantina	Tahun Pelaksanaan			
	2019	2020	2021	2022
Melayu	22,689	6,880	15,246	15,813
Cina	1,683	497	1,961	1,695
India	806	318	794	743
Bumiputera Sabah	1,720	334	1,073	1,083
Bumiputera Sarawak	341	218	555	706
Lain-lain	549	93	185	175
Jumlah	27,788	8,340	19,814	20,215
Jumlah Keseluruhan	76,157			

Pecahan peserta MFLS mengikut etnik dan kaum

Bagi pelaksanaan MFLS pula, pada tahun ini dijangka seramai 30,820 orang belia bakal menerima manfaat daripada program ini termasuk alumni-alumni program melalui 206 program yang telah dirangka oleh KBS. Berikut merupakan perancangan program MFLS pada tahun 2023:

Bil.	Nama Program	Jumlah Program	Jumlah Peserta
1.	MFLS Tier 1	86	17,200
2.	MFLS Tier 2 (5 Kohort)	65	6,150
3.	MFLS Tier 3	1	150
4.	Program Kepimpinan Altruistik (PKA)	40	6,800
5.	Kursus Pengurusan Kepimpinan Alumni MFLS	14	560
Jumlah Keseluruhan		206	30,860

Bagi tujuan *profiling* alumni, KBS melalui Institut Pembangunan dan Kecemerlangan Kepimpinan (i-LEAD) kini dalam proses untuk menambahbaik sistem khas yang dinamakan Sistem Kepimpinan i-LEAD KBS. Sistem ini mengumpulkan data keseluruhan alumni MFLS dan akan menjadi medan untuk alumni berkumpul dan menyalurkan pandangan dan idea mereka secara maya.

Untuk makluman Ahli Yang Berhormat, sehingga tahun 2022 seramai 754 orang Felo Perdana telah menyertai program ini. Daripada jumlah tersebut KBS telah mengenalpasti beberapa orang peserta yang menepati objektif utama program seperti berikut: -

1. Syed Saddiq Syed Abdul Rahman (2013) – Ahli Parlimen Muar
2. Gurpreet Khera (2014) - Chief Business Officer, Boost Digital Bank
3. Armand Zarim Rafique Haniff (2015) - Head of MD's Office UEM Edgenta Berhad
4. Elaine Sim Ee Sze (2016) - Co-Founder, Pinkcollar Employment Agency
5. Danial Fahmi Mohamed Zamberi (2017) - Co-Founder, Adeante Corporation
6. Leeroy Ting Kah Sing (2018) - Head of Regional Public Affair, CARSOME
7. Fazilah Majeed (2019) - Defence and Security Liaison Officer, Netherlands Embassy
8. Elvina Carmella Bahanang Anak Ungan (2020) - Pegawai Tadbir dan Diplomatik (Penjawat Awam)
9. Luqman Hadi bin Azahar (2021) – Senior Engineer, PROTON Sdn Bhd.
10. Ainaa Syifaa Binti Ahmad Sabri (2022) - Litigation Executive, AmBank Malaysia Berhad.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

**DARIPADA : DATO' HAJAH SITI ZAILAH BINTI
MOHD YUSOFF (RANTAU PANJANG)**

SOALAN

DATO' HAJAH SITI ZAILAH BINTI MOHD YUSOFF (RANTAU PANJANG) minta **MENTERI BELIA DAN SUKAN** menyatakan adakah status program Anugerah Remaja Perdana Rakan Muda dan adakah pihak Kementerian bersedia memenuhi kesemua syarat yang telah diletakkan oleh *International Award Foundation* bagi memperbaharui lesen operasi program tersebut di Malaysia.

JAWAPAN

Tuan Yang di-Pertua,

Program Anugerah Remaja Perdana Rakan Muda (ARPRM) merupakan antara program ikonik Kementerian Belia dan Sukan (KBS) sejak ia diperkenalkan pada tahun 1991 dan masih dilaksanakan sehingga kini oleh Kementerian Belia dan Sukan selaku National Award Operator (NAO) di Malaysia. ARPRM diadaptasikan daripada program “The Duke of Edinburgh’s International Award” di bawah The Duke of Edinburgh’s International Award Foundation (IAF) yang berpusat di United Kingdom. ARPRM adalah program pembangunan karakter remaja yang disertai secara sukarela dalam persekitaran yang seimbang dan bebas dari persaingan. Ini akan menggalakkan perkembangan personaliti, sikap bertanggungjawab kepada diri sendiri dan kepada masyarakat. Sehingga kini seramai 191,579 orang belia telah berjaya ditauliahkan untuk ketiga-tiga tahap (Tahap Emas : 1.695 orang, Tahap Perak : 54,176 orang dan Tahap Gangsa : 135,708 orang).

Namun begitu, beberapa perubahan struktur pentadbiran dan operasi peringkat antarabangsa telah berlaku selari dengan peredaran masa. Pada tahun 2013, pihak IAF telah memperkenalkan sistem pelesenan kepada semua negara yang mengoperasikan anugerah ini dan dinilai bagi setiap 2 tahun mengikut piawaian yang telah ditetapkan di samping turut melibatkan peningkatan kos. Sehingga kini, Malaysia telah berjaya menerima *Accredited Conditional License* daripada pihak IAF untuk mengoperasikan program anugerah ini di Malaysia.

Kementerian turut membuat kajian terperinci dengan mengambil kira pelbagai aspek termasuk perjanjian antara dua entiti dan peruntukan kewangan semasa. Perkara tersebut berada dalam peringkat akhir penelitian sebelum sebarang keputusan dibuat berhubung pelaksanaan ARPRM bagi memastikan pengoperasian program anugerah ini dapat dilaksanakan dengan lancar dan memberi manfaat kepada semua pihak.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATO' INDERA DR. SUHAILI BIN ABDUL
RAHMAN [LABUAN]**

SOALAN

DATO' INDERA DR. SUHAILI BIN ABDUL RAHMAN [LABUAN] minta **MENTERI EKONOMI** menyatakan langkah-langkah strategik membantu kumpulan B40 berdasarkan ramalan harga barang dan makanan melonjak sehingga 10 peratus dan apakah dasar jangka pendek bagi menangani ekonomi semasa di bawah Kerajaan Perpaduan ini demi kesejahteraan rakyat

JAWAPAN

Tuan Yang di-Pertua,

Kerajaan akan terus mengimbangi tumpuan untuk menstrukturkan ekonomi negara dengan keperluan ekonomi rakyat berhubung pendapatan yang lebih baik dan kos sara hidup dalam merangka perancangan sosioekonomi negara. Kerajaan komited untuk meningkatkan pendapatan dan menangani kos sara hidup terutamanya kumpulan B40 untuk kesejahteraan rakyat. Bagi menangani kenaikan harga barangan dan makanan serta perkhidmatan, Kerajaan telah dan akan mengambil beberapa inisiatif jangka panjang dan pendek bagi menangani isu-isu berkaitan.

Rancangan Malaysia Kedua Belas (RMKe-12), 2021-2025 menggariskan inisiatif menangani peningkatan kos sara hidup dan meningkatkan kuasa beli bagi jangka masa panjang. Usaha mengurangkan ketidaksamarataan antara isi rumah akan dipergiat bagi mempertingkatkan keterangkuman dan mencapai kesaksamaan untuk semua.

Bagi inisiatif jangka pendek dan sederhana, Kerajaan melalui Majlis Kos Sara Hidup Negara (NACCOL) di bawah Kementerian Perdagangan Dalam Negeri dan Kos Sara Hidup (KPDN) telah memutuskan agar dasar-dasar atau inisiatif-inisiatif sedia ada yang bermanfaat untuk menangani isu kenaikan harga barang diteruskan. Ini termasuk penetapan harga siling minyak masak dan penetapan harga minyak petrol RON 95 dan diesel.

Di samping itu, Program Penyeragaman Harga (PPH) dilaksanakan oleh Kerajaan bagi menyeragamkan harga tujuh barangan asas yang terlibat iaitu beras putih, gula, minyak masak 1kg, tepung gandum, LPG, petrol RON95 dan diesel bagi memastikan bekalan barangan tersebut sampai kepada penduduk di kawasan luar bandar/ pedalaman Semenanjung, Sabah dan Sarawak.

KPDN juga telah memperkenalkan konsep Payung Rahmah yang merangkumi Bakul Rahmah, Jualan Rahmah, Pakej Rahmah, Kafe

Rahmah dan Menu Rahmah bagi mengurangkan impak kenaikan harga barangan ini. Sebagai contoh, Kerajaan memperuntukkan RM100 juta untuk menjayakan program Jualan Rahmah yang menawarkan barangan asas dengan harga sehingga 30% lebih murah berbanding pasaran di setiap kawasan Parlimen.

Melalui Belanjawan 2023, YAB Perdana Menteri merangkap Menteri Kewangan telah mengumumkan Sumbangan Tunai Rahmah (STR) yang akan memberikan manfaat kepada hampir 9 juta penerima. Kerajaan juga komited dalam membantu mengurangkan impak kenaikan kos sara hidup yang dihadapi oleh rakyat. Sejumlah RM64 bilion diperuntukkan bagi subsidi, bantuan dan insentif kepada rakyat. Pemberian bantuan tunai dan subsidi ini dapat meringankan kesan kenaikan harga barangan kepada rakyat terutamanya golongan B40.

Di samping itu, Kementerian Ekonomi sedang melaksanakan Inisiatif Pendapatan Rakyat (IPR) yang bertujuan bagi meningkatkan potensi pendapatan secara mampan. Peruntukan sejumlah RM750 juta disediakan untuk tahun 2023 bagi menjayakan IPR dengan kumpulan sasar miskin tegar dan B40.

Program IPR akan melibatkan tiga inisiatif permulaan iaitu Inisiatif Usahawan Tani (INTAN), Inisiatif Usahawan Makanan (INSAN) dan Inisiatif Operasi Perkhidmatan (IKHSAN). Program ini menyasarkan untuk peserta meraih pendapatan antara RM2,000 hingga RM2,500 sebulan dalam tempoh pemantauan 24 bulan. INSAN sebagai contoh membantu peniaga kecil menjual makanan secara mudah dan murah serta berkualiti.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' INDERA DR. SUHAILI BIN ABDUL
RAHMAN [LABUAN]**

SOALAN

DATO' INDERA DR. SUHAILI BIN ABDUL RAHMAN [LABUAN] minta **MENTERI PENDIDIKAN** menyatakan keseriusan kira-kira 100,000 pelajar berisiko tercicir daripada sistem pendidikan negara berikutan terbeban dengan kos sara hidup yang semakin meningkat mengikut laporan akhbar arus perdana dan setakat mana jumlah keciciran pelajar itu dikesan di Parlimen Labuan serta seluruh negeri Sabah.

JAWAPAN

Tuan Yang di-Pertua,

Kementerian Pendidikan Malaysia (KPM) merujuk kepada definisi keciciran iaitu murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat tempoh pendidikan. Sehingga Jun 2022, kadar keciciran murid di seluruh negara pada peringkat sekolah rendah adalah 0.07 peratus manakala pada peringkat sekolah menengah pula adalah 0.99 peratus.

Walau bagaimanapun, KPM telah meneliti laporan akhbar tersebut dan mendapati bilangan keciciran murid sebanyak 100,000 yang dianggarkan oleh penulis laporan adalah tidak tepat. Ini disebabkan oleh penulis telah menggunakan kaedah penganggaran dan definisi keciciran yang berbeza dengan definisi KPM. Definisi yang digunakan oleh penulis merangkumi keciciran murid daripada sistem pendidikan termasuk bilangan murid yang mendaftar Sijil Pelajaran Malaysia (SPM) tetapi tidak hadir dan gagal mendapatkan sijil.

Untuk makluman Ahli Yang Berhormat, berdasarkan statistik KPM pada tahun 2022 tiada keciciran murid pada peringkat sekolah rendah di Parlimen Labuan dan Sabah. Pada peringkat menengah pula, tiada keciciran murid di Parlimen Labuan manakala kadar keciciran murid di Sabah mencatatkan 0.03 peratus.

KPM sentiasa komited bagi memastikan mereka kekal dalam sistem pendidikan negara. Pemantauan dan intervensi dilaksanakan terhadap murid berisiko cicir dan murid cicir daripada peringkat sekolah hingga ke jabatan pendidikan negeri agar mereka kekal bersekolah sehingga tamat tingkatan lima atau setara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN TAN HONG PIN [BAKRI]

SOALAN

TUAN TAN HONG PIN [BAKRI] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan rekod NRW dalam pecahan setiap negeri serta tindakan dan peruntukan yang diambil bagi mengurangkan NRW di setiap negeri untuk mengelakkan pembaziran air dan gangguan bekalan air berlaku.

JAWAPAN

Tuan Yang di-Pertua,

1. Purata kadar air tidak berhasil (*Non-Revenue Water* - NRW) Malaysia adalah 36.3% pada suku ketiga tahun 2022. Kadar NRW adalah berbeza-beza mengikut negeri dan julat kadar NRW tahun 2022 adalah dari 24.70% - 60.00%. Pecahan kadar NRW setiap negeri bagi suku ketiga tahun 2022 adalah seperti berikut:

BIL.	NEGERI	NRW (%)
1.	Pulau Pinang	24.70
2.	Johor	25.90
3.	Selangor	29.10
4.	Perak	28.90
5.	Melaka	31.00
6.	Negeri Sembilan	33.60
7.	Terengganu	37.30
8.	Labuan	35.90
9.	Sarawak	44.90
10.	Pahang	47.20
11.	Kedah	50.30
12.	Sabah	53.90

13.	Kelantan	52.70
14.	Perlis	60.00
PURATA		36.3

2. Antara punca kadar NRW yang tinggi adalah kehilangan fizikal dan komersial. Merujuk kepada data Suruhanjaya Perkhidmatan Air Negara (SPAN), kehilangan fizikal (kebocoran paip dan penyambungan paip yang tidak sempurna) mewakili 75%, kehilangan komersial (kecurian air dan bacaan meter yang tidak tepat) mewakili 20% dan lain-lain faktor (penyelenggaraan dan kegunaan pemadaman kebakaran) sebanyak 5% kadar NRW. Penyelesaian NRW perlu ditangani secara holistik dan berterusan serta memerlukan peruntukan yang besar. Namun begitu, kekangan kewangan yang dihadapi oleh operator air merupakan cabaran utama dalam pelaksanaan program NRW.

3. Antara langkah yang diambil bagi membantu operator air mengurangkan kadar NRW adalah seperti berikut:

- i. peruntukan sebanyak RM1.907 bilion di bawah RMKe-11 hingga RMKe-12 bagi pelaksanaan Program NRW Kebangsaan melalui Pendekatan 1 dan Pendekatan 2;
- ii. pembiayaan Modal (CAPEX) penggantian paip oleh Pengurusan Aset Air Bhd. (PAAB) berjumlah RM2.084 bilion dari tahun 2010 hingga Disember 2022 bagi negeri yang telah memuktamadkan penstrukturan semula industri bekalan air;
- iii. kemudahan pinjaman jangka pendek oleh PAAB bagi membiayai pelaksanaan program NRW di bawah skop perbelanjaan operasi (OPEX) seperti penggantian meter, pembangunan *District Metering Zone* (DMZ), pengesanan kebocoran secara aktif dan lain-lain;

- iv. menggalakkan pendanaan pihak swasta dalam kerja pengurangan NRW di bawah Program NRW Kebangsaan;
- v. pemantapan kawal selia oleh Suruhanjaya Perkhidmatan Air Negara (SPAN) dari segi penetapan Petunjuk Prestasi Utama (KPI), pengauditan operasi, penguatkuasaan bagi kes kecurian air, pengawalan kualiti bahan dan produk yang mematuhi standard, berkualiti dan berdaftar dengan SPAN; dan
- vi. kerjasama antara SPAN dan Lembaga Pembangunan Industri Pembinaan Malaysia (CIDB) serta Jabatan Pembangunan Kemahiran (JPK) dalam meningkatkan kompetensi tenaga kerja sektor air selaras dengan kehendak Seksyen 49, Akta Industri Perkhidmatan Air Negara 2006 [Akta 655].

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)
DARIPADA : YB DATO' INDERA DR. SUHAILI BIN ABDUL
RAHMAN [LABUAN]

SOALAN

DATO' INDERA DR. SUHAILI BIN ABDUL RAHMAN [LABUAN]
minta **MENTERI PERTANIAN DAN KETERJAMINAN MAKANAN**
menyatakan jangkaan harga makanan ayam yang dijangka tinggi
sepanjang tahun ini memberi kesan negatif pada industri ternakan
ayam dan setakat mana peranan Majlis Tindakan Sara Hidup Negara
(NACCOL) mengatasi masalah terhadap bekalan rantai ternakan
ayam dan telur yang terjejas kebelakangan ini.

JAWAPAN

Negara berhadapan dengan pelbagai cabaran sejak beberapa tahun kebelakangan ini. Isu perubahan iklim, wabak COVID-19 dan ketidakstabilan geopolitik dunia seperti konflik Rusia-Ukraine telah memberi kesan terhadap rantai bekalan makanan global. Antara impak yang ketara adalah peningkatan harga bahan makanan ternakan ayam seperti jagung bijian dan hampas kacang soya di Malaysia yang mencecah sehingga 34% pada akhir tahun 2022.

Melalui Majlis Tindakan Sara Hidup Negara (NACCOL) di bawah Kementerian Perdagangan Dalam Negeri dan Kos Sara Hidup (KPDN), isu bekalan ayam dan telur ayam diberi tumpuan dengan pelbagai intervensi yang telah dilaksanakan seperti berikut:

- (i) memperuntukkan subsidi berjumlah RM1.8 bilion kepada penternak ayam pedaging dan ayam penelur bermula dari Februari sehingga Disember 2022 selaras dengan kawalan harga ke atas ayam dan telur ayam bagi menstabilkan harga di pasaran. Kerajaan turut bersetuju untuk meneruskan pemberian subsidi sehingga Jun 2023 dengan peruntukan sebanyak RM1.28 bilion;
- (ii) menawarkan pinjaman mudah kepada penternak ayam melalui Agrobank di bawah Dana Pembiayaan Agromakanan berjumlah RM300 juta untuk membantu penternak mengatasi masalah modal pusingan akibat kenaikan kos pengeluaran;
- (iii) membenarkan kemasukan telur dari sumber luar secara sementara yang akan dikaji semula apabila bekalan kembali stabil;
- (iv) memantau kuantiti bekalan di peringkat daerah ke atas peruncit terpilih secara harian, pemborong terpilih secara mingguan dan pengeluar terpilih di seluruh negara yang meliputi 222 Parlimen dan 576 kawasan Dewan Undangan Negeri;

SOALAN NO: 523

- (v) melaksanakan Program Pemantauan Harga di pasaran dan langkah pencegahan bagi menstabilkan harga yang melibatkan 1,000 pegawai pemantau harga; dan
- (vi) melaksanakan siasatan dan tindakan di bawah Akta Kawalan Harga dan Anti Pencatutan (AKHAP) 2011 bagi memastikan tiada aktiviti mengaut keuntungan berlebihan.

Kerajaan akan terus komited untuk bekerjasama dengan semua pemegang taruh bagi memastikan industri ayam dan telur terus mampan dan stabil.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' INDERA DR. SUHAILI BIN ABDUL
RAHMAN [LABUAN]**

SOALAN

DATO' INDERA DR. SUHAILI BIN ABDUL RAHMAN [LABUAN] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan kesediaan Kementerian mewujudkan pakej pemasangan tenaga solar rakyat mampu milik dalam memperkasakan tenaga boleh baharu di seluruh negara dan berapa kos sebenarnya pemasangan tenaga solar di kediaman dan komersial pada masa ini.

JAWAPAN

Tuan Yang di-Pertua,

1. Kerajaan telah menyediakan program khas di bawah Program NEM Rakyat untuk membolehkan rakyat yang merupakan pengguna elektrik domestik memasang sistem solar di bumbung premis/ rumah kediaman masing-masing. Manakala, Program NEM NOVA diperkenalkan untuk membolehkan pemasangan sistem solar oleh pengguna komersial dan industri. Secara puratanya, kos pemasangan sistem solar adalah dalam lingkungan RM4,000 hingga RM5,000 bagi setiap kilowatt sistem solar yang dipasang.

2. Bagi membolehkan pembiayaan kos pemasangan sistem solar menjadi mampu milik, Kerajaan telah mengalakkan penyediaan pakej pembiayaan oleh pelabur solar atau institusi kewangan seperti berikut:

- a) skim solar sifar modal kepada pengguna komersial yang membolehkan pemasangan solar dilakukan tanpa bayaran modal;
- b) skim ansuran kad kredit sifar faedah kepada pengguna domestik yang membolehkan pengguna membayar balik kos pemasangan sistem solar secara ansuran bulanan tanpa dikenakan faedah oleh pihak bank; dan
- c) skim pinjaman khas solar kepada pengguna komersial yang membolehkan pengguna mendapatkan pinjaman bank untuk pembiayaan kos pemasangan sistem solar dengan kadar faedah yang ditetapkan oleh institusi kewangan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK SUHAIMI BIN NASIR
[LIBARAN]**

SOALAN

YB DATUK SUHAIMI BIN NASIR [LIBARAN] minta **MENTERI PEMBANGUNAN KERAJAAN TEMPATAN** menyatakan adakah Kerajaan mempunyai perancangan memberi tawaran skim sewa untuk beli dalam usaha memberi pemilikan rumah kepada penyewa asal.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan melalui Kementerian Pembangunan Kerajaan Tempatan (KPKT) sentiasa menitik beratkan aspek pemilikan rumah oleh rakyat yang terkesan terutamanya golongan B40 dan M40. Ini termasuklah menawarkan skim sewa beli atau skim Skim *Rent-To-Own* (RTO). Sehubungan itu, KPKT telah memperkenalkan dua (2) program perumahan sewa beli atau RTO seperti berikut:

(1) RTO Program Perumahan Rakyat (PPR)

Skim RTO PPR telah diperkenalkan pada tahun 2017 dan merupakan skim pembiayaan mudah khusus bagi membantu pemilikan rumah golongan berpendapatan B40 yang telah ditawarkan unit PPR tapi gagal mendapatkan pembiayaan daripada mana-mana institusi kewangan.

Skim RTO PPR telah dilaksanakan di empat belas (14) PPR di seluruh negara yang melibatkan 6,166 unit rumah. Sehingga 31 Januari 2023, sebanyak 4,690 keluarga telah ditawarkan skim RTO PPR di seluruh negara.

(2) RTO Perbadanan PR1MA Malaysia (PR1MA)

Skim Pembiayaan RTO PR1MA diperkenalkan bagi meningkatkan pemilikan rumah dalam kalangan rakyat Malaysia khususnya golongan berpendapatan pertengahan (M40). Melalui skim ini, bakal pembeli yang menghadapi masalah untuk mendapat pinjaman melalui institusi kewangan mempunyai pilihan untuk menyewa selama lima (5) tahun pertama dengan kadar sewa yang berpatutan sebelum membeli rumah tersebut dengan pembiayaan penuh. Skim RTO ini dibuka kepada semua bakal pembeli rumah PR1MA bagi projek yang terpilih iaitu yang telah siap dibina di seluruh negara.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

DARIPADA : YB DATUK SUHAIMI BIN NASIR (LIBARAN)

SOALAN

DATUK SUHAIMI BIN NASIR [LIBARAN] minta **MENTERI KERJA RAYA** menyatakan status projek Pan-Borneo di Sabah yang kini dalam pembinaan.

JAWAPAN

Tuan Yang Di-Pertua,

Untuk makluman Ahli Yang Berhormat, pelaksanaan projek Fasa 1 Lebuhraya Pan Borneo (LPB) Sabah dengan anggaran jarak keseluruhan 706 km dibahagikan kepada 35 pakej kerja di mana sehingga kini, 15 pakej kerja telah dibuat pelantikan kontraktor bagi tujuan kerja-kerja pembinaan dengan status kemajuan sehingga Disember 2022 bagi pakej kerja yang telah dimulakan adalah 73%. Sehingga kini, pakej-pakej kerja berikut telah dibuka untuk pengguna jalan raya:

- i) Pakej Kerja 5 : Donggongan ke Papar telah siap pada 29 Ogos 2022; dan
- ii) Pakej Kerja 27: Kampung Lot M ke Batu 32, Sandakan telah siap pada 18 November 2022.

Manakala status satu (1) pakej kerja baharu iaitu Pakej Kerja 9 yang melibatkan laluan dari Serusop ke Pituru pula dijangka akan dilaksanakan seawal suku tahun kedua 2023, menjadikan keseluruhan 16 pakej kerja akan dilaksanakan buat masa kini, dengan kos keseluruhan sebanyak RM 10,849 juta menggunakan peruntukan pembangunan (*Development Expenditure* – DE) sepenuhnya.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN SUHAIMI BIN NASIR [LIBARAN]

SOALAN

Datuk Suhaimi bin Nasir [Libaran] minta **MENTERI DALAM NEGERI** menyatakan :

- (a) apakah usaha untuk menaik taraf fasiliti balai-balai polis, pondok polis dan rumah anggota yang terletak di kawasan luar bandar; dan
- (b) apa status projek pembinaan balai polis baharu di Rancangan Sungai Manila Batu 12, Sandakan yang telah dirasmikan sebelum ini.

JAWAPAN

Tuan Yang Di Pertua,

- (a) Kerajaan melalui Kementerian Dalam Negeri telah memperuntukkan sejumlah RM38,124,400.70 pada tahun 2021 dan RM30,615,797.85 pada tahun 2022 bagi menaik taraf prasarana semua 338 buah balai polis serta 649 buah kuarters polis yang sangat daif di seluruh Malaysia.

PDRM telah menyenaraikan cadangan pembangunan baharu khususnya bagi menggantikan bangunan-bangunan lama serta tidak ekonomik untuk diselenggara dan dibaiki. Senarai cadangan pembangunan di dalam Pelan Tindakan Pembangunan Strategik PDRM (PSPDRM) tahun 2021 hingga 2025 bagi Kontinjen Sabah adalah seperti berikut :

1. Pembinaan IPD Penampang dan Perumahan;
2. Pembinaan IPD Papar dan Perumahan;
3. Pembinaan Tuaran dan Perumahan;
4. Pembinaan Balai Polis Kuala Penyu;
5. Pembinaan Balai Polis Sook dan Perumahan;
6. Pembinaan Balai Polis Kerakit dan Perumahan;
7. Pembinaan Balai Polis Pitas dan Perumahan; dan
8. Pembinaan Pondok Polis Kampung Pimping dan Perumahan.

Pada masa ini pihak Kementerian sedang memberi penumpuan dan keutamaan bagi projek sedia ada (baharu dan sambungan) serta kerja-kerja menaiktaraf premis PDRM yang uzur. Pihak Kementerian akan membuat semakan keutamaan dari semasa ke semasa dan sekiranya terdapat keperluan mendesak, cadangan projek ini akan dikaji semula untuk dimasukkan dalam *Rolling Plan* berikutnya.

Tuan Yang Di Pertua,

- (b) Semakan dengan Ketua Balai Polis Daerah (KBPD) Sandakan mendapati bahawa tidak ada Balai Polis baharu Sungai Manila Batu 12 dirasmikan sebelum ini. Pada masa kini, terdapat Pondok Polis Sungai Manila yang dibina pada tahun 1974 (49 tahun) di atas tanah Lot CL075462252, Mukim Sandakan seluas 0.51 ekar dengan perjawatan seramai dua (2) orang. Untuk makluman, pembinaan Balai Polis baharu Rancangan Sungai Manila, Sandakan tidak disenaraikan dalam PSPDRM tahun 2021 hingga 2025 bagi Kontinjen Sabah.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN SUHAIMI BIN NASIR [LIBARAN]

SOALAN

Datuk Suhaimi bin Nasir [Libaran] minta **MENTERI DALAM NEGERI** menyatakan adakah rancangan Kerajaan bagi menubuhkan sebuah agensi kawalan sempadan Sabah - Filipina, Sabah - Kalimantan dalam masa terdekat bagi tugas kawal selia persempadanan yang lebih berkesan.

JAWAPAN

Tuan Yang Di Pertua,

Kerajaan sentiasa komited dalam memperkasa dan memperkukuhkan kawalan keselamatan di Sabah khususnya di Pantai Timur Sabah yang bersempadan dengan Filipina dan juga sempadan Sabah-Kalimantan. Antara pendekatan yang telah diambil oleh Kerajaan dalam mengawal keselamatan di sempadan Sabah-Filipina adalah melalui penubuhan *Eastern Sabah Security Command* (ESSCOM) pada 01 April 2013. Penubuhan ESSCOM adalah berperanan sebagai agensi yang bertanggungjawab dalam mengekalkan dan meningkatkan keselamatan di Zon Selamat Sabah Timur (ESS Zone).

Dalam pada itu, Kementerian Dalam Negeri (KDN) juga sedang menjalankan kajian memperincikan penubuhan agensi tunggal sempadan (Single Border Agency-SBA) bagi **fasa pertama yang memfokuskan kepada pintu masuk negara yang diwartakan di bawah Akta Imigresen 1959/63 [Akta 155] termasuk pelabuhan** melalui Pasukan Nukleus SBA. Cadangan satu badan tunggal diwujudkan adalah untuk menambahbaik perkhidmatan di pintu-pintu masuk di seluruh negara termasuk Sabah khususnya bagi mempercepatkan proses pemeriksaan orang dan barang.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN SUHAIMI BIN NASIR [LIBARAN]

SOALAN

Datuk Suhaimi bin Nasir [Libaran] minta **MENTERI DALAM NEGERI** menyatakan pelan strategik dan garis masa Kerajaan dalam membantu Kerajaan Negeri Sabah dalam membentaras kemasukan baharu Pendatang Tanpa Izin ke Sabah khususnya dari sempadan Filipina dan Kalimantan, Indonesia.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Dalam Negeri (KDN) memandang serius berkaitan masalah Pendatang Asing Tanpa Izin (PATI) di negara ini yang memerlukan strategi pembanterasan secara berterusan. Justeru, sebagai langkah memperkukuhkan tadbir urus dan menambah baik sistem kerja penguatkuasaan sedia ada, KDN sedang memperhalusi pelan strategik penguatkuasaan PATI yang lebih komprehensif dan menyeluruh.

Statistik Jabatan Imigresen Malaysia sehingga 08 Februari 2023 menunjukkan terdapat 5,436 orang PATI yang ditahan di empat buah Depot Imigresen di Negeri Sabah. Manakala bagi tahanan yang dikategorikan orang tidak berdokumen (*undocumented*) adalah seramai 12 orang.

Berdasarkan pelaksanaan aktiviti penguatkuasaan melibatkan premis-premis perniagaan ataupun perusahaan, sebanyak 1,169 operasi telah dilaksanakan oleh JIM Negeri Sabah pada tahun 2019 dengan tangkapan seramai 4,178 orang PATI dan 23 orang majikan. Pada tahun 2020 pula, sebanyak 942 operasi telah dilaksanakan dengan tangkapan seramai 1,866 orang PATI dan 26 orang majikan. Sepanjang tahun 2021, sebanyak 1,076 operasi penguatkuasaan telah dilaksanakan dengan tangkapan seramai 1926 orang PATI dan 45 majikan. JIM Negeri Sabah telah melaksanakan 700 operasi penguatkuasaan melibatkan tangkapan 1,451 orang PATI daripada pelbagai negara dan 14 majikan atas pelbagai kesalahan imigresen pada tahun 2022.

Bagi memastikan usaha pengusiran dilaksanakan dengan cekap, dan isu kesesakan atau kepadatan di Depot Imigresen khususnya di Negeri Sabah tidak berterusan, Kementerian Dalam Negeri melalui JIM Negeri Sabah mengambil tindakan secara konsisten seperti berikut:

- (i) melaksanakan pemindahan banduan dari depot berkapasiti tinggi ke depot yang kurang berkapasiti tinggi;
- (ii) menggiatkan usaha pengusiran PATI ke negara asal; dan
- (iii) mengadakan rundingan secara berkala dengan pihak Kedutaan Negara Filipina dan Indonesia bekerjasama bagi mempercepatkan proses penghantaran pulang tahanan ke negara asal.

JIM Negeri Sabah juga telah merekodkan seramai 7,053 PATI diusir dari empat Depot Imigresen di Negeri Sabah pada tahun 2020. Bagi tahun 2021 seramai 2,947 orang PATI telah diusir. Manakala sepanjang tahun 2022, seramai 5,450 orang PTI telah diusir pulang ke negara asal masing-masing. Bagi tempoh 1 Januari sehingga 08 Februari 2023, seramai 484 orang lagi PATI telah diusir pulang.

Mesyuarat Jawatankuasa Pengurusan Warga Asing di Sabah (JKPWAS) pada 17 Jun 2022 telah memutuskan supaya Kerajaan Negeri Sabah melaksanakan pendataan warga asing di Sabah secara digital terlebih dahulu sebelum cadangan penyeragaman dokumen dilaksanakan. Kerajaan Negeri Sabah sedang melaksanakan aktiviti Pendataan Digital Warga Asing di Sabah yang bermula secara *pilot test*.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN SYED IBRAHIM BIN SYED NOH
[LEDANG]**

SOALAN

Tuan Syed Ibrahim bin Syed Noh [Ledang] minta **MENTERI DALAM NEGERI** menyatakan data dan statistik kes penderaan atau jenayah melibatkan pengasuh di pusat asuhan kanak-kanak.

JAWAPAN

Tuan Yang Di Pertua,

Statistik kes penderaan di rumah pengasuh dan pusat asuhan bagi tahun 2018 hingga 2022

Tempat Kejadian	2018	2019	2020	2021	2022	Jumlah
Rumah Pengasuh	137	118	121	86	107	569
Pusat Asuhan/Taska Berdaftar	20	29	29	51	62	191
Pusat Asuhan/Taska Tidak Berdaftar	0	0	0	10	10	20
Tadika	0	0	0	1	9	10
Jumlah	157	147	150	148	188	790

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN SYED IBRAHIM BIN SYED NOH
[LEDANG]**

SOALAN

TUAN SYED IBRAHIM BIN SYED NOH [LEDANG] minta
MENTERI PERTANIAN DAN KETERJAMINAN MAKANAN
menyatakan unjuran perbelanjaan yang akan ditanggung
Kementerian dalam melaksanakan strategi baharu untuk menambah
rantai makanan serta sumber negara bagi menggantikan bekalan
import.

JAWAPAN

Tuan Yang di-Pertua,

Dalam usaha Kementerian untuk melaksanakan strategi baharu bagi meningkatkan sumber dalam negara, menggantikan bekalan import, dan meningkatkan kecekapan rantai makanan, unjuran perbelanjaan yang akan ditanggung oleh Kementerian adalah seperti berikut:

1. Program Pengukuhan Keterjaminan Makanan bagi RMKe-12 (2023) – Kos Projek RM100 juta

Kementerian telah diperuntukkan RM100 juta bagi melaksanakan Program Pengukuhan Keterjaminan Makanan pada tahun ini. Pelaksanaan program ini akan memfokuskan kepada aspek pengeluaran dan pemasaran bagi mengurangkan kebergantungan import makanan sekaligus meningkatkan keterjaminan makanan negara.

**PEMBERITAHUAN PERTANYAAN BUKANBERTULIS DEWAN
RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN
DARIPADA : TUAN SYED IBRAHIM BIN SYED NOH
[LEDANG]

SOALAN

TUAN SYED IBRAHIM BIN SYED NOH [Ledang] minta **MENTERI PERDAGANGAN DALAM NEGERI DAN KOS SARA HIDUP** menyatakan langkah advokasi yang akan dilaksanakan oleh Kerajaan berkenaan peranan rakyat menghadapi krisis inflasi.

JAWAPAN

Yang di-Pertua,

Kementerian dari semasa ke semasa sentiasa merangka program-program kepenggunaan dengan harapan untuk meningkatkan pencapaian Indeks Pendayaupayaan Pengguna (Consumer Empowerment Index, CEI) Malaysia, pada ketika ini berada di tahap sederhana iaitu 63.1% pada masa yang sama mendidik rakyat untuk menghadapi krisis inflasi.

Pada tahun 2022, Kementerian ini khususnya Bahagian Gerakan Kepenggunaan telah menjalankan advokasi kepenggunaan melalui pelbagai platform bertujuan untuk memperkasakan ilmu kepenggunaan secara lebih menyeluruh serta memberi pendedahan kepada masyarakat supaya pengguna Malaysia lebih matang dan bijak membuat keputusan pembelian terutamanya dalam tempoh krisis inflasi. Antara advokasi yang telah dilaksanakan adalah advokasi kepenggunaan melalui media sosial, platform pasaran digital, pengangkutan awam dan media elektronik di premis kerajaan tumpuan orang ramai. Advokasi turut diadakan sepanjang bulan Pengguna. Para pelajar sekolah dan IPT juga didedahkan dengan maklumat kepenggunaan melalui Kelab Pengguna Sekolah dan Gerakan Pengguna Siswa.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN JAWAB LISAN

**DARIPADA : YB TUAN SYED IBRAHIM BIN SYED NOH
[LEDANG]**

SOALAN

YB TUAN SYED IBRAHIM BIN SYED NOH [LEDANG] minta **MENTERI PELANCONGAN, SENI DAN BUDAYA** menyatakan data impak sambutan peringkat kebangsaan bagi acara-acara yang dilaksanakan oleh Kementerian di bandar-bandar utama seperti Kuala Lumpur.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Kementerian Pelancongan, Seni dan Budaya (MOTAC) telah mengadakan beberapa program berskala nasional sepanjang tahun 2021 dan 2022, sama ada secara fizikal atau dalam talian. MOTAC menerusi Perbadanan Kemajuan Kraftangan Malaysia (Kraftangan Malaysia) sentiasa membangun dan memperkasa industri kraf tempatan yang merupakan sumber pendapatan utama usahawan kraf di Malaysia. Usaha-usaha meningkatkan industri kraf dilaksanakan menerusi program-program acara dan promosi bagi memastikan usahawan kraf terus lestari dan berdaya saing seterusnya mampu menyumbang kepada pendapatan negara.
2. Pada tahun 2022, sebanyak RM41.7 juta jualan berjaya dijana melalui 460 aktiviti promosi fizikal dengan penglibatan seramai 2,853 orang usahawan. Salah satunya adalah acara signatur iaitu Hari Kraf Kebangsaan (HKK) 2022 dengan janaan nilai jualan sebanyak RM13.8 juta dan penyertaan seramai 403 orang usahawan dengan kehadiran seramai 40,991 orang pengunjung
3. Selain itu, Majlis Rumah Terbuka Malaysia (MRTM) Tahun Baharu Cina telah diadakan pada 20 Februari 2021 secara dalam talian. Siaran program dilaksanakan secara maya melalui saluran TV1 dan Facebook Kementerian ini. Jumlah tontonan yang dicatatkan sebanyak 16,315 tontonan yang mana purata tontonan langsung seramai 252 tontonan dan 300 komen. Berdasarkan analisis data, purata umur penonton adalah di antara 25 hingga 44 tahun dan interaksi secara langsung sebanyak 2,618.
4. Minggu Budaya Malaysia (MBM) telah berlangsung secara dalam talian bermula dari 25 hingga 30 Oktober 2021 sebagai menterjemahkan strategi di bawah Dasar Kebudayaan Negara (DAKEN). Aktiviti yang diketengahkan termasuk maklumat berkenaan aktiviti pengarkiban, seni

persembahan, seni visual, kandungan manuskrip terpilih, pendidikan seni, budaya dan warisan, video pengiktirafan UNESCO, artifak dan sejarah Malaysia, serta penjenamaan Malaysia sebagai '*Top of the Mind Ecotourism Destination of the World*'. Majlis Perasmian telah disempurnakan oleh YB Menteri Pelancongan, Seni dan Budaya. Secara keseluruhannya, nilai publisiti (*PR Value*) yang dicatatkan adalah RM6,110,153.07 dan *Advertising Value Equivalency* (AVE) sebanyak RM2,036,717.69.

5. Pada 13 November 2021, MRTM Deepavali telah dilaksanakan di Pusat Pelancongan Malaysia (MaTIC) secara fizikal dengan mematuhi SOP yang diluluskan oleh MKN bermula dari jam 10 pagi hingga 11.30 malam. Majlis Pelancaran telah disempurnakan oleh YAB Perdana Menteri dan turut dihadiri YB Menteri Pelancongan, Seni dan Budaya serta YB Menteri Sumber Manusia, YB Menteri Wilayah Persekutuan dan Presiden MIC Tan Sri SA Vigneswaran. Antara aktiviti yang diketengahkan termasuklah persembahan kebudayaan kaum India dengan gabungan persembahan kebudayaan pelbagai kaum di Malaysia. Selain itu, aktiviti-aktiviti lain termasuk demonstrasi masakan India, kraf seramik, pakej Cuti-Cuti Malaysia, pameran dari Jabatan dan Agensi di bawah MOTAC dan pameran kolam. Kehadiran khalayak dianggarkan seramai 3,000 pengunjung, dan siaran langsung ditonton seramai 3.4 juta tontonan serta nilai publisiti yang direkodkan sebanyak RM1,800,435. Secara keseluruhannya, sebanyak 49 berita dengan nilai publisiti RM8,624,137.22 dan AVE sebanyak RM2,874,712.40.

6. MOTAC menerusi JKKK juga melaksanakan Program Pelancongan Budaya (*Culture Based Tourism*) yang merupakan program berbentuk penyemarakan seni budaya dan menjadi salah satu bentuk promosi pelancongan budaya dan Program Panggung Seni Tradisional (PST) yang bertujuan untuk menghidupkan seni warisan tidak ketara melalui seni pementasan. Program ini yang turut memberi ruang kepada penggiat/ NGO seni budaya untuk berkarya mensasarkan pelancong tempatan dan antarabangsa untuk menghayati keunikan seni budaya negara.

Berikut merupakan rumusan pelaksanaan program ini yang telah dilaksanakan di sekitar Kuala Lumpur mulai tahun 2015-2022:

PERKARA	BUTIRAN
Program dan Lokasi	i. IFTAR@KL Dataran Merdeka, Kuala Lumpur
	ii. Festival Permainan Malaysia@Kuala Lumpur Dataran Merdeka, Kuala Lumpur
	iii. Festival Seni Hidup (<i>Living Arts Cultural Festival</i>) MaTic, Jalan Ampang, Kuala Lumpur
	iv. Festival Kesenian Orang Asli dan Peribumi Antarabangsa Taman Tasik Titiwangsa, Kuala Lumpur
Tahun pelaksanaan	2015-2022
Khalayak (Org)	Keseluruhan: 840,052 Tempatan: 710,884 Antarabangsa: 129,168
Pendapatan (RM)	3,410,006.35
Nilai PR (RM)	21,359,147.16

PERKARA	BUTIRAN
Program	Panggung Seni Tradisional (PST)
Tempat	Pusat Pelancongan Malaysia (MaTiC), Jalan Ampang, Kuala Lumpur
Tahun pelaksanaan	2015-2022

Penglibatan peserta	4,401
Khalayak (Org)	34,808
Khalayak Antarabangsa (Org)	1,148
Pendapatan (RM) (Juala Tiket)	236,973.00
Nilai PR (RM)	5,090,482.81

7. Acara-acara yang dilaksanakan Kementerian ini mempunyai impak sosial dalam bentuk pemupukan perpaduan dan keharmonian kaum. Impak budaya dapat dilihat melalui pengekaln warisan seni budaya Malaysia yang unik, impak politik yang mempamerkan kestabilan ekonomi, politik dan kebebasan beragama, serta interaksi masyarakat bersama kepimpinan negara. Penganjuran acara ini mampu meningkatkan impak ekonomi melalui peningkatan ekonomi terutamanya dalam kalangan masyarakat setempat. Ini amat penting dalam proses pemulihan negara setelah memasuki fasa endemik. Promosi yang dilaksanakan turut mampu menarik kedatangan pelancong domestik dan antarabangsa, seterusnya menyemarakkan aktiviti seni budaya Malaysia.

8. Kementerian ini amat komited dalam bersama-sama Kerajaan dalam memulihkan kesejahteraan rakyat Malaysia pasca pandemic COVID-19 melalui penganjuran acara berskala nasional, yang terbukti mampu menjenamakan semula Malaysia sebagai destinasi pelancongan setanding negara-negara lain

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN SYED IBRAHIM BIN SYED NOH
[LEDANG]**

SOALAN

YB TUAN SYED IBRAHIM BIN SYED NOH [LEDANG] minta **MENTERI
PEMBANGUNAN KERAJAAN TEMPATAN** menyatakan perkembangan
usaha menyelesaikan isu projek perumahan sakit dan terbengkalai.

JAWAPAN

Untuk makluman Ahli Yang Berhormat, pelbagai langkah kawalan dilaksanakan oleh Kementerian Pembangunan Kerajaan Tempatan (KPKT) bagi menyelesaikan isu projek perumahan sakit dan terbengkalai. Antara tindakan yang telah diambil adalah seperti berikut:

- i) senarai projek perumahan yang sakit yang telah tamat tempoh Perjanjian Jual Beli yang pertama dan juga projek terbengkalai akan dikenal pasti dan dipaparkan di laman portal Jabatan Perumahan Negara (JPN) kepada umum. Senarai projek ini boleh dijadikan panduan oleh bakal pembeli rumah dan pihak pembiaya sebelum meluluskan sesuatu pinjaman perumahan baharu dan mengawal bayaran kemajuan kepada pemaju sedia ada;
- ii) melaksanakan pemantauan yang lebih kerap termasuk pembekuan akaun pemajuan perumahan (*Housing Development Account* - HDA) bagi projek-projek sakit terpilih untuk mengelakkan pengeluaran wang secara tidak bertanggungjawab oleh pemaju;
- iii) menyenarai hitam pemaju dan Ahli Lembaga Pengarah dan menyekat pemaju projek sakit daripada memohon Permit Iklan dan Jualan (*Advertising Permit*) yang baharu selagi projek sakit sedia ada belum disiapkan dengan CCC Penuh;
- iv) bagi projek-projek sakit yang tiada kemajuan kerja di tapak dalam tempoh yang lama, projek-projek ini akan diangkat kepada YB Menteri KPKT untuk disahkan sebagai projek terbengkalai selaras dengan Seksyen 11(1)(ca), Akta Pemajuan Perumahan (Kawalan Dan Pelesenan) 1966 (Akta118) & Peraturan-Peraturan; dan

- v) Kementerian sedang mempertimbangkan untuk meminda Akta 118 yang berkaitan dengan kewajipan pemaju untuk mengemukakan wang deposit sebanyak 3% daripada kos pemajuan keseluruhan di bawah Akta supaya wang deposit tersebut boleh digunakan bagi tujuan menyelamatkan projek sakit atau terbengkalai.

Bagi pembeli yang terjejas pula, Kementerian melalui JPN akan mengeluarkan surat pengesahan projek bermasalah (sakit atau terbengkalai) atas permohonan pembeli kepada pihak pembiaya pinjaman untuk pengstruktur semula pinjaman. Ini adalah bagi membantu meringankan beban kewangan yang ditanggung oleh pembeli.

Selain itu, *Task Force* Projek Perumahan Swasta Sakit dan Terbengkalai juga telah diwujudkan oleh Kementerian untuk mencari pendekatan yang lebih berfokus dan strategik serta memberi impak positif dalam menyelesaikan isu projek sakit dan terbengkalai.

KPKT sentiasa berusaha untuk mengenal pasti dan menyelesaikan isu projek perumahan sakit dan terbengkalai ini secara holistik dengan melibatkan lebih banyak pihak dalam industri untuk mendapatkan pandangan dan idea dari perspektif yang lebih meluas melalui program-program yang dirancang seperti berikut:

- i) mengadakan program kerjasama pintar (*smart partnership*) bersama kerajaan negeri, Lembaga Perumahan dan Hartanah Negeri, Pihak Berkuasa Tempatan (PBT), agensi kerajaan, agensi teknikal, dan pemaju bagi mengenal pasti permasalahan dan mencari jalan penyelesaian bersama bagi menangani isu projek sakit dan terbengkalai di pelbagai peringkat;
- ii) mengadakan Forum Perumahan Swasta dengan kumpulan kerja yang terdiri daripada pemegang taruh (*stakeholder*) dan pemain

industri, antaranya *Real Estate and Housing Developers' Association Malaysia* (REHDA), Persatuan Bank Malaysia, Persatuan Pembeli Rumah, Jabatan Peguam Negara, pelikuidasi, dan lain-lain agensi kerajaan dan teknikal;

- iii) memperkasa syarikat berkaitan Kementerian iaitu Perbadanan PR1MA Malaysia dan Syarikat Perumahan Nasional Berhad (SPNB) supaya dapat memainkan peranan lebih proaktif dalam menyelesaikan isu projek sakit secara lebih telus dan efektif;
- iv) mengadakan taklimat berjadual kepada pemaju di seluruh Semenanjung Malaysia berkaitan tanggungjawab dan kewajipan pemaju perumahan berlesen berdasarkan Akta 118; dan
- v) menggalakkan penggunaan teknologi baru dalam pembinaan seperti *Industrialised Building System* (IBS) dan bahan binaan alternatif untuk mempercepatkan penyiapan projek perumahan dengan kos yang lebih murah tanpa menjejaskan kualiti pembinaan.

Selain itu, terdapat inisiatif pendigitalan dalam sektor perumahan yang telah diperkenalkan oleh KPKT dikenali sebagai *Housing Intergrated Management System* (HIMS). Sistem HIMS ini merupakan sistem yang dibangunkan secara atas talian sebagai *One Stop Centre* bagi pemaju perumahan mengemukakan maklumat projek-projek perumahan yang dimajukan di Semenanjung Malaysia mengikut Akta 118. Sistem ini dibangunkan sebagai *management tools* iaitu *single entry* untuk pengurusan lesen pemajuan dan permit & iklan jualan, kawalan dan pemantauan projek serta penguatkuasaan peruntukan mengikut Akta sehingga janaan Perjanjian Jual Beli (e-SPA). HIMS telah mula Go Live mulai 31 Januari 2022.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN SYED SADDIQ BIN SYED ABDUL
RAHMAN [MUAR]**

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan Kerajaan telah mensasarkan bahawa 40% daripada sumber tenaga negara datang daripada tenaga boleh baharu pada tahun 2035. Berapakah peratusan terkini sumber tenaga datang daripada tenaga boleh baharu. Adakah Kerajaan berhasrat untuk membenarkan syarikat di Malaysia untuk mengeksport tenaga ini.

JAWAPAN

Tuan Yang di-Pertua,

1. Untuk makluman Ahli Yang Berhormat, sehingga September 2022 jumlah campuran kapasiti Tenaga Boleh Baharu (TBB) dalam pembekalan elektrik negara telah mencapai 24% atau berbanding sasaran 40% pada tahun 2035 yang telah ditetapkan. Pencapaian TBB ini adalah terdiri daripada 15.3% hidro, 6% solar, 2.4% biojisim dan 0.4% biogas.
2. Sebarang aktiviti bagi mengeksport bekalan elektrik yang dijana di Malaysia merentasi sempadan negara perlu dilaksanakan berdasarkan garis panduan yang dikeluarkan Suruhanjaya Tenaga iaitu *Guide For Cross-border Electricity Sales*. Berhubung dengan kebenaran untuk syarikat Malaysia mengeksport tenaga, aktiviti penjualan tenaga merentasi sempadan adalah terhad kepada sumber bukan tenaga boleh baharu sahaja kerana:

- a) pada masa ini, hanya 8% daripada jumlah penjanaan elektrik di Semenanjung Malaysia yang merupakan *energy demand centre* adalah terdiri daripada TBB. Dianggarkan bagi memenuhi permintaan dan komitmen ESG oleh syarikat-syarikat korporat di Malaysia, penjanaan TBB sebanyak 30% daripada jumlah penjanaan elektrik diperlukan dalam sistem pembekalan elektrik di Semenanjung;
- b) komposisi TBB secara keseluruhan setelah mengambil kira penjanaan di Sabah dan Sarawak hanya dalam lingkungan 17%. Pada dasarnya, negara tidak mempunyai lebih TBB untuk dijual ke negara jiran disebabkan bekalan TBB negara ini masih tidak mencukupi, walaupun dengan adanya sambungtara antara Semenanjung dan Sarawak;
- c) Negara bukan sahaja kehilangan kelebihan tarikan pelaburan bernilai tinggi, malahan juga akan kehilangan hak untuk menuntut penghindaran karbon (*carbon avoidance*) daripada penjanaan TBB kerana atribut hijau (*green attribute*) TBB tersebut perlu diserahkan kepada penerima bekalan elektrik (*offtaker*) di negara yang membeli bekalan elektrik tersebut. Oleh itu, hak untuk menuntut penghindaran karbon tersebut akan menjadi hak milik negara tersebut dan sekaligus akan menjejaskan usaha dan komitmen Kerajaan ke arah mencapai sasaran negara neutral karbon menjelang tahun 2050.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN SYED SADDIQ BIN SYED ABDUL
RAHMAN [MUAR]**

SOALAN

Tuan Syed Saddiq bin Syed Abdul Rahman [Muar] minta **MENTERI DALAM NEGERI** menyatakan usaha yang akan dan telah diambil oleh pihak Kerajaan dalam meningkatkan kelinciran permohonan kewarganegaraan, terutamanya yang melibatkan perkahwinan dengan bukan warganegara dan anak angkat. Ketiadaan garis masa yang khusus membantutkan potensi modal insan, menjadi punca kepada penindasan sistemik terkait hak asasi manusia dan akses mereka kepada kemudahan awam.

JAWAPAN

Tuan Yang Di Pertua,

Untuk makluman Ahli Yang Berhormat, penganugerahan kewarganegaraan Malaysia merupakan anugerah tertinggi dan hak eksklusif Kerajaan Persekutuan. Dalam mempertimbangkan permohonan kewarganegaraan Malaysia, beban untuk membuktikan kelayakan untuk dianugerahkan kewarganegaraan Malaysia ini pula adalah di bawah tanggungjawab setiap pemohon dan proses pertimbangan adalah tertakluk kepada syarat-syarat di bawah Bahagian III, Perlembagaan Persekutuan, Kaedah-Kaedah Kewarganegaraan 1964 serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen. Fakta dan dokumen bukti yang dikemukakan oleh setiap pemohon akan diteliti mengikut giliran yang sewajarnya sebelum keputusan dikeluarkan. Justeru, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan kes.

Kementerian Dalam Negeri (KDN) sedang melaksanakan tindakan segera terhadap semua permohonan kewarganegaraan yang diterima secara berperingkat selaras dengan aspirasi konsep Malaysia MADANI. Kementerian ini juga komited dan beriltizam untuk menyelesaikan sebanyak 3,000 permohonan warganegara melalui KPI 100 hari YB Menteri Dalam Negeri Tahun 2023 (bermula 2 Disember 2022 - 12 Mac 2023).

Kementerian ini juga melalui Jabatan Pendaftaran Negara (JPN) sentiasa mengambil langkah proaktif dalam memastikan urusan pendaftaran dokumen pengenalan diri individu yang berkelayakan dapat dilaksanakan dengan mudah di seluruh negara terutamanya di kawasan pedalaman dan luar bandar melalui program Menyemai Kasih Rakyat (MEKAR). Melalui program ini, JPN memberikan pelbagai perkhidmatan termasuklah khidmat nasihat berkaitan pendaftaran kad pengenalan, kelahiran dan kematian serta kewarganegaraan bagi memudahkan urusan rakyat untuk memiliki dokumen pengenalan diri mengikut kelayakan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : YB TUAN SYED SADDIQ BIN SYED
ABDUL RAHMAN [MUAR]**

SOALAN

Minta **PERDANA MENTERI** menyatakan perincian jumlah peruntukan khas Perdana Menteri sejak 2018 sehingga kini dan bagaimanakah ianya telah dibelanjakan secara khusus.

JAWAPAN

**DIJAWAB OLEH DATUK ARMIZAN BIN MOHD ALI,
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)**

Tuan Yang di-Pertua,

Penyediaan dan penyaluran Peruntukan Khas YAB Perdana Menteri adalah mengikut dasar sedia ada dan tertakluk kepada kemampuan semasa kewangan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGKAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN SYED SADDIQ BIN SYED ABDUL
RAHMAN [MUAR]**

SOALAN

TUAN SYED SADDIQ BIN SYED ABDUL RAHMAN [MUAR] minta **PERDANA MENTERI** menyatakan berapa jumlah penjimatan yang dapat dilakukan oleh Kerajaan daripada pemotongan gaji Menteri secara khusus dan bagaimanakah penjimatan ini dapat dirasakan oleh rakyat.

JAWAPAN

**DIJAWAB OLEH YB DATUK ARMIZAN BIN MOHD ALI, MENTERI DI
JABATAN PERDANA MENTERI (HAL EHWAL SABAH, SARAWAK
DAN TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, seurus pembentukan Kerajaan baharu, Kerajaan Perpaduan telah mengambil langkah-langkah awal penjimatan dengan tidak mengambil gaji sebagai Perdana Menteri seperti mana yang telah diumumkan sendiri oleh YAB Perdana Menteri. Selain itu, Jemaah Menteri juga bersetuju menerima potongan gaji pokok sebanyak 20% setiap bulan atas keprihatinan kepada rakyat sehingga ekonomi negara pulih.
2. Anggaran penjimatan perbelanjaan Kerajaan bagi pemotongan 20% gaji pokok Menteri (termasuk Perdana Menteri dan Timbalan Perdana Menteri) adalah sebanyak RM100,000 sebulan atau RM1.2 juta setahun.

Terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN SYED SADDIQ BIN SYED ABDUL
RAHMAN [MUAR]**

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah status terkini usaha Kerajaan untuk mengatasi masalah pembuangan e-waste di Malaysia memandangkan data menunjukkan Malaysia adalah negara 5 tertinggi negara pengimport aluminium scraps bagi negara China.

JAWAPAN

Tuan Yang di-Pertua,

1. Kementerian Sumber Asli, Alam Sekitar dan Perubahan Iklim (NRECC) komited untuk memastikan Malaysia tidak dijadikan tempat transit atau pelupusan sisa elektronik (*electronic waste - e-waste*) dari negara-negara maju. Ia adalah selaras dengan komitmen negara kepada *Basel Convention on The Control of Transboundary Movements of Hazardous Wastes and Their Disposal*, yang mana Malaysia perlu memastikan semua pergerakan rentas sempadan buangan terjadual mempunyai kelulusan terlebih dahulu sebelum sebarang aktiviti transit, *transshipment*, import dan eksport dapat dijalankan.
2. Untuk makluman, Konvensyen Basel telah menetapkan supaya pengurusan e-waste yang merentasi sempadan hendaklah melalui *Prosedur Prior Informed Consent* (PIC) yang mana kebenaran negara pengimport perlu diperolehi sebelum ia dihantar ke negara berkenaan. Setiap aktiviti pengimportan e-waste dikawal selia melalui syarat dan kriteria seperti berikut:

- i) e-waste yang disenaraikan di bawah List A (Annex 8) dan List B (Annex 9) hendaklah melalui prosedur *Prior Informed Consent* (PIC). Pengimportan yang gagal mematuhi prosedur ini dikategorikan sebagai *illegal shipment* di bawah Artikel 9; dan
- ii) Artikel 9 Basel Konvensyen juga menyatakan bahawa negara pengekspor yang tidak mendapat kelulusan dari negara pengimport bagi barang dagangan yang dikategorikan sebagai buangan terjadual perlu mengambil semula barang dagangan tersebut dalam tempoh 30 hari.

3. Dalam masa yang sama, Kementerian ini melalui Jabatan Alam Sekitar (JAS) akan terus memperkasa pemantauan dan penguatkuasaan bagi pengimportan e-waste yang digunakan oleh industri kitar semula. Tindakan tegas akan diambil ke atas mana-mana pengimport yang gagal mematuhi peraturan dan undang-undang yang telah ditetapkan termasuklah menghantar balik kontena e-waste import tersebut ke negara asal selaras dengan Artikel 9, Konvensyen Basel.

4. Selain itu, di bawah Seksyen 34B, Akta Kualiti Alam Sekeliling 1974 (Akta 127), sebarang penempatan dan peletakan buangan terjadual sama ada di darat atau dalam perairan Malaysia, transit atau membenarkan ditransit tanpa kelulusan daripada Ketua Pengarah JAS, adalah menjadi satu kesalahan di bawah Akta 127 dan jika disabitkan kesalahan boleh dihukum penjara tidak melebihi 5 tahun dan denda tidak melebihi RM500,000 (lima ratus ribu ringgit).

5. Bermula pada Januari 2022 pihak SIRIM QAS International telah mengeluarkan satu garis panduan yang bertajuk "*Guidelines for Importation and Inspection of Metal Scrap*". Garis panduan ini bertujuan untuk memberi maklumat kepada semua pengimport-pengimport 'scrap' termasuklah "*Aluminium Scraps*" (HS Code 7602) supaya mendapat kelulusan daripada pihak SIRIM yang merupakan agensi bertanggungjawab mengeluarkan *Certificate of Approval* (COA).

Sekian. Terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : PUAN SYERLEENA BINTI ABDUL RASHID [BUKIT BENDERA]

SOALAN

PUAN SYERLEENA BINTI ABDUL RASHID [BUKIT BENDERA] minta **MENTERI PEMBANGUNAN USAHAWAN DAN KOPERASI** menyatakan berapa jumlah rakan penghantar e-hailing di seluruh negara mengikut pecahan umur 21 ke bawah, 30 tahun ke bawah dan 50 tahun ke bawah.

JAWAPAN

Tuan Yang di-Pertua,

Buat masa ini, Kementerian Pengangkutan hanya mengawal selia perkhidmatan e-Hailing. Perkhidmatan e-Hailing merupakan tempahan kenderaan oleh penumpang yang menggunakan aplikasi untuk perjalanan penumpang dari satu destinasi ke destinasi yang lain. Maklumbalas yang diterima bagi pemandu e-Hailing Grab sehingga November 2022 untuk Semenanjung Malaysia adalah sebagaimana jadual berikut :

UMUR	JUMLAH PEMANDU
<21	174
22-30	15,624
31-50	51,318
>51	21,907
JUMLAH	89,023

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

**DARIPADA : PUAN SYERLEENA BINTI ABDUL RASHID
(BUKIT BENDERA)**

SOALAN

PUAN SYERLEENA BINTI ABDUL RASHID [BUKIT BENDERA] minta **MENTERI BELIA DAN SUKAN** menyatakan apakah pelan jangka masa panjang bagi menangani isu (penghantar *e-hailing*) ini terutamanya apabila golongan belia yang kini banyak bergantung kepada sektor ini dan tidak merugikan negara terutamanya dalam sektor yang sememangnya memerlukan tenaga kerja mahir terutamanya vokasional.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Belia dan Sukan (KBS) sentiasa komited untuk meneruskan agenda pemerkasaan belia melalui pendidikan dan latihan teknikal dan vokasional (TVET) melalui 22 buah Institusi Latihan Kemahiran Belia dan Sukan (ILKBS) di seluruh negara kepada golongan belia massa bagi menggalakkan penyertaan dan penglibatan dalam memperoleh kemahiran TVET.

ILKBS menawarkan latihan kemahiran dari tahap 1 hingga tahap 5 melalui pensijilan Sijil Kemahiran Malaysia, Diploma Kemahiran Malaysia dan Diploma Lanjutan Kemahiran Malaysia serta persijilan professional meliputi 14 bidang utama, 115 program/ kursus antaranya bidang Hospitaliti, Teknologi Personel, Teknologi Awam, Teknologi Automotif, Teknologi Mekanikal, Teknologi Elektrik dan Elektronik dan lain-lain secara sepenuh masa di dalam ILKBS. Skop latihan kemahiran TVET adalah berlandaskan kepada standard pekerjaan yang diiktiraf, dengan penekanan kepada komponen praktikal, kemahiran psikomotor dan pendedahan kepada latihan kemahiran di industri. Pembangunan kemahiran belia di bawah Kementerian Belia dan Sukan terutamanya melalui ILKBS telah menawarkan kursus teknologi digital secara tidak langsung seperti bidang teknologi maklumat, teknologi automotif, dan teknologi elektronik.

Bagi meningkatkan kadar kebolehpasaran graduan ILKBS dan menjadikan ILKBS sebagai pilihan utama majikan industri terutama sektor *e-hailing*, KBS akan terus mengukuhkan kolaborasi dan kerjasama strategik bersama industri, agensi kerajaan serta persatuan alumni ILKBS Malaysia. Ini bagi mengoptimumkan sumber serta meningkatkan penerimaan masyarakat terhadap kualiti graduan serta menjadikan ILKBS sebagai pusat rujukan dalam pelbagai aktiviti, sama ada bersifat teknikal, sosial dan ekonomi. Untuk itu, TVET KBS akan berusaha menyediakan ekosistem penawaran dan permintaan tenaga mahir secara menang-menang dengan pelbagai agensi di peringkat tempatan dan antarabangsa. KBS juga sedang memperkasa penggunaan teknologi

maklumat dan digital dengan menyediakan persekitaran Pendigitalan@ILKBS. Antaranya seperti

- i. *Industrial Automation Trainer (I4.0 System)* di IKTBN Pagoh, Johor yang menggunakan *MPS Integrated System*.
- ii. IR4.0 di Jabatan Permesinan, IKTBN Pagoh Johor yang menggunakan *Virtual Informative Display Application (ViDA)*.
- iii. Projek IR4.0 di IKTBN Bukit Mertajam, Pulau Pinang yang menggunakan aplikasi *E-learning, Augmented Reality (AR)* dan *Smart Meeting Room*.
- iv. Projek IR4.0 di IKTBN Pekan, Pahang yang menggunakan *Pipeline Hydrostatic Pressure Integrated (Phypti) Training Kit, Robotics Toolbox Integrated System (RTIS)* dan *Zero Waste Management System (ZEWMAS)*.

Kesemua usaha dan inisiatif yang dilaksanakan Kementerian diharap dapat membantu golongan belia menceburi sektor penghantar *e-hailing* dengan memperlengkapkan anak-anak muda untuk meningkatkan tenaga kerja mahir dalam kemahiran digitalisasi untuk *e-hailing* seiring dengan perkembangan Revolusi Industri 4.0.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB PUAN SYERLEENA BINTI ABDUL RASHID
[BUKIT BENDERA]**

SOALAN

Puan Syerleena binti Abdul Rashid [Bukit Bendera] minta **MENTERI DALAM NEGERI** menyatakan senarai bilangan individu yang telah dijatuhkan hukuman mati di Malaysia bagi tempoh Januari 2022 hingga Disember 2022 mengikut pecahan tarikh, lokasi, jantina, umur, kewarganegaraan, dan status lain, dan jenayah.

JAWAPAN

Tuan Yang Di Pertua,

Untuk makluman Ahli Yang Berhormat, rekod Jabatan Penjara Malaysia sehingga 3 Februari 2023, menunjukkan bahawa bilangan individu yang telah dijatuhkan hukuman mati di Malaysia bagi tempoh Januari 2022 hingga Disember 2022 adalah seramai **126** orang banduan.

Daripada jumlah banduan akhir tersebut, seramai **117** (92.86%) orang adalah banduan lelaki manakala banduan wanita adalah seramai **9** (7.14%) orang.

Seramai **30** (23.81%) orang terdiri daripada mereka yang berumur 21 tahun ke 30 tahun. Seramai **59** (46.83%) orang berada di dalam kategori umur di antara 31 tahun ke 40 tahun, manakala **33** (26.19%) orang pula adalah berumur di antara 41 tahun ke 50 tahun. Bagi banduan hukuman mati yang berumur di antara 51 tahun dan ke atas, terdapat seramai **4** (3.17%) orang.

Bagi pecahan mengikut kewarganegaraan pula, rekod Jabatan Penjara Malaysia menunjukkan terdapat **105** (83.33%) orang banduan warganegara Malaysia dan **21** (16.67%) orang banduan warganegara asing yang terdiri daripada beberapa buah negara.

Daripada jumlah banduan akhir tersebut, seramai **44** (34.92%) orang banduan melakukan kesalahan di bawah Seksyen 302 Kanun Keseksaan (membunuh). Di bawah Seksyen 39B Akta Dadah Berbahaya (pengedaran dadah) pula terdapat seramai **82** (65.18%) orang banduan yang telah disabitkan.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB PUAN SYERLEENA BINTI ABDUL RASHID
[BUKIT BENDERA]**

SOALAN

Puan Syerleena binti Abdul Rashid [Bukit Bendera] minta **MENTERI DALAM NEGERI** menyatakan senarai bilangan hukuman mati telah diringkankan bagi tempoh Januari 2022 hingga Disember 2022 (mengikut pecahan tarikh, lokasi, jantina, umur, kewarganegaraan, dan status lain, dan jenayah) dan juga jenis/ nama pihak berkuasa yang membenarkan hukuman itu diubah.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan rekod Jabatan Penjara Malaysia sehingga 3 Februari 2023, tiada sebarang peringanan hukuman mahupun pengampunan daripada mana-mana Lembaga Pengampunan kepada banduan yang telah dijatuhkan hukuman mati.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : DATUK SERI TAKIYUDDIN BIN HASSAN
[KOTA BHARU]

SOALAN

DATUK SERI TAKIYUDDIN BIN HASSAN [KOTA BHARU] minta **PERDANA MENTERI** menyatakan statistik kebangkrapan mengikut umur bagi tempoh tahun 2020 sehingga 2022.

JAWAPAN

**YB DATUK SERI AZALINA OTHMAN SAID,
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, berdasarkan rekod Jabatan Insolvensi Malaysia (Mdl), jumlah keseluruhan kes kebangkrutan bagi tahun 2020 hingga tahun 2022 ialah 20,600 kes. Golongan umur yang mencatatkan kebangkrutan tertinggi ialah antara 35-44 tahun pada tahun 2020 iaitu seramai 3,150 orang. Statistik terperinci jumlah kes kebangkrutan mengikut golongan umur dari tahun 2020 hingga tahun 2022 ialah sebagaimana berikut:

GOLONGAN UMUR	TAHUN			JUMLAH	PERATUS
	2020	2021	2022		
Di bawah umur 25	21	20	11	52	0.25
25-34 tahun	1,741	1,060	759	3,560	17.28
35-44 tahun	3,150	2,535	2,237	7,922	38.46
45-54 tahun	2,211	1,802	1,630	5,643	27.39
55 tahun dan ke atas	1,204	1,116	1,024	3,344	16.23
Tiada maklumat	24	21	34	79	0.38
JUMLAH	8,351	6,554	5,695	20600	100

Catatan : Bagi golongan umur "Tiada Maklumat, dokumen petisyen tidak mengandungi butiran usia bankrap (Pengenalan Polis / Tentera).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK SERI TAKIYUDDIN BIN
HASSAN [KOTA BHARU]**

SOALAN

DATUK SERI TAKIYUDDIN BIN HASSAN [KOTA BHARU] minta
PERDANA MENTERI menyatakan status penggubalan Akta
Pendanaan Politik.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Kerajaan komited dalam membanteras rasuah dan politik wang. Dalam hal ini, Rang Undang-Undang (RUU) Dana Politik ini akan diangkat semula untuk kelulusan dasar baharu oleh Jemaah Menteri.
2. Susulan perkembangan politik pasca Pilihanraya Umum 15, landskap politik di Malaysia turut mengalami beberapa perubahan di mana terdapat gabungan politik yang baru. Oleh yang demikian, sesi libat urus perlu diteruskan untuk mendapatkan maklum balas parti-parti politik dan pihak berkepentingan, agar RUU yang bakal digubal ini adalah inklusif dan komprehensif.
3. Dalam hal ini, RUU Dana Politik akan dicadang untuk dirujuk kepada Jawatankuasa Pilihan Khas (PSC) supaya semua Ahli-Ahli Dewan Rakyat boleh memberi pandangan dan cadangan supaya semua aspek yang penting berkenaan dana politik ini diambil kira.
4. Selain daripada RUU Dana Politik, Kerajaan juga akan mengambil kira amalan dan perundangan yang sedia ada untuk mengatasi isu dana politik, antaranya Akta Suruhanjaya Pencegahan Rasuah Malaysia 2009 [Akta 694], Akta Kesalahan Pilihan Raya 1954 [Akta 5], Akta Pendaftaran Pertubuhan 1966 [Akta 335] dan Akta Pengubahan Wang Haram, Pencegahan Pembiayaan Keganasan dan Hasil Daripada Kegiatan Haram 2001 [Akta 613].

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK SERI TAKIYUDDIN BIN HASSAN
[KOTA BHARU]**

SOALAN

DATUK SERI TAKIYUDDIN BIN HASSAN [KOTA BHARU] minta
MENTERI SUMBER ASLI, ALAM SEKITAR DAN PERUBAHAN IKLIM
menyatakan secara terperinci status pelaksanaan projek tebatan banjir di
Negeri Kelantan.

JAWAPAN

Tuan Yang Di-Pertua,

1. Untuk makluman Ahli Yang Berhormat, Kerajaan melalui Jabatan Pengairan dan Saliran Malaysia (JPS) sedang melaksanakan pelbagai projek tebatan banjir di Negeri Kelantan dalam usaha mengurangkan impak banjir semasa musim Monsun Timur Laut.
2. Projek-projek yang sedang dilaksanakan di Negeri Kelantan adalah:
 - a. Projek Pembangunan Lembangan Sungai Bersepadu (PLSB) Sungai Golok (KESBAN) Fasa 1 dengan kos projek sebanyak RM656 juta. Projek ini dalam peringkat reka dan bina dan dalam proses perolehan serta disasar siap sepenuhnya pada Ogos 2024;
 - b. Projek Pembangunan Lembangan Sungai Bersepadu (PLSB) Sg Golok Fasa 2 dengan kos projek sebanyak RM879 juta. Projek ini dalam peringkat reka dan bina dan dalam proses perolehan; dan
 - c. Rancangan Tebatan Banjir (RTB) untuk Pembangunan Lembangan Sungai Bersepadu (PLSB) Sungai Kelantan Fasa 1, Kelantan berjumlah RM 699 juta.
3. Selain itu, JPS turut menjalankan kerja-kerja pemuliharaan sungai di bawah Rancangan Malaysia Kedua Belas (RMKe-12) yang melibatkan 59 projek kerja-kerja kecil pada tahun 2022 berjumlah sebanyak RM 3.664 juta.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB DATUK SERI TAKIYUDIN HASSAN
[KOTA BHARU]**

SOALAN

Datuk Seri Takiyuddin bin Hassan [Kota Bharu] minta **MENTERI
DALAM NEGERI** menyatakan apakah langkah Kerajaan dalam menangani
isu kesesakan dalam penjara dan pusat tahanan di seluruh negara.

JAWAPAN

Tuan Yang Di Pertua,

Untuk makluman Ahli Yang Berhormat, bagi menangani isu kesesakan dalam penjara, Kementerian Dalam Negeri melalui Jabatan Penjara Malaysia sedang melaksanakan Reformasi Penjara yang bertujuan antaranya untuk mengurangkan kesesakan dan residivis di seluruh penjara.

Antara usaha yang dilaksanakan adalah dengan pemasangan katil bertingkat untuk kegunaan banduan di sel dan dormitori penjara. Di samping itu, Jabatan Penjara Malaysia turut bekerjasama dengan pihak mahkamah bagi mempercepat perbicaraan agar mana-mana tahanan yang masih direman, dapat diputuskan pada kadar segera sama ada disabitkan bersalah bagi menjalani hukuman di penjara atau dibebaskan pada kadar segera.

Jabatan Penjara Malaysia turut memfokuskan program pemulihan dalam komuniti yang ketika ini telah melibatkan seramai 82,487 banduan dengan kadar residivis hanya 0.24 peratus.

Beberapa bekas kem Pusat Latihan Khidmat Negara (PLKN) telah diubahsuai sebagai Penjara Satelit (PS) dan diwartakan sebagai penjara sementara. Penjara Satelit tersebut adalah bertujuan untuk menempatkan banduan sabitan dan reman kategori risiko keselamatan minima, di bawah Seksyen 3, Akta Penjara 1995.

Jabatan Penjara Malaysia juga telah mewujudkan pusat-pusat transit di penjara untuk penempatan banduan yang baru dimasukkan ke penjara.

Disamping itu, selaras dengan halatuju Jabatan Penjara Malaysia iaitu 2/3 banduan sabitan yang layak akan menjalani pemulihan di luar penjara,

dipergiatkan lagi dengan pengembangan Sistem Parol, Perintah Kehadiran Wajib, Program Reintegrasi Penghuni Industri, Program *Corporate Smart Internship* (CSI) dan Pelepasan Banduan Secara Lesen yang dilaksanakan secara berterusan.

Terkini, Rang Undang-Undang (Kehadiran Wajib Pesalah-Pesalah) (Pindaan) 2021 telah dilulus dan diwartakan, sebagai satu lagi usaha memperkasa inisiatif pemenjaraan di luar tembok penjara melalui program pemulihan pesalah di dalam komuniti. Inisiatif ini membolehkan pesalah yang dihukum dengan hukuman tiga (3) tahun ke bawah boleh dipertimbangkan dalam program berkenaan.

Pada masa yang sama, cadangan *Probation & Community Correction* yang melibatkan pelbagai alternatif kepada hukuman pemenjaraan sedang dikaji oleh pihak-pihak yang berkaitan dengan melibatkan pihak perundangan.

Kementerian Dalam Negeri dan Jabatan Penjara Malaysia bersama-sama dengan Agensi kerajaan lain yang berkaitan, akan sentiasa bekerjasama dalam memastikan inisiatif-inisiatif dalam menangani masalah kesesakan di penjara ini dilaksanakan.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK SERI TAKIYUDDIN BIN
HASSAN [KOTA BHARU]**

SOALAN

DATUK SERI TAKIYUDDIN BIN HASSAN [KOTA BHARU] minta
PERDANA MENTERI menyatakan status terkini pelaksanaan Undang-
Undang Antilompat Parti di setiap negeri.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, Akta Perlembagaan (Pindaan) (No.3) 2022 [*Akta A1663*] yang melarang Ahli Dewan Rakyat bertukar parti telah diwartakan pada 6 September 2022 dan berkuat kuasa mulai 5 Oktober 2022.

2. Peruntukan seksyen 6 Akta A1663 memberikan ruang kepada Kerajaan Negeri/Dewan Undangan Negeri untuk melaksanakan peruntukan larangan Ahli Dewan Rakyat bertukar parti melalui pindaan Perlembagaan Negeri, tertakluk persetujuan Raja atau Yang di-Pertua Negeri.

3. Sehingga kini, negeri Selangor, Pulau Pinang, Perak, Perlis, Negeri Sembilan, Kelantan dan Sarawak adalah antara Negeri yang telah menguatkuasakan Enakmen Negeri masing-masing berkaitan larangan bertukar parti di peringkat Dewan Undangan Negeri.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN TAN HONG PIN (BAKRI)

SOALAN

TUAN TAN HONG PIN (BAKRI) minta **MENTERI KEMAJUAN DESA DAN WILAYAH** menyatakan jumlah dan perincian projek infrastruktur dan utiliti termasuk status terkini projek yang telah diluluskan di bawah Rancangan Malaysia Ke-12 untuk Parlimen Bakri dan nyatakan status projek bagi *Rolling Plan 1* dan *Rolling Plan 2*.

JAWAPAN

Tuan Yang di-Pertua,

Untuk makluman Yang Berhormat, sejumlah RM4.73 juta peruntukan telah diluluskan untuk Parlimen Bakri di bawah *Rolling Plan* 1 dan 2, Rancangan Malaysia Ke-12 (RMKe-12) melibatkan empat (4) projek infrastruktur di bawah Program Bekalan Air Luar Bandar (BALB), Program Jalan Perhubungan Desa (JPD), Majlis Amanah Rakyat (MARA) dan satu (1) program peningkatan produktiviti di bawah Pihak Berkuasa Kemajuan Pekebun Kecil Perusahaan Getah (RISDA) dengan jumlah keseluruhan kos projek terkini sebanyak RM11.239 juta seperti perincian berikut:

- i. Projek Pembinaan Tangki Air Untuk Kawasan DUN Bukit Naning, Parlimen Bakri, Johor.
Skop Projek: Sambungan paip sistem retikulasi daripada paip-paip utama Pihak Berkuasa Air Negeri (PBAN) ke kawasan/ rumah di luar bandar.
Kos Projek: RM6.5 juta
Peruntukan Tahun 2022: RM1 juta
Peruntukan Tahun 2021: RM3 juta
Status Projek: Dalam Pelaksanaan
- ii. Projek Menaiktaraf dan Ubah Suai Infrastruktur Serta Kemudahan di MRSM MUAR, Johor.
Skop Projek: Menaik taraf kemudahan fasiliti pengajaran dan pembelajaran.
Kos Projek: RM4.5 juta
Peruntukan Tahun 2022: RM500 ribu
Status Projek: Pra Pelaksanaan

- iii. Projek Jalan Perhubungan Desa (JPD).
Skop Projek: Membina baru, menaik taraf atau menyelenggara Jalan Perhubungan Desa.
Peruntukan Tahun 2021: RM235 ribu
Bilangan Projek Tahun 2021: 3 projek
Status Projek: Siap Sepenuhnya

- iv. Program Peningkatan Produktiviti Dan Pembangunan Pekebun Kecil Johor (RISDA)
Skop Projek: Peningkatan Produktiviti Dan Pembangunan Pekebun Kecil.
Peruntukan Tahun 2021: RM4.782 ribu
Bilangan Projek Tahun 2021: 3 projek
Status Projek: Siap Sepenuhnya

Pelaksanaan projek/ program infrastruktur dan ekonomi seperti ini diharap dapat menyumbang kepada kesejahteraan hidup masyarakat luar bandar khususnya dari aspek pembangunan ekonomi dan sosial. Sesuai dengan fokus pelaksanaannya yang bersifat *touch point* dan *people centric*, Kementerian komited untuk memastikan semua kampung dan penduduk menerima manfaat ini serta memenuhi tuntutan pembangunan sosio-ekonomi terlibat di kawasan luar bandar.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGKAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : TUAN TAN HONG PIN [BAKRI]

SOALAN

TUAN TAN HONG PIN [BAKRI] minta **MENTERI KEWANGAN** menyatakan status perkembangan terkini tentang inisiatif *Voluntary Carbon Market* (VCM) yang dilancarkan di bawah advokasi Bursa Malaysia bagi mencapai "Negara Sifar Karbon". Adakah mesyuarat diadakan bersama semua pemegang taruh seperti syarikat-syarikat dan Kerajaan Negeri untuk melancarkan inisiatif VCM.

JAWAPAN

Tuan Yang di-Pertua,

Selepas pelancaran *Bursa Carbon Exchange* (BCX) pada 9 Disember 2022, Bursa Malaysia Berhad (Bursa) telah bergerak ke arah pengoperasian platform tersebut. Kini, Bursa sedang bersiap sedia untuk lelongan sulung kredit karbon pada 16 Mac 2023.

Tuan Yang di-Pertua,

Dalam usaha mendapatkan pandangan pihak berkepentingan, Bursa pada tahun 2022 telah melaksanakan sesi libat urus secara berkala dengan golongan sasaran yang terdiri daripada pelbagai pihak berkepentingan yang membentuk Kumpulan Kerja Industri bagi mempersiapkan reka bentuk dan membantu dalam melancarkan pelancaran Pasaran Pertukaran Karbon Sukarela atau *Voluntary Carbon Market Exchange* (VCM). Bagi memacu pasaran tersebut, Kerajaan telah umumkan dana permulaan 10 juta ringgit bagi memacu permintaan bagi pengamal awal dalam pembekalan kredit karbon.

Sehingga kini, Bursa telah mengadakan libat urus dengan pelbagai pemegang taruh dan Kementerian/ Agensi Kerajaan seperti Kementerian Kewangan, Kementerian Sumber Asli, Alam Sekitar dan Perubahan Iklim (NRECC), Kementerian Perdagangan Antarabangsa dan Industri Malaysia, Bank Negara Malaysia, Suruhanjaya Sekuriti Malaysia, Suruhanjaya Tenaga, Malaysia Forest Fund, keenam-enam syarikat pelaburan milik Kerajaan (GLICs), syarikat milik Kerajaan termasuk PETRONAS dan TNB, Kerajaan Negeri dan Pihak Berkuasa Tempatan daripada Sabah, Sarawak, Pahang, Perak dan Pulau Pinang. Perbincangan lanjut dengan Kerajaan Negeri lain sedang diteruskan pada 2023, dengan sokongan daripada NRECC, bagi mengambil pandangan daripada institusi persekutuan dan negeri ke arah membangunkan ekosistem VCM yang mantap.

Bagi penglibatan korporat pula, Bursa telah dan akan terus mengadakan penglibatan di peringkat institusi melalui rangkaian seperti Rangkaian Tindakan CEO (CEO's Action Network) dan melalui penglibatan awam seperti persidangan, webinar dan sindikasi secara fizikal ataupun secara maya. Selain itu, Bursa turut telah mengadakan pelbagai sesi libat urus dengan institusi kewangan seperti CIMB, CIMB-CGS, Maybank, Hong Leong, Allianz dan lain-lain sektor intensif karbon yang mempunyai komitmen *carbon neutral* dan *net zero*.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : JAWAB BERTULIS

DARIPADA : TUAN TAN HONG PIN (BAKRI)

SOALAN

TUAN TAN HONG PIN (BAKRI) minta **MENTERI BELIA DAN SUKAN** menyatakan inisiatif, rancangan dan bantuan agensi Kerajaan Persekutuan dalam mendayaupayakan anak muda bagi meningkatkan daya saing dan memberikan kaunseling kerjaya dalam membina kerjaya mereka. Adakah Kementerian mempunyai rancangan untuk meningkatkan kesedaran sivik dan politik anak muda.

JAWAPAN

Tuan Yang di-Pertua,

Untuk makluman Yang Berhormat, Kementerian Belia dan Sukan (KBS) melalui Institut Pembangunan dan Kecemerlangan Kepimpinan (i-LEAD) mempunyai misi yang jelas dalam memacu kemajuan belia secara holistik bagi memenuhi aspirasi negara. Selain itu, menjadi tanggungjawab pihak Kementerian Belia dan Sukan bagi memastikan belia di Malaysia sedar, faham dan yakin dengan sistem demokrasi negara serta tahu mengenai hak dan tanggungjawab sebagai warganegara dalam mencorak demokrasi negara berdasarkan kebijaksanaan dan kesedaran politik yang matang.

Dalam usaha untuk mendayaupayakan anak muda bagi meningkatkan daya saing di kalangan belia pula, KBS telah turut menganjurkan Program *Youth Career* (Y-Career). Program berbentuk

SOALAN NO : 551

acara mini karnival ini dilaksanakan dengan kerjasama rakan strategik terpilih bertujuan memberi akses kepada belia massa untuk mendapatkan maklumat dan peluang penempatan pekerjaan berdasarkan keperluan industri serta meningkatkan kebolehpasaran belia dalam bidang kerjaya. Program merangkumi tiga (3) segmen utama iaitu sesi perkongsian, sesi penglibatan (engagement) bersama industri/ majikan dan sesi penilaian dan persediaan penempatan. Sebanyak 38,261 peluang pekerjaan di tawarkan secara keseluruhan. Seramai 6,676 belia telah ditemuduga dan seramai 1,179 berjaya ditawarkan pekerjaan.

Kementerian Belia dan Sukan (KBS) sentiasa komited untuk membina kerjaya belia melalui 22 buah Institusi Latihan Kemahiran Belia dan Sukan (ILKBS) di seluruh negara. Pada tahun ini (2023) ILKBS di seluruh negara sedang dan akan melaksanakan program baru iaitu Program *Skills For Life* iaitu belia NEET (*not in employment, education and training*) yang bertujuan untuk menyediakan peluang latihan kemahiran asas dengan menggunakan peralatan dan kemudahan sedia ada, serta kepakaran tenaga pengajar ILKBS seperti kursus memasak, make up, penyediaan kueh tradisional dan gunting rambut *high fade style*.

KBS sentiasa membuka peluang kepada anak – anak muda di negara ini untuk mengikuti latihan kemahiran di ILKBS. ILKBS bukan sekadar institusi TVET yang memberi tumpuan kepada pendidikan dan latihan kemahiran kepada pelajar, namun dalam masa yang sama turut menerapkan kesedaran sivik serta semangat cintakan tanah air melalui modul pembelajaran bina insan. Ini adalah untuk menghasilkan belia yang cemerlang dan seimbang, seterusnya dapat menghasilkan pelajar berkualiti dan berkemahiran tinggi kepada industri. Terkini sehingga tahun 2022, nilai kebolehpasaran graduan bagi 22 buah ILKBS adalah sebanyak 96.19% dengan purata gaji minimum sebanyak RM1,764.95.

Justeru itu, menerusi i-LEAD, KBS, pembentukan modul baharu, Program Membina Malaysia Madani merupakan salah satu Produk Kebangsaan yang berlandaskan konsep penjenamaan semula yang lebih segar menggabungkan falsafah dan ideologi, penekanan kepada pemahaman Malaysia Madani dan dasar-dasar Kerajaan. Ia merupakan satu falsafah terbaik dalam merealisasikan hasrat Kerajaan untuk meningkatkan keutuhan dalam aspek kenegaraan dan perpaduan.

Penggubalan modul nukleus (teras) khususnya untuk golongan belia yang perlu dipupuk, dibimbing serta diberikan pengetahuan yang mendalam mengenai sistem Demokrasi Berparlimen Raja Berpelembagaan kerana belia ini merupakan pemimpin pelapis pada masa hadapan yang perlu celik demokrasi dan cakna dengan isu politik matang.

Untuk makluman Yang Berhormat juga, KBS pada masa ini sedang menghasilkan satu modul baharu berkaitan program pendidikan demokrasi secara menyeluruh yang menekankan 12 perkara penting iaitu:

- a) Falsafah Kenegaraan dan Sistem Demokrasi;
- b) Perlembagaan Persekutuan;
- c) Pilihan Raya;
- d) Parti Politik;
- e) Institusi Parlimen;
- f) Pentadbiran Awam;
- g) Kerajaan Tempatan;
- h) Institusi Kehakiman;
- i) Media dan Akses kepada maklumat;
- j) Masyarakat Sivil;
- k) Seni dan Budaya; dan
- l) Kesaksamaan Gender.

Modul berkaitan program pendidikan demokrasi tersebut dijangka akan dilaksanakan sepenuhnya akhir tahun ini setelah ianya mendapat kelulusan atas perbincangan dalam beberapa siri bengkel daripada pihak pakar dan berkepentingan seperti badan kerajaan, ahli akademik, pertubuhan bukan kerajaan (NGO) dan aktivis belia. Seramai 9 juta warga belia akan mendapat manfaat daripada program ini khususnya dalam meningkatkan kefahaman tentang pendidikan demokrasi. Terdapat dua (2) kaedah pelaksanaan program iaitu:

- (a) Latihan bersemuka dan atas talian.
 - i) Seminar asas - seminar separuh hari;
 - ii) Kursus pertengahan - kursus 3 hari 2 malam; dan
 - iii) Kursus lanjutan - kursus 3 hari 2 malam.

- (b) Pendekatan digital mesra belia.
- i) Media sosial; dan
 - ii) Media arus perdana.

Manakala sasaran peserta bagi program pendidikan demokrasi ini adalah seperti berikut:

- i) Remaja (Belia Bersekolah);
- ii) Siswa (Belia Pengajian Tinggi); dan
- iii) Belia Berfokus iaitu perkumpulan belia berisiko, belia minoriti dan belia terpinggir.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN TAN HONG PIN [BAKRI]

SOALAN

TUAN TAN HONG PIN [BAKRI] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan rekod NRW dalam pecahan setiap negeri serta tindakan dan peruntukan yang diambil bagi mengurangkan NRW di setiap negeri untuk mengelakkan pembaziran air dan gangguan bekalan air berlaku.

JAWAPAN

Tuan Yang di-Pertua,

1. Purata kadar air tidak berhasil (*Non-Revenue Water* - NRW) Malaysia adalah 36.3% pada suku ketiga tahun 2022. Kadar NRW adalah berbeza-beza mengikut negeri dan julat kadar NRW tahun 2022 adalah dari 24.70% - 60.00%. Pecahan kadar NRW setiap negeri bagi suku ketiga tahun 2022 adalah seperti berikut:

BIL.	NEGERI	NRW (%)
1.	Pulau Pinang	24.70
2.	Johor	25.90
3.	Selangor	29.10
4.	Perak	28.90
5.	Melaka	31.00
6.	Negeri Sembilan	33.60
7.	Terengganu	37.30
8.	Labuan	35.90
9.	Sarawak	44.90
10.	Pahang	47.20
11.	Kedah	50.30
12.	Sabah	53.90

13.	Kelantan	52.70
14.	Perlis	60.00
PURATA		36.3

2. Antara punca kadar NRW yang tinggi adalah kehilangan fizikal dan komersial. Merujuk kepada data Suruhanjaya Perkhidmatan Air Negara (SPAN), kehilangan fizikal (kebocoran paip dan penyambungan paip yang tidak sempurna) mewakili 75%, kehilangan komersial (kecurian air dan bacaan meter yang tidak tepat) mewakili 20% dan lain-lain faktor (penyelenggaraan dan kegunaan pemadaman kebakaran) sebanyak 5% kadar NRW. Penyelesaian NRW perlu ditangani secara holistik dan berterusan serta memerlukan peruntukan yang besar. Namun begitu, kekangan kewangan yang dihadapi oleh operator air merupakan cabaran utama dalam pelaksanaan program NRW.

3. Antara langkah yang diambil bagi membantu operator air mengurangkan kadar NRW adalah seperti berikut:

- i. peruntukan sebanyak RM1.907 bilion di bawah RMKe-11 hingga RMKe-12 bagi pelaksanaan Program NRW Kebangsaan melalui Pendekatan 1 dan Pendekatan 2;
- ii. pembiayaan Modal (CAPEX) penggantian paip oleh Pengurusan Aset Air Bhd. (PAAB) berjumlah RM2.084 bilion dari tahun 2010 hingga Disember 2022 bagi negeri yang telah memuktamadkan penstrukturan semula industri bekalan air;
- iii. kemudahan pinjaman jangka pendek oleh PAAB bagi membiayai pelaksanaan program NRW di bawah skop perbelanjaan operasi (OPEX) seperti penggantian meter, pembangunan *District Metering Zone* (DMZ), pengesanan kebocoran secara aktif dan lain-lain;

- iv. menggalakkan pendanaan pihak swasta dalam kerja pengurangan NRW di bawah Program NRW Kebangsaan;
- v. pemantapan kawal selia oleh Suruhanjaya Perkhidmatan Air Negara (SPAN) dari segi penetapan Petunjuk Prestasi Utama (KPI), pengauditan operasi, penguatkuasaan bagi kes kecurian air, pengawalan kualiti bahan dan produk yang mematuhi standard, berkualiti dan berdaftar dengan SPAN; dan
- vi. kerjasama antara SPAN dan Lembaga Pembangunan Industri Pembinaan Malaysia (CIDB) serta Jabatan Pembangunan Kemahiran (JPK) dalam meningkatkan kompetensi tenaga kerja sektor air selaras dengan kehendak Seksyen 49, Akta Industri Perkhidmatan Air Negara 2006 [Akta 655].

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

DARIPADA : YB TUAN TAN HONG PIN (BAKRI)

SOALAN

TUAN TAN HONG PIN [BAKRI] minta **MENTERI KERJA RAYA** menyatakan rancangan, jadual dan kos untuk menaik taraf Lebuhraya Utara - Selatan (E2) Melaka-Yong Peng-Senai Utara - Pandan, Johor Bahru (bermula KM181 hingga KM13) daripada empat lorong dua hala kepada sekurang-kurangnya enam lorong dua hala.

JAWAPAN

Tuan Yang Di-Pertua,

Untuk makluman Ahli Yang Berhormat, Agensi Pusat telah meluluskan cadangan projek **Pembinaan Lorong Tambahan Lebuhraya Utara Selatan (Plus) Dari Yong Peng Utara Ke Senai Utara Fasa 1 : Senai (U) – Sedenak** pada *Rolling Plan 3* (RP3), Rancangan Malaysia Kedua Belas (RMKe-12) dengan anggaran kos RM 525 juta.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

DARIPADA : TUAN TAN KAR HING (GOPENG)

SOALAN

TUAN TAN KAR HING [GOPENG] minta **MENTERI BELIA DAN SUKAN** menyatakan isu pengangguran di kalangan belia, sila nyatakan kadar pengangguran sejak tahun 2018 - 2022. Apakah punca utama dan nyatakan program Kerajaan yang membantu mereka.

JAWAPAN

Untuk makluman Ahli Yang Berhormat, berdasarkan statistik pengangguran yang dikeluarkan oleh Malaysian Bureau of Labour Statistics, Jabatan Perangkaan Malaysia (DOSM) pada tahun 2018 adalah 6.8%, tahun 2019 mencatatkan penurunan iaitu 6.5%, tahun 2020 mencatatkan peningkatan iaitu 8.7% dan tahun 2021 mencatatkan penurunan iaitu 8.5%, manakala kadar pengangguran sehingga November 2022 mencatatkan penurunan 7.0%.

Dalam usaha membantu menangani masalah pengangguran di kalangan belia, Kementerian ini telah melaksanakan beberapa inisiatif program seperti Program *Social Entrepreneurship for Rural Youth* (SERY); Program *Youth Career*; Program Ekonomi Digital; Program myPRENEUR; Program MyGig; Program Skim Perantisan Nasional (SPN); Program Webinar Jom Cipta Kerja; dan Program Webinar Inspire! Kerjaya Agro.

1. Program *Social Entrepreneurship for Rural Youth (SERY)* tahun 2022

- Program berbentuk latihan yang bertujuan untuk membangunkan potensi belia dalam bidang keusahawanan sosial untuk mengupayakan belia menyumbang kepada pembangunan sosioekonomi dan komuniti luar bandar. Program ini adalah kombinasi latihan, bimbingan dan pementoran selama 6 bulan melibatkan kerjasama Kementerian Kemajuan Desa dan Wilayah (KKDW), UNDP – UNICEF dan NAMA Foundation. Pelaksanaan program SERY melibatkan lima (5) fasa pelaksanaan dengan pengisian modul seperti Model Kanvas, Perniagaan, Pengurusan Projek, Etnografi, Pengumpulan Dana, Panajaan, Pengukuran Impak dan Kemahiran Pembentangan.
- Pada tahun 2022 pelaksanaan SERY telah menerima permohonan keseluruhan penyertaan berjumlah 42 penyertaan secara berkumpulan, melibatkan seramai 164 orang belia dan hanya 11 daripada 42 kumpulan telah bersaing di peringkat penilaian akhir.

2. Program *Youth Career (Y-Career)* tahun 2022

- Program berbentuk acara mini karnival telah dilaksanakan dengan kerjasama rakan strategik terpilih bertujuan memberi akses kepada belia massa untuk mendapatkan maklumat dan peluang penempatan pekerjaan berdasarkan keperluan industri serta meningkatkan kebolehpasaran belia dalam bidang kerjaya. Program merangkumi tiga (3) segmen utama iaitu sesi perkongsian, sesi penglibatan (engagement) bersama industri/ majikan dan sesi penilaian dan persediaan penempatan. Sebanyak 38,261 peluang pekerjaan di tawarkan secara keseluruhan. Seramai 6,676 belia telah ditemuduga dan seramai 1,179 berjaya ditawarkan pekerjaan.

3. Program Ekonomi Digital tahun 2022

- Program Ekonomi Digital ini satu program yang memberi platform kepada ikon-ikon usahawan belia dan pemain industri ekonomi digital untuk berkongsi pengalaman, ilmu dan maklumat kepada golongan belia kepentingan dunia digital dalam aktiviti seharian. Program ini dilaksanakan dengan kerjasama rakan strategik dan pemegang taruh yang banyak terlibat dalam aktiviti dunia digital.
- Melalui program ini ia memberi akses kepada belia massa untuk mendapatkan ilmu dan maklumat terhadap peluang penciptaan pekerjaan dan peluang pekerjaan dalam ekonomi digital pada era baru. Ia merangkumi dua (2) aktiviti utama iaitu Webinar Youth Digital dan Simposium Digital Ekonomi. Pengisian aktiviti melibatkan sesi perkongsian, pembentangan kertas kerja dengan penglibatan bersama agensi dan pihak industri / majikan.
- Pada tahun 2022 program Webinar Youth Digital telah dilaksanakan dengan 150 aktiviti peringkat negeri dengan penyertaan seramai 46,431 orang

4. Program myPRENEUR tahun 2022

- Program berbentuk latihan/program yang dijalankan oleh Akademi Pembangunan Belia Malaysia (APBMBG) dalam konteks pembangunan keusahawanan, keusahawanan sosial dan pembangunan kapasiti untuk menyerlahkan potensi belia dalam bidang keusahawanan berpandukan Dasar Belia Malaysia (DBM), Dasar Keusahawanan Nasional (DKN) serta Model Baharu Pembangunan Belia (MBPB).
- Pada tahun 2022 KBS telah melaksanakan 29 aktiviti dengan penyertaan seramai 3115 orang belia.

5. Program *MyGig* tahun 2021

- *MyGig* bertujuan untuk meningkatkan keterlibatan belia dalam ekonomi gig bagi menjana pendapatan. Program ini terbahagi kepada dua iaitu :-
 - *MyGig Service* - Menyediakan peluang pekerjaan dan jana pendapatan tambahan melalui platform digital dengan melaksanakan tugas secara hands-on seperti penghantaran, eHailing dan lain-lain perkhidmatan.
 - *MyGig Digital Freelance* - Menjana pendapatan tambahan dan mendapatkan pekerjaan melalui platform digital dan melaksanakan tugas secara atas talian dengan kemahiran tertentu seperti programming, pereka grafik dan lain-lain perkhidmatan yang berkemahiran.
- Pada tahun 2021, seramai 2,676 orang belia telah mendaftar untuk menyertai program *MyGig Service* dan 1,009 daripadanya telah mendapat peluang pekerjaan. Manakala, 1,872 orang belia telah mendaftar untuk program *MyGig Digital Freelancer* dan 1037 telah mendapat peluang pekerjaan.

6. Program Skim Perantisan Nasional (SPN)

- Merupakan berkonsepkan “*place and train*” bagi membantu melonjakkan kebolehpasaran belia dan menyediakan lebih banyak peluang untuk belia mendapatkan pengalaman bekerja. KBS bekerjasama dengan Kementerian Sumber Manusia di bawah inisiatif PENJANA bagi melaksanakan program SPN untuk belia mendapatkan pengalaman bekerja di sektor swasta dan syarikat berkaitan Kerajaan (GLC).
- Melibatkan penempatan latihan perantisan selama 3 hingga 6 bulan. Perantis ditempatkan di syarikat mengikut keperluan bidang kerja dan kemahiran yang diperlukan oleh syarikat

tersebut. Dalam tempoh penempatan ini, perantis mengikuti latihan kemahiran *soft skills* yang dikendalikan oleh penyedia latihan secara berkala. Latihan *soft skills* ini mensasarkan peningkatan modal insan dan profail perantis. Pada tahun 2021 seramai 7,679 orang telah terlibat dalam program SPN melibatkan sebanyak 175 syarikat/ *training provider*.

7. Program Webinar Jom Cipta Kerja

- Program Webinar Jom Cipta Kerja dengan kerjasama Majlis Belia Malaysia untuk menyampaikan maklumat-maklumat berkaitan peluang penciptaan pekerjaan dalam konteks: keusahawanan; pertanian; dan ekonomi digital secara langsung kepada belia. Pada tahun 2021, Sebanyak 22 siri webinar telah dilaksanakan dengan penyertaan seramai 2,321 orang.

8. Program Webinar Inspire! Kerjaya Agro

- Program Webinar Inspire! Kerjaya Agro dengan kerjasama Majlis Belia Malaysia (MBM) untuk memberikan pendedahan dan menyampaikan maklumat kepada para belia tentang peluang kerjaya dalam bidang pertanian (agromakanan). Pada tahun 2021, sebanyak 24 siri webinar telah dilaksanakan dengan penyertaan seramai 10,458 orang

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

DARIPADA : YB TUAN TAN KAR HING (GOPENG)

SOALAN

TUAN TAN KAR HING [GOPENG] minta **MENTERI KERJA RAYA** menyatakan mengapa jumlah permohonan yang diluluskan bagi membaik pulih jalan Persekutuan di negeri Perak adalah jauh lebih rendah. Apakah rasional kadar kelulusan permohonan yang rendah bagi negeri Perak. Tahun 2022 permohonan adalah RM510,907,881.81 tetapi kelulusan hanya RM81,331,072.40.

JAWAPAN

Tuan Yang Di-Pertua,

Untuk makluman Ahli Yang Berhormat, pihak Kementerian Kewangan (MOF) telah meluluskan peruntukan sebanyak **RM869 juta** bagi pelaksanaan program penyenggaraan Jalan Persekutuan Semenanjung Malaysia bagi tahun 2022. Daripada peruntukan tersebut, sebanyak **RM81.3 juta** telah diagihkan untuk penyenggaraan jalan Persekutuan di Negeri Perak.

Sehubungan dengan itu, pelaksanaan kerja bagi program penyenggaraan yang telah dirangka adalah tertakluk kepada senarai keutamaan kerja berdasarkan kepada penilaian teknikal tahap kritikal kerosakan bagi keseluruhan jaringan jalan persekutuan yang dilaksanakan oleh Jabatan Kerja Raya dan juga berdasarkan kepada had peruntukan yang diluluskan oleh Kementerian Kewangan Malaysia.

Bagi memastikan Jalan Persekutuan disenggara dengan baik, Kementerian Kerja Raya menyediakan program penyenggaraan berdasarkan notis kerosakan notis kerosakan (Notice of Defects / NOD) yang disediakan oleh syarikat konsesi penyenggaraan jalan Persekutuan. Melalui NOD ini, Kementerian akan menyenaraikan program penyenggaraan mengikut keutamaan, tahap kritikal dan keperluan mendesak untuk dikemukakan kepada Kementerian Kewangan bagi kelulusan peruntukan.

Kementerian ini sentiasa berusaha dalam memastikan keadaan Jalan Persekutuan sentiasa berada dalam keadaan selamat, baik dan selesa kepada semua pengguna Jalan Persekutuan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN TAN KAR HING [GOPENG]

SOALAN

YB TUAN TAN KAR HING [GOPENG] minta **MENTERI PEMBANGUNAN KERAJAAN TEMPATAN** menyatakan jumlah projek sakit perumahan bawah Perbadanan PR1MA Malaysia, apakah perancangan Kerajaan dalam membantu pembeli dan menyempurnakan projek-projek sakit tersebut.

JAWAPAN

Tuan Yang di-Pertua,

Untuk makluman Ahli Yang Berhormat, bagi tahun 2023, di bawah Perbadanan PR1MA Malaysia (PR1MA), sebanyak empat (4) projek sakit yang merangkumi 2,601 unit telah pun berjaya disiapkan dan memperolehi Perakuan Siap dan Pematuhan (CCC). Setakat 28 Februari 2023, jumlah projek sakit di bawah PR1MA adalah sebanyak 18 projek yang terdiri daripada 12,375 unit. Projek-projek ini merangkumi projek yang terletak di Semenanjung Malaysia dan Sabah.

PR1MA telah meletakkan keutamaan dalam menangani isu projek sakit melalui strategi intervensi dan mediasi projek. Antara langkah yang diambil adalah seperti berikut:

- (i) mengambil alih pengurusan projek daripada kontraktor bermasalah;
- (ii) lantikan kontraktor penyelamat;

SOALAN NO : 556

- (iii) mengurus dan membuat pembayaran terus kepada pembekal, perunding dan subkontraktor projek; dan
- (iv) membuat rombakan dan perancangan semula kerja-kerja di tapak bagi mempercepatkan penyiapan projek.

Selain itu, langkah yang turut dilaksanakan oleh pihak PR1MA sebagai nilai tambah kepada kerja-kerja hakiki di bawah kontraktor yang bertanggungjawab adalah seperti berikut:

- (i) penglibatan dalam kerja-kerja pengindahan landskap dan peningkatan kualiti fasiliti dalam tempoh akhir pembinaan;
- (ii) mengadakan beberapa sesi perjumpaan dengan wakil pembeli bagi projek-projek yang terkesan iaitu *Homebuyer Review Committee* (HRC) bertujuan untuk memberitahu perkembangan terkini berkenaan status pembangunan projek. HRC juga bertujuan untuk mewujudkan komunikasi dua hala bagi membolehkan pihak pembeli memberi maklum balas dan pandangan kepada PR1MA; dan
- (iii) melaksanakan pembayaran awal sebahagian Gantirugi Tertentu dan Ditetapkan (*Liquidated Ascertained Damages*, LAD) kepada pembeli-pembeli yang layak.

PR1MA prihatin dengan masalah yang dihadapi oleh pembeli yang terkesan dengan kelewatan projek-projek PR1MA serta sentiasa komited dalam menyediakan perumahan mampu milik yang berkualiti untuk golongan M40.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : TUAN TAN KAR HING [GOPENG]

SOALAN

TUAN TAN KAR HING [GOPENG] minta **MENTERI KESIHATAN** menyatakan perancangan Kementerian dalam mewujudkan hospital baru atau menaiktarafkan klinik kesihatan yang sedia ada dalam kawasan Kinta, Batu Gajah dan Kampar, Perak mengikut perancangan Kementerian.

JAWAPAN

Tuan Yang di-Pertua,

1. Antara projek naik taraf yang sedang dilaksanakan dalam daerah Kinta ialah:

- a. Jabatan Transfusi Hospital Raja Permaisuri Bainun – dijangka siap pada akhir tahun 2023;
- b. Projek Klinik Kesihatan Manjoi - dijangka siap pada pertengahan tahun 2024; dan
- c. Projek Blok Kesihatan Ibu dan Anak Klinik Kesihatan Greentown – dijangka siap pada pertengahan tahun 2025.

2. Manakala cadangan Klinik Kesihatan Jenis 3 Chemor telah disenaraikan dalam permohonan *Rolling Plan 4* RMK-12.

3. Bagi Hospital Kampar yang baharu, KKM sedang dalam proses mengenal pasti tanah / tapak yang sesuai.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN TAN KAR HING [GOPENG]

SOALAN

TUAN TAN KAR HING [GOPENG] minta **MENTERI PERTANIAN DAN KETERJAMINAN MAKANAN** menyatakan sama ada Kementerian pernah melakukan audit terhadap kejayaan skim-skim Tanah Kekal Pengeluaran Makanan (TKPM) di Negeri Perak. Apakah prestasi skim TKPM di Perak dari segi pengeluaran bahan makanan dalam setiap tahun dari 2018 hingga 2021.

JAWAPAN

Tuan Yang di-Pertua,

Program Taman Kekal Pengeluaran Makanan (TKPM) merupakan salah satu program berimpak tinggi yang diperkenalkan oleh Kerajaan di bawah Dasar Pertanian Negara ke-3 sebagai salah satu strategi untuk mentransformasikan sektor pertanian dengan menggalakkan pelaksanaan projek pertanian secara berskala besar, komersil dan berteknologi tinggi oleh usahawan selain memperkasakan jaminan bekalan makanan negara melalui pengwujudan kawasan khusus bagi pengeluaran makanan secara kekal.

Pembangunan TKPM melibatkan tiga sub-sektor pertanian iaitu tanaman, ternakan dan perikanan di bawah pemantauan Kementerian Pertanian dan Keterjaminan Makanan (KPKM) melalui pengawalseliaan oleh Jabatan Pertanian Malaysia (DOA), Jabatan Perikanan Malaysia (DOF) dan Jabatan Perkhidmatan Veterinar (DVS).

KPKM sentiasa memantau dan menjalankan audit ke atas prestasi semua projek Taman Kekal Pengeluaran Makanan (TKPM) dari semasa ke semasa. Elemen pemantauan dan audit secara berkala oleh KPKM ini telah diambil kira dalam Garis Panduan Pembangunan Projek TKPM. Audit Dalam KPKM khususnya, bertanggungjawab dalam memantau secara keseluruhan sistem operasi dan pencapaian hasil pengeluaran tanaman TKPM bukan sahaja di negeri Perak tetapi melibatkan kesemua TKPM yang ada di Semenanjung, Sabah, Sarawak dan Wilayah Persekutuan Labuan. Peserta-peserta TKPM yang tidak mencapai prestasi ditetapkan akan ditamatkan mengikut prosedur yang telah ditetapkan.

KPKM melalui Jabatan Pertanian telah membangunkan enam (6) buah TKPM di Negeri Perak melibatkan lima (5) TKPM di bawah tanah milik kerajaan negeri iaitu TKPM Sungkai (2001), TKPM Lekir (2001), TKPM

SOALAN NO: 558

SKC Slim (2004), TKPM Gua Tempurung (2006) dan TKPM Degong (2014) manakala satu (1) TKPM dibangunkan di bawah tanah milik Kerajaan Persekutuan iaitu TKPM Titi Gantung (2004).

TKPM Gua Tempurung, TKPM SKC Slim, TKPM Sungkai dan TKPM Titi Gantung telah dibangunkan secara konvensional manakala TKPM Degong dibangunkan sepenuhnya dengan struktur pelindung hujan (SPH) dan TKPM Lekir terdiri daripada campuran konvensional dan SPH.

Setakat ini, seramai 98 orang peserta sedang mengusahakan projek TKPM di Negeri Perak dengan keluasan keseluruhan 788 hektar. Purata pengeluaran bagi keseluruhan TKPM di Negeri Perak adalah diantara 18,000 ke 20,000 tan metrik setahun melibatkan tanaman buah- buahan, sayur- sayuran dan tanaman kontan. Daripada 98 orang peserta tersebut, 63 orang peserta memperoleh pendapatan melebihi RM5,000.00 sebulan, 16 orang peserta memperoleh pendapatan diantara RM3,000.00 ke RM5,000.00 sebulan, tujuh (7) orang peserta mendapat pendapatan dibawah RM3,000.00 sebulan manakala 12 orang adalah peserta yang baru menyertai TKPM.

Prestasi pengeluaran hasil tanaman di TKPM Negeri Perak bagi tempoh 2018 sehingga 2021 adalah seperti berikut:

TAHUN	PENGELUARAN HASIL (TAN METRIK)	NILAI (RM JUTA)
2018	16,532.76	27.16
2019	15,387.28	26.25
2020	15,581.45	25.48
2021	18,912.96	28.90
JUMLAH	66,414.45	107.79

Antara tanaman sayur- sayuran utama yang banyak ditanam di TKPM di Negeri Perak adalah cili, bendi, kacang panjang, timun, terung, peria,

SOALAN NO: 558

sawi, kangkung dan bayam. Pengeluaran TKPM negeri Perak mengikut kategori tanaman adalah seperti berikut:

BIL.	JENIS TANAMAN	PENGELUARAN (TAN METRIK)	NILAI (RM JUTA)
1.	Sayur	5,405.93	9.3
2.	Tanaman Ladang / Kontan	9,617.91	11.9
3.	Buah-buahan	2,152.31	4.9
4.	Rempah ratus	96.23	0.25
5.	Tanaman Industri	0.11	0.022
6.	Lain-lain Tanaman	1,640.46	2.45
JUMLAH		18,912.95	28.822

Bagi sub-sektor ternakan, sebanyak 10 lot tanah kawasan padang ragut di bawah Jabatan Perkhidmatan Veterinar (DVS) telah dikategorikan dibawah program TKPM di Perak dan program ini melibatkan 117 orang peserta terdiri daripada penternak ruminan (lembu, kerbau dan kambing) dan juga rusa pada tahun 2021. Pada tahun 2021, jumlah ternakan yang dapat ditenak adalah berjumlah 2,096 ekor dengan nilai hasil pengeluaran sebanyak RM2,012,800.00. Berlaku peningkatan prestasi jika dibandingkan dengan pencapaian program pada tahun 2018 hanya 1,836 ekor dengan nilai hasil pengeluaran sebanyak RM1,500,200.00 seperti perincian berikut:

TAHUN	BILANGAN TERNAKAN (EKOR)	NILAI (RM)
2018	1,836	1,500,200.00
2019	1,923	1,615,600.00
2020	1,936	1,740,000.00
2021	2,096	2,012,800.00
JUMLAH	7,791	6,868,600.00

KPKM melalui Jabatan Perikanan Malaysia (DOF) sentiasa menjalankan pemantauan berkala dan khidmat nasihat bagi aspek pengeluaran

SOALAN NO: 558

ternakan serta pengauditan yang melibatkan pematuhan pensijilan myGAP dan *Fish Quality Certificate* (FQC).

Bagi sub-sektor perikanan, TKPM Zon Industri Akuakultur (ZIA) yang digazetkan untuk sektor perikanan bagi negeri Perak adalah sebahagian kawasan Tasik Temengor iaitu seluas 100 hektar. Terkini, seramai tujuh (7) pengusaha individu dan satu (1) syarikat terlibat dalam pengeluaran ternakan ikan di kawasan tersebut.

Jumlah keseluruhan pengeluaran perikanan di TKPM Tasik Temengor bagi tempoh empat (4) tahun dari tahun 2018 hingga 2021 adalah sebanyak 8,376.76 tan metrik bernilai RM72.9 juta seperti perincian berikut:

TAHUN	PENGELUARAN PERIKANAN (TAN METRIK)	NILAI (RM)
2018	2,473.48	21,519,276.00
2019	1,445.16	12,572,892.00
2020	1,809.69	15,744,303.00
2021	2,648.43	23,041,341.00
JUMLAH	8,376.76	72,877,812.00

Kerajaan sentiasa menyarankan kepada pengusaha-pengusaha yang layak serta berminat untuk menyertai bidang akuakultur di kawasan ZIA sedia ada.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN TAN KOK WAI [CHERAS]

SOALAN

TUAN TAN KOK WAI [CHERAS] minta **PERDANA MENTERI** menyatakan:

- a) mengapa Jabatan Peguam Negara masih belum mendakwa pihak tertuduh dalam kes berkaitan laporan polis dengan No. Report: CHERAS/022144/20 bertarikh 20 Oktober 2020 walaupun polis telah mengemukakan siasatan mereka berulang kali.
- b) Apakah perkara yang menyebabkan kelewatan ini sedangkan kes ini melibatkan kematian tragis seorang pemuda.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Mangsa dalam siasatan kes ini bukan seorang pemuda sebagaimana soalan yang telah diajukan. Mangsa (si mati) adalah seorang wanita berbangsa Cina. Kertas siasatan dirujuk ke Jabatan Peguam Negara. Setelah kertas siasatan diteliti, terdapat beberapa arahan lanjut yang perlu diambil tindakan oleh pegawai penyiasat PDRM bagi melengkapkan siasatan.
2. Setelah kertas siasatan dikembalikan semula kepada Jabatan Peguam Negara, terdapat beberapa lagi perkara yang perlu disiasat dan perincian lanjut perlu diberikan oleh pegawai penyiasat bagi menjelaskan beberapa isu yang berkaitan. Kertas siasatan telah dikembalikan semula kepada PDRM untuk tindakan PDRM.
3. Setakat ini, siasatan lanjut sedang dilengkapkan oleh pegawai penyiasat sebelum arahan yang sewajarnya boleh diberikan oleh Jabatan Peguam Negara.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN TAN KOK WAI [CHERAS]

SOALAN

TUAN TAN KOK WAI [CHERAS] minta **MENTERI LUAR NEGERI** menyatakan sama ada Kerangka Kod Tata Laku Laut China Selatan mempunyai kuasa ikatan undang-undang dan pendirian Malaysia mengenai cadangan kuasa ikatan undang-undang.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Cheras atas pertanyaan yang dikemukakan.

Tuan Yang di-Pertua,

2. Seperti Yang Berhormat sedia maklum, sebagai langkah untuk memastikan keamanan, kestabilan dan mengelakkan ketegangan di Laut China Selatan, Negara-Negara Anggota ASEAN dan China telah memeterai Deklarasi Tatalaku Pihak–pihak Berkepentingan di Laut China Selatan, atau dengan izin, *Declaration on the Conduct of Parties in the South China Sea* (DOC) pada 4 November 2002.

3. Menerusi DOC, negara-negara ASEAN dan China bertekad untuk melaksanakan aktiviti-aktiviti untuk membina dan meningkatkan keyakinan, terutamanya antara negara-negara penuntut, berhubung isu Laut China Selatan. Susulan daripada pemeteraian DOC, Negara-Negara Anggota ASEAN dan China sedang merundingkan Kod Tatalaku di Laut China Selatan, atau dengan izin, *Code of Conduct in the South China Sea*

(COC), yang dilihat sebagai satu usaha bagi mengelakkan sebarang konflik antara satu sama lain.

4. Untuk makluman Dewan yang mulia ini, isu mengenai kuasa ikatan undang-undang COC masih dibincangkan dalam sesi-sesi rundingan COC yang dijalankan dengan negara-negara ASEAN dan China. Kerajaan Malaysia berpendirian bahawa semua negara yang terlibat dalam rundingan COC perlu mematuhi perkara-perkara yang telah dipersetujui sebagai hasil kepada proses rundingan COC bagi mengekalkan Laut China Selatan sebagai laut yang aman.

5. Tiada jangka masa khusus yang ditetapkan untuk memuktamadkan teks COC, dan masa yang diambil akan bergantung kepada pelbagai faktor dalam rundingan antara Negara-Negara Anggota ASEAN dan China. Walau bagaimanapun, kesemua negara yang terlibat beraspirasi mempercepatkan proses rundingan bagi mengelakkan timbulnya sebarang isu atau konflik sepanjang proses rundingan diadakan.

6. Dalam melaksanakan rundingan COC tersebut, Kerajaan Malaysia akan sentiasa memastikan bahawa COC yang akan dirundingkan tidak sekali-kali mengetepikan kedaulatan, hak kedaulatan dan hak kepentingan negara

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
DARIPADA : TUAN TAN KOK WAI [CHERAS]

SOALAN

TUAN TAN KOK WAI [CHERAS] minta **MENTERI KEWANGAN** menyatakan hasil rundingan dan jumlah pampasan kepada pihak China yang timbul akibat pembatalan projek Multi Product Pipeline dan Trans Sabah Gas Pipeline.

JAWAPAN

Tuan Yang di-Pertua,

Untuk makluman Tuan Yang Dipertua, Mesyuarat Jemaah Menteri pada 10 Februari 2021 antara lain telah bersetuju supaya projek *Trans Sabah Gas Pipeline* (TSGP) yang telah dibatalkan sebelum ini disambung semula pelaksanaannya manakala projek *Multi-Product Pipeline* (MPP) dikaji dan dirundingkan dengan lebih lanjut dengan pihak kontraktor bagi menentukan hala tuju yang jelas.

Selaras dengan itu, beberapa siri rundingan telah diadakan antara pihak Kementerian Kewangan dan syarikat *Suria Strategic Energy Resources* (SSER) selaku pemilik projek dengan pihak *China Petroleum Pipeline Bureau* (CPPB) bagi mencari kaedah penyelesaian terbaik untuk meneruskan pelaksanaan projek TSGP di samping membuat penambahbaikan terhadap isu- isu yang telah dibangkitkan sebelum ini.

Hasil daripada rundingan tersebut, kedua-dua pihak bersetuju untuk menyambung semula projek TSGP di samping usaha untuk memuktamadkan terma dan syarat perjanjian baharu. Susulan daripada itu, Jemaah Menteri dalam mesyuaratnya pada 21 September 2022 antara lain bersetuju secara prinsip supaya Perjanjian Tambahan bagi maksud penyambungan semula projek TSGP ditandatangani antara SSER dan CPPB berdasarkan terma dan syarat yang dipersetujui oleh kedua-dua belah pihak. Manakala pelaksanaan projek MPP hanya akan dipertimbangkan setelah kajian lanjut dilaksanakan, tertakluk kepada keputusan Kerajaan.

Selaras dengan keputusan terkini Kerajaan untuk menyambung semula projek TSGP, kedua-dua pihak SSER dan CPPB bersetuju supaya sebarang keputusan melibatkan tuntutan pampasan oleh kedua-dua belah pihak dibuat melalui rundingan bersama dengan mengambil kira perkara-perkara yang dibangkitkan dalam rundingan terdahulu berkaitan isu pampasan pembatalan projek.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : PUAN TERESA KOK SUH SIM [SEPUTEH]

SOALAN

PUAN TERESA KOK SUH SIM [SEPUTEH] minta **MENTERI PENDIDIKAN** menyatakan berapa peruntukan bantuan yang merangkumi penyelenggaraan, naik taraf dan pengubahsuaian kepada Sekolah Bantuan Kerajaan (SBK) mengikut aliran SK, SJK(C), SJK(T), sekolah mubaligh, sekolah menengah jenis kebangsaan sepanjang tahun 2018 – 2022.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited kepada usaha menyediakan fasiliti bangunan dan kemudahan sekolah yang dapat berfungsi dengan baik, selamat dan kondusif.

Untuk makluman Ahli Yang Berhormat, agihan peruntukan bagi penyelenggaraan sekolah berstatus sekolah bantuan kerajaan (SBK) iaitu sekolah kebangsaan (SK), sekolah jenis kebangsaan Cina (SJKC), sekolah jenis kebangsaan Tamil (SJKT), sekolah mubaligh (SM), dan sekolah menengah kebangsaan (merujuk kepada sekolah menengah jenis kebangsaan - SMJK) akan dipertimbangkan berdasarkan permohonan yang dikemukakan kepada KPM oleh lembaga pengelola sekolah (LPS). Sepanjang tahun 2018 sehingga 2022, KPM telah menyalurkan peruntukan penyelenggaraan, naik taraf dan pengubahsuaian seperti berikut:

Jenis Sekolah	Tahun 2018 (RM)	Tahun 2019 (RM)	Tahun 2020 (RM)	Tahun 2021 (RM)	Tahun 2022 (RM)
SK	-	-	-	257,000.00	20,000.00
SJKC	49,995,000.00	48,295,000.00	8,328,755.85	45,623,258.20	46,571,585.43
SJKT	13,510,000.00	20,380,000.00	33,232,977.00	18,136,379.00	16,349,130.80
SM	43,150,710.00	42,880,000.00	45,786,162.62	21,235,090.00	9,943,868.88
SMK*	11,690,000.00	11,600,000.00	18,887,858.53	3,424,563.00	1,484,027.00
Jumlah	118,345,710.00	123,155,000.00	106,235,754.00	88,676,290.20	74,368,612.11

Nota:

Sekolah Bantuan Kerajaan:

- i. SK- Sekolah Kebangsaan
- ii. SJKC- Sekolah Jenis Kebangsaan (Cina)
- iii. SJKT- Sekolah Jenis Kebangsaan (Tamil)
- iv. SM - Sekolah Mubaligh
- v. SMK- Sekolah Menengah Kebangsaan

*Merujuk kepada SMJK

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : PUAN TERESA KOK SUH SIM
[SEPUTEH]**

SOALAN

PUAN TERESA KOK SUH SIM [SEPUTEH] minta **MENTERI PERLADANGAN DAN KOMODITI** menyatakan bilangan buku “Mari Kenali Sawit” versi sekolah rendah dan sekolah menengah yang telah diedarkan ke 144 Pejabat Pendidikan Daerah di seluruh Malaysia. Beri pecahan kos pengangkutan buku tersebut ke Pejabat Pendidikan Daerah di setiap negeri di Malaysia.

JAWAPAN

Yang di-Pertua,

1. Untuk makluman YB, kos pengangkutan buku tersebut telah diambil kira dalam kos keseluruhan penerbitan buku tersebut.
2. Setiap buah buku *Mari Kenali Sawit* versi sekolah rendah berharga RM13.30 dan versi sekolah menengah berharga RM19.30. Kos pengangkutan telah dikira sebagai harga pakej dalam harga setiap buah buku, secara purata. Pengangkutan meliputi penghantaran buku ke semua Pejabat Pendidikan Daerah (PPD) di seluruh Malaysia.
3. Selain daripada kos pengangkutan, pihak penerbit buku *Mari Kenali Sawit* juga menerbitkan *flipbook* dan animasi 2D buku versi sekolah rendah iaitu dalam bahasa Melayu dan Inggeris dan ia boleh diimbas melalui kod QR yang terdapat pada muka hadapan buku tersebut. Manakala untuk versi sekolah menengah, kod QR yang terdapat di atas muka hadapan buku tersebut akan membawa pembaca kepada capaian-capaian yang mengandungi infografik dan poster mengenai minyak sawit serta *flipbook* buku tersebut.
4. Kesemua kos ini adalah merupakan harga pakej buku tersebut secara keseluruhan.
5. Penghantaran diuruskan oleh syarikat logistik yang dilantik untuk menghantar buku-buku tersebut ke 144 PPD.
6. Menurut pihak penerbit buku, syarikat logistik ini merupakan syarikat logistik yang biasa dilantik oleh Kementerian Pendidikan untuk semua penghantaran buku dan lain-lain bahan pendidikan ke seluruh Malaysia.
7. Kos penghantaran dikira mengikut peratusan harga buku iaitu 10% daripada harga buku yang dihantar ke PPD di Semenanjung Malaysia dan 18% daripada harga buku yang dihantar ke Sabah, Sarawak dan WP Labuan.

NO. SOALAN : 563

8. Pecahan bagi pengangkutan edaran buku “Mari Kenali Sawit” sebanyak RM484,073.45 adalah seperti berikut:

No	Bil Sekolah	Kuantiti Setiap Sekolah	Jumlah Buku	Harga (RM)	Jumlah (RM)
A	Sabah/Sarawak/WP Labuan SR – 2,357 buah SM – 425 buah	27 25	63,639 10,625	13.30	846,398.70
				19.30	205,062.50
					<u>1,051,461.20</u>
				18%	189,263.02
B	Semenanjung Malaysia SR – 5,423 buah SM – 2,074 buah	27 25	146,421 51,850	13.30	1,947,399.30
				19.30	<u>1,000,705.00</u>
					2,948,104.30
				10%	294,810.43
JUMLAH KOS PENGHANTARAN = A + B					484,073.45

SR – Sekolah rendah

SM – Sekolah menengah

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : PUAN TERESA KOK SUH SIM
[SEPUTEH]**

SOALAN

PUAN TERESA KOK SUH SIM [SEPUTEH] minta **MENTERI PERLADANGAN DAN KOMODITI** menyatakan sama ada Dasar Industri Perkayuan Kebangsaan (NATIP) 2009 - 2020 telah digantikan dengan dasar baharu. Sekiranya ya, nyatakan hala tuju baru perkembangan industri perkayuan dan juga sebab dasar baru ini tidak dimuat naik dalam laman web MTIB.

JAWAPAN

Yang di-Pertua,

1. Untuk makluman Ahli Yang Berhormat, selaras dengan Dasar Agrikomoditi Negara 2021-2025 (DAKN 2030) yang dilancarkan pada 9 Mac 2022 dan berakhirnya tempoh Dasar Perindustrian Kayu Negara (NATIP) pada akhir tahun 2020, Lembaga Perindustrian Kayu Malaysia (MTIB) telah melancarkan Pelan Strategik Industri Perkayuan Negara (NTISP) 2021-2025.
2. NTISP 2021-2025 dirangka dengan halatuju untuk memperkasakan industri perkayuan Malaysia sebagai satu industri yang berdaya saing dan lestari di peringkat tempatan dan antarabangsa. Lima teras strategik yang digariskan meliputi bahan mentah dan kemampanan industri; teknologi, inovasi dan sokongan industri; modal insan dan produktiviti; pembangunan pemasaran dan perdagangan serta peningkatan penglibatan Bumiputera.
3. NTISP juga merupakan semakan semula NATIP dan sejajar dengan Dasar Agrikomoditi Negara (DAKN) 2021-2030 di bawah sub-sektor perkayuan yang turut selaras dengan fokus Kerajaan yang berpandukan kepada Wawasan Kemakmuran Bersama (WKB) 2030, Matlamat Pembangunan Mampan (SDGs), kelestarian industri dan penghasilan produk bernilai tambah.
4. NTISP 2021-2025 mensasarkan eksport perkayuan sebanyak RM28 bilion dan nisbah eksport produk perkayuan hiliran (bernilai tambah) berbanding hulu sebanyak 68:32 pada tahun 2025. Pelan strategik ini bertujuan bagi memastikan industri perkayuan akan terus kekal kompetitif dan berdaya saing dalam pasaran tempatan dan antarabangsa.
5. Untuk makluman Ahli Yang Berhormat, dokumen Pelan Strategik Industri Perkayuan Negara (NTISP) 2021-2025 telah dimuatnaik ke dalam laman sesawang MTIB pada 26 Julai 2022. Salinan dokumen juga telah diedarkan kepada semua pihak persatuan industri perkayuan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : PUAN TERESA KOK SUH SIM [SEPUTEH]

SOALAN

YB PUAN TERESA KOK SUH SIM [SEPUTEH] minta **MENTERI PEMBANGUNAN KERAJAAN TEMPATAN** menyatakan senarai projek rumah mampu milik yang telah diluluskan dan sedang/belum dibina di setiap kawasan Parlimen. Nyatakan unit setiap projek rumah mampu milik tersebut.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan komited untuk meneruskan inisiatif penyediaan Rumah Mampu Milik (RMM) yang berdaya huni dan berkualiti di bawah Rancangan Malaysia Kedua Belas (RMKe-12) dengan sasaran penyediaan sebanyak 500,000 unit RMM di seluruh negara. Dalam hal ini, Kementerian Pembangunan Kerajaan Tempatan (KPKT) telah dipertanggungjawabkan sebagai penyelaras bagi penyediaan dan pelaporan RMM yang akan dilaksanakan oleh agensi penyedia perumahan di peringkat Kerajaan Persekutuan, kerajaan negeri dan pemaju swasta. Sehingga 31 Disember 2022, sebanyak 108,373 unit telah siap dibina, 131,573 dalam pembinaan, manakala baki sebanyak 298,785 unit RMM adalah dalam perancangan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : PUAN TERESA KOK SUH SIM [SEPUTEH]

SOALAN

PUAN TERESA KOK SUH SIM [SEPUTEH] minta **MENTERI PENDIDIKAN** menyatakan berapa bilangan Sekolah Bantuan Kerajaan (SBK) yang daif mengikut lokasi negeri dan berapa jumlah peruntukan yang telah disalurkan sepanjang tahun 2008 – 2022.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha untuk menyediakan prasarana dan kemudahan infrastruktur pendidikan kepada semua sekolah termasuk sekolah bantuan kerajaan (SBK).

Untuk makluman Ahli Yang Berhormat, KPM telah mengenal pasti sebanyak 45 buah SBK yang mempunyai bangunan daif di seluruh negara. Sehingga Februari 2022, bilangan SBK yang mempunyai bangunan daif mengikut negeri adalah seperti berikut:

Negeri	Bilangan Sekolah
Perlis	1
Kedah	3
Perak	1
Selangor	3
Johor	3
Pahang	2
Sabah	9
Sarawak	23
Jumlah	45

Untuk makluman Ahli Yang Berhormat, KPM mempunyai maklumat lengkap berkenaan sumbangan bantuan penyelenggaraan bagi SBK bermula tahun 2016 seperti berikut:

Tahun	2016	2017	2018	2019	2020	2021	2022
Jumlah Peruntukan (RM Juta)	105.28	128.7	138.3	173	154.9	109.9	91.85

Sekian, terima kasih.

RT58

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN AZLI BIN YUSOF [SHAH ALAM]

SOALAN

TUAN AZLI BIN YUSOF [SHAH ALAM] minta **PERDANA MENTERI** menyatakan perancangan jangka masa panjang dalam melaksanakan Akta Perkhidmatan Parlimen.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, sebagaimana Yang Amat Berhormat Perdana Menteri menyatakan sebelum ini, Kerajaan komited dalam memastikan Parlimen bebas daripada kuasa eksekutif. Usaha transformasi Parlimen juga penting bagi mengekalkan demokrasi dan kebebasan bersuara.
2. Buat masa ini, Bahagian Hal Ehwal Undang-Undang, Jabatan Perdana Menteri (BHEUU, JPM) bersama-sama dengan Jabatan Peguam Negara sedang memuktamadkan Rang Undang-Undang Perkhidmatan Parlimen untuk menjadikan perkhidmatan Parlimen berasingan daripada perkhidmatan awam yang dikenali sebagai perkhidmatan Parlimen. Pemberian Kuasa Autonomi kepada Parlimen melalui penggubalan Akta Perkhidmatan Parlimen ini adalah amat penting dan merupakan satu progres yang baik dalam memartabatkan doktrin pengasingan kuasa antara Badan Perundangan dan Badan Eksekutif.
3. Memorandum Jemaah Menteri mengenai perkara ini akan dibentangkan di Mesyuarat Jemaah Menteri dalam masa terdekat.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN AZLI BIN YUSOF [SHAH ALAM]

SOALAN

TUAN AZLI BIN YUSOF [SHAH ALAM] minta **MENTERI EKONOMI** menyatakan sejauh manakah usaha-usaha dan matlamat Kerajaan dalam melestarikan Ekonomi Hijau atau 'Green Economy' di Malaysia menjelang tahun 2030.

JAWAPAN

Tuan Yang di-Pertua,

Model pembangunan ekonomi yang lebih bersifat konvensional kurang memberi penekanan kepada aspek penjagaan alam sekitar dan pemeliharaan sumber asli. Kegiatan ekonomi yang dijalankan secara tidak lestari akan memberi kesan buruk terhadap alam sekitar, kerosakan biodiversiti dan perubahan iklim. Menyedari perkara ini, negara meletakkan matlamat pertumbuhan hijau sebagai salah satu keutamaan pembangunan negara. Ia mampu menyumbang kepada peningkatan ekonomi serta pada masa sama dapat melestarikan alam sekitar dan aset semulajadi dalam negara.

Malaysia mendukung aspirasi pembangunan model ekonomi hijau antaranya untuk mengurangkan kesan perubahan iklim. Semasa pelancaran Rancangan Malaysia Kedua Belas (RMKe-12) pada September 2021, Kerajaan mengumumkan aspirasi untuk mencapai

pelepasan gas rumah kaca (GHG) bersih sifar atau *net-zero GHG emissions* seawal-awalnya pada tahun 2050.

Net-zero emissions adalah merujuk kepada pengimbangan pelepasan dan penyerapan GHG. Perincian langkah-langkah bagi mencapai sasaran ini tertakluk kepada laporan kajian Strategi Jangka Masa Panjang Pembangunan Rendah Karbon (LT-LEDS) oleh Kementerian Sumber Asli, Alam Sekitar dan Perubahan Iklim (NRECC) yang akan dimuktamadkan pada akhir tahun 2023.

Salah satu fokus utama dalam RMKe-12 adalah Mempercepat Pertumbuhan Hijau untuk memastikan kemampanan dan daya tahan dengan melaksana agenda pembangunan bersih, hijau dan berdaya tahan melalui pendekatan keseluruhan negara. Antara strategi pertumbuhan hijau yang akan dilaksanakan termasuk:

- i. Melaksana pembangunan ekonomi rendah karbon;
- ii. Mempertingkatkan tenaga boleh baharu;
- iii. penerimgunaan ekonomi kitaran;
- iv. mengarus perdana prinsip alam sekitar, sosial dan tadbir urus (ESG);
- v. menggalakan mobiliti mesra alam;
- vi. memperluas pasaran hijau dalam negara;
- vii. memperkukuh pengurusan sisa; dan
- viii. penerapan perubahan tingkah laku.

Di bawah Kajian Separuh Penggal RMKe-12, agenda pertumbuhan hijau akan terus dipergiat bagi mempertingkatkan daya tahan terhadap perubahan iklim dan bencana. Antara strategi yang akan diberi penekanan adalah untuk menerima guna ekonomi kitaran serta mengarus perdana prinsip ESG dan SDG dalam pembuatan keputusan. Adalah diharapkan agar usaha ini dapat menyumbang kepada pertumbuhan yang mampan dan kesihatan bumi yang lebih baik ke arah pencapaian Agenda 2030.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

DARIPADA : YB TUAN AZLI BIN YUSOF [SHAH ALAM]

SOALAN

YB TUAN AZLI BIN YUSOF (SHAH ALAM) minta **MENTERI PERPADUAN NEGARA** menyatakan apakah Kerajaan bersedia untuk menggubal semula akta perhubungan kaum untuk mengawal ketegangan kaum yang semakin meruncing di negara ini.

JAWAPAN

Tuan Yang di-Pertua,

1. Pada masa ini, **undang-undang sedia ada sudah memadai** dalam memastikan hubungan antara kaum terpelihara. Akta dan perundangan yang berkuat kuasa adalah:

- i. Subseksyen 4(1) Akta Hasutan 1948 [*Akta 15*] iaitu kesalahan menghasut;
- ii. Seksyen 233 Akta Komunikasi dan Multimedia 1998 [*Akta 588*] iaitu kesalahan penggunaan tidak wajar kemudahan rangkaian atau perkhidmatan rangkaian;
- iii. Seksyen 295 Kanun Keseksaan [*Akta 574*] iaitu kesalahan membencana atau mencemarkan tempat sembahyang dengan niat hendak mengaibkan agama mana-mana golongan;

- iv. Seksyen 296 Kanun Keseksaan iaitu kesalahan mengganggu perhimpunan yang menjalankan sembahyang;
- v. Seksyen 298 Kanun Keseksaan iaitu kesalahan menyebut perkataan-perkataan atau melakukan perbuatan-perbuatan lain dengan niat sengaja hendak melukakan perasaan agama seseorang;
- vi. Seksyen 298A Kanun Keseksaan iaitu kesalahan menyebabkan, atas alasan-alasan agama, suasana tidak harmoni, perpecahan, perasaan permusuhan, benci-membenci atau niat jahat, atau memudaratkan pemeliharaan keadaan harmoni atau perpaduan;
- vii. Seksyen 504 Kanun Keseksaan iaitu kesalahan dengan sengaja mengaibkan dengan niat hendak membangkitkan pecah keamanan;
- viii. Seksyen 505 Kanun Keseksaan iaitu kesalahan mengeluarkan kenyataan-kenyataan yang mendatangkan khianat awam; dan
- ix. Seksyen 506 Kanun Keseksaan [Akta 574] iaitu kesalahan menakutkan secara jenayah.

2. Justeru, Kementerian ini berpendapat **tiada keperluan untuk menggubal atau memperkenalkan suatu undang-undang baharu seperti Akta Perhubungan Kaum** pada masa ini dan penguatkuasaan undang-undang sedia untuk mengawal ketegangan kaum boleh dipertingkatkan lagi.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN AZLI BIN YUSOF [SHAH ALAM]

SOALAN

TUAN AZLI BIN YUSOF [SHAH ALAM] minta **MENTERI PENDIDIKAN** menyatakan apakah usaha Kementerian bagi menyelesaikan isu pertukaran guru bagi mempertingkatkan produktiviti pendidikan negara.

JAWAPAN

Tuan Yang di-Pertua,

Kementerian Pendidikan Malaysia (KPM) bertanggungjawab dalam mengurus permohonan pertukaran guru bagi memastikan pengajaran dan pembelajaran murid tidak terjejas.

KPM telah membuat penambahbaikan kepada proses pertukaran guru dengan menyediakan Surat Pekeliling Ikhtisas (SPI) KPM Bil. 7/2021 Pelaksanaan Permohonan Pertukaran Pegawai Perkhidmatan Pendidikan di Sekolah dan Kolej Vokasional. Turut dilampirkan bersama-sama SPI ini ialah Garis Panduan Permohonan Pertukaran Pegawai Perkhidmatan Pendidikan di Sekolah dan Kolej Vokasional Kementerian Pendidikan Malaysia yang berkuat kuasa mulai 1 Januari 2022.

Untuk makluman Ahli Yang Berhormat, berdasarkan kepada garis panduan tersebut, KPM telah menetapkan tiga prinsip asas pertukaran iaitu kekosongan jawatan, keperluan opsyen serta kepentingan dan keperluan perkhidmatan. KPM turut membuat penambahbaikan dalam garis panduan tersebut. Penambahbaikan adalah seperti berikut:

- i. permohonan dibuka sepanjang tahun;
- ii. tempoh sah permohonan adalah satu tahun dari tarikh permohonan;
- iii. permohonan dalam talian dibuka kepada semua kumpulan Pegawai Perkhidmatan Pendidikan (PPP);
- iv. kelulusan pertukaran dilaksanakan sepanjang tahun bagi penyandang jawatan Pengetua/Guru Besar, Penolong Kanan, Guru Kanan Mata Pelajaran dan Guru Tingkatan 6;
- v. kelulusan pertukaran bagi PPP yang lain dilaksanakan mengikut sesi penggal persekolahan;
- vi. keutamaan pertimbangan kelulusan pertukaran adalah kepada PPP yang telah berkhidmat sekurang-kurangnya lima tahun di negeri semasa bagi negeri-negeri di semenanjung atau sekurang-kurangnya tiga tahun di negeri semasa bagi Sarawak, Sabah dan Wilayah Persekutuan Labuan; dan
- vii. sekiranya tiada kekosongan jawatan dan keperluan opsyen bagi permohonan pertukaran PPP ke negeri yang dimohon, pertimbangan

SOALAN NO : 570

pertukaran akan diberikan kepada negeri pilihan kedua atau ketiga pemohon serta kepada negeri yang berdekatan.

KPM yakin dengan penambahbaikan kaedah dan sistem pertukaran guru ini, proses pertukaran guru dapat dilaksanakan dengan lebih cekap dan berkesan. KPM juga sentiasa komited untuk memastikan kebajikan guru diberi keutamaan bagi mempertingkatkan produktiviti pendidikan negara.

Sekian, terima kasih.

RT59

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

DARIPADA : TUAN AZLI BIN YUSOF [SHAH ALAM]

SOALAN

TUAN AZLI BIN YUSOF [SHAH ALAM] minta **MENTERI BELIA DAN SUKAN** menyatakan apakah usaha-usaha Kementerian dalam membendung isu keculasan kelab bola sepak membayar gaji pemain dan staf kejurulatihan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Belia dan Sukan (KBS) komited dan amat prihatin dalam memastikan kebajikan atlet sukan negara termasuk pemain – pemain bola sepak. Sebagaimana piha Ahli Yang Berhormat sedia maklum, Persatuan Bola Sepak Malaysia (FAM) merupakan badan induk yang bertanggungjawab sepenuhnya dalam pembangunan dan kemajuan sukan bola sepak negara.

Selain dari itu, Liga Bola Sepak Malaysia (MFL) mempunyai peraturan-peraturan/langkah-langkah untuk membendung isu keculasan kelab bola sepak membayar gaji pemain dan jurulatih. Di antara tindakan-tindakan yang boleh diambil adalah pemotongan mata pasukan dan penggantungan pasukan daripada bertanding di musim yang seterusnya. Perkara ini adalah sesuatu yang sentiasa dilakukan oleh pihak MFL kerana ianya adalah di luar bidang kuasa Kementerian.

SOALAN NO : 571

Walau bagaimanapun, pihak Kementerian sentiasa bekerjasama dengan pihak FAM bagi memantau isu pembayaran gaji tertunggak yang tidak sepatutnya berlaku dalam situasi bola sepak negara yang telahpun mencapai tahap liga profesional.

Pada masa yang sama, pemain-pemain juga digalakkan untuk menjadi ahli Persatuan Pemain-pemain Profesional Malaysia (PFAM) di mana PFAM mempunyai kepakaran untuk mewakili pemain-pemain termasuk mengambil tindakan undang-undang terhadap pasukan/kelab yang gagal untuk membayar gaji.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SRI TUAN IBRAHIM BIN TUAN MAN
[KUBANG KERIAN]**

SOALAN

DATO' SRI TUAN IBRAHIM BIN TUAN MAN [KUBANG KERIAN]
minta **MENTERI SUMBER ASLI, ALAM SEKITAR DAN PERUBAHAN
IKLIM** menyatakan:

- (a) jumlah cawangan pejabat Jabatan Alam Sekitar (JAS) yang terkini di seluruh Malaysia; dan
- (b) jumlah penguat kuasa JAS di cawangan pejabat JAS dan apakah nisbah yang sepatutnya dipraktikkan.

JAWAPAN

Tuan Yang di-Pertua,

1. Jabatan Alam Sekitar (JAS) mempunyai 15 pejabat JAS Negeri dan 30 pejabat JAS Cawangan di seluruh Malaysia. Berdasarkan waran perjawatan, jumlah pegawai penguat kuasa yang diperuntukkan di negeri dan cawangan adalah seramai 932 perjawatan. Seramai 867 pengisian pegawai penguat kuasa telah dilaksanakan di negeri dan cawangan sehingga 28 Februari 2023.
2. Berdasarkan rekod Jabatan ini pada 1 Januari 2023, terdapat 61,494 premis yang terdiri daripada pelbagai jenis aktiviti antaranya industri pembuatan, loji rawatan kumbahan dan tapak pelupusan sisa pepejal. Manakala, sebanyak 2,638 projek yang tertakluk kepada Perintah Kualiti Alam Sekeliling (Aktiviti yang Ditetapkan)(Penilaian Kesan kepada Alam Sekeliling) 2015 yang berpotensi menyebabkan pencemaran alam sekitar.
3. Dalam usaha memastikan penguatkuasaan Akta Kualiti Alam Sekeliling 1974 (Akta 127) dapat dilaksanakan dengan lebih menyeluruh, Kementerian berpandangan bahawa nisbah yang munasabah bagi pegawai penguat kuasa berbanding bilangan “punca pencemaran” adalah 1 pasukan penguatkuasa (yang terdiri 3 orang pegawai penguat kuasa) kepada setiap 50 “punca pencemaran”. Dalam hal ini, bilangan pegawai penguat kuasa yang diperlukan adalah sekurang-kurangnya seramai 3,849 orang pegawai penguatkuasa di seluruh Negara.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA PENGGAL KEDUA
PARLIMEN KELIMA BELAS**

PERTANYAAN : BUKAN JAWAB LISAN

**DARIPADA : YB DATO' SRI TUAN IBRAHIM BIN
TUAN MAN [KUBANG KERIAN]**

SOALAN:

Minta **PERDANA MENTERI** menyatakan perincian kerugian yang ditanggung oleh negeri dan rakyat dalam kejadian banjir yang berlaku baru-baru ini dan nyatakan perincian bentuk bantuan pasca banjir yang disalurkan Kerajaan pusat kepada negeri-negeri terbabit.

JAWAPAN

Tuan Yang di-Pertua,

1. Kerajaan Persekutuan melalui Jabatan Perangkaan Malaysia (DOSM) akan mengeluarkan kerugian yang ditanggung oleh negeri dan rakyat selepas tamat musim Monsun Timur Laut (MTL) dan dapatan input daripada pelbagai agensi.
2. Kerajaan Persekutuan akan meneruskan bantuan bencana yang diberikan oleh Kerajaan terdahulu bagi mangsa-mangsa bencana dalam tempoh musim Monsun Timur Laut (MTL) 2022/2023 yang layak di seluruh negara seperti berikut:
 - i. Bantuan Wang Ihsan (BWI) bernilai RM1,000 kepada setiap Ketua Isi Rumah (KIR) dan RM10,000 kepada waris bagi setiap mangsa yang meninggal dunia akibat bencana;
 - ii. Bantuan Barangan Keperluan Asas (BBKA) RM2,500 kepada setiap KIR;

- iii. Bantuan Pembaikan Rumah (BPR) dengan had nilai maksimum sehingga RM5,000 bagi setiap KIR; dan
- iv. Bantuan Baik Pulih (RM5,000 hingga RM15,000) & Bina Baharu Rumah bagi setiap KIR yang dilaksanakan oleh Kementerian Kemajuan Desa dan Wilayah (KKDW) dan Kementerian Pembangunan Kerajaan Tempatan (KPKT).

Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN JAWAB LISAN

**DARIPADA : YB DATO' SRI TUAN IBRAHIM BIN TUAN MAN
[KUBANG KERIAN]**

SOALAN

YB DATO' SRI TUAN IBRAHIM BIN TUAN MAN [KUBANG KERIAN]
minta **MENTERI PELANCONGAN, SENI DAN BUDAYA** menyatakan:

- (a) langkah-langkah yang diambil Kerajaan dalam memelihara dan memulihara warisan ketara dan tidak ketara di negara ini; dan
- (b) jumlah pusat konservasi yang melakukan kerja-kerja konservasi (memelihara dan memulihara) warisan ketara dan tidak ketara negara.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Kementerian Pelancongan, Seni dan Budaya (MOTAC) melalui Jabatan Warisan Negara (JWN) telah mengambil inisiatif serta langkah-langkah dalam memelihara dan memulihara warisan dengan mewartakan mana-mana butiran yang berkepentingan warisan termasuk bangunan, tapak arkeologi, tapak semula jadi, objek warisan kebudayaan ketara, objek warisan kebudayaan tidak ketara dan memberi pengiktirafan kepada Tokoh Orang Hidup (WAKOH) mengikut Akta Warisan Kebangsaan 2005 (Akta 645). Pewartaan ini akan memberi nilai tambah kepada tarikan pelancongan.

2. Sehingga kini pihak MOTAC menerusi JWN telah mewartakan sejumlah 994 butiran di bawah Akta Warisan Kebangsaan 2005 (Akta 645), ini termasuklah Warisan Ketara (*tangible heritage*) dan Warisan Tidak Ketara (*intangible heritage*). Daripada keseluruhan butiran yang telah diwartakan tersebut, sejumlah 243 butiran telah diisytihar sebagai Warisan manakala sejumlah 751 butiran telah diisytihar sebagai Warisan Kebangsaan.

3. Usaha pemeliharaan dan pemuliharaan akan diteruskan yang mana JWN telah mengambil pelbagai langkah antaranya:

- (i) mewartakan tapak yang berkepentingan meliputi bangunan, monumen, tapak arkeologi dan tapak semulajadi. Contohnya; Bangunan Sultan Abdul Samad (Kuala Lumpur), Istana Kenangan (Kuala Kangsar, Perak), Bangunan Stadhuys (Melaka), Taman Tasik Perdana (Kuala Lumpur) dan lain-lain;
- (ii) mewartakan objek Warisan Kebudayaan Tidak Ketara yang mana meliputi makanan, seni persembahan, adat, permainan tradisi, seni pertahanan diri dan lain-lain. Contohnya; Nasi

Lemak, Teh Tarik, Laksa Johor, Silat, Mak Yong, Boria, Tarian Singa dan lain-lain;

- (iii) mewartakan objek Warisan Kebudayaan Ketara. Contohnya; Cokmar Dewan Negara dan Dewan Rakyat, Panji-Panji Diraja, Batu Bersurat Terengganu, Perak Man dan lain-lain;
- (iv) mengiktiraf tokoh-tokoh budaya sebagai Tokoh Warisan Kebangsaan Orang Hidup (WAKOH); dan
- (v) melaksanakan kerja-kerja konservasi, antaranya seperti Masjid Syed Alwi Kangar, Perlis; Kota Kuala Kedah, Alor Setar; Rumah Teh Bunga, Pulau Pinang; Muzium Taiping, Perak; Bangunan St. Mary's Cathedral, Kuala Lumpur; Rumah Penghulu Mat Natar, Melaka; Istana Seri Menanti, Kuala Pilah, Negeri Sembilan; Galeri Nisan Warisan di Pulau Omdal, Semporna, Sabah; Kubu Margerita, Petra Jaya, Kuching, Sarawak dan lain-lain.

4. Pihak JWN juga sentiasa memberi perhatian kepada usaha untuk memelihara dan memulihara warisan menerusi penyediaan plan pengurusan pemeliharaan seperti Tapak Warisan Dunia di Malaysia iaitu di Melaka dan George Town, Pulau Pinang serta Lembah Lenggong, Perak. Untuk makluman, kedua-dua tapak ini telah mempunyai *Conservation Management Plan* (CMP) dan *Special Area Plan* (SAP) yang dapat mengekalkan Nilai Keunggulan Sejagat (*Outstanding Universal Value-OUV*); integriti dan keasliannya.

5. Pengiktirafan antarabangsa juga dapat meningkatkan identiti dan visibiliti negara. Sebagai contoh pengiktirafan Warisan Tidak Ketara di peringkat UNESCO iaitu; Makyong (2005); Dondang Sayang (2018); Silat (2019); Wangkang (2020); Pantun (2020) dan Songket (2021). Selain itu, pengiktirafan Tapak Warisan Dunia UNESCO antaranya Tapak Warisan Dunia yang telah diiktiraf oleh UNESCO ialah; Taman Negara Gunung Mulu, Sarawak (2000); Taman Kinabalu, Sabah (2000); Bandar Bersejarah Selat Melaka, Melaka dan George Town (2008); dan Tapak Warisan Arkeologi Lembah Lenggong (2012).

6. Untuk makluman Ahli Yang Berhormat, JWN adalah satu-satunya agensi di bawah kementerian ini yang melaksanakan kerja-kerja konservasi warisan di negara ini sebagaimana fungsi Pesuruhjaya Warisan yang tertakluk di dalam seksyen 6 Akta 645.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SRI TUAN IBRAHIM BIN TUAN MAN
[KUBANG KERIAN]**

SOALAN

DATO' SRI TUAN IBRAHIM BIN TUAN MAN [KUBANG KERIAN] minta
MENTERI PENDIDIKAN menyatakan :

- (a) bilangan kuarters guru yang tidak didiami di seluruh negara; dan
- (b) perancangan Kerajaan untuk mengatasi isu lambakan kuarters guru yang dibiarkan berkeadaan daif dan mereput ekor tidak dihuni.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha menyediakan prasarana pendidikan termasuk kuarters guru yang selamat dan kondusif untuk diduduki.

Untuk makluman Ahli Yang Berhormat, secara keseluruhan, jumlah kuarters guru KPM adalah sebanyak 47,947 unit, di mana sebanyak 29,207 unit kuarters sedang diduduki dan 18,740 unit kuarters tidak diduduki.

KPM memberi fokus kepada kerja-kerja membaik pulih dan penyelenggaraan kuarters guru yang didiami berdasarkan tahap kerosakan yang kritikal seperti kerosakan bumbung, pendawaian elektrik, perpaipan, kerosakan tandas, kumbahan dan kerosakan struktur bangunan.

Untuk makluman Ahli Yang Berhormat, kerosakan kuarters yang melibatkan struktur akan dilaksanakan oleh Jabatan Kerja Raya (JKR). Manakala, kerosakan kuarters yang tidak melibatkan struktur akan dilaksanakan oleh KPM. Pemantauan akan dibuat dari semasa ke semasa oleh JKR dan KPM bagi memastikan skop kerja dipatuhi mengikut spesifikasi yang ditetapkan.

Bagi kuarters guru yang tidak diduduki, KPM telah melantik perunding hartanah bagi menjalankan kajian mengoptimumkan penggunaan kuarters guru tidak berpenghuni milik KPM di seluruh negara. Skop kajian adalah merangkumi cadangan penyelesaian bagi mengoptimumkan kuarters kosong di seluruh negara. Kajian ini dijangka selesai pada akhir April 2023.
Sekian, terima kasih.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SRI TUAN IBRAHIM BIN TUAN MAN
[KUBANG KERIAN]**

SOALAN

Minta **MENTERI PENDIDIKAN TINGGI** menyatakan:

- (a) langkah-langkah yang diambil Kementerian bagi menggalakkan universiti awam menjalankan penyelidikan berimpak tinggi dan bermanfaat kepada negara;
- (b) insentif yang ditawarkan kepada universiti awam dan syarikat swasta yang bekerjasama menjalankan penyelidikan.

JAWAPAN

(a)

Tuan Yang di-Pertua,

1. Terdapat pelbagai langkah yang telah diambil oleh Kementerian ini dalam menggalakkan universiti awam menjalankan penyelidikan berimpak tinggi dan bermanfaat kepada negara.
2. Antara langkah yang diambil adalah **pelaksanaan penyelidikan bersifat fundamental** untuk menjana ilmu yang menyumbang terhadap peningkatan tahap intelektual, penciptaan teknologi baharu dan penyuburan budaya yang dinamik selaras dengan aspirasi negara.
3. **Pertamanya**, penawaran Geran Penyelidikan secara jangka pendek seperti Skim Geran Penyelidikan Fundamental (FRGS), Skim Geran Penyelidikan Jangka Panjang (LRGS), Skim Geran Penyelidikan Prototaip (PRGS) dan Skim Geran Penyelidikan Jangka Panjang - Jejak Sarjana Ulung (LRGS-JSU) membantu memberi sumbangan yang signifikan dalam penyelidikan berimpak tinggi dan bermanfaat kepada negara.
4. Projek penyelidikan yang dibiayai di bawah dana ini adalah bersifat fundamental dan bertujuan menggalakkan penerokaan idea, konsep atau teori baharu ke arah penjanaaan ilmu baharu beracuan Malaysia.
5. **Langkah kedua**, KPT turut melaksanakan kerjasama penyelidikan antarabangsa yang menawarkan bidang-bidang strategik antara negara-negara kolaborator seperti United Kingdom, Jepun, Perancis dan Sepanyol.
6. Skim geran bagi dana padanan antarabangsa ini dinamakan *Malaysia Partnerships and Alliances in Research* (MyPAiR) dan melibatkan kerjasama dengan penyelidik dari universiti 50 hingga 100 teratas dunia (*world top 50/100*) bagi negara-negara terlibat.
7. Melalui pelbagai skim geran dan kerjasama antarabangsa ini adalah diharapkan Kementerian dapat menggalakkan universiti awam menjalankan penyelidikan berimpak tinggi dan bermanfaat kepada negara.

(b)

1. Berhubung insentif yang ditawarkan kepada universiti awam dan syarikat swasta yang bekerjasama menjalankan penyelidikan, KPT telah memperkenalkan inisiatif PPRN pada tahun 2015.
2. Ia merupakan satu model kerjasama strategik antara industri dan Institusi Pendidikan Tinggi (IPT) / Institusi Penyelidikan Awam (PRI) untuk meningkatkan produktiviti perusahaan mikro, kecil dan sederhana (PMKS) melalui pelaksanaan projek-projek inovasi yang berdasarkan permintaan industri.
3. Melalui inisiatif PPRN juga, kerajaan memberi insentif yang berbentuk geran kepada universiti awam dan syarikat swasta. Geran ini disalurkan kepada universiti dan dipadankan dengan sumbangan daripada syarikat untuk membiayai kos pembangunan projek.
4. Sehingga 31 Disember 2022, 680 projek PPRN yang melibatkan 634 syarikat telah diluluskan. 680 projek tersebut melibatkan lima sektor, iaitu sektor perkhidmatan, pertanian, perlombongan dan pengkuarian, pembinaan dan pembuatan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : TUAN KALAM BIN SALAN
[SABAK BERNAM]**

SOALAN

TUAN KALAM BIN SALAN [SABAK BERNAM] minta **MENTERI PELANCONGAN, SENI DAN BUDAYA** menyatakan kawasan dan jenis premis yang dibenarkan beroperasi sebagai homestay atau rumah penginapan. Kerajaan hendaklah memastikan semua pengusaha industri tersebut mendaftarkan perniagaannya dengan Pihak Berkuasa Tempatan dan Kementerian.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Program Pengalaman Homestay Malaysia di bawah Kementerian Pelancongan Seni dan Budaya adalah berkonsepkan satu bentuk program pengalaman (*experiential program*) kepada pelancong yang mana pelancong yang datang perlu menginap bersama pengusaha program, menjalani gaya hidup masyarakat luar bandar dan turut serta dalam aktiviti seharian seperti memasak, menoreh, memancing, makan bersila, rewang, belajar tarian, sukan tradisional, dan lain-lain lagi.
2. Ia telah dilancarkan pada tahun 1995 dengan tujuan untuk menggalakkan masyarakat luar bandar menceburi sektor pelancongan dengan menawarkan produk-produk atau perkhidmatan pelancongan berasaskan komuniti (*community based tourism*) kepada pelancong tempatan dan antarabangsa.
3. Syarat utama untuk berdaftar di bawah program homestay ini, rumah bagi pengusaha yang ingin berdaftar hendaklah terletak di kawasan luar bandar dan berkeluarga. Ini adalah bertujuan untuk meningkatkan pendapatan dan taraf hidup rakyat terutamanya di kawasan luar bandar dan di zon pelancongan.
4. Premis yang terletak di kawasan taman perumahan atau premis yang menawarkan perkhidmatan penginapan dan sarapan (*bed and breakfast*) adalah tidak layak untuk memohon di bawah Program Pengalaman Homestay Malaysia.
5. Program Pengalaman Homestay Malaysia mempunyai dua (2) jenis konsep penginapan iaitu Program Homestay dan Program Kampungstay iaitu:

- I. Jenis HomeStay yang mana premis penginapan di mana pelancong atau pengunjung tinggal bersama-sama pengusaha. Sebagai tambahan kepada jenis HomeStay, pengusaha boleh mewujudkan Annex Homestay di mana laluan keluar masuk ke premis penginapan pelancong atau pengunjung adalah berasingan walaupun ia adalah unit rumah yang sama dengan pengusaha
 - II. Jenis KampungStay adalah yang melibatkan premis penginapan yang berasingan (*non-detached*) dan berada dalam halaman yang sama/ berhampiran dengan premis penginapan pengusaha. Di bawah jenis KampungStay, terdapat empat (4) pecahan yang boleh dikategorikan seperti:
 - A. Guest Kampungstay - premis penginapan standard untuk pelancong yang berasingan dan terletak dalam kawasan yang sama;
 - B. Chalet Kampungstay - premis penginapan pengusaha yang mempunyai tarikan eko pelancongan; sungai, air terjun atau pantai;
 - C. Inovatif Kampungstay - premis dibina menggunakan kontena, iglu, khemah dan lain-lain yang terletak dalam kawasan yang sama atau berhampiran dengan premis penginapan pengusaha;
 - D. Farm/Agro Kampungstay - premis yang mempunyai tarikan kawasan seperti agro pelancongan, dusun buah-buahan dan ladang ternakan.
6. Menyahut saranan kerajaan untuk penduduk luar bandar meningkatkan pendapatan ekonomi negara, pengusaha di bawah program ini digalakkan untuk menubuhkan koperasi di bawah Suruhanjaya Koperasi Malaysia (SKM) dan berdaftar Suruhanjaya Syarikat Malaysia (SSM).

7. Selain itu, Kementerian ini juga melalui Akta Industri Pelancongan 1992 [Akta 482] bertanggungjawab untuk mendaftarkan premis penginapan di seluruh negara sebagai Premis Penginapan Pelancong (PPP) mengikut syarat-syarat yang telah ditetapkan oleh pihak Kementerian di dalam Garis Panduan Pendaftaran Premis Penginapan Pelancong. Antara syarat mandatori pendaftaran adalah premis hendaklah mempunyai Lesen Perniagaan Premis Penginapan daripada Pihak Berkuasa Tempatan (PBT) masing-masing sebelum layak didaftarkan sebagai PPP. Kementerian ini bukan merupakan Jabatan/ Agensi yang bertanggungjawab untuk mengeluarkan dan mengawal selia aktiviti pelesenan premis penginapan. Ini juga selaras dengan penetapan Akta 482 di mana hanya Sijil Pendaftaran sahaja yang akan dikeluarkan kepada premis yang telah berdaftar sebagai PPP. Sehingga 31 Disember 2022, sebanyak 4,771 premis penginapan telah berdaftar sebagai PPP di bawah MOTAC.

Sekian terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : TUAN KALAM BIN SALAN
[SABAK BERNAM]**

SOALAN

TUAN KALAM BIN SALAN [SABAK BERNAM] minta **MENTERI PELANCONGAN, SENI DAN BUDAYA** menyatakan berapa ramai pengusaha homestay yang mendaftarkan perniagaannya dengan Kementerian Pelancongan , Seni dan Budaya (MOTAC). Kerajaan hendaklah menyalurkan Geran Bantuan Khas secara one-off sebanyak RM10,000 kepada mereka untuk merancakkan industri tersebut yang secara langsung memberi peluang pekerjaan kepada rakyat.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Kementerian Pelancongan Seni dan Budaya telah memperkenalkan program pelancongan luar bandar yang dinamakan Program Pengalaman Homestay Malaysia yang berkonsepkan satu bentuk program pengalaman (*experiential program*) yang mana pelancong yang datang perlu menginap bersama pengusaha program, menjalani gaya hidup masyarakat luar bandar dan turut serta dalam aktiviti seharian seperti memasak, menoreh, memancing, makan bersila, rewang, belajar tarian, sukan tradisional, dan lain-lain lagi.
2. Sehingga 31 Disember 2022, sebanyak 3,397 orang pengusaha seluruh Malaysia telah berdaftar dibawah program ini yang melibatkan sebanyak 450 kampung di seluruh Malaysia.
3. Bagi merancakkan dan membangunkan kembali program ini selepas pandemik Covid -19, Kerajaan melalui Pembentangan Bajet 2022 pada 29 Oktober 2021 telah mengumumkan pemberian Bantuan Khas kepada lebih 20 ribu pengusaha pelancongan yang berdaftar di bawah MOTAC dengan peruntukan sebanyak RM85 juta. Bagi Program Pengalaman Homestay Malaysia, seramai 2895 orang pengusaha Program Pengalaman Homestay Malaysia telah menerima manfaat bantuan khas kewangan sebanyak RM1,800 bagi setiap pengusaha yang melibatkan peruntukan sebanyak RM5,211,000.00.
4. Selain itu, MOTAC juga menyediakan Geran Padanan Pembaikan Inap Desa (Homestay) bagi membantu pengusaha inap desa (homestay) membaik pulih premis inap desa bagi memastikan tahap kemudahan, kebersihan, keselamatan dan keindahan premis kediaman pengusaha sentiasa terpelihara agar pelancong dapat terus menikmati kemudahan

yang selesa dan pengalaman yang menarik di negara ini. Geran padanan ini membolehkan pengusaha Program Pengalaman Homestay Malaysia menerima sumbangan geran dari Kerajaan sebanyak 90% dengan nilai maksimum RM15,000 bagi kerja-kerja membaik pulih dan menyelenggara kemudahan untuk pelancong di premis masing-masing.

5. Melalui Geran ini MOTAC telah meluluskan sebanyak 1620 permohonan pengusaha inap desa (homestay) bagi Geran Padanan Pembaikan Inap Desa (Homestay), Program Pengalaman Homestay Malaysia dengan kos keseluruhan berjumlah RM11,466,721.00.

Sekian terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN KALAM BIN SALAN
[SABAK BERNAM]**

SOALAN

TUAN KALAM BIN SALAN [SABAK BERNAM] minta **MENTERI PENDIDIKAN** menyatakan pendirian Kementerian berhubung pembinaan SJK(C) Too Joon Hin yang sepatutnya lokasi di Dengkil tetapi telah dipindahkan pada tahun 2019 ke Kinrara di tapak yang sepatutnya dibina sekolah kebangsaan.

JAWAPAN

Tuan Yang di-Pertua,

Untuk makluman Ahli Yang Berhormat, berhubung dengan pembinaan SJK(C) Too Joon Hin yang sepatutnya lokasi di Dengkil tetapi telah dipindahkan pada tahun 2019 ke Kinrara di tapak yang sepatutnya dibina sekolah kebangsaan, terdapat suatu permohonan Semakan Kehakiman (No. Kes: WA-25-26-01/2022) ("Semakan Kehakiman") yang telah difailkan oleh Jawatankuasa Pembinaan Sementara SJK(C) Too Joon Hing & 4 Lagi terhadap Ketua Setiausaha Kementerian Pendidikan Malaysia & 2 Lagi pada 17 Januari 2022. Pada 5 Disember 2022, YA Dato' Wan Ahmad Farid bin Wan Ahmad, Hakim Mahkamah Tinggi Kuala Lumpur telah memutuskan bahawa Semakan Kehakiman yang difailkan oleh Pemohon adalah dibenarkan tanpa perintah terhadap kos dan ganti rugi.

Kerajaan telah memfailkan rayuan melalui suatu Notis Rayuan terhadap keputusan YA Hakim pada 3 Januari 2023. Kes rayuan tersebut telah ditetapkan untuk pengurusan kes di Mahkamah Rayuan pada 4 April 2023.

Memandangkan perkara ini masih dalam pertimbangan Mahkamah Rayuan dan selaras dengan Peraturan Mesyuarat 23(1)(g) Peraturan-Peraturan Majlis Mesyuarat Dewan Rakyat yang memperuntukkan bahawa "sesuatu pertanyaan itu tidak boleh dikarangkan cakupnya sekira-kira harus menggelengcungkan perkara yang sedang dibicarakan oleh Mahkamah dan tidak boleh ditanya berkenaan dengan apa-apa perkara yang dalam timbangan Mahkamah", maka Kementerian Pendidikan Malaysia tidak dapat mengulas lanjut berkenaan soalan ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN MOHD SANY BIN HAMZAN
[HULU LANGAT]**

SOALAN

TUAN MOHD SANY BIN HAMZAN [HULU LANGAT] minta **MENTERI PENDIDIKAN** menyatakan kajian keperluan sekolah menengah yang baru di Dusun Tua dalam Parlimen Hulu Langat akibat kepadatan sekolah sedia ada.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha menyediakan prasarana dan kemudahan infrastruktur pendidikan kepada semua murid di seluruh negara, termasuk di kawasan Hulu Langat.

Untuk makluman Ahli Yang Berhormat, berdasarkan data Kementerian Pendidikan Malaysia (KPM) pada Februari 2023, terdapat dua buah sekolah menengah di sekitar kawasan Dusun Tua, Hulu Langat, Selangor iaitu SMK Abdul Jalil dan SMK Dusun Nanding. Kedua-dua buah sekolah ini beroperasi secara dua sesi.

Sehubungan dengan itu, KPM melalui Jabatan Pendidikan Negeri Selangor sedang mengenal pasti cadangan tapak bagi pembinaan sekolah menengah baharu tersebut. KPM akan mengemukakan permohonan kepada agensi pusat untuk pembinaan sekolah menengah baharu dalam Rancangan Malaysia Lima Tahun (RMLT) setelah selesai urusan perolehan dan pemilikan cadangan tapak tersebut. Walau bagaimanapun kelulusan permohonan ini adalah tertakluk kepada keutamaan dan kedudukan kewangan kerajaan.

Sekian, terima kasih.

RT62

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN MOHD SANY BIN HAMZAN
[HULU LANGAT]**

SOALAN

TUAN MOHD SANY BIN HAMZAN [HULU LANGAT] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan tahap tindakan di peringkat persekutuan untuk mengatasi banjir yang sering berlaku di kawasan Hulu Langat setiap tahun.

JAWAPAN

Tuan Yang Di-Pertua,

1. Untuk makluman Ahli Yang Berhormat, antara faktor yang menyumbang kepada masalah banjir di kawasan Hulu Langat adalah kawasan di sekitar Sungai Langat mengalami isu kepadatan penduduk. Kawasan perumahan yang padat, kawasan pertanian serta aktiviti ekonomi yang pesat telah menyebabkan masalah sampah sarap domestik yang tidak dapat dibendung di kawasan Sungai Langat.
 2. Selain itu, berdasarkan kajian *Sungai Langat Integrated River Basin Management Study*, 2006 oleh JPS Malaysia, terdapat 3 buah empangan yang terletak dalam Lembangan Sungai Langat iaitu Empangan Sungai Langat, Empangan Semenyih dan Empangan Putrajaya yang berfungsi sebagai bekalan air bukan sebagai tebatan banjir. Kesan daripada pelepasan dan penyelenggaraan empangan-empangan ini menyebabkan limpahan kepada sungai serta membawa kelodak (*sediment*) dari hulu ke hilir sungai sehingga Daerah Kuala Langat. Ini sekaligus memburukkan lagi keadaan banjir di Sungai Langat.
 3. Susulan kejadian banjir yang melanda di kawasan Pekan Dengkil setiap tahun, Rancangan Tebatan Banjir (RTB) Sungai Langat Fasa 1 telah diluluskan dengan kos projek RM 41 juta. Pelaksanaan projek RTB Fasa 1 ini adalah selaras dengan hasil analisa hidraulik yang telah dijalankan oleh Jabatan Pengairan dan Saliran Malaysia (*Dr. Nik & Associates, Tahun 2017*). Projek ini bakal ditender pada sukuan pertama tahun 2023 dan mengambil masa 35 bulan.
 4. Bagi jangka masa panjang, Kementerian melalui JPS telah merancang pelaksanaan Projek Tebatan Banjir Khas, namun begitu ia tertakluk kepada kelulusan Kementerian Kewangan (MOF). Permohonan projek akan dimohon di dalam *Rolling Plan* yang akan datang.
- Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : TUAN MOHD SANY BIN HAMZAN [HULU
LANGAT]**

SOALAN

Tuan Mohd Sany bin Hamzan [Hulu Langat] minta **MENTERI KOMUNIKASI DAN DIGITAL** menyatakan capaian internet dan jaringan telekomunikasi yang sangat rendah kualitinya akhir-akhir ini terutama di luar bandar.

JAWAPAN

Tuan Yang di-Pertua,

Bagi mengatasi masalah liputan komunikasi di kawasan berpenduduk di seluruh negara, Kementerian Komunikasi dan Digital (KKD) melalui Suruhanjaya Komunikasi dan Multimedia Malaysia (SKMM) sentiasa memantau perkhidmatan jalur lebar mudah alih dan talian tetap terutamanya di kawasan-kawasan yang telah diadukan. Dalam usaha ini, SKMM turut giat melakukan audit kualiti perkhidmatan dari semasa ke semasa bagi memastikan perkhidmatan yang diberikan oleh syarikat telekomunikasi memenuhi Standard Mandatori yang telah ditetapkan di bawah Akta Komunikasi dan Multimedia 1998 [Akta 588].

Pada tahun 2022, SKMM telah selesai mengaudit sejumlah 3,080 lokasi di seluruh Malaysia. Setakat ini, sebanyak 229 Arahan Suruhanjaya telah dikeluarkan kepada pemberi perkhidmatan, yang melibatkan 214 lokasi berbeza. Daripada 229 Arahan Suruhanjaya tersebut, pemberi perkhidmatan telah membuat penambahbaikan yang melibatkan 157 Arahan Suruhanjaya. Manakala, semakan semula akan dibuat ke atas lokasi yang melibatkan 32 Arahan Suruhanjaya. Tindakan

sivil akan diambil ke atas baki 40 Arahan Suruhanjaya yang telah gagal dipatuhi. Bagi lokasi-lokasi lain yang telah diaudit, hasil dapatan masih dalam peringkat analisis dan semakan.

Melalui Arahan Suruhanjaya ini, pemberi perkhidmatan wajib melakukan penambahbaikan kualiti perkhidmatan dengan mengoptimumkan atau menaik taraf menara sedia ada agar kualiti pengalaman pengguna pada tahap yang baik serta menyediakan menara baharu untuk menambah baik kualiti jaringan jalur lebar. Kegagalan pemberi perkhidmatan mematuhi Arahan Suruhanjaya ini boleh dikenakan penalti sivil sehingga RM200,000 di bawah seksyen 109, Akta 588.

SKMM akan terus menjalankan audit kualiti perkhidmatan bagi tahun 2023 dengan sasaran lebih tinggi sebanyak 4,000 lokasi di seluruh negara bagi memastikan Standard Mandatori terus dipatuhi oleh pemberi perkhidmatan untuk menyelesaikan masalah kualiti perkhidmatan. Pada masa yang sama, usaha melalui projek JENDELA Fasa 2 sehingga tahun 2025 juga akan dapat memperbaiki masalah kualiti perkhidmatan jaringan jalur lebar di seluruh Malaysia.

Dalam hubungan ini, KKD mengalu-alukan maklum balas daripada orang awam bagi kawasan yang mempunyai masalah perkhidmatan bagi membolehkan tindakan selanjutnya boleh diambil. Sebarang aduan boleh disalurkan terus kepada portal aduan SKMM menerusi pautan laman web berikut <https://aduan.skmm.gov.my>.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)
DARIPADA : TUAN MOHD SANY BIN HAMZAN
[HULU LANGAT]

SOALAN

TUAN MOHD SANY BIN HAMZAN [HULU LANGAT] minta
MENTERI PERTANIAN DAN KETERJAMINAN MAKANAN
menyatakan apakah perancangan Kementerian dalam menangani
masalah rangkaian pengedaran produk makanan asas dan
keterjaminan makanan terutama ke kawasan luar bandar berikutan
ada kawasan terputus barangan makanan tertentu.

JAWAPAN

Tuan Yang Dipertua,

1. Untuk makluman Ahli Yang Berhormat, Kementerian Pertanian dan Keterjaminan Makanan (KPKM) sentiasa berusaha menangani masalah rangkaian pengedaran produk makanan asas dan keterjaminan makanan sekiranya berlaku situasi terputus bekalan makanan tertentu terutamanya di kawasan luar bandar. Tanggungjawab bagi menjamin ketersediaan dan ketercapaian makanan asas kepada rakyat adalah selaras dengan matlamat KPKM melalui Dasar Agromakanan Negara 2021-2030 (DAN 2.0).

2. Kementerian melalui FAMA melaksanakan pengedaran produk agromakanan berdasarkan dua situasi iaitu, sama ada krisis atau bukan krisis. Pengedaran bukan krisis merujuk kepada aktiviti jual beli keluaran hasil pertanian terutama di luar bandar untuk diedarkan ke pasaran. Program-program pengaturan pasaran antaranya melalui Rakan Pemasar Kontrak Pemasaran (RPKP) iaitu kerjasama strategik usahawan pemasar bimbingan FAMA dengan peserta Ladang Kontrak turut dilaksanakan bagi mempertingkatkan pengedaran hasil pertanian luar bandar. Bagi memastikan bekalan dapat diperolehi oleh pengguna pada harga yang berpatutan, FAMA telah membangunkan pelbagai jenis outlet pemasaran seperti Agrobazaar, Gerai Buah-buahan Segar dan Pasar Tani. Secara keseluruhan, berakhir Januari 2023 terdapat 1548 buah outlet pemasaran FAMA di seluruh negara seperti di senarai berikut:

Bil.	Outlet Pemasaran	Jumlah
1.	Pasar Tani (PT)	244
2.	Gerai Buah-Buahan Segar (GBBS)	176
3.	Motorsikal Tiga Roda	61
4.	Karavan Tani	276
5.	Medan Food Truck	11
6.	Agrobazaar Kedai Rakyat (AKR)	313
7.	Agrobazaar R&R	6
8.	Agrobazaar Rakyat (ABR)	167

Bil.	Outlet Pemasaran	Jumlah
9.	Pasar Tani Kekal (PTK)	30
10.	Projek Pasar Komuniti dan Karavan (PAKAR)	10
11.	Pusat Transformasi Luar Bandar (RTC) - RTC FAMA Kelantan - RTC FAMA Perak	2
12.	Medan Niaga Satok	1
13.	Kompleks Pemasaran Kekal, Kota Tani	1
14.	Kiosk Kopiesatu & Movan	13
15.	Kiosk Mykopie	13
16.	Agrobazaar K-Shoppe	224
Jumlah Keseluruhan		1,548

3. Namun semasa krisis berlaku seperti pandemik Covid19 dan kekurangan bekalan telur di pasaran, pengedaran produk agromakanan akan ditingkatkan melalui 40 buah Pusat Operasi FAMA di seluruh negara. Bermula 16 November 2022 sehingga 26 Februari 2023, lebih 12 juta telur ayam telah diedarkan melalui intervensi pemasaran FAMA. Kebolehcapaian pengguna bagi bekalan telur ini diperkukuhkan dengan pengedaran ke 369 outlet pemasaran FAMA di seluruh negara.

4. Selain itu, kebolehcapaian bekalan termasuk di luar bandar telah dipertingkatkan melalui perkhidmatan pengedaran yang turut ditawarkan melalui pembelian dalam talian di platform Agrobazaar Online. Sehingga Januari 2023 terdapat 2755 pekedai aktif dengan 7397 bilangan SKU dalam platform Agrobazaar Online.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN MOHD SANY BIN HAMZAN
[HULU LANGAT]**

SOALAN

TUAN MOHD SANY BIN HAMZAN [HULU LANGAT] minta **MENTERI PENDIDIKAN** menyatakan perancangan membaik pulih dan naik taraf sekolah-sekolah yang berusia lebih 40 tahun. Dikhuatiri nanti wujud kes murid yang mati kerana renjatan elektrik, mati ditimpa bumbung atau terjatuh dalam lubang pembentung najis.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk penyelenggaraan elektrik.

Untuk makluman Ahli Yang Berhormat, KPM membaik pulih dan menaik taraf sekolah berdasarkan tahap kerosakan menggunakan analisis Skor Gred Impak tanpa mengambil kira usia bangunan. Oleh itu, keutamaan bagi kerja perancangan membaik pulih dan menaik taraf akan diberikan kepada sekolah yang mengalami kerosakan kritikal dan mendatangkan ancaman terhadap keselamatan murid dan guru.

Antara kerosakan yang sering dilaporkan dan seterusnya diambil tindakan pembaikan adalah seperti kerosakan bumbung, pendawaian elektrik, perpaipan, kerosakan tandas, kumbahan dan kerosakan struktur bangunan.

Untuk makluman Ahli Yang Berhormat, kerja-kerja yang melibatkan struktur akan dilaksanakan oleh Jabatan Kerja Raya (JKR). Manakala, kerja-kerja yang tidak melibatkan struktur akan dilaksanakan oleh KPM melalui jabatan pendidikan negeri (JPN). Kerja-kerja tersebut akan dipantau dari semasa ke semasa bagi memastikan skop kerja dipatuhi mengikut spesifikasi yang ditetapkan.

Sekian, terima kasih.

RT63

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN SYAHREDZAN BIN JOHAN [BANGI]

SOALAN

Tuan Syahredzan bin Johan [Bangi] minta **MENTERI DALAM NEGERI** menyatakan statistik bilangan individu yang disiasat, didakwa dan disabitkan bagi kes-kes kesalahan keselamatan seperti yang ditakrifkan di bawah Akta Kesalahan Keselamatan (Langkah-langkah Khas) 2012 setakat ini mengikut kaum/bangsa.

JAWAPAN

Tuan Yang Di Pertua,

Seramai 1166 individu telah ditangkap dari tahun 2015 sehingga kini di bawah Akta Kesalahan Keselamatan (Langkah-langkah Khas) 2012. Daripada jumlah tangkapan tersebut, seramai 824 individu telah didakwa dengan pelbagai seksyen kesalahan di bawah Bab VIB Jenayah Terancang, Kanun Keseksaan di mana 474 individu telah dijatuhkan hukuman, 186 individu dilepaskan tanpa dibebaskan (DNAA) dan 17 individu dilepaskan dan dibebaskan (AND) .

Daripada jumlah individu tersebut telah dibahagikan mengikut kaum dan bangsa. Pecahan bangsa terdiri daripada 269 Melayu, Cina 161, India 649, 6 Lain-lain Kaum dan warganegara asing seramai 81 orang.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN SYAHREDZAN BIN JOHAN [BANGI]

SOALAN

YB TUAN SYAHREDZAN BIN JOHAN [BANGI] minta **MENTERI PEMBANGUNAN KERAJAAN TEMPATAN** menyatakan statistik bilangan kes berkenaan dengan pengurusan strata yang dikendalikan oleh Tribunal Perumahan dan Pengurusan Strata setakat ini mengikut tahun dan jenis tuntutan.

JAWAPAN

Tuan Yang di-Pertua,

Untuk makluman Ahli Yang Berhormat, Tribunal Pengurusan Strata (TPS) merupakan satu forum alternatif yang disediakan bagi mendengar pertikaian yang secara umumnya berkenaan penyenggaraan dan pengurusan bangunan dan harta bersama.

Berikut ialah statistik pendaftaran dan penyelesaian kes di TPS bagi tempoh lima (5) tahun terkini iaitu dari tahun 2018 sehingga tahun 2022:

Tahun									
2018		2019		2020		2021		2022	
Daftar	Selesai	Daftar	Selesai	Daftar	Selesai	Daftar	Selesai	Daftar	Selesai
4964	5247	5675	6106	6605	4108	5851	5919	8269	10741

Untuk makluman Ahli Yang Berhormat, bilangan penyelesaian kes yang dikira adalah termasuk kes-kes yang didaftarkan dari tahun sebelumnya.

Seterusnya, jenis tuntutan yang difailkan di TPS adalah sepertimana yang diperuntukkan di bawah bidang kuasa TPS yang disenaraikan di bawah Bahagian 1, Jadual Keempat, Akta Pengurusan Strata 2013 [Akta 757]. Terdapat 14 bidang kuasa yang disenaraikan iaitu:

1. suatu pertikaian atau aduan berkenaan dengan suatu perjalanan atau pelaksanaan, atau kegagalan untuk menjalankan atau melaksanakan, suatu fungsi, kewajipan atau kuasa yang diberikan atau dikenakan oleh Akta ini atau perundangan subsidiari yang dibuat di bawah Akta ini, kecuali bagi yang diperuntukkan secara khusus dalam Bahagian ini;
2. tertakluk kepada subseksyen 16N(2) Akta Pemajuan Perumahan (Kawalan dan Pelesenan) 1966 [Akta 118], suatu

pertikaian mengenai kos atau pembaikan berkenaan dengan suatu kecacatan dalam suatu petak, bangunan atau tanah yang dicadangkan untuk dipecah bahagi kepada petak-petak, atau bangunan atau tanah yang dipecah bahagi, dan harta bersama atau harta bersama terhadapnya;

3. suatu tuntutan bagi mendapatkan caj, atau caruman kepada kumpulan wang penjelas, atau apa-apa jumlah yang diisytiharkan oleh peruntukan Akta ini sebagai suatu hutang;
4. suatu tuntutan bagi suatu perintah untuk mengadakan suatu mesyuarat agung;
5. suatu tuntutan bagi suatu perintah untuk membatalkan prosiding mesyuarat jika mana-mana peruntukan Akta telah dilanggari;
6. suatu tuntutan bagi suatu perintah untuk menidaksahkan suatu ketetapan jika hak mengundi telah dinafikan atau jika notis yang sewajarnya telah tidak diberi;
7. suatu tuntutan bagi suatu perintah untuk menidaksahkan suatu ketetapan yang diluluskan dalam suatu mesyuarat agung;
8. suatu tuntutan bagi suatu perintah untuk membatalkan pindaan undang-undang kecil dengan mengambil kira kepentingan semua pemunya petak atau pemilik;
9. suatu tuntutan bagi suatu perintah untuk mengubah kadar bunga yang ditetapkan oleh badan pengurusan bersama, perbadanan pengurusan atau perbadanan pengurusan subsidiari bagi pembayaran lewat caj, atau caruman kepada kumpulan wang penjelas;
10. suatu tuntutan bagi suatu perintah untuk mengubah jumlah insurans yang disediakan;

11. suatu tuntutan bagi suatu perintah untuk meneruskan suatu tuntutan insurans;
12. suatu tuntutan bagi memaksa pemaju, badan pengurusan bersama, perbadanan pengurusan atau perbadanan pengurusan subsidiari untuk memberikan maklumat atau dokumen;
13. suatu tuntutan bagi suatu perintah untuk memberikan persetujuan bagi melakukan perubahan kepada mana-mana harta bersama atau harta bersama terhad; dan
14. suatu tuntutan bagi suatu perintah untuk mengesahkan, mengubah atau membatalkan keputusan Pesuruhjaya.

Untuk makluman Ahli Yang Berhormat, bidang kuasa TPS adalah terhad untuk tuntutan yang tidak melebihi RM250,000.00 sahaja. Sekiranya tuntutan adalah melebihi jumlah tersebut, tuntutan perlu difailkan di Mahkamah Sivil. Bagi tempoh had masa pula, TPS adalah tidak tertakluk kepada Akta Had Masa 1953 [Akta 254]. Oleh yang demikian, tiada had masa bagi pemfailan tuntutan di TPS.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN SYAHREDZAN BIN JOHAN [BANGI]

SOALAN

YB TUAN SYAHREDZAN BIN JOHAN [BANGI] minta **MENTERI PEMBANGUNAN KERAJAAN TEMPATAN** menyatakan usaha-usaha dan kaedah-kaedah yang dilaksanakan untuk melupuskan kenderaan terbiar di seluruh negara bagi menambah baik keberkesanan pengurusan kenderaan terbiar oleh pihak berkuasa tempatan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) melalui Pihak Berkuasa Tempatan (PBT) melaksanakan penguatkuasaan pelupusan kenderaan terbiar di seluruh negara berdasarkan Garis Panduan Pelupusan Kenderaan Terbiar di Kawasan Operasi PBT. Garis panduan tersebut telah menggariskan prosedur pengurusan yang seragam dan jelas kepada semua PBT dan proses melupuskan kenderaan terbiar dapat diselesaikan dalam tempoh 122 hari sahaja. PBT juga boleh mengambil tindakan di bawah kesalahan halangan di bawah seksyen 46 Akta Jalan, Parit dan Bangunan 1974 (Akta 133) atau Perintah Pengangkutan Jalan yang berkenaan di bawah Akta Pengangkutan Jalan 1987 (Akta 333).

Bagi tahun 2022, sebanyak 5,326 operasi penguatkuasaan terhadap kenderaan terbiar telah dilaksanakan oleh PBT dan sejumlah 5,429 bilangan kenderaan terbiar yang dilupuskan susulan operasi tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN SYAHREDZAN BIN JOHAN
[BANGI]**

SOALAN

TUAN SYAHREDZAN BIN JOHAN [BANGI] minta **PERDANA MENTERI** menyatakan statistik bilangan kes tuntutan kecil yang difailkan di Mahkamah Tuntutan Kecil bagi tahun 2012 sehingga tahun 2022 mengikut tahun.

JAWAPAN

**YB DATO' SRI AZALINA OTHMAN SAID,
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Untuk makluman Ahli Yang Berhormat, kes tuntutan kecil adalah suatu prosiding dalam Mahkamah Majistret selaras dengan peruntukan Aturan 93 Kaedah-Kaedah Mahkamah 2012. Statistik bilangan kes tuntutan kecil yang difailkan di Mahkamah Majistret bagi tahun 2012 hingga tahun 2022 adalah seperti berikut:

TAHUN	BILANGAN KES
2012	1375
2013	1027
2014	2084
2015	2058
2016	1768
2017	1848
2018	1935
2019	2042
2020	1837
2021	1438
2022	1990
JUMLAH	19402

Sekian terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN SYAHREDZAN BIN JOHAN [BANGI]

SOALAN

Tuan Syahredzan bin Johan [Bangi] minta **MENTERI DALAM NEGERI** menyatakan jumlah permohonan baru program MM2H di seluruh Malaysia dan juga di Sarawak sejak syarat-syarat baru diperkenalkan pada Ogos 2021, jumlah permohonan baru untuk program PVIP dan adakah Kementerian akan meminda syarat-syarat MM2H bagi menarik lebih ramai pesara warga asing.

JAWAPAN

Tuan Yang Di Pertua,

Untuk makluman Ahli Yang Berhormat, jumlah permohonan baharu sejak Jabatan Imigresen Malaysia mengambilalih pelaksanaan Program MM2H pada tahun 2021 daripada Kementerian Pelancongan, Seni dan Budaya, sehingga 28 Februari 2023 permohonan yang diterima adalah sebanyak 1269 yang melibatkan prinsipal dan tanggungan. Statistik keseluruhan peserta Program MM2H aktif sejak program ini mula diperkenalkan pada tahun 2002 sehingga 28 Februari 2023 adalah 53,552 orang merangkumi prinsipal dan tanggungan.

Untuk makluman YB, syarat-syarat baharu Program MM2H adalah tidak terpakai di negeri Sarawak kecuali pembayaran Fi penyertaan. Bagi Program MM2H di Sarawak, Jabatan Imigresen Malaysia telah menerima sebanyak 365 permohonan untuk menyertai program dari 2022 hingga Februari 2023.

Bagi Program PVIP, Jabatan Imigresen telah meluluskan kuota sebanyak 10,300 permohonan melibatkan 16 ejen. Sehingga kini, ejen-ejen yang dilantik masih giat mempromosikan program. Walau bagaimanapun, memandangkan banyak negara baru sahaja membuka sempadan, PVIP Malaysia telah menerima 3 permohonan penyertaan bagi menyertai program ini. Kementerian ini mendapati program ini masih rendah penyertaannya disebabkan kesan daripada sekatan perjalanan yang dikuatkuasakan oleh sesetengah negara berikutan wabak Covid-19. Faktor lain yang menyebabkan program ini masih rendah penyertaannya adalah disebabkan keadaan ekonomi dunia yang masih dalam fasa pemulihan. Selain itu, birokrasi negara peserta seperti sekatan pemindahan wang juga memberikan kesan ke atas penyertaan program ini.

Pada ketika ini Kerajaan tidak mempunyai perancangan untuk meminda syarat-syarat Program MM2H kerana syarat-syarat yang sedia ada masih kompetitif dan relevan dengan situasi ekonomi semasa. Selain itu, Kerajaan juga telah memperkenalkan satu program berkonsepkan residensi melalui pelaburan iaitu Program Visa Premium (PVIP) yang diwujudkan bagi menarik mana-mana warga asing yang berkelayakan dan berminat untuk menetap di Malaysia bagi tempoh yang lebih lama. Faedah yang bakal diperolehi oleh peserta adalah lebih baik berbanding Program MM2H iaitu diberi kelulusan sehingga 20 tahun, dibenarkan bekerja, menjalankan perniagaan dan melabur secara aktif dalam mana-mana sektor yang dibenarkan di negara ini.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN TS. ZAHIR BIN HASSAN (WANGSA
MAJU)**

SOALAN

**TUAN TS. ZAHIR BIN HASSAN [WANGSA MAJU] minta MENTERI
KERJA RAYA menyatakan :**

- (a) apakah langkah-langkah yang disusun bagi memastikan kualiti menampal pot-hole di jalan-jalan raya bertahan lama; dan
- (b) apakah produk-produk baru yang dalam penilaian dan yang telah dikenalpasti bagi menangani masalah pot-hole agar hasil penampalan tersebut boleh bertahan lebih lama.

JAWAPAN

Tuan Yang Di-Pertua,

Untuk makluman Ahli Yang Berhormat, kerosakan yang sering berlaku pada permukaan jalan raya kebiasaannya adalah kewujudan *pothole*. *Pothole* bermaksud lubang di permukaan jalan berukuran tidak kurang 200mm garis pusat (tidak melebihi 1000mm) dan tidak kurang 25mm dalam.

Untuk makluman Ahli Yang Berhormat, pihak kementerian melalui agensinya JKR amat memberi penekanan dalam meningkatkan kualiti tampalan *pothole*. Pihak JKR dalam proses mengemaskini *Standard Specification For Road Works (SPJ)* dan *Standard Operating Procedure (SOP)* Senggara Jalan bagi meningkatkan kualiti kerja-kerja pembinaan dan penurapan jalan. Selain itu, pihak JKR juga telah bekerjasama dengan *Road Engineering Association of Malaysia (REAM)* dalam membangunkan *Guidelines on Cold Mix Standard for Permanent Pothole Patching*.

Antara produk-produk baharu yang telah digunakan bagi menangani masalah *pothole* ialah penggunaan *All Weathered Coldmix* iaitu bahan tampalan *pothole* yang boleh digunakan ketika cuaca hujan atau basah. Di samping itu, bagi memastikan kualiti tampalan *pothole* tersebut mematuhi spesifikasi mampatan yang ditetapkan penggunaan alat *Non-Destructive Testing (NDT)* akan dibuat setelah kerja-kerja penampalan *pothole* selesai dilaksanakan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN ZAHIR BIN HASSAN [WANGSA MAJU]

SOALAN

TUAN ZAHIR BIN HASSAN [WANGSA MAJU] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan:

- (a) apakah dasar untuk dimanfaatkan kawasan-kawasan di bawah talian penghantaran (transmission line) dari terbiar dan memerlukan kos penyelenggaraan yang tinggi; dan
- (b) apakah panduan serta syarat-syarat bagi memanfaatkan ruang kawasan berkenaan seperti digunakan sebagai kawasan parkir kenderaan, dusun bandar dan sebagainya.

JAWAPAN

Tuan Yang di-Pertua,

Untuk makluman Ahli Yang Berhormat,

1. Garis Panduan Izin lalu Talian Pembekalan Elektrik yang dikeluarkan oleh Suruhajaya Tenaga telah menggariskan panduan pelaksanaan aktiviti-aktiviti penggunaan tanah yang dibenarkan di bawah talian penghantaran (*transmission line*).

2. Berdasarkan garis panduan ini, aktiviti-aktiviti yang dibenarkan di dalam koridor penghantaran (*transmission corridor*) adalah seperti berikut:

- a) penanaman sayur dan tanaman jangka pendek, dengan syarat tanaman tersebut hendaklah mempunyai ketinggian tumbesaran semula jadi tidak melebihi 6 kaki (1.8 meter). Contoh tanaman-tanaman tersebut adalah cili, keledak, sayur-sayuran, serai, kobis, lobak, pandan, halia, kunyit, labu, teh, keladi, kacang botol, tomato, nenas, pegaga dan tembikai;
- b) tempat meletak kenderaan, dengan syarat jaring keselamatan hendaklah dipasang sepanjang tempoh pengoperasian;
- c) kolam oksida dan kolam ternakan ikan, dengan syarat aktiviti memancing tidak dibenarkan; dan
- d) jalan atau trek.

Untuk makluman Ahli Yang Berhormat juga,

3. Tanah yang terletak dalam laluan talian penghantaran di bawah izin lalu (*way leave*) masih lagi kepunyaan pemilik tanah berdaftar. Tenaga Nasional Berhad (TNB) hanya menggunakan tanah tersebut untuk

memasang dan menyelenggara talian penghantaran serta bertanggungjawab untuk memastikan keselamatan ke atas pembekalan elektrik.


4. Oleh itu, setiap pemohon yang ingin melaksanakan aktiviti-aktiviti yang dibenarkan ini, perlulah mendapat kebenaran bertulis daripada pemilik tanah persendirian atau daripada Pentadbir Tanah untuk tanah Kerajaan.

5. TNB juga terbuka untuk berbincang dengan pihak Kerajaan dan agensi-agensi berkaitan untuk meneroka potensi tanah-tanah milik Kerajaan di bawah jajaran talian penghantaran bekalan elektrik TNB, bagi tujuan memperluaskan pelaksanaan program seperti kebun komuniti, yang merupakan salah satu inisiatif untuk mengatasi isu keselamatan makanan atau *food security issues* dan dapat membantu mengurangkan kos sara hidup rakyat.

Sekian, terima kasih.

MAKLUMAT TAMBAHAN**Right of way**

Bagi sistem talian penghantaran, jarak kelebaran *right of way* yang telah dipraktikkan oleh TNB adalah mengikut kawasan dan tahap voltan bagi talian penghantaran tersebut. Jarak kelebaran *right of way* bagi sistem talian penghantaran 132 kV dan 275 kV adalah 40 meter kecuali di kawasan hutan di mana jarak kelebaran *right of way* yang ditetapkan adalah 60 meter. Untuk talian penghantaran bervoltan 500 kV pula, jarak kelebaran *right of way* yang diamalkan adalah 50 meter kecuali di kawasan hutan di mana jarak kelebaran *right of way* yang ditetapkan adalah 70 meter.



Rajah: *Right Of Way* Talian Penghantaran

Jenis Kawasan Koridor Penghantaran	Tahap Voltan		
	132kV	275kV	500kV
Kelebaran tanah koridor penghantaran bagi kawasan perhutanan	60m	60m	70m

NO SOALAN : 591

Kelebaran tanah koridor penghantaran selain dari kawasan perhutanan	40m	40m	50m
---------------------------------------------------------------------------	-----	-----	-----

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : TUAN ZAHIR BIN HASSAN
[WANGSA MAJU]**

SOALAN

TUAN ZAHIR BIN HASSAN [WANGSA MAJU] minta **MENTERI KESIHATAN** menyatakan : -

- (a) di manakah kedudukan dan pencapaian pelancongan kesihatan (*health tourism*) dalam industri pelancongan negara; dan
- (b) dalam pelancongan kesihatan (*health tourism*), secara khususnya, di manakah kedudukan dan pencapaian pelancongan kesihatan pergigian (*dental*).

JAWAPAN

Tuan Yang di-Pertua,

1. Sektor pelancongan kesihatan bagi tahun 2020 dan 2021 telah terjejas teruk akibat implikasi pandemik COVID-19. Oleh yang demikian, pelbagai usaha sedang dan akan dijalankan bagi memperkukuh kedudukan Malaysia sebagai destinasi pilihan yang selamat dan dipercayai bagi pelancongan kesihatan di rantau Asia Pasifik.
2. Pada tahun 2022, industri pelancongan kesihatan telah mencatatkan peningkatan, di mana sektor ini telah berjaya mencatatkan pendapatan berjumlah RM1.2 billion, 20% melepasi sasaran awal RM1 billion.
3. Pencapaian ini juga merupakan peningkatan melebihi dua kali ganda berbanding pencapaian tahun 2021 berjumlah iaitu RM0.58 billion. Ini membuktikan bahawa strategi Malaysia berkesan dalam menarik kembali pelancong kesihatan ke negara ini melalui peningkatan kepercayaan dan keyakinan negara luar terhadap tahap kualiti penjagaan kesihatan di Malaysia.
4. Pencapaian pada tahun 2022 telah meletakkan sektor pelancongan kesihatan Malaysia pada tahap pemulihan yang memberangsangkan iaitu sekitar 70% daripada pencapaian pre-pandemik sebanyak RM1.7 billion pada tahun 2019. Pada tahun 2023, kerajaan menyasarkan pendapatan industri berjumlah RM1.5 billion.
5. Sektor ini dijangka akan kembali pulih kepada pencapaian pre-pandemik sebanyak RM1.7 billion pada tahun 2024, setahun lebih awal daripada sasaran asal pada tahun 2025 seperti di dalam Pelan Tindakan Industri Pelancongan Kesihatan 2021-2025.
6. Walaupun ketidaktentuan ekonomi global dilihat mampu menggugat kadar pemulihan sektor ini, kerajaan masih optimis akan kemampuan sektor ini memandangkan ia merupakan sektor keperluan utama yang mampu menjana ekonomi negara.

Kedudukan dan pencapaian pelancongan kesihatan pergigian

Tuan Yang di-Pertua,

7. Statistik pada tahun 2019 telah menunjukkan peratusan bilangan kedatangan pelancong kesihatan bagi mendapatkan perkhidmatan pergigian adalah sekitar 0.15% daripada jumlah keseluruhan seramai 1.2 juta. Antara tujuan utama pelancongan kesihatan ke Malaysia adalah bagi mendapatkan perkhidmatan saringan kesihatan, kardiologi, onkologi, rawatan kesuburan dan ortopedik.

8. Walaupun pencapaian pelancongan kesihatan pergigian ketika ini tidak begitu memberangsangkan berbanding perkhidmatan lain, kerajaan sedang berusaha untuk memperluas potensi perkhidmatan ini. Antaranya ialah mempromosikan perkhidmatan ini dalam pakej 'Premium Wellness' bermula tahun 2023. Ini melibatkan kerjasama antara sektor perkhidmatan pergigian dan hospitaliti dalam menawarkan pakej gabungan penginapan dan rawatan kesihatan.

9. Terdapat sejumlah 26 fasiliti berdaftar dibawah Malaysia Healthcare Travel Council (MHTC) yang sedia menyediakan perkhidmatan pelancongan kesihatan pergigian.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN ZAHIR BIN HASSAN
(WANGSA MAJU)**

SOALAN

**TUAN ZAHIR BIN HASSAN (WANGSA MAJU) minta MENTERI
PEMBANGUNAN USAHAWAN DAN KOPERASI menyatakan:**

- (a) rancangan yang lebih menyeluruh, bersepadu serta mampan untuk membantu mereka seperti ibu tunggal, suri rumah dan sebagainya yang memerlukan pendapatan yang stabil, tetap dan berterusan; dan
- (b) pandangan terhadap penubuhan koperasi yang khusus bagi tujuan tersebut.

JAWAPAN

Tuan Yang di-Pertua,

1. Kementerian sentiasa prihatin dan komited dalam melaksanakan inisiatif dan perancangan yang lebih menyeluruh, bersepadu serta mampan dalam memastikan golongan ibu tunggal, suri rumah dan sebagainya dapat menjana pendapatan yang stabil dan tetap bagi meneruskan kelangsungan hidup.

Pelbagai program telah dirangka dan dilaksanakan oleh Kementerian Pembangunan Usahawan dan Koperasi (KUSKOP) melalui agensi-agensi di bawah kementerian seperti berikut:

- (i) **Amanah Ikhtiar Malaysia** telah menyediakan skim pembiayaan kepada usahawan wanita (Sahabat Usahawan AIM) melalui Skim Pembiayaan Ekonomi dan Skim Pembiayaan Sosial;
- (ii) **Program TEKUNNita oleh TEKUN Nasional** yang bertujuan membantu usahawan wanita mendapatkan pembiayaan berkumpulan dengan mudah, cepat dan cekap untuk tujuan perniagaan.;
- (iii) **Program UDA Bizznita (*Promo Space & Fashion Street*)** oleh UDA Holdings (UDA) yang diperkenalkan pada tahun 2022 bagi membantu usahawan PMKS wanita dengan menyediakan platform yang bersesuaian kepada usahawan untuk jangka pendek atau panjang agar usahawan ini terus kekal berada di pasaran;
- (iv) **Program Pemerkasaan Usahawan Wanita (PUAN)** yang dilaksanakan oleh INSKEN, bertujuan memperkasakan usahawan wanita B40 yang menjalankan perniagaan dalam sektor makanan dan minuman ke arah pendigitalan melalui pemberian latihan dan geran perniagaan; dan

- (v) **Program Pembiayaan dan Latihan** di bawah Bank Rakyat juga menawarkan pembiayaan dan pemberian latihan serta bimbingan kepada usahawan wanita.

2. Secara keseluruhannya, KUSKOP dan agensi dibawahnya komited untuk menyediakan program-program bantuan dan intervensi bersasar dalam meningkatkan keupayaan dan kemahiran keusahawanan kepada usahawan wanita.

3. Selain itu, KUSKOP sentiasa memberi galakan kepada penubuhan koperasi wanita dan ibu tunggal memandangkan koperasi ini dapat memainkan peranan yang penting dalam meningkatkan sosioekonomi golongan tersebut. Sehubungan itu, beberapa bentuk bantuan telah disediakan oleh KUSKOP dan agensi di bawahnya bagi memperkasa gerakan koperasi termasuk koperasi wanita dan ibu tunggal seperti penubuhan Koperasi Prihatin Rakyat (KPR) di bawah Program Pembiayaan Intervensi Pemulihan Ekonomi Koperasi yang terkandung dalam Bajet 2022. Selain itu, Bantuan Pembangunan Perniagaan dan juga pembiayaan melalui Tabung Modal Pusingan Suruhanjaya Koperasi Malaysia juga dapat membantu golongan berkenaan untuk memula dan mengembangkan perniagaan.

4. Sehingga 30 Jun 2022, sebanyak 276 buah koperasi wanita dan ibu tunggal telah didaftarkan dengan keanggotaan seramai 29,385 orang. Jumlah aset koperasi pula adalah bernilai RM77 juta, manakala jumlah modal syer/ yuran koperasi adalah sebanyak RM18.7 juta serta perolehan koperasi berjumlah RM10.13 juta.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : TUAN ZAHIR BIN HASSAN
[WANGSA MAJU]**

SOALAN

Minta **Perdana Menteri** menyatakan

- a) berapa ramai dan peratusan yang bernikah berakhir dengan perceraian mengikut tahun dalam 10 tahun terakhir; dan
- b) laporan audit keberkesanan kursus pra perkahwinan dalam usaha mengukuhkan institusi keluarga dan mengurangkan kadar perceraian.

JAWAPAN

YB SENATOR DATO' SETIA DR. HAJI MOHD NAI'IM BIN HAJI MOKHTAR
MENTERI DI JABATAN PERDANA MENTERI (HAL EHWAL AGAMA)

Tuan Yang di-Pertua,

1. Untuk makluman Ahli Yang Berhormat, setiap perceraian yang berlaku dalam kalangan pasangan beragama Islam hendaklah mendapat pengesahan daripada Mahkamah Syariah. Pasangan yang ingin bercerai hendaklah mengemukakan permohonan di Mahkamah Syariah Dan boleh bercerai sekiranya mendapat kebenaran Mahkamah. Manakala pasangan yang bercerai diluar Mahkamah, hendaklah mengemukakan permohonan pengesahan perceraian di Mahkamah Syariah sebelum mendaftarkan perceraian di pejabat Agama. Walau bagaimanapun, perceraian diluar Mahkamah tanpa kebenaran Hakim adalah menjadi kesalahan yang boleh membawa hukuman denda atau penjara. Berikut merupakan statistik kes perceraian yang didaftarkan di Mahkamah Syariah Seluruh Malaysia bagi tahun 2013 hingga Januari 2023 yang direkodkan oleh Jabatan Kehakiman Syariah Malaysia (JKSM):

Tajuk:	Statistik Kes Perceraian Di Mahkamah Syariah Seluruh Malaysia Bagi Tahun 2013 Hingga Jan 2023											
Tarikh Janaan:	4/2/2023											
Status Kes:	Daftar											
Jenis Kes Kod Nama:	151 - Tuntutan / Permohonan Perceraian							154 - Tuntutan Khulu' / Tebus Talaq				
	152 - Tuntutan Pengesahan Lafaz Cerai							162 - Tuntutan Fasakh				
	153 - Tuntutan Pengesahan Cerai Taklik											
Negeri	2013	2014	2015	2016	2017	2018	2019	2020	2021	2022	2023	JUMLAH
Johor	5,159	5,597	5,920	5,982	6,130	6,184	6,844	6,126	5,058	7,126	807	60,933
Kedah	3,684	4,462	5,189	5,506	5,656	5,676	5,757	4,934	3,873	5,839	557	51,133
Kelantan	4,408	4,581	4,382	4,719	4,637	4,543	4,555	4,433	4,094	4,982	506	45,840
Melaka	1,631	1,749	1,925	1,849	1,822	1,937	2,188	1,980	1,596	2,078	201	18,956
Negeri Sembilan	2,395	2,499	2,616	2,982	2,783	2,794	3,187	2,661	2,478	3,125	326	27,846
Pahang	3,593	3,809	3,894	4,255	3,908	4,250	4,552	3,907	3,409	4,688	430	40,695
Perak	3,371	3,696	4,038	4,400	4,481	4,362	4,848	4,288	4,215	2,305	0	40,004
Perlis	683	721	891	892	927	938	933	839	785	901	79	8,589
Pulau Pinang	2,080	2,263	2,392	2,489	2,275	2,345	2,637	2,327	1,930	2,508	241	23,487
Sabah	3,277	3,730	4,157	4,502	4,197	4,359	4,620	3,157	3,027	5,054	442	40,522
Sarawak	2,302	2,471	2,640	2,670	2,690	2,756	2,980	1,051	2	0	0	19,562
Selangor	10,154	11,073	11,896	12,513	12,203	11,859	13,282	10,447	8,811	12,098	1,128	115,464
Terengganu	3,374	3,631	4,320	4,326	4,441	4,401	4,589	4,129	3,359	4,593	383	41,546
Wilayah Persekutuan	3,611	3,832	3,907	4,156	3,994	4,218	4,003	2,999	2,791	4,085	346	37,942
JUMLAH	49,722	54,114	58,167	61,241	60,144	60,622	64,975	53,278	45,428	59,382	5,446	572,519

2. Untuk makluman Ahli Yang Berhormat, rekod data perceraian ini adalah sehingga Januari 2023 dan jumlah permohonan cerai tersebut termasuk tuntutan fasakh, tuntutan pengesahan lafaz cerai, tuntutan perceraian, tuntutan khuluk/ tebus talaq dan tuntutan pengesahan cerai taklik.

3. Laporan Kajian Keberkesanan Pelaksanaan Kursus Praperkahwinan Islam yang telah dibentangkan dalam Persidangan Ketua-ketua Pendaftar Nikah, Cerai dan Rujuk (KPNCR) Kali Ke-44 pada 15 - 17 Mac 2022 telah menunjukkan data purata kefahaman peserta Kursus Praperkahwinan Islam adalah seperti berikut:

- i. Tasawwur Islam: Secara purata 46% pemahaman peserta berada di tahap tinggi.
- ii. Perkahwinan: Purata pemahaman peserta bagi tajuk ini sebanyak 51.34% berada pada tahap tinggi, manakala 0.76% pada tahap yang sangat rendah.
- iii. Pengurusan Kesihatan: Sebanyak 50.75% purata pemahaman peserta berada pada tahap yang tinggi.
- iv. Tanggungjawab Suami isteri: Purata pemahaman peserta selepas mengikuti kursus bagi tajuk ini ialah 45.8% yang berada pada tahap tinggi.
- v. Komunikasi Suami Isteri: Sebanyak 49.32% peserta berada pada tahap tinggi bagi pemahaman berkaitan tajuk ini.
- vi. Pengurusan Kewangan: Seramai 51.34% peserta berada pada tahap tinggi bagi tajuk ini.
- vii. Pengurusan Kesihatan: Seterusnya bagi tajuk ini sebanyak 50.74% peserta berada pada tahap tinggi.
- viii. Pengurusan Stress dan Konflik: Sebanyak 51.15% peserta berada pada tahap tinggi.
- ix. Pembubaran Perkahwinan: Sebanyak 51.03% peserta berada pada tahap tinggi dalam memahami tajuk ini.

- x. Majlis Akad Nikah dan Walimatul Urus: Sebanyak 42.9% peserta berada pada tahap tinggi.
- 4. Secara keseluruhan daripada kajian yang dilaksanakan ini, purata pemahaman peserta setelah mengikuti kursus ini berada pada tahap tinggi.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : DATO' VERDON BIN BAHANDA [KUDAT]

SOALAN

DATO' VERDON BIN BAHANDA [KUDAT] minta **MENTERI PERTANIAN DAN KETERJAMINAN MAKANAN** menyatakan insentif pembinaan jalan-jalan pertanian bagi menghubungkan jalan pertanian di kawasan luar bandar di Sabah bagi membantu meringankan beban petani mengeluarkan hasil pertanian yang mana industri pertanian adalah merupakan ekonomi utama di kebanyakan kawasan luar bandar.

JAWAPAN

Tuan Yang di-Pertua,

Kementerian Pertanian dan Keterjaminan Makanan (KPKM) telah menyalurkan peruntukan bagi kerja-kerja Menaiktaraf Jalan Pertanian di seluruh negara termasuk negeri Sabah setiap tahun melalui agensi pelaksana Kawasan Pembangunan Pertanian Bersepadu (IADA) Kota Belud dan Jabatan Pengairan dan Saliran (JPS) Negeri Sabah. Sebagai maklumat tambahan, tafsiran jalan pertanian di bawah bidang kuasa KPKM adalah merangkumi jalan-jalan pertanian yang menghubungkan kawasan pertanian dengan jalan utama bagi pengeluaran hasil pertanian seperti padi, sayuran, tanaman kontan dan buah-buahan. Jalan pertanian ini tidak termasuk jalan pertanian ke kawasan komoditi seperti kelapa sawit, getah, tembakau dan kenaf. Manakala skop pelaksanaan projek adalah merangkumi kerja-kerja membina/ naiktaraf jalan pertanian *crusher run*/laterit (tidak termasuk bitumin) dan kerja-kerja menaiktaraf pemetung.

Tuan Yang di-Pertua, dari segi agihan peruntukan, sebanyak RM9,376,224.17 telah disalurkan dari tahun 2018 sehingga 2023 bagi pembinaan dan penyelenggaraan jalan pertanian seluruh negeri Sabah.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATO' VERDON BIN BAHANDA
[KUDAT]**

SOALAN

YB DATO' VERDON BIN BAHANDA [KUDAT] minta **MENTERI PEMBANGUNAN KERAJAAN TEMPATAN** menyatakan perancangan dan pelan strategik pembangunan pekan kecil sebagai pusat perniagaan setempat, khususnya pekan daerah Pitas dan daerah kecil Banggi untuk dimajukan sebagai pusat ekonomi setempat.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) melalui Jabatan Perancangan Bandar dan Desa (PLANMalaysia) bersedia untuk menyediakan input kepakaran untuk menjalankan Kajian Semula Rancangan Fizikal Negara (RFN) yang akan mencadangkan strategi dan tindakan bagi hala tuju perancangan strategik guna tanah dan polisi sektoral bagi negeri Sabah. Cadangan pembangunan guna tanah yang diperincikan ini juga merangkumi pembangunan pusat pertumbuhan dan pekan-pekan kecil di Sabah sebagai pusat perniagaan setempat termasuk pekan daerah Pitas dan daerah kecil Banggi untuk dimajukan sebagai pusat ekonomi setempat tertakluk kepada persetujuan Kerajaan Negeri Sabah.

Rancangan Fizikal Negara (RFN) merupakan suatu pelan perancangan spatial negara yang memberi panduan mengenai arah dan corak pembangunan, kegunaan dan pemeliharaan tanah negara yang strategik di bawah peruntukan Akta Perancangan Bandar dan Desa 1976 (Akta 172) yang terhad kepada Semenanjung Malaysia sahaja. Sehubungan itu, perluasan penyediaan RFN kepada negeri Sabah perlu mendapat persetujuan daripada Kerajaan Negeri Sabah terlebih dahulu.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : DATO' VERDON BIN BAHANDA (KUDAT)

SOALAN

DATO' VERDON BIN BAHANDA (KUDAT) minta **MENTERI KEMAJUAN DESA DAN WILAYAH** menyatakan jumlah peruntukan yang telah diperuntukkan untuk pembangunan bekalan air luar bandar di Kudat dan perancangan Kementerian untuk mempercepatkan pelaksanaan capaian bekalan air luar bandar di daerah Kudat.

JAWAPAN

Tuan Yang di-Pertua,

Untuk makluman Yang Berhormat, Kerajaan telah memperuntukkan sejumlah RM6.14 juta di dalam Mini Bajet 2023 di bawah Program Bekalan Air Luar Bandar (BALB) bagi Parlimen Kudat.

Bagi mempercepat capaian bekalan air luar bandar di Daerah Kudat, pembinaan Loji Rawatan Air ke-2 Pitas dengan kapasiti 10 JLH sedang dilaksanakan oleh Kementerian Kemajuan Desa dan Wilayah (KKDW). Projek ini dijangka siap menjelang penghujung tahun 2023.

Kesinambungan ini akan diteruskan dengan pelaksanaan Projek Bekalan Air Luar Bandar (BALB) Sistem Agihan dan Retikulasi Daerah Pitas, Sabah (Mukim Kalumpang, Dandun dan Pantai) yang dijangka memberi manfaat kepada 4,103 rumah/ akaun baharu di Mukim Kalumpang, Dandun dan Pantai, Daerah Pitas, Sabah.

Selain itu, Kementerian sedang dalam proses untuk melantik kontraktor bagi Projek Bekalan Air Luar Bandar (BALB) Menaiktaraf Loji Rawatan Air Kanibongan, Sabah berkapasiti 2 juta liter sehari (JLH). Kerja-kerja pembinaan dijangka akan dilaksanakan menjelang suku ketiga tahun 2023 dan projek ini dijangka akan memberi manfaat kepada 112 rumah/ akaun baharu.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : YB DATO' VERDON BIN BAHANDA
[KUDAT]**

SOALAN

Minta **PERDANA MENTERI** menyatakan jumlah pengagihan peruntukan yang telah disalurkan untuk Program Perkhidmatan Tanah Adat Negeri Sabah (PANTAS) dan tambahan peruntukan untuk mempercepatkan pemilikan tanah kepada Anak Negeri Sabah.

JAWAPAN

**DIJAWAB OLEH YB DATUK ARMIZAN BIN MOHD ALI,
MENTERI DI JABATAN PERDANA MENTERI
(HAL EHWAL SABAH, SARAWAK DAN TUGAS-TUGAS KHAS)**

Tuan Yang di-Pertua,

1. Kerajaan Persekutuan memberi perhatian khusus kepada masyarakat di Sabah dengan menyediakan peruntukan yang sewajarnya bagi Program Pengukuran Tanah Hak Adat (*Native Customary Rights*-NCR) di Sabah termasuk peruntukan kepada Program Perkhidmatan Tanah Adat Negeri Sabah (PANTAS).
2. Program ini diletakkan di bawah Program Khas Anak Negeri (PKAN) Sabah yang dipantau dan diselaraskan oleh Unit Penyelarasan Pelaksanaan, Jabatan Perdana Menteri (ICU JPM). Usaha-usaha pengukuran tanah NCR dilaksanakan secara berterusan dengan komitmen untuk memberi hak milik tanah kepada individu yang layak.
3. Program pengukuran tanah NCR Sabah telah bermula sejak tahun 2011. Daripada tahun 2011 hingga 2022, sejumlah RM164.53juta telah disalurkan kepada Kerajaan Negeri Sabah di bawah Peruntukan Pembangunan. Secara kumulatif dari tahun 2011 hingga 28 Februari 2023, sejumlah 141,849.40 hektar tanah telah selesai diukur berbanding sasaran sebanyak 137,496 hektar.
4. Bagi tahun 2023, sebanyak RM10juta telah diperuntukkan bagi pelaksanaan program pengukuran tanah NCR di Sabah. Kerajaan Negeri Sabah telah mensasarkan sebanyak 65,000 hektar tanah untuk diukur sepanjang Rancangan Malaysia Kedua Belas (RMKe-12). Sepanjang tahun 2021-2022, sejumlah 28,812.3 hektar telah diukur berbanding sasaran sebanyak 28,300 hektar.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : YB DATO' VERDON BIN BAHANDA
[KUDAT]**

SOALAN

YB DATO' VERDON BIN BAHANDA [KUDAT] minta **MENTERI PELANCONGAN, SENI DAN BUDAYA** menyatakan perancangan dan insentif untuk membangunkan sektor pelancongan luar bandar, sekali gus membangunkan pemuliharaan alam sekitar di luar bandar dan memberikan impak terus kepada komuniti luar bandar.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Menerusi Dasar Pelancongan Negara 2020-2030, Kementerian Pelancongan, Seni dan Budaya (MOTAC) telah mengenalpasti pelancongan desa atau luar bandar (*rural tourism*) sebagai salah satu segmen pelancongan yang menyumbang kepada ekonomi setempat, menerusi aktiviti-aktiviti seperti homestay, kampungstay, perusahaan kraftangan, pemprosesan makanan, agropelancongan, ekopelancongan dan sebagainya.

2. Antaranya adalah Program Pengalaman Homestay Malaysia yang dilancarkan pada tahun 1995 bagi meningkatkan penyertaan masyarakat luar bandar di dalam sektor pelancongan. Program ini menggunakan konsep *experiential tourism* dan pelancongan berasaskan komuniti (*community-based tourism-CBT*), yang mana pelancong akan tinggal bersama keluarga tuan rumah pengusaha homestay yang telah berdaftar dengan MOTAC, dan seterusnya menjalani gaya hidup seharian masyarakat desa, khususnya di komuniti tersebut. Tambahan pula, pelancong juga berpeluang untuk turut serta dalam aktiviti CBT seperti sukan rakyat, acara kebudayaan, merewang, perayaan, belajar tarian, memasak, pemuliharaan alam sekitar dan sebagainya yang terdapat di kawasan homestay berkenaan.

3. Sebagai contohnya, Homestay Miso Walai – Kampung Batu Puteh, Sabah telah menerima anugerah Kampung Pelancongan Terbaik 2021 oleh *World Tourism Organisation* (UNWTO) atas komitmen dan inisiatif pemuliharaan dan pemeliharaan budaya tradisional dan alam sekitar. Usaha-usaha tersebut telah berkembang menjadi perusahaan sosial berskala sederhana yang menyokong pekerjaan, matlamat sosial dan alam sekitar serta komited untuk melindungi dan memulihkan ekosistem dan biodiversiti di Santuari Hidupan Liar Kinabatangan. Ini telah menjadikan Sabah begitu unik dan signifikan pada skala global.
4. Di samping itu, MOTAC turut menyediakan insentif dalam bentuk latihan kepada pengusaha-pengusaha Program Pengalaman Homestay Malaysia, antaranya kursus berkaitan pemasaran digital, pembangunan pakej Homestay, keselamatan pelancong, asas pengendalian makanan, pembuatan kraftangan, pengurusan perniagaan, bahasa dan Kursus Mesra Malaysia. Kementerian turut bekerjasama dengan agensi-agensi Kerajaan lain, seperti kerjasama dengan Institut Kemajuan Desa (INFRA) bagi penganjuran Kursus Asas Homestay dan kerjasama dengan INSKEN Bumiputera *Business Coaching* bagi penganjuran kursus keusahawanan kepada peserta Program Pengalaman Homestay Malaysia di Sabah, Sarawak dan Labuan pada tahun 2023.
5. Sehingga 31 Disember 2022, seramai 3,397 pengusaha homestay telah berdaftar dengan MOTAC yang melibatkan 450 buah kampung di seluruh negara dan berjaya menjana pendapatan melebihi RM28.5 juta. Bagi daerah Kudat, sehingga 31 Disember 2022, seramai 25 pengusaha homestay yang melibatkan 6 buah kampung telah berdaftar dengan MOTAC seperti Kampung Minyak, Kampung Lajong, dan Kampung Kumbatang.

6. Selain itu, MOTAC turut menganjurkan kursus-kursus kesedaran umum berkaitan kelestarian pelancongan kepada penggiat-penggiat industri pelancongan, antaranya seperti Kursus Eco-Host. Kursus ini dibangunkan untuk meningkatkan kesedaran mengenai keperluan memelihara dan memulihara alam sekitar, memahami hubungan antara pelancongan dengan persekitaran serta kepentingan ekopelancongan dalam kalangan kakitangan barisan hadapan (*frontliners*) dan masyarakat. Pada tahun 2022, MOTAC telah mengadakan sebanyak enam (6) siri Kursus Ecohost yang melibatkan lebih 180 orang peserta.

7. Selanjutnya, MOTAC menerusi Kraftangan Malaysia juga giat mengadakan program-program pembangunan industri bagi membangun dan memperkasakan ekonomi usahawan kraf di luar bandar. Ini termasuklah program pembangunan produk, pembangunan kemahiran teknikal dan keusahawanan serta pemasaran kraf dalam meningkatkan mutu dan kualiti produk yang dihasilkan bagi memenuhi permintaan pelancong. Di daerah Kudat misalnya, sehingga 31 Disember 2022, terdapat seramai 184 orang usahawan kraf dan tenaga kerja di bawah kategori B40 yang telah berjaya menjana nilai jualan kraf melebihi RM1.04 juta, melibatkan pelbagai jenis kraf, antaranya adalah produk kraf tekstil, hasil rimba, hasil logam dan aneka jenis kraf yang lain.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : PUAN VIVIAN WONG SHIR YEE [SANDAKAN]

SOALAN

PUAN VIVIAN WONG SHIR YEE [SANDAKAN] minta **MENTERI PENDIDIKAN** menyatakan jika terdapat sebarang rancangan untuk melengkapkan semua sekolah dengan akses internet berkelajuan tinggi, TV pintar dan kemudahan IT yang lain dengan melihat cara baharu bagi melaksanakan pembelajaran selepas pandemik.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk melaksanakan yang terbaik untuk melengkapkan semua sekolah dengan akses Internet berkelajuan tinggi, peranti digital dan kemudahan IT yang lain.

KPM telah menyediakan capaian jalur lebar Internet dengan kelajuan 30Mbps hingga 300Mbps untuk 10,233 sekolah di bawah KPM. Sebanyak 5,027 sekolah disediakan dengan talian gentian optik, 4,701 sekolah disediakan talian jalur lebar tanpa wayar 4G dan 505 sekolah disediakan dengan talian satelit. Pada masa ini, capaian internet di sekolah hanya meliputi makmal komputer, bilik guru dan pejabat pentadbiran.

KPM juga sedang merancang untuk menaik taraf capaian internet yang mengutamakan teknologi fiber dengan kelajuan minimum 100Mbps sehingga 1,500Mbps bergantung kepada saiz dan populasi premis institusi pendidikan serta institusi lain bawah KPM. Selain itu, KPM juga bercadang untuk menaik taraf infrastruktur rangkaian dalaman yang membolehkan internet dicapai dari semua lokasi dalam kawasan premis institusi bawah KPM.

KPM sedang melaksanakan kaedah baharu pengajaran dan pembelajaran (PdP) pasca pandemik COVID-19 melalui pelaksanaan secara rintis kelas hibrid untuk 110 buah institusi pendidikan terpilih yang melibatkan 550 buah kelas. Pelaksanaan rintis kelas hibrid ini akan mengupayakan PdP secara digital dan bersemuka dalam satu ekosistem yang sama. PdP secara silang dapat dilaksanakan di antara kelas dan sekolah yang meliputi dalam juga luar negara. Melalui kaedah ini, pakar daripada pelbagai bidang dapat dilibatkan bagi meningkatkan kualiti penyampaian pendidikan dalam kalangan guru dan murid.

Melalui pelaksanaan rintis kelas hibrid ini, semua kelas tersebut akan dinaik taraf pendawaian elektrik dalam kelas serta akan dilengkapi

SOALAN NO : 600

dengan kemudahan peralatan digital *Smartboard*, TV pintar, set kamera dan perakam suara (*air mic*). Infrastruktur rangkaian dalaman (*Local Area Network* – LAN) juga akan dinaik taraf bagi membolehkan capaian Internet disediakan di semua kelas tersebut.

Melalui pelaksanaan rintis inisiatif kelas hibrid ini, keupayaan pendidikan digital dapat diperkasakan bagi meningkatkan kualiti PdP.

Sekian, terima kasih.

RT64

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN JAWAB LISAN

DARIPADA : PUAN VIVIAN WONG SHIR YEE [SANDAKAN]

SOALAN

PUAN VIVIAN WONG SHIR YEE [SANDAKAN] minta **MENTERI SUMBER MANUSIA** menyatakan apakah kesan kepada ekonomi dan pasaran kerja kita khususnya di bandar- bandar sekunder seperti Sandakan sejak arahan perintah gaji minimum yang baharu pada Mei tahun 2022.

JAWAPAN

1. Perintah Gaji Minimum 2022 (PGM 2022) telah berkuat kuasa mulai 1 Mei 2022 dengan kadar gaji minimum RM1,500 sebulan untuk semua sektor tanpa mengira wilayah bagi majikan yang menggajikan lima (5) orang pekerja atau lebih dan tanpa mengira bilangan pekerja bagi majikan yang menjalankan suatu aktiviti professional yang dikelaskan di bawah Piawaian Pengelasan Pekerjaan Malaysia (*Malaysia Standard Classification of Occupations*, MASCO) 2020. Kerajaan telah melanjutkan pelaksanaan PGM 2022 bagi majikan yang menggajikan kurang lima (5) orang pekerja daripada 1 Januari 2023 kepada 1 Julai 2023 di seluruh negara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : PUAN VIVIAN WONG SHIR YEE
[SANDAKAN]**

SOALAN

PUAN VIVIAN WONG SHIR YEE [SANDAKAN] minta **MENTERI PELANCONGAN, SENI DAN BUDAYA** menyatakan adakah Kementerian akan mempertimbangkan untuk memberi subsidi kepada pengendali penerbangan sewa khas agar pengendali pelancongan dapat menerokai ke dalam pasaran baru muncul yang mana pada masa ini kekurangan penerbangan terus ke negeri atau bandar tertentu di negara ini.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Kementerian Pelancongan, Seni dan Budaya melalui agensinya Tourism Malaysia sentiasa pro-aktif mewujudkan pelbagai kerjasama dengan syarikat-syarikat penerbangan dalam dan luar negara bagi meningkatkan kedatangan pelancong-pelancong asing ke negara ini.
2. Sejak penularan wabak COVID-19, sektor penerbangan antara yang paling teruk terjejas dan melibatkan banyak laluan penerbangan yang terpaksa dihentikan berikutan pintu sempadan negara yang ditutup. Implikasinya turut dapat dilihat menerusi pemberhentian atau penggantungan pekerja disektor penerbangan itu sendiri. Semenjak pembukaan pintu sempadan negara pada 1 April 2022 yang lalu, industri pelancongan telah kembali rancak dan Malaysia telah mendapat perhatian semula dari pelancong-pelancong asing sebagai destinasi percutian semasa era pasca-pandemik ini.
3. Pihak Kementerian akan sentiasa mempertimbangkan sebarang bentuk kerjasama atau bantuan subsidi yang dapat diberikan kepada mana-mana pengendali penerbangan sewa khas dalam dan luar negara sekiranya cadangan yang diusulkan dapat menepati syarat-syarat kerjasama aktiviti promosi yang ingin diketengahkan.
4. Penerbangan sewa khas ini juga merupakan salah satu program pemasaran Tourism Malaysia yang akan dapat memberikan pulangan maksima terhadap peningkatan kedatangan pelancong serta sekaligus menambahkan jumlah pendapatan negara melalui perbelanjaan pelancong-pelancong yang datang ke Malaysia.
5. Dalam melestarikan aktiviti promosi penerbangan khas ini, antara kerjasama yang dapat dilaksanakan adalah dengan mewujudkan kerjasama dengan pihak kerajaan negeri dalam usaha menarik minat pengusaha-pengusaha penerbangan khas ini untuk terbang ke Malaysia. Kerjasama

SOALAN NO : 602

dalam bentuk insentif dan prasarana produk pelancongan di negeri-negeri yang terlibat merupakan salah satu 'unique selling point' yang dapat diketengahkan bagi peningkatan perkhidmatan penerbangan khas ke Malaysia. Pada masa ini, pihak Langkawi Development Authority (LADA) menawarkan insentif sebanyak USD10,000 bagi setiap penerbangan sewa khas yang dibawa masuk ke Langkawi.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : PUAN VIVIAN WONG SHIR YEE
[SANDAKAN]**

SOALAN

YB PUAN VIVIAN WONG SHIR YEE [SANDAKAN] minta **MENTERI PEMBANGUNAN KERAJAAN TEMPATAN** menyatakan sama ada Kementerian bercadang untuk memperkenalkan Skim Rumah Belia khas untuk membantu golongan belia yang tidak mampu memiliki rumah pertama mereka.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) sedang merancang pembinaan Rumah Belia Madani (RBM) di kawasan Lembah Klang. Inisiatif RBM adalah inisiatif Kerajaan dalam penyediaan perumahan secara transit untuk golongan belia yang berumur 35 tahun dan ke bawah untuk mendiami rumah tersebut bagi sesuatu tempoh yang dirasakan cukup sehingga mereka dapat mengukuhkan kedudukan kewangan dan seterusnya memiliki kediaman sendiri. RBM yang pertama akan dibangunkan di Mukim Batu, Sentul melibatkan 1,048 unit rumah.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB PUAN VIVIAN WONG SHIR YEE
[SANDAKAN]**

SOALAN

Puan Vivian Wong Shir Yee [Sandakan] minta **MENTERI DALAM NEGERI** menyatakan secara terperinci:

- a) dalam 5 tahun terkini, berapa jumlah permohonan status Pemastautin Tetap untuk pasangan bukan warganegara Malaysia yang telah ditolak, diluluskan dan masih diproses; dan
- b) apakah sebab utama penolakan tersebut dilakukan memandangkan Jabatan Imigresen hanya menerima permohonan yang lengkap

JAWAPAN

Tuan Yang Di-Pertua,

Untuk makluman Ahli Yang Berhormat, seorang warga asing perlu memiliki Permit Masuk sebelum mengemukakan permohonan status Permastautin Tetap. Berdasarkan statistik yang direkodkan oleh Jabatan Imigresen Malaysia (JIM) mulai tahun 2018 sehingga tahun 2022, terdapat sejumlah 17,964 permohonan Permit Masuk yang telah diterima di seluruh negeri. Untuk tempoh tersebut, sebanyak 6,556 permohonan telah mendapat kelulusan Permit Masuk manakala 11,408 permohonan telah ditolak.

Berikut merupakan sebab penolakan bagi permohonan Permit Masuk:

- i. Permohonan tidak melepasi Tapisan Keselamatan daripada pihak Polis Diraja Malaysia (PDRM);
- ii. Pemohon atau penaja tersenarai dalam Senarai Syak / Senarai Hitam Jabatan;
- iii. Tidak mendapat sokongan daripada JIM kerana tiada kerjasama pemohon dan penaja sewaktu proses temuduga dijalankan atau semasa proses naziran dilaksanakan;
- iv. Pemohon atau penaja telah meninggal dunia;
- v. Pasangan telah bercerai atau penaja telah menarik diri daripada tajaan;
- vi. Hasil laporan naziran mengesahkan terdapat isu '*Marriage of Convenience*'; dan
- vii. Pemohon atau penaja tidak fasih atau faham Bahasa Malaysia semasa ditemuduga.

Bagi memastikan hanya individu yang benar-benar layak sahaja mendapat Permit Masuk, setiap pemohon perlulah memenuhi syarat dan kriteria permohonan sebelum dipertimbangkan untuk keputusan oleh Ketua Pengarah Imigresen selaras Seksyen 10, Akta Imigresen 1959/63. Dalam hal ini, pemberian Pas Residen kepada pemohon juga akan dipertimbangkan sebagai langkah kawalan dan pemantauan sebelum dikeluarkan Permit Masuk.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : TUAN WAN AHMAD FAYHSAL BIN WAN
AHMAD KAMAL [MACHANG]**

SOALAN

**YB TUAN WAN AHMAD FAYHSAL BIN WAN AHMAD KAMAL
[MACHANG]** minta **MENTERI PEMBANGUNAN KERAJAAN
TEMPATAN** menyatakan pendirian Kementerian mengenai
cadangan untuk diadakan Pilihan Raya Kerajaan Tempatan.

JAWAPAN

Tuan Yang di-Pertua,

Untuk makluman Ahli Yang Berhormat, negara kita mengamalkan Sistem Raja Berpelembagaan Demokrasi Berparlimen dan Kerajaan Perpaduan pada hari ini sentiasa menghormati hak rakyat untuk mengundi.

Untuk makluman Ahli Yang Berhormat, sejarah Pilihan Raya Kerajaan Tempatan telah bermula pada tahun 1857 iaitu sejak 166 tahun yang dahulu. Walau bagaimanapun, pelaksanaannya telah ditangguhkan pada tahun 1965 ekoran dari konfrontasi antara Malaysia dan Indonesia, dan semenjak itu ia tidak pernah diteruskan lagi.

Untuk makluman Dewan yang mulia, Kerajaan mengambil maklum Laporan Suruhanjaya Diraja, dengan izin *Report of the Royal Commission of Enquiry to Investigate into The Workings of Local Authorities in West Malaysia* yang diketuai oleh Senator Dato' Athi Nahappan pada tahun 1965 telah mengesyorkan bahawa:

- (i) “...that the present system of election on the basis of ward should continue to provide representation to local government as in the past.”; dan
- (ii) “...that voting in local government elections in the country should continue on the voluntary basis as has been hitherto.”

Untuk makluman Ahli Yang Berhormat, Kerajaan Perpaduan pada hari ini melalui Kementerian Pembangunan Kerajaan Tempatan (KPKT) sedang memberi tumpuan kepada tujuh (7) bidang fokus utama yang baharu iaitu:

- (i) membangun dan memperkasa peranan Kerajaan Tempatan;
- (ii) membangun potensi Pihak Berkuasa Tempatan (PBT) bagi menjana sumber pendapatan tambahan negara;

- (iii) perancangan perumahan yang lebih komprehensif dan berdaya saing;
- (iv) pemeraksanaan komuniti tanpa mengira kaum;
- (v) pengurusan sisa pepejal bersepadu yang lebih efektif dan efisien bagi menghasilkan pelaksanaan ke arah ekonomi kitaran;
- (vi) memperkukuh agenda bandar mampan dan pintar ke arah perbandaran baharu; dan
- (vii) memperkukuh kesiapsiagaan kebombaan dan penyelamatan yang sejahtera

Bagi tahun 2023, Kementerian Pembangunan Kerajaan Tempatan (KPKT) akan memastikan perkhidmatan asas PBT diutamakan seperti jalan raya yang rata, tandas awam bersih bertaraf BMW iaitu bersih, menawan dan wangi, lampu yang terang serta longkang yang bersih sebagai misi utama untuk menyampaikan perkhidmatan yang terbaik kepada rakyat. Justeru itu, Pilihanraya Kerajaan Tempatan ketika waktu ini bukan satu perkara keutamaan pihak Kementerian.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN WAN AHMAD FAYHSAL BIN WAN
AHMAD KAMAL [MACHANG]**

SOALAN

TUAN WAN AHMAD FAYHSAL BIN WAN AHMAD KAMAL [MACHANG] minta **MENTERI PENDIDIKAN** menyatakan sekiranya kapasiti sekolah menengah di daerah Machang khususnya dalam kawasan Pulai Chondong berada pada tahap yang optimum. Hal ini kerana, pihak penduduk telah membuat aduan bahawa sekolah sedia ada agak sesak dan tidak selesa.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha menyediakan prasarana dan kemudahan infrastruktur pendidikan kepada semua murid di seluruh negara.

Untuk makluman Ahli Yang Berhormat, terdapat tiga buah sekolah menengah di daerah Machang iaitu Sekolah Menengah Kebangsaan (SMK) Machang, SMK Bandar Machang dan SMK Sultan Abdul Samad. Berdasarkan semakan data Kementerian Pendidikan Malaysia (KPM), SMK Sultan Abdul Samad yang berada di kawasan Pulai Chondong mempunyai 35 bilik darjah dan beroperasi secara satu sesi. Sehingga 3 Februari 2023, enrolmen murid di sekolah ini adalah seramai 670 orang dan masih belum melepasi kapasiti optimum sekolah.

Sehubungan dengan itu, buat masa ini, KPM berpandangan bahawa sekolah menengah sedia ada di kawasan Pulai Chondong, Machang, Kelantan masih berupaya untuk menampung keperluan dan pertambahan enrolmen murid.

Walau bagaimanapun, KPM sentiasa mengenal pasti keperluan prasarana dan kemudahan infrastruktur pendidikan dari semasa ke semasa mengikut kesesuaian dan keperluan dalam kalangan masyarakat setempat khususnya di negeri Kelantan.

Sekian, terima kasih.

RT65

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : TUAN WAN AHMAD FAYHSAL BIN WAN
AHMAD KAMAL [MACHANG]**

SOALAN

Tuan Wan Ahmad Fayhsal bin Wan Ahmad Kamal [Machang] minta **MENTERI KOMUNIKASI DAN DIGITAL** menyatakan perancangan Kementerian untuk menaik taraf akses dan kapasiti capaian jalur lebar bagi Parlimen Machang. Untuk makluman YB Menteri, daerah Machang adalah pusat ilmu yang mempunyai cawangan UiTM, sekolah berasrama penuh (SBP) dan sekolah-sekolah agama rakyat. Mereka memerlukan capaian internet yang baik untuk pendidikan yang sempurna.

JAWAPAN

Tuan Yang di-Pertua,

Kementerian Komunikasi dan Digital (KKD) melalui Suruhanjaya Komunikasi dan Multimedia Malaysia (SKMM) telah dan sedang mempercepatkan penaiktarafan akses dan kapasiti capaian jalur lebar melalui pelaksanaan Pelan Jalinan Digital Negara (JENDELA) Fasa 1 (2020-2022) dan Fasa 2 (2023-2025).

Setakat suku ketiga tahun 2022, peratusan liputan 4G di kawasan berpenduduk di Parlimen Machang telah meningkat kepada 98.18% berbanding 89.79% sebelum pelaksanaan JENDELA pada suku kedua 2020.

Bagi membekalkan capaian internet yang baik di Parlimen Machang, setakat suku keempat tahun 2022 sebanyak 2,319 premis telah siap dengan ketersediaan sambungan gentian optik bagi jalur lebar talian tetap, manakala baki sebanyak 1,429 premis dalam peringkat pelaksanaan daripada 3,748 yang dirancang. Selain itu, sebanyak 96 alat pemancar komunikasi telah siap dinaik taraf sepenuhnya kepada teknologi 4G setakat suku keempat 2022.

SKMM juga telah menyiapkan sembilan menara baharu dan dalam proses menyiapkan baki tiga menara daripada 12 menara yang dirancang. Kesemua inisiatif yang sedang dalam peringkat pelaksanaan dijangka akan siap sepenuhnya pada suku keempat 2023. Dengan pelaksanaan inisiatif-inisiatif ini, capaian internet di Parlimen Machang sedang diperluaskan secara berperingkat dan menyeluruh.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN WAN AHMAD FAYHSAL BIN WAN
AHMAD KAMAL (MACHANG)**

SOALAN

**TUAN WAN AHMAD FAYHSAL BIN WAN AHMAD KAMAL
[MACHANG]** minta **MENTERI KERJA RAYA** menyatakan apakah perkembangan terkini projek pembinaan serta naik taraf lebuh raya-lebuh raya di negeri Kelantan seperti Central Spine Road 34. Berdasarkan pemerhatian, lebuh raya ini telah terlewat dari rancangan asal siap kerja.

JAWAPAN

Tuan Yang Di-Pertua,

Untuk makluman Ahli Yang Berhormat, terdapat dua (2) projek berskala besar di negeri Kelantan iaitu Projek Lebuhraya Kota Bharu – Kuala Krai (KBKK) dan Lingkaran Tengah Utama (LTU). Projek KBKK merangkumi sembilan (9) kontrak, di mana tujuh (7) dalam pembinaan dan dua (2) telah siap. Manakala LTU merangkumi sepuluh (10) kontrak di Negeri Kelantan, di mana dua (2) di peringkat perolehan, tujuh (7) di peringkat pembinaan dan satu (1) telah siap. Kos keseluruhan projek KBKK dan LTU di Negeri Kelantan adalah sebanyak RM5.4 bilion.

Status semasa Projek KBKK sehingga 31 Januari 2023 adalah 43.2% sebenar berbanding 45.5% unjuran. Manakala status semasa Projek LTU melibatkan jajaran Kuala Krai ke Gua Musang adalah 20.5% sebenar berbanding 21.4% unjuran. Penyumbang utama kelewatan kedua-dua projek ini adalah disebabkan isu pengambilan balik tanah.

Kementerian ini juga telah mengenal pasti satu (1) projek sakit iaitu KBKK Pakej 2B melibatkan jajaran Ketereh ke Kok Lanas. Kemajuan fizikal projek ini sehingga 31 Januari 2023 adalah 80.7% sebenar berbanding 98% unjuran. Notis Untuk Tujuan Penamatan Kontraktor telah dikeluarkan pada 29 Disember 2022 dan Mesyuarat Jawatankuasa *Contract Coordination Panel (CCP)* dijadualkan pada 20 Februari 2023 untuk membuat keputusan muktamad mengenai tindakan yang akan dilaksanakan meliputi pengesyoran penamatan kontraktor atau langkah pemulihan bagi Projek Sakit.

Kedua-dua pakej KBKK dan LTU terutamanya di negeri Kelantan dijangka dapat digunakan sepenuhnya oleh pengguna jalan raya pada pertengahan tahun 2026.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN WAN AHMAD FAYHSAL BIN
WAN AHMAD KAMAL [MACHANG]**

SOALAN

TUAN WAN AHMAD FAYHSAL BIN WAN AHMAD KAMAL [MACHANG] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan bilakah pihak Jabatan Pengairan dan Saliran akan melaksanakan projek tebatan banjir di Sungai Sat. Hal ini memandangkan hampir setiap tahun air sungai akan melimpah dan mengakibatkan berlakunya banjir di kawasan penempatan terdekat.

JAWAPAN

Tuan Yang Di-Pertua,

Untuk makluman Ahli Yang Berhormat, pelaksanaan kerja-kerja pengorekan sungai sepanjang 11.2 km di Sungai Sat yang merupakan anak Sungai Kelantan telah siap pada tahun 2022 melalui pelaksanaan projek Pembangunan Lembangan Sungai Bersepadu (PLSB) Sg Kelantan Fasa 1. Projek ini dilaksanakan secara reka dan bina dengan siling kos projek sebanyak RM699 juta. Projek dijangka siap sepenuhnya pada April 2023.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATO' SERI DR. WAN AZIZAH WAN ISMAIL
[BANDAR TUN RAZAK]**

SOALAN

DATO' SERI DR. WAN AZIZAH WAN ISMAIL [BANDAR TUN RAZAK] minta **MENTERI PERTANIAN DAN KETERJAMINAN MAKANAN** menyatakan permohonan penyertaan Projek Pembangunan Pertanian 2023 telah dibuka. Salah satu senarai projek pertanian 2023 ditawarkan ialah pembangunan tanah terbiar. Tumpuan diberikan kepada tanah terbiar di kawasan luar bandar. Apakah cadangan untuk kawasan terbiar bandar seperti di persekitaran perumahan PPR.

JAWAPAN

Tuan Yang di-Pertua,

Kementerian ini melalui Jabatan Pertanian melaksanakan Program Pembangunan Pertanian Komuniti melibatkan penduduk bandar bagi mengoptimumkan penggunaan tanah-tanah terbiar di kawasan komuniti di bandar. Usaha ini dijalankan dengan kerjasama Pihak Berkuasa Tempatan (PBT).

Sejak pelaksanaan Program Pertanian Bandar / Program Pembangunan Pertanian Komuniti pada tahun 2014 sehingga 2022, seramai 212,263 orang melibatkan 65,722 individu, 56,700 komuniti, 62,607 sekolah dan 27,234 institusi telah mendapat manfaat.

Latihan dan kursus teknikal khas diberikan seperti aspek penanaman, aspek penyelenggaraan dan penjagaan dari serangan penyakit dan perosak tanaman juga diambil kira. Juga kursus penghasilan kompos dari sisa dapur dan sisa tanaman, penghasilan produk hiliran pertanian dan juga kaedah pemasaran produk hasilan kebun komuniti mereka.

Bagi memastikan Projek Pembangunan Pertanian Komuniti dilaksanakan dengan jayanya, Pihak Kementerian Pertanian Dan Keterjaminan Makanan (KPKM) melalui Jabatan / Agensi di bawah naungannya akan memberikan bimbingan/ khidmat nasihat/ kursus/ penerangan secara langsung kepada penduduk komuniti PPR terlibat supaya mereka mendapat informasi melalui latihan teknikal secara teori dan amali supaya penduduk komuniti PPR mahir dalam menguruskan kebun komuniti mereka.

Di bawah Program Pembangunan Pertanian Komuniti pihak Kementerian menyediakan bantuan/insentif kepada peserta seperti:

1. Bahan input (baja, biji benih, media tanaman – tanah campuran, sabut kelapa, peatmoss);
2. Peralatan kecil pertanian (planter box, *Raised Bed*, pasu panjang, Mesin pembuatan kompos dan peralatan kecil-gardening tools, cangkul, secateurs dll); dan

3. Teknologi tanaman tanpa tanah – Hidroponik (Sistem Fertigasi titis, sistem *Nutrient Film Technique* (NFT), sistem *Deep Flow Technique* DFT menggunakan Solar Panel.

Melihat kepada sambutan yang sangat memberangsangkan daripada masyarakat, Program Kebun Komuniti Malaysia (KeKMa) akan dilaksanakan bermula tahun 2023 sehingga 2025 dengan perluasan aktiviti tidak tertumpu kepada tanaman sahaja tetapi diperluaskan kepada ternakan dan akuakultur mengikut kesesuaian lokaliti dengan tumpuan kepada golongan muda melibatkan peruntukan sebanyak RM 30 juta. Program ini tidak lagi tertumpu kepada sara diri tetapi diperluaskan kepada pemasaran langsung antara komuniti dengan komuniti melalui rangkaian yang diwujudkan dikalangan komuniti.

Sekian, terima kasih.

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : DATO' SERI DR. WAN AZIZAH WAN ISMAIL
[BANDAR TUN RAZAK]**

SOALAN

Dato' Seri Dr. Wan Azizah Wan Ismail [Bandar Tun Razak] minta **MENTERI KOMUNIKASI DAN DIGITAL** menyatakan terdapat 873 Pusat Internet Komuniti di seluruh Malaysia, apakah langkah yang diambil untuk mengoptimumkan penggunaan pusat ini untuk warga wilayah.

JAWAPAN

Tuan Yang di-Pertua,

Pusat Internet Komuniti (PIK) telah ditransformasikan sebagai Pusat Ekonomi Digital Keluarga Malaysia (PEDi) sejak tahun 2021. Setakat 31 Januari 2023, terdapat sebanyak 911 Pusat Ekonomi Digital (PEDi) telah ditubuhkan dan sedang beroperasi di seluruh negara. Dalam usaha Kerajaan melalui Suruhanjaya Komunikasi dan Multimedia Malaysia (SKMM) mengoptimumkan penggunaan PEDi, terdapat pelbagai program dan latihan yang dijalankan, antaranya adalah:

- (i) Latihan ICT dan Multimedia;
- (ii) Program Pemerkasaan Pendigitalan Usahawan Kecil (PUPUK);
- (iii) Latihan *Science, Technology, Engineering and Mathematics (STEM)* dan *Internet of Things (IoT)*;
- (iv) E-Pembelajaran;

- (v) Program Jangkauan Komuniti dan Advokasi; dan
- (vi) Program Peluang Pekerjaan.

Selain perkhidmatan internet, penggunaan komputer dan lain-lain perkakasan ICT, PEDi juga menawarkan pelbagai perkhidmatan tambahan seperti bayaran tanpa tunai, Pusat Pungutan dan Serahan (PUDO). Setakat Disember tahun 2022, sebanyak 46,283 penyertaan bagi pelbagai program dan latihan yang dikendalikan oleh 21 buah PEDi di Wilayah Persekutuan Kuala Lumpur seperti berikut:

No.	Program dan Latihan	Jumlah Penyertaan
1.	Latihan ICT dan Multimedia	18,092
2.	E-Pembelajaran	13,643
3.	Program Jangkauan Komuniti dan Advokasi	13,418
4.	Latihan Keusahawan	1,130

Ikon-Ikon Usahawan juga telah ditempatkan di setiap 21 buah PEDi tersebut yang berperanan sebagai mentor kepada usahawan setempat. Terdapat juga penempatan 10 orang Rakan Digital PEDi di 10 buah PEDi di Wilayah Persekutuan Kuala Lumpur yang dilantik untuk membantu usahawan setempat mendigitalisasikan perniagaan mereka menerusi pelbagai program yang dikelolakan berkaitan digital ekonomi.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN LISAN

**DARIPADA : DATO' SERI DR. WAN AZIZAH WAN
ISMAIL [BANDAR TUN RAZAK]**

SOALAN

DATO' SERI DR. WAN AZIZAH WAN ISMAIL [BANDAR TUN RAZAK] minta **MENTERI PEMBANGUNAN WANITA, KELUARGA DAN MASYARAKAT** menyatakan peranan PAWE di kalangan masyarakat tidak dirasai. Malaysia akan menjadi negara menua 2030 (Jabatan Perangkaan Malaysia). Apakah pelan strategik oleh Kementerian untuk menghadapi ini."

JAWAPAN

Pusat Aktiviti Warga Emas (PAWE) merupakan perkhidmatan bercorak pendampingan sosial (*reaching out*) dan pembangunan (*developmental*) yang mensasarkan kepada warga emas yang sihat serta dapat menguruskan diri.

Kerajaan telah memperuntukkan sebanyak RM17 juta untuk penubuhan PAWE baharu mulai tahun 2018 di bawah Rancangan Malaysia Ke-11. Sehingga Disember 2022, terdapat 161 buah PAWE yang telah ditubuhkan dan beroperasi, meliputi 146 kawasan parlimen di seluruh negara. Seramai 52,753 orang ahli berdaftar yang terdiri daripada warga emas pelbagai bangsa dan agama telah terlibat secara aktif di PAWE terlibat.

Kerajaan menyasarkan menjelang tahun 2030, Malaysia akan mempunyai sekurang-kurangnya sebuah PAWE di setiap parlimen iaitu sebanyak 222 kawasan parlimen keseluruhannya. Kerajaan benar-benar ingin memastikan agenda ke arah penuaan sihat, aktif dan produktif dapat

terus dilaksanakan dan ini adalah selari dengan Dasar Warga Emas Negara dan Pelan Tindakan Warga Emas Negara 2011.

Kerajaan melalui KPWK M telah merangka dan melaksanakan pelbagai inisiatif memperkasakan program dan aktiviti di PAWE dengan membentuk perancangan program yang lebih berstruktur berdasarkan dimensi penuaan di dalam Dasar Warga Emas Negara (DWEN) iaitu penuaan aktif, penuaan positif, penuaan sihat, penuaan produktif dan penuaan menyokong agar keseimbangan yang diterapkan dalam pelaksanaan program di PAWE dapat membantu kesejahteraan dan dinikmati oleh warga emas.

Perkara ini juga adalah selaras dengan Pelan Strategik KPWK M 2021-2025, di bawah Teras Strategik 4: Memantapkan Persekitaran Warga Emas, dan Langkah Strategik 4: Memperkasa sokongan sosial kepada warga emas ke arah penuaan aktif, di mana KPWK M menggariskan 2 program utama iaitu penubuhan PAWE baharu dan pemantapan PAWE sebagai hab perkhidmatan warga emas.

Pada tahun 2022, sebanyak 10 buah PAWE baharu telah ditubuhkan dengan peruntukan sebanyak RM1 juta dan pada tahun ini juga, JKM telah diperuntukan sebanyak RM1 juta bagi penubuhan 10 buah PAWE baharu. Penubuhan PAWE ini merupakan salah satu tindakan proaktif kementerian dalam menyediakan platform untuk warga emas terlibat dan kekal produktif dalam komuniti setempat.

Selain itu, Belanjawan 2021, kerajaan juga telah menaikkan bantuan kewangan tahunan pengendalian PAWE yang dikendalikan oleh NGO daripada RM33,330 kepada RM50,000. Ini adalah bukti komitmen dan keprihatinan kerajaan khususnya dalam menambah baik perkhidmatan kepada warga emas terutamanya di komuniti. Peningkatan ini merangkumi pertambahan kepada peruntukan program dan aktiviti PAWE serta kenaikan elaun sukarela, penyelia dan pembantu penyelia dengan mengambil kira gaji minimum yang telah dikuatkuasakan.

Kenaikan ini dilaksanakan bagi mendayaupayakan badan bukan kerajaan (NGO) serta komuniti dalam memperkasakan PAWE melaksanakan pelbagai program dan aktiviti dalam komuniti.

Sebanyak RM7.65 juta telah diperuntukkan pada tahun 2022 bagi tujuan kelangsungan operasi di 153 buah PAWE sedia ada dan peruntukan ini diteruskan pada tahun 2023 kepada 161 buah PAWE keseluruhannya. Terkini keahlian warga emas yang berdaftar adalah seramai 52,753 orang warga emas terdiri daripada ahli komuniti tersebut termasuk juga golongan pesara.

Bagi memperkasakan fungsi PAWE sebagai suatu tempat bagi penuaan aktif dan produktif sebagai persediaan ke arah Negara Tua 2030, PAWE disasarkan untuk menjadi hab atau pusat rujukan setempat bagi warga emas dengan sasaran 2 projek rintis tahun 2021 dan 2 PAWE sebagai hab perkhidmatan warga emas setiap tahun dari 2022 sehingga tahun 2025.

Sehingga kini terdapat 4 buah PAWE hab perkhidmatan warga emas. Sebagai projek rintis, pada tahun 2021, PAWE di Universiti Kebangsaan Malaysia (UKM) dan PAWE di Universiti Islam Malaysia (UIA) telah diperkasakan fungsinya menjadi hab pembelajaran sepanjang hayat. PAWE UKM menfokuskan kepada kesihatan warga emas, manakala PAWE di UIA memfokuskan kepada pengajian Islam. Pada tahun 2022, PAWE MyAgeing, Negeri Sembilan telah dipilih sebagai Hab Penjagaan Warga Emas; dan PAWE Putrajaya sebagai Hab Digital Warga Emas.

Oleh itu, bagi pihak kementerian, usaha untuk memantapkan peranan aktif PAWE dalam komuniti sebenarnya sangat memerlukan komitmen pertubuhan, komuniti dan kerjasama pelbagai pihak dari semua peringkat.

**PEMBERITAHUAN PERTANYAAN DEWAN RAKYAT
MESYUARAT PERTAMA PENGGAL KEDUA
PARLIMEN KELIMA BELAS**

PERTANYAAN : BUKAN JAWAB LISAN

**DARIPADA : YB DATO' SERI DR. WAN AZIZAH WAN
ISMAIL [BANDAR TUN RAZAK]**

SOALAN

Minta **PERDANA MENTERI** menyatakan :

- (a) cerun telah menimbulkan bencana dan mengakibatkan kehilangan nyawa. Apakah langkah pencegahan cerun diambil Agensi Pengurusan Bencana Negara (NADMA); dan
- (b) apakah analisis keberkesanan untuk bencana pada masa hadapan dan pemantauan secara rutin di tapak, pemeriksaan oleh pihak berkuasa tempatan.

JAWAPAN

Tuan Yang di-Pertua,

- (a) Kegagalan cerun merupakan salah satu kejadian bencana yang sering berlaku di Malaysia, bahkan ia merupakan kejadian bencana geologi yang mencatatkan kadar kematian paling tinggi, terkini kejadian tanah runtuh di Tapak Perkhemahan *Father's Organic Farm*, Batang Kali pada 16 Disember 2022 yang lalu merekodkan 31 kematian.

Aspek pencegahan kegagalan cerun yang dilaksanakan oleh Agensi Pengurusan Bencana Negara (NADMA) ialah melalui arusperdana inisiatif pengurangan risiko bencana dengan memastikan pencegahan dan mitigasi, kesiapsiagaan dan tindak balas bencana dan pemulihan semula yang lebih baik selepas bencana.

Pendekatan pencegahan dan pengurangan risiko bencana tanah runtuh selari dengan keutamaan untuk

- (i) memahami risiko bencana melalui maklumat pemetaan kawasan bahaya dan risiko cerun yang dibangunkan oleh Agensi berkaitan seperti Jabatan Mineral dan Geosains (JMG) untuk cerun semulajadi dan Jabatan Kerja Raya (JKR) untuk cerun-cerun jalan, seterusnya merancang intervensi yang perlu untuk cerun-cerun kritikal yang berpotensi mencetuskan bencana;
- (ii) meningkatkan pelaburan dalam pengurangan risiko bencana tanah runtuh melalui mitigasi berstruktur dan tidak berstruktur seperti pembaikan dan *retrofit* cerun-cerun kritikal contohnya di Cameron Highlands, pendekatan mitigasi berasaskan semulajadi (*nature-based solution*) melalui penanaman pokok untuk pengukuhan tebing seperti di Kundasang, menjalankan instalasi sistem ramalan awal (*Early Warning System*) di

kawasan berisiko seperti di Gunung Pas, Simpang Pulau dan kawasan aliran puing di Yan, Kedah. Pendekatan mitigasi tidak berstruktur seperti pengukuhan perundangan dan garis panduan, pemerksaan kapasiti pengurus bencana dan juga komuniti yang menetap di kawasan berisiko tanah runtuh.

Dalam konteks tadbir urus pengurusan cerun dan tanah runtuh, di bawah Pelan Induk Cerun Negara 2009-2023, Jawatankuasa Antara Agensi Kerajaan Bagi Pengurusan Cerun, kelolaan JKR adalah Jawatankuasa Induk yang bertanggungjawab dalam menjalankan pengurusan risiko bencana tanah runtuh. Melalui 5 Jawatankuasa Kerja yang dibentuk, inisiatif Pemetaan Bahaya dan Risiko Cerun, Pendidikan dan Kesedaran, Dasar dan Perundangan, Kesiapsiagaan dan Pemulihan Bencana serta Kajian dan Penyelidikan dilaksanakan oleh pelbagai agensi termasuk NADMA, yang menerajui Kumpulan Kerja Kesiapsiagaan Menghadapi dan Pemulihan Bencana. Jawatankuasa ini secara berkala dan berdasarkan keperluan, akan melaporkan ke Jawatankuasa Pengurusan Bencana Pusat untuk apa jua pertimbangan dan pemakluman berkaitan pengurusan cerun.

- (b) Analisis keberkesanan pengurusan bencana di masa hadapan dilaksanakan melalui beberapa kaedah, merangkumi pemantauan dan pengukuran pengurangan risiko bencana berdasarkan indikator seperti penurunan bilangan kematian, pengurangan bilangan mereka yang terjejas bencana, pengurangan kerugian ekonomi dan penurunan kadar gangguan kepada kemudahan asas.

Di lapangan, agensi yang bertanggungjawab dan pihak berkuasa tempatan mengaplikasikan kaedah pemantauan secara serantau menggunakan kaedah penderiaan jauh seperti perbandingan data satelit dan imej foto udara; dan pemeriksaan di lapangan (*on-site inspection*). Berdasarkan pemetaan dan inventori cerun yang disediakan, pemeriksaan

cerun secara rutin di lapangan dijalankan sekurangnya 1 kali setahun oleh Pihak Berkuasa Tempatan contohnya Majlis Perbandaran Ampang Jaya untuk melihat tanda-tanda kegagalan cerun seperti regim aliran air, perubahan kepada struktur fizikal seperti longkang, jalan dan lain-lain struktur, retakan atau perubahan kepada tumbuhan dan sebagainya .

Penduduk setempat juga banyak dilibatkan dan didedahkan untuk membuat pemantauan sendiri di kawasan masing-masing dan melaporkan kepada Pihak Berkuasa dengan segera sekiranya terdapat tanda-tanda kegagalan cerun

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATO' SERI DR. WAN AZIZAH WAN ISMAIL
[BANDAR TUN RAZAK]**

SOALAN

DATO' SERI DR. WAN AZIZAH WAN ISMAIL [BANDAR TUN RAZAK] minta **MENTERI EKONOMI** menyatakan langkah Kementerian dalam menangani isu miskin bandar yang semakin ketara dalam kalangan penduduk bandar. Minta dikaji semula kriteria kelayakan pemohon e-Kasih sedia ada dan menjalankan bancian/semakan semula kategori miskin tegar.

JAWAPAN

Tuan Yang di-Pertua,

Agenda pembasmian kemiskinan dan pembangunan inklusif sentiasa menjadi tonggak penting dalam dasar pembangunan sosioekonomi negara. Ini dilaksanakan melalui penekanan kepada pertumbuhan dengan ekuiti serta berasaskan keperluan. Malaysia telah menangani kemiskinan dengan ketara dan merapatkan jurang ketidaksamarataan dalam kalangan rakyat, tanpa mengira jantina, etnik, status ekonomi dan lokasi. Walau bagaimanapun, kemiskinan masih wujud dalam kelompok tertentu di bandar dan luar bandar.

Pandemik COVID-19 telah memberi kesan kepada kehidupan isi rumah mudah terjejas dan memberikan impak kepada usaha sedia ada dalam mengurangkan kemiskinan dan ketidaksamarataan. Malaysia menyaksikan insiden kemiskinan meningkat kepada 8.4% pada tahun 2020 daripada 5.6% pada tahun 2019. Pekali Gini pula telah melebar kepada 0.411 daripada 0.407 dalam tempoh yang sama.

Rancangan Malaysia Kedua Belas, 2021 – 2025 (RMKe-12) menggariskan beberapa strategi jangka sederhana dan panjang untuk menangani kemiskinan khususnya untuk isi rumah miskin bandar. Ini termasuklah meningkatkan pendapatan dan meningkatkan taraf hidup golongan miskin bandar, peningkatan akses kepada sokongan sosial seperti pendidikan dan kesihatan bagi mengekalkan tahap kualiti hidup tertentu serta meningkatkan kesejahteraan isi rumah miskin bandar.

Dalam tempoh RMKe-12 (2021 – 2022), bilangan projek fasiliti kesihatan dan perumahan di bandar yang diluluskan adalah seperti berikut:

- i. Program Bina Baharu Rumah di Bandar dengan kos RM125 juta;
- ii. Program Baik Pulih Rumah di Bandar dengan kos RM6 juta;
- iii. Tabung Penyelenggaraan Perumahan Malaysia (TPPM) dengan kos RM252 juta – bantuan penyelenggaraan

- perumahan berstrata kos rendah dan sederhana rendah swasta;
- iv. Program Penyenggaraan Perumahan (PPP) dengan kos RM250 juta – bantuan penyenggaraan perumahan berstrata kos rendah dan sederhana awam;
 - v. Hospital sebanyak 2 unit dengan kos keseluruhan sebanyak RM838.1 juta;
 - vi. Klinik Kesihatan sebanyak 12 unit dengan kos keseluruhan sebanyak RM458.3 juta; dan
 - vii. Kerja penyelenggaraan dan naik taraf di 21 hospital di bandar dengan kos keseluruhan sebanyak RM279.1 juta.

YAB Perdana Menteri semasa ucapan Belanjawan 2023 pada 24 Februari 2023, telah mengumumkan langkah-langkah berikut bagi menangani kemiskinan dan meningkatkan kesejahteraan rakyat termasuk:

- viii. Sumbangan Tunai Rahmah kepada hampir 9 juta penerima dengan peruntukan disediakan hampir RM8 bilion;
- ix. Bantuan bulanan Jabatan Kebajikan Masyarakat (JKM) kepada 400,000 golongan yang mudah terjejas termasuk kanak-kanak, warga emas dan orang kurang upaya;
- x. Projek program-program membasmi kemiskinan termasuk program bina baharu rumah dan perumahan rakyat di bandar berjumlah RM3.9 billion;
- xi. Subsidi, bantuan serta insentif bagi mengurangkan beban kos sara sebanyak RM64 billion serta pelaksanaan konsep Payung Rahmah; dan
- xii. Pakej Perpaduan Prabayar Internet Mudah Alih dan Pakej Perpaduan Jalur Lebar.

Kerajaan melalui Kementerian Ekonomi sedang melaksanakan Inisiatif Pendapatan Rakyat (IPR) yang akan menumpukan kepada pengupayaan golongan miskin tegar dan B40 di seluruh negara supaya meningkatkan potensi pendapatan secara mampan. Melalui Belanjawan 2023, peruntukan sejumlah RM750 juta disediakan bagi menjayakan IPR pada tahun 2023.

Program IPR akan melibatkan tiga inisiatif permulaan iaitu Inisiatif Usahawan Tani (INTAN), Inisiatif Usahawan Makanan (INSAN) dan Inisiatif Operator Perkhidmatan (IKHSAN). Program ini menyasarkan untuk peserta meraih pendapatan antara RM2,000 hingga RM2,500 sebulan dalam tempoh pemantauan 24 bulan.

Tuan Yang di-Pertua,

Kerajaan melalui DOSM juga sedang memuktamadkan dapatan Survei Pendapatan, Perbelanjaan dan Kemudahan Asas 2022 (HIES & BA 2022) melibatkan 92,000 isi rumah di seluruh negara. Pendapatan Garis Kemiskinan 2022 yang baharu akan dikemas kini bagi menentukan had pendapatan kelayakan eKasih yang akan diterbitkan bersekali dengan Laporan HIES & BA 2022 pada pertengahan tahun 2023.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN HAJI WAN HASSAN BIN MOHD RAMLI
(DUNGUN)**

SOALAN

TUAN HAJI WAN HASSAN BIN MOHD RAMLI (DUNGUN) minta **MENTERI KEMAJUAN DESA DAN WILAYAH** menyatakan adakah jalan luar bandar antara jalan Kampung Mat Daling ke Kampung Pasir Raja, Dungun telah dalam proses pembinaan dan berapakah peratusan projek tersebut berjalan.

JAWAPAN

Untuk makluman Yang Berhormat, projek pembinaan jalan dari Kampung Mat Daling, Jerantut, Pahang ke Kampung Pasir Raja, Dungun, Terengganu sepanjang 52.5 km telah diluluskan dalam RMKe-11 dan dibahagikan kepada 2 pakej kerja. Kedua-dua pakej kerja ini sedang dalam peringkat awal pembinaan.

Pakej pertama iaitu jalan dari Kampung Mat Daling ke Sempadan Pahang/Terengganu dijangka siap pada Julai 2026. Peratusan kemajuan kerja sebenar bagi pakej ini adalah 6.20% berbanding jadual 2.17%.

Manakala pakej kedua iaitu jalan dari Sempadan Pahang/Terengganu ke Kampung Pasir Raja, Hulu Dungun, Terengganu dijangka siap pada Ogos 2024. Peratusan kemajuan kerja sebenar bagi pakej ini adalah 11.39% berbanding jadual 4.83%.

Dengan siapnya kedua-dua pakej kerja ini nanti, maka kampung-kampung di sekitar kawasan Kampung Pasir Raja dan Ulu Tembeling dapat dihubungkan di samping menjadi jalan alternatif bagi penduduk dari Kuala Tahan di Jerantut, Pahang ke Hulu Dungun, Terengganu.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

SOALAN

TUAN HAJI WAN HASSAN BIN MOHD RAMLI [DUNGUN] minta
MENTERI SUMBER ASLI, ALAM SEKITAR DAN PERUBAHAN IKLIM
menyatakan:

- a) perkembangan terkini projek pemecah ombak di muara sungai Dungun, adakah ianya sudah bermula dan berapakah peratusan hasil projek sudah dijalankan; dan
- b) jelaskan tentang kedalaman yang dikorek muara Sungai Dungun bagi mengelakkan tersangkutnya bot-bot nelayan semasa paras air menurun.

JAWAPAN

Tuan Yang Di-Pertua,

1. Kementerian Sumber Asli, Alam Sekitar dan Perubahan Iklim (NRECC) melalui Jabatan Pengairan dan Saliran (JPS) sedang melaksanakan Projek Pemuliharaan Muara Sungai Dungun dengan kos berjumlah RM242.97 juta bermula pada 26 September 2022 dan dijangka siap dalam tempoh 54 bulan iaitu sehingga 25 Mac 2027.
2. Skop kerja merangkumi pengorekan alur pelayaran, pembinaan struktur pemecah ombak, pembinaan struktur dinding penahan lapis lindung pantai, pembinaan '*groin*' iaitu struktur hidraulik yang dibina secara berserenjang bagi mengurangkan kesan pukulan ombak pada pantai serta pembinaan lampu tanda arah suar. Sehingga Februari 2023 peratus kemajuan sebenar adalah 4.35%.
3. Muara Sungai Dungun yang berfungsi sebagai laluan pelayaran utama terjejas kerana mendapan sedimen sehingga menyebabkan muara menjadi cetek. Tambahan pula, beting pasir telah mengunjur seperti tanjung di beberapa kawasan di muara sungai. Dianggarkan sedimen di muara Sungai Dungun adalah sekitar 460,000 meter padu setahun. Bagi mengatasi masalah mendapan dan kecekakan muara ini, kerja-kerja pengorekan alur pelayaran di muara Sungai Dungun sehingga kedalaman lima (5) meter akan dilaksanakan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

SOALAN

TUAN HAJI WAN HASSAN BIN MOHD RAMLI [DUNGUN] minta **MENTERI PENDIDIKAN** menyatakan langkah pemantauan dan penyelenggaraan terhadap infrastruktur sekolah dan asrama serta kemudahan air, sistem kumbahan dan sebagainya di sekolah-sekolah berasrama penuh terutamanya di daerah Dungun.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk Parlimen Dungun.

Untuk makluman Ahli Yang Berhormat, KPM telah menyalurkan peruntukan penyelenggaraan di semua sekolah di Terengganu termasuk sekolah berasrama penuh sebanyak RM28 juta bagi tahun 2022.

Khusus di parlimen Dungun, sejumlah RM1.5 juta peruntukan penyelenggaraan disalurkan ke semua sekolah termasuk sekolah berasrama penuh pada tahun 2022.

KPM melalui Jabatan Pendidikan Negeri Terengganu sentiasa memantau secara berkala pelaksanaan kerja-kerja penyelenggaraan institusi pendidikan di Terengganu.

Dalam usaha menambahbaik pengurusan operasi dan penyelenggaraan sistem kumbahan di Institusi Pendidikan, KPM bekerjasama dengan pihak Jabatan Perkhidmatan Pembetungan (JPP) sebagai agensi pelaksana dan pihak Indah Water Konsortium (IWK) bagi mengoperasi dan menyelenggara loji rawatan kumbahan institusi pendidikan milik KPM. Hal ini bagi memastikan sistem kumbahan di institusi pendidikan milik KPM dapat diselenggara dengan lebih sistematik, teratur dan efisien oleh pemegang lesen perkhidmatan pembetungan yang kompeten.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA,
PARLIMEN KE-15**

**PERTANYAAN : BERTULIS
DARIPADA : TUAN HAJI WAN HASSAN BIN MOHD
RAMLI [DUNGUN]**

SOALAN

YB TUAN HAJI WAN HASSAN BIN MOHD RAMLI [DUNGUN] minta
KEMENTERIAN PERDAGANGAN ANTARABANGSA DAN INDUSTRI
menyatakan jumlah pelaburan langsung dan agihan kepada negeri-
negeri pada bermula 1 April 2022 hingga 31 Disember 2022.

JAWAPAN

Tuan Yang di-Pertua,

Jumlah keseluruhan pelaburan langsung yang diluluskan di bawah seliaan MITI / MIDA bagi tempoh April hingga September 2022 adalah bernilai RM100.5 bilion, merangkumi sektor perkilangan dan perkhidmatan. Pelaburan ini melibatkan 827 projek dan akan menjana sebanyak 42,360 peluang pekerjaan baharu. Pelaburan langsung asing kekal sebagai penyumbang utama, sebanyak RM82.0 bilion atau 81.6 peratus manakala pelaburan domestik menyumbang RM18.5 bilion atau 18.4 peratus, seperti di **Jadual 1** berikut:

Jadual 1: Jumlah Pelaburan Langsung Yang Diluluskan Dalam Tempoh April Sehingga September 2022

Sektor	April-September 2022				
	Bil. Projek	Jumlah Peluang Pekerjaan	Pelaburan Domestik (RM bilion)	Pelaburan Asing (RM bilion)	Jumlah Pelaburan (RM bilion)
Perkilangan	403	36,472	11.5	25.2	36.7
Perkhidmatan	424	5,888	7.0	56.8	63.8
Jumlah	827	42,360	18.5	82.0	100.5

Negeri-negeri utama yang menerima pelaburan langsung tertinggi di bawah seliaan MITI / MIDA bagi tempoh April-September 2022 adalah Johor (RM57.8 bilion atau 57.5%) diikuti oleh W.P. Kuala Lumpur dengan RM10.0 bilion (9.9%), Selangor (RM8.3 bilion atau 8.3%), Negeri Sembilan RM6.9 bilion (6.8%) dan Pulau Pinang dengan pelaburan sebanyak RM4.8 bilion (4.7%) seperti di **Jadual 2** berikut:

Jadual 2: Jumlah Pelaburan Langsung Yang Diluluskan Dalam Tempoh April Sehingga September 2022 Mengikut Negeri

Kedudukan	Negeri	Jumlah Pelaburan (RM juta)
1	Johor	57,788.7
2	W.P. Kuala Lumpur	9,977.8

SOALAN NO : 618

3	Selangor	8,300.3
4	Negeri Sembilan	6,861.0
5	Pulau Pinang	4,771.1
6	Sabah	3,279.0
7	Kedah	2,664.1
8	Pahang	2,514.6
9	Perak	2,083.4
10	Melaka	1,059.3
11	Sarawak	1,008.9
12	Terengganu	95.4
13	Kelantan	56.5
14	Perlis	3.9
Jumlah		100,464.0

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : YB TUAN HAJI WAN HASSAN BIN MOHD RAMLI
[DUNGUN]**

SOALAN

YB TUAN HAJI WAN HASSAN BIN MOHD RAMLI [DUNGUN] minta **MENTERI PELANCONGAN, SENI DAN BUDAYA** menyatakan rangka-rangka untuk memajukan tempat pelancongan seperti Taman Rimba Bukit Bauk, Dungun dan sekitar.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Menerusi Pelan Ekopelancongan Kebangsaan 2.0, Kementerian Pelancongan, Seni dan Budaya (MOTAC) telah mengenal pasti kluster ekopelancongan Dungun - Rantau Abang - Al-Muktafi Billah Shah - Pulau Tenggol sebagai salah satu daripada 60 kluster ekopelancongan di Malaysia yang berpotensi dibangunkan bagi merangsang ekonomi setempat. Antara tarikan utama di sekitar kluster ini adalah seperti Rantau Abang, Pantai Teluk Bidara, Pantai Dungun, Lata Cemerung dan Taman Rimba Bukit Bauk. Pelbagai aktiviti rekreasi boleh dipromosikan seperti berkelah, kembara hutan (*hiking*), berenang, berkhemah, memancing memandu ATV dan sebagainya.

2. Selain itu, MOTAC menerusi Tourism Malaysia juga sedang merancang program pembangunan pakej ekopelancongan dan pengembaraan lasak melalui bengkel dan seminar bagi mengetengahkan segmen minat khas baharu dan sedia ada yang melibatkan kawasan kluster ekopelancongan yang telah dikenalpasti dan berpotensi di bawah Pelan Ekopelancongan Kebangsaan 2.0. Antara aktiviti yang dirancang bakal melibatkan komuniti setempat dan segmen minat khas adalah Homestay Kg. Pasir Raja dan agro pelancongan, seperti Bukit Besi Agro Exotic Farm dalam usaha merancakkan ekonomi dan meningkatkan pendapatan komuniti setempat.

3. Di samping itu, bagi meningkatkan kualiti kemudahan dan perkhidmatan pelancongan, MOTAC telah memperuntukkan sebanyak RM7.66 juta untuk melaksanakan enam (6) buah projek pembangunan serta penyelenggaraan kemudahan pelancongan di Negeri Terengganu di bawah Rancangan Malaysia Kesebelas bermula dari tahun 2016 sehingga 2020.

4. Khusus bagi daerah Dungun, di bawah Rancangan Malaysia Kedua Belas Tahun 2021 dan 2022, MOTAC telah memperuntukkan sebanyak RM5.5 juta bagi projek pembangunan serta penyelenggaraan kemudahan pelancongan iaitu:

- I. Projek Pembangunan Ecotourism Pelancongan Taman Eko - Rimba Chemerong, Dungun, Terengganu (RM2.2 juta); dan
- II. Projek Peningkatan Kemudahan Pelancongan Di Muzium Permainan Rakyat, Dungun, Terengganu (RM3.3 juta).

5. Pada masa yang sama, sebanyak RM400,000 telah diperuntukkan di bawah Bajet Mengurus MOTAC Tahun 2021 dan 2022 bagi Penyelenggaraan Kemudahan Pelancongan Termasuk Pemuliharaan Dan Pemeliharaan Tapak/Bangunan Warisan Di Bawah Peruntukan Pemerkasaan Sektor Pelancongan, Kebudayaan dan Warisan dan Kerja-Kerja Pemulihan, Pemuliharaan, Ubah Suai dan Naik Taraf (PPUN) seperti berikut:

- I. Kerja-Kerja Membina Dan Menyiapkan Kemudahan Kawasan Letak Kenderaan, Tandas, Lampu Jalan Dan Wakaf Serta Kerja-Kerja Berkaitan Di Tapak Chimney, Bukit Besi, Dungun (RM200,000); dan
- II. Menaiktaraf Kawasan Sejarah Bijih Besi Di Terowong Bersejarah Bukit Tebuk, Dungun, Terengganu (RM200,000).

6. Seperti Ahli Yang Berhormat sedia maklum, Taman Rimba Bukit Bauk yang merupakan kawasan Hutan Simpan Bukit Bauk di bawah seliaan Unit Hutan Lipur, Jabatan Perhutanan Negeri Terengganu dan Pejabat Hutan Daerah Terengganu Selatan, telah dijenamakan semula kepada Taman Eko Rimba (TER) Bandar Bukit Bauk. Melalui semakan MOTAC, tiada cadangan permohonan yang dikemukakan oleh pihak Jabatan Perhutanan Negeri Terengganu untuk menaiktaraf kemudahan ini sejak tahun 2021.

7. Bagaimanapun, MOTAC sentiasa bekerjasama rapat dengan Kerajaan Negeri Terengganu, Pihak Berkuasa Tempatan dan Lembaga

NO. SOALAN : 619

Kemajuan Terengganu Tengah dalam mempertimbangkan sebarang cadangan bagi membangun atau menaiktaraf kemudahan pelancongan di kawasan Parlimen Dungun khususnya dan di Negeri Terengganu amnya untuk memastikan produk pelancongan di kawasan tersebut terus berdaya saing dan memberi faedah kepada masyarakat tempatan serta ekonomi negara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN WAN RAZALI BIN WAN NOR [KUANTAN]

SOALAN

TUAN WAN RAZALI BIN WAN NOR [KUANTAN] minta **MENTERI PERTANIAN DAN KETERJAMINAN MAKANAN** menyatakan peratusan kadar guna tanah bagi sektor pertanian, perladangan dan penternakan di seluruh negara bagi tempoh 10 tahun terakhir.

JAWAPAN

Maklumat guna tanah pertanian bagi sektor agromakanan di Semenanjung Malaysia dikemaskini setiap tiga (3) tahun dengan keluasan guna tanah bagi subsektor tanaman dan penternakan adalah seperti berikut:-

Tahun	Keluasan (Ha)	
	Tanaman¹	Penternakan²
2010	997,485.00	41,864.00
2013	849,099.00	44,184.00
2015	778,686.42	41,350.00
2018	943,706.00	47,066.00
2021	817,999.50	47,065.81

Sumber: Jabatan Pertanian, Kementerian Pertanian dan Keterjaminan Makanan

Nota:

¹ Termasuk tanaman bunga-bunga

² Termasuk akuakultur

Maklumat guna tanah untuk sektor agrikomoditi di seluruh negara adalah seperti berikut:

Tahun	Keluasan (Ha)
2010	5,910,320
2011	6,063,956
2012	6,146,186
2013	6,319,567
2014	6,495,517
2015	6,754,589
2016	6,853,274
2017	6,929,706
2018	7,001,236
2019	7,046,959
2020	7,019,796
2021	6,890,151
2022	6,825,722

Sumber: Kementerian Perlindungan dan Komoditi

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : TUAN WAN RAZALI BIN WAN NOR
[KUANTAN]**

SOALAN

YB TUAN WAN RAZALI BIN WAN NOR [KUANTAN] minta **MENTERI PEMBANGUNAN KERAJAAN TEMPATAN** menyatakan tindakan kawalan kepada pemaju perumahan agar kawasan pembinaan yang baharu tidak menjejaskan kawasan yang terdahulu dibina seperti paras tanah yang lebih tinggi hingga menimbulkan masalah seperti ketidakcekapan sistem saliran seperti air bertakung.

JAWAPAN

Tuan Yang di-Pertua,

Untuk makluman Ahli Yang Berhormat, Akta Perancangan Bandar dan Desa (Akta 172) dan Akta Jalan, Parit dan Bangunan (Akta 133) telah menggariskan bahawa Pelan Pemajuan Utama perlu diluluskan terlebih dahulu sebelum kerja-kerja pembinaan dapat dijalankan. Pelan Pemajuan Utama adalah merangkumi:

- i. Pelan Kebenaran Merancang (KM);
- ii. Pelan Jalan dan Parit (PJP);
- iii. Pelan Kerja Tanah (PKT); dan
- iv. Pelan Bangunan (PB).

Selain itu, pemohon juga hendaklah mengemukakan Laporan Cadangan Pemajuan (LCP) sebagaimana diperuntukkan di dalam Akta 172 semasa permohonan Kebenaran Merancang. Kementerian Pembangunan Kerajaan Tempatan (KPKT) juga menetapkan keperluan pematuhan antaranya perihal tanah termasuk alam sekitar dari segi fizikal, topografi, landskap, geologi, kontur, saliran, air dan tadahan air dan bentuk semula jadi di atasnya dan analisis guna tanah dan kesannya terhadap tanah bersempadan.

Agensi teknikal seperti Jabatan Kerja Raya (JKR), Jabatan Pengairan dan Saliran (JPS), Perbadanan Pengurusan Sisa Pepejal dan Pembersihan Awam (SWCorp), Jabatan Perancangan Bandar dan Desa (PLANMalaysia) serta Pihak Berkuasa Air Negeri akan melaksanakan lawatan tapak secara terperinci dan membuat ulasan bagi memastikan pelan dan dokumen yang dikemukakan mematuhi keperluan teknikal mengikut skop dan tanggungjawab setiap jabatan/ agensi tersebut.

KPKT akan sentiasa memastikan setiap perancangan pembangunan yang dilaksanakan adalah selaras dan mempunyai kesinambungan antara tapak sedia ada dengan tapak pemajuan yang akan dibangunkan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN WAN RAZALI BIN WAN NOR
[KUANTAN]**

SOALAN

TUAN WAN RAZALI BIN WAN NOR [KUANTAN] minta **MENTERI PENDIDIKAN** menyatakan kadar penguasaan bahasa Melayu (mengikut gred) di kalangan pelajar sekolah vernakular, sekolah swasta dan sekolah persendirian bagi tempoh 5 tahun terkini dan apakah usaha Kementerian bagi meningkatkan penguasaan Bahasa Melayu di kalangan pelajar sekolah tersebut.

JAWAPAN

Tuan Yang di-Pertua,

Untuk makluman Ahli Yang Berhormat, penguasaan murid dalam Bahasa Melayu boleh diukur melalui pencapaian mereka dalam Ujian Pencapaian Sekolah Rendah (UPSR) untuk murid di peringkat rendah serta Sijil Pelajaran Malaysia bagi murid di peringkat menengah.

Bermula tahun 2016, pelaksanaan UPSR adalah menggunakan format baharu selaras dengan pelaksanaan Kurikulum Standard Sekolah Rendah. Analisis keputusan mata pelajaran Bahasa Melayu UPSR SJK tahun 2016 hingga 2019 adalah seperti di Jadual 1. Manakala analisis bagi tahun 2020 dan 2021 tidak diperoleh kerana UPSR tidak dilaksanakan.

JADUAL 1

Peratus

Kod - Mata Pelajaran	Tahun	Mencapai Tahap Penguasaan Minimum					Belum Mencapai Tahap Penguasaan Minimum	Jumlah Duduki
		A	B	C	D	(A→D)	E	
021 & 031 - Bahasa Melayu-Pemahaman (SJK)	2016	15.69	24.50	23.72	25.39	89.30	10.70	101,901
	2017	16.61	22.57	26.64	24.94	90.76	9.24	100,170
	2018	17.71	24.35	23.06	24.69	89.81	10.19	98,108
	2019	14.77	24.02	24.00	26.90	89.69	10.31	99,059
022 & 032 - Bahasa Melayu-Penulisan (SJK)	2016	19.17	18.51	24.85	19.33	81.86	18.14	101,904
	2017	20.82	17.73	26.48	18.77	83.80	16.20	100,170
	2018	23.36	17.24	28.41	17.20	86.21	13.78	98,113
	2019	25.39	16.04	28.84	17.47	87.74	12.27	99,058

Bagi peperiksaan Sijil Pelajaran Malaysia (SPM), analisis keputusan mata pelajaran Bahasa Melayu adalah meliputi calon baharu yang mendaftar sekurang-kurangnya enam mata pelajaran. Analisis keputusan mata pelajaran Bahasa Melayu SPM bagi sekolah swasta dan sekolah persendirian tahun 2017 hingga 2021 adalah seperti di Jadual 2.

JADUAL 2

SIJIL PELAJARAN MALAYSIA (SPM) TAHUN 2017-2021

ANALISIS MATA PELAJARAN DAN GRED PURATA MATA PELAJARAN (GPMP) BAHASA MELAYU
PERINGKAT NASIONAL

i. Calon Baharu Sekolah Swasta yang Mendaftar Sekurang-kurangnya Enam Mata Pelajaran

Tahun	Peratusan Calon					Bil. Duduki	GPMP
	Cemerlang A+, A, A-	Kepujian B+, B, C+, C	Lulus DE	A+→E	Gagal G		
2017	20.8	49.3	23.0	93.0	7.0	14,716	4.78
2018	20.4	50.5	23.0	93.9	6.1	13,867	4.79
2019	20.0	53.0	22.2	95.2	4.8	14,043	4.68
2020	17.9	54.6	22.6	95.0	5.0	12,854	4.82

Tahun	Peratusan Calon					Bil. Duduki	GPMP
	Cemerlang A+, A, A-	Kepujian B+, B, C+, C	Lulus DE	A+→E	Gagal G		
2021*	22.8	51.7	22.8	97.3	2.7	13,098	4.51

*Format pentaksiran baharu mulai tahun 2021 berdasarkan KSSM

ii. Calon Baharu Persendirian yang Mendaftar Sekurang-kurangnya Enam Mata Pelajaran

Tahun	Peratusan Calon					Bil. Duduki	GPMP
	Cemerlang A+, A, A-	Kepujian B+, B, C+, C	Lulus DE	A+→E	Gagal G		
2020	8.9	53.7	30.2	92.8	7.2	8,086	5.52
2019	7.8	47.0	35.0	89.9	10.1	8,852	5.79
2018	7.9	44.2	35.3	87.4	12.6	7,166	5.95
2017	11.2	39.4	34.6	85.2	14.8	6,883	5.87

Tahun	Peratusan Calon					Bil. Duduki	GPMP
	Cemerlang A+, A, A-	Kepujian B+, B, C+, C	Lulus DE	A+→E	Gagal G		
2021*	16.7	56.7	23.8	97.2	2.8	7,043	4.78

*Format pentaksiran baharu mulai tahun 2021 berdasarkan KSSM

Pelbagai usaha yang dilakukan oleh KPM bagi meningkatkan penguasaan bahasa Melayu dalam kalangan murid sekolah. Antara usaha tersebut iaitu:

- i. melaksanakan Program Literasi dan Numerasi (PLaN) yang melibatkan murid Tahap 1 (Tahun 1 hingga Tahun 3) di semua sekolah;
- ii. mengadakan program Bantu Membaca yang melibatkan murid yang belum menguasai asas membaca. Program ini dilaksanakan secara kolaboratif pelatih IPG yang menjalani latihan praktikum di sekolah yang terlibat, pelibatan pelajar Matrikulasi dan pelajar sekolah berasrama penuh yang bersama-sama membantu murid menguasai asas literasi. Program ini dilaksanakan selama tiga bulan bermula 7 September 2022 hingga 30 November 2022;
- iii. mengadakan program intervensi yang bersesuaian di sekolah masing-masing bagi menangani murid yang belum menguasai asas membaca pada tahun 1;
- iv. melaksanakan aktiviti kokurikulum seperti Program Interaktif Bahasa Melayu (PiKBM) dalam usaha meningkatkan penguasaan bahasa murid di luar kelas; dan
- v. melaksanakan program berfokus secara kolaboratif dengan pihak NGO dalam usaha meningkatkan pedagogi dan penguasaan guru bahasa Melayu di SJK.

Bagi sekolah swasta dan persendirian, KPM memberi autoriti kepada pihak pengurusan sekolah tersebut untuk memastikan penguasaan bahasa Melayu dalam kalangan murid ditingkatkan melalui aktiviti kebahasaan yang diadakan secara berkala di peringkat sekolah masing-masing.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : TUAN WAN RAZALI BIN WAN NOR
[KUANTAN]**

SOALAN

YB TUAN WAN RAZALI BIN WAN NOR [KUANTAN] minta **MENTERI PEMBANGUNAN KERAJAAN TEMPATAN** menyatakan syarat-syarat pemilikan rumah kediaman bagi bukan warganegara Malaysia dan jumlah unit kediaman mengikut kelas yang dibeli dan dimiliki oleh bukan warganegara Malaysia daripada tahun 2015 hingga 2022.

JAWAPAN

Tuan Yang di-Pertua,

Untuk makluman Ahli Yang Berhormat, syarat-syarat pemilikan termasuk penetapan kuota dan harga jualan rumah kediaman bagi bukan warganegara Malaysia adalah ditetapkan oleh pihak berkuasa negeri masing-masing. Berdasarkan data daripada Jabatan Penilaian dan Perkhidmatan Harta, Transaksi Pindahmilik Harta Tanah Kediaman (Bukan Warganegara) Mengikut Negeri Utama bagi tahun 2018-2021 adalah seperti berikut:

Bil	NEGERI	TRANSAKSI PINDAHMILIK HARTA TANAH KEDIAMAN (BUKAN WARGANEGARA) (TRANSAKSI)			
		2018	2019	2020	2021
1	Johor	147	106	111	52
2	Pulau Pinang	106	85	73	49
3	Selangor	31	43	34	28
4	W.P. Kuala Lumpur	505	438	397	369

Sumber: Jabatan Penilaian dan Perkhidmatan Harta

***Data transaksi di atas adalah TIDAK TERMASUK penjualan harta tanah daripada pemaju di pasaran primer yang hakmilik individu/hakmilik strata belum dikeluarkan.**

Penetapan bagi penjualan samada kepada warganegara atau warga asing seperti juga kuota Bumiputera atau harga jualan kepada warga asing adalah di bawah bidang kuasa Kerajaan Negeri.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : YB TUAN RAZALI BIN WAN NOR
[KUANTAN]**

SOALAN

TUAN WAN RAZALI BIN WAN NOR [KUANTAN] minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah kes keganasan rumah tangga yang berpunca daripada aktiviti perjudian bagi tempoh lima (5) tahun terkini dan apakah tindakan yang telah dilakukan oleh pihak kementerian bagi menangani dan mengurangkan kes berkenaan.

JAWAPAN

Jumlah keseluruhan kes keganasan rumah tangga yang direkodkan oleh Polis Diraja Malaysia (PDRM) dari tahun 2018 hingga 2022 adalah sebanyak 30,346 kes mengikut pecahan berikut:

TAHUN	JUMLAH KES
2018	5,421
2019	5,657
2020	5,260
2021	7,468
2022	6,540
JUMLAH	30,346

Berdasarkan data tersebut, antara punca utama kes keganasan rumah tangga adalah penyalahgunaan dadah, selisih faham dan masalah kewangan. Tiada data berkaitan aktiviti perjudian direkodkan oleh PDRM sebagai salah satu punca berlakunya keganasan rumah tangga sepanjang tempoh tersebut. Namun demikian, mengikut data Jabatan Kebajikan Masyarakat (JKM), terdapat sebanyak 36 kes berpunca daripada aktiviti perjudian daripada 4,134 kes yang dilaporkan dari tahun 2018 hingga 2022.

Selaras dengan peruntukan di bawah Akta Keganasan Rumah Tangga 1994 [Akta 521], Kementerian Pembangunan Wanita, Keluarga dan Masyarakat (KPWKM) sentiasa memandang serius terhadap isu keganasan rumah tangga. Bagi menangani serta mengurangkan kes keganasan rumah tangga dalam kalangan masyarakat, pelbagai inisiatif telah dan dilaksanakan secara berterusan oleh kementerian khususnya menerusi Jawatankuasa Menangani Keganasan Rumah Tangga seperti berikut:

- a) **memperluaskan pelaksanaan program advokasi** berkaitan keganasan rumah tangga untuk meningkatkan tahap kesedaran serta pemahaman dalam kalangan masyarakat mengenai isu, hak, perkhidmatan dan tindakan yang boleh diambil berkaitan keganasan rumah tangga;
- b) **memperbanyakkan program kekeluargaan dan keibubapaan** bagi menerapkan elemen bertanggungjawab dan saling menghormati antara satu sama lain untuk kesejahteraan institusi keluarga;
- c) **menerapkan elemen keganasan rumah tangga dalam program sedia ada** di bawah agensi kerajaan seperti kekeluargaan, keibubapaan, keagamaan, kursus pra perkahwinan dan sebagainya;
- d) **melipatganda usaha mempromosikan perkhidmatan aduan atas talian melalui Talian Kasih 15999 dan aplikasi *WhatsApp* 019-26 15999** yang beroperasi 24 jam setiap hari sebagai *single point of contact* untuk mengemukakan aduan, mendapatkan khidmat nasihat serta mengakses bantuan dan sokongan yang disediakan oleh KPWKM termasuk perkhidmatan psiko-sosial;
- e) **menyediakan khidmat psiko-sosial, kaunseling dan nasihat** yang boleh diakses oleh mangsa atau mana-mana individu yang memerlukan menerusi Talian Kasih 15999, Lembaga Penduduk dan Pembangunan Keluarga (LPPKN), Pusat Sokongan Sosial Setempat (PSSS) dan lain-lain;
- f) **mempergiatkan Skuad Wanita Anti Jenayah (WAJA)** untuk melaksanakan program bimbingan psikososial dalam komuniti yang meliputi bimbingan, nasihat dan rujukan kepada pihak-pihak berkaitan merangkumi advokasi mengenai keselamatan dan perlindungan di peringkat komuniti khususnya dalam kalangan wanita. Sehingga 31 Disember 2022, terdapat seramai 328,558 orang ahli telah didaftarkan di bawah Skuad WAJA; dan
- g) **memperbanyakkan program kemahiran, keusahawanan dan penjagaan khususnya untuk golongan wanita** bagi memperkasa

mereka selain membantu menjana pendapatan dan kelangsungan hidup;

- h) **menggunakan Pusat Sokongan Sosial Setempat (PSSS)** di bawah KPWKM sebagai pusat rujukan khusus untuk mengemukakan pertanyaan atau aduan, memperoleh maklumat dan nasihat, mendapatkan perkhidmatan segera seperti kaunseling serta transit sementara. Sehingga 31 Januari 2023, sebanyak tiga (2) buah PSSS tetap (fizikal) telah ditubuhkan di negeri Kuala Lumpur dan Kelantan manakala sebanyak tujuh (9) buah PSSS bergerak disediakan di zon tengah, zon utara, selatan, timur, Sabah dan Sarawak;
- i) **menyediakan Pusat Transit Sementara di masjid** yang telah dikenal pasti bagi mangsa keganasan rumah tangga. Sehingga 31 Januari 2023, tiga (4) buah masjid iaitu Masjid Wilayah Persekutuan, Masjid Al Ghufuran Pinggiran Taman Tun Dr. Ismail, Masjid Alwi dan Masjid Oran Mata Ayer di Perlis telah dijadikan sebagai Masjid Pusat Transit manakala 12 buah masjid lagi digunakan sebagai pusat aduan bagi kes keganasan rumah tangga;
- j) **memastikan perkhidmatan perlindungan iaitu penyediaan Tempat Selamat atau Rumah Perlindungan serta pengeluaran Perintah Perlindungan Kecemasan (EPO)** sentiasa dapat diakses oleh mangsa. Sehingga 31 Januari 2023, terdapat sebanyak 44 buah Tempat Selamat di seluruh negara yang dikendalikan oleh kerajaan dan Badan Bukan Kerajaan (NGO); dan
- k) **menambah baik prosedur kerja** bagi memastikan kes keganasan rumah tangga dapat dikendalikan secara bersistematik dan berkesan.

Kementerian ini akan terus komited dalam usaha untuk menangani dan mengurangkan kes keganasan rumah tangga secara bersepadu dengan kerjasama agensi kerajaan dan NGO untuk kesejahteraan sesebuah institusi keluarga dan pembangunan masyarakat.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK WAN SAIFULRUDDIN BIN WAN JAN
[TASEK GELUGOR]**

SOALAN

DATUK WAN SAIFULRUDDIN BIN WAN JAN [TASEK GELUGOR] minta **PERDANA MENTERI** menyatakan status tindakan Kerajaan dan pelan perlaksanaan cadangan-cadangan dalam Laporan Jawatankuasa Khas Pembaikan Sistem dan Undang-Undang Pilihan Raya (ERC) yang diserahkan kepada Kerajaan pada Ogos 2020.

JAWAPAN

**YB DATO' SRI AZALINA OTHMAN SAID,
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

Laporan Jawatankuasa Pembaikan Sistem dan Undang-Undang Pilihan Raya (ERC) yang mengandungi 49 syor akan diteliti oleh sebuah Jawatankuasa Khas Kabinet. Jawatankuasa Khas Kabinet yang ditubuhkan ini meneliti semua syor yang dikemukakan serta mengkaji kesesuaian pelaksanaannya. Ini kerana syor-syor ERC melibatkan perundangan dan bidang kuasa pelbagai kementerian. Selain itu, syor-syor itu juga memerlukan pindaan ke atas sistem pilihan raya, undang-undang, termasuklah pindaan kepada Perlembagaan Persekutuan

Sekian,

terima

kasih

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK WAN SAIFULRUDDIN BIN WAN JAN
(TASEK GELUGOR)**

SOALAN

**DATUK WAN SAIFULRUDDIN BIN WAN JAN [TASEK GELUGOR] minta
MENTERI PERTAHANAN menyatakan :**

- (a) dalam sesi Parlimen yang lalu, Kerajaan menyatakan komitmen untuk membeli pesawat F-18 C/D Hornet Kuwait, apakah status perkembangan terkini dan bilakah Kerajaan akan memulakan rundingan rasmi dengan Kuwait; dan
- (b) apa rancangan pembelian Meriam SPH Yavuz 155mm 52 Cal dari Turkiye, yang LOI telah dikeluarkan semasa pentadbiran Kerajaan lalu akan diteruskan, jika ia diteruskan bilakah perolehan tersebut dijangka dibuat.

JAWAPAN

1. Pada masa ini, cadangan perolehan pesawat tempur terpakai F/A-18 C/D Hornet dari negara Kuwait masih belum dimuktamadkan dan perkara ini melibatkan perbincangan lanjut di antara negara-negara yang berkenaan (*Government to Government*).

2. Bagi rancangan perolehan Meriam 155mm *Self Propelled Howitzer* (SPH) dari Turki pula, Kementerian Kewangan pada 16 Januari 2023 telah memutuskan bahawa cadangan perolehan SPH secara rundingan terus dibatalkan. Buat masa ini, Kementerian Pertahanan bersama Agensi Pusat sedang berbincang untuk melaksanakan perolehan peralatan ini secara *Government to Government*.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN
**DARIPADA : DATUK WAN SAIFUL WAN JAN [TASEK
GELUGOR]**

SOALAN

DATUK WAN SAIFUL WAN JAN [TASEK GELUGOR] minta **MENTERI KEWANGAN** menyatakan jumlah hasil kutipan cukai bagi tahun 2015 hingga Disember 2022 bagi produk tembakau dan minuman keras, dalam satu jadual dengan pecahan jumlah keseluruhan kutipan cukai, GST/cukai jualan, cukai import, khususnya bagi rokok putih, rokok kretek, lain-lain produk tembakau, bir malt dan lain-lain produk berakohol.

JAWAPAN

Tuan Yang di-Pertua,

Untuk makluman Ahli Yang Berhormat, jumlah keseluruhan kutipan hasil cukai daripada rokok dan produk tembakau serta produk minuman keras dari tahun 2015 hingga tahun 2022 adalah sebanyak RM45,612 bilion. Hasil cukai ini merangkumi kutipan duti import, duti eksais dan GST/cukai jualan yang dikenakan ke atas produk yang diimport atau yang dikilangkan di dalam negara.

Pecahan jumlah kutipan hasil cukai bagi kedua-dua kategori produk mengikut tahun adalah seperti di Jadual berikut:

Jadual: Kutipan Hasil Duti/Cukai Rokok Dan Minuman Keras Dari Tahun 2015 Hingga 2022

Tahun	Rokok/Tembakau (RM juta)	Minuman Keras (RM juta)	Jumlah (RM juta)
2015	3,580	1,872	5,452
2016	3,831	2,008	5,839
2017	3,441	2,108	5,549
2018	3,289	2,351	5,640
2019	3,050	2,765	5,815
2020	3,274	2,409	5,683
2021	3,469	2,255	5,724
2022	2,798	3,112	5,910
Jumlah	26,732	18,880	45,612

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATO' SRI DR. WEE JECK SENG
[TANJUNG PIAI]**

SOALAN

YB DATO' SRI DR. WEE JECK SENG [TANJUNG PIAI] minta **MENTERI PEMBANGUNAN KERAJAAN TEMPATAN** menyatakan apakah jaminan Kerajaan bagi memastikan Malaysia tidak mengalami masalah harga rumah tidak mampu milik seperti di Singapura berikutan langkah Kerajaan untuk mengambil pakar-pakar dari Housing Development Board (HDB) masuk ke dalam Kementerian.

JAWAPAN

Tuan Yang di-Pertua,

Untuk makluman Ahli Yang Berhormat, *Housing Development Board* (HDB) Singapura hanya dilibatkan dalam sesi perkongsian pengetahuan dan pengalaman. Sesi perkongsian pengetahuan dan libat urus bersama HDB ini telah dimulakan sejak tahun 2018 lagi melalui lawatan ke negara jiran itu untuk memahami perancangan dan penyediaan perumahan terutamanya dalam perumahan sosial. Selain itu, Kementerian Pembangunan Kerajaan Tempatan (KPKT) juga telah melaksanakan beberapa sesi perkongsian pengetahuan dengan *Ministry of Land, Infrastructure and Transport* (MOLIT) dan *Housing and Urban Guarantee Corporation* (HUG), Korea Selatan serta agensi-agensi berkaitan perumahan di Australia dalam aspek mekanisme dan polisi pemajuan perumahan swasta dan Akta Sewaan Kediaman.

Berhubung kegusaran Ahli Yang Berhormat mengenai harga rumah yang tidak mampu dimiliki pula, harga jualan rumah adalah dipengaruhi oleh beberapa faktor. Antaranya adalah kos bahan binaan, kos tanah serta caj-caj yang dikenakan oleh Pihak Berkuasa Tempatan (PBT) dan penyedia perkhidmatan utiliti. Namun, bagi memastikan harga rumah adalah terkawal, Kerajaan telah melaksanakan beberapa tindakan seperti berikut:

- (i) memperkenalkan Dasar Rumah Mampu Milik (DRMM). Melalui DRMM ini, Kerajaan telah memperkenalkan dan menetapkan siling harga Rumah Mampu Milik (RMM) pada RM300,000. Walau bagaimanapun, siling harga RMM ini turut tertakluk kepada dasar perumahan di peringkat negeri;
- (ii) melaksanakan pemetaan Indeks Rumah Mampu Milik berdasarkan pendapatan median mengikut negeri dan daerah

yang diperoleh daripada tinjauan Laporan Survei Pendapatan Isi Rumah dan Kemudahan Asas 2019. Kaedah ini mengambil kira median pendapatan rakyat mengikut lokaliti berdasarkan kaedah gandaan median (*median multiple*). Pemetaan ini bertujuan sebagai panduan kepada pemaju serta agensi penyedia perumahan bagi penetapan harga jualan rumah di satu-satu lokaliti; dan

- (iii) menggalakkan pemaju untuk melaksanakan Kajian Kebolehlaksanaan atau *Feasibility Study* sebelum sesuatu pemajuan dilaksanakan bagi memastikan rumah yang dibina adalah berdasarkan kemampuan rakyat seterusnya mengelakkan rumah tersebut tidak terjual.

KPKT akan terus giat untuk melaksanakan inisiatif demi memastikan rakyat mendapat akses terhadap perumahan yang berkualiti dan mampu dimiliki. KPKT juga memberi jaminan bahawa Kerajaan akan memastikan kepentingan semua pihak terpelihara dalam pelaksanaan agenda perumahan negara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SRI DR. WEE JECK SENG
[TANJUNG PIAI]**

SOALAN

DATO' SRI DR. WEE JECK SENG [TANJUNG PIAI] minta **MENTERI PENDIDIKAN** menyatakan langkah-langkah yang telah diambil oleh Kementerian bagi meningkatkan tahap kaedah dan gaya pengajaran guru dalam subjek berkaitan Sains, Teknologi dan Inovasi (STI).

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa cakna akan perubahan persekitaran dalam sistem pendidikan yang memerlukan guru agar kekal berkualiti bagi memastikan kemenjadian murid untuk menerajui pembangunan ekonomi dan dunia global masa hadapan.

Untuk makluman Ahli Yang Berhormat, Program Ijazah Sarjana Muda Perguruan (PISMP) menawarkan kursus pedagogi khusus dan juga kursus inovasi digital dalam pengajaran dan pembelajaran. Kursus inovasi digital memberi fokus kepada proses penjanaan idea inovasi, pelaksanaan inovasi digital pendidikan, proses pembelajaran Trialogikal, promosi dan pemasaran serta penilaian projek inovasi digital pendidikan.

KPM turut melaksanakan program pembangunan profesionalisme berterusan bagi guru dalam perkhidmatan. Ini merangkumi latihan dan bimbingan yang berterusan dalam mendukung pelaksanaan dasar pendidikan semasa termasuk meningkatkan ilmu dan kemahiran dalam aspek pendigitalan pendidikan bagi mendepani pendidikan abad ke-21.

Selain itu, KPM juga memberi sokongan kepada guru dengan bimbingan strategi pengajaran dan penghasilan inovasi STEM melalui Program Duta Guru bagi memperkasakan 4,500 guru menjadi pendidik STEM yang berkebolehan tinggi; menjadi teladan dalam meningkatkan minat dan kecekapan murid dalam pendidikan STEM dan mengukuhkan kemahiran berfikir aras tinggi mereka menjelang 2030.

Kualiti guru yang berkebolehan tinggi dalam bidang STEM amat penting bagi memenuhi keperluan pelaksanaan kaedah pembelajaran di luar bilik darjah melalui program koakademik STEM yang berunsurkan inkuiri, *edutainment* dan *fun learning* seperti Karnival STEM, *STEM Online Challenge*, *Formula 1 In Schools*, *Young STEMist Expo*, Pertandingan Robotik Kebangsaan dan Pertandingan Inovasi Sains Teknologi dan Kejuruteraan yang membolehkan murid menerokai bidang STI dengan lebih luas.

SOALAN NO : 63

KPM sentiasa memastikan usaha meningkatkan kualiti guru dalam subjek berkaitan Sains, Teknologi dan Inovasi (STI) sesuai dengan keperluan pendidikan terkini.

Sekian, terima kasih.

RT68

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SRI DR. WEE JECK SENG
[TANJUNG PIAI]**

SOALAN

Minta **MENTERI PENDIDIKAN TINGGI** menyatakan apakah terdapat langkah atau strategi Kementerian bagi mempergiatkan usaha penyelidikan dan inovasi dengan pembabitan universiti tempatan ke arah menambah baik proses penanaman dan penuaian buah sawit.

JAWAPAN

Tuan Yang di-Pertua,

1. Kementerian Pendidikan Tinggi (KPT) sentiasa mempergiatkan usaha penyelidikan dan inovasi dalam pelbagai bidang, termasuk menambah baik proses penanaman dan penuaian buah sawit.
2. Antara penyelidikan yang telah ditawarkan di bawah *Translational Research @ MOHE (TR@M)* bagi mempergiatkan usaha penyelidikan dan inovasi penanaman dan penuaian buah sawit ialah "*Field testing of Oil Palm Electrical Cutter Prototype for Several Oil Palm Plantation in Malaysia*" dengan nilai geran sebanyak RM250,000.00.
3. Projek yang dikendalikan oleh penyelidik Universiti Putra Malaysia (UPM) ini telah menghasilkan prototaip *E-Cutter* atau *electrical cutter* (pemotong buah sawit elektrik) sepenuhnya, 10 model prototaip untuk ujian lapangan oleh peneroka sawit, serta prototaip akhir yang boleh digunapakai oleh industri sawit bagi meningkatkan produktiviti penuaian hasil sawit kepada pengguna.

4. *E-Cutter* adalah suatu teknologi sabit elektrik yang mempunyai generator khas yang ringan, jimat tenaga dan mampu memetik buah kelapa sawit serta mencantas pelepah kelapa sawit sehingga ketinggian kira-kira 30 kaki berbanding kebiasaannya peladang menggunakan alat mekanikal atau manual untuk menuai buah kelapa sawit atau mencantas pelepahnya.
5. Ia dibangunkan melalui sistem yang menggabungkan *generator* elektrik dan motor. *Double Standard Generator* yang mempunyai ketumpatan kuasa tinggi digunakan sebagai generator.
6. *E-Cutter* yang beratnya kurang daripada 9kg dan digerakkan menggunakan tenaga petrol tetapi berkuasa tinggi, merupakan alat yang mudah alih untuk digunakan peladang kerana mempunyai sistem pungutan bagi meminimumkan kecederaan pada buah yang boleh menjejaskan kualiti minyak yang diproses. Justeru, inovasi ini membantu menambah baik proses penanaman dan penuaian buah sawit.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : DATO' SRI DR. WEE JECK SENG
(TANJUNG PIAI)**

SOALAN

DATO' SRI DR. WEE JECK SENG (TANJUNG PIAI) minta **MENTERI KEMAJUAN DESA DAN WILAYAH** menyatakan apakah langkah yang diambil bagi penyelenggaraan bahu jalan di jalan-jalan kampung di Parlimen Tanjung Piai supaya dalam keadaan yang baik dan kondusif untuk menjamin keselamatan pengguna jalan raya.

JAWAPAN

Tuan Yang di-Pertua,

Untuk makluman Yang Berhormat, urusan penyelenggaraan jalan adalah di bawah *Malaysian Road Record Information System* (MARRIS) yang diselia oleh Jabatan Kerja Raya (JKR) dan Pejabat Daerah. Sehubungan itu, pihak Yang Berhormat boleh mengemukakan permohonan penyelenggaraan jalan berkenaan kepada pihak JKR/ Pejabat Daerah untuk tindakan selanjutnya.

Walau bagaimanapun, sekiranya jalan kampung di kawasan Yang Berhormat memerlukan baik pulih/ naik taraf atau bina baharu, permohonan berkenaan boleh dikemukakan kepada Kementerian Kemajuan Desa dan Wilayah (KKDW) ini untuk siasatan. Permohonan akan dipertimbangkan sekiranya menepati skop projek di bawah Projek Jalan Perhubungan Desa KKDW tertakluk kepada kos dan peruntukan yang diluluskan oleh agensi pusat.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATO' SRI DR. WEE JECK SENG
[TANJUNG PIAI]**

SOALAN

YB DATO' SRI DR. WEE JECK SENG [TANJUNG PIAI] minta **MENTERI PEMBANGUNAN KERAJAAN TEMPATAN** menyatakan adakah Kementerian merancang untuk mengadakan kerjasama yang lebih baik dengan pihak berkuasa tempatan bagi mencegah kejadian tanah runtuh melalui pemantauan yang lebih ketat dan mewajibkan laporan penilaian impak alam sekitar (EIA) daripada pengusaha perniagaan atau penganjur aktiviti sebelum lesen atau kebenaran diberikan di kawasan-kawasan cerun bukit berisiko tinggi.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) sentiasa memantau permohonan yang diterima di Pihak Berkuasa Tempatan (PBT) melalui Sistem OSC 3.0 Plus dan sentiasa bekerjasama dengan PBT bagi mengatasi sebarang isu atau masalah yang timbul sama ada kesan dari bencana alam mahupun kesan sampingan sesuatu pembangunan yang dijalankan bukan hanya di kawasan cerun bahkan di semua kawasan pentadbiran PBT.

KPKT melalui Jabatan Perancangan Bandar dan Desa (PLANMalaysia) telah menyediakan Draf Garis Panduan Perancangan (GPP) Tapak Perkhemahan. Draf GPP ini dijangka dapat dimuktamadkan pada akhir April 2023 setelah mengambil kira pandangan dan maklum balas daripada pelbagai agensi berkaitan, PBT dan pemain industri (pengusaha tapak perkhemahan).

GPP ini memberi fokus kepada aktiviti perkhemahan jenis asas (juga disebut *primitive camping* atau *backcountry camping*) iaitu perkhemahan yang menggunakan khemah yang didirikan di kawasan semula jadi dengan kemudahan asas yang minimum berserta kelengkapan, peralatan dan makanan yang perlu dibawa sendiri oleh peserta.

Antara aspek penting berkaitan perancangan dan kawalan kesesuaian tapak perkemahan yang digariskan adalah seperti berikut :

- (i) kesesuaian cadangan lokasi tapak perkhemahan yang dibenarkan di kawasan gunung dan berbukit, tepian laut dan sungai, kawasan hutan, kawasan berisiko bencana semula jadi serta kawasan sensitif alam sekitar (KSAS) yang lain;
- (ii) keselamatan tapak dengan menentukan jarak yang sesuai dari kawasan larangan dan sensitif alam sekitar, keadaan topografi dan tahap kecerunan yang sesuai dan struktur kekuatan tanah;

SOALAN NO : 632

- (iii) keperluan dan kesesuaian akses laluan keluar-masuk ke tapak perkhemahan;
- (iv) keperluan kemudahan dan infrastruktur asas seperti sistem perparitan, bekalan air, elektrik, pembentungan, pengurusan sisa pepejal, kemudahan letak kenderaan, pejabat pengurusan, tempat berkumpul, tempat rawatan awal, tandas, tempat memasak, surau dan sebagainya; dan
- (v) pengurusan dan operasi tapak perkhemahan meliputi daftar masuk, taklimat keselamatan, keperluan kakitangan pengusaha dan pengurusan kecemasan.

Draf GPP juga menyentuh aspek berkaitan pematuhan perundangan di bawah bidang kuasa PBT dan agensi berkaitan seperti kelulusan permit sementara bangunan, lesen perniagaan, permit papan tanda dan iklan, permit menjalankan aktiviti luar atau ekstrem (seperti *flying fox*) dan lain-lain.

Adalah diharapkan dengan adanya garis panduan yang disediakan, aspek-aspek berkaitan keselamatan, keselesaan dan pemuliharaan alam semula jadi dapat diberi perhatian dalam perancangan dan pembangunan tapak-tapak perkhemahan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB DATUK SERI IR. DR. WEE KA SIONG
(AYER HITAM)**

SOALAN

DATUK SERI IR. DR. WEE KA SIONG [AYER HITAM] minta **MENTERI KERJA RAYA** menyatakan status terkini projek menaik taraf laluan FT050. Bila pelebaran jalan dan pembinaan pembahagi jalan dan persimpangan Tol Ayer Hitam ke Kluang akan dilaksanakan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian ini mengambil maklum pandangan Ahli Yang Berhormat berhubung keperluan untuk menaiktaraf Jalan Persekutuan FT50 yang menghubungkan Batu Pahat - Kluang bagi meningkatkan tahap keselamatan di laluan berkenaan.

Untuk makluman Ahli Yang Berhormat, Projek Pembinaan Pembahagi Jalan Dan Pelebaran Jalan Di Laluan FT050 Jalan Batu Pahat – Ayer Hitam – Kluang dibahagikan kepada 4 Fasa iaitu Fasa 1, Fasa 2, Fasa 3A dan Fasa 3B. Pelaksanaan projek ini adalah secara berperingkat mengikut keutamaan, kelulusan agensi pusat dan keadaan kewangan semasa. Dua fasa telah pun siap sepenuhnya iaitu Fasa 1: Pelebaran Jalan FT050 Daripada Seksyen 7 (Batu Pahat Sehingga Seksyen 49 (Kluang) FT050 (Daerah Kluang) telah disiapkan pada 9 April 2004 dan Fasa 2: Membina Pusingan U Dan Median Kerb Di Jalan FT050 Daripada Seksyen 7 Sehingga Seksyen 21 (Sekolah Menengah Tun Aminah Ke Parit Sempadan) telah disiapkan pada 25 Oktober 2012.

Fasa 3A iaitu Projek Membina Median, Pusingan U Dan Kerja-Kerja Berkaitan Di Jalan Batu Pahat-Ayer Hitam –Kluang FT050 Daripada Parit Sempadan, Batu Pahat (Seksyen 21) Hingga Jambatan Merentasi Lebuhraya Plus (Seksyen 34.5) sedang dalam pembinaan. Projek ini melibatkan kos sebanyak RM 250.0 Juta dan sehingga 31 Januari 2023, kemajuan fizikal sebenar projek ini adalah 13.76% berbanding jadual 9.86%. Tarikh Milik Tapak bagi projek ini adalah pada 26 Oktober 2021 dengan tempoh pembinaan selama 36 bulan. Walaubagaimanapun, projek ini telah diberikan Lanjutan Masa (EOT) selama 366 hari disebabkan kelewatan penyerahan tanah kepada kontraktor. Projek ini dijangka akan siap sepenuhnya pada 26 Oktober 2025.

Bagi Fasa 3B: Dari Ayer Hitam Ke Kluang (Seksyen 33.8) Hingga Persimpangan Stadium Kluang (Seksyen 49.1), cadangan projek ini pernah dimohon ketika RP4, RMKe-11, namun tidak dapat dipertimbangkan pada ketika itu berdasarkan kedudukan keutamaan projek dan agihan siling peruntukan pembangunan yang terhad untuk projek baharu.

Kementerian ini akan meneliti semula cadangan projek ini apabila dimohon dalam Rolling Plan RMKe-12 yang akan datang dan akan dipertimbangkan untuk diangkat kepada Agensi Pusat untuk kelulusan, tertakluk kepada kedudukan keutamaan projek dan ketersediaan agihan peruntukan pembangunan.

Untuk makluman Ahli Yang Berhormat, Kementerian amat mengambil berat akan isu keselamatan jalan raya khususnya di Jalan Persekutuan seluruh negara. Kementerian ini melalui Program Menaiktaraf Infrastruktur Keselamatan Jalan Raya di bawah skop kerja merawat dan memperelok lokasi kerap berlaku kemalangan, akan mengenal pasti dan memperbaiki lokasi kerap berlaku kemalangan di jalan raya Persekutuan tersebut yang dikenali sebagai kawasan blackspots untuk mengurangkan kemalangan yang disebabkan oleh faktor kejuruteraan jalan.

Bagi rekod pembaikan blackspots yang telah dilaksanakan di jalan – jalan Persekutuan seluruh negara dalam RMKe-11, sebanyak 159 lokasi telah dilaksanakan pembaikan pada tahun 2017 hingga 2020. Program ini telah diteruskan pelaksanaannya dalam RMKe-12 dan telah berjaya merawat sebanyak 52 lokasi blackspots pada tahun 2021 dan 53 lokasi blackspots pada tahun 2022. Manakala pada tahun 2023 pula sebanyak 76 lokasi blackspots baru telah disasarkan untuk dibaikpulih. Pembaikan yang dilaksanakan ini adalah bersifat low cost solution with high impact (dengan izin).

Untuk makluman Ahli Yang Berhormat, bagi lokasi yang dimaksudkan

iaitu Laluan Persekutuan FT050, Jalan Batu Pahat – Air Hitam – Kluang, sebanyak 5 lokasi pembaikan blackspots yang terlibat iaitu:

- i) Tahun 2009 : Jalan Batu Pahat – Kluang (Seksyen 16);
- ii) Tahun 2012 : Jalan Batu Pahat – Kluang (Seksyen 32);
- iii) Tahun 2014 : Jalan Batu Pahat – Kluang (Seksyen 4);
- iv) Tahun 2017 : Jalan Batu Pahat – Kluang (Seksyen 44.5 – Seksyen 45);
- v) Tahun 2022 : Jalan Batu Pahat – Mersing (Seksyen 57)

Pemantauan di lokasi-lokasi yang berisiko berlaku kemalangan akan terus dilaksanakan pada setiap masa oleh pihak Kementerian dan Jabatan Kerja Raya serta di kawasan blackspots yang telah dibuat rawatan di samping mengenal pasti lokasi-lokasi baru blackspots di seluruh negara.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB DATUK SERI IR. DR. WEE KA SIONG
(AYER HITAM)**

SOALAN

DATUK SERI IR. DR. WEE KA SIONG [AYER HITAM] minta **MENTERI KERJA RAYA** menyatakan status terkini pelebaran jalan dan menaik taraf FT01 dari Kampung Desa Temu Jodoh Chaah, Segamat ke pekan Ayer Hitam memandangkan keadaan jalan sangat teruk dan membahayakan pengguna jalan raya.

JAWAPAN

Tuan Yang Di-Pertua,

Untuk makluman Ahli Yang Berhormat, cadangan menaiktaraf FT001 dari Kampung Desa Temu Jodoh, Chaah ke Ayer Hitam adalah termasuk di dalam cadangan projek Menaiktaraf Jalan Dari Gemas ke Ayer Hitam yang dirancang secara berfasa iaitu Fasa 1: Persimpangan Ayer Hitam (Sekyen 94.0) ke Sempadan Segamat (Seksyen 134.0).

Kementerian ini pernah mengangkat permohonan projek tersebut di dalam *Rolling Plan 1* (RP1), Rancangan Malaysia Kesebelas (RMKe-11). Namun demikian, permohonan tersebut tidak mendapat kelulusan daripada Agensi Pusat pada tempoh tersebut.

Kementerian ini akan meneliti semula cadangan projek ini apabila dimohon dalam *Rolling Plan* RMKe-12 yang akan datang dan akan dipertimbangkan untuk diangkat kepada Agensi Pusat untuk kelulusan, tertakluk kepada kedudukan keutamaan projek dan ketersediaan agihan peruntukan pembangunan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN BERTULIS (BERTULIS)

DARIPADA : DATUK SERI IR. DR. WEE KA SIONG

[AYER HITAM]

SOALAN

DATUK SERI IR. DR. WEE KA SIONG [Ayer Hitam] minta **MENTERI PERDAGANGAN DALAM NEGERI DAN KOS SARA HIDUP** menyatakan apakah langkah Kementerian bagi menangani kenaikan harga simen dan bahan binaan lain yang dijangka terus meningkat sehingga tahun 2025 seterusnya meningkatkan kos serta harga pembinaan dan penjualan kediaman rakyat termasuk bangunan komersial.

JAWAPAN:

Yang di-Pertua,

Kerajaan tidak mengawal harga besi dan simen sebaliknya membenarkan persaingan sihat berlaku dalam perniagaan. Ini berdasarkan faktor penawaran dan permintaan terutama sekali perubahan harga yang berlaku adalah bersifat global. Walau bagaimanapun kerajaan tetap boleh memantau dan menyiasat kenaikan harga yang berlaku bagi memastikan tiada berlaku aktiviti pencatutan iaitu mengambil keuntungan secara tidak munasabah.

Kenaikan harga bahan pembinaan ini berlaku di seluruh dunia. Selain itu, kos pengeluaran yang berlaku di pelbagai peringkat di seluruh dunia serta akibat pandemik Covid19 telah menjadikan harga berlipat kali ganda.

KPDN sering berhubung dengan Kementerian Kerja Raya, Kementerian Ekonomi, Kementerian Kewangan, Kementerian Perdagangan Antarabangsa dan Industri, CIDB, dan lain-lain agensi dalam memantau bekalan dan harga bahan binaan serta kesannya terhadap kenaikan harga kediaman dan pusat komersial.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB DATUK SERI IR. DR. WEE KA SIONG
[AYER HITAM]**

SOALAN

Datuk Seri Ir. Dr. Wee Ka Siong [Ayer Hitam] minta **MENTERI DALAM NEGERI** menyatakan status terkini Program Malaysia Rumah Keduaku (MM2H) yang sebelum ini dibekukan dan beroperasi semula pada Oktober 2021 dengan beberapa penambahbaikan dan syarat baharu kepada peserta, bagaimanakah Kerajaan memastikan Malaysia berdaya saing dalam menarik warga asing tinggal untuk jangka panjang berbanding negara jiran.

JAWAPAN

Tuan Yang Di Pertua,

Untuk makluman Ahli Yang Berhormat, jumlah permohonan baharu sejak Jabatan Imigresen Malaysia mengambilalih pelaksanaan Program MM2H pada tahun 2021 daripada Kementerian Pelancongan, Seni dan Budaya sehingga 28 Februari 2023 adalah sebanyak 1269 permohonan yang melibatkan prinsipal dan tanggungan. Statistik keseluruhan peserta Program MM2H aktif sejak program ini mula diperkenalkan pada tahun 2002 sehingga 28 Februari 2023 adalah 53,552 orang merangkumi prinsipal dan tanggungan.

Tujuan utama syarat-syarat baharu Program MM2H diperkenalkan pada tahun 2021 adalah bagi memastikan Malaysia berdaya saing dalam menarik lebih ramai warga asing yang berpendapatan tinggi, berkecukupan dan memenuhi kriteria yang ditetapkan untuk tinggal atau menetap dan berbelanja bagi suatu tempoh yang lama di Malaysia.

Syarat-syarat baharu ini adalah lebih kompetitif dan menarik serta merupakan daya tarikan kepada Program MM2H berbanding program residensi negara-negara jiran yang mengikat permohonan dengan mewajibkan satu jumlah pelaburan tertentu atau pembelian hartanah berdasarkan kadar yang ditetapkan.

Dalam hal yang sama, Kementerian ini berpandangan bahawa Malaysia perlu meneroka produk pelancongan yang baharu dan dipelbagaikan sebagai fokus utama menarik warga asing. Kementerian ini percaya bahawa Kementerian Pelancongan, Seni dan Budaya (MOTAC) mempunyai strategi pemasaran dan telah melaksanakan pelbagai usaha secara berterusan bagi mempromosikan Program MM2H di luar negara.

Kementerian ini juga terbuka dan bersedia dengan mana-mana cadangan daripada mana-mana agensi/kementerian atau GLC yang ingin bekerjasama dengan Kementerian ini untuk menawarkan insentif baharu melalui Program MM2H bagi menarik kemasukan lebih ramai peserta MM2H yang berkualiti.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : DATUK SERI IR. DR. WEE KA SIONG
[AYER HITAM]**

SOALAN

DATUK SERI IR. DR. WEE KA SIONG [AYER HITAM] minta **MENTERI EKONOMI** menyatakan perancangan Kerajaan untuk meningkatkan tahap pendapatan rakyat Malaysia berikutan dengan pelaksanaan rasionalisasi subsidi, hal ini kerana penetapan kadar gaji minimum RM1,500 tidak membawa perubahan besar kepada struktur gaji majoriti golongan pekerja Malaysia yang telah pun terbeban dengan peningkatan kos sara hidup, inflasi dan kenaikan OPR.

JAWAPAN

Tuan Yang di-Pertua,

Kerajaan akan terus mengimbangi tumpuan untuk menstrukturkan ekonomi negara dengan keperluan ekonomi rakyat berhubung pendapatan yang lebih baik dan kos sara hidup dalam merangka perancangan sosioekonomi negara. Pengumuman Kerajaan untuk merasionalisasi subsidi bukanlah membawa kepada penghapusan subsidi, tetapi memperbetulkan pemberian subdisi supaya lebih berkesan dan diagihkan kepada kumpulan yang benar-benar layak. Kerajaan komited untuk meningkatkan pendapatan dan menangani kos sara hidup untuk kesejahteraan rakyat. Bagi menangani kenaikan harga barangan dan makanan serta perkhidmatan, Kerajaan telah dan akan mengambil beberapa inisiatif bagi menangani isu-isu berkaitan.

Rancangan Malaysia Kedua Belas (RMKe-12), 2021-2025 menggariskan penekanan kepada peningkatan pendapatan dan menangani kos sara hidup terutama bagi golongan miskin dan kumpulan B40. Melalui strategi ekonomi makro, Kerajaan komited untuk meningkatkan bahagian pampasan pekerja (atau CE) dalam RMKe-12, 2021-2025. Bahagian CE disasarkan mencapai 40% kepada keluaran dalam negeri kasar (KDNK) pada tahun 2025 berbanding 34.8% pada tahun 2021. Dalam usaha untuk meningkatkan pendapatan, Kerajaan telah menetapkan kadar gaji minimum baharu sebanyak RM1,500 sebulan di seluruh negara berkuat kuasa pada 1 Mei 2022. Pengecualian diberikan ke atas majikan yang menggaji kurang daripada lima orang pekerja sehingga 1 Julai 2023.

Usaha akan dipertingkat untuk menggalakkan aktiviti ekonomi yang mempunyai nilai ditambah yang tinggi dan menarik lebih banyak pelaburan dalam industri berintensifkan pengetahuan. Ini bertujuan merangsang pewujudan pekerjaan mahir dan berpendapatan tinggi. Inisiatif untuk meningkatkan produktiviti buruh akan terus diberi penekanan melalui penerimgunaan teknologi termaju yang lebih menyeluruh serta peningkatan kemahiran dan latihan kemahiran semula tenaga kerja.

Kementerian Ekonomi akan mengambil tindakan meneliti dasar-dasar bersabit dengan gaji akan dibawa ke Majlis Tindakan Ekonomi Negara (MTEN) supaya dasar negara diselaraskan ke arah satu sasaran pertumbuhan gaji yang menyeluruh kepada semua golongan pekerja.

Di samping itu, pendapatan rakyat akan ditingkatkan melalui program-program keusahawanan, peningkatan kemahiran dan latihan kemahiran semula serta dasar perlindungan sosial yang komprehensif. Pada peringkat isi rumah, inisiatif ini termasuk menangani peningkatan kos sara hidup dan meningkatkan kuasa beli serta mengukuhkan perlindungan sosial.

Kementerian Ekonomi sedang melaksanakan Inisiatif Pendapatan Rakyat (IPR) untuk meningkatkan pendapatan miskin tegar dan B40. Sebanyak tiga inisiatif rintis telah diperkenalkan iaitu Inisiatif Usahawan

Tani (INTAN), Inisiatif Usahawan Makanan (INSAN) dan Inisiatif Operator Perkhidmatan (IKHSAN) dengan peruntukkan berjumlah RM750 juta. Inisiatif ini melibatkan kerjasama antara Kerajaan, rakyat dan rakan-rakan strategik melalui *whole-of-nation* approach merentasi ekosistem rantai nilai.

Kerajaan komited dalam membantu mengurangkan impak kenaikan kos sara hidup yang dihadapi oleh rakyat. Seperti yang diumumkan dalam Belanjawan 2023, sejumlah RM64 bilion diperuntukkan bagi subsidi, bantuan dan insentif kepada rakyat.

Kerajaan melalui Kementerian Perdagangan Dalam Negeri dan Kos Sara Hidup (KPDN) telah memutuskan agar dasar-dasar atau inisiatif-inisiatif sedia ada yang bermanfaat untuk menangani isu kenaikan harga barang diteruskan termasuk penetapan harga siling minyak masak dan penetapan harga minyak petrol RON 95 dan diesel. Di samping itu, Program Penyeragaman Harga (PPH) dilaksanakan oleh Kerajaan bagi menyeragamkan harga tujuh barangan asas yang terlibat iaitu beras putih, gula, minyak masak 1kg, tepung gandum, LPG, petrol RON95 dan diesel bagi memastikan bekalan barangan tersebut sampai kepada penduduk di kawasan luar bandar/ pedalaman Semenanjung, Sabah dan Sarawak.

KPDN juga telah memperkenalkan konsep Payung Rahmah yang merangkumi Bakul Rahmah, Jualan Rahmah, Pakej Rahmah, Kafe Rahmah dan Menu Rahmah bagi mengurangkan impak kenaikan harga barangan ini. Sebagai contoh, melalui Belanjawan 2023, Kerajaan memperuntukkan RM100 juta ringgit untuk menjayakan program Jualan Rahmah yang menawarkan barangan asas dengan harga sehingga 30% lebih murah berbanding pasaran di setiap kawasan Parlimen.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB DATUK WETROM BIN BAHANDA (KOTA
MARUDU)**

SOALAN

DATUK WETROM BIN BAHANDA [KOTA MARUDU] minta **MENTERI KERJA RAYA** menyatakan rancangan pembangunan dan naik taraf jaringan jalan raya di kawasan luar bandar pengkhususan kepada daerah Kota Marudu Sabah yang mempunyai kawasan pedalaman dan kebolehcapaian kawasan yang jauh. Kawasan-kawasan ini mempunyai laluan tetapi sukar untuk dilalui kerana keadaan jalan raya yang sangat teruk dan masih belum dinaik taraf.

JAWAPAN

Tuan Yang Di-Pertua,

Untuk makluman Ahli Yang Berhormat, rancangan pembangunan dan naik taraf jaringan jalan raya di kawasan luar bandar adalah di bawah bidang kuasa Kementerian Pembangunan Desa dan Wilayah (KKDW).

Sehubungan itu, kementerian ini berpandangan cadangan untuk menaiktaraf jalan tersebut lebih sesuai dilaksanakan melalui peruntukan Kementerian Pembangunan Desa dan Wilayah (KKDW) kerana bidang kuasa Kementerian ini adalah untuk Jalan Persekutuan sahaja.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB DATUK WETROM BIN BAHANDA (KOTA
MARUDU)**

SOALAN

DATUK WETROM BIN BAHANDA [KOTA MARUDU] minta **MENTERI KERJA RAYA** menyatakan perancangan pihak Kementerian bagi mengatasi kesesakan laluan di kawasan pekan Kota Marudu yang sesak disebabkan oleh laluan jalan berkembar yang masih lagi belum siap sehingga hari ini. Apakah pihak Kementerian mempunyai pelan jangka masa pendek atau alternatif untuk mengatasi masalah ini.

JAWAPAN

Tuan Yang Di-Pertua,

Untuk makluman Ahli Yang Berhormat, semakan oleh Kementerian ini dengan Jabatan Kerja Raya (JKR) Sabah mendapati Projek Naiktaraf Jalan Langkon Pitas adalah projek di bawah Kerajaan Negeri Sabah. Projek ini terletak di Jalan Langkon Pitas yang merupakan jalan Negeri dengan kod laluan 10006.

Kementerian ini turut dimaklumkan bahawa skop kerja projek ini bagi fasa 2 yang sedang dalam pelaksanaan hanya melibatkan pembinaan parit.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATUK WETROM BIN BAHANDA
[KOTA MARUDU]**

SOALAN

DATUK WETROM BIN BAHANDA [KOTA MARUDU] minta **MENTERI PENDIDIKAN** menyatakan apakah perancangan pihak Kementerian bagi menangani masalah prasarana dan keperluan asrama-asrama sekolah di kawasan luar bandar seperti kawasan Kota Marudu. Ada beberapa asrama sekolah yang amat daif prasarananya seperti tempat tidur dan juga tempat pembelajaran yang memberi kesukaran untuk pelajar terus tinggal di asrama dan tiadanya pilihan kerana tempat tinggal jauh dari sekolah.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian kepada usaha menyediakan prasarana pendidikan termasuk kemudahan asrama di sekolah bandar dan luar bandar.

Untuk makluman Ahli Yang Berhormat, KPM telah membuat perancangan bagi menangani isu prasarana dan keperluan asrama sekolah di kawasan luar bandar termasuk Kota Marudu. Antara perancangan yang dilaksanakan adalah seperti berikut iaitu:

- i. mengenal pasti keperluan pembaikan prasarana pendidikan termasuk asrama;
- ii. menyedia peruntukan yang diperlukan untuk pembaikan prasarana pendidikan termasuk asrama;
- iii. melaksana kerja-kerja pembaikan prasarana pendidikan termasuk asrama;
- iv. memantau pelaksanaan kerja-kerja pembaikan prasarana pendidikan termasuk asrama; dan
- v. mengadakan kerjasama dengan Jabatan Kerja Raya Malaysia (JKR) bagi sesi inspektorat ke sekolah yang memerlukan pembaikan prasarana pendidikan termasuk asrama.

Untuk makluman Ahli Yang Berhormat, pada tahun 2022, KPM telah menyalurkan peruntukan sebanyak RM1.25 juta bagi menyelenggara 26 buah sekolah di kawasan Kota Marudu yang merangkumi penyelenggaraan bangunan, bumbung, pendawaian elektrik, pagar, longkang, padang dan penyelenggaraan kecil lain.

Pada tahun 2023, KPM akan membantu sekolah di Kota Marudu melalui penyelenggaraan asrama serta perolehan kemudahan seperti katil, tilam dan bantal untuk persekitaran pembelajaran yang selesa serta kondusif.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN WILLIAM LEONG JEE KEEN
[SELAYANG]**

SOALAN

Tuan William Leong Jee Keen [Selayang] minta **MENTERI DALAM NEGERI** menyatakan senarai bilangan orang yang telah ditahan, didakwa di mahkamah dengan kategori jenayah dan berapa banyak yang disabitkan atau dilepaskan oleh mahkamah bagi setiap tahun dari tarikh SOSMA bermula.

JAWAPAN

Tuan Yang Di Pertua,

Seramai 1166 individu telah ditangkap dari tahun 2015 sehingga kini di bawah Akta Kesalahan Keselamatan (Langkah-langkah Khas) 2012. Daripada jumlah tangkapan tersebut, seramai 824 individu telah didakwa dengan pelbagai seksyen kesalahan di bawah Bab VIB Jenayah Terancang, Kanun Keseksaan di mana 474 individu telah dijatuhkan hukuman, 186 individu dilepaskan tanpa dibebaskan (DNAA) dan 17 individu dilepaskan dan dibebaskan (AND) .

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : TUAN WILLIAM LEONG JEE KEEN
[SELAYANG]**

SOALAN

YB TUAN WILLIAM LEONG JEE KEEN [SELAYANG] minta **MENTERI PEMBANGUNAN KERAJAAN TEMPATAN** menyatakan suatu senarai mengenai:

- (a) bilangan projek perumahan terbengkalai dan pemaju projek terbengkalai yang mana Akaun Pembangunan Perumahan (Akaun HDA) yang dikehendaki dibuka dan dikendalikan mengikut Peraturan-Peraturan Pemajuan Perumahan (Akaun Pemajuan Perumahan) 1991 telah diaudit; dan
- (b) tindakan yang diambil terhadap pemaju perumahan yang ingkar mematuhi peraturan tersebut.

JAWAPAN

Tuan Yang di-Pertua,

Untuk makluman Ahli Yang Berhormat, sehingga 28 Februari 2023 terdapat sebanyak 110 projek terbengkalai di seluruh Malaysia yang merangkumi 23,563 unit rumah dan 13,931 orang pembeli. Senarai projek mengikut negeri adalah seperti berikut:

Negeri	Bil. Projek	Bil. Unit Rumah	Bil. Pembeli
Selangor	43	14,291	7,337
Kelantan	20	1,140	1,002
Johor	8	2,595	2,119
Pahang	7	911	501
Terengganu	12	1,339	1,087
Perak	5	364	305
Negeri Sembilan	4	593	557
Kedah	3	589	331
W.P. Kuala Lumpur	4	1,523	597
Pulau Pinang	3	139	85
Melaka	1	79	10
Jumlah	110	23,563	13,931

Untuk makluman Ahli Yang Berhormat, Kerajaan memandang serius mengenai isu projek perumahan sakit dan terbengkalai dan sedang mengambil tindakan holistik berkaitan perkara ini. Antara usaha Kerajaan adalah mewujudkan Task Force Perumahan Sakit dan Terbengkalai bagi mencari pendekatan yang lebih berfokus dan strategik serta memberi impak positif dalam menyelesaikan projek sakit dan terbengkalai. Task Force ini menekankan empat (4) elemen utama sebagai Terma Rujukan (Term of Reference – TOR) iaitu pengenalpastian (tracking), penyelesaian (resolve), pencegahan (preventive) dan cadangan penambahbaikan ke hadapan (forward modelling). Selain itu, task force yang diwujudkan juga akan membuat *facts finding* dan *due diligence*

untuk mengenal pasti cara terbaik menyelesaikan masalah kronik projek perumahan.

Berdasarkan kepada Seksyen 7A Akta Pemajuan Perumahan (Kawalan dan Pelesenan) 1966, [Akta 118], adalah menjadi satu kewajipan kepada pemaju perumahan untuk membuka dan menyelenggara Akaun Pemajuan (HDA). Ini bermaksud sebanyak 110 projek yang telah diisytiharkan sebagai projek perumahan swasta terbengkalai di bawah Akta Pemajuan Perumahan (Kawalan dan Pelesenan) 1966 [Akta 118] telah sedia ada mempunyai Akaun Pemajuan Perumahan (HDA).

Bagi mana-mana projek yang telah diisytiharkan sebagai projek perumahan swasta terbengkalai, Kementerian Pembangunan Kerajaan Tempatan (KPKT) melalui Jabatan Perumahan Negara (JPN) akan mengeluarkan surat arahan secara terus kepada pihak bank atau syarikat kewangan yang telah didaftarkan untuk membekukan HDA projek tersebut supaya tiada sebarang transaksi pengeluaran wang dibenarkan. Subseksyen 4 di bawah Seksyen 7, Akta 118 juga menyatakan tidak membenarkan sebarang pengeluaran yang tidak mematuhi syarat-syarat pengeluaran wang dari HDA.

Adalah jelas bahawa pengeluaran wang daripada HDA yang dikawal melalui Akta 118 dan peraturan-peraturannya perlu dipatuhi oleh semua pemaju perumahan berlesen dan sekiranya gagal boleh dikenakan di bawah Seksyen 7A (10), Akta 118 iaitu denda tidak kurang daripada RM250,000 tetapi tidak melebihi RM500,000 dan boleh juga dipenjarakan selama tempoh tidak melebihi tiga (3) tahun atau kedua-duanya. Berdasarkan kepada peruntukan dan peraturan tersebut, KPKT sentiasa memantau, memeriksa, menyemak dan memastikan semua pemaju perumahan yang berlesen membuka dan menyelenggara setiap akaun HDA serta mematuhi peruntukan dan peraturan yang telah ditetapkan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN WILLIAM LEONG JEE KEEN
(SELAYANG)**

SOALAN

TUAN WILLIAM LEONG JEE KEEN [SELAYANG] minta **MENTERI KERJA RAYA** menyatakan sebab-sebab perancangan dan pembinaan lebuhraya tidak dijalankan dengan secara holistik dengan pengangkutan awam seperti MRT, LRT, KTM, bas Rapid dan operasi bas dan pengangkutan yang lain, dan apakah cadangan untuk rancangan holistik tersebut dilaksanakan.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya telah menerbitkan Pelan Pembangunan Rangkaian Jalan Raya 2030 atau *Highway Network Development Plan 2030* (HNDP 2030) yang bertujuan untuk mengenalpasti keperluan pembangunan jaringan jalan raya bagi meningkatkan kesalinghubungan yang akan menyokong pembangunan ekonomi negara.

HNDP 2030 turut mengambilkira kesalinghubungan di antara infrastruktur jalan raya dan sistem pengangkutan awam terutamanya di Lembah Klang dengan menggariskan strategi yang boleh dilaksanakan.

Di antara strategi yang dikenalpasti adalah mengukuhkan dan meningkatkan perhubungan jalan raya yang akan menjadi pelengkap di koridor pengangkutan awam seperti perkhidmatan rel. Dengan adanya sistem jaringan jalan raya yang baik akan meningkatkan kesalinghubungan di antara koridor pengangkutan awam dengan kawasan luar yang seterusnya akan menjimatkan masa perjalanan bagi pengguna perkhidmatan rel.

Di samping itu, strategi yang turut digariskan dalam HNDP 2030 adalah memperkenalkan konsep lebuh raya hibrid di mana koridor lebuh raya dan pengangkutan awam dikongsi bersama. Dengan konsep hibrid, jalan raya akan dikongsi bersama laluan mod pengangkutan awam seperti Bus Rapid Transit (BRT) terutamanya bagi kawasan yang terhad dan kos pengambilan tanah yang tinggi.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS
DARIPADA : TUAN WILLIAM LEONG JEE KEEN
[SELAYANG]

SOALAN

TUAN WILLIAM LEONG JEE KEEN [SELAYANG] minta **MENTERI KESIHATAN** menyatakan : -

- (a) berapa projek pembinaan hospital berdasarkan 'reka dan bina' (*design and build*) telah dilaksanakan dan berapa banyak projek yang telah siap mengikut jadual asal; dan
- (b) nyatakan tempoh kelewatan dalam penyiapan projek untuk sesuatu hospital dan sebab-sebab kelewatan.

JAWAPAN

Tuan Yang di-Pertua,

1. Terdapat sebanyak 41 projek Kementerian Kesihatan Malaysia yang dilaksanakan secara Reka dan Bina melibatkan pembinaan hospital baharu, pembinaan bangunan tambahan dan projek naik taraf hospital. Daripada jumlah tersebut, 10 projek telah siap sepenuhnya, 28 projek dalam peringkat pelaksanaan dan 3 projek dalam peringkat pra pelaksanaan.

2. Bagi projek-projek yang telah siap sepenuhnya, sebanyak 2 projek berjaya disiapkan sebelum tarikh siap asal yang ditetapkan dan 6 projek disiapkan sebelum tarikh siap yang dilanjutkan. Manakala, terdapat 2 projek yang siap selepas tarikh siap yang dilanjutkan.

3. Tempoh kelewatan projek adalah di antara 60 hari hingga 1,129 hari berbeza mengikut projek. Kebanyakan projek-projek yang mengalami kelewatan ini adalah berpunca daripada kesan penguatkuasaan Perintah Kawalan Pergerakan sepanjang tempoh Pandemik COVID-19 yang mengehadkan aktiviti pembinaan di tapak termasuk melibatkan isu bahan binaan dan tenaga kerja. Namun, masih terdapat punca-punca lain yang sering menyebabkan kelewatan projek iaitu seperti berikut:

- (i) Kelemahan pengurusan dan kewangan kontraktor;
- (ii) Kekurangan tenaga kerja mahir dan bahan binaan kesan daripada penularan COVID-19 yang menjejaskan rantai bekalan global;
- (iii) Perubahan skop projek disebabkan keperluan terkini KKM;
- (iv) Isu reka bentuk dan spesifikasi oleh perunding dan/atau Agensi Pelaksana; dan
- (v) Kelewatan memperolehi kelulusan Pihak Berkuasa Tempatan, Agensi Teknikal dan Syarikat Penyedia Utiliti.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN WILLIAM LEONG JEE KEEN
[SELAYANG]**

SOALAN

TUAN WILLIAM LEONG JEE KEEN [SELAYANG] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan langkah-langkah mitigasi pencemaran udara yang patut diambil untuk mengurangkan pelepasan habuk dan asap daripada Blacktop Industries Sdn. Bhd. bersebelahan Batu 15 Rawang, Selangor.

JAWAPAN

Tuan Yang di-Pertua,

1. Untuk makluman, premis Blacktop Industries Sdn. Bhd. merupakan premis pembuatan asfalt yang digunakan untuk dalam pembuatan jalan raya. Aktiviti ini adalah tertakluk kepada Peraturan-Peraturan Kualiti Alam Sekeliling (Udara Bersih) 2014 kerana mengeluarkan habuk dan bau.
2. Selaras dengan keperluan di bawah Peraturan-Peraturan Kualiti Alam Sekeliling (Udara Bersih) 2014, sebagai langkah-langkah mitigasi untuk mengurangkan habuk, premis ini telah memasang sistem kawalan pencemaran udara (SKPU) seperti "*dust collector*" iaitu "*bag filter*" dan '*scrubber*' bagi mengawal pelepasan habuk dan bau daripada proses yang dijalankan di premis. Pihak premis juga hendaklah memastikan tahap kecekapan SPKU berada dalam tahap terbaik melalui inisiatif berikut:

- i) menjalankan pemeriksaan dan penyelenggaraan berkala kepada sistem;
- ii) melantik “orang yang berwibawa” (*competent person*); dan
- iii) menjalankan “percontohan cerobong” (*isokinetic sampling*) secara berkala bagi memastikan pelepasan habuk ke udara mematuhi had nilai batas dan standard teknikal yang ditetapkan.

3. Berdasarkan siasatan terakhir Jabatan Alam Sekitar (JAS) pada 27 April 2022 di premis Blacktop Industries Sdn. Bhd. susulan daripada aduan awam yang diterima, hasil siasatan mendapati terdapat kebocoran pada SKPU dan pihak premis gagal melaporkan perkara ini kepada pihak JAS. Sehubungan itu, pihak JAS telah mengambil tindakan “Penahanan Operasi Kelengkapan” (POK) di bawah Seksyen 38(1)(a), Akta Kualiti Alam Sekeliling 1974 (Akta 127) bagi menghentikan pencemaran udara dari terus berlaku. Selain itu, JAS juga telah membuka kertas siasatan untuk tindakan mahkamah.

4. Untuk makluman, pihak premis telah mengambil tindakan pembaikan dengan segera dengan memasang SKPU. Semakan JAS ke atas laporan “percontohan cerobong” yang diterima pada 4 Ogos 2022 mendapati pelepasan asap/habuk daripada cerobong premis adalah mematuhi had nilai batas dan standard teknikal yang ditetapkan di bawah Peraturan-Peraturan Kualiti Alam Sekeliling (Udara Bersih) 2014.

5. Jabatan ini adalah komited untuk menjalankan penguatkuasaan dan membuat pemantauan ke atas premis dari semasa ke semasa termasuk pada waktu malam bagi memastikan operasi premis adalah mematuhi Akta 127 dan peraturan di bawahnya.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

**DARIPADA : DATUK WILLIE ANAK MONGIN
[PUNCAK BORNEO]**

SOALAN

DATUK WILLIE ANAK MONGIN [PUNCAK BORNEO] minta **MENTERI SUMBER MANUSIA** menyatakan adakah Kementerian Sumber Manusia berhasrat membina Pusat Pemulihan (Rehabilitation Center) di Wilayah Sarawak.

JAWAPAN

Tuan Yang di-Pertua,

1. Kementerian Sumber Manusia melalui PERKESO mempunyai sebuah pusat rehabilitasi yang dikenali sebagai Pusat Rehabilitasi PERKESO Tun Abdul Razak di Melaka yang telah beroperasi sejak 1 Oktober 2014. Pusat Rehabilitasi ini menyediakan perkhidmatan rehabilitasi yang komprehensif dan berteknologi tinggi untuk membantu memulihkan golongan yang mengalami hilang upaya akibat kemalangan atau penyakit kronik seperti kecederaan otak yang serius, kecederaan saraf tunjang, buta, kelumpuhan dan sebagainya sehingga mereka boleh berdikari, kembali bekerja dan kembali menyumbang kepada masyarakat.
2. Kementerian Sumber Manusia menyambut baik hasrat daripada Yang Berhormat Serian berkenaan pembinaan Pusat Pemulihan (Rehabilitation Center) di Wilayah Sarawak. Namun demikian, cadangan ini perlu diperhalusi semula dengan teliti dan melaksanakan kajian terperinci dengan mengambil kira pelbagai faktor secara menyeluruh dari segi impak sosioekonomi, kemampunan dana organisasi, faktor geografi, keperluan semasa dan keutamaan kepentingan (*urgency*).
3. Walau bagaimanapun, Kementerian Sumber Manusia menerusi PERKESO juga telah memeterai Memorandum Persefahaman (MoU) dengan Universiti Sarawak bagi menyediakan dan memanjangkan program serta kemudahan rehabilitasi di Bumi Kenyalang menerusi penyediaan kemudahan tersebut di Hospital Pengajar UNIMAS. Inisiatif murni ini memberi manfaat kepada masyarakat setempat terutamanya para pencarum PERKESO untuk mendapatkan rawatan rehabilitasi di kampus UNIMAS.
4. MoU ini juga merintis kolaborasi dua hala dalam aspek penyelidikan dan pembelajaran, Selain itu, ianya bertujuan bagi meningkatkan kemahiran serta pengetahuan anggota dalam bidang-bidang seperti perubatan, rehabilitasi, intervensi neurologi, kesihatan mental, kemahiran kesihatan bersekutu, robotik, latihan vokasional, keselamatan dan kesihatan, pengurusan hilang upaya, Program *Return To Work* (RTW), dan program perkhidmatan pekerjaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : DATUK WILLIE ANAK MONGIN [PUNCAK BORNEO]

SOALAN

DATUK WILLIE ANAK MONGIN [PUNCAK BORNEO] minta **MENTERI KESIHATAN** menyatakan apakah status pembinaan Hospital Puncak Borneo untuk menggantikan Hospital Peringatan Rajah Charles Brooke (RCBM) yang sesak dan usang.

JAWAPAN

Tuan Yang di-Pertua,

1. KKM ambil maklum bahawa Hospital Peringatan Rajah Charles Brooke (RCBM) ini telah berusia lebih 90 tahun. Hospital ini juga berhadapan dengan masalah cerun yang tidak stabil dan kerap berlaku banjir. Kerja-kerja naik taraf hospital ini juga agak terhad memandangkan hospital ini telah diwartakan sebagai bangunan warisan oleh Jabatan Muzium pada tahun 2022.
2. Walau bagaimanapun, keperluan sebuah hospital baharu di masa sekarang adalah tidak mendesak memandangkan perkhidmatan kesihatan masih boleh ditampung oleh Hospital Umum Sarawak dan juga dengan siapnya Hospital Petrajaya pada penghujung tahun 2024.
3. Untuk makluman, hospital ini telah dikenal pasti untuk menjalani *Building Condition Assessment* (BCA) yang akan dilaksanakan dalam tahun ini bagi merangka kerja-kerja baik pulih yang komprehensif. Laporan BCA dijangka akan dapat diperolehi pada hujung tahun 2024.
4. Cadangan sebuah hospital baharu perlu dikaji dengan mengambil kira dapatan *Building Condition Assessment terlebih dahulu*, ketersediaan tapak yang sesuai dan peruntukan kerajaan. Buat masa ini, Kementerian Kesihatan akan sentiasa memantau dan melaksanakan kerja-kerja baik pulih mengikut keperluan bagi memastikan pengoperasian hospital ini berada dalam keadaan selamat dan selesa kepada anggota serta pesakit.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : JAWAB BUKAN LISAN

**DARIPADA : DATUK WILLIE ANAK MONGIN
[PUNCAK BORNEO]**

SOALAN

Datuk Willie Anak Mongin [Puncak Borneo] minta **MENTERI DALAM NEGERI** menyatakan apakah langkah-langkah Kementerian untuk membasmi kegiatan judi haram *online* dan *offline* yang semakin berleluasa dan tidak terkawal ketika ini.

JAWAPAN

Tuan Yang Di Pertua,

PDRM sentiasa memantau dan menjalankan operasi secara terancang dan berterusan dalam menangani masalah ini. Tindakan diambil dari semasa ke semasa oleh pihak PDRM untuk mengesan serta membanteras kegiatan yang dijalankan ini, sama ada oleh orang perseorangan atau kumpulan sindiket.

Di antara langkah-langkah yang telah diambil dan dirancang oleh pihak polis termasuklah:

1. Memastikan bagi setiap serbuan yang dilakukan, kertas siasatan dibuka dan suspek dapat dituduh di mahkamah di bawah Akta Rumah Judi Terbuka 1953 dan undang-undang yang berkuatkuasa di Malaysia;
2. Mengadakan operasi dan serbuan secara berterusan melalui Op Dadu termasuklah operasi bersepadu dengan kerjasama agensi-agensi lain seperti Pihak Berkuasa Tempatan (PBT) untuk melumpuhkan kegiatan ini;
3. Bekerjasama dengan Suruhanjaya Komunikasi Multimedia Malaysia (SKMM) bagi sekatan laman sesawang perjudian di bawah Sek. 263 (2) Akta Komunikasi Multimedia;
4. Bekerjasama dengan syarikat-syarikat utiliti seperti Tenaga Nasional Berhad (TNB) dan syarikat bekalan air untuk tindakan pemotongan bekalan elektrik dan air ke atas premis yang sering digunakan oleh sindiket perjudian;

5. Mengambil tindakan ke atas pihak-pihak yang terlibat dalam kegiatan ini termasuklah penjaga premis dan penganjur kegiatan perjudian haram di bawah peruntukan undang-undang berkaitan judi sedia ada seperti Akta Rumah Judi Terbuka 1957 dan Akta Pertaruhan 1953. Selain itu, tindakan yang lebih keras juga akan diambil di bawah peruntukan undang-undang lain yang berkaitan iaitu Akta Pencegahan Jenayah 1959 (POCA) serta Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram (AMLATFPUAA) 2001;
6. Meneliti undang-undang berkaitan judi sedia ada bagi tujuan pindaan penambahbaikan bagi memastikan undang-undang ini relevan dengan perubahan modus operandi sindiket perjudian ini terutamanya perjudian atas talian (*online*). Dalam hal ini, Kementerian Dalam Negeri juga telah turut dilibatkan di dalam kajian undang-undang berkaitan perjudian yang sedang dijalankan oleh Kementerian Kewangan Malaysia (*MOF*) untuk ditambah baik supaya sentiasa selaras dengan perkembangan semasa; dan
7. Bekerjasama dengan Bank Negara Malaysia (BNM) untuk mengesan pemilik-pemilik akaun yang membenarkan akaun mereka digunakan oleh pihak sindiket perjudian (akaun keldai) bagi tujuan mengurus dan mengutip wang pertaruhan.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA PENGGAL KEDUA
PARLIMEN KELIMA BELAS**

PERTANYAAN : BUKAN JAWAB LISAN

DARIPADA : YB TUAN WONG CHEN [SUBANG]

SOALAN

Minta **PERDANA MENTERI** menyatakan:

- (a) Pecahan permohonan yang diluluskan dan yang ditolak bagi Bantuan Kerja Pembaikan Rumah dari Taman Kinrara Seksyen 1 dan Taman Kinrara Seksyen 2; dan
- (b) Jumlah bilangan penerima terkini yang telah menerima bantuan ini dan sebab-sebab permohonan untuk bantuan ini ditolak.

JAWAPAN

Tuan Yang di-Pertua,

- 1. Terdapat keseluruhan 295 permohonan diterima bagi Bantuan Pembaikan Rumah yang telah diterima. Permohonan yang telah diluluskan adalah sebanyak 256 manakala permohonan yang ditolak adalah sebanyak 39 permohonan.
- 2. Jumlah penerima terkini adalah sebanyak 256 permohonan dengan nilai RM1,058,000.00. Antara sebab permohonan ditolak adalah disebabkan nama pemohon tiada di dalam senarai Ketua Isi Rumah (KIR) yang menerima Bantuan Wang Ihsan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN WONG CHEN [SUBANG]

SOALAN

TUAN WONG CHEN [SUBANG] minta PERDANA MENTERI menyatakan

- (a) Bagaimana Kerajaan berhasrat untuk melindungi pelarian daripada penipuan, penyisihan dan penderaan; dan
- (b) Peranan Jabatan Kebajikan Masyarakat, Kementerian Pendidikan dan Kementerian Kesihatan dalam hal perlindungan pelarian.

JAWAPAN

**DIJAWAB OLEH YB DATUK ARMIZAN BIN MOHD ALI
MENTERI DI JABATAN PERDANA MENTERI (HAL EHWAL
SABAH, SARAWAK DAN TUGAS-TUGAS KHAS)**

Tuan Yang di-Pertua,

1. Walaupun Malaysia mengekalkan pendirian untuk tidak menyertai Konvensyen 1951 dan Protokol 1967 pada masa ini, namun ianya bukanlah suatu penghalang kepada Kerajaan untuk menentukan agar kebajikan, keselamatan dan perlindungan terhadap pelarian turut terbela dan terjaga. Melalui penambahbaikan terhadap Arahan MKN No. 23: Dasar dan Mekanisme Pengurusan Pelarian dan Pemohon Suaka (semakan 2023) yang sedang dirangka, ianya turut menyentuh mengenai peruntukan-peruntukan yang memberi perlindungan keselamatan dan sosial kepada pemohon suaka dan pelarian. Peranan setiap agensi kerajaan dalam memberikan perlindungan sewajarnya terhadap pemohon suaka dan pelarian turut digariskan agar selaras dengan peranan kementerian, jabatan dan agensi tersebut. Ini termasuklah dalam aspek pengendalian kanak-kanak, penglibatan pelarian dalam sistem undang-undang, kebajikan, kesihatan dan peluang pendidikan.

2. Dalam aspek kesihatan, KKM telah menyediakan ruang iaitu setiap pelarian boleh mendapatkan perkhidmatan kesihatan di fasiliti kerajaan (hospital dan klinik kesihatan kerajaan) seperti berikut:

- i. Perkhidmatan kesihatan di fasiliti kerajaan tersedia tanpa mengira status kewarganegaraan. Namun begitu perkhidmatan ini boleh diakses mengikut ketetapan yang termaktub di bawah Akta Fi 1951 dan Perintah Fi (Perubatan)(Kos Perkhidmatan) 2014;
- ii. Tersedia 24 jam sehari terutama di hospital kerajaan;

- iii. Perkhidmatan kesihatan kecemasan yang diberikan kepada pendatang atau pelarian tanpa meminta deposit awal. Walau bagaimanapun, apabila pesakit pulih, bayaran perlu diselesaikan sebelum discaj;
 - iv. Rawatan bagi 10 penyakit berjangkit adalah percuma dan 10 penyakit tersebut adalah Demam Kuning (*Yellow Fever*), Ebola, Kolera, Malaria, Kepialu, Selsema Burung (*Avian Flu*), Kusta & Tuberkulosis (*Ist line drug*) & COVID-19;
 - v. Bagi pemegang kad UNHCR rawatan boleh diperolehi pada kadar 50% kurang berbanding kadar warga asing; dan
 - vi. Rawatan bagi pelarian juga boleh diperolehi di sektor swasta tetapi tertakluk kepada caj yang ditetapkan oleh fasiliti swasta.
3. Dalam aspek kesihatan Dalam aspek pendidikan, KPM telah menetapkan penerimaan kemasukan kanak-kanak bukan warganegara ke sekolah kerajaan atau sekolah bantuan kerajaan bawah Kementerian Pendidikan Malaysia (KPM) adalah berdasarkan Peraturan-Peraturan Pendidikan (Penerimaan Masuk Murid ke Sekolah, Penyimpanan Daftar dan Syarat Bagi Pengekalan Murid Belajar di Sekolah) 1998, Akta Pendidikan 1996.
4. Kanak-kanak pelarian yang berada di Malaysia tidak termasuk dalam kategori kanak-kanak bukan warganegara yang boleh diterima masuk ke sekolah kerajaan atau sekolah bantuan kerajaan berdasarkan Akta Pendidikan 1996 yang dinyatakan. Walau bagaimanapun, kanak-kanak pelarian diberi akses pendidikan oleh pihak UNHCR atau organisasi-organisasi bukan kerajaan (NGO).

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : BUKAN JAWAB LISAN

DARIPADA : TUAN WONG CHEN [SUBANG]

SOALAN

TUAN WONG CHEN [SUBANG] minta **MENTERI SUMBER MANUSIA** menyatakan:

- a) bagaimana pindaan terkini kepada Akta Kerja 1955 akan melindungi pekerja domestik tanpa izin; dan
- b) jika pekerja migran tanpa izin dapat membuat tuntutan kes di Mahkamah Buruh sepertimana yang ditetapkan oleh Mahkamah Rayuan pada bulan Mei 2022.

JAWAPAN

Tuan Yang di-Pertua,

1. Akta Kerja (Pindaan) 2022 telah dikuatkuasakan pada 1 Januari 2023. Semua pekerja sektor swasta tanpa mengira had gaji di Semenanjung Malaysia dan Labuan adalah dilindungi di bawah akta ini.
2. Melalui Akta ini, pekerja - pekerja domestik asing yang sah diberikan kemudahan cuti rehat mingguan sebagaimana yang dinikmati oleh pekerja-pekerja lain melalui pindaan Jadual Pertama.
3. Peruntukan baharu di bawah seksyen 60K Akta Kerja 1955 mengenai penggajian pekerja asing termasuk pekerja domestik asing yang memerlukan majikan mendapat kebenaran awal (*prior approval*) daripada Ketua Pengarah Jabatan Tenaga Kerja Semenanjung Malaysia.
4. Pekerja – pekerja migran tanpa izin boleh memfailkan aduan ke Pejabat Tenaga Kerja yang berhampiran dengan tempat pekerjaan untuk tindakan siasatan.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB TUAN WONG CHEN
[SUBANG]**

SOALAN

**Tuan Wong Chen [Subang] minta MENTERI DALAM NEGERI
menyatakan :-**

- (a) jumlah keseluruhan serta pecahan banduan yang dibebaskan dalam Program Pemulihan Berasaskan Komuniti (CBR) pada 2022, peratusan banduan yang dibebaskan mengikut setiap tujuh program CBR yang dilaksanakan oleh Jabatan Penjara Malaysia; dan
- (b) bilangan banduan pembebasan terus dari penjara pada tahun 2022.

JAWAPAN

Tuan Yang Di Pertua,

a) Untuk makluman Ahli Yang Berhormat, terdapat tujuh (7) Program Pemulihan Dalam Komuniti (PDK) yang telah dilaksanakan oleh Jabatan Penjara Malaysia iaitu:-

1. Program Pelepasan Secara Perintah Parol;
2. Program Pembebasan Banduan Secara Berlesen (PBSL);
3. Program Pembebasan Banduan Secara Berlesen (PBSL) Sekolah Henry Gurney;
4. Program Reintegrasi Penghuni (PRP);
5. Program Reintegrasi Penghuni Industri (PRPi);
6. Program Reintegrasi Penghuni Penjara (PRPP); dan
7. Perintah Kehadiran Wajib (PKW).

Melalui program tersebut, jumlah keseluruhan banduan yang telah dibebaskan pada tahun 2022 adalah sebanyak **19,720** orang banduan. Dari segi pecahan pembebasan banduan mengikut program pula adalah seperti berikut:-

1. Program Pelepasan Secara Perintah Parol sebanyak **7,613** bersamaan **38.61%**;
2. Program Pembebasan Banduan Secara Berlesen (PBSL) sebanyak **6,198** orang bersamaan **31.43%**
3. Program Pembebasan Banduan Secara Berlesen (PBSL) Sekolah Henry Gurney sebanyak **211** orang bersamaan **1.07%**;
4. Program Reintegrasi Penghuni (PRP) sebanyak **2,558** orang bersamaan **12.97%**;
5. Program Reintegrasi Penghuni Industri (PRPi) sebanyak **1,565** orang bersamaan **7.94%**;

6. Program Reintegrasi Penghuni Penjara (PRPP) sebanyak **1,173** orang bersamaan **5.95%**; dan
7. Perintah Kehadiran Wajib (PKW) sebanyak **402** orang bersamaan **2.04%**.

b) Berdasarkan rekod Jabatan Penjara Malaysia, jumlah banduan yang telah dibebaskan secara terus dari penjara pada tahun 2022 adalah seramai **86,383** orang banduan.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : TUAN WONG CHEN [SUBANG]

SOALAN

TUAN WONG CHEN [SUBANG] minta **MENTERI KESIHATAN** pelan tindakan dan bajet yang diperuntukkan bagi mereka yang terlepas vaksin HPV mereka sejak 3 tahun yang lalu.

JAWAPAN

Tuan Yang di-Pertua,

1. Pada tahun 2021 Kementerian Kesihatan Malaysia tidak dapat melaksanakan sebarang perolehan bekalan vaksin Human Papillomavirus (HPV) berikutan terdapat gangguan bekalan vaksin HPV peringkat global. Keadaan ini telah mengganggu pelaksanaan pemberian imunisasi HPV kepada remaja perempuan 13 tahun bermula tahun 2021.
2. Berdasarkan baki stok vaksin pada tahun 2020, seramai 34,933 orang (15.7%) murid perempuan Tingkatan 1 kohort 2021 telah menerima dos 1 vaksin HPV, manakala 31,708 atau 14.8% telah melengkapkan dua dos vaksin. Oleh itu, masih terdapat 187,151 atau 84.3% belum menerima vaksin HPV pada tahun 2021.
3. Pada tahun 2022 pula, harga vaksin HPV di peringkat global telah meningkat sebanyak enam (6) kali ganda iaitu sebanyak **RM150 per dos** berbanding **RM25 per dos tahun sebelumnya**. Berdasarkan peruntukan yang diluluskan pada tahun tersebut, KKM telah melaksanakan perolehan sebanyak 100,000 dos vaksin HPV pada Disember 2022 dengan implikasi kewangan sebanyak **RM15 juta**. Kesemua vaksin tersebut telah diagihkan ke negeri-negeri untuk diberikan kepada murid perempuan Tingkatan 1 kohort 2021 yang belum menerima vaksin.
4. Setakat Januari 2023, dianggarkan seramai 567,151 orang murid perempuan yang layak belum menerima vaksin HPV mereka. Susulan itu, KKM terus komited untuk memastikan semua murid perempuan kohort 2021, kohort 2022 dan kohort 2023 akan menerima vaksin HPV sebelum mereka tamat persekolahan.
5. Walau bagaimanapun, pelaksanaan ini tertakluk kepada jumlah vaksin yang dapat diperolehi pada tahun 2023, keutamaan pemberian vaksin HPV adalah kepada murid perempuan kohort 2021 yang sedang berada di Tingkatan 3 terlebih dahulu dan apabila keseluruhan kohort ini selesai, vaksin akan mula diberikan kepada murid kohort 2022 sebelum pemberian kepada murid kohort 2023.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN WONG KAH WOH [TAIPING]

SOALAN

TUAN WONG KAH WOH [TAIPING] minta **MENTERI PENDIDIKAN** menyatakan senarai permohonan peruntukan Tabung Khas daripada SJK(C), SJK(T), sekolah mubaligh pada tahun 2022 serta jumlah peruntukan yang diluluskan serta disalurkan setiap satu sekolah. Nyatakan mengapa kebanyakan sekolah-sekolah di daerah Larut Matang dan Selama tidak diluluskan permohonan peruntukan.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited kepada usaha menyediakan fasiliti bangunan dan kemudahan sekolah yang dapat berfungsi dengan baik, selamat dan kondusif.

Untuk makluman Ahli Yang Berhormat, KPM telah menyalurkan sumbangan bantuan kepada sekolah bantuan kerajaan (SBK) sebanyak RM76.83 juta bagi SJK(C), SJK(T), sekolah mubaligh pada tahun 2022.

Untuk makluman Ahli Yang Berhormat, semua permohonan sumbangan bantuan SBK perlu dikemukakan untuk semakan dan pengesahan teknikal di Pejabat Pendidikan Daerah (PPD) atau Jabatan Pendidikan Negeri (JPN) bagi memastikan skop kerja dan anggaran harga yang dikemukakan oleh pihak Lembaga Pengelola SBK dapat dinilai secara objektif.

Bagi tahun 2022 sebanyak 28 permohonan sumbangan bantuan kerajaan telah diterima dari sekolah di daerah Larut Matang dan Selama. Daripada jumlah tersebut, dua buah sekolah (seperti jadual di bawah) yang telah diluluskan manakala 26 permohonan tidak mendapat perakuan pegawai teknikal di PPD atau JPN untuk dikemukakan kepada KPM.

SEKOLAH BANTUAN KERAJAAN (SBK)		
Jenis Sekolah	Nama Sekolah	Peruntukan (RM)
SJKT	SJKT Ladang Getah Taiping	150,000
	SJKT Ladang Matang	50,000
Jumlah Keseluruhan		200,000

KPM melalui JPN Perak dan PPD Larut Matang dan Selama akan diminta mengadakan sesi libat urus dengan sekolah bantuan kerajaan di daerah tersebut pada bulan April bagi permohonan bantuan tahun 2023. Sesi libat urus ini adalah bertujuan untuk memberi penjelasan dan bimbingan mengenai tatacara permohonan sumbangan bantuan bagi sekolah bantuan kerajaan.

Sekian, terima kasih.

RT70

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : TUAN WONG KAH WOH [TAIPING]

SOALAN

YB TUAN WONG KAH WOH [TAIPING] minta **MENTERI PEMBANGUNAN KERAJAAN TEMPATAN** senaraikan hotspot banjir kilat dalam rekod Kerajaan di sekitar kawasan Taiping serta punca-puncanya. Sama ada Kerajaan bersedia untuk memberikan peruntukan tambahan yang secukupnya kepada Kerajaan negeri dan Kerajaan tempatan untuk menangani isu banjir kilat yang dinyatakan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) telah mengenal pasti 11 lokasi *hotspot* banjir kilat di kawasan Taiping seperti di **Lampiran 1**.

KPKT mendapati antara faktor-faktor yang menyebabkan kejadian banjir kilat di kawasan ini adalah seperti berikut:

- i) keadaan longkang/ parit yang telah lama dan tidak dapat menampung aliran air hujan yang lebat melebihi kapasiti longkang/ parit; dan
- ii) struktur longkang/ parit runtuh dan longkang/ parit dipenuhi sampah dan mendapan yang mengganggu aliran air hujan serta menyebabkan limpahan keluar seterusnya menyebabkan banjir kilat berlaku.

Untuk makluman Ahli Yang Berhormat, KPKT telah meluluskan peruntukan sebanyak RM249,153 bagi tahun 2021 dan RM914,181.55 bagi tahun 2022 kepada Majlis Perbandaran Taiping bagi menaik taraf sistem perparitan sedia ada. Bagi tahun 2023, KPKT sedia mempertimbangkan permohonan peruntukan PBT bagi mengatasi banjir kilat di kawasan Taiping.

Sekian, terima kasih.

LOKASI HOTSPOT BANJIR KILAT DI KAWASAN TAIPING

BIL.	LOKASI HOTSPOT BANJIR	BULAN & TAHUN KEJADIAN BANJIR
1	Taman Kamunting Maju, Kamunting	Mei 2020 November 2020 April 2021 Mac 2022 Ogos 2022 November 2022
2	Taman Pertama, Aulong	April 2021 Mac 2022 Ogos 2022
3	Taman Sri Kota	April 2021 Mac 2022 Ogos 2022
4	Taman Simpang Harmoni Kg. Baru Simpang	Mei 2020 November 2020 April 2021 Mac 2022 Ogos 2022
5	Taman Lela, Kamunting	November 2020 April 2021 Mac 2022 Ogos 2022
6	Kampung Expo, Kamunting	Mei 2020 November 2020 April 2021 Mac 2022 Ogos 2022 November 2022
7	Jalan Muzium Hulu dan Jalan Wan Rashdi	Mei 2020 November 2020 April 2021 Mac 2022 Ogos 2022

SOALAN NO : 655

BIL.	LOKASI HOTSPOT BANJIR	BULAN & TAHUN KEJADIAN BANJIR
8	Jalan Perusahaan 4 dan 1, Industri Kamunting	April 2021 Mac 2022 Ogos 2022 November 2022
9	Jalan Berek, Bandar Taiping	Ogos 2022 November 2022
10	Taman Pengkalan Makmur dan Taman Pengkalan Setia	Ogos 2022
11	Taman Mas-Jalan Air Kuning (Jalan Lama)	Mei 2020 November 2020 April 2021 Mac 2022 Ogos 2022

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN WONG KAH WOH [TAIPING]

SOALAN

TUAN WONG KAH WOH [TAIPING] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status penyiapan pembinaan Loji Rawatan Kumbahan Serantau dan rangkaian paip pembetungan di Taiping, Perak. Apakah tindakan yang akan diambil ke atas kontraktor yang telah gagal memastikan jalan diturap semula dengan sempurna semasa/selepas projek dilaksa

JAWAPAN

Tuan Yang Di-Pertua,

Pembinaan Loji Rawatan Kumbahan Serantau dan Rangkaian Paip Pembetungan di Taiping, Perak telah siap 96.5% dan dijangka siap sepenuhnya pada 4 Ogos 2023.

Jabatan Perkhidmatan Pembetungan telah membuat peringatan bertulis kepada pihak kontraktor melalui tiga (3) *Site Memo* (bertarikh 27 November 2020, 7 Januari 2021 dan 27 Januari 2021) dan satu (1) Surat Peringatan Terakhir bertarikh 31 Mei 2022, juga termasuk menahan bayaran *pre-lim maintenance public road* supaya kontraktor memastikan jalan diturap semula dengan sempurna semasa/ selepas projek dilaksanakan.

Sekian. Terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN WONG KAH WOO [TAIPING]

SOALAN

YB Wong Kah Woh [Taiping] minta **MENTERI DALAM NEGERI** nyatakan jumlah permohonan kewarganegaraan yang masih dalam proses setakat kini mengikut setiap satu kategori permohonan. Apakah pembaharuan Kerajaan dalam mempercepatkan proses permohonan dan pemberitahuan keputusan permohonan tersebut.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan rekod Jabatan Pendaftaran Negara (JPN), sebanyak 41,314 permohonan kewarganegaraan telah diterima dari tahun 2018 hingga 31 Januari 2023. Dari jumlah berkenaan, sebanyak 31,808 permohonan yang masih dalam proses dengan pecahan Perkara 15(1) sebanyak 5,212, Perkara 15(2) sebanyak 3,443, Perkara 15A sebanyak 13,285, Perkara 16 sebanyak 374 dan Perkara 19 sebanyak 9,494.

Untuk makluman Ahli Yang Berhormat, penganugerahan kewarganegaraan Malaysia merupakan anugerah tertinggi dan hak eksklusif Kerajaan Persekutuan. Dalam mempertimbangkan permohonan kewarganegaraan Malaysia, beban untuk membuktikan kelayakan untuk dianugerahkan kewarganegaraan Malaysia ini pula adalah di bawah tanggungjawab setiap pemohon dan proses pertimbangan adalah tertakluk kepada syarat-syarat di bawah Bahagian III, Perlembagaan Persekutuan, Kaedah-Kaedah Kewarganegaraan 1964 serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen. Fakta dan dokumen bukti yang dikemukakan oleh setiap pemohon akan diteliti mengikut giliran yang sewajarnya sebelum keputusan dikeluarkan. Justeru, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan kes.

Kementerian Dalam Negeri (KDN) sedang melaksanakan tindakan segera terhadap semua permohonan kewarganegaraan yang diterima secara berperingkat selaras dengan aspirasi konsep Malaysia MADANI. Kementerian ini juga komited dan beriltizam untuk menyelesaikan sebanyak 3,000 permohonan warganegara melalui KPI 100 hari YB Menteri Dalam Negeri Tahun 2023 (bermula 2 Disember 2022 - 12 Mac 2023).

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN WONG KAH WOH [TAIPING]

SOALAN

TUAN WONG KAH WOH [TAIPING] minta **MENTERI PENDIDIKAN** menyatakan jumlah permohonan Program Ijazah Sarjana Muda Perguruan (PISMP) mata pelajaran Bahasa Cina di SJK(C) dari tahun 2018 sehingga ini dan jumlah pengambilan untuk program tersebut. Apakah tindakan Kerajaan dalam menangani isu kekurangan guru di SJK(C).

JAWAPAN

Tuan Yang di-Pertua,

Untuk makluman Ahli Yang Berhormat, pengambilan calon dalam kalangan pelajar lepasan Sijil Pelajaran Malaysia (SPM) bagi Program Ijazah Sarjana Muda (PISMP) di Institut Pendidikan Guru Kementerian Pendidikan Malaysia (IPG KPM) adalah berdasarkan kepada unjuran serta syarat yang telah ditetapkan. Syarat umum kemasukan ke IPG yang ditetapkan ialah calon mestilah memperoleh sekurang-kurangnya gred Cemerlang dalam mana-mana lima mata pelajaran dalam Sijil Peperiksaan Malaysia (SPM).

Jumlah permohonan dan pengambilan bagi PISMP mata pelajaran Bahasa Cina di sekolah jenis kebangsaan Cina (SJKC) dari tahun 2018 sehingga 2022 adalah sebanyak 1,284 permohonan dan 305 daripadanya telah mendapat penempatan selepas ditemuduga. Penempatan pelajar adalah berdasarkan permohonan yang melepasi syarat kelayakan dan memenuhi kriteria pengambilan.

KPM akan membuat semakan dari semasa ke semasa bagi memastikan bekalan guru di SJKC mencukupi.

Sekian, terima kasih.

RT71

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB PUAN WONG SHU QI [KLUANG]

SOALAN

Puan Wong Shu Qi [Kluang] minta **MENTERI DALAM NEGERI** menyatakan kes-kes kematian dalam tahanan di Depot Imigresen mengikut pecahan warganegara dan lokasi pusat tahanan untuk setiap tahun secara berasingan bagi tahun 2021 dan 2022.

JAWAPAN

Tuan Yang Di Pertua,

Untuk makluman Ahli Yang Berhormat, bagi tempoh 1 Januari 2021 sehingga 31 Disember 2022, terdapat 315 kematian melibatkan 268 orang tahanan lelaki, 40 orang tahanan wanita, 5 orang tahanan kanak-kanak lelaki dan 2 orang tahanan kanak-kanak perempuan. Antara sebab-sebab kematian yang dikenal pasti oleh pihak hospital adalah berpunca daripada jangkitan COVID-19, Tuberculosis, sakit jantung, sakit buah pinggang, kanser dan jangkitan paru-paru (Pneumonia). Pengendalian kes-kes kematian pula adalah mengikut proses perundangan di mana laporan polis akan dibuat oleh pegawai bertugas apabila berlaku kematian selain pihak hospital akan mengeluarkan laporan perubatan yang menjelaskan punca kematian serta pengesahan kematian akan dibuat oleh Hakim Koroner bagi menentukan tiada unsur-unsur penderaan atau jenayah yang telah dilakukan.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB PUAN WONG SHU QI
(KLUANG)**

SOALAN

Puan Wong Shu Qi [Kluang] minta **MENTERI DALAM NEGERI** menyatakan jumlah kapasiti dan jumlah banduan yang sedang dikurung setakat 15 September 2022 di setiap penjara.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan statistik Jabatan Penjara Malaysia sehingga 15 September 2022, kapasiti keseluruhan banduan di seluruh institusi penjara adalah seramai **65,762** orang banduan manakala jumlah pengisian banduan seluruh institusi penjara pula adalah seramai **76,187** orang banduan. Ini bermakna telah berlaku perbezaan lebihan kapasiti sebanyak **10,425** (15.85%) orang banduan.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB PUAN WONG SHU QI [KLUANG]

SOALAN

Puan Wong Shu Qi [Kluang] minta **MENTERI DALAM NEGERI** menyatakan kes-kes kematian dalam lokap polis dan penjara untuk setiap tahun secara berasingan bagi tahun 2021 dan 2022.

JAWAPAN

Tuan Yang Di Pertua,

Bagi tempoh 1 Januari 2021 hingga 31 Disember 2021, jumlah kematian tahanan dalam lokap Polis adalah sebanyak 14 kes. Sebanyak lapan (8) kes melibatkan tahanan berketurunan Melayu; tiga (3) berketurunan Cina; dua (2) berketurunan India; dan seorang warganegara asing.

Dari 1 Januari 2022 hingga 31 Disember 2022, jumlah kematian tahanan dalam lokap Polis adalah sebanyak 11 kes. Sebanyak sembilan (9) kes melibatkan tahanan berketurunan Melayu; seorang berketurunan Cina; dan seorang warganegara asing.

Tuan Yang Di Pertua,

Sepanjang tahun 2021, Jabatan Penjara telah merekodkan sebanyak 12 kes kematian banduan dalam Penjara yang terdiri daripada 11 lelaki dan seorang perempuan. Daripada jumlah tersebut, seramai sembilan (9) orang berketurunan Melayu dan tiga (3) orang adalah warga asing iaitu dari Indonesia, Thailand dan Nepal.

Manakala bagi tahun 2022 pula, sebanyak sembilan (9) kematian banduan dalam Penjara telah direkodkan dan kesemuanya adalah lelaki. Daripada jumlah tersebut, seramai empat (4) orang berketurunan Melayu; tiga (3) orang berketurunan Cina; seorang berketurunan India; dan seorang warganegara Vietnam.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : PUAN WONG SHU QI [KLUANG]

SOALAN

PUAN WONG SHU QI [KLUANG] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan jumlah dengan terperinci semua tanah Kerajaan Persekutuan yang terbiar atau tidak digunakan di seluruh Malaysia mengikut lokasi dan keluasan tanah tersebut.

JAWAPAN

Tuan Yang di-Pertua,

Sehingga 31 Disember 2022, sebanyak 1539 lot tanah Persekutuan dengan keluasan berjumlah 10,748.18 hektar masih belum dibangunkan bagi tempoh sekurang-kurangnya lima (5) tahun. Namun daripada jumlah tersebut, sebahagian daripadanya di peringkat perancangan Kementerian/Jabatan Pengguna yang berkaitan dengan kelulusan projek/program *Rolling Plan* ke 3, 4 dan seterusnya.

Perincian pecahan jumlah lot dan keluasan bagi setiap negeri adalah seperti berikut:

Bil.	Negeri	Jumlah Lot	Jumlah Keluasan (Hektar)
1.	Johor	105	764.78
2.	Kedah	66	522.40
3.	Kelantan	154	1,243.74
4.	Melaka	87	1,170.34
5.	Negeri Sembilan	257	791.02
6.	Pahang	104	638.06
7.	Perak	209	463.08
8.	Perlis	22	137.86
9.	Pulau Pinang	7	18.99
10.	Sabah	48	334.64
11.	Sarawak	153	1,589.88
12.	Selangor	90	381.92
13.	Terengganu	127	1,955.19
14.	W.P. Kuala Lumpur	89	198.26
15.	W.P Labuan	21	538.02
16.	W.P Putrajaya	0	0.00
JUMLAH		1539	10,748.18

Sekian, terima kasih.

MAKLUMAT TAMBAHAN

Beberapa langkah yang sesuai boleh diambil bagi menangani perkara ini seperti berikut:

i. Tukarguna

Mana-mana tanah yang diserahkan kepada Pesuruhjaya Tanah Persekutuan (PTP) boleh ditawarkan kepada Kementerian/ Jabatan Pengguna (KJP) lain untuk tujuan tukar kegunaan berdasarkan projek yang dirancang;

ii. Sewaan

Tanah-tanah Persekutuan yang tidak dibangunkan boleh disewakan kepada mana-mana individu, syarikat atau Badan Bukan Kerajaan (NGO) bagi tempoh tidak melebihi tiga (3) tahun;

iii. Pajak

Tanah-tanah Persekutuan yang tidak dibangunkan boleh dipajak kepada pihak lain untuk tempoh yang melebihi tiga (3) tahun hingga sembilan puluh sembilan (99) tahun; dan

iv. Pelepasan atau Serahbalik

Kerajaan Persekutuan boleh melepaskan tanah rizab Persekutuan atau menyerahkan tanah milik Persekutuan kepada Kerajaan Negeri berdasarkan permohonan daripada Kerajaan Negeri.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : PUAN WONG SHU QI [KLUANG]

SOALAN

PUAN WONG SHU QI [KLUANG] minta **MENTERI PENGANGKUTAN** menyatakan maklumat terperinci berkenaan bas berhenti-henti yang beroperasi seperti berikut:

- (a) jumlah bas berhenti-henti dimiliki setiap syarikat mengikut negeri pengoperasian; dan
- (b) jumlah bas milik Prasarana yang tidak digunakan buat masa ini.

JAWAPAN

Tuan Yang di-Pertua,

1. Jumlah bas berhenti-henti dimiliki setiap syarikat mengikut negeri berdasarkan data yang dimiliki Agensi Pengangkutan Awam Darat (APAD) sehingga 31 Disember 2022 adalah seperti berikut:

Negeri	Nama Pengendali	Jumlah
Johor	AEROSYSTEM TOUR AND TRAVEL (M) SDN. BHD.	57
	CITY HOLIDAYS EXPRESS TOURS & TRANSPORT SDN BHD	4
	COASTAL OMNIBUS COMPANY SDN BHD	15
	GREEN TRANSIT LINER SDN BHD	15
	HANDAL CERIA SDN. BHD.	148
	HANDAL INDAH SDN. BHD.	351
	JOHOR MOTOR BUS COMPANY SDN BHD	12
	KEMBARA CT ENTERPRISE SDN BHD	16
	KOPERASI PENGANGKUTAN MELAYU KLUANG BERHAD	10
	NORTH WEST JOHORE BUS SERVICE BERHAD	16
	OMEGA PERTIWI SDN BHD	18
	SERI INTAN TRANSTOUR SDN. BHD.	12
	SYARIKAT KENDERAAN S & S SDN. BHD.	164
	SYARIKAT PENGANGKUTAN MAJU BHD.	179
	TRANSIT LINK (JOHOR BAHRU) SDN BHD	62
	TRITON COMMUTER SDN BHD	15
	YOW HOE BUS CO BHD	21
Kedah	ALFARHAN TRAVEL & TOURS SENDIRIAN BERHAD	2
	JADAM ENTERPRISE SDN BHD	3
	KUALA KEDAH TRANSPORT CO SDN BHD	3
	TANJUNG MEWAH HOLIDAY SDN BHD	9
	THE JALAN LANGGAR TRANSPORT CO. BHD	5
	THE KULIM BALING ROAD TRANSPORT CO SDN BHD	39
	TRANSWIND TRANSPORT SDN. BHD.	10
Kelantan	KONSORTIUM E-MUTIARA BERHAD	20
Melaka	BATANG BUS COMPANY SDN BHD	16
	PANORAMA MELAKA SDN BHD	71
Negeri Sembilan	GOPI TRAVEL TOURS SDN BHD	16
	GTT LINER SDN BHD	6
	KR TRAVEL & TOURS SDN BHD	29
	SYARIKAT UNITEDBAS SDN BHD	22

NO. SOALAN: 663

Negeri	Nama Pengendali	Jumlah
	THE SOUTHERN OMNIBUS COMPANY BERHAD	25
Pahang	SINAR PELANGI HOLIDAY SDN BHD	4
	SRI JENGKA SDN BHD	23
	SRI MARONG TRAVEL & TOURS SDN. BHD.	1
Perak	CKS BUMI SDN BHD	67
	HUP SOON OMNIBUS CO SDN BHD	12
	HUP YIK OMNIBUS COMPANY SDN BHD	6
	IPOH OMNIBUS CO SDN BHD	20
	MB SOORIA SATHIAN RESOURCES (M) SDN BHD	6
	PUNCAK ALECTRA SDN BHD	2
	RED OMNIBUS CO SDN BHD	39
	SUPER COACHLINER SDN BHD	13
	THE BLUE OMNIBUS CO. SDN BHD.	10
	THE GENERAL OMNIBUS CO (PERAK) SDN BHD	26
	THE KINTA OMNIBUS CO SDN BHD	15
	THE LINTANG JALONG OMNIBUS CO SDN BHD	2
	WAI THONG OMNIBUS SDN BHD	9
Perlis	UMMUL TRAVEL & TOURS SDN. BHD.	2
	UNIC LEISURE TRANSTOUR SDN. BHD.	29
Pulau Pinang	BIGSTAR AUTO SDN BHD	2
	HUNZA PROPERTIES (PENANG) SDN BHD	1
	LEAN HOCK BUS CO. SDN. BHD.	16
	YB TRANS & TOUR SDN. BHD.	2
Selangor	CITYLINER SDN BHD	234
	ECO WORLD PROJECT MANAGEMENT SDN BHD	2
	KENDERAAN LANGKASUKA SDN BHD	25
	NORTH SOUTH SPEED SDN BHD	9
	PENGANGKUTAN AWAM PUTRAJAYA TRAVEL & TOURS SDN. BHD.	38
	PENGANGKUTAN ERAMESRA ANAK-ANAK PERAK SDN BHD	12
	PERKHIDMATAN HAFEENA SDN BHD	3
	SANWA TOURS (M) SDN BHD	7
	SEPANG OMNIBUS CO SDN BHD	22
	SKS COACHBUILDERS SDN BHD	99
	SRI THEVEN TRAVEL & TOURS SDN BHD	7
	WAWASAN SUTERA TRAVEL & TOURS SDN BHD	79
Terengganu	CAS LIGAS SDN. BHD	7
	INTAN UNGGUL TRAVEL TOURS SDN. BHD.	2
	SYARIKAT KENDERAAN NOOR DAN HISHAM SDN BHD	5

NO. SOALAN: 663

Negeri	Nama Pengendali	Jumlah
	SYARIKAT PENGANGKUTAN BUMI PANTAI TIMUR SDN BHD	18
Kuala Lumpur	AIRPORT COACH SDN. BHD.	1
	ELANG WAH SDN BHD	20
	KENDERAAN BAS MARA	263
	KONSORTIUM BAS EKSPRES SEMENANJUNG (M) SDN BHD	3
	MAHLIGAI TRAVEL & TOUR SDN BHD	1
	MARA LINER SDN BHD	4
	MHASNOR HOLDINGS (M) SDN BHD	1
	OHG SERVICES SDN BHD	2
	PRASARANA MALAYSIA BERHAD	1,917
	RAPID BUS SDN. BHD.	1
	RAPID RAIL SDN BHD	1
	SHANGRI-LA HOTEL (KL) SENDIRIAN BERHAD	1
	SYARIKAT CENTRAL PAHANG OMNIBUS SDN BHD	7
	THE PAHANG SOUTH UNION OMNIBUS COMPANY SDN. BHD.	5
	THE SELANGOR OMNIBUS CO BHD	51
Putrajaya	PERBADANAN PUTRAJAYA	133
Jumlah Keseluruhan tidak termasuk Sabah dan Sarawak		4,678

Senarai bagi Sabah dan Sarawak:

Sabah	THE TUARAN UNITED TRANSPORT COMPANY SDN. BHD.	18
	THE LUEN THUNG TANJONG ARU TRANSPORT CO. SDN. BHD.	16
	MY ALAP BANA TAWAU TRANSPORT SDN. BHD.	13
	KENDERAAN EDZA SDN. BHD.	9
	PERKHIDMATAN JASA KELUARGA BERSATU	9
	SYARIKAT ASIA TRANSPORT	8
	SYARIKAT PENGANGKUTAN SAGA	7
	SKT D. MY ENTERPRISE	6
	SYARIKAT PENGANGKUTAN ASRANI	6
	SYARIKAT PENGANGKUTAN SALEM ENTERPRISE	6
	TERAS JUTA ENTERPRISE	6
	D'JUARA TRANSPORT	5

NO. SOALAN: 663

	LABUK ROAD BUS COMPANY SDN BHD	5
	MAJAMA SDN BHD	5
	SYARIKAT PENGANGKUTAN JAYA MAWAR	5
	SYARIKAT SHEIKH BERSAUDARA	5
	SYT PENGANGKUTAN RAHMAT HIDAYA	5
	ALIF JAYA	4
	BENTENG JAYA ENTERPRISE	4
	BLUE SHUTTLE SDN. BHD.	4
	SKT. PENGANGKUTAN USPAR	4
	SYARIKAT ALITA ENTERPRISE	4
	SYARIKAT PENGANGKUTAN LIE	4
	SYARIKAT PENGANGKUTAN NAILA	4
	SYARIKAT PENGANGKUTAN R S	4
	SYARIKAT SUTERA EMAS ENTERPRISE	4
	THE TUARAN UNITED TRANSPORT COMPANY SDN. BHD.	18
	THE LUEN THUNG TANJONG ARU TRANSPORT CO. SDN. BHD.	16
	MY ALAP BANA TAWAU TRANSPORT SDN. BHD.	13
	KENDERAAN EDZA SDN. BHD.	9
	PERKHIDMATAN JASA KELUARGA BERSATU	9
	SYARIKAT ASIA TRANSPORT	8
	SYARIKAT PENGANGKUTAN SAGA	7
	SKT D. MY ENTERPRISE	6
	SYARIKAT PENGANGKUTAN ASRANI	6
	SYARIKAT PENGANGKUTAN SALEM ENTERPRISE	6
	TERAS JUTA ENTERPRISE	6
	D'JUARA TRANSPORT	5
	LABUK ROAD BUS COMPANY SDN BHD	5
	MAJAMA SDN BHD	5
	SYARIKAT PENGANGKUTAN JAYA MAWAR	5
	SYARIKAT SHEIKH BERSAUDARA	5
	SYT PENGANGKUTAN RAHMAT HIDAYA	5
	ALIF JAYA	4
	BENTENG JAYA ENTERPRISE	4
	BLUE SHUTTLE SDN. BHD.	4
	SKT. PENGANGKUTAN USPAR	4
	SYARIKAT ALITA ENTERPRISE	4
	SYARIKAT PENGANGKUTAN LIE	4
	SYARIKAT PENGANGKUTAN NAILA	4
	SYARIKAT PENGANGKUTAN R S	4
	SYARIKAT SUTERA EMAS ENTERPRISE	4
	JASA ENTERPRISE	3

NO. SOALAN: 663

	MIZARAH ENTERPRISE	3
	NUHA KEYSHA ENTERPRISE	3
	PAKKAMASE ENTERPRISE	3
	SALINA JAAF ENTERPRISE	3
	SHAMIL TRANSPORT AND SERVICES	3
	SYAKIRAH TRANSPORTATION	3
	SYARIKAT CAHAYA ENTERPRISE	3
	SYARIKAT FATIMAH ENTERPRISE	3
	SYARIKAT MRJ ENTERPRISE	3
	SYARIKAT MUHARIP BERSAUDARA	3
	SYARIKAT NELMI ENTERPRISE	3
	SYARIKAT NUR HAMIEDA JAYA	3
	SYARIKAT NUR HIDAYAH	3
	SYARIKAT PENGANGKUTAN ALI JAYA	3
	SYARIKAT PENGANGKUTAN ALIF	3
	SYARIKAT PENGANGKUTAN AN NUR ENTERPRISE	3
	SYARIKAT PENGANGKUTAN AYU ADRIANA	3
	SYARIKAT PENGANGKUTAN BAS JAYA DIRI	3
	SYARIKAT PENGANGKUTAN BERSAMA	3
	SYARIKAT PENGANGKUTAN CAHAYA SIDRAP	3
	SYARIKAT PENGANGKUTAN EZYAN & ADAM BERSAUDARA	3
	SYARIKAT PENGANGKUTAN FARADILLAH NADIA	3
	SYARIKAT PENGANGKUTAN GLOBAL	3
	SYARIKAT PENGANGKUTAN HAMSIR	3
	SYARIKAT PENGANGKUTAN IMPIAN JADI	3
	SYARIKAT PENGANGKUTAN JUMARIAH	3
	SYARIKAT PENGANGKUTAN KAMBAR MAS	3
	SYARIKAT PENGANGKUTAN MURNI	3
	SYARIKAT PENGANGKUTAN RAHIMAH	3
	SYARIKAT PENGANGKUTAN SAHARIL BERSAUDARA	3
	SYARIKAT PENGANGKUTAN SAM SEKELUARGA	3
	SYARIKAT PENGANGKUTAN SRI TINOSA	3
	SYARIKAT PERMAI TRANSPORT	3
	SYARIKAT RAKYAT BERSATU	3
	SYARIKAT SERIBU DINAR	3
	SYARIKAT SHAFIZA ENTERPRISE	3
	SYARIKAT SIRA	3
	SYARIKAT SRI ANA	3
	SYARIKAT TUNJANG WARISAN	3
	SYARIKAT TUTONG ENTERPRISE	3
	SYKT. PENGANGKUTAN SANHEY	3

NO. SOALAN: 663

	AHMAD ENTERPRISE	2
	SYARIKAT PENGANGKUTAN JAYA MAWAR	5
	SYARIKAT SHEIKH BERSAUDARA	5
	SYT PENGANGKUTAN RAHMAT HIDAYA	5
	ALIF JAYA	4
	BENTENG JAYA ENTERPRISE	4
	BLUE SHUTTLE SDN. BHD.	4
	SKT. PENGANGKUTAN USPAR	4
	SYARIKAT ALITA ENTERPRISE	4
	SYARIKAT PENGANGKUTAN LIE	4
	SYARIKAT PENGANGKUTAN NAILA	4
	SYARIKAT PENGANGKUTAN R S	4
	SYARIKAT SUTERA EMAS ENTERPRISE	4
	JASA ENTERPRISE	3
	MIZARAH ENTERPRISE	3
	NUHA KEYSHA ENTERPRISE	3
	PAKKAMASE ENTERPRISE	3
	SALINA JAAF ENTERPRISE	3
	SHAMIL TRANSPORT AND SERVICES	3
	SYAKIRAH TRANSPORTATION	3
	SYARIKAT CAHAYA ENTERPRISE	3
	SYARIKAT FATIMAH ENTERPRISE	3
	SYARIKAT MRJ ENTERPRISE	3
	SYARIKAT MUHARIP BERSAUDARA	3
	SYARIKAT NELMI ENTERPRISE	3
	SYARIKAT NUR HAMIEDA JAYA	3
	SYARIKAT NUR HIDAYAH	3
	SYARIKAT PENGANGKUTAN ALI JAYA	3
	SYARIKAT PENGANGKUTAN ALIF	3
	SYARIKAT PENGANGKUTAN AN NUR ENTERPRISE	3
	SYARIKAT PENGANGKUTAN AYU ADRIANA	3
	SYARIKAT PENGANGKUTAN BAS JAYA DIRI	3
	SYARIKAT PENGANGKUTAN BERSAMA	3
	SYARIKAT PENGANGKUTAN CAHAYA SIDRAP	3
	SYARIKAT PENGANGKUTAN EZYAN & ADAM BERSAUDARA	3
	SYARIKAT PENGANGKUTAN FARADILLAH NADIA	3
	SYARIKAT PENGANGKUTAN GLOBAL	3
	SYARIKAT PENGANGKUTAN HAMSIR	3
	SYARIKAT PENGANGKUTAN IMPIAN JADI	3
	SYARIKAT PENGANGKUTAN JUMARIAH	3
	SYARIKAT PENGANGKUTAN KAMBAR MAS	3

NO. SOALAN: 663

	SYARIKAT PENGANGKUTAN MURNI	3
	SYARIKAT PENGANGKUTAN RAHIMAH	3
	SYARIKAT PENGANGKUTAN SAHARIL BERSAUDARA	3
	SYARIKAT PENGANGKUTAN SAM SEKELUARGA	3
	SYARIKAT PENGANGKUTAN SRI TINOSA	3
	SYARIKAT PERMAI TRANSPORT	3
	SYARIKAT RAKYAT BERSATU	3
	SYARIKAT SERIBU DINAR	3
	SYARIKAT SHAFIZA ENTERPRISE	3
	SYARIKAT SIRA	3
	SYARIKAT SRI ANA	3
	SYARIKAT TUNJANG WARISAN	3
	SYARIKAT TUTONG ENTERPRISE	3
	SYKT. PENGANGKUTAN SANLEY	3
	AHMAD ENTERPRISE	2
	ASCO TRANSPORTATION	2
	CABANG JUTA SDN BHD	2
	HANTARAN MAHIR SDN. BHD.	2
	JAYA SUTERA ENTERPRISE	2
	JUITA ENTERPRISE	2
	KAMAL ENTERPRISE	2
	KASAH TRANSPORT (S) SDN BHD	2
	KITAGAS GEMILANG	2
	KUAMUT ENTERPRISE	2
	LAPPO TRANSPORT	2
	M & J ENTERPRISE	2
	MADZUE ENTERPRISE	2
	MAHANYZ ENTERPRISE	2
	MAIL MAZ ENTERPRISE	2
	MASTISAH ENTERPRISE	2
	NDF ENTERPRISE	2
	NFR ENTERPRISE	2
	NOORAS ENTERPRISE	2
	PENGANGKUTAN ALI SOPAN	2
	PENGANGKUTAN AMIL SEKELUARGA	2
	PENGANGKUTAN ASRUL	2
	PENGANGKUTAN ERRA MISAH	2
	PENGANGKUTAN INDRAWATI	2
	PENGANGKUTAN IZZAT BERSATU	2
	PENGANGKUTAN PADAIDI PADELO	2
	PENGANGKUTAN SEMBILAN SAUDARA	2
	PENGANGKUTAN SRI BAHAGIA	2

NO. SOALAN: 663

	PENGANGKUTAN SRI MELATI	2
	PERNIAGAAN SRI HARMONI	2
	PUTRA WAWASAN ENTERPRISE	2
	SYARIKAT PENGANGKUTAN KAMBAR MAS	3
	SYARIKAT PENGANGKUTAN MURNI	3
	SYARIKAT PENGANGKUTAN RAHIMAH	3
	SYARIKAT PENGANGKUTAN SAHARIL BERSAUDARA	3
	SYARIKAT PENGANGKUTAN SAM SEKELUARGA	3
	SYARIKAT PENGANGKUTAN SRI TINOSA	3
	SYARIKAT PERMAI TRANSPORT	3
	SYARIKAT RAKYAT BERSATU	3
	SYARIKAT SERIBU DINAR	3
	SYARIKAT SHAFIZA ENTERPRISE	3
	SYARIKAT SIRA	3
	SYARIKAT SRI ANA	3
	SYARIKAT TUNJANG WARISAN	3
	SYARIKAT TUTONG ENTERPRISE	3
	SYKT. PENGANGKUTAN SANAY	3
	AHMAD ENTERPRISE	2
	ASCO TRANSPORTATION	2
	CABANG JUTA SDN BHD	2
	HANTARAN MAHIR SDN. BHD.	2
	JAYA SUTERA ENTERPRISE	2
	JUITA ENTERPRISE	2
	KAMAL ENTERPRISE	2
	KASAH TRANSPORT (S) SDN BHD	2
	KITAGAS GEMILANG	2
	KUAMUT ENTERPRISE	2
	LAPPO TRANSPORT	2
	M & J ENTERPRISE	2
	MADZUE ENTERPRISE	2
	MAHANYZ ENTERPRISE	2
	MAIL MAZ ENTERPRISE	2
	MASTISAH ENTERPRISE	2
	NDF ENTERPRISE	2
	NFR ENTERPRISE	2
	NOORAS ENTERPRISE	2
	PENGANGKUTAN ALI SOPAN	2
	PENGANGKUTAN AMIL SEKELUARGA	2
	PENGANGKUTAN ASRUL	2
	PENGANGKUTAN ERRA MISAH	2
	PENGANGKUTAN INDRAWATI	2

NO. SOALAN: 663

	PENGANGKUTAN IZZAT BERSATU	2
	PENGANGKUTAN PADAIDI PADELO	2
	PENGANGKUTAN SEMBILAN SAUDARA	2
	PENGANGKUTAN SRI BAHAGIA	2
	PENGANGKUTAN SRI MELATI	2
	PERNIAGAAN SRI HARMONI	2
	PUTRA WAWASAN ENTERPRISE	2
	REAL HARVEST CORPORATION	2
	RND ENTERPRISE	2
	SABAR MENANTI ENTERPRISE	2
	SALI TRANSPORT ENTERPRISE	2
	SHALS ENTERPRISE	2
	SKT ASIA TRANSPORT	2
	SKT. D. RM ENTERPRISE	2
	SPEEDY ENTERPRISE	2
	SYARIKAT ALI ENTERPRISE	2
	SYARIKAT BERSAMA ENTERPRISE	2
	SYARIKAT CIRCLE LINE	2
	SYARIKAT DATU ZAINAL ABIDIN	2
	SYARIKAT HARIKARU	2
	SYARIKAT IMRAN JAYA ENTERPRISE	2
	SYARIKAT JAYA BONNE	2
	SYARIKAT JILLY ENTERPRISE	2
	SYARIKAT KENDERAAN BUMI ASLI	2
	SYARIKAT KUMT ENTERPRISE	2
	SYARIKAT L.S ENTERPRISE	2
	SYARIKAT LAGENDA	2
	SYARIKAT LEE BROS^ ENTERPRISE	2
	SYARIKAT M.R ENTERPRISE	2
	SYARIKAT MING TRANSPORT	2
	SYARIKAT MUNAH BERSAUDARA	2
	SYARIKAT NADI PUTRA	2
	SYARIKAT PENGANGKUTAN ACF MAJU	2
	SYARIKAT PENGANGKUTAN AHMAZ	2
	SYARIKAT PENGANGKUTAN AS ENTERPRISE	2
	SYARIKAT PENGANGKUTAN ASFARIZAT MAJU JAYA	2
	SYARIKAT PENGANGKUTAN ASRAF	2
	SYARIKAT PENGANGKUTAN AWAM LO TET FOH	2
	SYARIKAT PENGANGKUTAN AWAM MANN	2
	SYARIKAT PENGANGKUTAN AZMAN	2
	SYARIKAT PENGANGKUTAN AZWANI ENTERPRISE	2
	SYARIKAT PENGANGKUTAN BANDAR RAYA KINABALU	2

NO. SOALAN: 663

	SYARIKAT PENGANGKUTAN BANGAU	2
	SYARIKAT PENGANGKUTAN BAS MINI SALDA	2
	SYARIKAT PENGANGKUTAN BINA JAYA KITA	2
	SYARIKAT PENGANGKUTAN BUMI DESA	2
	SYARIKAT PENGANGKUTAN BUMI MAJU	2
	SYARIKAT PENGANGKUTAN BUNIMIN ENTERPRISE	2
	SYARIKAT PENGANGKUTAN DIENAFIZ	2
	SYARIKAT PENGANGKUTAN EDY	2
	SYARIKAT PENGANGKUTAN FARHANA ENTERPRISE	2
	SYARIKAT PENGANGKUTAN GK4F BERSAUDARA	2
	SYARIKAT PENGANGKUTAN GUNAL	2
	SYARIKAT PENGANGKUTAN HARI HARIMAU	2
	SYARIKAT PENGANGKUTAN ISHAM	2
	SYARIKAT PENGANGKUTAN IZZARANA	2
	SYARIKAT PENGANGKUTAN JALIL	2
	SYARIKAT RAKYAT BERSATU	3
	SYARIKAT SERIBU DINAR	3
	SYARIKAT SHAFIZA ENTERPRISE	3
	SYARIKAT SIRA	3
	SYARIKAT SRI ANA	3
	SYARIKAT TUNJANG WARISAN	3
	SYARIKAT TUTONG ENTERPRISE	3
	SYKT. PENGANGKUTAN SANLEY	3
	AHMAD ENTERPRISE	2
	ASCO TRANSPORTATION	2
	CABANG JUTA SDN BHD	2
	HANTARAN MAHIR SDN. BHD.	2
	JAYA SUTERA ENTERPRISE	2
	JUITA ENTERPRISE	2
	KAMAL ENTERPRISE	2
	KASAH TRANSPORT (S) SDN BHD	2
	KITAGAS GEMILANG	2
	KUAMUT ENTERPRISE	2
	LAPPO TRANSPORT	2
	M & J ENTERPRISE	2
	MADZUE ENTERPRISE	2
	MAHANYZ ENTERPRISE	2
	MAIL MAZ ENTERPRISE	2
	MASTISAH ENTERPRISE	2
	NDF ENTERPRISE	2
	NFR ENTERPRISE	2
	NOORAS ENTERPRISE	2

NO. SOALAN: 663

	PENGANGKUTAN ALI SOPAN	2
	PENGANGKUTAN AMIL SEKELUARGA	2
	PENGANGKUTAN ASRUL	2
	PENGANGKUTAN ERRA MISAH	2
	PENGANGKUTAN INDRAWATI	2
	PENGANGKUTAN IZZAT BERSATU	2
	PENGANGKUTAN PADAIDI PADELO	2
	PENGANGKUTAN SEMBILAN SAUDARA	2
	PENGANGKUTAN SRI BAHAGIA	2
	PENGANGKUTAN SRI MELATI	2
	PERNIAGAAN SRI HARMONI	2
	PUTRA WAWASAN ENTERPRISE	2
	REAL HARVEST CORPORATION	2
	RND ENTERPRISE	2
	SABAR MENANTI ENTERPRISE	2
	SALI TRANSPORT ENTERPRISE	2
	SHALS ENTERPRISE	2
	SKT ASIA TRANSPORT	2
	SKT. D. RM ENTERPRISE	2
	SPEEDY ENTERPRISE	2
	SYARIKAT ALI ENTERPRISE	2
	SYARIKAT BERSAMA ENTERPRISE	2
	SYARIKAT CIRCLE LINE	2
	SYARIKAT DATU ZAINAL ABIDIN	2
	SYARIKAT HARIKARU	2
	SYARIKAT IMRAN JAYA ENTERPRISE	2
	SYARIKAT JAYA BONNE	2
	SYARIKAT JILLY ENTERPRISE	2
	SYARIKAT KENDERAAN BUMI ASLI	2
	SYARIKAT KUMT ENTERPRISE	2
	SYARIKAT L.S ENTERPRISE	2
	SYARIKAT LAGENDA	2
	SYARIKAT LEE BROS^ ENTERPRISE	2
	SYARIKAT M.R ENTERPRISE	2
	SYARIKAT MING TRANSPORT	2
	SYARIKAT MUNAH BERSAUDARA	2
	SYARIKAT NADI PUTRA	2
	SYARIKAT PENGANGKUTAN ACF MAJU	2
	SYARIKAT PENGANGKUTAN AHMAZ	2
	SYARIKAT PENGANGKUTAN AS ENTERPRISE	2
	SYARIKAT PENGANGKUTAN ASFARIZAT MAJU JAYA	2
	SYARIKAT PENGANGKUTAN ASRAF	2

NO. SOALAN: 663

	SYARIKAT PENGANGKUTAN AWAM LO TET FOH	2
	SYARIKAT PENGANGKUTAN AWAM MANN	2
	SYARIKAT PENGANGKUTAN AZMAN	2
	SYARIKAT PENGANGKUTAN AZWANI ENTERPRISE	2
	SYARIKAT PENGANGKUTAN BANDAR RAYA KINABALU	2
	SYARIKAT PENGANGKUTAN BANGAU	2
	SYARIKAT PENGANGKUTAN BAS MINI SALDA	2
	SYARIKAT PENGANGKUTAN BINA JAYA KITA	2
	SYARIKAT PENGANGKUTAN BUMI DESA	2
	SYARIKAT PENGANGKUTAN BUMI MAJU	2
	SYARIKAT PENGANGKUTAN BUNIMIN ENTERPRISE	2
	SYARIKAT PENGANGKUTAN DIENAFIZ	2
	SYARIKAT PENGANGKUTAN EDY	2
	SYARIKAT PENGANGKUTAN FARHANA ENTERPRISE	2
	SYARIKAT PENGANGKUTAN GK4F BERSAUDARA	2
	SYARIKAT PENGANGKUTAN GUNAL	2
	SYARIKAT PENGANGKUTAN HARI HARIMAU	2
	SYARIKAT PENGANGKUTAN ISHAM	2
	SYARIKAT PENGANGKUTAN IZZARANA	2
	SYARIKAT PENGANGKUTAN JALIL	2
	SYARIKAT PENGANGKUTAN JALITA	2
	SYARIKAT PENGANGKUTAN JASA WIRA	2
	SYARIKAT PENGANGKUTAN JAYA BAKTI	2
	Syarikat Pengangkutan Jusai	2
	SYARIKAT PENGANGKUTAN JUTA MURNI	2
	SYARIKAT PENGANGKUTAN KADIR	2
	SYARIKAT PENGANGKUTAN KEH	2
	SYARIKAT PENGANGKUTAN KEMBARA	2
	SYARIKAT PENGANGKUTAN KURNIA JAYA	2
	SYARIKAT PENGANGKUTAN LEBUH RAYA	2
	SYARIKAT PENGANGKUTAN LIMA (5) BERSAUDARA	2
	SYARIKAT PENGANGKUTAN MASPUL	2
	SYARIKAT PENGANGKUTAN MAWI	2
	SYARIKAT PENGANGKUTAN MEWAH	2
	SYARIKAT PENGANGKUTAN MINI	2
	SYARIKAT PENGANGKUTAN N.D. BERSAUDARA	2
	SYARIKAT PENGANGKUTAN NUR QALESYAH	2
	SYARIKAT PENGANGKUTAN NURHAIDAH	2
	SYARIKAT PENGANGKUTAN NURUL SYAFIKA	2
	SYARIKAT PENGANGKUTAN PERDANA	2
	SYARIKAT PENGANGKUTAN PUNCAK MAS	2
	SYARIKAT PENGANGKUTAN PUTERI JAYA	2

NO. SOALAN: 663

	SYARIKAT PENGANGKUTAN RABEN ENTERPRISE	2
	SYARIKAT PENGANGKUTAN RAFIQI	2
	SYARIKAT PENGANGKUTAN RJ	2
	SYARIKAT PENGANGKUTAN S.B.M.	2
	SYARIKAT PENGANGKUTAN S.E	2
	SYARIKAT PENGANGKUTAN S.P.R.	2
	PENGANGKUTAN SRI MEMPAKUL	2
	SYARIKAT PENGANGKUTAN AMAS ENTERPRISE	2
	SYARIKAT PENGANGKUTAN HERNI .S.S	2
	SYARIKAT PENGANGKUTAN MANTEDAN	2
	SYARIKAT PENGANGKUTAN IMPIAN JRI	2
	SYARIKAT PENGANGKUTAN RAT	2
	SYARIKAT PENGANGKUTAN SADEEN	2
	SYARIKAT PENGANGKUTAN SAHIZAN	2
	SYARIKAT PENGANGKUTAN SAMAH	2
	SYARIKAT PENGANGKUTAN SEMPURNA	2
	SYARIKAT PENGANGKUTAN SERI BUDAYA	2
	SYARIKAT PENGANGKUTAN SHAH	2
	SYARIKAT PENGANGKUTAN SHAMSIAH II	2
	SYARIKAT PENGANGKUTAN SINAR TINUSA	2
	SYARIKAT PENGANGKUTAN SINJAYA	2
	SYARIKAT PENGANGKUTAN SYUKUR	2
	SYARIKAT PENGANGKUTAN TAMAN LOK KAWI	2
	SYARIKAT PENGANGKUTAN TAQWA	2
	SYARIKAT PENGANGKUTAN TEBOBON ENTERPRISE	2
	SYARIKAT PENGANGKUTAN TIONG LEMBAH	2
	SYARIKAT PENGANGKUTAN ZAHARAH	2
	SYARIKAT PENGANGKUTAN ZAMA ENTERPRISE	2
	SYARIKAT PENGANGKUTAN ZUL	2
	SYARIKAT PERKHIDMATAN INDAH JAYA	2
	SYARIKAT PERKHIDMATAN PENGANGKUTAN BAHAGIA	2
	SYARIKAT S.J.M.S	2
	SYARIKAT SANN	2
	SYARIKAT SAPUPU	2
	SYARIKAT SHARIF ENTERPRISE	2
	SYARIKAT SUTERA WARISAN	2
	SYARIKAT TANJUNG LABIAN	2
	SYARIKAT TAUFIK ENTERPRISE	2
	SYARIKAT YUDISING	2
	SYKT INDANG KASIH EXPRESS	2
	SYKT PENGANGKUTAN ANAK BUMIPUTERA	2
	SYKT PENGANGKUTAN DIRI MAJU	2

NO. SOALAN: 663

	SYT PENGANGKUTAN ARINA BERSAUDARA	2
	SYT ROSMINAH BERSAUDARA	2
	SYT. PENGANGKUTAN ILHAM	2
	SYT. PENGANGKUTAN ZAH SIR	2
	USAHA BONE SDN BHD	2
	WARISAN TEPAT	2
	313 ENTERPRISE	1
	A.A TRANSPORT	1
	ABANG ENTERPRISE	1
	ABD AZIZ BIN KAZZA	1
	ABD RAHMAN BIN AMBAR	1
	ABDUL HAMID BIN MUSA	1
	ABDUL JALIL BIN BERAHIM	1
	ABDUL RAHMAN BIN SAZALI	1
	ABDUL TALIP BIN MANDIKUN	1
	ADI SURAWIJAYA BIN SUTAJIL	1
	ADJID BIN SADOALANI	1
	ADZMI ENTERPRISE	1
	AGEN USAHA JAYA	1
	AHAMAT BIN AKUB	1
	ALAI BIN SUPOT	1
	ALAM ENTERPRISE	1
	ALIMUDDIN BIN NOHONG	1
	ALMAH ENTERPRISE	1
	AMIRUDDIN BIN SAKIR	1
	ANAK SABAH ENTERPRISE	1
	ANDI SABRI BIN SUDIRMAN	1
	ANDI UMUNG TRANSPORT	1
	ANDIKA ENTERPRISE	1
	ANUAR ENTERPRISE	1
	ANUGERAH ANGGUN ENTERPRISE	1
	ANUGERAH MEWAH	1
	ANUN ENTERPRISE	1
	AR RAZAK KONTRAKTOR	1
	ARIBFIN BIN TAMRIN	1
	ARUN J.ENTERPRISE	1
	ASLANNS ENTERPRISE	1
	ASLINAH BINTI AMOR	1
	ATHIRA ENTERPRISE	1
	AWANG KU FADDLEE BIN AWANG LATIP	1
	AWANGKU ENTERPRISE	1
	AZIMAH ENTERPRISE	1

NO. SOALAN: 663

	BACHO BIN BANTAGI	1
	BANTENG JAYA ENTERPRISE	1
	BENGSON BIN DANDONG	1
	BISTARI ENTERPRISE	1
	BOLONG ENTERPRISE	1
	BOMBERS TRANSKOTA	1
	BUDGET SUCCESS SDN BHD	1
	BUDIH BIN RODING	1
	BUMI BERTUAH ENTERPRISE	1
	CAHAYA SABAH ENTERPRISE	1
	CHARLES KONG CHAIN VUI	1
	CHONG CHIEW YIN	1
	D.R.TRANSPORT	1
	DALUS @ DEANY BIN LINDAAN	1
	DAMAN SARAH ENTERPRISE	1
	DAMIL BIN SUBAN	1
	DANIES TRANSPORT	1
	DARMAN BIN DAPI	1
	DARMAWATI ENTERPRISE	1
	DONATIAN BIN KOIJIN	1
	DORKAS BINTI LUKAS	1
	DULANG ENTERPRISE	1
	DUSUP BIN DOLIMBU	1
	EDDY BIN DANAN	1
	EEDAAR ENTERPRISE	1
	ERA BALUNG ENTERPRISE	1
	ERA ENTERPRISE	1
	ERNAWATI BINTI RASYID	1
	ESQUIRE ENTERPRISE	1
	EZZA ENTERPRISE	1
	FARITH ENTERPRISE	1
	FIRDAUS BIN ALI	1
	FITRI ANI JAYA ENTERPRISE	1
	FRIDIANSHA BIN HASSAN	1
	G & H TRANSPORT	1
	GALABI @ PETRUS BIN DOLINTING	1
	GIVEN GRACE TRANSPORT	1
	GK5F ENTERPRISE	1
	GODON JAYA ENTERPRISE	1
	GULJUMAN BIN FAKIR MOHAMMAD	1
	HAFIZ ENTERPRISE	1
	HAIDAR ALI BIN SYED ROUF SHAH	1

NO. SOALAN: 663

	HAIKAL ENTERPRISE	1
	HAJIMA ENTERPRISE	1
	HAMDY ENTERPRISE	1
	HASMIA BINTI HANSAH	1
	HERNA ENTERPRISE	1
	HERWIN BIN BEDDU	1
	IDRIS BIN RAPPE	1
	INISMAWATI BINTI YUSUP	1
	ISKANDAR ENTERPRISE	1
	ISMAIL BIN DURAI	1
	J & A ENTERPRISE	1
	JAENAP ENTERPRISE	1
	JAGUH ENTERPRISE	1
	JAIS ENTERPRISE	1
	JAMINAH BT TAJAN	1
	JAS ENTERPRISE	1
	JAYA INDAH TRANSPORT	1
	JEBAT ENTERPRISE	1
	JESSICA TRADING	1
	JOUTIN @ TABURUI BIN JUMBIN	1
	JUARA ENTERPRISE	1
	JUHIN BIN LOPOH	1
	JUMBO ENTERPRISE	1
	JUMILAH ENTERPRISE	1
	KADIR BIN DIHING	1
	KAK MAS ENTERPRISE	1
	KAMAL BIN HAJI SIBLI	1
	KAPSAH TRANSPORT ENTERPRISE	1
	KARISMATEK ENTERPRISE	1
	KASIM BIN HASIM	1
	KM ENTERPRISE	1
	KOPERASI KAKITANGAN TAMAN-TAMAN SABAH BERHAD	1
	KOPERASI KENDERAAN BABAGON BERHAD	1
	KOPERASI SERBAGUNA PENEROKA RANCANGAN SUNGAI MANILA BHD.	1
	KUMPULAN SRI PENGANGKUTAN KK	1
	LABATJO BIN TAGILIN	1
	LIMBAHAU ENTERPRISE	1
	MAAROF BIN BELOK	1
	MADANG CORPORATION	1
	MAGSUKUL TRANSPORT	1
	MAHA ENTERPRISE	1

NO. SOALAN: 663

	MAHAL ENTERPRISE	1
	MAHIRZ ENTERPRISE	1
	MAIDIN BIN LANTAI	1
	MALANGANG ENTERPRISE	1
	MANDAT ENTERPRISE	1
	MARIAM TRANSPORT	1
	MAS AYU ENTERPRISE	1
	MAS ENTERPRISE	1
	MAS TANJUNG CORPORATION	1
	MAZLIN ENTERPRISE	1
	MB ENTERPRISE	1
	MESRA ENTERPRISE	1
	MFQ ENTERPRISE	1
	MIRA BINTI ABU NAWAS	1
	MIZUME ENTERPRISE SDN. BHD	1
	MMK ENTERPRISE	1
	MOH AMIN BIN TEMMU	1
	MOHAMAD BIN AG. SAMAN	1
	MOHAMAD SALIM BIN MOSTYN	1
	MOHD ADLAN BIN GULAM	1
	MOHD AMIN BIN MEDIA	1
	MOHD AZIWAN BIN BASRI	1
	MOHD SAID BIN AGYA	1
	MUHAMAD SHAN BIN ALIMALDAN	1
	MUHAMMAD AKHBAR BIN AZIS	1
	MUHD ENTERPRISE	1
	MUKTI SDN BHD	1
	MUSLI ENTERPRISE	1
	MUSTIKA ENTERPRISE SDN. BHD.	1
	MUTIARA ENTERPRISE	1
	N.B.A TRANSPORT CO	1
	NADI KOTA	1
	NAHARUDIN BIN SAING	1
	NASIP ENTERPRISE	1
	NAZRY ENTERPRISE	1
	NG SU NGUN @ ABEL NG	1
	NG SU YIN @ PETER	1
	NIPPI BIN TADDANG	1
	NIZAM JAYA ENTERPRISE	1
	NOR ENTERPRISE	1
	NOR NURUL AIN BINTI KAMARUDIN	1
	NORIZAN ENTERPRISE	1

NO. SOALAN: 663

	NORLENIH BINTI ROSLEE	1
	NORMA BINTI MOHD ELIH	1
	NORMAN ENTERPRISE	1
	NORMAWATI BINTI HALIM	1
	NUR ANA TRANSPORT	1
	NURHAYATI BINTI LAIMAN	1
	NURIJAYA PENGANGKUTAN ENTERPRISE	1
	NURSYAM ENTERPRISE	1
	OPTISJAYA SDN BHD	1
	OWEN ENTERPRISE	1
	P & R WARISAN	1
	PAMMIN USAHA BERSAUDARA	1
	PAOL @ PAUL BIN BATTAH	1
	PARALLA TRANSPORT	1
	PENGANGKUTAN ASPAL	1
	PENGANGKUTAN AWAM ENTERPRISE	1
	PENGANGKUTAN AWAM RANOKAR	1
	PENGANGKUTAN AWAM ROSLI	1
	PENGANGKUTAN AZIRA	1
	PENGANGKUTAN AZRUL	1
	PENGANGKUTAN BAS MINI JAS ENTERPRISE	1
	PENGANGKUTAN BUMI ENTERPRISE	1
	PENGANGKUTAN BUNGA KASTURI	1
	PENGANGKUTAN CEKAP	1
	PENGANGKUTAN DJ	1
	PENGANGKUTAN ENTERPRISE	1
	PENGANGKUTAN FARAH NURFATIN	1
	PENGANGKUTAN FATIMAH	1
	PENGANGKUTAN GERAK MAJU	1
	PENGANGKUTAN HAIRI	1
	PENGANGKUTAN J.A ENTERPRISE	1
	PENGANGKUTAN JK SYAHKHAL	1
	PENGANGKUTAN JOE	1
	PENGANGKUTAN JUM	1
	PENGANGKUTAN KAMNOR ENTERPRISE	1
	PENGANGKUTAN LANTONA ENTERPRISE	1
	PENGANGKUTAN LAVAH	1
	PENGANGKUTAN LIMAN ENTERPRISE	1
	PENGANGKUTAN M.S	1
	PENGANGKUTAN MBF GEMILANG	1
	PENGANGKUTAN NAYSAN	1
	PENGANGKUTAN NORHASWIRA	1

NO. SOALAN: 663

	PENGANGKUTAN NURAZ	1
	PENGANGKUTAN NURHAS	1
	PENGANGKUTAN NURMUSAFI ENTERPRISE	1
	PENGANGKUTAN RAMLAN BERSAUDARA	1
	PENGANGKUTAN RAMLI	1
	PENGANGKUTAN RASA SAYANG MINI BAS	1
	PENGANGKUTAN RAYHAN	1
	PENGANGKUTAN RD	1
	PENGANGKUTAN SAHILAN	1
	PENGANGKUTAN SAMIRAH	1
	PENGANGKUTAN SAR	1
	PENGANGKUTAN SINAR HARAPAN RD	1
	PENGANGKUTAN SMY	1
	PENGANGKUTAN SRI SUMBER ANAK BALUNG	1
	PENGANGKUTAN SSM	1
	PENGANGKUTAN SURIA	1
	PENGANGKUTAN SYAFIQ SRI JAYA AGENCY	1
	PENGANGKUTAN TAWAKAL	1
	PENGANGKUTAN USMAN DAKIT EXPRESS	1
	PENGANGKUTAN ZAHAR	1
	PENGANGKUTAN ZIKRI	1
	PENUH JAYA ENTERPRISE	1
	PERKHIDMATAN BINA USAHA	1
	PERKHIDMATAN D.A. ENTERPRISE	1
	PERKHIDMATAN DINAMIK	1
	PERKHIDMATAN INTRA JAYA	1
	PERKHIDMATAN JAYA BERSAMA	1
	PERKHIDMATAN PENGANGKUTAN BAS MINI TAKIM	1
	PERNIAGAAN DESA PERMAI	1
	PERNIAGAAN KASMAH	1
	PERNIAGAAN SAAM	1
	PHILOMENA TRANSPORT	1
	PURI WARISAN ENTERPRISE	1
	PURNAMA ENTERPRISE	1
	PUTRA GUDON ENTERPRISE	1
	QAYYUM ENTERPRISE	1
	R.D ENTERPRISE	1
	RAHIMAH BINTI ABDILA	1
	RAHMAN TRANSPORT	1
	RAMLAN BIN MANCHING	1
	RASHID JAYA ENTERPRISE	1
	RAZALI BIN DAMIT	1

NO. SOALAN: 663

	REZEKI ENTERPRISE	1
	RIMATAJAM SDN BHD	1
	ROBAT BIN UGAU @ RIBOT BIN UGAU	1
	ROSDIN @ N & S ENTERPRISE	1
	ROSLAN BIN BAKI	1
	RUKIAH BINTI RODDING	1
	RUSMAN BIN JAPALUS	1
	S. RUHA ENTERPRISE	1
	S.B ENTERPRISE	1
	S.M TRANSPORT	1
	SAFWAN TRANSPORT	1
	SAHIDANI BIN TAUKASI	1
	SAIDAH BINTI MAJID	1
	SAIDI BIN ARSIN	1
	SALMAN TRANSPORT	1
	SALMIA ENTERPRISE	1
	SAMM ENTERPRISE	1
	SANITA BINTI SAPENA	1
	SARI ENTERPRISE	1
	SARINA ENTERPRISE	1
	SELATAN ENTERPRISE	1
	SHAM SALAMAE TRANSPORT	1
	SIDI BIN MADI	1
	SILATURAHIM ENTERPRISE	1
	SKT PENGANGKUTAN INGINJAYA	1
	SKT PENGANGKUTAN MURNI	1
	SMAIL NASIONAL TRANSPORT	1
	SRI BARU ENTERPRISE	1
	SRI KENANGAN HAJI WASLI	1
	SRI PURNAMA TRANSPORT	1
	SRI WHITE HOUSE ENTERPRISE	1
	SUANAM BIN MARADAN	1
	SUHAI DAH ENTERPRISE	1
	SUHARDI BIN IDRIS	1
	SUHARTO BIN ATAWA	1
	SUHENI BINTI SURI	1
	SULIM ENTERPRISE	1
	SUOK DAMPAK ENTERPRISE	1
	SURIANSYAH ENTERPRISE	1
	SUTERA KINABALU TRANSPORT	1
	SYAHARUDDIN BIN ABD PATU	1
	SYARIKAT AFIQ ENTERPRISE	1

NO. SOALAN: 663

	SYARIKAT AFIZAH BERSAUDARA	1
	SYARIKAT AG SRI TANJUNG	1
	SYARIKAT AG. SRI TANJUNG	1
	SYARIKAT AISAH ENTERPRISE	1
	SYARIKAT AMMIERA	1
	SYARIKAT AMMZAI ENTERPRISE	1
	SYARIKAT AMN ENTERPRISE	1
	SYARIKAT ANAK-ANAKKU SAYANG	1
	SYARIKAT AZIZI BERSAUDARA	1
	SYARIKAT AZWA ENTERPRISE	1
	SYARIKAT BEKK	1
	SYARIKAT BERJAYA PENGANGKUTAN AWAM JINIH	1
	SYARIKAT BERSAMA SELAMANYA	1
	SYARIKAT BERSAUDARA	1
	SYARIKAT BETA HAMU	1
	SYARIKAT BIS ENTERPRISE	1
	SYARIKAT C.J.J ENTERPRISE	1
	SYARIKAT CENTRE LINER	1
	SYARIKAT CHUNG & SON TRANSPORT	1
	SYARIKAT DAYYAN UMayRAH	1
	SYARIKAT DICKSON CHONG	1
	SYARIKAT DZ ENTERPRISE	1
	SYARIKAT FARAH TRANSPORT	1
	SYARIKAT FATRAH JAYA	1
	Syarikat Firdaus	1
	SYARIKAT GG ENTERPRISE	1
	SYARIKAT GOGA TRANSPORT	1
	SYARIKAT HARAPAN KEMBALI	1
	SYARIKAT HARSAH ENTERPRISE	1
	SYARIKAT HIDAYAH	1
	SYARIKAT HUSNI JAYA ENTERPRISE	1
	SYARIKAT ISSI (T) TRANSPORT	1
	SYARIKAT JAFS ENTERPRISE	1
	SYARIKAT JAMAL	1
	SYARIKAT JAMILAH	1
	SYARIKAT JER-A	1
	SYARIKAT JL ENTERPRISE	1
	SYARIKAT JULIA	1
	SYARIKAT KEJORA	1
	SYARIKAT KERJASAMA ENTERPRISE	1
	SYARIKAT KIAH ENTERPRISE	1
	SYARIKAT KOTA PADAS TRANSPORT ENTERPRISE	1

NO. SOALAN: 663

	SYARIKAT LAI & SON TRANSPORT ENTERPRISE	1
	SYARIKAT LAYA ENTERPRISE	1
	SYARIKAT LUQMAN BERSAUDARA	1
	SYARIKAT M & J COMMUNICATION	1
	SYARIKAT MAHKOTA	1
	SYARIKAT MAJULAT ENTERPRISE	1
	SYARIKAT MASBUL ENTERPRISE	1
	SYARIKAT MASYARAKAT ENTERPRISE	1
	SYARIKAT MAYA ENTERPRISE	1
	SYARIKAT MOHD TON	1
	SYARIKAT MUBA ENTERPRISE	1
	SYARIKAT MUHAMMAD REZKY ENTERPRISE	1
	SYARIKAT MURNI INDAH	1
	SYARIKAT MUSTIKA	1
	SYARIKAT MUTIARA ENTERPRISE	1
	SYARIKAT N F AQILA	1
	SYARIKAT NAZRI TRANSPORT	1
	SYARIKAT NEKAD JAYA	1
	SYARIKAT NOORJAN HJ. KUSHAL KHAN	1
	SYARIKAT NOORLIZA ENTERPRISE	1
	SYARIKAT NOR IMPIAN ENTERPRISE	1
	SYARIKAT NUR DALILAH	1
	SYARIKAT NURDEE	1
	SYARIKAT NURLELA ENTERPRISE	1
	SYARIKAT NURSABRINA	1
	SYARIKAT NURUL	1
	SYARIKAT NURUL AISAH	1
	SYARIKAT PARMAN EXPRESS	1
	SYARIKAT PELITA BUMI ENTERPRISE	1
	SYARIKAT PENGANGKUTAN (M) TRANSPORT	1
	SYARIKAT PENGANGKUTAN A G M	1
	SYARIKAT PENGANGKUTAN A'AN	1
	SYARIKAT PENGANGKUTAN ABADI	1
	SYARIKAT PENGANGKUTAN ABD HARUN	1
	SYARIKAT PENGANGKUTAN ABDUL GAFFUR BERSAUDARA	1
	SYARIKAT PENGANGKUTAN ABDUL MALIK	1
	SYARIKAT PENGANGKUTAN ADUA ENTERPRISE	1
	SYARIKAT PENGANGKUTAN ADYAN	1
	SYARIKAT PENGANGKUTAN AFADZMIESA	1
	SYARIKAT PENGANGKUTAN AFIQ BERSAUDARA	1
	SYARIKAT PENGANGKUTAN AG	1

NO. SOALAN: 663

	SYARIKAT PENGANGKUTAN AJANA	1
	SYARIKAT PENGANGKUTAN AKMAL	1
	SYARIKAT PENGANGKUTAN AL - MUBARAQ	1
	SYARIKAT PENGANGKUTAN AL AMIN	1
	SYARIKAT PENGANGKUTAN AL AZMIR	1
	SYARIKAT PENGANGKUTAN ALHAMJA	1
	SYARIKAT PENGANGKUTAN ALIAS	1
	SYARIKAT PENGANGKUTAN AL-KADAF	1
	SYARIKAT PENGANGKUTAN AME	1
	SYARIKAT PENGANGKUTAN AMEY	1
	SYARIKAT PENGANGKUTAN AMIDA	1
	SYARIKAT PENGANGKUTAN AMSIA	1
	SYARIKAT PENGANGKUTAN ANAK BUMIPUTRA TONGKALLOH ISNIHE	1
	SYARIKAT PENGANGKUTAN ANDA	1
	SYARIKAT PENGANGKUTAN ANDIKAYA	1
	SYARIKAT PENGANGKUTAN ANDY SHAH PUTRA	1
	SYARIKAT PENGANGKUTAN ANNA SEKELUARGA	1
	SYARIKAT PENGANGKUTAN ANUGERAH	1
	SYARIKAT PENGANGKUTAN ARA	1
	SYARIKAT PENGANGKUTAN ARDIANSAH	1
	SYARIKAT PENGANGKUTAN ARMAN	1
	SYARIKAT PENGANGKUTAN AR-NUR	1
	SYARIKAT PENGANGKUTAN ASBUDI	1
	SYARIKAT PENGANGKUTAN ASIAH	1
	SYARIKAT PENGANGKUTAN AWAL	1
	SYARIKAT PENGANGKUTAN AWAM	1
	SYARIKAT PENGANGKUTAN AWAM ABBAS	1
	SYARIKAT PENGANGKUTAN AWAM BSR	1
	SYARIKAT PENGANGKUTAN AWAM JARINA	1
	SYARIKAT PENGANGKUTAN AWAM M.H JAYA MAS	1
	SYARIKAT PENGANGKUTAN AWAM RAS JAYA	1
	SYARIKAT PENGANGKUTAN AZA ENTERPRISE	1
	SYARIKAT PENGANGKUTAN AZIZ	1
	SYARIKAT PENGANGKUTAN AZIZUL	1
	SYARIKAT PENGANGKUTAN BABA ENTERPRISE	1
	SYARIKAT PENGANGKUTAN BAHARUDIN	1
	SYARIKAT PENGANGKUTAN BAKTI	1
	SYARIKAT PENGANGKUTAN BANI	1
	SYARIKAT PENGANGKUTAN BANNY	1
	SYARIKAT PENGANGKUTAN BARUS	1
	SYARIKAT PENGANGKUTAN BAS BUMIPUTERA	1

NO. SOALAN: 663

	SYARIKAT PENGANGKUTAN BAS KG. LIKAS	1
	SYARIKAT PENGANGKUTAN BAS NOOR HAFIZAH	1
	SYARIKAT PENGANGKUTAN BASLINA	1
	SYARIKAT PENGANGKUTAN BATMAN	1
	SYARIKAT PENGANGKUTAN BERKAT B.Y	1
	SYARIKAT PENGANGKUTAN BERKAT USAHA ENTERPRISE	1
	SYARIKAT PENGANGKUTAN BERSAMA ANDA	1
	SYARIKAT PENGANGKUTAN BETANGAN BARU	1
	SYARIKAT PENGANGKUTAN BINTANG BARU	1
	SYARIKAT PENGANGKUTAN BUMI JATI	1
	SYARIKAT PENGANGKUTAN BUNGA JADI	1
	SYARIKAT PENGANGKUTAN BUNGA RAYA	1
	SYARIKAT PENGANGKUTAN CAHAYA BULAN	1
	SYARIKAT PENGANGKUTAN CEMPAK ENTERPRISE	1
	SYARIKAT PENGANGKUTAN CENDERAKASIH	1
	SYARIKAT PENGANGKUTAN CHE YAH	1
	SYARIKAT PENGANGKUTAN CIN-CIN SI	1
	SYARIKAT PENGANGKUTAN DAHANA ENTERPRISE	1
	SYARIKAT PENGANGKUTAN DALLEN	1
	SYARIKAT PENGANGKUTAN DAYANG NURUL SHAFIQAH	1
	SYARIKAT PENGANGKUTAN DELIMA BTE AMIR	1
	SYARIKAT PENGANGKUTAN DEWI RAM	1
	SYARIKAT PENGANGKUTAN DHIA	1
	SYARIKAT PENGANGKUTAN DIAN	1
	SYARIKAT PENGANGKUTAN DRUS	1
	SYARIKAT PENGANGKUTAN DUA SAUDARA	1
	SYARIKAT PENGANGKUTAN DURIN BERSAUDARA	1
	SYARIKAT PENGANGKUTAN EMA	1
	SYARIKAT PENGANGKUTAN EMPAT SAUDARA	1
	SYARIKAT PENGANGKUTAN ERLIN BATRISHAH	1
	SYARIKAT PENGANGKUTAN EVE ENTERPRISE	1
	SYARIKAT PENGANGKUTAN EVIS (2)	1
	SYARIKAT PENGANGKUTAN FATYMAYA	1
	SYARIKAT PENGANGKUTAN FUNG	1
	SYARIKAT PENGANGKUTAN GAH	1
	SYARIKAT PENGANGKUTAN GUDON JATI	1
	SYARIKAT PENGANGKUTAN H.H	1
	SYARIKAT PENGANGKUTAN HADIMIFZAL	1
	SYARIKAT PENGANGKUTAN HALIDAH	1
	SYARIKAT PENGANGKUTAN HALIM ENTERPRISE	1
	SYARIKAT PENGANGKUTAN HAMIDA	1
	SYARIKAT PENGANGKUTAN HAN'S	1

NO. SOALAN: 663

	SYARIKAT PENGANGKUTAN HARDIANA	1
	SYARIKAT PENGANGKUTAN HARYANTI	1
	SYARIKAT PENGANGKUTAN HASLINDAH	1
	SYARIKAT PENGANGKUTAN HASNAH	1
	SYARIKAT PENGANGKUTAN HASTINA	1
	SYARIKAT PENGANGKUTAN HASZ	1
	SYARIKAT PENGANGKUTAN HEDZRIE	1
	SYARIKAT PENGANGKUTAN HIKMAH ENTERPRISE	1
	SYARIKAT PENGANGKUTAN HIZAM	1
	SYARIKAT PENGANGKUTAN HJH DAIRAH SEKELUARGA	1
	SYARIKAT PENGANGKUTAN HS	1
	SYARIKAT PENGANGKUTAN ILAHAN ENTERPRISE	1
	SYARIKAT PENGANGKUTAN INDAH JAYA	1
	SYARIKAT PENGANGKUTAN INDAH KHIDMAT	1
	SYARIKAT PENGANGKUTAN IQMAL REZEQIE	1
	SYARIKAT PENGANGKUTAN IRDA BERSAUDARA	1
	SYARIKAT PENGANGKUTAN IRHAM	1
	SYARIKAT PENGANGKUTAN ISTIQAMAH	1
	SYARIKAT PENGANGKUTAN J.A	1
	SYARIKAT PENGANGKUTAN J.S	1
	SYARIKAT PENGANGKUTAN JAHIMA	1
	SYARIKAT PENGANGKUTAN JAJARAI KANYO	1
	SYARIKAT PENGANGKUTAN JAMADI	1
	SYARIKAT PENGANGKUTAN JANANG	1
	SYARIKAT PENGANGKUTAN JANNA	1
	SYARIKAT PENGANGKUTAN JAYA	1
	SYARIKAT PENGANGKUTAN JAYA DIRI	1
	SYARIKAT PENGANGKUTAN JAYA DIRI BUMIPUTRA	1
	SYARIKAT PENGANGKUTAN JIY JIY ENTERPRISE	1
	SYARIKAT PENGANGKUTAN JOE	1
	SYARIKAT PENGANGKUTAN JUAR ENTERPRISE	1
	SYARIKAT PENGANGKUTAN JURIAH	1
	SYARIKAT PENGANGKUTAN JUSLIAH	1
	SYARIKAT PENGANGKUTAN K.P ENTERPRISE	1
	SYARIKAT PENGANGKUTAN KALING	1
	SYARIKAT PENGANGKUTAN KALLA JAYA	1
	Syarikat Pengangkutan Kapsah	1
	SYARIKAT PENGANGKUTAN KARISMA	1
	SYARIKAT PENGANGKUTAN KARYA EMAS	1
	SYARIKAT PENGANGKUTAN KARYMAZ	1
	SYARIKAT PENGANGKUTAN KASSRI JAYA	1
	SYARIKAT PENGANGKUTAN KELUARGA BAHAGIA	1

NO. SOALAN: 663

	SYARIKAT PENGANGKUTAN KENANGAN MANIS	1
	SYARIKAT PENGANGKUTAN KG. ANDUS PAPAR	1
	SYARIKAT PENGANGKUTAN KHAIRIA	1
	SYARIKAT PENGANGKUTAN KHALIDA	1
	SYARIKAT PENGANGKUTAN KODUNTUT	1
	SYARIKAT PENGANGKUTAN KOTA	1
	SYARIKAT PENGANGKUTAN L&Y	1
	SYARIKAT PENGANGKUTAN LAHAILA ENTERPRISE	1
	SYARIKAT PENGANGKUTAN LAMSON	1
	SYARIKAT PENGANGKUTAN LARIS	1
	SYARIKAT PENGANGKUTAN LESTER	1
	SYARIKAT PENGANGKUTAN LIZA AMIN	1
	SYARIKAT PENGANGKUTAN LUMIN ENTERPRISE	1
	SYARIKAT PENGANGKUTAN LYNIE	1
	SYARIKAT PENGANGKUTAN M & M	1
	SYARIKAT PENGANGKUTAN M.B	1
	SYARIKAT PENGANGKUTAN M.H BUNGA MAS	1
	SYARIKAT PENGANGKUTAN MADU	1
	SYARIKAT PENGANGKUTAN MAHKOTA	1
	SYARIKAT PENGANGKUTAN MAJU MANTAP	1
	SYARIKAT PENGANGKUTAN MALAWA	1
	SYARIKAT PENGANGKUTAN MALAWALI	1
	SYARIKAT PENGANGKUTAN MAN	1
	SYARIKAT PENGANGKUTAN MAN JAYA	1
	SYARIKAT PENGANGKUTAN MANGKALAI MAJU	1
	SYARIKAT PENGANGKUTAN MANTAP	1
	SYARIKAT PENGANGKUTAN MANTOB	1
	SYARIKAT PENGANGKUTAN MARANNU	1
	SYARIKAT PENGANGKUTAN MARAU ARAU	1
	SYARIKAT PENGANGKUTAN MAS ENTERPRISE	1
	SYARIKAT PENGANGKUTAN MASLAN	1
	SYARIKAT PENGANGKUTAN MASNAH	1
	SYARIKAT PENGANGKUTAN MASYITA	1
	SYARIKAT PENGANGKUTAN MAUFAKAT	1
	SYARIKAT PENGANGKUTAN MEGA JAYA	1
	SYARIKAT PENGANGKUTAN MELATI	1
	SYARIKAT PENGANGKUTAN MEZ	1
	SYARIKAT PENGANGKUTAN MILENIUM	1
	SYARIKAT PENGANGKUTAN MINI BAS KOPUNGIT	1
	SYARIKAT PENGANGKUTAN MIZAN	1
	SYARIKAT PENGANGKUTAN MLBA	1
	SYARIKAT PENGANGKUTAN MOHD AZLANSYAH	1

NO. SOALAN: 663

	SYARIKAT PENGANGKUTAN MOHD DIANSYAH	1
	SYARIKAT PENGANGKUTAN MOHD FAUZI	1
	SYARIKAT PENGANGKUTAN MOHD IZWAN ENTERPRISE	1
	SYARIKAT PENGANGKUTAN MYDA	1
	SYARIKAT PENGANGKUTAN NADZWINA	1
	SYARIKAT PENGANGKUTAN NAIM	1
	SYARIKAT PENGANGKUTAN NAZATIQA IMAN	1
	SYARIKAT PENGANGKUTAN NITA	1
	SYARIKAT PENGANGKUTAN NIZAR	1
	SYARIKAT PENGANGKUTAN NORBAYAH	1
	SYARIKAT PENGANGKUTAN NORZANI	1
	SYARIKAT PENGANGKUTAN NUR AINON	1
	SYARIKAT PENGANGKUTAN NURALIN	1
	SYARIKAT PENGANGKUTAN NURHANI SEKELUARGA	1
	SYARIKAT PENGANGKUTAN NURHAZWIA	1
	SYARIKAT PENGANGKUTAN NURI	1
	SYARIKAT PENGANGKUTAN NURI (SABAH)	1
	SYARIKAT PENGANGKUTAN NURSAIFUL	1
	SYARIKAT PENGANGKUTAN NURSYAZLIANA	1
	SYARIKAT PENGANGKUTAN P & M	1
	SYARIKAT PENGANGKUTAN P.P ENTERPRISE	1
	SYARIKAT PENGANGKUTAN PANG & SON'S	1
	SYARIKAT PENGANGKUTAN PELAYARAN	1
	SYARIKAT PENGANGKUTAN PENGASIH	1
	SYARIKAT PENGANGKUTAN PERKHIDMATAN WAWASAN	1
	SYARIKAT PENGANGKUTAN PERMATA ILHAM	1
	SYARIKAT PENGANGKUTAN PERSAUDARAAN	1
	SYARIKAT PENGANGKUTAN PUSAKA	1
	SYARIKAT PENGANGKUTAN PUTRA LOKUB PERMAI	1
	SYARIKAT PENGANGKUTAN RADIENSYAH	1
	SYARIKAT PENGANGKUTAN RAHMAT JAYA	1
	SYARIKAT PENGANGKUTAN RAIHANA	1
	SYARIKAT PENGANGKUTAN RAMSYAH	1
	SYARIKAT PENGANGKUTAN RANGGA	1
	SYARIKAT PENGANGKUTAN RAS EXPRESS	1
	SYARIKAT PENGANGKUTAN RASA SAYANG	1
	SYARIKAT PENGANGKUTAN RASIT	1
	SYARIKAT PENGANGKUTAN RASMIE JAYA	1
	SYARIKAT PENGANGKUTAN RH	1
	SYARIKAT PENGANGKUTAN RHM/3J'S	1
	SYARIKAT PENGANGKUTAN RINDANG	1
	SYARIKAT PENGANGKUTAN ROBASIAH	1

NO. SOALAN: 663

	SYARIKAT PENGANGKUTAN ROHAILAN	1
	SYARIKAT PENGANGKUTAN ROHAINAH	1
	SYARIKAT PENGANGKUTAN ROSLAN	1
	SYARIKAT PENGANGKUTAN ROZZELYA JAYA	1
	SYARIKAT PENGANGKUTAN RUFAIDA	1
	SYARIKAT PENGANGKUTAN RUNAN ENTERPRISE	1
	SYARIKAT PENGANGKUTAN S.R ENTERPRISE	1
	SYARIKAT PENGANGKUTAN SABAH	1
	ANWAR BIN SAINUDDIN	1
	FAISAL BIN IRWAN	1
	HARMONY RELIABLE SERVICE	1
	J & S ENTERPRISE	1
	JESSICA ENTERPRISE	1
	JOY RIDE ENTERPRISE	1
	JULIUS @ MOHD NOR BIN AZIZ	1
	JUSTINE BIN BASOL	1
	KADIR BIN TASAKA	1
	KHANISAH ENTERPRISE	1
	MANGUMBA @ ABD MAJID BIN PATIROI	1
	MOHD FAIZAL BIN MAHMUD	1
	MOHD PASSRAH BIN SANUSI	1
	MOHD ZA'BA BIN HASSAN	1
	N.A ENTERPRISE	1
	NORAIN ENTERPRISE	1
	NUR SHAFIQAH	1
	NURSAHIRA ENTERPRISE	1
	NURUL ENTERPRISE	1
	ONE NATION ENTERPRISE	1
	PENGANGKUTAN AZMIL	1
	PENGANGKUTAN D.J WALINA	1
	PENGANGKUTAN HEREMEC	1
	PENGANGKUTAN MOHD ADAM	1
	PENGANGKUTAN OSMANIA	1
	PENGANGKUTAN SAUDAGAR BAS SHALIHIN	1
	PENGANGKUTAN SRI WAWASAN	1
	RAKJAYA MAJU (SABAH) SDN. BHD.	1
	ROSLAN BIN MUSTAMIN	1
	RUDI BIN ABDUL RAHIM	1
	SAKAG KUOWON ENTERPRISE	1
	SARINI BINTI BAHARUDDIN	1
	SERI ANGSANA ENTERPRISE	1
	SHAMSUL ENTERPRISE	1

NO. SOALAN: 663

	SRI IZZHAM ENTERPRISE	1
	SUADI BIN HASANDIN	1
	SULAIMAN BIN MD. ASIP	1
	SYARIKAT AVAKAS ENTERPRISE	1
	Syarikat Burmas Enterprise	1
	SYARIKAT GITOM ENTERPRISE	1
	SYARIKAT PENGANGKUTAN KELUARGA BAHAGIA	1
	SYARIKAT PENGANGKUTAN KENANGAN MANIS	1
	SYARIKAT PENGANGKUTAN KG. ANDUS PAPAR	1
	SYARIKAT PENGANGKUTAN KHAIRIA	1
	SYARIKAT PENGANGKUTAN KHALIDA	1
	SYARIKAT PENGANGKUTAN KODUNTUT	1
	SYARIKAT PENGANGKUTAN KOTA	1
	SYARIKAT PENGANGKUTAN L&Y	1
	SYARIKAT PENGANGKUTAN LAHAILA ENTERPRISE	1
	SYARIKAT PENGANGKUTAN LAMSON	1
	SYARIKAT PENGANGKUTAN LARIS	1
	SYARIKAT PENGANGKUTAN LESTER	1
	SYARIKAT PENGANGKUTAN LIZA AMIN	1
	SYARIKAT PENGANGKUTAN LUMIN ENTERPRISE	1
	SYARIKAT PENGANGKUTAN LYNIE	1
	SYARIKAT PENGANGKUTAN M & M	1
	SYARIKAT PENGANGKUTAN M.B	1
	SYARIKAT PENGANGKUTAN M.H BUNGA MAS	1
	SYARIKAT PENGANGKUTAN MADU	1
	SYARIKAT PENGANGKUTAN MAHKOTA	1
	SYARIKAT PENGANGKUTAN MAJU MANTAP	1
	SYARIKAT PENGANGKUTAN MALAWA	1
	SYARIKAT PENGANGKUTAN MALAWALI	1
	SYARIKAT PENGANGKUTAN MAN	1
	SYARIKAT PENGANGKUTAN MAN JAYA	1
	SYARIKAT PENGANGKUTAN MANGKALAI MAJU	1
	SYARIKAT PENGANGKUTAN MANTAP	1
	SYARIKAT PENGANGKUTAN MANTOB	1
	SYARIKAT PENGANGKUTAN MARANNU	1
	SYARIKAT PENGANGKUTAN MARAU ARAU	1
	SYARIKAT PENGANGKUTAN MAS ENTERPRISE	1
	SYARIKAT PENGANGKUTAN MASLAN	1
	SYARIKAT PENGANGKUTAN MASNAH	1
	SYARIKAT PENGANGKUTAN MASYITA	1
	SYARIKAT PENGANGKUTAN MAUFAKAT	1
	SYARIKAT PENGANGKUTAN MEGA JAYA	1

NO. SOALAN: 663

	SYARIKAT PENGANGKUTAN MELATI	1
	SYARIKAT PENGANGKUTAN MEZ	1
	SYARIKAT PENGANGKUTAN MILENIUM	1
	SYARIKAT PENGANGKUTAN MINI BAS KOPUNGIT	1
	SYARIKAT PENGANGKUTAN MIZAN	1
	SYARIKAT PENGANGKUTAN MLBA	1
	SYARIKAT PENGANGKUTAN MOHD AZLANSYAH	1
	SYARIKAT PENGANGKUTAN MOHD DIANSYAH	1
	SYARIKAT PENGANGKUTAN MOHD FAUZI	1
	SYARIKAT PENGANGKUTAN MOHD IZWAN ENTERPRISE	1
	SYARIKAT PENGANGKUTAN MYDA	1
	SYARIKAT PENGANGKUTAN NADZWINA	1
	SYARIKAT PENGANGKUTAN NAIM	1
	SYARIKAT PENGANGKUTAN NAZATIQA IMAN	1
	SYARIKAT PENGANGKUTAN NITA	1
	SYARIKAT PENGANGKUTAN NIZAR	1
	SYARIKAT PENGANGKUTAN NORBAYAH	1
	SYARIKAT PENGANGKUTAN NORZANI	1
	SYARIKAT PENGANGKUTAN NUR AINON	1
	SYARIKAT PENGANGKUTAN NURALIN	1
	SYARIKAT PENGANGKUTAN NURHANI SEKELUARGA	1
	SYARIKAT PENGANGKUTAN NURHAZWIA	1
	SYARIKAT PENGANGKUTAN NURI	1
	SYARIKAT PENGANGKUTAN NURI (SABAH)	1
	SYARIKAT PENGANGKUTAN NURSAIFUL	1
	SYARIKAT PENGANGKUTAN NURSYAZLIANA	1
	SYARIKAT PENGANGKUTAN P & M	1
	SYARIKAT PENGANGKUTAN P.P ENTERPRISE	1
	SYARIKAT PENGANGKUTAN PANG & SON'S	1
	SYARIKAT PENGANGKUTAN PELAYARAN	1
	SYARIKAT PENGANGKUTAN PENGASIH	1
	SYARIKAT PENGANGKUTAN PERKHIDMATAN WAWASAN	1
	SYARIKAT PENGANGKUTAN PERMATA ILHAM	1
	SYARIKAT PENGANGKUTAN PERSAUDARAAN	1
	SYARIKAT PENGANGKUTAN PUSAKA	1
	SYARIKAT PENGANGKUTAN PUTRA LOKUB PERMAI	1
	SYARIKAT PENGANGKUTAN RADIENSYAH	1
	SYARIKAT PENGANGKUTAN RAHMAT JAYA	1
	SYARIKAT PENGANGKUTAN RAIHANA	1
	SYARIKAT PENGANGKUTAN RAMSYAH	1
	SYARIKAT PENGANGKUTAN RANGGA	1
	SYARIKAT PENGANGKUTAN RAS EXPRESS	1

NO. SOALAN: 663

	SYARIKAT PENGANGKUTAN RASA SAYANG	1
	SYARIKAT PENGANGKUTAN RASIT	1
	SYARIKAT PENGANGKUTAN RASMIE JAYA	1
	SYARIKAT PENGANGKUTAN RH	1
	SYARIKAT PENGANGKUTAN RHM/3J'S	1
	SYARIKAT PENGANGKUTAN RINDANG	1
	SYARIKAT PENGANGKUTAN ROBASIAH	1
	SYARIKAT PENGANGKUTAN ROHAILAN	1
	SYARIKAT PENGANGKUTAN ROHAINAH	1
	SYARIKAT PENGANGKUTAN ROSLAN	1
	SYARIKAT PENGANGKUTAN ROZZELYA JAYA	1
	SYARIKAT PENGANGKUTAN RUFAIDA	1
	SYARIKAT PENGANGKUTAN RUNAN ENTERPRISE	1
	SYARIKAT PENGANGKUTAN S.R ENTERPRISE	1
	SYARIKAT PENGANGKUTAN SABAH	1
	ANWAR BIN SAINUDDIN	1
	FAISAL BIN IRWAN	1
	HARMONY RELIABLE SERVICE	1
	J & S ENTERPRISE	1
	JESSICA ENTERPRISE	1
	JOY RIDE ENTERPRISE	1
	JULIUS @ MOHD NOR BIN AZIZ	1
	JUSTINE BIN BASOL	1
	KADIR BIN TASAKA	1
	KHANISAH ENTERPRISE	1
	MANGUMBA @ ABD MAJID BIN PATIROI	1
	MOHD FAIZAL BIN MAHMUD	1
	MOHD PASSRAH BIN SANUSI	1
	MOHD ZA'BA BIN HASSAN	1
	N.A ENTERPRISE	1
	NORAIN ENTERPRISE	1
	NUR SHAFIQAH	1
	NURSAHIRA ENTERPRISE	1
	NURUL ENTERPRISE	1
	ONE NATION ENTERPRISE	1
	PENGANGKUTAN AZMIL	1
	PENGANGKUTAN D.J WALINA	1
	PENGANGKUTAN HEREMEC	1
	PENGANGKUTAN MOHD ADAM	1
	PENGANGKUTAN OSMANIA	1
	PENGANGKUTAN SAUDAGAR BAS SHALIHIN	1
	PENGANGKUTAN SRI WAWASAN	1

NO. SOALAN: 663

	RAKJAYA MAJU (SABAH) SDN. BHD.	1
	ROSLAN BIN MUSTAMIN	1
	RUDI BIN ABDUL RAHIM	1
	SAKAG KUOWON ENTERPRISE	1
	SARINI BINTI BAHARUDDIN	1
	SERI ANGSANA ENTERPRISE	1
	SHAMSUL ENTERPRISE	1
	SRI IZZHAM ENTERPRISE	1
	SUADI BIN HASANDIN	1
	SULAIMAN BIN MD. ASIP	1
	SYARIKAT AVAKAS ENTERPRISE	1
	Syarikat Burmas Enterprise	1
	SYARIKAT GITOM ENTERPRISE	1
	SYARIKAT HARAPAN JAYA	1
	SYARIKAT J & S	1
	SYARIKAT JAINAL BERSAUDARA	1
	SYARIKAT JISI ENTERPRISE	1
	SYARIKAT KELUARGA ENTERPRISE	1
	SYARIKAT KELUARGA PJJ ENTERPRISE	1
	SYARIKAT M.N. HAQIL	1
	SYARIKAT MARINA BERSAUDARA	1
	SYARIKAT MAYA	1
	SYARIKAT MUTIARA PUTIH	1
	SYARIKAT NENRLINA	1
	SYARIKAT NUR MADA ENTERPRISE	1
	SYARIKAT PENGANGKUTAN A & Z	1
	SYARIKAT PENGANGKUTAN AJ	1
	SYARIKAT PENGANGKUTAN AMYRAH	1
	SYARIKAT PENGANGKUTAN AQ	1
	SYARIKAT PENGANGKUTAN ARDIAN SHAH ENTERPRISE	1
	SYARIKAT PENGANGKUTAN ARINNIE	1
	SYARIKAT PENGANGKUTAN ASLI BUMIPUTRA	1
	SYARIKAT PENGANGKUTAN AWAM JOEFFRAN	1
	SYARIKAT PENGANGKUTAN BARU	1
	SYARIKAT PENGANGKUTAN BATIK ENTERPRISE	1
	SYARIKAT PENGANGKUTAN BERKAT JASA	1
	SYARIKAT PENGANGKUTAN DIN BERSAUDARA	1
	SYARIKAT PENGANGKUTAN ERAH	1
	SYARIKAT PENGANGKUTAN FOUR NAZ	1
	SYARIKAT PENGANGKUTAN GABUNGAN JALAN BOKARA - BATU SAPI	1
	SYARIKAT PENGANGKUTAN GENTISAN RAYA	1

NO. SOALAN: 663

	SYARIKAT PENGANGKUTAN HAREYANTIE	1
	SYARIKAT PENGANGKUTAN HG	1
	SYARIKAT PENGANGKUTAN IGA ENTERPRISE	1
	SYARIKAT PENGANGKUTAN INTRA-BORNEO	1
	SYARIKAT PENGANGKUTAN J.J BERSAUDARA	1
	SYARIKAT PENGANGKUTAN JAMALUDDIN ENTERPRISE	1
	SYARIKAT PENGANGKUTAN JIMS	1
	SYARIKAT PENGANGKUTAN KG. BONTOL	1
	SYARIKAT PENGANGKUTAN KHALIDAH	1
	SYARIKAT PENGANGKUTAN KIBABAIG	1
	SYARIKAT PENGANGKUTAN KKS	1
	SYARIKAT PENGANGKUTAN KOLEKTIF	1
	SYARIKAT PENGANGKUTAN MAERDA ENTERPRISE	1
	SYARIKAT PENGANGKUTAN MAJU JAYA ENTERPRISE	1
	SYARIKAT PENGANGKUTAN MAMBO	1
	SYARIKAT PENGANGKUTAN MUHD FIRDAUS	1
	SYARIKAT PENGANGKUTAN MURAS	1
	SYARIKAT PENGANGKUTAN MUSA	1
	SYARIKAT PENGANGKUTAN NICKOLES	1
	SYARIKAT PENGANGKUTAN NORIDAWAN	1
	SYARIKAT PENGANGKUTAN NORLIDAH	1
	SYARIKAT PENGANGKUTAN NURRAHADATUL AFIF SAFIYYAH	1
	SYARIKAT PENGANGKUTAN NYUK YUN	1
	SYARIKAT PENGANGKUTAN P.A CAHAYA MEGASI	1
	SYARIKAT PENGANGKUTAN PELANGI BARU	1
	SYARIKAT PENGANGKUTAN RAMLAH ZULKIFLI	1
	SYARIKAT PENGANGKUTAN ROSDIANA	1
	MENDIRI TRANSPORT	1
	MOHAMMAD JUNUS BIN RODDING	1
	S.J. ENTERPRISE	1
	SRI PARAD JAYA ENTERPRISE	1
	STIYUMAN BINTI SAAT	1
	SURIA ENTERPRISE	1
	SYARIANSHAH BIN RAKIM	1
	SYARIKAT BERWAWASAN	1
	SYARIKAT BETA HAMU (MALTRAS SIAHAAN)	1
	SYARIKAT CHRISTO & BROTHERS ENTERPRISE	1
	SYARIKAT KOTALINER	1
	SYARIKAT MELOR MINI BAS ENTERPRISE	1
	SYARIKAT P.SRI DINAWAN ENTERPRISE	1
	SYARIKAT PENGANGKUTAN AIN SYAZANA	1

NO. SOALAN: 663

	SYARIKAT PENGANGKUTAN ANRIANA	1
	SYARIKAT PENGANGKUTAN BUMI JAYA	1
	SYARIKAT PENGANGKUTAN MAS	1
	SYARIKAT PENGANGKUTAN MURSALIM	1
	SYARIKAT PENGANGKUTAN N.J	1
	SYARIKAT PENGANGKUTAN NUR AMIRAH	1
	SYARIKAT PENGANGKUTAN NUR FARRAHDILLA	1
	ALI BIN ABD MUIN	1
	AZIS BIN SOLONG	1
	BAHARUDIN ENTERPRISE	1
	PETER DOMINIC LO	1
	SYARIKAT PENGANGKUTAN AWANG SEKELUARGA	1
	SYARIKAT PENGANGKUTAN GAJO	1
	SYARIKAT PENGANGKUTAN NICK	1
	JUNAIDAH ENTERPRISE	1
	SYARIKAT PENGANGKUTAN ANAK SUNGAI	1
	SYARIKAT PENGANGKUTAN MUTIARA ENTERPRISE	1
	SYARIKAT PENGANGKUTAN RAFIDAH DUA BERSAUDARA	1
	PENGANGKUTAN SRI GEMILANG	1
	SYARIKAT HARIS ENTERPRISE	1
	SYARIKAT PENGANGKUTAN IMPIAN ABADI	1
	JN ENTERPRISE	1
	SYARIKAT PENGANGKUTAN RATNA	1
	SYARIKAT PENGANGKUTAN SABAH MAS	1
	SYARIKAT PENGANGKUTAN SABAR MENANTI	1
	SYARIKAT PENGANGKUTAN SAFARI	1
	SYARIKAT PENGANGKUTAN SAHDAN	1
	SYARIKAT PENGANGKUTAN SAMA	1
	SYARIKAT PENGANGKUTAN SAMA MAJU	1
	SYARIKAT PENGANGKUTAN SAMIRA	1
	SYARIKAT PENGANGKUTAN SANAY	1
	SYARIKAT PENGANGKUTAN SARIPA	1
	SYARIKAT PENGANGKUTAN SARMIMIE	1
	SYARIKAT PENGANGKUTAN SEGAMA	1
	SYARIKAT PENGANGKUTAN SEKELUARGA	1
	SYARIKAT PENGANGKUTAN SEMARAK	1
	SYARIKAT PENGANGKUTAN SERI ADDA	1
	SYARIKAT PENGANGKUTAN SERI PERDANA	1
	SYARIKAT PENGANGKUTAN SERI SIBUGA JAYA	1
	SYARIKAT PENGANGKUTAN SERI TEGUH BERSAUDARA	1
	SYARIKAT PENGANGKUTAN SETIA	1
	SYARIKAT PENGANGKUTAN SH RUDZRIMAR	1

NO. SOALAN: 663

	SYARIKAT PENGANGKUTAN SHALIN ENTERPRISE	1
	SYARIKAT PENGANGKUTAN SHAM	1
	SYARIKAT PENGANGKUTAN SHANIERAH	1
	SYARIKAT PENGANGKUTAN SHARIF	1
	SYARIKAT PENGANGKUTAN SHARIF HAMIZAN	1
	SYARIKAT PENGANGKUTAN SHARIFA SANDRA	1
	SYARIKAT PENGANGKUTAN SHARIFAH	1
	SYARIKAT PENGANGKUTAN SHARIFAH AZWALIZA	1
	SYARIKAT PENGANGKUTAN SHIEMASUE	1
	SYARIKAT PENGANGKUTAN SIDI GAZALBA	1
	SYARIKAT PENGANGKUTAN SIDODADI	1
	SYARIKAT PENGANGKUTAN SINAR BAHAGIA	1
	SYARIKAT PENGANGKUTAN SINAR JAYA	1
	SYARIKAT PENGANGKUTAN SINAR KELUARGA	1
	SYARIKAT PENGANGKUTAN SINARAN	1
	SYARIKAT PENGANGKUTAN SIRHANA	1
	SYARIKAT PENGANGKUTAN SITI	1
	SYARIKAT PENGANGKUTAN SITI HASRUNI	1
	SYARIKAT PENGANGKUTAN SLK	1
	SYARIKAT PENGANGKUTAN SMI	1
	SYARIKAT PENGANGKUTAN SMJ	1
	SYARIKAT PENGANGKUTAN SOLOR	1
	SYARIKAT PENGANGKUTAN SRI BAKTI	1
	SYARIKAT PENGANGKUTAN SRI DAINGIN II ENTERPRISE	1
	SYARIKAT PENGANGKUTAN SRI ISTIMEWA	1
	SYARIKAT PENGANGKUTAN SRI IZZATY	1
	SYARIKAT PENGANGKUTAN SRI JADI	1
	SYARIKAT PENGANGKUTAN SRI KETIAU	1
	SYARIKAT PENGANGKUTAN SRI PASIR PUTIH 1	1
	SYARIKAT PENGANGKUTAN SRI RIMBA ENTERPRISE	1
	SYARIKAT PENGANGKUTAN SRI TAMBALANG II	1
	SYARIKAT PENGANGKUTAN SRI TANJUNG	1
	SYARIKAT PENGANGKUTAN SUARDI NORFAZLI ENTERPRISE	1
	SYARIKAT PENGANGKUTAN SUDAH DAPAT	1
	SYARIKAT PENGANGKUTAN SULHAN	1
	SYARIKAT PENGANGKUTAN SUNAS	1
	SYARIKAT PENGANGKUTAN SUNDUSING	1
	SYARIKAT PENGANGKUTAN SUNGAI KAYU SANDAKAN	1
	SYARIKAT PENGANGKUTAN SUPARMAN	1
	SYARIKAT PENGANGKUTAN SURAYA	1
	SYARIKAT PENGANGKUTAN SURIAH	1

NO. SOALAN: 663

	SYARIKAT PENGANGKUTAN SURYA	1
	SYARIKAT PENGANGKUTAN SUSAH DAPAT	1
	SYARIKAT PENGANGKUTAN SYAHIRAH	1
	SYARIKAT PENGANGKUTAN SYANA	1
	SYARIKAT PENGANGKUTAN SYARMIDAH	1
	SYARIKAT PENGANGKUTAN T.J ENTERPRISE	1
	SYARIKAT PENGANGKUTAN T.T. WIRA	1
	SYARIKAT PENGANGKUTAN TIJAH	1
	SYARIKAT PENGANGKUTAN TPR	1
	SYARIKAT PENGANGKUTAN TUJUH BERSAUDARA	1
	SYARIKAT PENGANGKUTAN TUNJANG HARAPAN	1
	SYARIKAT PENGANGKUTAN TUSI	1
	SYARIKAT PENGANGKUTAN USAHA MAJU	1
	SYARIKAT PENGANGKUTAN USAHA SAMA KELUARGA	1
	SYARIKAT PENGANGKUTAN USAHA YAKIN	1
	SYARIKAT PENGANGKUTAN USMIE	1
	SYARIKAT PENGANGKUTAN USPAR SDN BHD	1
	SYARIKAT PENGANGKUTAN WAH	1
	SYARIKAT PENGANGKUTAN WAN INDAH	1
	SYARIKAT PENGANGKUTAN WILMAH	1
	SYARIKAT PENGANGKUTAN WIRA PELAUT	1
	SYARIKAT PENGANGKUTAN WIWANTRISYAHA	1
	SYARIKAT PENGANGKUTAN YAN'S	1
	SYARIKAT PENGANGKUTAN YEN2	1
	SYARIKAT PENGANGKUTAN YOU & I	1
	SYARIKAT PENGANGKUTAN YUN FUNG	1
	SYARIKAT PENGANGKUTAN YUNUS ENTERPRISE	1
	SYARIKAT PENGANGKUTAN YUNUS SEKELUARGA	1
	SYARIKAT PENGANGKUTAN YUSMIRA	1
	SYARIKAT PENGANGKUTAN YUSUF ENTERPRISE	1
	SYARIKAT PENGANGKUTAN Z.N ENTERPRISE	1
	SYARIKAT PENGANGKUTAN ZAINAL ENTERPRISE	1
	SYARIKAT PENGANGKUTAN ZARIF ZIKRIE	1
	SYARIKAT PENGANGKUTAN ZIANIE	1
	SYARIKAT PENGANGKUTAN ZITHAR	1
	SYARIKAT PERHUBUNGAN HIGHLAND	1
	SYARIKAT PERKHIDMATAN ALAF BARU	1
	SYARIKAT PERKHIDMATAN ALISIA	1
	SYARIKAT PERKHIDMATAN DARAS ENTERPRISE	1
	SYARIKAT PERKHIDMATAN PENGANGKUTAN SHAM	1
	SYARIKAT PERKHIDMATAN SRI SAHABAT	1
	SYARIKAT PERKHIDMATAN USAHA WAWASAN JAYA	1

NO. SOALAN: 663

	SYARIKAT PERNIAGAAN FARAH AYU	1
	SYARIKAT PERNIAGAAN IQMAL REZEQIE	1
	SYARIKAT PERNIAGAAN KO-KAIS	1
	SYARIKAT PERUSAHAAN MAJULAH	1
	SYARIKAT PERUSAHAAN MFH	1
	SYARIKAT PJM SEKELUARGA	1
	SYARIKAT PUTRA JAYA	1
	SYARIKAT RADZMALYN SEKELURAGA	1
	SYARIKAT RAKYAT MESRA ENTERPRISE	1
	SYARIKAT REDHA ENTERPRISE	1
	SYARIKAT RIDWAN ENTERPRISE	1
	SYARIKAT RIDZWAN ENTERPRISE	1
	SYARIKAT RIMBA TROPIKA	1
	SYARIKAT ROHAS	1
	SYARIKAT RS TRANSPORT	1
	SYARIKAT S.R ENTERPRISE	1
	SYARIKAT SABAH BARU	1
	SYARIKAT SABTU ENTERPRISE	1
	SYARIKAT SAKAZON TOKOU	1
	SYARIKAT SAKIMIN TRANSPORT	1
	SYARIKAT SAMSUL ENTERPRISE	1
	SYARIKAT SANGTANA	1
	SYARIKAT SAWERIGADING ENTERPRISE	1
	SYARIKAT SERI KIONSOM	1
	SYARIKAT SINAR HARAPAN	1
	SYARIKAT SINAR KEMBALI	1
	SYARIKAT SRI DEWI	1
	SYARIKAT SRI KINABALU	1
	SYARIKAT SRI NAKHODA TRANSPORT	1
	SYARIKAT SRI SELAMA ENTERPRISE	1
	SYARIKAT SRI WAKUBA	1
	SYARIKAT SUHARIA	1
	SYARIKAT SUPRI ENTERPRISE	1
	SYARIKAT TAHAN MAJU ENTERPRISE	1
	SYARIKAT TAMPINAI	1
	SYARIKAT TANJUNG JAYA	1
	SYARIKAT TRANSPORT KERJASAMA	1
	SYARIKAT TRANSPORT KRIS MASGHNY	1
	SYARIKAT UMMI ENTERPRISE	1
	SYARIKAT USAHA MAJU	1
	SYARIKAT USAHAWAN III ENTERPRISE	1
	SYARIKAT USRIA ENTERPRISE	1

NO. SOALAN: 663

	SYARIKAT VIALAH TRANSPORT	1
	SYARIKAT WARISAN ENTERPRISE	1
	SYARIKAT WARISAN UMMIEQU ENTERPRISE	1
	SYARIKAT WIRA	1
	SYARIKAT WIRA ENTERPRISE	1
	SYARIKAT YUGA TRANSPORT	1
	SYARIKAT YUSGA	1
	SYKT ASY-SUBALLI	1
	SYKT BINTUON & RAKAN-RAKAN ENTERPRISE	1
	SYKT KALLA BERSAUDARA	1
	SYKT PENGANGKUTAN ANAK DESA	1
	SYKT PENGANGKUTAN APSIAH	1
	SYKT PENGANGKUTAN ELMAY SEKELUARGA	1
	SYKT PENGANGKUTAN MOBILE EXPRESS	1
	SYKT PENGANGKUTAN MOHAMAD PAIRUL	1
	SYKT PENGANGKUTAN SAHABAT	1
	SYKT PENGANGKUTAN SINAR GUNONG	1
	SYKT PENGANGKUTAN SINARAN	1
	SYKT PERKHIDMATAN AWAM	1
	SYKT. NORA ABDUL ENTERPRISE	1
	SYKT. PENGANGKUTAN BAS KEPAYAN RIDGE	1
	SYKT. PENGANGKUTAN NURSUHAILAH	1
	SYKT. PENGANGKUTAN SM ENTERPRISE	1
	SYKT. PENGANGKUTAN YUNIKA	1
	SYKT.PENGANGKUTAN HAMIS	1
	SYT PENGANGKUTAN ADRI	1
	SYT PENGANGKUTAN ERA JAYA	1
	SYT PENGANGKUTAN ILHAM	1
	SYT PENGANGKUTAN JALAN PANTAI	1
	SYT PENGANGKUTAN NINA WATI	1
	SYT PENGANGKUTAN TONDEKAN	1
	SYT. IMPIAN IBSA	1
	SYT. PENGANGKUTAN RESTU	1
	SYT. PENGANGKUTAN ROHANA SEKELUARGA	1
	SYT. PENGANGKUTAN SURYANI JAYA	1
	SYT.PENGANGKUTAN BERSAUDARA	1
	SYT.PENGANGKUTAN SRI SIBUGA	1
	T.J ENTERPRISE	1
	TAMBRIN ENTERPRISE	1
	TAMIN BIN ABD RASHID	1
	TAMUI ENTERPRISE	1
	TRANSKOTA ENTERPRISE	1

NO. SOALAN: 663

	UMMIKALTHUM @ HELMA RAHAYU BT AG SALLEH	1
	UNSIN BIN TANDONG	1
	USUP BIN BEDDU	1
	WAFA ENTERPRISE	1
	WAIDAH ENTERPRISE	1
	WALHAMNI BT DJAHILA	1
	WHITE HOUSE ENTERPRISE	1
	WILJAYA SDN BHD	1
	WIRA BUMI	1
	Y.S ENTERPRISE	1
	YAHYA BROTHERS & CO. SDN.BHD.	1
	YONG MUI LAN @ RANI	1
	YUSAIDA ENTERPRISE	1
	ZAITON BTE ABD.HAMID	1
	ZAKI BIN PIRAMLI	1
	ZANA ENTERPRISE	1
	ZUDAYA ENTERPRISE	1
	ZURIF ENTERPRISE	1
	SYARIKAT VIALAH TRANSPORT	1
	SYARIKAT WARISAN ENTERPRISE	1
	SYARIKAT WARISAN UMMIEQU ENTERPRISE	1
	SYARIKAT WIRA	1
	SYARIKAT WIRA ENTERPRISE	1
	SYARIKAT YUGA TRANSPORT	1
	SYARIKAT YUSGA	1
	SYKT ASY-SUBALLI	1
	SYKT BINTUON & RAKAN-RAKAN ENTERPRISE	1
	SYKT KALLA BERSAUDARA	1
	SYKT PENGANGKUTAN ANAK DESA	1
	SYKT PENGANGKUTAN APSIAH	1
	SYKT PENGANGKUTAN ELMAY SEKELUARGA	1
	SYKT PENGANGKUTAN MOBILE EXPRESS	1
	SYKT PENGANGKUTAN MOHAMAD PAIRUL	1
	SYKT PENGANGKUTAN SAHABAT	1
	SYKT PENGANGKUTAN SINAR GUNONG	1
	SYKT PENGANGKUTAN SINARAN	1
	SYKT PERKHIDMATAN AWAM	1
	SYKT. NORA ABDUL ENTERPRISE	1
	SYKT. PENGANGKUTAN BAS KEPAYAN RIDGE	1
	SYKT. PENGANGKUTAN NURSUHAILAH	1
	SYKT. PENGANGKUTAN SM ENTERPRISE	1
	SYKT. PENGANGKUTAN YUNIKA	1

NO. SOALAN: 663

	SYKT.PENGANGKUTAN HAMIS	1
	SYT PENGANGKUTAN ADRI	1
	SYT PENGANGKUTAN ERA JAYA	1
	SYT PENGANGKUTAN ILHAM	1
	SYT PENGANGKUTAN JALAN PANTAI	1
	SYT PENGANGKUTAN NINA WATI	1
	SYT PENGANGKUTAN TONDEKAN	1
	SYT. IMPIAN IBSA	1
	SYT. PENGANGKUTAN RESTU	1
	SYT. PENGANGKUTAN ROHANA SEKELUARGA	1
	SYT. PENGANGKUTAN SURYANI JAYA	1
	SYT.PENGANGKUTAN BERSAUDARA	1
	SYT.PENGANGKUTAN SRI SIBUGA	1
	T.J ENTERPRISE	1
	TAMBRIN ENTERPRISE	1
	TAMIN BIN ABD RASHID	1
	TAMUI ENTERPRISE	1
	TRANSKOTA ENTERPRISE	1
	UMMIKALTHUM @ HELMA RAHAYU BT AG SALLEH	1
	UNSIN BIN TANDONG	1
	USUP BIN BEDDU	1
	WAFa ENTERPRISE	1
	WAIDAH ENTERPRISE	1
	WALHAMNI BT DJAHILA	1
	WHITE HOUSE ENTERPRISE	1
	WILJAYA SDN BHD	1
	WIRA BUMI	1
	Y.S ENTERPRISE	1
	YAHYA BROTHERS & CO. SDN.BHD.	1
	YONG MUI LAN @ RANI	1
	YUSAIDA ENTERPRISE	1
	ZAIRON BTE ABD.HAMID	1
	ZAKI BIN PIRAMLI	1
	ZANA ENTERPRISE	1
	ZUDAYA ENTERPRISE	1
	ZURIF ENTERPRISE	1
	SYARIKAT VIALAH TRANSPORT	1
	SYARIKAT WARISAN ENTERPRISE	1
	SYARIKAT WARISAN UMMIEQU ENTERPRISE	1
	SYARIKAT WIRA	1
	SYARIKAT WIRA ENTERPRISE	1
	SYARIKAT YUGA TRANSPORT	1

NO. SOALAN: 663

	SYARIKAT YUSGA	1
	SYKT ASY-SUBALLI	1
	SYKT BINTUON & RAKAN-RAKAN ENTERPRISE	1
	SYKT KALLA BERSAUDARA	1
	SYKT PENGANGKUTAN ANAK DESA	1
	SYKT PENGANGKUTAN APSIAH	1
	SYKT PENGANGKUTAN ELMAY SEKELUARGA	1
	SYKT PENGANGKUTAN MOBILE EXPRESS	1
	SYKT PENGANGKUTAN MOHAMAD PAIRUL	1
	SYKT PENGANGKUTAN SAHABAT	1
	SYKT PENGANGKUTAN SINAR GUNONG	1
	SYKT PENGANGKUTAN SINARAN	1
	SYKT PERKHIDMATAN AWAM	1
	SYKT. NORA ABDUL ENTERPRISE	1
	SYKT. PENGANGKUTAN BAS KEPAYAN RIDGE	1
	SYKT. PENGANGKUTAN NURSUHAILAH	1
	SYKT. PENGANGKUTAN SM ENTERPRISE	1
	SYKT. PENGANGKUTAN YUNIKA	1
	SYKT.PENGANGKUTAN HAMIS	1
	SYT PENGANGKUTAN ADRI	1
	SYT PENGANGKUTAN ERA JAYA	1
	SYT PENGANGKUTAN ILHAM	1
	SYT PENGANGKUTAN JALAN PANTAI	1
	SYT PENGANGKUTAN NINA WATI	1
	SYT PENGANGKUTAN TONDEKAN	1
	SYT. IMPIAN IBSA	1
	SYT. PENGANGKUTAN RESTU	1
	SYT. PENGANGKUTAN ROHANA SEKELUARGA	1
	SYT. PENGANGKUTAN SURYANI JAYA	1
	SYT.PENGANGKUTAN BERSAUDARA	1
	SYT.PENGANGKUTAN SRI SIBUGA	1
	T.J ENTERPRISE	1
	TAMBRIN ENTERPRISE	1
	TAMIN BIN ABD RASHID	1
	TAMUI ENTERPRISE	1
	TRANSKOTA ENTERPRISE	1
	UMMIKALTHUM @ HELMA RAHAYU BT AG SALLEH	1
	UNSIN BIN TANDONG	1
	USUP BIN BEDDU	1
	Wafa ENTERPRISE	1
	WAIDAH ENTERPRISE	1
	WALHAMNI BT DJAHILA	1

	WHITE HOUSE ENTERPRISE	1
	WILJAYA SDN BHD	1
	WIRA BUMI	1
	Y.S ENTERPRISE	1
	YAHYA BROTHERS & CO. SDN.BHD.	1
	YONG MUI LAN @ RANI	1
	YUSAIDA ENTERPRISE	1
	ZAITON BTE ABD.HAMID	1
	ZAKI BIN PIRAMLI	1
	ZANA ENTERPRISE	1
	ZUDAYA ENTERPRISE	1
	ZURIF ENTERPRISE	1
Sarawak	CITY PUBLIC LINK BUS SERVICE SDN BHD	45
	BIARAMAS EXPRESS SDN BHD	18
	PETRA JAYA TRANSPORT (S) SDN BHD	1
	BAU TRANSPORT COMPANY SDN BHD	1
	LANANG ROAD BUS COMPANY BHD	24
	REJANG TRANSPORT SDN BHD	2
	TEKU ROAD BUS CO SDN BHD	11
	SUNGEI MERAH BUS BHD	9
	MIRI CITY BUS SDN BHD	11
	MIRI BELAIT TRANSPORT CO. SDN BHD	19
	MIRI TRANSPORT CO. SDN BHD	16
	BORNEO AMALGAMATED TRANSPORT CO. BHD	20

2. Jumlah bas milikan Prasarana yang tidak digunakan:

- i. Jumlah pegangan: 1,757
- ii. Jumlah bas aktif: 1,497

3. Baki 260 adalah bas “*mothball*” yang berada dalam proses untuk diaktifkan / dilupuskan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : PUAN YEO BEE YIN [PUCHONG]

SOALAN

PUAN YEO BEE YIN [PUCHONG] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan statistik terperinci penghasilan sisa elektronik di Malaysia mengikut kategori sisa elektronik, negeri dan sebagainya.

JAWAPAN

Tuan Yang di-Pertua,

1. Untuk makluman, Kementerian Sumber Asli, Alam Sekitar dan Perubahan Iklim (NRECC) melalui Jabatan Alam Sekitar (JAS) telah membangunkan satu mekanisme pengurusan buangan elektrik dan elektronik (e-waste) di Malaysia. Mekanisme pengurusan e-waste yang dibangunkan ini mengawal enam (6) jenis peralatan elektrik dan elektronik iaitu telefon bimbit, komputer peribadi, televisyen, peti ais, pendingin hawa dan mesin basuh. Mekanisme yang dibangunkan ini telah memberi fokus kepada konsep *Extended Producer Responsibility* (EPR) dimana pengeluar bertanggungjawab untuk memastikan produk peralatan elektrik dan elektronik diuruskan secara mesra alam sehingga tamat jangka hayat.

2. Berdasarkan kajian yang dijalankan pada tahun 2015 hingga 2018, menjelang pada tahun 2025 dianggarkan sebanyak 24.5 juta unit e-waste akan dihasilkan di Malaysia. Berdasarkan kajian tersebut, unjuran pecahan kuantiti e-waste yang dianggarkan mulai 2016 hingga 2025 mengikut jenis adalah seperti berikut:

JENIS E-WASTE	KUANTITI (UNIT)
Telefon bimbit	17,112,000
Komputer peribadi	3,985,000
Televisyen	1,654,000
Mesin basuh	444,000
Peti ais	505,000
Pendingin hawa	804,000
JUMLAH	24,504,000

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

DARIPADA : PUAN YEO BEE YIN [PUCHONG]

SOALAN

YB PUAN YEO BEE YIN [PUCHONG] minta **MENTERI PEMBANGUNAN KERAJAAN TEMPATAN** menyatakan statistik kilang-kilang haram pemprosesan sisa elektronik di Malaysia serta senaraikan kilang-kilang haram yang dikenal pasti dan tindakan telah diambil.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) telah mengenal pasti jumlah kilang-kilang haram pemprosesan sisa elektronik di Malaysia seperti berikut:

BIL	NEGERI	JUMLAH KILANG HARAM PEMROSESAN SISA ELEKTRONIK
1.	Johor	16
2.	Kedah	1
3.	Kelantan	1
4.	Melaka	0
5.	Negeri Sembilan	0

BIL	NEGERI	JUMLAH KILANG HARAM PEMROSESAN SISA ELEKTRONIK
6.	Pahang	3
7.	Perak	4
8.	Perlis	0
9.	Pulau Pinang	2
10.	Selangor	554
11.	Terengganu	0
12.	Wilayah Persekutuan (KL)	0
13.	Sabah	0
14.	Sarawak	0
JUMLAH		581

KPKT memandang serius pewujudan kilang-kilang haram pemprosesan sisa elektronik di Malaysia dan sentiasa komited melakukan penguatkuasaan secara berterusan. Tindakan boleh dikenakan kepada pemilik-pemilik kilang haram ini di bawah Akta Kerajaan Tempatan 1976. Pihak Berkuasa Tempatan (PBT) juga telah melaksanakan operasi bersepadu bersama Jabatan Alam Sekitar (JAS), Polis Diraja Malaysia (PDRM) dan Pejabat Daerah dan Tanah. Pihak JAS telah bertindak menyita peralatan untuk memproses sisa elektronik dan kelengkapan pembakaran sisa dan PDRM melaksanakan pemantauan berterusan di kawasan tersebut. Tindakan kompaun juga dikenakan atas kesalahan menjalankan aktiviti perniagaan tanpa lesen dan operasi kilang diarahkan untuk tutup serta-merta.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : PUAN YEO BEE YIN [PUCHONG]

SOALAN

PUAN YEO BEE YIN [PUCHONG] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status terkini penghantaran kontena plastik haram dan kontena e-waste haram kepada negara asal serta nyatakan negara yang terlibat.

JAWAPAN

Tuan Yang di-Pertua,

1. Kementerian melalui Jabatan Alam Sekitar (JAS) hanya membenarkan premis yang mematuhi sepenuhnya Akta Kualiti Alam Sekeliling 1974 (Akta 127) dan mempunyai “*Approved Permit*” (AP) daripada Jabatan Pengurusan Sisa Pepejal Negara (JPSPN) untuk mengimport buangan plastik untuk dikitar semula di premis mereka. Kerajaan hari ini juga akan meneruskan tindakan dan usaha penghantaran balik kontena buangan plastik yang tidak mematuhi perundangan ke negara pengeksport.

2. Bermula September 2019 sehingga Disember 2022, sebanyak 286 kontena yang mengandungi buangan plastik melibatkan 23 negara telah berjaya dihantar pulang melalui tiga (3) pelabuhan iaitu Pelabuhan Klang, Selangor, Pelabuhan Senari, Kuching, Sarawak dan Pelabuhan Pulau Pinang. Manakala bagi kontena yang mengandungi e-waste, sejumlah 261 kontena telah dihantar pulang ke negara asal melalui dua (2) pelabuhan iaitu Pelabuhan Klang, Selangor dan Pelabuhan Johor.

3. Negara-negara yang terlibat bagi penghantaran pulang kontena plastik dan e-waste sehingga Disember 2022 adalah seperti berikut:

BIL	PELABUHAN	NEGARA	BIL. KONTENA PLASTIK	BIL. KONTENA E-WASTE
1.	Pelabuhan Klang, Selangor	Hong Kong	17	-
		Spain	10	3
		Belgium	7	-
		Australia	6	12
		Jepun	5	11

		Austria	4	-
		USA	5	85
		China	3	-
		Korea Selatan	3	4
		German	2	2
		Bangladesh	1	-
		Poland	1	-
		Sri Lanka	1	-
		Taiwan	1	-
		United Kingdom (UK)	1	1
		Canada	1	4
		Singapore	-	24
		Nigeria	-	1
		France	-	1
		Thailand	-	2
		Turki	-	1
2.	Pelabuhan Senari, Kuching, Sarawak	France	48	-
		Amerika Syarikat (USA)	37	-
		Canada	23	-
		Singapore	6	-

3.	Pelabuhan Pulau Pinang	UK	46	-
		USA	26	-
		Canada	13	-
		Hong Kong	10	-
		Portugal	3	-
		Dominican Republic	2	-
		Vietnam	2	-
		Arab Saudi	1	-
		Lithuania	1	-
4.	Pelabuhan Johor	Romania	-	110
Jumlah			286	261

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : PUAN YEO BEE YIN [PUCHONG]

SOALAN

PUAN YEO BEE YIN [PUCHONG] minta **MENTERI PENDIDIKAN** menyatakan senarai peruntukan Kerajaan ke sekolah-sekolah di Parlimen Puchong dari tahun 2018 hingga 2022.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) sentiasa komited dalam usaha untuk menyediakan prasarana dan kemudahan infrastruktur pendidikan kepada semua sekolah termasuk di Parlimen Puchong.

Sepanjang tahun 2018 sehingga 2022, KPM telah menyalurkan peruntukan ke sekolah di Parlimen Puchong bagi tujuan penyelenggaraan seperti berikut:

Tahun	2018	2019	2020	2021	2022
Peruntukan (RM)	157,800	739,847	399,944	659,283	529,500

Sekian, terima kasih.

RT72

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

DARIPADA : PUAN YEO BEE YIN [PUCHONG]

SOALAN

PUAN YEO BEE YIN [PUCHONG] minta **MENTERI KESIHATAN** menyatakan senarai purata masa menunggu di bahagian Kemalangan dan Kecemasan (A&E) di setiap hospital besar Kerajaan di Malaysia termasuk Hospital Serdang dan Hospital Putrajaya.

JAWAPAN

Tuan Yang di-Pertua,

1. Pada ketika ini, KKM belum mempunyai data yang lengkap berkenaan tempoh masa menunggu bagi semua hospital KKM di seluruh negara. Namun begitu, satu audit masa menunggu akan dilaksanakan dalam masa terdekat bagi mendapatkan gambaran sebenar yang lebih tepat berkenaan perkara ini.

2. Jabatan Kecemasan dan Trauma, Kementerian Kesihatan Malaysia sentiasa menumpukan usaha bagi mempercepatkan pengurusan semua pesakit. Tumpuan utama adalah untuk memberikan rawatan kepada pesakit kecemasan kritikal (zon merah) dan kecemasan separa kritikal (zon kuning) di mana pesakit kritikal akan dirawat serta-merta manakala pesakit separa kritikal akan dirawat dalam tempoh kurang dari 30 minit. Di samping itu, pesakit kecemasan bukan kritikal (zon hijau) akan dirawat dalam tempoh 2 jam.

3. Untuk makluman, masih terdapat kes-kes bukan kecemasan yang hadir ke Jabatan Kecemasan dan Trauma di mana sebagai contoh pada tahun 2019, kedatangan pesakit bukan kecemasan ke Jabatan Kecemasan dan Trauma adalah seramai 1,359,485 orang (16.5%) di seluruh negara.

4. Pada tahun 2019, sebanyak:

- (i) 88,622 kes kecemasan bukan kritikal dilaporkan hadir di Hospital Serdang yang mana 17,474 (20%) kes daripadanya adalah kes bukan kecemasan; dan
- (ii) 66,134 kes kecemasan bukan kritikal dilaporkan hadir di Hospital Putrajaya yang mana 11,678 (18%) daripadanya adalah kes bukan kecemasan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : PUAN YOUNG SYEFURA BINTI OTHMAN
[BENTONG]**

SOALAN

PUAN YOUNG SYEFURA BINTI OTHMAN [BENTONG] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status dan perancangan untuk projek tebatan banjir di kawasan Bentong terutamanya di kawasan Pelangai, Telemong dan Bandar Bentong yang kerap terjadi banjir kilat.

JAWAPAN

Tuan Yang Di-Pertua,

1. Untuk makluman Ahli Yang Berhormat, kerajaan Negeri Pahang telah meluluskan sebanyak RM14.4 juta bagi melaksanakan projek-projek tersebut dan akan dijangka dilaksanakan pada tahun 2023:

- a. Kajian Pelan Induk Saliran Mesra Alam (PISMA) berjumlah RM 5 juta;
- b. Rancangan Tebatan Banjir Sungai Gementi berjumlah RM 4.5 juta;
- c. Pemuliharaan Koridor Sg Nilam berjumlah RM 1.5 juta; dan
- d. Projek Pasca Banjir Negeri berjumlah RM 3.4 juta.

2. JPS juga telah melaksanakan Kajian Pelan Induk Saliran Mesra Alam (PISMA) berjumlah RM5 juta meliputi kawasan Bandar Bentong dan Pekan Karak. Kajian ini merupakan satu kerangka tindakan menggunakan konsep 'kawalan di punca' seperti dalam Manual Saliran Mesra Alam (MSMA) bagi pengurusan air larian hujan. Kajian ini perlu dilaksanakan terlebih dahulu untuk mengenalpasti punca-punca kejadian banjir kilat dan rujukan dalam merancang infrastruktur saluran serta mengenal pasti langkah penyelesaian jangka pendek dan jangka panjang.

3. Bagi langkah mengurangkan risiko banjir jangka masa pendek, pelaksanaan kerja-kerja pemuliharaan sungai di bawah peruntukan pasca banjir akan dilaksanakan di sekitar kawasan *hot spot* banjir di daerah Bentong.

4. Bagi langkah jangka masa panjang, Kementerian melalui JPS telah mengenal pasti kawasan-kawasan yang berisiko bencana dan perancangan pelaksanaan Projek Tebatan Banjir Khas, namun begitu ia tertakluk kepada kelulusan Kementerian Kewangan (MOF). Permohonan projek akan dimohon di dalam *Rolling Plan* yang akan datang.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

**DARIPADA : YB PUAN YOUNG SYEFURA BINTI OTHMAN
[BENTONG]**

SOALAN

Puan Young Syefura binti Othman [Bentong] minta **MENTERI DALAM NEGERI** menyatakan perancangan untuk peningkatan tangga gaji anggota dan pegawai di penjara-penjara Malaysia yang masih lagi kecil berbanding dengan anggota dan pegawai Polis Diraja Malaysia.

JAWAPAN

Tuan Yang Di Pertua,

Kementerian Dalam Negeri (KDN) amat prihatin dengan isu kebajikan anggota keselamatan dan penguatkuasaan bagi Jabatan / Agensi di bawah KDN. Kementerian sentiasa meneliti dan menyemak kadar emolumen yang merangkumi gaji dan elaun kepada anggota keselamatan dan penguatkuasaan termasuk Jabatan Penjara Malaysia demi memastikan kebajikan mereka terbela.

Secara umumnya, gaji dalam Perkhidmatan Awam ditentukan mengikut sesuatu skim perkhidmatan dan gred jawatan berdasarkan kepada prinsip-prinsip berikut:

i. Kadar Upah Untuk Kerja (Rate For The Job)

Seseorang pegawai yang menyandang sesuatu jawatan hendaklah dibayar upahan mengikut jenis kerja dan tanggungjawab yang dijalankan.

ii. Kelayakan Masuk dan Latihan

Seseorang calon itu memenuhi syarat kelayakan dan latihan yang ditetapkan bagi melayakkannya menjalankan sesuatu kerja dalam sektor awam; dan

iii. Relativiti dan Pariti

Hubung kait munasabah dalam struktur gaji antara gred jawatan lebih tinggi dengan gred jawatan lebih rendah. Manakala prinsip pariti adalah pegawai Perkhidmatan Awam dalam kumpulan perkhidmatan setaraf sewajarnya menerima saraan yang setaraf.

Gaji minimum bagi Pegawai Penjara Gred KA19 lantikan baru ditetapkan sebanyak RM1,360.00 adalah sama sebagaimana gaji minimum bagi skim perkhidmatan lain dalam klasifikasi perkhidmatan Keselamatan dan Pertahanan Awam (K) seperti Pegawai Imigresen Gred KP19, Pegawai Bomba Gred KB19 dan Pembantu Keselamatan Gred KP19. Jumlah pendapatan terendah bagi Pegawai Penjara Gred KA19 adalah sebanyak RM1,975.00 merangkumi gaji pokok sebanyak RM1,360.00, Bayaran Imbuhan Sara Hidup (BISH) antara RM200.00 hingga RM350.00 mengikut kawasan tempat bertugas, Imbuhan Tetap Perumahan (ITP) sebanyak RM300.00 dan Imbuhan Tetap Khidmat Awam (ITKA) sebanyak RM115.00.

Selain itu, Pegawai Penjara yang layak turut menerima Bayaran Insentif Pengawasan Banduan (BIPB) sebanyak RM200.00 sebulan. Kadar BIPB ini juga telah disemak semula dan dinaikkan daripada RM150.00 ke RM200.00 sebulan berkuat kuasa mulai 1 Januari 2022. Beberapa elaun lain juga turut diberi kepada Pegawai Penjara / Penolong Penguasa Penjara / Penguasa Penjara tertakluk kepada syarat dan kelayakan pegawai selaras dengan peraturan yang berkuat kuasa seperti berikut:

- i. Bayaran Insentif Tugas Hukuman Sebat pada kadar RM10.00 sekali sebatan;
- ii. Bayaran Insentif Tugas Hukuman Gantung sebanyak RM300.00 bagi jawatan Pembantu dan RM500.00 bagi jawatan Ketua; dan
- iii. Bayaran Insentif Ketukangan (Jabatan Penjara Malaysia) berdasarkan kadar mengikut jenis ketukangan.

Kerajaan dari semasa ke semasa melaksanakan kajian dan semakan saraan (gaji, elaun dan kemudahan) Perkhidmatan secara menyeluruh dan tidak tertumpu kepada skim-skim perkhidmatan tertentu sahaja dengan mengambil kira pelbagai faktor termasuklah kedudukan kewangan Kerajaan dan keharmonian dalam Perkhidmatan Awam.

SOALAN NO: 670

Sejak pelaksanaan Sistem Saraan Malaysia (SSM) pada tahun 2002, Kerajaan telah melaksanakan pelbagai penambahbaikan berterusan terhadap gaji Perkhidmatan Awam. Terkini, Kerajaan telah melaksanakan pemberian Kenaikan Gaji Tahunan (KGT) Tambahan Khas sebanyak RM100.00 kepada Pegawai Perkhidmatan Awam Persekutuan dalam Kumpulan Pelaksana serta Kumpulan Pengurusan dan Profesional berkuat kuasa 1 Januari 2023.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : PUAN YOUNG SYEFURA BINTI
OTHMAN [BENTONG]**

SOALAN

PUAN YOUNG SYEFURA BINTI OTHMAN [BENTONG] minta **MENTERI KESIHATAN** menyatakan peratusan atau jumlah doktor kontrak yang telah diserap masuk menjadi doktor tetap dan punca doktor-doktor kontrak ini masih lagi belum diserap menjadi doktor tetap serta perancangan untuk mengatasi masalah kekurangan doktor di hospital-hospital Kerajaan di seluruh negara.

JAWAPAN

Tuan Yang di-Pertua,

1. Pertimbangan bagi pelantikan tetap pegawai lantikan kontrak adalah tertakluk kepada kekosongan jawatan tetap, lulus temu duga dan memenuhi syarat pelantikan ditetapkan oleh Suruhanjaya Perkhidmatan Awam (SPA).
2. Proses penilaian pelantikan tetap bagi Pegawai Perubatan lantikan kontrak dibuat sepanjang tempoh perkhidmatan pegawai. Pegawai Perubatan lantikan kontrak akan di nilai berdasarkan kepada prestasi sepanjang tempoh latihan siswazah dan khidmat wajib. Pegawai Perubatan lantikan kontrak juga akan dinilai berdasarkan kepada markah laporan penilaian tahunan (LNPT) terkini oleh Ketua Jabatan di penempatan bertugas.
3. Di samping itu, Pegawai Perubatan lantikan kontrak juga akan dinilai secara insaniah (*soft skill*) yang merangkumi aspek keterampilan, jati diri, kerja berpasukan, kepimpinan dan profesionalisme untuk dilantik sebagai penjawat awam melalui kaedah temu duga.
4. Kementerian Kesihatan melaksanakan penilaian berdasarkan kepada prinsip penilaian yang objektif, adil dan telus. Penilaian prestasi dibuat berasaskan kepada penghasilan kerja dan tingkah laku yang di pamerkan Pegawai Perubatan dalam memenuhi objektif keperluan perkhidmatan di fasiliti Kementerian.
5. Sehingga 31 Disember 2022, terdapat seramai 4,255 Pegawai Perubatan kontrak telah dilantik tetap di Kementerian Kesihatan. Bagi tahun 2023, sebanyak 4,263 kekosongan jawatan tetap Pegawai Perubatan ditawarkan Kementerian Kesihatan untuk di mohon oleh Pegawai Perubatan lantikan kontrak yang memenuhi syarat ditetapkan. Iklan permohonan jawatan ini dibuat oleh SPA pada 6 Januari 2023 dan telah ditutup pada 23 Januari 2023. Proses pelantikan tetap Pegawai

Perubatan lantikan kontrak ini dijangka selesai pada Julai 2023.

6. Kementerian Kesihatan dari tahun ke tahun telah melaksanakan pelbagai inisiatif untuk meningkatkan lagi bilangan Pegawai Perubatan di Hospital kerajaan. Selain bertujuan untuk meningkatkan penyampaian perkhidmatan kesihatan di Hospital kerajaan, pertambahan bilangan Pegawai Perubatan juga dibuat bagi memenuhi sasaran satu (1) Pegawai Perubatan kepada 400 penduduk menjelang tahun 2025 melalui Rancangan Malaysia Kedua Belas (RMKe-12).

7. Peningkatan dalam jumlah Pegawai Perubatan di sektor awam dan swasta dapat dilihat berdasarkan nisbah kepada penduduk pada tahun 2021, iaitu 1:420 berbanding 1:554 pada tahun 2017. Berdasarkan kepada jumlah Pegawai Perubatan pada tahun 2021, sektor awam telah menyumbang sebanyak 72 peratus daripada keseluruhan 77,775 pegawai perubatan di Malaysia.

8. Sehingga 31 Disember 2022, jumlah Pegawai Perubatan yang sedang berkhidmat di KKM adalah seramai 59,651 orang merangkumi 6,985 Pakar Perubatan dan 52,666 Pegawai Perubatan bukan pakar.

9. Bagi meningkatkan bilangan Pegawai Perubatan di negara ini, kerajaan juga telah memperkenalkan pelbagai insentif bagi menarik minat Pegawai Perubatan dan Pegawai Perubatan Pakar untuk terus berkhidmat dengan kerajaan. Antara inisiatif yang telah diambil adalah seperti berikut:

- (i) menyegerakan proses lantikan graduan perubatan melalui pelantikan secara kontrak tanpa perlu melalui proses temuduga oleh SPA;
- (ii) meningkatkan slot latihan siswazah di KKM daripada 10,835 pada tahun 2013 kepada 12,228 pada tahun 2022;
- (iii) menggalakkan lebih ramai Pegawai Perubatan melanjutkan pengajian dalam program Sarjana Kepakaran;

- (iv) meningkatkan peluang latihan kepakaran perubatan supaya lebih ramai doktor pakar dihasilkan melalui Program Latihan Kepakaran *Parallel Pathway* (dengan izin) di Kementerian Kesihatan;
- (v) melantik semula Pegawai Perubatan Pakar yang telah tamat kontrak untuk berkhidmat dengan Kementerian Kesihatan mengikut keperluan;
- (vi) melantik semula secara kontrak Pegawai Perubatan Pakar warganegara yang telah bersara wajib untuk berkhidmat dengan Kementerian Kesihatan mengikut keperluan dan bidang kritikal;
- (vii) mendapatkan perkhidmatan kepakaran luar untuk berkhidmat secara sessional (dengan izin);dan
- (viii) menggalakkan Pakar Perubatan warganegara Malaysia yang berkhidmat di luar negara untuk pulang ke tanah air.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : YB PUAN YOUNG SYEFURA BINTI OTHMAN
[BENTONG]**

SOALAN

YB PUAN YOUNG SYEFURA BINTI OTHMAN [BENTONG] minta **MENTERI PELANCONGAN, SENI DAN BUDAYA** menyatakan perancangan Kementerian untuk memperkasakan industri pelancongan negara pasca COVID-19 serta perancangan Kementerian untuk menghadapi masalah *climate change* yang menjejaskan industri pelancongan negara

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang di-Pertua,

1. Dalam usaha untuk memulih dan memperkasakan industri pelancongan pasca pandemik, MOTAC bersama-sama penggiat industri menerusi *Tourism Productivity Nexus* (TPN) telah menambahbaik pelan pemulihan sedia ada dan membangunkan Rangka Kerja Pemulihan Pelancongan 2.0 atau TRF 2.0 yang menggariskan rangka tindakan komprehensif bagi menentu ukur dan membangunkan semula industri pelancongan agar lebih kukuh dan lebih berdaya tahan (*resilient*) di samping menyumbang kepada pembangunan keseluruhan ekonomi dan peningkatan kualiti hidup secara mampan (*sustainable*). Pelan ini merupakan strategi utama kementerian bagi tempoh jangka pendek dan sederhana serta menyokong Dasar Pelancongan Negara 2020 – 2030. Ia telah menggariskan lima (5) tonggak strategi utama iaitu:

Tonggak 1: Menyokong Pemulihan Perniagaan Pelancongan dan Kebudayaan;

Tonggak 2: Memulihkan Keyakinan Pelancong dan Perjalanan Antarabangsa dan Intra-Rantau yang Lancar;

Tonggak 3: Mencipta Semula Produk/Perkhidmatan Pelancongan dan Kebudayaan Bagi Memacu Daya Saing;

Tonggak 4: Menyelaraskan Pelancongan Dengan Kemampanan dan Keterangkuman; dan

Tonggak 5: Memperkukuh Pemulihan Dengan Ketahanan Jangka Panjang dan Kesediaan Menghadapi Krisis.

2. Menerusi tonggak 4, MOTAC melaksanakan pelbagai insentif untuk mengukuhkan peranan pelancongan sebagai pemangkin pembangunan ekonomi secara mampan, bertanggungjawab dan inklusif dalam usaha menyokong Matlamat Pembangunan Lestari Pertubuhan Bangsa-Bangsa Bersatu (UNSDGs). Usaha MOTAC ini secara tidak langsung menyokong peranan Kementerian Sumber Asli, Alam Sekitar dan Perubahan Iklim (NRECC) selaku *focal point* utama dalam menangani impak perubahan iklim negara dan pada masa yang sama menyumbang kepada agenda kemampanan negara. Antara usaha yang dilaksanakan oleh MOTAC adalah:

- I. Membangun dan melaksanakan pengelasan premis penginapan pelancongan (*Hotel Green*) bertujuan untuk menggalakkan dan memberi pengiktirafan kepada premis-premis penginapan pelancongan yang mengamalkan amalan hijau. Antara kriteria yang diambil kira adalah penggunaan bahan-bahan mesra persekitaran, pengurusan sisa pepejal, pengurusan penggunaan tenaga dan air serta pengurusan sisa bahan kimia dan toksik.
- II. Melaksanakan Program Malaysia Tourism Quality Assurance (MyTQA) dalam usaha mengiktiraf produk pelancongan serta memberi penekanan kepada penggiat industri pelancongan supaya lebih mengutamakan mutu perkhidmatan yang disediakan dan keperluan untuk menaiktaraf kualiti kemudahan produk pelancongan di Malaysia. Antara elemen penilaian yang turut ditekankan adalah amalan mampan untuk menjadikan produk pelancongan yang telah menerima pengiktirafan MyTQA lebih diyakini untuk dikunjungi oleh para pelancong. Sehingga kini, sebanyak 61 buah produk pelancongan dari pelbagai kategori di seluruh negara telah menerima pengiktirafan MyTQA.

III. Menganjurkan kursus-kursus kesedaran pelancongan mampan dan bertanggungjawab kepada penggiat industri dan masyarakat setempat, antaranya:

- a. *Sustainable Practices for Hotel Waste Management in ASEAN Tourism Industry Workshop* pada 4 hingga 7 Oktober 2022 yang melibatkan 60 peserta anggota ASEAN, Kementerian/Agensi Persekutuan, Kerajaan Negeri dan Pihak Berkuasa Tempatan(PBT). Kursus ini bertujuan memberi pendedahan dan mempromosi amalan mampan sisa hotel pengurusan melalui program latihan jurulatih;
- b. Kursus Eco-host kepada kakitangan barisan hadapan (*frontliners*) dan masyarakat setempat untuk meningkatkan kesedaran mengenai keperluan memelihara dan memulihara alam sekitar, memahami hubungan antara pelancongan dengan persekitaran serta kepentingan pelancongan mampan dan bertanggungjawab. Pada tahun 2022, MOTAC telah mengadakan sebanyak enam (6) siri Kursus Ecohost yang melibatkan lebih 180 orang peserta; dan
- c. Enam (6) siri Kursus Pemandu Pelancongan Berkemahiran Alam Semulajadi (Tahap 2) bagi Semenanjung dan Zon Sabah sepanjang tahun 2022 yang melibatkan seramai 186 peserta.

3. Pada masa yang sama, MOTAC juga telah menubuhkan Jawatankuasa Kecil Pelancongan Lestari di bawah Teras Strategi 4, Dasar Pelancongan Negara 2020-2030. Jawatankuasa ini dianggotai oleh pelbagai Kementerian/Agensi berkaitan yang berperanan untuk merangka fokus, tindakan strategi serta memantau pelaksanaan Pelancongan Lestari di peringkat nasional.

4. Antara strategi utama di bawah jawatankuasa ini adalah kerjasama MOTAC dengan Jabatan Perangkaan Malaysia (DOSM) bagi mengenalpasti dan membangunkan indikator pengukuran pelancongan lestari iaitu *Measuring Sustainable Tourism* (MST) yang mengukur tiga (3) elemen utama iaitu alam sekitar, sosial dan ekonomi dan impaknya terhadap industri pelancongan negara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : PUAN YOUNG SYEFURA BINTI OTHMAN
[BENTONG]**

SOALAN

PUAN YOUNG SYEFURA BINTI OTHMAN [BENTONG] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan perancangan Kementerian untuk menghadapi climate change yang kini sudah mula ketara sehingga menyebabkan terjadinya bencana-bencana besar kepada negara.

JAWAPAN

Tuan Yang Di-Pertua,

1. Untuk makluman Ahli Yang Berhormat, pelaksanaan fungsi-fungsi utama berkaitan perubahan iklim negara telah diletakkan di bawah fungsi dan tanggungjawab Kementerian Sumber Asli, Alam Sekitar dan Perubahan Iklim (NRECC) serta mengambil kira kaedah '*whole of government approach*'.
2. Sehubungan itu, NRECC akan terus melaksanakan fungsi-fungsi utama berkaitan perubahan iklim negara iaitu sebagai '*focal point*' perubahan iklim, penyelaras obligasi negara kepada UNFCCC, penyelaras dasar dan tindakan perubahan iklim di peringkat kebangsaan meliputi mitigasi dan adaptasi perubahan iklim, dan mengetuai penyertaan negara di dalam proses rundingan perubahan iklim antarabangsa.
3. NRECC juga bertanggungjawab dalam merancang dan menyelaras pembiayaan perubahan iklim (climate finance) daripada pelbagai sumber termasuk mendapatkan akses dana pembiayaan antarabangsa seperti *Green Climate Fund (GCF)*, *Global Environment Facility (GEF)*, *Adaptation Fund (AF)*, serta dana pelbagai hala dan dwi-hala lain berkaitan perubahan iklim..
4. Kementerian Sumber Asli, Alam Perubahan Iklim melalui Jabatan Pengairan dan Saliran (JPS) bertanggung jawab secara langsung dalam melaksanakan projek mitigasi banjir. Secara ringkasnya, fokus yang diberikan oleh JPS dapat dikategorikan kepada 3 aspek utama:
 - i. Memastikan kesiapsiagaan infrastruktur tebatan banjir pam, pintu air dan genset) dengan kerjasama Kerajaan Negeri berfungsi ada tahap optimum dengan anggaran keperluan kos pihak Kerajaan Persekutuan sebanyak RM185 juta sehingga tahun 2023;

ii. Menyelenggara, mendalamkan dan membersihkan saluran utama, sungai serta kolam takungan banjir bagi meningkatkan kapasiti aliran dan takungan air larian permukaan dengan anggaran keperluan kos di pihak Kerajaan Persekutuan sebanyak RM200 juta sehingga tahun 2023;

iii. Menaik taraf 516 stesen siren sedia ada dengan penambahbaikan kepada sistem suara/siren amaran yang lebih berkesan serta dapat dibezakan dengan sistem siren ambulan polis. Di samping itu, 155 stesen kamera web sedia ada akan juga dinaik taraf di samping pembinaan 361 stesen kamera web baharu. Kerja-kerja ini melibatkan penambahbaikan kepada aspek perkongsian visual keadaan semasa di kawasan lembangan sungai dengan orang ramai agar lebih bersedia apabila paras air sungai mencapai tahap bahaya. Kedua-dua kerja ini melibatkan anggaran keperluan kos sebanyak RM160 juta sehingga tahun 2023;

5. JPS mempunyai model ramalan banjir bagi Lembangan Sungai Kelantan, Lembangan Sungai Terengganu dan Lembangan Sungai Pahang yang telah dibangunkan susulan kejadian banjir monsoon 2014 di bawah Program Ramalan dan Amaran Banjir Negara (PRAB) Fasa 1. Model ini telah mula beroperasi sepenuhnya pada 2017. Ramalan banjir seawal 7 hari dan amaran banjir seawal 2 hari dapat dikeluarkan bagi ketiga-tiga lembangan ini berpandukan data dari Jabatan Meteorologi Malaysia (MET).

6. Projek PRAB Fasa 1 telah beroperasi di 3 lembangan sungai iaitu Lembangan Sungai Kelantan, Lembangan Sungai Terengganu dan Lembangan Sungai Pahang; dan sedang dalam proses mengemaskini data-data hidrologi dan data-data berkaitan dari masa ke semasa bagi kegunaan model-model ramalan yang dibangunkan. Terdapat 126 stesen siren yang telah dibunyikan bagi memberi amaran kepada penduduk di kawasan terbabit.

7. PRAB Fasa 2 sedang dalam pelaksanaan yang melibatkan 38 lembangan sungai di seluruh negara. Terdapat 390 stesen siren yang

akan dibangunkan di bawah PRAB Fasa 2 yang dijangka siap pada penghujung tahun 2025.

8. Untuk makluman Yang Berhormat, NRECC menitikberatkan tindakan adaptasi perubahan iklim bagi meningkatkan daya tahan dan kapasiti adaptif negara terhadap impak perubahan iklim. Kerajaan sentiasa proaktif dan mengambil pendekatan berperingkat atau '*stepwise approach*' dalam perancangan jangka panjang untuk menangani impak perubahan iklim.

9. Ke arah itu, Kerajaan sedang dalam proses untuk mengemukakan permohonan kewangan iklim iaitu Dana Program Ketersediaan atau *Readiness Programme*, *Green Climate Fund* untuk membangunkan Pelan Tindakan Adaptasi Kebangsaan (*National Adaptation Plan - NAP*) bagi merangka strategi adaptasi perubahan iklim negara bagi jangka masa panjang yang turut merangkumi sektor keselamatan air dan sumber pesisir pantai serta pertanian dan keselamatan makanan. Impak perubahan iklim terhadap komuniti pesisir pantai akan ditangani di bawah Kumpulan Kerja Teknikal yang akan ditubuhkan di bawah NAP.

10. Untuk makluman Ahli Yang Berhormat juga, NRECC melalui NAHRIM juga telah menyediakan panduan pelaksanaan adaptasi perubahan iklim melalui penerbitan *Climate Change Adaptation Framework for Water Sector* atau Kerangka Adaptasi Kebangsaan (NAF) yang akan memantapkan pelaksanaan adaptasi perubahan iklim di Malaysia.

11. NRECC menerusi Jabatan Pengairan dan Saliran (JPS) sentiasa memantau keadaan garis pantai negara secara berkala dan melaksanakan langkah-langkah kawalan hakisan jangka pendek dan jangka panjang. Langkah-langkah tersebut mengutamakan konsep *work with nature* dan turut mengambil kira faktor perubahan iklim seperti kenaikan aras laut dan luruan ribut bagi mengekalkan keseimbangan alam sekitar dan reka bentuk struktur yang optimum dan bersesuaian dengan keadaan tapak.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

**DARIPADA : TUAN YUNESWARAN A/L RAMARAJ
[SEGAMAT]**

SOALAN

TUAN YUNESWARAN A/L RAMARAJ E [SEGAMAT] minta **MENTERI PELANCONGAN, SENI DAN BUDAYA** menyatakan usahasama yang sedang digerakkan dengan Kementerian-Kementerian lain bagi merencanakan usaha menaik taraf fasiliti serta infrastruktur rekreasi pelancongan di negeri Johor terutamanya di kawasan peranginan tumpuan di negeri tersebut.

JAWAPAN

**YB DATO SRI TIONG KING SING
MENTERI PELANCONGAN, SENI DAN BUDAYA**

Tuan Yang Di-Pertua,

1. Sektor pelancongan merupakan sektor yang merangkumi pelbagai cabang industri, merentasi bidang dan meliputi segenap pelosok kawasan di dalam negara. Sejajar dengan kepentingan industri pelancongan sebagai salah satu penyumbang utama kepada peningkatan ekonomi negara, MOTAC sentiasa seiringan dengan kesemua pemain industri dan Jabatan Kerajaan yang menyokong sektor ini supaya industri pelancongan sentiasa berkembang. MOTAC sentiasa berusaha untuk memastikan tiada pihak yang tertinggal dan sentiasa mencuba untuk memenuhi kehendak pemain industri bagi membolehkan kesemua pihak menerima manfaat dan dapat menikmati keunikan serta keindahan lokasi pelancongan di Malaysia.
2. Kementerian Pelancongan, Seni dan Budaya (MOTAC) sentiasa membantu pemain-pemain industri pelancongan dan budaya tempatan. Bagi Negeri Johor, Kementerian telah memperuntukkan sebanyak RM4.39 juta bagi projek-projek penyelenggaraan kemudahan pelancongan di seluruh Negeri Johor bagi tahun 2021 – 2022 di bawah butiran Penyelenggaraan Infrastruktur / Kemudahan Pelancongan serta butiran Pemulihan, Pemuliharaan, Ubah Suai dan Naik Taraf (PPUN) Sektor Pelancongan, Kebudayaan dan Warisan.
3. MOTAC sentiasa berkolaborasi bersama dengan semua Agensi Kerajaan, Kerajaan Tempatan dan mana-mana Jabatan Kerajaan bagi memastikan infrastruktur pelancongan di kawasan-kawasan yang menjadi tumpuan pelancong di seluruh negara amnya dan Negeri Johor khususnya sentiasa berada di dalam keadaan yang terbaik bagi memastikan keselesaan dan kepuasan pelancong yang datang bercuti di Malaysia. MOTAC juga sentiasa bersedia untuk mempertimbangkan mana-mana permohonan yang diterima bagi menaiktaraf dan menyelenggara

kemudahan-kemudahan pelancongan yang berada di dalam keadaan daif dan perlu dinaik taraf bagi membolehkan lokasi tersebut menjalankan kefungsiannya sebagai sebuah pusat pelancongan.

4. Sepanjang tahun 2021 – 2022, MOTAC telah menjalankan penyelenggaraan dan baik pulih infrastruktur pelancongan yang telah dilaksanakan oleh pelbagai Agensi Kerajaan Persekutuan dan Kerajaan Tempatan. Di antara projek-projek penyelenggaraan infrastruktur yang telah siap sepenuhnya adalah seperti Menaiktaraf Muzium Daerah Mersing, Menaiktaraf Kemudahan Landskap Eko-Pelancongan Tasik Teratai, Taman Bandar Pasir Gudang dan Kerja Menaiktaraf Kemudahan Asas Eko-Pelancongan Taman Eko Rimba Gunung Belumut, Kluang, Johor.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : TUAN YUNESWARAN A/L RAMARAJ
[SEGAMAT]**

SOALAN

TUAN YUNESWARAN A/L RAMARAJ [SEGAMAT] minta **MENTERI PENGANGKUTAN** menyatakan langkah-langkah yang diambil bagi memantau kenaikan tambang secara mendadak bagi perkhidmatan bas serta van sekolah dan apakah bentuk sokongan yang disediakan buat para pengendali perkhidmatan tersebut yang mampu mengurangkan beban kenaikan kos tanpa mengundang kesan domino terhadap inflasi tambang.

JAWAPAN

Tuan Yang di-Pertua,

1. Bagi tambang bas dan van sekolah, Kerajaan telah memutuskan bermula pada tahun 2015 untuk tidak lagi menetapkan kadar tambang yang dikenakan, dengan tujuan untuk menjadikan industri ini lebih mapan serta mutu perkhidmatan dipertingkatkan dari aspek keselamatan dan keselesaan anak-anak.

2. Kadar tambang bas dan van sekolah pada masa ini adalah lebih fleksibel dan ditetapkan menerusi rundingan bersama antara pengendali bas sekolah dan ibu bapa bagi mendapatkan kadar tambang yang menang-menang berdasarkan keadaan semasa seperti kos operasi, tempoh serta waktu perkhidmatan dan lain-lain. Malah, sekiranya ibu bapa tidak bersetuju dengan kadar yang ditetapkan oleh pengendali maka mereka mempunyai pilihan untuk mendapatkan perkhidmatan

daripada pengendali bas sekolah yang lain. Maka, pengendali tidak akan sewenang-wenangnya menaikkan tambang yang melampau kerana mereka akan kehilangan pelanggan.

3. Selain itu Kerajaan juga sentiasa membuat pemantauan dan libat urus bersama persatuan-persatuan pengendali bas sekolah bagi memastikan pengendali tidak mengenakan tambang yang tidak munasabah serta memastikan keselamatan kenderaan dan penumpang sentiasa diberikan perhatian. Pengendali juga perlu mematuhi syarat-syarat lesen yang ditetapkan serta boleh dikenakan tindakan di bawah Akta Pengangkutan Awam Darat (Akta 715) sekiranya didapati melanggar syarat lesen tersebut.

4. Pada masa yang sama Kerajaan juga berusaha untuk tidak membebankan pengendali bas sekolah bagi mendapatkan permit perkhidmatan di mana caj lesen yang dikenakan adalah pada kadar yang minima. Kerajaan juga berusaha untuk menggalakkan pengusaha bas sekolah yang tidak berlesen untuk mendapatkan lesen yang sah dengan memudahkan proses permohonan dan memberi pengecualian syarat-syarat lesen tertentu kepada mereka.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BERTULIS

**DARIPADA : YB TUAN YUNESWARAN A/L RAMARAJ
(SEGAMAT)**

SOALAN

TUAN YUNESWARAN A/L RAMARAJ [SEGAMAT] minta **MENTERI KERJA RAYA** menyatakan sejauh manakah Jabatan Kerja Raya (JKR) Persekutuan memantau dari masa ke masa keadaan serta struktur Jalan Persekutuan Yong Peng - Segamat dan adakah JKR benar-benar mematuhi penjadualan penyelenggaraan berkala dengan mengambil kira peningkatan pergerakan logistik menerusi jalan tersebut.

JAWAPAN

Tuan Yang Di-Pertua,

Untuk makluman Ahli Yang Berhormat Senator, Kementerian Kerja Raya sentiasa komited dalam memastikan pematuhan kerja – kerja penyenggaraan Jalan Persekutuan melalui pihak JKR dan pihak Syarikat Konsesi yang dilantik di bawah Kontrak Penswastaan. Pemantauan dan perancangan program kerja penyenggaraan dilaksanakan sepanjang tahun di mana sebarang kerosakan yang dikenalpasti akan disenaraikan dalam senarai Anggaran Penyenggaraan Jalan (APJ) dan permohonan peruntukan dimohon kepada pihak Kementerian Kewangan. Walau bagaimanapun, disebabkan peruntukan terhad yang diluluskan setiap tahun, pelaksanaan program pembaikan dan penyenggaraan dilaksanakan mengikut senarai keutamaan kerja berdasarkan penilaian tahap kritikal kerosakan bagi keseluruhan jaringan jalan persekutuan yang akan disediakan pihak JKR.

Selain itu, di bawah kontrak penswastaan jalan persekutuan, pihak syarikat konsesi yang dilantik bertanggungjawab melaksanakan kerja penyenggaraan rutin iaitu skop kerja penyenggaraan pavemen, penyenggaraan bahu jalan, potong rumput, perabot jalan, mencuci jambatan dan pemetang, mencuci longkang serta pemeriksaan rutin. Syarikat konsesi juga bertanggungjawab melaksanakan kerja penyenggaraan berkala pavemen dan bukan pavemen yang dilaksanakan secara Arahan Kerja (AK) berdasarkan peruntukan yang diluluskan oleh Kementerian Kewangan. Pihak syarikat turut dipertanggungjawabkan untuk melaksanakan kerja kecemasan dengan membuat tindakan segera jika berlaku kejadian yang di luar jangka. Sebagai contoh, kerja membersihkan jalan setelah kejadian tanah runtuh, menyediakan pelan pengurusan trafik atau *Traffic Management Plan* (TMP) dan menyediakan laluan sementara bagi membolehkan jalan dilalui oleh kenderaan.

Merujuk kepada soalan Ahli Yang Berhormat Senator, bagi Jalan Persekutuan Jalan Yong Peng – Segamat FT001 dari 1 Januari 2020 sehingga 31 Disember 2022, Kementerian telah meluluskan dan melaksana kerja – kerja penyenggaraan Rutin bernilai RM 5.67 juta, Berkala Pavemen RM5.28 juta dan Berkala Bukan Pavemen RM1.14 juta dengan nilai keseluruhan sebanyak **RM12.09 juta**.

Manakala bagi tahun 2023, pelaksanaan program penyenggaraan di laluan ini dilaksanakan melalui kontrak baru secara *Performance Based Contract* (PBC).

Kementerian ini melalui pihak JKR senantiasa memastikan pemantauan di tapak secara berkala dilaksanakan agar kerja – kerja penyenggaraan Jalan Persekutuan ini disempurnakan dengan baik bagi memastikan keselamatan dan keselesaan pengguna jalan raya.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : YB TUAN YUNESWARAN A/L RAMARAJ
(SEGAMAT)**

SOALAN

YB TUAN YUNESWARAN A/L RAMARAJ (SEGAMAT) minta **MENTERI PEMBANGUNAN USAHAWAN DAN KOPERASI** menyatakan pelan pelaksanaan berfokus yang sedang dipersiapkan bagi mengenal pasti serta menggembeleng usahawan-usahawan kecil di negeri Johor yang mempunyai potensi untuk melebarkan perusahaan mereka ke negeri-negeri lain tanpa perlu khuatir dengan risiko kerugian akibat bencana luar jangka.

JAWAPAN

Tuan Yang di-Pertua,

1. Kementerian Pembangunan Usahawan dan Koperasi (KUSKOP) telah membangunkan Pelan Strategik KUSKOP 2023 yang menggariskan 185 program/projek merangkumi penggubalan dasar, tadbir urus dan kawal selia, pembangunan kapasiti, akses pembiayaan, akses pasaran, adaptasi teknologi dan pengukuhan penyampaian perkhidmatan. Pelaksanaan kesemua program/projek tersebut dijangka akan memanfaatkan 543,080 individu usahawan dan bakal usahawan di seluruh negara termasuk negeri Johor.

2. Antara program/projek yang akan dilaksanakan oleh agensi-agensi di bawah KUSKOP untuk mempertingkatkan daya tahan dan daya saing usahawan di negeri Johor bagi tahun 2023 adalah seperti berikut:

(i) Amanah Ikhtiar Malaysia (AIM) akan menyediakan peruntukan modal pembiayaan bernilai RM164.44 juta kepada 23,224 akaun Sahabat Usahawan AIM dari negeri Johor.

SOALAN NO : 677

(ii) TEKUN Nasional telah menyediakan peruntukan berjumlah RM72 juta yang dijangka akan memberi manfaat kepada seramai 4,000 usahawan di negeri Johor.

(iii) SME Corp. menerusi cawangan Pejabat Negeri Johor telah merancang untuk mengadakan tiga bengkel khusus berkaitan pengurusan kewangan, pemasaran digital dan transformasi halal untuk usahawan dan PMKS melebarkan perusahaan mereka ke negeri-negeri lain.

SME Corp. juga akan mewujudkan peluang akses pasaran kepada para usahawan dan PMKS Johor melalui program Minggu PMKS 2023 Zon Selatan yang dijangka akan diadakan pada Jun 2023. Para usahawan dan PMKS negeri Johor berpeluang mempromosi produk/perkhidmatan dan meluaskan lagi rangkaian perniagaan mereka melalui penyertaan dalam Sesi Pemadanan Perniagaan serta mendapatkan maklumat dan khidmat nasihat daripada pelbagai agensi yang terlibat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN

**DARIPADA : TUAN YUNESWARAN A/L RAMARAJ
[SEGAMAT]**

SOALAN

TUAN YUNESWARAN A/L RAMARAJ [SEGAMAT] minta **PERDANA MENTERI** menyatakan sejauh manakah peruntukan RM13.07 juta bagi Unit Transformasi Masyarakat India Malaysia (MITRA) yang diperuntukkan oleh Kerajaan terdahulu dapat diteruskan bagi pembiayaan prasekolah anak-anak komuniti India B40 di seluruh negeri Johor terutamanya Parlimen Segamat.

JAWAPAN

Yang Di-Pertua,

1. MITRA pada tahun **2022** telah memperuntukkan sejumlah **RM13.07 juta** untuk pembiayaan kepada **5,164 kanak-kanak** prasekolah golongan B40 di **214 buah pusat prasekolah** seluruh Malaysia.

2. Daripada peruntukkan ini sebanyak **RM601,648.00** telah disalurkan kepada **10 buah prasekolah** yang melibatkan **seramai 248 kanak-kanak** di Negeri Johor iaitu:

- a. **Satu (1)** prasekolah di **Daerah Johor Bahru** yang melibatkan seramai **21 kanak-kanak**;
- b. **Lima (5)** prasekolah di **Daerah Kluang** yang melibatkan seramai **133 kanak-kanak**;
- c. **Tiga (3)** prasekolah di **Daerah Kulai Jaya** yang melibatkan seramai **77 kanak-kanak**; dan
- d. **Satu (1)** prasekolah di **Daerah Tangkak** yang melibatkan seramai **17 kanak-kanak**.

3. Kelulusan pembayaran prasekolah adalah berdasarkan permohonan dari prasekolah yang mempunyai sebilangan kanak-kanak dari kategori B40.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

DARIPADA : TUAN ZAKRI BIN HASSAN (KANGAR)

SOALAN

TUAN ZAKRI BIN HASSAN (KANGAR) minta **MENTERI BELIA DAN SUKAN** menyatakan apakah langkah-langkah yang telah diambil oleh KBS dalam memajukan sukan anak muda khususnya sukan *motocross* di luar bandar.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Belia dan Sukan (KBS) Jabatan Belia dan Sukan Negara (JBSN) telah merangka program pembangunan sukan permotoran bagi memajukan sukan anak muda khususnya sukan *motorcross* di luar bandar. Pada tahun 2022 sebanyak dua (2) program sukan permotoran di bawah jenama MyFit@Motorsports iaitu Motorcross Peringkat Negeri Perlis telah diadakan pada 8 Oktober 2022 dan Cub Prix Peringkat Negeri Perlis pada 10 Disember 2022.

Kementerian akan sentiasa menyokong program pembangunan sukan permotoran bagi anak muda khususnya di kawasan luar bandar bagi memberikan manfaat kepada golongan belia yang meminati sukan *motorcross*.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)
DARIPADA : TUAN ZAKRI BIN HASSAN [KANGAR]

SOALAN

Minta **MENTERI PERTANIAN DAN KETERJAMINAN MAKANAN** menyatakan jelaskan apakah usaha-usaha yang dilakukan oleh Kementerian untuk membeli dan memasarkan semua mempelam Harumanis dalam pelbagai gred bagi membantu pekebun yang kurang mahir dalam aktiviti pemasaran di negara ini.

JAWAPAN

Tuan Yang Dipertua,

1. Untuk makluman Ahli Yang Berhormat, Kementerian Pertanian dan Keterjaminan Makanan (KPKM) komited untuk membantu pengusaha produk pertanian memasarkan hasil pertanian termasuk Mangga Harumanis dalam pelbagai gred bagi membantu pekebun yang kurang mahir dalam aktiviti pemasaran di negara ini. Usaha berterusan untuk memperkukuhkan pasaran fizikal dan juga pasaran secara online yang berteraskan teknologi dan inovasi adalah selaras dengan matlamat KPKM melalui Dasar Agromakanan Negara 2021-2030 (DAN 2.0).

2. Kementerian, melalui Lembaga Pemasaran Pertanian Persekutuan (FAMA), membangunkan Pelan Pemasaran Mangga Harumanis bagi setiap musim pengeluaran secara tahunan. Strategi pemasaran adalah bergantung kepada kualiti dan ketersediaan bekalan. Berikut adalah inisiatif-inisiatif yang diambil:

- i. Pengaturan logistik bersama pihak syarikat kurier bagi penghantaran harumanis seperti City Link, Pos Laju dan Line Clear. Kerjasama ini telah membantu pengedaran sebanyak 219 MT pada tahun 2022;
- ii. Penggunaan aplikasi platform Agrobazaar Online (ABO) dengan sasaran tempahan awal (*Early Bird*) sebanyak 1,000 kotak bersamaan 3 MT melalui Kedai Pusat Operasi FAMA Perlis dan lebih 10 buah Kedai-Kedai Usahawan dalam portal ABO (10-15 usahawan);
- iii. Pengaturan pasaran ke outlet peruncitan FAMA, syarikat-syarikat korporat dan pasaraya. Pemasaran dan pengedaran terus oleh FAMA melalui pusat-pusat operasi untuk pasaran runcit dan borong di kawasan sekitar. Penganjuran Karnival Harumanis dan Program Jualan Terus Dari Ladang (JTDL) di luar negeri Perlis bergantung kepada situasi pengeluaran tahun ini;

- iv. Sekiranya terdapat lebih pengeluaran dengan kualiti yang sesuai untuk pemprosesan, pusat memproses buah-buahan FAMA di Beseri, Perlis bersedia untuk memproses isi mangga harumanis;
 - v. Pada masa yang sama, FAMA juga menganjurkan Kursus Amalan Pemasaran Baik Mangga Harumanis pada 2 Februari dan 15 Mac 2023 di PPL YA Harumanis, Panggas dan Dewan Orang Ramai, Beseri dengan anggaran jumlah penyertaan 73 orang pengusaha mangga harumanis; dan
 - vi. Bagi meningkatkan kualiti belian untuk pasaran, FAMA telah melaksanakan pengendalian buah harumanis menggunakan mesin sistem pengkelasan kualiti pintar mangga harumanis (*Harumanis Mango Intelligent Quality System*).
3. Selain daripada itu, pada tahun 2021, KPKM telah mengadakan kerjasama strategik dengan Air Asia Grocer dalam usaha membantu pemasaran Mangga Harumanis Perlis ke Sabah bagi menyokong pemasaran secara dalam talian produk pertanian dan industri makanan. Program ini telah memanfaatkan seramai 14 penanam Mangga Harumanis di Perlis dengan keseluruhan sebanyak 10.2MT buah telah berjaya dijual melalui platform berkenaan bersamaan nilai jualan direkodkan sebanyak RM306,000 dengan menggunakan kelebihan jaringan ekosistem sedia ada Air Asia (fasiliti kargo, gudang, logistik, pengangkutan udara dan darat termasuklah padanan perniagaan melalui pangkalan data perniagaan Air Asia sedia ada).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN ZAKRI BIN HASSAN [KANGAR]

SOALAN

TUAN ZAKRI BIN HASSAN [KANGAR] minta **MENTERI
PERTANIAN DAN KETERJAMINAN MAKANAN** menyatakan
jelaskan apakah usaha Kementerian untuk menaikkan harga padi
bagi meningkatkan pendapatan pesawah.

JAWAPAN

Tuan Yang Dipertua,

Untuk makluman Ahli Yang Berhormat, Kementerian Pertanian dan Keterjaminan Makanan (KPKM) telah melaksanakan penyeragaman harga lantai belian padi atau kadar minima bagi Semenanjung Malaysia daripada RM 750 setiap tan kepada RM1,200 setiap tan pada 1 Mac 2014. Bagi harga siling belian padi pula, pada masa ini, Kementerian tidak menetapkan sebarang harga siling dan pengilang-pengilang dibenarkan untuk membeli padi dengan harga melebihi RM1,200 setiap tan tertakluk kepada keupayaan kilang dan kualiti padi yang dihasilkan. Sebagai contoh, secara purata harga belian padi di negeri Selangor adalah sekitar RM 1,250 setiap metrik tan iaitu lebih tinggi berbanding dengan negeri-negeri lain.

Sebarang cadangan kenaikan harga lantai belian padi akan memberikan implikasi terutamanya kepada pengilang dan pemborong memandangkan margin keuntungan perniagaan yang semakin mengecil kesan daripada kawalan harga beras di peringkat runcit. Kenaikan harga siling belian padi akan dapat dilaksanakan sekiranya harga beras runcit dinaikkan. Dalam hubungan ini, Kementerian akan melaksanakan kajian pasaran secara terperinci terlebih dahulu sebelum mengemukakan cadangan harga baru padi dan beras bagi memastikan impak peningkatan kos tidak membebankan pengguna dan rakyat keseluruhannya.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : JAWAB BERTULIS

**DARIPADA : TUAN ZAKRI BIN HASSAN
[KANGAR]**

SOALAN

TUAN ZAKRI BIN HASSAN [KANGAR] minta **MENTERI BELIA DAN SUKAN** menyatakan adakah projek pembinaan gelanggang-gelanggang serba guna untuk kegunaan masyarakat di luar bandar masih berjalan hingga kini.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Belia dan Sukan (KBS) pada masa ini tiada perancangan untuk membina gelanggang – gelanggang sukan yang baharu. Keutamaan yang diberikan Kementerian pada masa ini adalah untuk menaik taraf kemudahan sukan KBS sedia ada. Ini adalah kerana pembinaan kemudahan sukan baharu memerlukan penyelenggaraan yang tinggi.

Selain itu, KBS memandang serius ketersediaan tapak dalam pembinaan kemudahan sukan baharu sebagaimana syarat yang ditetapkan oleh Kementerian Ekonomi, iaitu;

- Memastikan tapak/tanah perlu didaftarkan atas nama Pesuruhjaya Tanah Persekutuan (PTP) dengan memperoleh pengesahan pihak Jabatan Ketua Pengarah Tanah dan Galian (JKPTG); dan
- Tapak adalah bebas bebanan dan sedia untuk dimasuki serta tiada isu tapak/tanah projek seperti setingan, bantahan penduduk dan lokasi tidak sesuai apabila membuat permohonan projek fizikal binaan baharu. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

DARIPADA : TUAN ZAKRI BIN HASSAN [KANGAR]

SOALAN

TUAN ZAKRI BIN HASSAN [KANGAR] minta **MENTERI PENDIDIKAN** menyatakan apakah tindakan-tindakan Kementerian Pendidikan untuk menyelesaikan masalah pendawaian elektrik di sekolah-sekolah yang mempunyai bangunan lama bagi mengelakkan berlakunya litar pintas dan seterusnya menyebabkan berlakunya kebakaran.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk penyelenggaraan elektrik.

Untuk makluman Ahli Yang Berhormat, antara tindakan yang diambil oleh KPM untuk mengelakkan berlakunya litar pintas dan kebakaran adalah seperti berikut iaitu:

- i. mengenal pasti bangunan sekolah lama yang berusia melebihi 50 tahun;
- ii. menyedia peruntukan yang diperlukan untuk pendawaian semula elektrik;
- iii. melaksana pendawaian semula elektrik bagi sekolah yang dikenal pasti;
- iv. memantau pelaksanaan pendawaian semula elektrik; dan
- v. mengadakan kerjasama dengan Cawangan Kejuruteraan Elektrik (CKE), Jabatan Kerja Raya Malaysia (JKR) bagi sesi inspektorat ke sekolah yang mempunyai bangunan lama untuk menilai tahap keselamatan sistem pendawaian elektrik.

Untuk makluman Ahli Yang Berhormat, KPM sentiasa memberi keutamaan keselamatan sekolah bagi mengelakkan berlakunya litar pintas dan kebakaran di sekolah. Oleh itu, penambahbaikan dalam aspek pendawaian elektrik dilaksanakan dari semasa ke semasa bagi memastikan sekolah selamat digunakan.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT PERTAMA,
PENGAL KEDUA, PARLIMEN KELIMA BELAS**

PERTANYAAN : BUKAN LISAN

DARIPADA : TUAN ZULKIFLI BIN ISMAIL [JASIN]

SOALAN

Minta **MENTERI PENDIDIKAN TINGGI** menyatakan sejauh manakah pengajaran dan pembelajaran subjek berkaitan Pendidikan Islam diberikan kepada pelajar-pelajar Islam di institut pengajian tinggi di Malaysia sebagai kesinambungan proses yang diterima di peringkat sekolah.

JAWAPAN

Tuan Yang di-Pertua,

1. Secara umumnya, semua program pengajaran dan pembelajaran melibatkan Pendidikan Islam (PI) yang diterapkan kepada pelajar-pelajar Islam di Institusi Pengajian Tinggi (IPT) di Malaysia adalah kesinambungan daripada pengajaran dan pembelajaran di peringkat sekolah.
2. Pengurusan dan pentadbiran program PI di IPT adalah tertakluk kepada kuasa senat IPT masing-masing, iaitu Badan Tertinggi yang mengurus aspek akademik di IPT. Dari segi kurikulum, penawaran dan pengawasan kualiti program Pendidikan Islam ini terletak di bawah kuasa Agensi Kelayakan Malaysia (MQA).
3. Buat masa ini, program PI ditawarkan di 15 buah UA, 10 IPTS, 12 Kolej IPTS, lima (5) Politeknik dan dua (2) KPTM.

4. Terdapat dua (2) bidang PI yang ditawarkan iaitu Pengajian Islam Teras dan Pengajian Islam Gunaan yang mempunyai kerangka ilmu (*body of knowledge*) yang berbeza.
5. Secara keseluruhan terdapat 190 program Pengajian Islam Teras dan 135 program Pengajian Islam Gunaan yang ditawarkan di seluruh IPT Malaysia.
6. Antara program bidang pengajian Islam teras adalah seperti:
 - i) Ijazah Sarjana Muda Pengajian Islam;
 - ii) Ijazah Sarjana Muda Syariah; dan
 - iii) Ijazah Sarjana Muda Usuludin.
7. Manakala contoh program bidang pengajian Islam Gunaan adalah:
 - i) Ijazah Sarjana Muda Pentadbiran Muamalat;
 - ii) Ijazah Sarjana Muda Kewangan Islam;
 - iii) Ijazah Sarjana Muda Pengurusan Halal; dan
 - iv) Ijazah Sarjana Muda Pentadbiran Perniagaan (Kewangan Islam).

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : BUKAN JAWAB LISAN

DARIPADA : YB TUAN HJ. ZULKIFLI BIN HJ. ISMAIL [JASIN]

SOALAN

Tuan Zulkifli bin Ismail [Jasin] minta **MENTERI DALAM NEGERI** menyatakan apakah status projek pembinaan Balai Polis Pekan Sungai Rambai yang telah tertangguh sejak sekian lama.

JAWAPAN

Tuan Yang Di Pertua,

Untuk makluman Yang Berhormat, cadangan pembinaan Balai Polis Sungai Rambai pernah diluluskan melalui peruntukan pembiayaan syarikat PBLT Sdn. Bhd. Walau bagaimanapun, projek tersebut tidak diteruskan berkaitan terdapat keperluan pembangunan lain yang lebih mendesak melibatkan Balai Polis Simpangan yang sering dilanda banjir.

Pada masa ini, Balai Polis Sungai Rambai tidak disenaraikan dalam Pelan Tindakan Pembangunan Strategik PDRM (PSPDRM) tahun 2021 hingga 2025. Namun pihak Kementerian dan PDRM akan membuat semakan keutamaan dari semasa ke semasa dan sekiranya terdapat keperluan mendesak, cadangan projek ini akan dimasukkan ke dalam *Rolling Plan* berikutnya.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BERTULIS

**DARIPADA : TUAN ZULKIFLI BIN ISMAIL
[JASIN]**

SOALAN

TUAN ZULKIFLI BIN ISMAIL [JASIN] minta **MENTERI KESIHATAN** menyatakan apakah status projek pembinaan Klinik Kesihatan Sungai Rambai.

JAWAPAN

Tuan Yang di-Pertua,

Kementerian Kesihatan Malaysia (KKM) sedang meneliti cadangan pembinaan Klinik Kesihatan Jenis 3 Sungai Rambai. Sekiranya terdapat keperluan mendesak dan berkeutamaan tinggi, permohonan projek ini akan dikemukakan kepada Kementerian Ekonomi mengikut tempoh yang ditetapkan iaitu selewat-lewatnya 31 Mac 2023.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

**DARIPADA : TUAN ZULKIFLI BIN ISMAIL
(JASIN)**

SOALAN

TUAN ZULKIFLI BIN ISMAIL (JASIN) minta **MENTERI PEMBANGUNAN USAHAWAN DAN KOPERASI** menyatakan apakah perancangan jangka masa pendek dan panjang pihak Kementerian untuk membantu peniaga- peniaga kecil Melayu dalam menghadapi kemerosotan ekonomi.

JAWAPAN

Tuan Yang di-Pertua,

1. Kerajaan sentiasa prihatin dan komited untuk membangunkan perusahaan mikro termasuk kumpulan penjaja dan peniaga kecil di Malaysia. Bagi menyahut hasrat YAB Perdana Menteri yang menyatakan kepentingan perniagaan penjaja dan peniaga kecil dalam merakyatkan ekonomi negara, Kementerian Pembangunan Usahawan dan Koperasi (KUSKOP) telah merangka dasar serta program bersifat jangka masa pendek dan panjang yang dipercayai mampu menyokong pertumbuhan serta pembangunan peniaga-peniaga kecil di Malaysia seperti berikut:

- (i) untuk tempoh jangka panjang, **Pelan Pembangunan Penjaja dan Peniaga Kecil (P3PK) 2023 - 2027** telah dirangka sebagai panduan bagi membangunkan serta memperkasakan komuniti penjaja dan peniaga kecil secara keseluruhan. P3PK 2023 – 2027 merupakan suatu dokumen perancangan strategik KUSKOP untuk tempoh lima (5) tahun yang akan datang bagi memperkasa pembangunan serta menambahbaik tahap sosioekonomi komuniti penjaja dan peniaga kecil.
- (ii) bagi tempoh jangka pendek, KUSKOP telah menggubal **Garis Panduan Aspek Kawal Selia Perniagaan Dari Rumah (*Home-Based Business*)** bagi menyokong peningkatan pertumbuhan perniagaan yang beroperasi dari rumah terutamanya pasca COVID-19 dan melaksanakan **Program Pemantapan Penjaja dan Peniaga Kecil** yang bermatlamat untuk meningkatkan pengetahuan dan pendedahan berkaitan transformasi perniagaan yang menyasarkan penyertaan daripada kumpulan penjaja dan peniaga kecil.

Bagi tahun 2023, fokus pelaksanaan program akan diteruskan dengan penumpuan terhadap pemerkasaan

modal insan menerusi latihan bagi meningkatkan kapasiti dan kemahiran penjaja dan peniaga kecil melalui penggunaan platform digital sedia ada terutamanya Warongku 2.0.

- (iii) KUSKOP turut memperuntukkan dana sejumlah RM50 juta bagi pelaksanaan **Program Pembiayaan Mikro untuk Penjaja dan Peniaga Kecil 2.0** melalui Bank Rakyat dengan tujuan menambah baik dan membangunkan semula perniagaan sedia ada. Program ini adalah pembiayaan syariah dengan kadar keuntungan kosong peratus (0%) dan pemberian moratorium selama 12 bulan. Pembiayaan yang dimohon boleh digunakan bagi tujuan pemulihan perniagaan seperti modal pusingan, pembelian peralatan/ perkakasan, bayaran gaji, bayaran sewa, bil utiliti dan lain-lain. Nilai pembiayaan adalah maksimum RM10,000 kepada usahawan informal dan maksimum RM50,000 kepada usahawan mikro dengan tempoh bayaran balik hingga lima tahun.

Pada 26 September 2022, Program MPPK 2.0 telah diperluaskan capaian pembiayaan dengan nilai sebanyak RM2 juta diperuntukkan untuk pembangunan perniagaan yang dijalankan secara dalam talian. Sehingga 15 Februari 2023, sebanyak 2,043 permohonan telah diluluskan melibatkan pembiayaan berjumlah RM46 juta.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : BUKAN LISAN (BERTULIS)

DARIPADA : TUAN ZULKIFLI BIN ISMAIL [JASIN]

SOALAN

TUAN ZULKIFLI BIN ISMAIL [JASIN] minta **MENTERI PERTANIAN DAN KETERJAMINAN MAKANAN** menyatakan tentang status projek beras wangi Sungai Rambai yang tertangguh.

JAWAPAN

Tuan Yang Di Pertua,

Untuk makluman Ahli Yang Berhormat, pada masa ini Kerajaan sedang meneliti kebolehlaksanaan projek beras wangi Sungai Rambai. Mengambil kira potensi Melaka sebagai Gerbang Selatan Jelapang Padi dan perintis kepada pengeluaran beras wangi di negara ini, Kementerian Pertanian dan Keterjaminan Makanan (KPKM) telah mengadakan beberapa siri perbincangan bersama Syarikat Peneraju di bawah Program *SMART* Sawah Berskala Besar (*SMART* SBB) iaitu FGV Integrated Farming Holdings Sdn. Bhd. dan satu tinjauan tapak telah diadakan pada tahun 2022 bagi mengenal pasti potensi kawasan yang bersesuaian untuk projek penanaman padi wangi.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS**

**PERTANYAAN : BUKAN BERTULIS (BERTULIS)
DARIPADA : DATO' SERI HISHAMMUDDIN TUN HUSSEIN
[SEMBRONG]**

SOALAN

DATO' SERI HISHAMMUDDIN TUN HUSSEIN [Sembrong] minta **MENTERI PERDAGANGAN DALAM NEGERI DAN KOS SARA HIDUP** menyatakan apakah usaha kerajaan untuk mengawal harga bekalan bahan mentah sehingga pengusaha gerai dan restoran terpaksa menaikkan harga makanan hampir 40 peratus daripada biasa.

JAWAPAN:

Yang di-Pertua,

Kerajaan mengenakan kawalan ke atas komoditi tertentu bagi membantu pengusaha gerai dan restoran dengan mengambil beberapa langkah dalam usaha mengawal harga bekalan bahan mentah seperti:

- i) mengadakan Skim Harga Maksimum Musim Perayaan bagi menetapkan harga maksimum untuk barangan tertentu pada tempoh tertentu. Contohnya mengawal harga kategori daging, sayur, ikan dan barang kering;
- ii) melaksanakan Penentuan Harga Maksimum bagi Ayam dan Telur Ayam bagi memberikan kestabilan harga kepada kedua-dua item penyumbang sumber protein utama penduduk negara ini;
- iii) mengawal harga minyak masak sawit tulen bagi paket 1kg dan botol bagi 1kg, 2kg, 3kg dan 5kg;
- iv) mengawal harga barang keperluan lain seperti tepung gandum dan gula;
- v) memantau kegiatan mencatut atau mengambil keuntungan yang berlebihan oleh peniaga bagi barangan bahan mentah;
- vi) melaksanakan Ops Menu 3.0 bertujuan bagi memantau dan menangani isu harga makanan bermasak bagi memastikan peniaga restoran dan kedai makan menggunakan penandaan harga yang jelas dan tidak mengelirukan pengguna di premis-premis yang terlibat; dan
- vii) memperkenalkan Menu Rahmah yang dijual oleh restoran dan kedai makan terpilih dengan harga RM5.00 ke bawah sepinggan untuk jualan kepada rakyat yang memerlukan.

Dengan adanya langkah-langkah yang dinyatakan di atas, ia diharap dapat menstabilkan harga barangan di pasaran.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SERI HISHAMMUDDIN BIN TUN
HUSSEIN [SEMBRONG]**

SOALAN

DATO' SERI HISHAMMUDDIN BIN TUN HUSSEIN [SEMBRONG] minta **PERDANA MENTERI** menyatakan adakah Kementerian berhasrat untuk mewujudkan langkah-langkah tertentu bagi membolehkan mangsa penipuan siber mendapatkan semula kerugian mereka memandangkan jumlah kerugian sebanyak RM1.73 bilion dicatatkan pada tahun 2022.

JAWAPAN

**YB DATO' SRI AZALINA OTHMAN SAID
MENTERI DI JABATAN PERDANA MENTERI
(UNDANG-UNDANG DAN REFORMASI INSTITUSI)**

Tuan Yang di-Pertua,

1. Pihak Kerajaan kini sedang secara serius meneliti beberapa peruntukan undang-undang yang boleh digunakan atau yang boleh dipinda bagi tujuan membolehkan pengembalian wang penipuan kepada mangsa-mangsa.

2. Antara peruntukan undang-undang yang sedang diteliti adalah Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 [Akta 613], Kanun Keseksaan dan Kanun Tatacara Jenayah.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SERI HISHAMMUDDIN TUN HUSSIEN
[SEMBRONG]**

SOALAN

DATO' SERI HISHAMMUDDIN TUN HUSSIEN [SEMBRONG] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah pelan tindakan kerajaan untuk menguruskan banjir menerusi Dasar Air Negara yang akan dibangunkan kelak memandangkan jumlah kerugian kemusnahan harta benda dan kemudahan awam akibat banjir telah mencecah RM7.1 bilion dari 2017 hingga 2021 berdasarkan rekod Jabatan Pengairan Saliran Malaysia (JPS) dan Jabatan Perangkaan Malaysia (DOSM).

JAWAPAN

Tuan Yang di-Pertua,

1. Banjir merupakan diantara bencana utama yang berlaku di dalam negara. Magnitud banjir bertambah buruk akibat daripada kesan perubahan iklim kepada keamatan dan taburan hujan sepanjang tahun. Draf Dasar Air Negara yang sedang digubal telah mengambil kira tindakan yang perlu dilaksanakan untuk mengurangkan impak kejadian banjir kepada orang awam. Dasar ini menekankan kerjasama semua pihak berkepentingan dalam mengurus perdana aktiviti mitigasi dan adaptasi perubahan iklim (*mainstreaming climate change mitigation and adaptation activities*).
2. Strategi dasar yang dicadangkan melibatkan pembangunan sistem takungan pelbagai fungsi yang berperanan untuk melencongkan aliran air semasa banjir dan menjadi takungan sumber air semasa musim kering. Kerajaan pada masa ini juga telah mengambil kira faktor perubahan iklim dalam penyediaan reka bentuk infrastruktur air dan cadangan Jabatan Pengairan dan Saliran (JPS) Malaysia untuk meningkatkan tahap perlindungan daripada 100 ARI kepada 200 ARI.
3. Selain itu, dasar ini juga telah meneliti peranan hutan dalam kawalan bencana banjir. Hutan bertindak sebagai span yang memerangkap air dan melepaskannya secara perlahan-lahan ke sungai. Proses ini sebenarnya menghalang masalah banjir daripada menjadi teruk dan mengekalkan aliran air sungai ketika musim kemarau. Namun, penerokaan dan pembangunan kawasan hutan yang tidak terancang menyumbang kepada peningkatan bencana tersebut.
4. Dalam hal ini, dasar ini menekankan keseragaman dalam perancangan guna tanah serta pengurusan sumber air yang bukan sahaja menjamin dan memastikan kecukupan sumber air, tetapi juga sebagai langkah mitigasi banjir. Pelaksanaan strategi ini memerlukan kerjasama di antara semua jabatan/agensi Kerajaan Persekutuan dan juga kerajaan negeri.

SOALAN NO: 691

5. Sebagai langkah jangka masa panjang, antara strategi yang telah dicadangkan adalah supaya sebarang proses membuat keputusan berkaitan dengan pembangunan sesuatu kawasan mengambil kira konsep pengurusan sumber air bersepadu (*Integrated Water Resources Management* – IWRM) dan juga pengurusan lembangan sungai bersepadu (*Integrated River Basin Management* – IRBM). Pembangunan dasar ini secara tidak langsung menggalakkan penggunaan Pelan IRBM yang telah dihasilkan oleh Jabatan Pengairan dan Saliran dalam perancangan dan pembangunan di dalam kawasan lembangan sungai. Objektif penyediaan pelan IRBM antara lain bertujuan untuk mengurangkan impak kejadian banjir di dalam sesuatu lembangan sungai.

6. Penggubalan Dasar Air Negara ini juga selaras dengan Agenda Transformasi Sektor Air 2040 (*Water Sector Transformation 2040* – WST 2040) di bawah Rancangan Malaysia ke-12.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SERI HISHAMMUDDIN TUN HUSSEIN
(SEMBRONG)**

SOALAN

DATO' SERI HISHAMMUDDIN TUN HUSSEIN [SEMBRONG] minta **MENTERI PERTAHANAN** menyatakan apakah langkah yang diambil kerajaan melalui Tonggak Ketiga Strategi Pertahanan Negara, Perkongsian Berwibawa bagi menjamin keselamatan Negara dalam berhadapan dengan ketegangan keselamatan global akibat daripada persaingan kuasa-kuasa besar?

JAWAPAN

1. Perkongsian Berwibawa merupakan satu daripada tiga tonggak Strategi Pertahanan yang digariskan di dalam Kertas Putih Pertahanan yang berkuatkuasa untuk tempoh sepuluh tahun iaitu dari 2021 hingga 2030. Tujuan strategi ini adalah untuk mempertahankan Malaysia melalui pendekatan kerjasama pertahanan yang meliputi aspek pembangunan keupayaan, peningkatan kapasiti, keperluan keselamatan negara dan kestabilan serantau. Melalui strategi ini Malaysia telah mengadakan kerjasama pertahanan dua hala dan pelbagai hala dengan negara-negara jiran dan negara-negara berkepentingan yang dapat menyumbang kepada aspek-aspek di atas.

2. Kerjasama pertahanan ini melibatkan pelbagai langkah peningkatan keyakinan (*confidence building measures*) seperti mesyuarat berkala, kunjungan hormat, lawatan rasmi, pertukaran pegawai, kursus dan latihan, eksesais dan operasi ketenteraan. Untuk tahun 2023, Kementerian Pertahanan telah mengenal pasti 23 negara fokus yang melibatkan negara-negara Asia Tenggara dan negara-negara berkepentingan di luar rantau

termasuk negara-negara di Eropah dan Asia Barat. Senarai 23 negara fokus adalah seperti di **LAMPIRAN 1**.

3. Bagi kerjasama pertahanan dua hala, Kementerian dan ATM akan terus memperkukuh hubungan sedia ada dan mewujudkan hubungan baharu yang memenuhi kepentingan negara semasa dan akan datang. Malaysia telah pun mempunyai hubungan pertahanan dua hala yang kukuh dengan negara-negara jiran seperti Filipina, Indonesia dan Singapura serta negara-negara luar rantau seperti Amerika Syarikat, Australia, Republik Rakyat China dan Rusia. Malaysia kini sedang meningkatkan hubungan pertahanan dengan negara-negara seperti Jerman, Jepun, Mesir dan Turkiye bagi mendepani cabaran yang akan datang. Kerjasama dua hala ini dapat membantu Malaysia dalam menjaga kepentingan dan kedaulatan negara serta berganding bahu mengekang ancaman keselamatan yang dihadapi bersama seperti ancaman serangan siber, keganasan, rompakan di laut, *kidnap for ransom* (KFR) serta jenayah rentas sempadan seperti kegiatan penyeludupan dan pemerdagangan manusia.

4. Bagi kerjasama pertahanan pelbagai hala pula, Kementerian Pertahanan akan terus komited dan memberi sumbangan bermakna melalui platform-platform seperti *The Association of Southeast Asian Nations* (ASEAN) dan *Five Power Defence Arrangements* (FPDA). Bagi platform ASEAN, Malaysia buat masa sekarang merupakan pengerusi bersama dengan negara Republik Korea untuk *ADMM-plus Expert Working Group on Cyber Security* bagi kitaran 2021 hingga 2024. Malaysia juga sedang menjuarai inisiatif ASEAN *Cyber Defence Network* (ACDN) dan ASEAN *Military Ready Group on Humanitarian Assistance and Disaster Relief* (AMRG on HADR).

5. Manakala bagi platform FPDA pula, Malaysia akan terus memberi komitmen kepada FPDA seperti mana yang telah dizahirkan melalui Deklarasi Bersama ketika 11th FPDA *Defence Minister's Meeting* dan sambutan ke-50 Tahun FPDA yang berlangsung pada tahun 2021. Malaysia kini sedang membuat persiapan bagi pelaksanaan Eksesais Bersama Lima secara fizikal yang akan diadakan pada bulan Oktober tahun 2023.

6. Kementerian Pertahanan juga komited untuk meningkatkan kerjasama antara Indonesia, Malaysia, Singapura dan Thailand dalam *Malacca Straits Patrol* (MSP) dengan mewujudkan Mesyuarat Kuartet MSP secara berkala di peringkat Menteri-Menteri Pertahanan. Penglibatan Menteri-Menteri

Pertahanan dan pegawai tinggi Kerajaan di peringkat strategik akan membolehkan perbincangan antara negara anggota mengenai cabaran keselamatan kawasan operasi serta serantau di samping meningkatkan keberkesanan pelaksanaan aktiviti dibuat secara berkala.

7. Bagi inisiatif *Trilateral Cooperative Arrangements* (TCA) yang melibatkan Filipina, Indonesia dan Malaysia, Kementerian Pertahanan sedang berusaha untuk menginstitusikan *Trilateral Ministerial Meeting* (TMM) secara berkala bagi menyokong komunikasi yang lebih efektif, memantau keberkesanan pelaksanaan operasi, merundingkan penyelesaian bagi isu-isu yang berbangkit, memformulasikan dasar dan seterusnya menetapkan hala tuju serta meningkatkan lagi penglibatan dan komitmen antara negara anggota.

8. Kementerian Pertahanan juga akan meneruskan penglibatan di peringkat antarabangsa untuk menyumbang terhadap keamanan sejagat di bawah mandat Pertubuhan Bangsa Bangsa Bersatu (PBB). Angkatan Tentera Malaysia (ATM) akan terus mengatur gerak pasukan pengaman Malaysian Battalion (MALBATT-850) bagi misi *United Nations Interim Force in Lebanon* (UNIFIL) serta lain-lain misi di seluruh dunia. Kementerian Pertahanan komited untuk meningkatkan penglibatan anggota pengaman wanita ke dalam misi pengaman selaras dengan pelaksanaan agenda *Women, Peace and Security* (WPS) yang dipelopori oleh PBB.

9. Perkongsian berwibawa ini secara langsung menyokong kepada dasar luar Malaysia yang berkecuali dan tidak mencampuri urusan negara lain bagi menjaga imej Malaysia yang berbaik dengan semua negara dan menolak sebarang bentuk penggunaan kekerasan. Strategi ini turut menyokong konsep zon aman, bebas dan berkecuali (ZOPFAN) yang ditandatangani pada tahun 1971 demi menjaga keselamatan negara dan kestabilan serantau.

Sekian, terima kasih.

LAMPIRAN 1

23 negara fokus Kementerian Pertahanan bagi tahun 2023 meliputi negara-negara Asia Tenggara dan negara-negara berkepentingan di luar rantau seperti berikut:

- 1) Amerika Syarikat
- 2) Arab Saudi
- 3) Australia
- 4) Bangladesh
- 5) Brunei Darussalam
- 6) Republik Rakyat China
- 7) Filipina
- 8) India
- 9) Indonesia
- 10) Itali
- 11) Jepun
- 12) Jerman
- 13) Republik Korea
- 14) Kuwait
- 15) Mesir
- 16) New Zealand
- 17) Pakistan
- 18) Perancis
- 19) Rusia
- 20) Thailand
- 21) Turkiye
- 22) United Kingdom
- 23) Vietnam

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : BUKAN LISAN

**DARIPADA : DATO' SERI HISHAMMUDDIN TUN HUSSEIN
(SEMBRONG)**

SOALAN

DATO' SERI HISHAMMUDDIN TUN HUSSEIN [SEMBRONG] minta **MENTERI PERTAHANAN** menyatakan adakah kerajaan berhasrat untuk meneruskan rancangan menghidupkan semula Program Latihan Khidmat Negara 3.0?

JAWAPAN

1. Kementerian Pertahanan telahpun melaksanakan kajian terhadap pelaksanaan semula Program Latihan Khidmat Negara (PLKN) selaras dengan keperluan Akta Latihan Khidmat Negara 2003 (Akta 628), iaitu menyediakan remaja Malaysia untuk khidmat negara di bawah Akta Khidmat Negara 1952 (Akta 425). Namun demikian, pada masa ini, Kementerian tidak berhasrat untuk melaksanakan semula program ini.

Sekian, terima kasih.